

清  
實  
錄

穆宗毅皇帝實錄(三)

卷九〇至卷一二五  
同治三年

# 清實錄

第四七冊

中華書局影印



清 實 錄

(第 四 七 冊)

穆 宗 實 錄 (三)

\*

中 華 書 局 出 版

(北京王府井大街 36 號)

北京市中國書店發行

中國建築工業出版社印刷廠印刷

\*

787×1092 毫米 1/16 • 48 印張

1987 年 2 月第 1 版 1987 年 2 月北京第 1 次印刷

印數 0,001—1,500 冊

統一書號: 11018 • 1355—47 定價: 36.00 元

# 清實錄第四七冊目錄

## 穆宗毅皇帝實錄(三)

|      |         |     |
|------|---------|-----|
| 卷九〇  | 同治三年正月上 | 一   |
| 卷九一  | 同治三年正月中 | 一六  |
| 卷九二  | 同治三年正月下 | 三〇  |
| 卷九三  | 同治三年二月上 | 四五  |
| 卷九四  | 同治三年二月中 | 六三  |
| 卷九五  | 同治三年二月下 | 八四  |
| 卷九六  | 同治三年三月上 | 九三  |
| 卷九七  | 同治三年三月中 | 一二四 |
| 卷九八  | 同治三年三月下 | 一四四 |
| 卷九九  | 同治三年四月上 | 一六八 |
| 卷一〇〇 | 同治三年四月中 | 一九三 |
| 卷一〇一 | 同治三年四月下 | 二一四 |
| 卷一〇二 | 同治三年五月上 | 二三六 |
| 卷一〇三 | 同治三年五月中 | 二五七 |
| 卷一〇四 | 同治三年五月下 | 二七九 |

|      |          |     |
|------|----------|-----|
| 卷一〇五 | 同治三年六月上  | 三〇三 |
| 卷一〇六 | 同治三年六月中  | 三二二 |
| 卷一〇七 | 同治三年六月下  | 三三六 |
| 卷一〇八 | 同治三年七月上  | 三六八 |
| 卷一〇九 | 同治三年七月中  | 三九四 |
| 卷一一〇 | 同治三年七月下  | 四一六 |
| 卷一一一 | 同治三年八月上  | 四四五 |
| 卷一二二 | 同治三年八月中  | 四八〇 |
| 卷一二三 | 同治三年八月下  | 五〇二 |
| 卷一二四 | 同治三年九月上  | 五二九 |
| 卷一二五 | 同治三年九月中  | 五五〇 |
| 卷一二六 | 同治三年九月下  | 五七〇 |
| 卷一二七 | 同治三年十月上  | 五八五 |
| 卷一二八 | 同治三年十月中  | 六〇三 |
| 卷一二九 | 同治三年十月下  | 六二四 |
| 卷一三〇 | 同治三年十一月上 | 六四四 |
| 卷一二一 | 同治三年十一月下 | 六六〇 |
| 卷一二二 | 同治三年十二月上 | 六七三 |
| 卷一二三 | 同治三年十二月下 | 六九六 |

穆宗實錄

卷一二四

同治三年十二月中

七二八

卷一二五

同治三年十二月下

七四三



監奏事官等尋游起程進京太子太傅文淵閣閣學給事中徐宗魯等奏請將來京略習禮儀武藝諸生大學士等議大行皇帝孫孫山嗣位  
理學祭事等戶部主事等知加七級軍功加五級禮部知七級祀祭十二次奏育學士楊雲龍等請旨太子少保文淵閣閣學體仁閣學士袁汝清等  
正人等滿洲總管理二部光祿寺事務內大臣額駙公軍功加一級禮部知六級祀祭十七次主宗室長壽等奏請旨禮部主事太子太傅徐林等奏  
學府等奏主事等奉國文苑總纂長等奏請將光祿寺主事等職大臣等原軍管理戶部主事等請旨太子少保等知九級軍功加五級禮部  
知九級祀祭十九次主沈桂芬等奏請將禮部主事等職大臣等原軍管理戶部主事等請旨太子少保等知九級軍功加五級禮部主事

同治三年甲子春正月癸卯朔

奉先殿行禮○遣官祭

太廟後殿○率王以下文武大臣詣

慈寧門慶賀

慈安皇太后○

慈禧皇太后○禮成○御太和殿受朝○作樂宣表如

儀  
○  
詣

大高殿

壽皇殿行禮○甲辰○

上詣綏履殿問

慈安皇太后安平安安室問

慈禧皇太后安。至辛未皆如之。○諭內閣前因

翰林院侍讀學士孫鏘鳴奏前署温州府知

府黃維誥等縱匪殃民各款諭令左宗棠查

明具奏。茲據奏稱查明原叅黃維誥等釀成

會匪之變一節係由瑞安林垵牙戶李子榮

與富戶陳安瀾挾嫌喉前倉匪寅折毀陳安

瀾房屋時孫鏘鳴在籍辦理團練自募勇丁

赴平陽將前倉房屋燒毀該處匪黨旋圖報

復聞孫鏘鳴有赴府城之信。卽闌入府城。經

署永嘉縣知縣陳寶善當卽擊散厥後會匪

攻温州者兩次。攻瑞安者月餘。均由黃維誥

陳寶善孫杰設法守禦幸未被陷會匪激變

之由實由紳團孟浪所致原叅知府周開錫

試辦鹽釐。陳寶善勸其以殺立威一節。上年

春間周開錫赴溫州府知府任時曾令試辦

鹽釐輔以官運。永嘉所轄溫溪地方私販播

一蓬流言。果匪姚繼富。糾眾攔搶鹽船。連毀青田處州釐卡。周開錫委陳寶善會同遊擊謝復雲前往處州。將姚繼富緝獲。訊明正法。餘均弗問。所稱捕得一人。卽時斬首。當卽指此陳寶善並無力勸用威之事。原叅已革署平陽縣知縣蘇全策與現署平陽縣知縣余麗元等勒捐索賄一節。溫屬之永嘉瑞安平陽於咸豐十一年逆匪滋事時。該局紳雇募台勇。議由各該紳富捐輸雇價。官不與聞。嗣該紳富無以為償。則書欠券。派各戶捐輸彌補。周開錫之令蘇全策同余麗元經理此案捐輸。不過因蘇全策為當時在事之人。責令設法了結。至蔡懋貞徧查捐局。並無其人。蘇全策實非以留算交代為名。仍辦平陽捐務。亦無與余麗元等帶同會匪蔡懋貞四出勒捐情事。原叅瑞安雙穗場鹽大使程泰森設立鹽局。以入會通匪鄉里不齒之捐納知縣沈漢澗在局幫辦一節。程泰森卽開化縣丞程

泰新之訛。上年曾委該員訪察甌鹽利病。委署雙穗場鹽大使。因辦理苛細。不洽輿情。業經撤委。其沈漢澗一員。向在瑞安與孫鏘鳴等同辦團事。因言語迂觸。致成嫌隙。其曾否入會通匪。無從查悉。該紳所辦。係海防局務。至置船募勇之事。係歸總兵黃載清管理。沈漢澗實無幫辦鹽局自設募船之事。黃維詰一員。居官廉謹。其操守尚屬可信。以上各情。有經元年春間。二年夏間。孫鏘鳴函請查辦者。及逐一密查。與所言迥異。未敢稍有徇飾等語。黃維詰等被叅各款。既據該督查無其事。孫鏘鳴所奏著毋庸議。朝廷勤求民瘼。言路宏開。外省各地方官。如果辦理不善。原准例應奏事之員。列款入告。從未徧持成見。不為查辦。乃孫鏘鳴在局辦團激變。輒行謾過於地方官。以縱匪釀亂等情。飾詞陳奏。若非左宗棠深知黃維詰陳寶善官聲尚好。幾至為該侍讀學士所誣。且因沈漢澗言語迂觸。

卽指為通匪。始則函屬左宗棠查辦。因所言不行。復捏詞入告。該侍讀學士以在籍久經辦團。疊選運糧之員。宜如何公正。為懷力圖報效。今據所奏各情。是其徇私挾嫌。居心實屬險詐。孫鐸鳴著卽勒令休致。○諭議政王軍機大臣等。左宗棠奏。攻勦餘杭。踞賊獲勝。及覆陳籌辦大畧情形。李鴻章奏。常州擊退援賊。立解奔牛。重圍等各摺片。奔牛一鎮。為鎮常衝要。李秀城李侍賢等巨酋。方以死力

護金陵。老巢後路糾集大股。圍困唐殿魁等新營。並用輪船炸礮。力爭其地。官軍以少禦眾。勢頗危險。竟能力解重圍。焚其輪船。所辦尚好。李鴻章既據曾國荃函會。李秀城由金陵出向句容而去。又獲賊供。圍奔牛時。李秀城卽在其內。此時賊猶恃其狡悍。必欲爭此要衝。以為竄走之路。李鴻章現飭李鶴章劉銘傳等。相機圍攻常城。並防忠逆回援。著卽妥籌兼顧。左宗棠所部黃少春等軍。攻勦餘

杭。踞逆東西北路均破。疊獲勝。蔣益澧攻杭一軍。分紮錢塘等門。復進攻清泰門外之觀音堂賊壘。水陸進逼。杭屬平湖乍浦海鹽之賊。俱已投誠。海甯州賊亦有獻城之說。杭賊勢孤。左宗棠已進駐橫溪頭。督勦餘杭。與蔣益澧攻杭之師。必須有一先下。嘉湖乃可次第肅清。卽著督令所部迅圖攻取。該督以賊中狡悍。惟餘李秀城李侍賢同惡相濟。所當併力亟圖。現在蘇州已克。金陵杭州均圍攻

緊急。賊勢必以皖浙為逃遁之路。廣德撫局未成。曾國藩所部不數分兵進勦。左宗棠留王開琳一軍。仍駐徽州屯溪鎮。究恐力薄勢單。如李秀城果挾洪逆由此路突出。恐不足資扼截。而現在句溧一帶。賊踞甚堅。溧陽更為賊之眷屬。輜重所在。李秀城李侍賢復併力於此。官軍獨唐殿魁等各營。僅守奔牛一鎮。頗覺空虚。曾國藩左宗棠等老謀。均不急求旦夕之功。而欲併力聚殲。使賊不得銳走。



所見本同。卽李鴻章疊克蘇錫各城。此次與賊力爭奔牛。亦必能識此意。惟常州攻擣勢在垂克。恐未能復令各軍舍而他圖。常賊雖不耐戰而守亦頗堅。若不速籌攻克。保無別生枝節。李鴻章諒有成竹在胸。在宗棠此奏。謂曾國藩亟應分兵以取廣德。力顧東壩。與浙師聯絡。李鴻章亟應由無錫攻宜溧。使賊不至由此路鉞走。自屬確有所見。著曾國藩左宗棠李鴻章沈葆楨悉心商酌。謀出萬全。

為東南半壁一勞永逸之計。江省之防。據左宗棠奏。以嚴扼昌江。力保上游為主。昌江係屬何水。著沈葆楨嚴密布置。與皖境浙師相為策應。並遵前旨。將饒信兩防各軍。妥為調度。豫籌堵截。奔牛降人。前據李鴻章奏。係邵小雙此次所保之邵之倫。請賞加遊擊銜。是否卽係其人。現在該處守禦緊要。該降人等是否出力可靠。著李鴻章查明具奏。將此由六百里各諭令知之。○以江蘇奔牛鎮解圍。

賞總兵官文茂林。副將黃桂蘭。參將周蘭亭。已圖魯名號。餘加銜升敘有差。○以浙江官軍赴援安徽。江西出力。賞遊擊李國良。知州楊詠春等花翎。守備蔣長春等藍翎。餘加銜升敘開復有差。○緩徵直隸開。東明。長垣。豐潤。武清。冀甯。河東。安。安肅。完。東。鹿。天津。青。靜。海。滄。南。皮。鹽。山。鉅。鹿。大名。懷。來。玉。田。衡水。甯。晉。深。二十四州縣被水被旱被雹被蟲地方。新舊額賦。暨雜課有差。○緩徵江蘇山陽。阜甯。清河。桃源。鹽城。高郵。泰。東。臺。甘泉。興化。寶應。銅山。豐。沛。蕭。陽。山。邳。宿遷。睢甯。海。沭。陽。贛。榆。泰。興。二十三州縣被水被旱地方。漕糧。暨折色銀兩。○緩徵江蘇山陽。阜甯。清河。桃源。安東。鹽城。高郵。泰。東。臺。江都。甘泉。興化。寶應。銅山。豐。沛。蕭。陽。山。邳。宿遷。睢甯。海。沭。陽。贛。榆。通。泰。興。海門。靖江。二十八州廳縣。暨淮安。大河。揚州。徐州。四衛被水被旱被兵地方。新舊額賦。租課有差。○蠲緩江蘇長洲。元和。吳江。

晏震澤武進陽湖無錫金匱江陰宜興荆溪  
丹徒丹陽金壇溧陽華亭嘉興青浦寶山常熟  
昭文崑山新陽太湖金山太倉鎮洋嘉定奉  
賢南匯川沙上海三十三州廳縣暨蘇州太  
倉鎮海金山鎮江五衛被擾地方舊欠額賦  
漕糧有差○乙巳

高宗純皇帝忌辰遣官祭

裕陵

上詣

壽皇殿行禮○諭議政王軍機大臣等前因滿  
慶恩慶奏稱呼徵捏詞誣控並勒辦瞻對及  
委員妄稟等各摺片當經諭令滿慶等以呼  
徵控訴各語萬難憑信令其傳知李玉圃迅  
速赴京質對並曉諭明正土司安站通道糧  
員嚴清榮撤回川省查辦矣呼徵失察堪布  
剋扣布施不能秉公辦理致令藏中滋事斷  
難復令回藏所控情節亦難憑信汪曲結布  
既為藏中僧俗所服即著滿慶等責令協同

達賴喇嘛掌辦藏務令其撫輯僧俗務使各  
寺相安永息爭端不准區分黨類恃強陵弱  
再行滋事儻能全藏底定尚當破格加恩所  
有呼徵前控各情並著無庸查辦此係朝廷  
為安輯全藏起見特降此旨即著滿慶等傳  
諭汪曲結布知悉令其益知感激倍加奮勉  
前據賂東章奏瞻對匪眾現已回巢此時所  
調藏兵自無庸再行進剿以省兵力而示體  
恤著滿慶即將此項兵丁撤回仍歸藏地本

境毋庸越境會剿並著崇實賂東章飭令史  
致康派撥兵丁查拏夾壩以次疏通驛路前  
據滿慶等奏稱李玉圃在川候補十年未得  
署缺並聲敘該員勞績請破格錄用當以該  
員現辦軍務俟有成效再行奏獎現在瞻對  
既無須進剿著滿慶等即將該員前次勞績  
查明會同崇實賂東章福濟景紋保奏令其  
赴川由賂東章送部引見並由賂東章察看  
該員才具酌量委用其嚴清榮被參之案即

著福濟等將該員撤回內地查辦其明正等土司仍由滿慶等曉諭令其照常安設驛站。噶微事現在雖可無庸查辦。噶對土匪回巢能否與明正等土司日久相安及洋人傳教能否阻止各節事關緊要。福濟曾任封疆辦理較滿慶等更當老練。福濟到藏後即幫同景紋將該處實在情形辦理。一面迅速奏聞其福濟行止著俟藏務辦竣後再行請旨。滿慶本係任滿赴京人員著仍遵前旨起程回京。福濟等仍遵前旨迅速赴藏毋稍延緩。將此由六百里各諭令知之。○又諭崇實賂秉章奏密陳西藏情形請權宜辦理一摺據稱滿慶李玉圖汪曲結布互相固結李玉圖慫恿滿慶蒙混具奏以汪曲結布掌辦藏務復奏請將李玉圖破格錄用汪曲結布奏書中復力剖滿慶李玉圖之冤並滿慶李玉圖藉瞻對天主教為名種種欺詐要挾請暫籌權宜辦理等語。滿慶等挾私懷詐把持藏務已

成固結難解之勢非權宜辦理不足以釋藏中之疑而離其勢本日已照所請寄諭滿慶等辦理矣。滿慶等寄諭內仍將崇實賂秉章福濟景紋四人銜名敘入以釋滿慶等疑慮著崇實等催令滿慶李玉圖迅即來京並曉諭汪曲結布令其撫輯僧俗毋令再生事端。儘能全藏底定尚當破格加恩俾免疑懼仍曉以前次加恩係出自特旨非由滿慶等奏請以散其固結之心一面催令李玉圖迅速來京催滿慶等到川再將李玉圖押解赴京。羅勒拏於道光年間既已入藏彼時未經藏中驅逐此時弛禁之後藏中僧俗未必即至驚疑滿慶等前奏藏中因洋人傳教人心惶惑是否實在情形著福濟景紋於到藏後查明酌辦噶對土匪前已回巢且係滿慶李玉圖藉勒辦該土司為名虛詞恫喝為要挾固結之謀即著福濟等飛速行文將滿慶等前調藏兵撤回毋庸越境會剿以弭邊釁仍著



駱秉章等飭令史致康督令派出阜和協兵五百名紮駐河口。查拏夾壩並曉諭明正裏塘各土司照常安設驛站以期疏通道路。惟藏中正當多事之秋此時福濟等赴藏勢更難緩且滿慶等既可由藏來川福濟景紋何獨不可由川赴藏著仍懷遵前旨卽速由川起程馳赴西藏認真查辦毋得藉詞推諉致干重咎。至李玉圃詭譎異常未必肯卽行來京質對案情前據滿慶等奏稱該員自到川以來候補十有餘年在口外苦累未得一署本缺懇請破格錄用等語是其志在躁進亟圖回川署缺早已情見乎詞此次寄諭滿慶等令其會同駱秉章等查明李玉圃勞績保奏請獎駱秉章等正可行文滿慶會商酌保一面將李玉圃檄調回省令其署缺俾該員有所欣羨迅速回川以絕藏中勾結煽惑之端亦係權宜一法總之藏中之治亂惟以福濟景紋到藏之遲速為斷如果能迅速赴藏

俾滿慶等及早交卸則李玉圃自無所用其煽惑福濟景紋當識此意趕緊由川起程不得一味畏憚致誤大局至福濟此次赴藏仍當以幫同景紋專助瞻對為詞以釋滿慶等疑懼俟到藏後仍將呼微等一案暗中查明據實具奏此次寄諭崇實等當加意慎密卽將來覆奏時繕寫摺件之人亦當慎擇毋令稍有宣露將此由六百里各諭令知之○又諭據崇實等奏遵旨設法查提田興恕密陳各情並據總理各國事務衙門將駱秉章所致信函呈覽所稱田興恕在松桃一帶路途既有阻塞蹤跡亦無定向意欲總理衙門再與柏爾德密酌議先將田興恕罪名令貴州擬定迅速奏結一面將其提解遣戍等語所慮不為不周惟此事前據總理衙門密片陳奏柏爾德密意稍活動時卽乘機告以將該革員發往新疆不准援免卽可立結自可毋庸監禁以免稽遲而該公使覆稱拏問一節

已告知本國。此時拏問之人。並未監禁。卽拏問亦恐不實。必須監禁後。給予照會。以便寄知本國。卽可辨結。是該將軍等設想所及。卽總理衙門所業經商辦之事。田興恕情罪重大。該公使應允。僅止監禁遣戍完案。實屬萬不可失之機會。今拖延日久。再與饒舌。彼必仍以礙難告知本國為詞。且恐謂中國盡屬虛言誑誘。乘機生釁。頓翻前議。屆時該將軍等尚欲顧全國體人心。不知又將何所措手。

也。著崇實、駱秉章、懷遵上年十月二十四日密寄諭旨。迅速設法。將田興恕查提到省。或卽照駱秉章此次函內所擬。選其平素相信之人。前往查提。先使之釋然不疑。迨入川後。卽行羈禁。一面迅速奏聞。卽可明降諭旨。宣示完結此案。川黔兩省教民。咸使聞知。當無異議。此事關繫至重。崇實、駱秉章切不可稍存推諉之見。再延時日。致誤全局。懷之。將此由六百里密諭知之。○丙午。諭議政王軍機

大臣等。多隆阿奏。彙報各路軍務。現籌攻勦情形一摺。據稱。盤屋城內。油鹽缺乏。逆勢十分窮蹙。適值大雪積深。師人多凍。必少需時。日方能相機勦辦。准劉蓉來咨。青石關諸軍。以糧運不繼。退扼川疆。青石關各隘。已為賊踞。多隆阿擬俟藍逆殲除。卽當全軍致討。而陳大禧、張總愚股匪。分擾南陽屬境。潼關應須嚴防。各營不敷分布。請仍調石青吉等七營來陝等語。藍匪賊糧乏絕。已如釜魚。併獸該將軍病已漸痊。著俟積雪消融。卽督飭穆圖善等實力進攻。務將藍逆全股一律殲除。以便移兵漢南。與劉蓉會師進剿。前據劉蓉奏。川援各軍。分駐青石關、梅子壩一帶。屢次獲勝。賊亦不復來犯。惟因地勢高峻。冰霰堅凝。糧運不繼。不得已退紮西河口等處。賊亦退駐新集、油坊街老巢。未言賊踞青石關要隘。或我兵既退之後。賊匪乘虛踞險。連日情形若何。如何進兵奪隘之處。著劉蓉妥籌進

紮相度機宜。迅速馳奏。商南股匪竄至山陽。鄖西交界之漫川關。著官文、嚴樹森、嚴飭梁作楫一軍。會同李雲麟所派兩營。分路夾擊。不准再有蔓延。多隆阿因兵力不敷。分佈請調石清吉等七營赴陝。著官文等速飭石清吉等七營兼程赴陝。以資攻剿。陳大澐等股分擾南陽屬境。潼關為全陝門戶。該將軍必須派兵嚴防。毋稍疏失。陶茂林一軍前據雷正綰奏。接其來函。有准於十四日到汧之語。

已諭雷正綰督軍與陶茂林前後夾擊。將汧隴及靈臺崇信之賊痛加勦洗。茲據多隆阿奏。鳳翔回民乞撫。已為頒發告條。飭總兵慶瑞前往會同分別辦理。陶茂林一軍俟將撫局辦理妥協。並將鳳翔北山零匪搭捕淨盡。再飭拔隊由汧隴取道進攻。是陶茂林十四日到汧之語。又成畫餅。該提督前此奮勇解圍。是以特加擢用。宜如何勉力殺賊。藉圖報稱。乃自議撫以後。時已數月。未聞著有成效。

恐為回匪所愚。藉作緩兵之計。鳳翔固守十數月之功。未可敗於垂成。多隆阿既派慶瑞前往會同辦理。即著嚴飭陶茂林等妥為籌辦。若復稍留後患。必惟陶茂林等是問。決不寬貸。俟辦有頭緒。即應迅赴汧隴會剿。甘肅待援孔亟。多隆阿務飭陶茂林趕緊前進。毋稍膜視。麟遊北山一帶之賊。催令曹克忠認真勦洗。山東勇丁赴定邊防剿。俟到陝後。由該將軍另揀得力將弁前往統帶。將此由六

百里各諭令知之。○以江蘇興化縣捐輸軍餉。永廣學額四名。○以湖北捐輸團練。永廣通山縣學額七名。廣濟縣五名。○緩徵山東臨清厯城。長山。齊河。禹城。長清。平原。泰安。東平。東阿。平陰。惠民。陽信。樂陵。濱。霑。化。鄒。滕。陽穀。荷澤。定陶。鉅野。濮。朝城。費。聊城。堂邑。在平。革。冠。館陶。高唐。昌樂。安邱。夏津。金鄉。嘉祥。濟甯。章邱。淄川。齊東。濟陽。臨邑。陵。肥城。海豐。利津。蒲臺。曲阜。泗水。嶧。壽張。單。城。武。曹。鄆。城。范。



蘭山。邦城。沂水。日照。博平。清平。恩。益。都。臨。淄。諸城。邱。魚。臺。樂安。七十州縣。暨德州。東昌。臨清。濟甯。四衛。東平所屯莊被災被擾地方。本年上忙額賦暨漕河倉課有差。○丁未。命四川按察使牛樹梅來京。以廣東鹽運使蔣志章為四川按察使。○戊申。諭議政王軍機大臣等。曾國藩奏陳近日軍情一摺。日前據左宗棠奏。賊中李秀城。李侍賢二酋最為狡悍。屢欲挾洪逆出走。恐由句容。溧陽。廣德一帶圖竄。與李鴻章奏。官軍與賊力爭奔牛要衝。李秀城現在句溧一帶。併力抗拒等情。正相符合。左宗棠謂曾國藩所部亟應分兵以取廣德。力顧東壩。與浙師聯絡。李鴻章應由無錫攻宜溧。防賊由此竄走。當經寄諭曾國藩。左宗棠。李鴻章。沈葆楨。悉心商酌。謀出萬全。以期同心合力。迅奏膚公。茲據曾國藩所奏。忠侍二逆。既不能各保分地。又不欲苦援金陵。非自皖以入江。別無圖存之策。計從廣德。

上竄江西。約有兩路。西由旌德。太平。石埭。以竄饒景。東由昌化。淳安。開化。以竄玉山。其西路之防。曾國藩已派兵堅守。涇旌。石太。青池。六城。東路之防。必由浙境經過。亦已分咨左宗棠。沈葆楨。分別扼守。以期節節堵遏等語。與前左宗棠所奏。仍是一事。東南事勢。方當得手。尤應防賊出竄。致成不了之局。疊據曾國藩。左宗棠等所奏。謀畫均屬相同。惟西路甯池太屬。曾國藩分兵駐守。自足以遏賊衝。而東路徽屬。據左宗棠前奏。本有王開琳一軍駐屯溪鎮。力薄勢單。恐不足資扼截之語。浙軍此時進攻杭州。餘杭二城。徽境之防。是否尚能增兵。廣德撫局未成。辦理究竟如何。曾國藩所部。能否分兵力取此城。以與浙師聯絡。朝廷不能遙度。諒該督等同矢公忠。必能共籌大局。以保萬全也。金陵賊氣尚固。糧食未盡。仍當飭令曾國荃。力求穩慎。相機攻取。毋徒急求旦夕之功。李鴻章前奏常州攻。

勦勢在垂克。如果賊以全力併由句漂一路突竄。該撫亦當豫籌兼顧。分飭諸軍緊蹙力追。使賊不得善脫。與徽甯各防之軍奮力夾擊。江省饒信兩防沈葆楨等之有素。此時更當嚴密布置。著卽懷遵疊次諭旨。妥為調度。毋稍疏虞。皖北漸就肅清。壽六一帶。毛有銘蔣凝學等各軍。當可別資分撥。能否調赴皖南。分投防勦之處。並著曾國藩妥為籌和。皖北善後。正當緊要。喬松年身任封圻。責無旁貸。前據袁保恒陳奏數條。不為無見。著鈔給曾國藩喬松年閱看。所言是否可行。抑應如何酌量辦理。卽著該督撫隨時妥籌具奏。將此由六百里各諭令知之。○以江南水師克復九洲洲出力。賞總兵官汪得元。丁際盛。言秀林。尹坤山。彭昌禧。副將歐陽森茂。羅芝雲。賓得桂。王金楷。趙俊秀。朱興亨。許鼎臣。參將易朝貴。張得勝。劉取仁。巴圖魯名號。遊擊龍意發等花翎。府經歷邱式漢等藍翎。餘加銜。

升敘有差。○

上以上辛祈穀於

上帝。自是日始齋戒三日。○己酉。

世祖章皇帝忌辰。遣官祭

孝陵。○諭議政王軍機大臣等。恩夔奏。青州德

州俸餉馬乾久缺。馬匹缺額。無從買補。一摺。

青州德州營馬缺額。至數百匹之多。向賴馬

乾以資買補。若復拖延不解。致令兵丁飢寒。

馬匹疲瘵。缺額久懸。於操防殊有關係。著閻

敬銘迅飭山東藩司。將各該營官兵連年俸

餉馬乾等項銀兩。速卽寬為補解。不准再事

宕延。恩夔於收到此項餉銀時。卽將馬政妥

為整頓。務期一律騰壯足額。毋誤差操。是為

至要。將此各諭令知之。○

上以孟春時事

太廟自是日始齋戒三日。○庚戌。諭內閣。慶春

奏。山海關駐防兵丁。應領同治二年欠放。未

石。管糧通判慶恩。定於上年十二月二十九

日午刻開放甲兵雅薩布等於是日早晨聚集二百餘人擅入通判衙署索米經慶春派令協領和盛阿等前往解散該通判隨將同治二年欠放米石當日全數開放請將聚眾索米之甲兵解交刑部治罪並請將該協領等議處暨自請議處等語山海關駐防兵丁於應領欠放米石膽敢聚集多人徑赴通判衙署索米此等刁風實屬可惡著慶春將首先滋事之甲兵雅薩布等十一名解交刑部審明治罪惟據慶春聲稱定於二十九日散放米石何以該兵丁等仍不肯靜候散放徑入通判衙署滋鬧該通判有無抑勒侵蝕情弊並著刑部一併查訊照例定擬其管轄不嚴之左翼協領兼佐領和盛阿右翼協領兼佐領伊克經額佐領德存順齡和明阿慶年佛爾國春扎普善均著交部照例議處慶春失於覺察著一併交部議處尋議慶春應罰俸一年准其抵銷從之○又諭官文等奏請

將隨營效力之逃配流犯免罪等語已革黑龍江披甲托佛洪阿於咸豐五年聽從舒凌阿行竊庫銀案內審擬杖流在配脫逃改名金玉投效湖北軍營本有應得之罪惟念該犯在營七年疊次打仗出力尚屬奮勇所有托佛洪阿原犯杖流及在配脫逃罪名著一併寬免仍責令隨隊勦賊以觀後效○諭議政王軍機大臣等內務府戶部奏遵議毛鴻賓等奏粵海關例解廣儲司公用銀兩力難批解請於各海關均勻分解一摺廣儲司公用銀三十萬兩例由粵海關按季批解未便率改舊章且各關撥款亦屬繁多若再令添解鉅款勢必藉詞推諉於要需毫無實際著照該衙門所議該關欠解二年京餉銀十萬兩仍著照舊報解其陳欠京餉銀四十萬兩著准其暫緩籌解其應解廣儲司公用銀兩仍著如數解交內務府兌收以重庫款經此次曲加體恤毛鴻賓郭嵩壽毓清務當認真

籌款陸續起解。不准藉端拖延。亦不准飾詞  
瀆請。儻敢再行延宕。定卽從嚴懲處。將由由  
五百里諭知毛鴻賓。郭嵩燾。並傳諭毓清。知  
之。○又諭。官文。嚴樹森。奏。鄂省。鄂襄。隨。東。軍  
務緊急。驟難派兵赴豫。並籌調征皖楚軍。回  
鄂。以資援剿。一摺。另片。奏。藍逆竄踞。鄖縣。所  
屬之趙家川。攻撲鄖西縣屬之城牆。垓等處。  
要隘。均經官軍團勇。先後擊退等語。髮逆藍  
二順。已由商南竄繞鄖境。擒匪陳大禧。餘黨

陳老陽等。亦由信陽竄入隨州之小林店等  
處。數皆逾萬。而苗黨漏網之苗添聲。復有糾  
合宋景詩。潰匪。圖竄孝感之信。鄂省西北邊  
境。警報頻仍。官文等。以眾寇環聚。鄂疆。兵勇  
不敷分布。將駐皖之成大吉。石清吉。兩軍。調  
回援剿。自是先其所急。惟隨。東。德安。一帶。現  
有總兵楊朝林。趙克彰。各營。及烏勒喜布等  
馬隊。前往防剿。總兵王桐柏。周鳳山。各率所  
部。扼紮於隨州之馬平港。黃陂縣之九子墩。

等處。今復益以成大吉。石清吉。兩支勁旅。兵  
力不為不厚。該大臣等。以賊蹤散漫。道路紛  
歧。尚宜以靜待動。固屬老成持重之見。然籌  
防不如進剿。近守不若遠攻。著卽激勵諸軍。  
鼓勇前進。迅將竄入小林店之陳老陽等股  
匪。剋日殲除。如苗添聲。糾合苗黨南竄。亦當  
嚴飭各將領。迎頭截剿。毋令闖入楚疆。一俟  
楚北軍務稍鬆。卽恪遵前旨。飛調石清吉七  
營。星速赴陝。交多隆阿調遣。以拯漢南之急。

該大臣等。素顧大局。諒能妥籌援剿。毋誤事  
機。鄖屬官軍。疊經獲勝。近復添調唐協和。助  
剿。並著檄飭道員梁作楫等。督率各營。將趙  
家川踞匪。剿滅。肅清疆圉。其張總愚一股。業  
由內鄉竄往南召。魯山一帶。賊蹤去楚較遠。  
楚軍自未便深入會剿。著張之萬。速飭張曜。  
奮力進攻。若能將盤踞山中之賊。聚而殲旃。  
固屬妥善。否則。偏令出險。俾蘇克金馬隊。得  
以盡其所長。亦不難於撲滅。該撫務將此股

竄匪就地殄除。毋再貽患鄰封。致干重咎。將此由六百里各諭令知之。○又諭慶昫等奏防禦乘閒詐賊。請旨辦理。並送回攻犯滿城。近日情形各摺片。甯夏步營防禦佛爾國春。於送回攻犯滿城。眾鋪民上城協守之時。膽敢向開碾房之周輔訛索制錢六串餘文。實屬目無法紀。若不嚴行懲辦。無以儆貪墨而固人心。佛爾國春著即於軍前正法。以昭炯戒。慶昫等仍即曉諭眾民戶一體上城協守。毋稍疏懈。另片奏送回攻犯滿城情形。近日尤甚。日夜前來附近城垣之四面村莊焚掠。意在不留民戶。以斷糧米柴薪之路。城頭槍礮擊倒賊匪多名。惟官兵窮餓。力有難支。日望援兵協餉到來。共保危城。近五十日未得省城信息。深以糧缺為慮。等語。甯夏滿城情形危急萬分。必得援兵協餉早到。方獲安全。著熙麟恩麟。懷遵前旨。設法接濟。英桂前奏報解甘餉三十萬兩。如已行抵慶陽。即著熙麟設法勻撥協濟。其應需軍火等項。並著熙麟一併解濟。委員探明路徑。解赴甯夏滿城。如有可以抽調兵勇。並著趕緊調派。迅解甯夏之圍。並通省城驛路。毋稍忽視。訥欽一軍。由歸綏一路赴甘。現已行抵何處。即著兼程前進。力圖救援。甯夏毋得稍事耽延。致干咎戾。慶昫等仍就現有兵力。激勵軍民。設法守禦。並飛催各處援兵協餉。以期共濟艱難。是為至要。將此由六百里諭知慶昫。常璩。熙麟。訥欽。並傳諭恩麟知之。○以理藩院尚書存誠兼總管內務府大臣。○以鑲藍旗蒙古都統世鐸暫署鑲黃旗蒙古都統。正藍旗滿洲副都統綿宜暫署正黃旗護軍統領。鑲白旗蒙古副都統福鈴暫署正黃旗蒙古副都統。○辛亥。祈穀於上帝。遣恭親王奕訢恭代行禮。○上以孟春時太廟前期親詣行禮。○諭議政王軍機大臣等

熙麟奏請撥京局火藥並請將發遣之張維義留營效力及阿揚阿等嚴辦不法哨官甚合機宜懇請獎擢各摺片甘肅軍營兵勇雲集日需火藥甚多若不亟為籌濟設有缺乏所聞非細除熙麟所請飭撥京局火藥業經諭令工部迅速籌撥外其山西欠解之火藥五萬斤著沈桂芬設法籌辦飛速解甘以利攻勦張維義既據熙麟奏稱帶隊尚屬出力著准其暫緩發遣留營效力俟軍務告竣再行起解哨官王敬國帶勇滋事大干法紀副將阿揚阿等將其正法辦理尚合機宜惟均係分內應辦之事宜可遽予獎擢所有阿揚阿將徵陶出力之處即由熙麟自行獎勵熙麟另片奏保鏽防守勦捐出力請獎等語保鏽原奏處分已准其開復所請賞戴花翎之處未免過優著毋庸議將此由五百里各諭令知之○予陝西底店被戕團總馮元佐祭葬世職如都司例○壬子享

太廟遣醇郡王奕譞恭代行禮○遣官祭太廟後殿○遣官祭

太歲之神○

上詣

時應宮拈香○御紫光閣賜蒙古王貝子額駙暨呼圖克圖朝鮮使臣等宴並賞賚有差○命喀喇沁頭等台吉旺都特那木濟勒阿巴哈納爾二等台吉多特諾爾多在乾清門行走賞喀爾喀頭等台吉密濟特多爾濟蘇

尼特頭等台吉綽克蘇倫茂明安頭等台吉達拉木濟里迪扎魯特二等台吉色倭英保花翎○賞科爾沁圖謝圖親王巴寶多爾濟紫纓

大清穆宗繼天開運受中居正保大定功聖智  
誠孝信敏恭寬毅皇帝實錄卷之九十

實錄卷之九十

三

大清穆宗繼天開運受中居正保大定功聖智

誠孝信敏恭寬毅皇帝實錄卷之九十一

敘

同治三年甲子正月癸丑

孝全成皇后忌辰遣官祭

慕陵○以神靈助順頒陝西蒲城縣

東嶽廟扁額曰威鎮重泉

城隍廟扁額曰蒲津保障○諭內閣前據耀

安奏參職員謀缺許賄請嚴行審辦一摺當

經降旨將候補副千總錫田暫行革職交麒

慶審辦續據麒慶奏稱錫田供詞內有耀安

長子景福曾兩次帶同逃兵幅才找向錫田

面許代為謀缺並向索謝禮幅才投首後所



供情節大略相同。復經諭令麒慶認真嚴訊。茲據耀安奏稱麒慶審辦此案。有偏袒錫田。並授意捕役。勒令幅才投首。任其狡展。刑偏韓喜等。令其承認。往找錫田等情。案關職官行賄謀缺。麒慶審辦此案。有無偏見。非徹底根究。不足以成信讞。而儆官邪。著麒慶即將此案一千人證迅速解京。交刑部嚴行審訊。尋刑部奏遵訊。景福指稱買缺誑騙錫田屬實。麒慶審辦此案。並無偏袒。耀安因幅才在

逃多日。忽行投首。疑為麒慶授意捕役誘令到案。所奏未為無因。惟於伊子指官撞騙。雖非知情徇庇。究未能先事覺察。請交部議處從之。○諭議政王軍機大臣等。前因劉蓉奏酌定援軍餉額。諭令張集馨每月撥銀二萬兩。解赴劉蓉軍營。茲據張集馨奏稱。准劉蓉劄飭每月撥銀二萬兩。查有湖南先後奉旨飭協陝省餉銀十五萬兩。經前撫臣委道員唐李杜前往催提。昨准楚省來咨。將墊發勇

糧銀二千餘兩。歸入協餉內扣算。其餘分釐未解。請飭湖南撫臣將應撥協餉徑解劉蓉行營等語。漢南軍情緊要。劉蓉現籌分路進剿。需餉甚亟。若不速籌接濟。勢必貽誤戎機。著惲世臨將先後派定協餉如數籌撥。陸續徑解劉蓉軍營。劉蓉辦理陝西軍務。張集馨由陝省協濟餉需。實屬分所當然。豈可盡行諉諸他省。轉致置身事外。著張集馨仍遵前旨。督率藩司迅速籌款。每月撥銀二萬兩解

赴劉蓉軍營。毋再遲延推諉。將此由五百里諭知惲世臨。劉蓉並傳諭張集馨知之。○甲寅。諭議政王軍機大臣等。張之萬毛昶熙奏攻克鮑寨。並擊剿張逆獲勝。攻拔息縣。擒巢擒斬鄔大年。副將孫之友被戕。各摺。鮑寨雖已攻克。而匪首王廷幹受創奔竄。尚未殲斃。其賊寨究在何處。亦未據該撫等聲明。著張之萬毛昶熙查明具奏。並即督飭各軍乘勝進攻。談圍將汝郡各匪巢穴次第肅清。王廷

幹係著名匪首。必須設法將其擒擒。攻毀其巢。毋留餘孽。前據官文等奏。張總愚股匪。由內鄉竄往南召魯山一帶。浙川已無匪蹤。茲據張之萬等奏。張逆避兵喙伏。上年十二月二十二十一等日。道員葛承霖等引軍出趙家莊。將出山口。賊衆來撲。勢甚兇猛。副將王有明等力戰陣亡。葛承霖率軍截擊。斬賊甚夥。追至王家莊。燒毀賊營而還。著張之萬督飭張曜等各率所部約期並攻。務須偏賊出

險。以便蘇克金等馬隊克盡所長。免致再傷精銳。賊匪所踞溝口。是否魯山南召山中。趙家莊坐落何地。浙川有無餘匪。均著該撫等查明具奏。以後奏報。當將坐落州縣地方敘明。以備參考。息縣擒首鄔大年攻陷民寨。經知州任重光調團往剿。密派內應。設計殲渠。辦理尚為妥速。所有在事出力員弁兵勇。著暫行存記。俟汝南肅清。彙案保獎。荆子關副將孫之友所部馬勇。與教天印勇隊口角互

鬪。間有受傷。經署副將裴政前往勸止。何以夜間孫之友即被戕害。裴政帶領營弁彈壓。何至街市塞斷。無隙可出。及至天明始行查見孫之友屍身。此等情節。殊屬支離。孫之友以專閫大員。打仗向稱得力。遽被戕害。實堪駭異。著張之萬督飭蒯賀孫將啟釁根由確切查明。並將已革副將教天印嚴提訊究。按律重懲。教天印所部勇丁。仍應妥為彈壓。毋任再有滋事。另片奏請令皖營總兵宋慶帶領所部勇丁來豫助剿等語。宋慶現在駐紮何處。如皖北漸次肅清。無須該總兵防剿。即令帶隊前往河南。交張之萬調遣。以厚兵力。著曾國藩喬松年酌度辦理。妥為調度。將此由六百里各諭令知之。○以河南攻克鮑寨賊巢。予都司連美等升敘。加銜有差。○予河南趙家莊陣亡副將王有明。把總張紹先。祭葬世職加等。○乙卯。予浙江杭州殉難故河南吏目趙貞復妻陸費氏旌表如例。○予浙

江會稽殉難故河南按察使余炳燾妻王氏  
暨眷屬二十九名口分別旌卹如例○丙辰  
宣宗成皇帝忌辰遣官祭

慕陵○

上詣

奉先殿

壽皇殿行禮○諭內閣步軍統領衙門奏拏獲  
從逆賊犯請交部審辦一摺北營遊擊張興  
等協同坊役在安定門外查店拏獲形跡可

疑之岡鳳川等五名訊據供稱有曾被捻匪  
裹脅在壽州與官兵打仗並曾充苗逆頭目  
等情岡鳳川開丙申包柏和包明升辛廣林  
五犯均著交刑部嚴行審訊按律定擬具奏  
其同夥之開鐵三包明典二犯並著河南山  
東巡撫嚴密查拏務獲歸案訊辦○諭議政  
王軍機大臣等本日據步軍統領衙門奏拏  
獲從逆賊犯一摺逆匪岡鳳川開丙申與從  
逆之包柏和包明升辛廣林均為苗沛霖所

遣潛由皖北來京其夥黨開鐵三包明典二  
名據岡鳳川等供稱尚在山東地方已明降  
諭旨將該犯等交部嚴審並令山東河南各  
巡撫嚴行緝拏矣因思京師地面遼闊五方  
輻湊奸宄最易潛蹤恐各處匪類潛匿都城  
者尚不僅苗沛霖黨與數人亟宜嚴行訪緝  
以期盡絕根株著步軍統領衙門順天府五  
城嚴密稽查如有似此匪黨潛匿居住者卽  
行迅速緝拏務令有犯必獲毋任一名漏網

以期輦轂肅清不可視為具文稍形疏懈將  
此各諭令知之○追予江西饒州陣亡千總  
韓鳳飛於贛州府屬地方建立專祠傷故勇  
丁九百餘名一併附祀○命山西巡撫沈桂  
芬撥銀八萬五千兩解赴烏里雅蘇台科布  
多兩城備本年經費○丁巳

上詣

大高殿

壽皇殿行禮○諭議政王軍機大臣等張凱嵩

奏貴縣官軍圍偏黃逆老巢。攻破賊壘多處。並鎮安府屬防勦土匪。保衛邊疆。請將出力及辦理不善之員分別舉劾。各一摺。署歸順州事崇善縣知縣張鳴鳳。平日防勦土匪。尚能盡心。此次於王士林練丁索補口糧。不能及時籌給。又不加意防範。致令滋事擾害。實屬辦理不善。張鳴鳳著暫行革職。示儆。太平府團總王士林。屢以戰功。洵保藍翎。守備於所帶練丁不能約束。著先行斥革。仍著張凱

奏稿卷三

八

嵩飭令左江道督同太平府嚴提到案。查明是否縱容騷擾。確切究辦。劉坤一所部各軍進勦黃逆老巢。將軍塘及青雲硃砂楊李等村次第攻破。並將岐山寨鏖盡。窩要隘暨賊屯糧之施村破獲。黃三遁踞平天寨。雖號堅巢。而險要盡失。援濟亦斷。勢成絕地。諒不難剋日聚殲。著卽督飭劉坤一與王承澤。易元泰等各軍乘此機勢。掃穴擒渠。迅奏全功。斷不准任該逆首復行逃竄。致留餘孽。其張三

奏稿卷三

九

一股。膽敢圍撲鎮安府城。與陸四大互相勾結。雖經該處兵練疊次防勦。尚能保全邊圉。地方而首逆未殲。全股亦未卽殄滅。仍著張凱嵩督飭知府興福等激勵軍民。務將各股匪迅圖掃蕩。毋任蔓延。鎮安一帶距省窵遠。為兵力所不及。現當得梧軍務得手之際。鎮安道路亦漸疏通。諒各土匪亦必聞風知懼。卽各兵團亦益加鼓舞。該撫務當因勢利導。速將邊境力籌保衛。毋以荒僻視為緩圖。任令匪徒肆其蹂踐。一俟得郡軍務肅清。各軍有可分撥。卽當酌量籌撥援濟。以慰邊氓望治之心。左江泗太各屬。現在有無股匪尚行肆擾。並著張凱嵩詳查具奏。梧藤等處各路土匪曾否淨盡。前經諭令毛鴻賓等飭令方耀一軍。會合西省官軍。勦除兩粵毗境餘氛。並著張凱嵩仍遵前旨。飭令蔣澤春等與東省之軍隨時聯絡。於各路餘匪竄匿之處。併力掃蕩。柳州獐匪梁扶英。勦平之後。地方足

否安謐。本日張凱嵩奏片內稱。煉勇管帶既不得人。其代辦提督蕭榮芳請假回籍。此時當可假滿。柳州為粵西重鎮。該員代辦提督印務。甚得軍民之心。著該撫即催令迅速仍回代篆。以資得力。將此由五百里諭令知之。○以山東捐備京倉米價。予學政尚慶潮布政使貢璜。按察使丁寶楨等議欽。○以廣西鎮安防勦土匪獲勝。賞知府興福花翎。外委陳熙宗等藍翎。餘升敘有差。○戊午。以江南

江北水師積年防勦出力。賞總兵官李起高。副將林宜華。巴圖魯名號。知州姚金誥。都司張英才等花翎。郎中顏鍾驥等藍翎。餘加銜升敘。開復有差。○己未。諭內閣。僧格林沁等奏稱。投效遊擊。邊得勝。戴有花翎。查驗功牌。劉文均無實據。訊據邊得勝供稱。曾隨總兵馬陞帶勇出力。經前署安徽巡撫查取職名請獎。其時馬陞云五品藍翎千總。應保花翎守備。該遊擊即以花翎守備具稟。迨經賈臻

給予劄文。以都司儘先補用。始知錯誤。復因潁州解圍。經勝保保至遊擊。儘先補用。並未保有花翎。請將該遊擊即行革職。解回天津原籍。交地方官嚴加管束等語。邊得勝以藍翎千總。明知保舉時誤為花翎守備。輒敢冒戴花翎。實屬居心險詐。況該遊擊在潁州一帶聲名狼藉。不安本分。僅予革職。遞籍不足蔽辜。著即行革職。從重發往軍臺效力贖罪。以示懲儆。翎頂係朝廷名器。所以獎賞有功

近來無恥之徒。往往濫行戴用。冀圖蒙混。殊屬不成事體。嗣後各省督撫。暨各路統兵大臣。如查有假冒翎頂之員弁。即行從嚴定擬罪名。以為不安本分者戒。○諭議政王軍機大臣等。前因僧格林沁奏勦辦白蓮池教匪。及東昌一帶土匪逆產。請逐一查辦。並招集難民。懇種。降旨特派巴革直隸總督文煜等專司辦理。嗣據閻敬銘奏。曹單等處强悍貧民。未便移諸兗州荒亂之地。其黃河南北災

民均因安土重遷。不願分投遷徙。當照所議停止移民認墾。茲據僧格林沁奏。接准文煜報稱。查出東昌曹州臨清兗州等屬逆產二百五十七頃餘畝。絕產荒地三百三十四頃餘畝。各處難民。既不願前往認墾。自未便強令遷移。請將此項田地入官。招佃耕種。按畝交租。不得照民地僅納錢糧。以昭覈實。而裕經費等語。所奏甚屬妥善。著閩敬銘督飭地方官認真辦理。毋得稍有弊混。並著戶部查照定例。此項入官地畝。每畝應交租項若干。迅速移咨該撫遵辦。其查出房間。或招租。或變價。均著閩敬銘斟酌妥辦。閩敬銘擬將鄒縣逆產作為白蓮池添設文武衙署書差兵役飯食之用。雖係因公起見。究恐不免牽混。所有白蓮池應設文武官署等項經費。著該撫另行籌款撥給。其流亡未歸荒田。卽照該撫前議。予限一年。如限滿不歸。一併入官招墾。輸納官租。惟滕縣絕產二頃八十八畝零。

若一概入官。該絕戶不免餒而之恨。除零星地畝無庸計議外。如查有絕戶地畝在數十畝以上者。自應傳集該戶家族人等。如有情願過繼子嗣為其立後者。卽以該戶田地界之用。示朝廷繼絕存亡之意。並著閩敬銘妥籌辦理。僧格林沁片。著鈔給閱看。將此諭令知之。○又諭。僧格林沁等奏。查辦蒙城等處荒田。安撫窮黎。並擬撥兵赴豫會剿。及遵查苗逆仇殺徐立壯等案情一摺。另片奏。請將東省查出逆產田地一併入官交租等語。苗逆仇殺徐立壯等一案。已將總兵黃鳴鐸及壽州紳士公稟等件。交兵部立傳。翁同書閱看。據實登覆。俟兵部查覆後。再降諭旨。其山東白蓮池等處查出逆產。亦照該大臣所請。諭令閩敬銘督飭地方官將此項田地歸官招佃。照納官租。以杜弊混。而裕經費。其蒙城等處荒田。卽著該大臣嚴飭各州縣確切查明。認真妥辦。務令流氓復業。田地不至荒蕪。

豫西股匪尚在李青店盤踞。不可不迅圖撲滅。該大臣現雖未能卽赴豫省。惟當嚴飭蘇克金等馬隊會同豫省各營將張總愚一股悉數殲除。俾不至日久蔓延為患。將此由五百里諭令知之。○又諭前因僧格林沁覆陳籌辦李世忠情形。當經密諭曾國藩迅將李世忠調至軍營勦賊。並遵旨妥辦一切。茲據僧格林沁奏。派赴五河一帶探聽李世忠動靜之總兵王佐臣等回營面稟。據李世忠聲

稱所管勇隊除有家業者業已遣散外。其餘現已請示曾國藩辦理。礮位船隻亦已分別遣留。所管各州縣及釐卡地方。擬卽稟請曾國藩派員接管。情詞極其馴順。惟所言與所行是否相符。尚難遽信。必須俟李世忠遵調前赴曾國藩軍營。並將淮北各城及釐卡地方全行交出。由喬松年派員接管。方見其言行符合。必須俟曾國藩喬松年將各事辦妥。該大臣方可督軍赴豫勦匪各等語。僧格林

沁老成之見。慮事甚屬周詳。著曾國藩迅速遵照前旨。剴調李世忠到營。將其部衆妥為布置。所占城池釐卡。諭令交出歸官。一俟辦理妥協。卽行知照僧格林沁。俾得拔隊赴豫。毋稍稽遲。致生他變。僧格林沁原摺著鈔給閱看。喬松年現在督辦江北糧臺。須俟接替有人。方能赴任。著曾國藩迅飭萬啟琛速赴江甯藩司之任。以便喬松年交卸起程。喬松年到皖後。著曾國藩將此次諭旨及僧格林

沁摺均另錄一分密行知照。會同商辦。不准稍有漏洩。將此由六百里密諭知之。○又諭毛鴻賓奏官軍攻勦三山土匪賊巢。及現在籌辦情形一摺。陽山縣匪首鄧二尺七糾黨肆擾。恃險負隅。歷有年所。此次四出劫掠。經張運蘭督兵進勦。破其隘卡三重。擒斬多名。該逆遁回三山老巢。勦辦甚屬得手。惟該逆巢山深林密。嘯聚易滋。若不乘此聲威。悉數殲滅。將來兵勇一撤。必將餘燼復燃。毛鴻賓



現飭張運蘭將所部五隊全數調齊併力進攻。所辦尚合機宜。卽著督飭該臬司帶領全部兵勇鼓勇前進。務將鄧二尺七擒獲。並餘黨及三峽頭另股逆匪馮九指等一律掃除。免致養癰貽患。將此由五百里諭令知之。○又諭勞崇光張亮基奏擊退偏省賊匪。省城解嚴。李逆餘黨竄擾黎平。請飭催楚軍帶餉會剿各摺片。修文雖已收復。餘匪尚踞開州。勞崇光張亮基務當督飭派出各軍奮力攻克。毋任逆匪再竄他處。松桃所屬衛汛經黔楚官軍收復。並攻克觀音山賊巢。廳境一律肅清。惟首逆包茅仙先期率夥黨數十人逃竄至馬鞍山等處糾黨圖逞。雖經節節擊敗。擒斬黨與多名。而包逆仍在漏網。著責令該文武員弁設法兜擒。毋任免脫。免致餘燼復然。代理廣西西隆州知州陳錫藩越境攻克冊亨城池。餘匪竄向貞豐州城。陳錫藩復移師進剿。興義逆回轉戰數月。擒斬甚多。並設

法離間招撫。實屬急公可嘉。著勞崇光等飭令該員認真辦理。仍飭興義府縣實力會剿。以收廓清之效。貞豐州城能否派兵攻克。並著酌度調派李幅猷分股竄擾靖州所屬播揚等處。意圖窺伺郡城。副將成應洪等均以衆寡不敵遇害。著憚世臨飛檄總兵周洪印督率勁旅兼備楚餉。馳赴黎平會黔軍防剿。勞崇光張亮基仍卽懷遵前旨。派得力兵勇馳赴黎平一帶痛加勦洗。楚省官軍固應不分畛域。黔省大吏又豈可專恃客兵。務須同心合力。將此股髮逆及苗教各匪次第殲除。庶黎郡肅清。邊圉無恐。已革副將周洪順當逆匪攻撲各營之時。該革員並不督練助勦。反敢攜帶行裝潛行回省。搖惑軍心。幾誤大局。該督撫將其正法。自是正辦。貴州軍務未竣。該督撫等必當振刷精神。力圖掃蕩。以副委任。另片奏陸傳應居官植品。所至有聲。現飭赴楚聽候查辦。如案內尚無徇隱情弊。可

否俟奏結後併案獎敘等語。陸傳應以監司大員。朝廷豈不知其才具。惟以湖南釐捐局內有撤任查辦之案。是以該督撫前此奏保曾經降旨。令俟結案後再行酌量辦理。前諭甚明。何得嘵嘵屢瀆。意存見好。著卽飭令該員速赴湖南聽候訊辦。如訊無扶同徇隱情弊。仍著憚世臨於定案時聲明請旨。將此由六百里各諭令知之。○貴州巡撫張亮基奏遵查韓超奏保前任思州府知府高振洛候補同知陸用康。汪金麟於被參後堵勒出力。均係實在情形。請一併開復原官。從之。○以山西捐備京倉米價。予前任巡撫英桂署巡撫沈桂芬學政黃鈺布政使鄭敦謹。按察使鍾秀等議敘。○以廣西團練克復貴州冊亨城。賞代理知州判陳錫藩藍翎。餘升敘有差。○以收復貴州修文縣城。賞都司李庚清等花翎。州判王相皋等藍翎。餘加銜升敘有差。○予貴州開州殉難署知州道員戴鹿芝。

知縣白夢蟾巡檢李特夫。祭葬世職加等於死事地方暨原籍建立專祠。陣亡副將何顯仕等十九員祭葬世職加等。○予湖南靖州陣亡署總兵官成應洪。署遊擊雷三佳。學正姜吉瑞祭葬世職加等。○予貴州石峴衛陣亡守備張貴山。把總張我臣。蕭啟洪祭葬世職加等。○庚申諭議政王軍機大臣等。熙麟奏甯夏逆回勾結情形一摺。逆回馬化澂黨與攻陷橫城興武兩處營汛地方。卽在該處設立集市。與蒙古兵民交易。囤積糧食。並傳聞有與蒙民勾串夥同搶劫得贓俵分之事。又馬化澂由綏遠城約去回匪二百餘人。假冒官兵。冀免沿途盤詰。及至興武營地方則肆行搶劫。隨後尚有千餘人陸續前往等情。雖據熙麟奏稱所得傳聞。均係偵探兵役口述之詞。而回情詭譎異常。該逆自陷甯靈之後。又復攻陷橫城興武兩處營汛。前此尚未據奏聞。現在該處回氛正熾。其四出勾結及

聲東擊西所至藉端希圖構釁均在意計之中。綏遠歸化兩城與甯夏毗連。蒙地尤應嚴密防範。前經諭令德勒克多爾濟等整飭兵勇為訥欽後路援應。副都統桂成係久經行陣之員。著卽將防勦事宜會同該副都統等妥辦。並將綏遠城等處安分良回妥為撫綏。務令各安生業。毋為甯夏逆回恫疑搖惑。自取殃禍。其有由甯夏前來該城煽約良回之賊匪奸細。並本地或有不安本分勾通外匪為害地方之匪徒人等。均卽設法嚴密查拏懲辦。以杜奸謀而安反側。其馬化澂由綏遠約去回匪二百餘人。隨後尚有千餘人陸續前去等情。究竟有無其事。並著德勒克多爾濟等不動聲色。嚴密訪查。督飭地方妥為防範。毋稍大意。訥欽現在帶兵由朔平綏歸一帶前進。亦應隨時戒備。沿途偵察情形。嚴飭兵弁整隊前行。或行至包頭鎮一帶暫行紮駐探聽。毋致為奸匪所乘。是為至要。該署提

督所帶直隸省官兵二千名。尚恐不敷進剿。卽著劉長佑於直隸各標營再行調撥官兵一千名。沈桂芬於山西各營調撥官兵一千名。均卽剋日派向朔平綏遠城一帶進發。以為訥欽後路之軍。此項官兵並著劉長佑、沈桂芬挑選精銳。派令得力將領管帶。迅速啟行。仍將所需軍火糧餉寬為籌備給發。毋稍稽滯。行抵歸綏一帶。卽與訥欽所帶官兵會合。均歸訥欽節制調遣。其統帶之員由訥欽酌定。或卽於直隸兩省原帶各員內選派。或於各路軍營知有得力之員奏調。均由訥欽自行辦理。如由京中察看遇有可派之人。亦卽續行派往。以資臂助。晉省沿邊各境此時均應設防。而陝省軍務仍未竣。河濱布置未可稍疏。此次飭令沈桂芬於各營調撥官兵千名。以為訥欽後路。卽著閻敬銘於山東省各勇營內調撥勇丁千名。選員管帶。剋日飭赴山西省。以為填紮之用。東省勇丁多由

南省募來。其到晉後。派令於南路如茅津渡等處設防。應資得力。著沈桂芬妥為調度。訥欽所統之兵。前後共四千名。係專赴甯夏進剿。究由何路進取。前已有旨令劉長佑與訥欽妥商。卽日前進。如果由朔平等處進發。不由口外行走。則歸綏一帶之防。德勒克多爾濟等卽當專力籌備。是否足資堵禦。訥欽所統官兵。能否分撥一千仍赴歸綏協同防禦。並著德勒克多爾濟及訥欽與沈桂芬及時

豫為籌定奏聞。至定邊之防。係恐賊由內地竄入陝境而設。前由東省調赴楚勇千名。此時計可到防。是否單薄。如須添兵。卽著多隆阿酌量調派。並著熙麟於楚勇到防後。就近隨時聯絡調度。以資防剿。將此由六百里各諭令知之。○又諭。寄諭阿拉善親王貢桑珠爾默特。本日據熙麟奏甯夏回匪勾結情形一摺。據稱甯靈逆首馬化澂黨與攻陷橫城興武兩營汛。在該處設立集市。與蒙古兵民

交易囤積糧食。並有勾串夥搶分贓情事等語。該王旗所屬蒙民。久與內地相安。斷不至滋生事端。惟沿邊一帶蒙古所屬佃戶居多。貪利是其本性。卽該王旗部下蒙古人等素來安分。而貪利為匪者。恐亦不免雜出其中。尤恐所屬地方遼闊。該王未及周知。現經熙麟行文該王旗禁止。著貢桑珠爾默特迅卽督飭所屬密行訪查。如有蒙民貪圖小利與該回匪交易及勾串搶劫者。立卽嚴拏懲辦。

毋稍疏縱。從前陝西回匪初起時。該王旗卽將境內居住回衆盡行驅逐出境。現在甘省回衆潛與該王旗境內蒙民勾串。將來聚集日多。難保不向該蒙古地面滋事。以圖報復。且該王旗所部蒙兵。前次赴援慶陽時。路經甯夏。為回匪邀截。被害者甚多。此時豈可再令回匪與所部蒙民勾串滋事。該王務當振刷精神。力行禁止。以期保全本境。儻漫不經心。任聽奸回蔓延日廣。惟該王旗是問。諒貢

桑珠爾默特當知以防務為急。不至漫無備禦。致令回匪滋蔓難圖也。將此由六百里諭令知之。○又諭駱秉章奏勦辦滇邊逆匪獲勝。並埽蕩碉寨伏賊。川界肅清一摺。逆匪何金隴在滇邊糾合游匪數千人。於上年十一月十五等日竄至川界筠高境內。經提督胡中和分飭各營並約會總兵李復勝等軍馳抵川滇毗界之斑竹塘分投進勦。俘斬甚多。惟何逆尚未就殲。現在逃往何處。著駱秉章

迅飭各營及各地方文武嚴密搜捕。務將該逆首就地殲除。以期淨絕根株。毋留餘孽。至金子口四方碉等寨。均有賊匪潛伏。與何逆勾通。亦經胡中和等督飭各營分道進攻。斬馘不少。何逆弟姪等亦均拿獲正法。伏賊一律勦滅淨盡。川境肅清。勦辦尚為奮勉。惟滇邊散練游匪伏莽尚多。並著駱秉章咨會胡中和分飭各營嚴防要隘。毋任匪蹤闖入。其由黔省正安竄入川境之號匪。即著駱秉章

飛飭李復勝所部果後三營迅由興文迎頭截擊。毋令蔓延腹地。以靖疆圉。將此由六百里諭令知之。○命喀爾喀扎薩克親王車林多爾濟巴林頭等台吉阿拉瑪斯巴咱爾在御前行走。賞喀爾喀扎薩克貝勒錦丕勒多爾濟郡王銜。阿巴噶扎薩克貝子桑齊薩拉特多布貝勒銜。科爾沁二等台吉阿爾塔什第巴林四等台吉伯和濟雅公銜。奈曼輔國公蘇克都爾科爾沁頭等台吉棍布旺濟勒等花翎。○辛酉。

上御撫辰殿大幄次。賜王公大臣蒙古王貝勒貝子台吉公暨朝鮮使臣等食。○諭議政王軍機大臣等張集馨奏請飭借撥山西河東鹽課。並催湖南四川協餉一摺。陝省徧遭蹂躪。餉源枯竭。不特各軍待餉紛紛。無從措解。且本省旗綠各營兵餉。亦屬不敷支放。若非迅籌鉅款。決裂即在目前。著沈桂芬飭令河東道於應解各省軍餉項下借撥銀十萬兩。

限於正二月迅速分起解陝。俟陝省徵收稍有起色。仍如該撫所奏籌畫解還晉省歸款。並著駱秉章。惲世臨將應撥協餉如數籌撥。

速解陝省。以濟眉急而拯危局。毋再遲延。推諉。張集馨另片奏。革員吳春煥欠繳捐項銀三萬五千兩。屢催未繳。該革員於上年六月城防喫緊之際。以措貲為名。前往四川省城居住。劉蓉前請月撥銀二萬兩。陝省無款可籌。吳春煥近住四川。應交捐款。就近呈繳川

省轉解漢南等語。著駱秉章飭令吳春煥將應繳捐項銀三萬五千兩如數呈交四川藩庫。以備漢南軍餉之用。如果該革員埽數迅交。准其奏懇恩施。儻敢仍前延宕。即著從嚴叅辦。將此由五百里各諭令知之。○減免直隸隆平。安。天津。三州縣上年歉收地方額賦。並緩徵本年糧租等項有差。○壬戌。以御前大臣景壽署正白旗領侍衛內大臣。○以正紅旗蒙古都統奕山署鑲白旗滿洲都統。○

巴里坤領隊大臣穆騰阿因病解職。賞已革盛京兵部侍郎訥爾濟藍翎侍衛為巴里坤領隊大臣。

大清穆宗繼天開運受中居正保大定功聖智誠孝信敏恭寬毅皇帝實錄卷之九十一

大清穆宗繼天開運受中居正保大定功聖智  
誠孝信敏恭寬毅皇帝實錄卷之九十二

救修

同治三年甲子正月癸亥。

孝穆成皇后忌辰遣官祭

慕陵○甲子。以神靈佑助。頒河南項城縣

關帝廟扁額曰秣城顯佑○諭議政王軍機大臣等曾國藩奏近日軍情金陵賊糧未罄仍謀負隅死守。另股分擾上興埠等處窺犯漂水雖不得逞而偽侍王句結堵逆黃汶金及廣德餘黨已由甯國竄至績溪人眾勢剽意圖衝過徽州直犯江境東南軍務正在得手。金陵賊巢雖未卽破而檻穽之勢已成。此

時自以防賊出竄滋擾他處。不令餘燼復熾。致成不了之局。為最要著節。據曾國藩左宗棠所奏。均有賊欲竄由皖南。以犯江西之語。茲復據曾國藩所奏。侍堵兩逆。果已擁眾突竄績溪。深恐左宗棠所派駐防徽州屯溪鎮之王開琳官軍。不數扼截。被賊衝過。著卽飭令所調毛有銘軍。星馳前赴休甯。與王開琳一軍相為聯絡。策應毋令賊得肆其奔突。沈葆楨所調韓進春五千餘人。移防玉山。席寶田等軍萬人。移防婺源。均能豫籌守禦。並著督令兩軍實力嚴防。務令賊黨不得間入江境。此次賊之分股出竄。僅係侍堵兩逆。而忠逆不在其中。是否仍與洪逆死守金陵。抑仍在句漂等處堅踞。馮子材等鎮江之軍。與賊相持。因鮑超一軍未能往會。未卽進攻。鮑超刻下是否尚在東壩南岸各軍防剿。正當喫緊之際。殊恐不敷分撥。因思北岸揚防無事。官軍屯戍已久。都興阿老於兵間。頗形持重。



是否可以量為調撥。令該將軍帶赴南岸與馮子材等合力以攻丹旬之賊。使常州賊黨失其援應。則李鴻章所部攻取毗陵自可迅期得手。即分竄皖境之賊亦將有後顧之虞。不得直前衝突。都興阿坐守揚州。未免髀肉復生之歎。如其帶兵過江。足資臂助。即著曾國藩迅速奏明飭調。其淮揚一帶。即可交吳崇安為籌防。富明阿因傷疾舉發。請假現在清江調理就痊。亦可回揚營以資統率。鮑超軍在東壩。能否量為調撥。廣德勦撫究竟如何。如由此路能有一軍以躡賊後。亦可與毛有銘王開琳等軍前後夾擊。均著曾國藩酌量妥籌。賊勢已偪。徽防浙師應由嚴州出兵邀擊。左宗棠所部。能否相機酌撥。著即與曾國藩隨時聯絡策應。以保萬全。將此由六百里各諭令知之。○乙丑。

孝聖憲皇后忌辰遣官祭

泰東陵○諭內閣朕奉

慈安皇太后

慈禧皇太后懿旨。三載考績。為國家激揚大典。中外滿漢諸臣。有能認真辦事。克著勤勤者。允宜特加甄敘。其或哀庸不職。亦必立予罷斥。當茲多事。未已。朝野望治。孔殷。尤應黜陟幽明。用彰旌別。茲屆京察之期。吏部開單題請。自當詳審。以為舉錯。議政恭親王賢親最著。輔翼公忠。自首贊樞。廷於今三載。於用人行政一切。克盡匡襄。勤勞罔懈。著交宗人府從優議敘。工部尚書文祥。戶部尚書寶鋆。工部尚書李棠階。兵部左侍郎曹毓瑛。同心協贊。克慎克勤。均著交部議敘。大學士湖廣總督官文敏。歷封疆。宣勤最久。於軍謀吏治。眾善靡遺。協辦大學士兩江總督曾國藩。督軍勦賊節制東南數省。盡心區畫。地方以次削平。舉賢任能。克資羣力。四川總督駱秉章。連年辦賊。疊平巨股。全蜀漸就肅清。於鄰省軍務及地方整頓各事宜。均能實力妥籌。精勤

因懈。閩浙總督兼署浙江巡撫左宗棠自簡任封圻以來。辦理軍務及地方事宜。均能果敢嚴毅。克復浙東郡縣。卓著戰功。江蘇巡撫李鴻章親履行間。克復蘇州省城及各郡縣。功績殊彰。均著交部從優議敘。吏部左侍郎孫葆元才具平庸。內閣學士中常年力就衰。均著原品休致。餘著照舊供職。○又諭本年輪應查閱湖北湖南雲南貴州四省營伍之期。湖北著卽派官文。湖南卽派譚世臨。雲南卽派勞崇光。貴州卽派張亮基。逐一查閱。認真簡校。如查有訓練不精。軍實不齊。卽將廢弛之將弁。據實參奏。現在該四省均有防勤事宜。尤須隨時加意整頓。毋得視為具文。丙寅。諭議政王軍機大臣等。本年正月十四日步軍統領衙門拏獲形跡可疑之岡瀾川等五名。訊有從捻打仗並充苗逆頭目等情。當經降旨交刑部嚴行審訊。其同夥之間鐵三包明典二犯。並著河南山東巡撫嚴拏務

獲。茲據刑部奏訊明岡瀾川開丙申。包明升。包柏智。辛廣林。分隸河南許州臨潁各州縣。同治元二兩年內。為苗逆裹脅。撥在白旗隊。目張汶得隊內餒馬。隨至壽州。曾與官兵接仗。二年八月間。張汶得派令岡瀾川開丙申。包明升。包柏和。辛廣林。開鐵三包明典七人。來京探聽消息。約於今年三月間。在開封府黃河沿會齊。行至山東地方。開鐵三包明典令岡瀾川等先行進京。致被盤獲。該犯等情。罪重大。請旨卽行正法等語。本日已將岡瀾川等犯處決。其間鐵三包明典二犯。同行落後。或在山東地方等候。或至開封一帶逗遛。均未可定。著問敬銘。萬之萬。督飭地方官吏。嚴密查拏。務獲從重懲辦。至供出之張汶得。一犯並著一體嚴拏究辦。毋令漏網。將此各諭令知之。○又諭前因僧格林沁奏遵查苗逆仇殺徐立壯等案。並呈遞黃鳴鐸及壽州紳耆稟詞。當經諭令兵部傳知翁同書據實

聲覆。茲據翁同書逐條呈覆。所稱孫家泰蒙時中被害情形與黃鳴鐸等稟大略相同。惟於徐立壯則稱其勾結長髮捻匪。圖襲壽城。在城內恣意淫掠。殺害無辜。兵民共憤。經黃鳴鐸等拏解前來。數其罪而誅之。士民同聲稱快。袁甲三從前奏報。亦有徐立壯勾來捻匪。又為苗沛霖勾結。擬為內應之語。而黃鳴鐸與紳耆公稟。則於招捻重情。全未提及。著曾國藩。喬松年將徐立壯勾結焚劫各情。細

加訪詢。是否確有其事。據實查明具奏。至博崇武等三鎮突圍南去。其為畏懼苗逆。已屬顯然。曾否與逆合隊攻城。當時眾目共睹。無難查辦。張學醇為苗說和。往來苗營。肆行無忌。曾否為苗設計。並曾否帶隊赴壽。偪死孫家泰等。鄒學鏞等附苗情形。並當日禦苗死事各員弁應行查卹者。均著該督撫詳查速奏。毋稍徇隱。翁同書呈一件。黃鳴鐸等稟二件。孫家泰等履歷一件。均著鈔給曾國藩。喬

松年間看。昨有旨令曾國藩察度情形。調都興阿兵渡江。剿賊。現在陝甘軍情緊急。山西綏遠城逼近回氛。防務頗形喫重。本日已令都興阿前赴綏遠。會同德勒克多爾濟辦理防務。並令富明阿即日前往揚州。接統都興阿所部。扼守江北。目下揚防無警。江北兵勇尚屬不少。應如何調遣。過江助剿。以益馮子材等兵力。著曾國藩妥為區畫。一面奏聞。一面調派。以資得力。前據步軍統領衙門拏獲

苗逆奸細岡鳳川等五名。業經刑部訊明。於本日正法。其同行落後之夥犯。開鐵三色明典。並供出白旗賊目張汶得。已諭令山東河南巡撫嚴拏。該犯等從苗為逆。皖北是其熟徑。難保不潛行逃回。並著僧格林沁。喬松年督飭地方員弁。嚴密查拏。毋任免脫。將此由六百里各諭令知之。○又諭。訥欽奏督兵馳抵歸化城。取道朔平前進。請添調官兵馬隊一摺。前因訥欽所帶兵止二千。恐不敷進剿。

諭令劉長佑。沈桂芬各調兵一千名。馳赴朔平一帶。歸訥欽節制調遣。昨據劉長佑奏。遵調官兵一千。由正定固關入晉。沈桂芬於接奉寄諭後。諒亦挑選精銳星速啟行。訥欽現由歸化城向朔平府進發。著卽催提直省運解之槍械帳棚等件。趕緊解到。一俟部署已定。卽由榆林府渡河。前赴甘境。相機進剿。所有續調直隸山西官兵二千名。均由訥欽酌量調派。以厚兵力。該提督當懍遵疊次諭旨。

力圖埽蕩。援救甯夏等城。毋稍耽延。致負委任。訥欽一軍。所需月餉。若待直隸解往。深恐緩不濟急。著沈桂芬就近籌撥。派員隨赴行營支放。其直隸應解餉項。卽運交山西兌抵。訥欽行營。應需一切軍火器械。並著劉長佑。沈桂芬隨時運解接濟。以利軍行。德勒克多爾濟所調之旗綠及兩盟蒙古官兵。分紮薩拉齊及磴口等處。均毋庸遷調。仍分飭該營將領。駐紮防範。並將存城官兵。隨時訓練。為

訥欽後路援應。毋稍疏虞。正在寄諭間。據多隆阿奏報。近日軍情。及勒辦髮逆獲勝一摺。甘肅徽縣兩當髮逆。有出寶雞山口。由郿縣分援盤屋之說。該大臣檄調陶茂林一軍。由汧陽折回鳳翔進剿。在雨門鎮二嶺關等處。擒斬甚夥。惟該匪現竄草涼驛。通衢要路。隨在可以分竄。著卽督飭陶茂林認真截剿。毋任回竄漢中。致滋延蔓。鳳翔回匪。自就撫後。猖獗如故。朝廷早有所聞。著多隆阿加意偵

察。如竟不妥。卽嚴飭陶茂林痛加剿洗。不准稍為遷就。貽患將來。慶瑞辦事何如。是否可靠。並著該大臣留心察看。盤屋一城。何以久未攻克。該城一日不拔。則該大臣各軍。不免為所牽掣。著卽激勵將士奮力進攻。迅拔堅城。毋再延誤。一俟盤屋攻拔。該大臣卽統率大軍。馳赴漢南。勒辦逆氛。廓清全陝。春氣已深。秦中應已晴霽。並著速飭曹克忠將麟遊一帶之賊。剋日埽除。訥欽請飭多隆阿調撥

馬隊五百名。能否分撥著酌度辦理。多隆阿另片奏。各路分兵糧草若仍自行經理恐難長莫及等語。著張集馨選派妥員分路籌辦各營糧草。毋令缺乏。甘省援兵漸集。糧臺最關緊要。本日特派副都統文煜前往督辦。麟當就現有兵力與訥欽所部聯絡策應。以期速殄回氛。肅清邊圉。將此由六百里諭知多隆阿德勒克多爾濟劉長佑熙麟沈桂芬訥欽並傳諭張集馨知之。○又諭熙麟奏甘

省大兵雲集。請飭催各省奉撥餉銀一摺。現在涇州慶陽兩處糧臺供支二十餘營。陶茂林大隊抵甘。兵勇雲集。需餉萬分緊迫。請飭催各省督撫將奉撥餉銀趕緊接濟。所奏自係實在情形。著駱秉章閻敬銘沈桂芬張之萬迅將奉文指撥並歷年欠解甘省協餉無論何項移緩就急。每省各先湊撥銀三十萬兩。無分星夜設法統源源運解甘省軍營以期士飽馬騰。毋再遲延貽誤。將此由五百

里各諭令知之。○又諭前因甘省靈州及甯夏漢城失守。回氛甚熾。該處與綏遠歸化兩城地勢毗連。節經先後調撥直隸山東等省官兵四千名。由署直隸提督訥欽統帶前往援剿。並諭令德勒克多爾濟等實力守禦。本日據訥欽奏到現已馳抵歸化。擬由朔平一帶分起取道前進矣。歸綏一帶防務緊要。必須有知兵之員整飭兵勇慎重籌防。方可以資重鎮而免疏虞。都興阿久在行間辦理軍

務素稱得力。著卽星速馳赴綏遠歸化兩城會同德勒克多爾濟等將該處一帶在防兵勇訓練操防。嚴密堵遏回氛。毋令賊蹤竄入。兼為訥欽後路接應。方為妥善。富明阿傷病諒已就痊。著卽迅回揚營督率都興阿所部兵勇妥為布置調遣。如應須派撥南岸助剿者。卽著酌量派撥。其不能打仗之兵勇並可會商曾國藩酌量裁撤以節糜費。現在丹句一帶尚為賊踞。馮子材鎮江之軍與賊相持

因兵力較單。未能前進。富明阿到防後。酌量情形。如傷病尚未全愈。不能親自渡江。該將軍即可在揚防坐鎮。一面選派得力兵弁。迅赴南岸。相機助剿。與馮子材之軍。聯絡一氣。痛掃賊氛。不得意存。畛域致誤事機。將此由六百里各諭令知之。○命禮部左侍郎龐鍾璐為

實錄館副總裁官。○轉吏部右侍郎毛昶熙為左侍郎。未到任前。以禮部左侍郎龐鍾璐兼署調禮部右侍郎。吳存義為吏部右侍郎。以都察院左副都御史王發桂為禮部右侍郎。仍兼署工部左侍郎。○命鑲黃旗蒙古副都統文煜。馳赴甘肅慶陽軍營。督辦糧臺事務。○以甘肅高家溝等處疊次勒匪出力。賞參將廣勳。知州陶斯咏等花翎。知縣林發深等藍翎。餘加銜升敘有差。○丁卯。諭議政王軍機大臣等。劉蓉奏官軍進紮甯羌。探聞漢郡各賊修葺城垣。為負隅抗拒之計。中旗與曹

逆竄踞略陽之郭家壩等處。窺伺漢南後路。現會商周達武。併力夾擊。請令多隆阿派撥曹克忠一軍。前赴留壩會剿。並請飭李雲麟於商州解圍後。仍即折回茶鎮等語。中旗暨逆與曹逆圍攻秦州。未得逞志。復竄略陽之郭家壩等處。若官兵進趨漢南。恐該逆伺我後路。諸多牽掣。著劉蓉迅即會商周達武。派兵併力夾擊。先將此股勒滅。則昭廣一帶防兵。均可撤赴漢南。以益兵力。現在各防布置已定。營務整頓。完該撫當激勵諸軍。剋日前進。馳赴陝南。實力剿辦。務將被陷各城一克復。若再遲延。恐該匪盤踞日久。根柢愈深。彌難著手。該撫其振刷精神。勉圖報稱。以副委任。曹克忠現在進攻麟遊一帶。能否調赴留壩之處。著多隆阿察度情形。酌量辦理。毋任該匪北竄。致滋延蔓。李雲麟前奏進恃西鄉。並派兵留守興安新舊兩城。與劉蓉晤商會剿。並未折回商州。著劉蓉於馳入陝境

後飛速知照該京卿會師合剿。分路堵截。以期迅殄逆氛。廓清全境。將此由六百里各諭令知之。○又諭前因麟興車林敦多布奏稱准分界大臣咨催查勘安置唐努烏梁海人戶地面一摺。當令總理各國事務衙門查議具奏。茲據該衙門奏稱俄國議單所載唐努鄂拉達巴哈雖據麟興等奏稱未能指定何山。而該處地方人戶被其包去等情。則勢所必然。請飭明誼等援照東界條約。令俄人讓出數百里。安置此項人眾。如勢必不能。或仿照東界辦法。分界後仍准中國人照常游牧。若俄使仍不允從。其被包去蒙古等部落中有堅心內附者。務與該國使臣言明。准其陸續內遷。不得攔阻。並先索憑據。以免日後藉口尋釁各等語。西界蒙古等部落百餘年來誠心效順。現雖因俄國分界駁駁被其包去。而朝廷實無委棄之意。明誼等與該國使臣議界時。能令其將烏梁海等處讓出數百里。

安置此項人眾於該蒙古等生計。庶有裨益。儻此節竟不能辦。即可仿照東界辦法。與立字據。分界後該處仍准中國人照常游牧。雖西界條約並無此語。而俄使前給明誼等照會。有從前阿勒坦淖爾烏梁海蒙古等應由兩國商選好官等語。即可就此乘間而入。與之商照舊章辦理。惟俄性堅韌。萬一堅執條約。不肯通融。其被包去之蒙古等部落中有誓志歸誠者。即須趕緊查明妥辦。儻趕辦不及。亦當與該國分界使臣議明。准其陸續歸還內地。不得強行攔阻。並向其索取憑據。以杜日後收納降人藉口尋釁之患。明誼等與該使臣申明此議。仍當宣布於眾。俾各蒙古等咸知中國眷念之意。不至生心滋事。明誼等身膺邊疆重寄。總當悉心籌畫。竭力圖維。以期挽回一分。即受一分之益。不得因有總理衙門此奏。遂存避難就易之心。至麟興等所稱各旗均分有一定界址。若各處查勘不



但有需時日。且恐該王公等藉端推諉等語。自係實在情形。本日已諭令理藩院轉飭扎薩克圖汗賽因諾顏兩部落盟長等趕緊妥為會議。讓出地面。開清地名界址。徑報麟興等酌覈辦理矣。至俄國議單所載唐努鄂拉達巴哈。如果卽係鄂蘭山及唐努山。則不但唐努烏梁海所屬人戶全行包去。且與各總管地面人戶均有關礙。明誼明緒。麟興車林敦多布廣鳳奎昌等仍當詳為考覈。於會議時儘力駁辯。得尺則尺。得寸則寸。不可稍有畏難遷就之心。伊犁卡外俄人情形若何。仍著常清隨時偵探。嚴密防範。毋稍大意。將此由六百里各諭令知之。○以內閣學士殷兆鏞署吏部右侍郎。○以通政使司通政使汪元方為都察院左副都御史。未到任前以太常寺卿王拯署理。○以御前侍衛西拉綱阿署鑲黃旗蒙古副都統。○戊辰引見京察三品以下京堂各官。得旨通政使司副使趙東

昕年力就衰。著以原品休致。國子監司業馬壽全聲名平常。著勒令休致。餘著照舊供職。○予安徽蚌埠等處陣亡副將陳開用祭葬。世職加等。守備唐敏忠等三十三員祭葬。世職。○已已諭議政王軍機大臣等。左宗棠奏攻勦餘杭。及收復海甯州城各一摺。暨陳相機勦撫各片。降人蔡元吉。雖所保稍優。惟獻城反正。功尚可錄。自與他處僅係脫身來歸者不同。該督摺內所稱。蔣益澧將其精銳挑選八營。卽交蔡元吉管帶。人數已屬不少。著左宗棠將該降人留心察看。妥為防範。如有未盡馴伏。恐滋事端之處。仍須隨時量為遣散。並卽傳知蔡元吉。此次優給項翎。乃朝廷逾格恩施。俾益感奮。該督奏片所陳招撫一事。流弊甚多。事前之詐偽。宜防事後則安插不易。惟有分別勦撫。相機辦理。持論頗為通達。此時海甯撫局已成。各逆私相攜貳。其應如何乘機分別勦撫之處。惟在該督妥為籌

辦。偽聽逆陳炳汶。早有與洪逆及李秀城互相猜疑之說。此時在李鴻章處呈遞帛書乞降。即著左宗棠與李鴻章妥商辦理。餘杭進攻兩勝一挫。康國器楊昌濬等各軍攻破楊家橋等賊壘。聲勢甚壯。惟瓶窯鎮賊壘未能盡破。至進攻林清堰賊巢。因地勢未詳。趨戰過急。致為悍逆汪海洋所乘。傷亡將士殊為可惜。現在海甯收復。杭州賊勢更孤。東北兩面可漸合圍。且偪攻餘杭諸軍。不須再籌分

兵他顧。更可壹意併力攻取。著左宗棠即嚴督諸軍奮力攻擣。迅拔名城。以奏膚公據。曾國藩奏侍堵兩逆已由甯國竄至績溪。此次左宗棠奏報於賊竄績溪等情。未經陳及殊深慮繫。著仍遵前旨相機調撥。出兵遊擊與曾國藩隨時聯絡防剿。毋令賊得肆其衝突。復擾他處。蔓延為患。杭州府知府一缺。向係揀員調補。惟此時為地擇人。即著該督酌籌應行請補。請調不必拘定資格。總以得人為

要。俟奏到時再降諭旨。將此由六百里諭令知之。○又諭曾元福。丁曰健奏生擒首逆。剿滅巨股。會匪並林文察奏圍攻林洪各逆老巢。疊獲勝仗。各一摺。首逆戴萬生。生於官軍攻破斗六後。逃至張厝莊。經曾元福帶兵將該莊附近西南一帶之目宜山紅毛社兩郎莊社頭崙仔等處逆莊四十餘處分路剿毀。復與丁曰健所派勇丁合破張厝莊。該逆遁至芋蔴仔莊。復經曾元福。丁曰健親督兵勇將

該莊攻破。生擒首逆戴萬生。並逆犯董九仙。戴印等正法。彰化縣屬西南大路俱已肅清。辦理尚屬得手。此股會匪黨與眾多。尚須力行撈捕。尤防其竄入內山番地。復行嘯聚。曾元福。丁曰健務當分派兵勇嚴扼入山要隘。以杜餘匪竄山之路。一面撈捕淨盡。以絕根株。毋貽後患。曾元福現督兵進攻小埔心陳啞狗巢穴。諒可迅速攻拔。該署提督擬俟事竣後內渡。著左宗棠徐宗幹屆時酌量情形。

將曾元福及其所部兵勇撤歸內地以節餉需。至內山北投四塊厝。為林晟洪儀等逆另股盤踞。卽責成林文察等連行攻克。將首逆林晟等擒斬。母任漏網。仍著丁曰健分派勇丁扼要堵禦。母令該逆紛竄臺灣各路。漸次肅清。林文察現稱擬留兵勇五千名足資防剿。此外兵勇及曾元福所部已咨請左宗棠徐宗幹分別撤回。著卽照所擬辦理。將此由六百里諭知左宗棠徐宗幹並傳諭林文察曾元福。丁曰健知之。○又諭張之萬奏官軍攻克談圓。連破賊寨。並進剿李青店賊匪。獲勝各摺片。汝南官軍克談圓後。乘勝將王占魁等寨踞平。計殲逆首王立柱。現在進攻王廷幹老巢。該逆附近各寨業已次第掃蕩。王廷幹勢成孤立。官軍趁此聲威。併力進攻。自不難迅殄妖氛。著張之萬毛昶熙激勵將弁實力進剿。務將王廷幹老寨趕緊攻拔。以期肅清汝境。毋令頓兵日久。致該逆死灰復燃。

又肆蔓延。張總愚一股避兵喙伏。負嵎不出。現在吳再升進紮李青店西北之馬市坪。葛承霖進紮正北之回龍溝。張曜軍於西南之板山坪。李青店三面均已嚴備。該逆因官軍日逼。日近漸次南趨。正當乘此賊勢窮蹙之時。節節進紮。以期逼賊出險。著張之萬督飭派出各軍分路剿洗。掃除窮寇。該匪乘虛南走。蘇克金馬隊遠在魯山。深恐鞭長莫及。致令該逆得以乘間兔脫。現在蘇克金已分隊馳往南召。著張之萬督令統率所部駐紮南召左近。嚴密堵禦。一俟該逆出險。卽當痛加懲創。並嚴飭張曜葛承霖吳再升等分投截剿。痛殲醜類。張之萬另片奏該逆因畏馬隊不敢南竄。趨重北路。馬市坪防兵尚嫌單薄。該處山路崎嶇。馬隊又未能深入等語。張總愚避兵鋌走。本屬意中之事。著該撫督飭派出之副將尹嘉賓等軍均赴馬市坪會同吳再升兵勇扼守要隘。豫為嚴備。不可稍涉大

意將此由六百里各諭令知之○以收復浙江海甯州城免已革道員張景渠罪復已革都司王錫馴職投誠賊目蔡元隆更名元吉賞四品頂翎○以福建臺灣生擒首逆戴萬生賞守備徐榮生等花翎縣丞費蓋臣等藍翎餘加銜升敘開復有差○予浙江林清堰陣亡副將余佩玉參將張明遠都司唐得勝守備陳宗懿等祭葬世職加等並入祀湖南昭忠祠○予福建臺灣四塊厝陣亡五品軍

功林赤賞卹加等○予河南馬市坪陣亡把總皋廣德祭葬世職加等○庚午諭議政王軍機大臣等李鴻章奏近日軍情並分路進剿情形一摺常州城大賊眾官軍未能遽圍合圍而賊勢漸衰自應設法攻擊以期迅克堅城李鴻章現因戈登悔過輸誠飭令會合郭松林等軍進搆宜興以扼洋人濟賊之路所辦甚是惟戈登性情無常該撫當密飭郭松林等妥為聯絡駕馭藉敦和好而維大局

常勝軍進攻宜興常賊已有首尾不能照應之勢並著督飭李鶴章劉銘傳等分督各營猛攻常城剋日攻拔毋稍遲玩劉秉璋潘鼎新之師屢敗嘉郡之賊進逼城下崇逆廖發受雖遞稟乞降而城中布守甚嚴難保不別有狡謀藉詞緩師李鴻章務當飭令程學啟等乘賊降戰未定之時相機攻剿迅下嘉城以固蘇滬門戶不得稍涉大意至忠侍各逆圖竄皖浙之路疊經諭令曾國藩左宗棠沈

葆楨等嚴扼要隘毋令竄逸李鴻章所稱蘇軍從下游節節仰攻勢不能繞越賊區扼斷竄路等語自係實在情形該撫惟當督率各軍迅赴常宜兩城期與金陵諸軍合兵掃蕩方為妥善程學啟攻剿嘉興正當喫緊且蘇滬守局尚未穩固自難赴調著照該撫所籌俟克嘉郡後酌度情形再行調赴金陵協剿將此由五百里諭令知之○又諭李雲麟奏漢中賊黨分南北中三路盡力東趨一由石

泉漢陰出興安而至鄖陽。一由西鄉出紫陽  
輒坪平利而至竹山。一由甯陝出鎮安而至  
商州。皆於河南之南陽湖北之襄陽一帶會  
齊。該京卿已將興安防守事宜布置。隨即馳  
赴石泉。惟時中路股匪欲由茶鎮等處偷渡  
過江。經水師奮勇截回。北路之賊已由洋縣  
渡江。擾至甯陝。其西鄉踞逆亦欲由瓦房店  
梅湖而出紫陽。李雲麟已派遊擊金殿安等  
進紮紫陽西鄉交界之瓦房店梅湖。督圍堵  
截。而自率各營親兵紮石泉。迤北之饒峯嶺  
相機截勦等語。髮逆東下。勢甚猖獗。李雲麟  
所部無多。恐不能十分得手。現在漢南所屬  
勢必空虛。著劉蓉迅由甯羌一帶進兵。先收  
復漢中郡縣。並分兵接應李雲麟。以防疏失。  
該撫當迅速馳入陝境。振刷精神。力圖滅賊。  
毋稍觀望。李雲麟現紮饒峯嶺。地當石泉甯  
陝之交。既可固中路門戶。亦可截北路竄匪。  
地勢已得。亟應激勵兵勇。分投扼截。出奇制

勝。並須兼顧興安之防。不得稍形疏懈。如兵  
力不敷。即飛咨多隆阿劉蓉調撥。以資得力。  
張集馨現權撫篆。責無旁貸。著即督飭地方  
文武實力防剿。如有兵勇可撥。並須撥赴商  
州要隘。毋任寇氛四竄。方為不負委任。多隆  
阿前奏藍屋即可得手。何以至今尚無信息。  
著即嚴飭穆圖善等設法攻克。以便分兵剿  
洗髮逆。若為一隅所牽掣。致令逆蹤擾及完  
善。恐該大臣不能當此重咎也。此股逆眾既  
有由河南南陽湖北襄陽一帶會齊之謠。官  
文嚴樹森張之萬當各飭派出防兵。實力遏  
截。毋令闖入本境。如能派兵出境。會秦師夾  
擊。更為上策。該督撫等其慎固封守。兼顧鄰  
疆。不得強分畛域。現在張總愚一股尚未撲  
滅。蘇克金馬隊非僧格林沁親自督率。恐難  
得办。皖北應辦事宜。諒有就緒。該親王必須  
移紮豫境。方能盡殄狂氛。肅清中土。著即趕  
緊區畫。一俟皖事布置妥協。後迅即移師進

勅。以慰朝廷拯民水火之意。將此由六百里諭知僧格林沁。官文。多隆阿。嚴樹森。張之萬。劉蓉。李雲麟。並傳諭張集馨知之。○命河南布政使王憲來京。以河南候補道蘇廷魁署布政使。○以江蘇克復江浦等城出力。賞總兵官庾光東。巴圖魯名號。都司張佳友等花翎。守備彭治敷等藍翎。餘加銜升敘有差。辛未。

孝儀純皇后忌辰遣官祭

裕陵。○諭內閣。為政之要。首在足食。各直省州縣。設立常平社倉。國家承平。留以備荒之用。一旦有事。恃以為緩急之需。所以為未雨綢繆之計者。法至善也。近來軍務繁興。寇盜所至地方。每以糧盡被陷。推原其故。總由各州縣恣意侵挪。任令米粟空虛。遇變無所倚賴。又或聞警逃遁。齎盜以糧。以至守禦無資。生民塗炭。興言及此。罪有攸歸。嗣後各省常平社倉。責成督撫大吏。認真整頓。廢者復之。

缺者補之。隨時稽查。凡官倉民倉未動之穀。不得變價提用。至於倉穀已缺。紳民捐貲彌補者。尤應加意保全。務使倉穀豐盈。以期有備無患。此旨著該部迅即通行各省。即著各該督撫將各該州縣倉儲實存若干。有無虧缺。查明據實覆奏。儻復因循玩忽。任聽州縣侵漁虧缺。定將該上司及州縣一併從重懲處。用示朝廷貴粟重農之意。將此通諭知之。○諭議政王軍機大臣等。前因南岸各軍。不敷分布。曾經諭令曾國藩酌量情形。調都興阿所部渡江。協剿復因甘省回匪。鳴張。特命都興阿前赴綏遠城。會同德勒克多爾濟辦理防務。並令富明阿即日前往揚州。接統所部。扼守江北。惟念都興阿老成持重。久於行陣。深得兵心。此次奉命北行。所部揚防兵勇。非有諳練戎機之大員。不能接統。富明阿患病尚未銷假。且北省需才正急。將來尚有另行簡用之處。自應趕緊遴選將才。以備任使。

現在江北文武大員。惟吳棠勦擒。向稱得力。第伊久在清淮一帶督兵。與楊防兵勇素不相習。且恐該漕督一離清河。則徐宿一帶。卽有鞭長莫及之慮。吳棠可否令其接統都興阿所部。若移紮揚州。能否兼顧清淮之處。著曾國藩酌覈具奏。詹啟綸帶兵亦稱得力。如令吳棠赴揚督兵。能否駕馭得宜。詹啟綸本任。係徐州鎮總兵。似可飭令赴任。以重職守。陳國瑞勇敢素著。如令接統楊防。或幫同吳棠辦理。尚能融洽。其能否獨當一面之處。並著曾國藩察看。迅速覆奏。僕吳棠。陳國瑞二員內。均難調派。卽著該大臣於所部各員內。擇其謀勇兼全。才能統眾者。奏請派赴揚州。接帶兵勇。庶江北守禦。不至空虛。且與大江以南。聯為一氣。至黑龍江馬隊。非有諳習情形之大員。不能統率。都興阿前赴綏遠。會辦防剿。所有黑龍江馬隊。卽可令其隨帶北來。藉資得力。其餘都興阿所部兵勇。均著曾國

藩仍遵前旨。分別布置調派。將此由六百里諭令知之。○以江蘇清河縣捐輸軍餉。永廣學額三名。○展緩山東單縣上年被擾村莊額賦。並漕倉河銀有差。

大清穆宗繼天開運受中居正保大定功聖智誠孝信敏恭寬毅皇帝實錄卷之九十二

[illegible]

同治三年甲子二月壬申朔

慈安皇太后安平安安室問

慈禧皇太后安。至庚子皆如之。○諭內閣。劉長佑奏甄別知縣各員請旨分別降革一摺。直隸沙河縣知縣黃鶴飛才識迂拘難膺民社著以府經歷縣丞降補青縣知縣何國鎮辦事竭蹶難勝繁要著卽撤任留省察看以相當簡缺酌量補用候補知縣錢葆延年少輕淨賦性澆薄著卽行革職以重地方而肅吏

清實錄  
同治三年二月上

鎮安並由洋縣渡河徑奔孝義廳境肆行焚掠等情乃係李雲麟昨奏賊竄三路中之一路惟甯陝係省城門戶賊之北竄深屬可虞鎮安之江口及金鎖橋距省非遙已有賊蹤其鄠縣之梁家橋地方更為切近亦經有賊窺伺且為多隆阿大營後路著多隆阿相機布置務將甯陝等處竄賊分兵接剿保全省城重地毋令賊得乘虛撲犯並遵疊次諭旨速將盤屋一城攻拔以免為所牽掣省城內



外防禦著張集馨嚴密籌備其所稱調回大峪口馬隊及該署撫所練省兵豫為籌布暨城中稽察儲積各事宜均須與德興阿等實力辦理以備不虞毋得徒託空言臨時仍復一無所持以為戰守並嚴飭各屬地方激勵民團齊心抵禦力行堅壁清野之法使賊所至罔可掠食勦辦自易得手鳳郡逆回包藏禍心不遵多隆阿所頒禁約且將寶雞前紮回民馬隊擅自調回郡城其以乞撫為暫行緩兵之計已屬確有明徵多隆阿已飭陶茂林將汧隴營伍調回著卽嚴飭痛加勦辦並將花花廟一帶迅速廓清毋稍延誤漢中收復情形究係如何著劉蓉查明據實具奏前有甘省兩當徽縣匪徒欲竄由鳳縣以擾秦疆並著該撫隨時兼顧毋令賊得突越以與漢南出竄之匪潛圖蔓結李雲麟駐軍饒峰嶺兼顧興郡之防務須乘賊窮竄將甯陝及石泉等處兩路逆氛嚴行截勦並飭金殿安

等軍迅由紫陽西鄉一帶截勦南路之賊迅圖掃蕩仍隨時與鄂豫兩省聲息相通聯絡接應以杜賊匪竄越之謀正在寄諭間多隆阿奏到漢南賊已東竄及鳳翔回逆仍須用勦各摺片與張集馨所奏皆同該大臣已調藍斯明等營折回商州並提催劉漢秀等勇營駐紮潼關金順等馬隊前往灃峪等處堵擊鳳翔回匪業經陶茂林進勦略有擒斬卽著嚴督各路之軍奮力防勦毋稍鬆勁將此由六百里諭知多隆阿德興阿劉蓉李雲麟並傳諭張集馨知之○又諭勞崇光等奏黔省下游各屬勦匪獲勝並清鎮等各處軍情現在進攻開州各一摺黔省下游各屬被匪滋擾幾無完區鎮遠黎平之苗匪思南都勻思州各府之教匪蔓延日久經各該地方文武勦辦或攻破賊巢或收復村寨或疊獲勝仗辦理尚屬得手惟各該處匪徒均未全股殄盡地方尚未肅清勞崇光等亟宜籌畫兵

食督飭在事各員乘此聲威速將各股匪徒悉數埽除以期盡絕根株毋留餘孽其石阡府屬之教匪現在勦辦情形若何未據勞崇光等奏及著督飭該處官紳實力勦洗並將現辦情形隨時具奏其滋擾附近省城一帶股匪逼近清鎮攻陷龍里經勞崇光等派兵攔截將賊匪擊退並將龍里縣城克復江內東西南三面均已肅清此股逆匪逼近省垣勢尤猖獗沈宏富等現在分路進攻開州著勞崇光等嚴督該將士等迅將開州城垣攻克並將竄向貴定一路賊匪實力追勦殄除淨盡以期一勞永逸張亮基奏患病懇請賞開署缺已賞假一月調理矣現在黔省羣盜如毛全境蹂躪殆徧開州及尚大坪等處巨匪屢窺省垣逼近肘腋值此軍務喫緊之時該署撫豈得以下游各屬小有勝仗遽為退諉息肩之計耶將此由五百里各諭令知之○以催科不加摘直隸知州高維翰聯傷知

縣王德炳吳履泰陳詠頂帶革休致知州陳鍾祥職○補鑄貴州普安廳同知照磨各關防印信從雲貴總督勞崇光請也○以湖南官軍援勦貴州廣西賊匪出力賞總兵官文恆巴圖魯名號遊擊黃梓材同知銜周祚鎮等花翎都司唐兆松等藍翎餘加銜升敘開復有差○予貴州龍里殉難署知縣余守鍾署典史余起鵬祭葬世職加等余起鵬子福生桂生暨幕友從九品商志孚分別賞卹加等余守鍾建立專祠余起鵬等一併附祀○甲戌遣官祭文昌帝君廟○遣官祭先醫之神○諭議政王軍機大臣等傳諭署陝西巡撫張集馨德興阿片奏西安八旗鰥寡孤獨共六百餘名口向由每年所收盤屋武功興平三縣馬廠地租並裁缺官員空閒地租滿營鋪面房租項下動用每月大口放給錢一千文小口放給錢五百文以資養贍

自陝省軍興以來地方多被蹂躪商賈大半歇業此項養贍之資更屬不敷撥用所有燒獨人等嗷嗷待哺勢不聊生請飭陝省藩庫每月暫行籌撥制錢六百五十千文以濟焚獨等語此項鰥寡孤獨人等養贍無資情殊可憫卽著張集馨飭令藩司無論何項每月暫行籌撥制錢六百五十千文以濟窮困俟滿營馬廠地租等項收有成數仍歸舊章辦理○以京營官軍防勦陝西賊匪出力賞曉

騎校雅爾杭阿五品銜花翎千總艾琨藍翎二等侍衛希蘭扎布等升敘有差○乙亥諭內閣沈葆楨奏請將捐升同知應行開缺之訓導留任辦理團練等語江西上饒縣學訓導吳廷英業經報捐同知例應開缺赴部投供惟據該撫奏稱該員在任年久深得士心歷年辦團亦甚出力吳廷英著無庸開缺仍留上饒縣訓導之任責令辦理團練藉收成效○諭議政王軍機大臣等沈葆楨奏遵覆

近日籌辦防勦情形一摺另片奏探悉賊匪分股肆竄請飭福建一體嚴防等語逆匪竄陷績溪後經唐義訓王開琳會勦該逆棄城狂竄已入淳安縣界其由昌化而來者掠至遂安境上去開化僅百餘里此股為忠逆所部約由浙界入廣信第二股約繞閩界入建昌第三股約由徽北入湖口第四股約由徽南入景鎮均於撫州取齊該逆率銳南趨江省軍情萬分喫重沈葆楨分調各軍於婺源

玉山廣豐等縣駐紮布置尚屬周密惟賊勢太盛剽疾異常稍有疏虞勢必闌入江境著沈葆楨嚴飭各路將領認真防守務與徽浙之師聯絡聲勢互相策應其竄往淳安遂安境內之賊若江省防堵嚴密必將折竄浙東左宗棠進攻餘杭如急切尚難得手自應力顧後路抽調兵勇赴衢嚴一帶相機迎勦兼顧徽防毋稍疏懈該逆既有由閩入江之議不可不豫為之防並著左宗棠徐宗幹迅卽

調派得力兵勇並督飭地方文武嚴扼閩疆毋令竄越毛有銘一軍曾否啟行著曾國藩嚴催該道員迅速渡江或由徽北扼賊入湖口之路或前赴休甯與王開琳會師截剿均著該大臣相機妥為調遣毋落後著上年李榕駐軍彭澤等處熟習該處地勢該運司現紮何處該大臣務當酌度緩急或將此軍調赴上游勦辦自更得力南竄之匪號稱三十萬取廣德自必空虛漂陽為忠侍兩酋巢穴

若由此兩路進兵或扼其咽喉或攻其要害皆為該逆所必救之處縱不能必得而以堅壘相持亦可紮忠侍等逆之足使不得逞以待其敝諒曾國藩李鴻章等亦必能審度及此鮑超是否仍在東壩東壩固係入蘇門戶能否另易他將駐守而以鮑超之軍分路進攻俾賊匪首尾不能相顧即著曾國藩酌量調派曾國荃圍攻金陵近日情形若何賊糧尚足賊守尚堅自未能剋期攻拔曾國藩仍

當飭令曾國荃嚴密合圍斷其接濟以收聚殲之效戈登郭松林進取宜興有無勝仗常州之師曾否得手著李鴻章激勵諸軍迅圖攻克乘勝移軍漂陽蘇省軍威日盛亦足以牽制賊勢使不暇擾我完善以援救金陵漢中據匪率眾東趨據多隆阿張集馨先後奏稱逆酋偽扶王等接南京來信蘇州已經官軍收復調各偽逆回援現由石泉鎮安等縣全股東竄等語該逆無故棄城而走其為金

陵逆酋喊使無疑本日已調僧格林沁駐師豫境力遏賊氛皖北伏莽未清恐僧格林沁拔隊以後餘燼復燃著曾國藩豫作準備防其竄逸句合毋得稍涉大意將此由六百里各諭令知之○又諭張集馨奏湘果各軍已於正月十一日克復漢中郡城髮逆竄至西鄉石泉地界屢撲甯陝廳城均經在城官紳兵勇擊退該逆現由東河賈家營向鎮安而去晝夜行走勢不停留已飛咨湖北河南各

督撫一體嚴防各等語。漢南髮逆全股東趨，意圖竄擾楚豫。為回救金陵，牽掣官軍之計。其謀甚狡。豫省兵力單薄，張總愚一股尚未就殲。若為髮逆所勾結，勦辦必更棘手。僧格林沁布置皖省事，宜已否周妥。著卽酌量情形，督帶兵勇進紮南陽一帶，迎頭截勦。如一時尚難離皖，卽著派得力將弁統帶勁旅，星馳赴豫，會同該省兵勇扼要堵截。毋任闖入腹地。張之萬務當督飭地方文武員弁認真防勦，不可稍有疏失。張曜一軍勦辦張總愚股匪久無成效。著該撫嚴飭該總兵迅速圖攻。剋日蕞事，庶可騰出兵力，痛殲髮逆。若任令外匪入境，與張總愚聯成一片蔓延為患，定惟該撫等是問。決不寬貸。鎮安接壤鄭襄，該逆前次本有會兵襄陽之說，不可不豫籌防範。著官文嚴樹森督飭在防各軍實力截擊，並添派勁兵前赴鄭襄一帶探蹤迎勦。毋稍大意。湖北河南如能嚴密堵遏，該逆窮無

復之難保，不分竄商南。由豫窺晉，著沈桂芬相機設防，妥籌辦理。陝西省城防務雖鬆，張集馨仍當隨時偵探，如城固西鄉之賊竄近子午谷各口，卽著溫德勒克西等痛加勦洗，盤屋連日進攻甚急，夜不撤隊，諒可得手。多隆阿務當激勵將士，迅復堅城，以便分兵策應。顧全大局，將此由六百里加緊諭知。僧格林沁官文多隆阿嚴樹森張之萬沈桂芬並傳諭張集馨知之。

上以祭

社稷壇自是日始齋戒三日。○丙子以神靈顯

應加河南項城縣

城隍神封號曰靈應。○諭內閣戶部奏年內專提京餉限期已滿，請分別勸懲一摺。上年八月間經戶部奏准將山西等省應解同治二年分京餉專提二百五十萬兩限於年內解齊。如有宕延，卽照該部奏定章程分別懲處。茲據戶部奏稱現在限期屆滿，山西省專

提之地丁銀九十萬兩已據儘數完解且歷屆並無帶欠所有山西巡撫布政使均屬籌畫有方顧全大局著吏部咨取職名從優議敘其湖北省地丁銀七萬五千兩鹽釐銀七萬兩直隸省天津關稅銀四萬兩亦俱依限報解該二處應解二年分京餉並能如數清完湖北巡撫布政使暨天津關監督均著交部議敘至江海關代徵九江關洋稅銀八萬兩前經奏准緩解粵海關稅銀十五萬兩僅解到五萬兩亦經該督奏明係因收項較少未能依限報解山東省地丁銀十一萬兩湖南省地丁銀十萬兩並無論何款先提銀二萬兩山西省河東加課羨餘銀七萬兩山東省鹽課銀四萬兩四川省鹽釐銀五萬兩閩海關稅銀十萬兩福建省鹽課銀三萬兩茶稅銀八萬兩均已如數報解各該處應解二年分京餉雖多延宕惟於此次專提之款尚能依限完竣並鎮江關稅銀五千兩業經報

明委解所有各該省將軍督撫監督等著一併免其議處此外河南省欠解地丁驛站銀四萬兩山海關欠解常稅贏餘銀三萬九千餘兩廣東省欠解新舊鹽課銀二萬兩運庫欠解新舊兩息銀一萬兩贛關欠解稅銀九千兩於該部專提之款均未能如數完解河南巡撫布政使廣東鹽運使並山海關贛關各監督均著查取職名交部議處又廣東司庫擬抵運庫雜款銀二萬兩太平關稅銀二萬兩江西省地丁銀三萬兩限內絲毫未解實屬玩延姑念為數無多所有兩廣總督廣東巡撫布政使江西巡撫布政使及太平關監督著從寬免其降革仍交部嚴加議處並著戶部將各該省欠解餉項飛催該督撫等迅於本年四月初旬一律依限解清儻敢仍前玩泄限滿仍不解交即著該部按照奏定處分章程從嚴叅辦○諭議政王軍機大臣等現在署直隸提督訥欽帶兵赴甯夏防剿

直省地方甫就肅清所有各標營整頓操練各事宜均關緊要直隸提督印務不可一日無人以專責成著劉長佑於所部帶兵各員或直隸鎮協各員內遴選才能勝任者保舉數員並將各該員履歷及其材略謀勇明晰開列具奏候旨派署將此諭令知之○又諭明誼等奏需餉甚迫請旨分別借撥飭催一摺據稱甘肅藩庫連年欠撥塔爾巴哈台經費銀十五萬五千餘兩烏魯木齊每年欠撥加屯守卡官兵鹽菜銀一萬四千餘兩雖經奉旨飭催令先撥解銀一二萬兩迄今已逾二年分毫未解上年俄夷兵隊環住各卡倫之外官兵防堵正形喫緊需餉尤形急迫不得已動用所徵茶稅及庫存茶布抵放防夷官兵鹽菜現在又均放罄甘肅回氛甚熾自顧不暇何能再行籌撥而官兵困苦情形實有朝不及夕之勢請飭山西撫臣借撥銀一二萬兩即劃作該省應撥甘肅之餉並請催

烏魯木齊欠餉等語塔爾巴哈台兵餉久形缺乏若不速籌接濟勢必譁潰堪虞關繫實非淺鮮著沈桂芬飭令藩司及河東道無論何款先行借撥銀一二萬兩派委妥員趕緊運解如探明草地可以行走或即由草地解交塔爾巴哈台以備支放此項借撥銀兩沈桂芬並咨照陝甘總督即劃作山西應撥甘肅協餉以清款項並著平瑞於欠解該城九十十一元二等年應撥加屯守卡官兵鹽菜銀兩內趕緊先行籌撥銀數千兩星速解往毋再稍涉遲延將此由四百里各諭令知之○督辦河南團練大臣毛昶熙奏汝陽正陽漸次肅清現赴息縣督勦得旨著即激勵各團將息縣新蔡捻圩一律掃蕩漢中髮逆有紛竄南陽之信並著會同張之萬力籌堵禦毋令擾及完善以副委任毋託空言○丁丑祭先師孔子遣戶部尚書羅惇衍行禮○諭內

閣。順天府尹卞寶第奏請整飭仕途以抑奔競一摺據稱近來各省州縣每多習為鑽營不務公事考其詞訟積案或多至二三百起延至數年不結錢糧則任意虧那緝捕則諸多廢弛各該上司於升調缺出類以空洞考語保題殊非覈實之道請飭各直省督撫府尹等於保題人員將其本任內有無積案及欠解錢糧承緝盜案等事均於疏內聲明其有積案五十起以上承緝盜案五起以上

及徵解錢糧不及七分者均停升轉如該上司徇隱含混具題別經發覺嚴行議處以挽積習等語所奏不為無見州縣為親民之官惟在各省大吏破除情面詳加考察遇有升調缺出務當覈其實在政績為地擇人方足以資治理嗣後各督撫府尹等保題屬員暨揀員請補升調各缺應將該員任內詞訟催科緝捕諸務如何覈實開列之處著吏部議奏尋議嗣後各直省督撫府尹凡保題升調

人員應令於疏內將該員任內有無積案及欠解錢糧承緝未獲盜案詳細聲敘如有已起降調革職參限者概不准其升調其有缺係繁要人地實在相需者亦應據實陳明不得以空洞考語濫行保題從之○又諭劉蓉奏官軍收復漢中府城並截勦中旗賊匪獲勝一摺逆首陳德才久踞漢中府城經劉蓉派令何勝必蕭慶高等督兵進勦正月初十日官軍攻破法慈院賊巢斃賊四五百名十

一日曾克勝等由牟家壩進擊油房街賊壘斬馘二千餘人各軍直薄漢中府城該逆聞大兵雲集意圖出竄官軍乘其慌亂斬關而入四路掩殺接斬一千餘人當將城池克復餘賊向東北奔逸其中旗逆匪竄往城固一帶與陳德才合股經官軍連日在牟家壩木家壩等處節節進勦復殲斃數千名勦辦尚屬得手仍著乘勢進勦盡殲醜類毋任遠颺○諭議政王軍機大臣等曾國藩奏覆陳遵



旨劄調李世忠到營大概情形等語曾國藩疊接李世忠文稱五河縣城業已交出弁勇業已撤遣其滁全等城亦可次第交出該大臣於行文咨令散遣部眾外並給予李世忠信函屬其自赴安慶或派親信大員赴營面商遣勇事宜惟部眾能否悉遵約束該提督能否親赴安慶及江北各城如何派營接防須俟李世忠呈覆到日奏明辦理是曾國藩辦理此事已有端緒李世忠措詞既甚馴謹

曾國藩復能示以不疑諒無不肯赴營之理曾國藩總須俟其交齊各城悉遣部眾後即行設法將該提督調至軍營責令幫同勦賊其事方為萬全河南信息伏莽未除張總愚捻股尚在南召一帶山內近日漢中髮逆復有分竄南陽之信情形甚緊著僧格林沁遵照前旨迅即拔隊起程前赴豫省駐紮調度防剿一切事宜所有李世忠部眾如何妥協遣散所留二千人是分隸各營如何管帶

調遣及交出各城如何派營接防均著責成曾國藩悉心籌畫妥速辦理不可稍涉大意致留後患將此由六百里各密諭知之○又諭前因張集馨多隆阿李雲麟先後奏陳收復漢中留壩賊匪分股東竄疊經諭令多隆阿嚴防陝省隘口湖北河南各督撫迎頭堵截茲據劉蓉奏收復漢中賊匪東竄情形與張集馨等所奏大略相同該逆因蘇州克復意圖回援金陵率眾東竄行走甚疾川軍甫抵漢中城固而逆蹤已及漢陰石泉勢必一由山陽商雒以趨豫省一由興安一帶以窺鄂疆若令竄出山險則平原曠蕩勢必紛擾蔓延堵截更難得手劉蓉務宜督率諸軍星夜東下乘勢追擊一面飭令李雲麟迎頭遏截毋稍鬆勁並著官文嚴樹森飭令襄陽在防將士嚴扼要隘仍添派勁旅馳往策應以厚兵力豫省與陝西商雒交界地方即著張之萬添募兵勇鼓舞鄉團嚴扼山險毋令賊

蹤竄入以期與陝省追師前後夾擊前因豫省兵力較單諭令僧格林沁親督援師或酌派馬隊先赴該省助勦恐一時未能遽到張之萬務當先期豫為布置不可專待援師稍形鬆懈仍一面飭令張曜迅將張總愚股匪殄除毋任與漢中股匪合併陝省商維一帶為入豫門戶著多隆阿添派兵勇與藍斯明一軍迎頭扼截毋任逆蹤闖入豫省劉蓉追勦此股賊匪務當盡力追躡如該匪竄入楚

豫即著越境窮追與楚豫防兵聯絡夾擊不得稍分畛域畫疆自守致令滋蔓難圖如楚豫不能堵截任賊長驅視其竄擾何省惟何省督撫是問儻前截而後不能追惟劉蓉李雲麟是問將此由六百里各諭令知之○引見各衙門保送京察一等人員得旨此次京察一等銓出人員著各該堂官再行出具切實考語交吏部帶領引見銓出之滿洲蒙古中書筆帖式等官著歸入理事同知通判內

遇有缺出與舊記名人一體帶領引見漢軍漢人著交部以撫民同知通判等官分別選用起居注主事興成大理寺左寺丞施德濬太常寺寺丞兼贊禮郎哈達布光祿寺署正覺羅三照太僕寺主事安福侍衛處主事富成欽天監冬官正陳希齡上諭處委署主事榮秀宗人府筆帖式宗室嵩溥通政司經歷溫忠恕太常寺贊禮郎德克繼烏勒登額景文泰讀祝官慶福裕光國子監助教文麟

鮑應鳴鴻臚寺鳴贊覺羅崇勳鑾儀衛鳴贊鞭官海壽欽天監靈臺郎長福順天府司獄查光泰俱著交部照例以應升之缺升用所有內閣侍讀扎拉豐阿等二百六十四員俱著准其一等加一級○欽差大臣曾國藩奏賊陷績溪旋即克復並歙南截勦獲勝得旨遂安賊勢尚重現又擾及開化該處可通休甯婺源常玉兩山之路在在均須嚴防曾國藩當檄飭毛有銘之軍聯絡浙江江西派出

各軍分路截勦迅速掃蕩毋令一賊竄入江西福建境內掣我兵力方為妥善勉之慎之○綏遠城將軍德勒克多爾濟等奏通籌口外防禦兼撫本地良回得旨歸綏一帶防務即著該將軍督飭兩盟旗綠各營嚴密布置毋稍疏懈回民勾結一節仍當隨時加意稽查認真防範不得有名無實又奏遵查烏蘭察布盟官兵在附近黃河駐紮伊克昭盟官兵在該盟沿邊駐紮技藝均尚嫻習足助聲

威至軍械偶有殘缺駝馬間有疲瘵悉令隨時補齊不至臨期貽誤報聞○調山西布政使鄭敦謹為直隸布政使直隸布政使王榕吉為山西布政使○以收復陝西漢中府城並追勦竄匪獲勝開復總兵官何勝必蕭慶高革職處分革不遵調度府經歷張星職守備鄧洪超革職留營○戊寅祭

大社

大稷遣惇親王奕誼恭代行禮

孝淑睿皇后忌辰遣官祭

昌陵○以陝西克復高陵縣城並連破賊巢出力賞協領舒保超哈布委參領阿哩遜博奇圖富興阿關德委防禦富善烏精阿內明佐領德隆阿參將羅玉春劉勝元趙占魁鄭天順蘇長青吳開征遊擊彭飛德張昌怡曾成元吳榮桂袁朝貴都司吳萬餘劉震巴圖魯名號委參領恩凌同知盛慶雲等花翎守備阿拉金等藍翎餘加銜升敘有差○予陝西

高陵等處陣亡參將周加明等一百九十一員祭葬世職加等○己卯諭內閣此次京察引見年至六十五歲以上之戶部員外郎恩澤兵部郎中玉秀中城兵馬司指揮張繼佩理藩院筆帖式盧殿魁均著以原品休致餘著照舊供職○諭議政王軍機大臣等官文等奏皖豫各捻闖入鄂邊派兵堵勦獲勝一摺皖捻王廷幹等由信陽一帶闖入隨州之小林店經楚省兵圍擊走回竄桐柏之平氏

鎮汝捻陳大禧與平氏鎮之捻會合圍撲隨  
州亦經楚軍擊敗現竄棗陽著官文嚴樹森  
督飭周鳳山趙克彰等將棗陽等處捻眾悉  
數殲除前據張之萬奏皖匪由桐泌竄隨州  
之新城集嚴飭黃貴誠尹嘉賓圖塔納拔隊  
追擊何以並未出境會勦黃貴誠前此追賊  
不力僅止摘頂已屬罪重罰輕著該撫即責  
令該員等實力進勦不得強分畛域以鄰為  
壑如再不知愧奮即行嚴叅治罪以儆玩泄

漢中逆股出竄有犯鄖陽之意成大吉一軍  
既不能赴陝即當派令速赴前敵認真迎勦  
若任令闖入楚境與藍二逆一股會合辦理  
更形棘手道員梁作楫一軍小有挫失是否  
足資堵禦並著該督撫妥籌調度毋稍疏虞  
豫省張總愚一股未滅而漢南髮逆有分竄  
南陽之謠陳大禧一股亦恐被擊回竄實有  
防不勝防之勢前諭僧格林沁將皖事布置  
妥協即酌量帶兵進紮南陽一帶否則酌派

將弁帶兵會勦未知該大臣能否即日移營  
前進楚省所需馬隊千名能否勻撥均著妥  
籌辦理迅速具奏吳棠前奏派郭寶昌等駐  
防徐郡統帶陳國瑞所部俟軍務大定再議  
裁撤陳國瑞患病是否業已痊愈其所部之  
四千人皆素經行陣屢著戰功河南現在兵  
微將寡僧格林沁進紮豫省後若得陳國瑞  
一軍歸其調遣必更可資得力著僧格林沁  
吳棠會同妥商調派或陳國瑞一軍能先赴

豫即由張之萬派赴前敵扼要駐紮以資防  
勦將來僧格林沁到豫統歸該大臣調度此  
數省邊防均極喫重該大臣忠勇夙著務須  
通盤籌畫力顧大局用慰廑繫將此由六百  
里各諭令知之○江甯將軍都興阿奏水師  
扼堵小河等處擊賊獲勝得旨小河等處仍  
飭吳全美等水師隨時嚴加防範毋稍鬆懈  
○庚辰遣官祭黑龍潭  
昭靈沛澤龍王之神玉泉山

惠濟慈佑靈護龍王之神昆明湖

安佑普濟沛澤廣生龍王之神密雲縣白龍潭

昭靈廣濟普澤龍王之神○遣官祭圓明園

惠濟祠

河神廟○諭議政王軍機大臣等劉蓉奏官軍大破上元觀賊壘連克城固洋縣兩城現籌分路進剿一摺逆匪陳德才黨與盤踞上元觀而漢中等處匪股出與合併希圖抗拒

經劉蓉督率官軍痛加勦擊大破上元逆壘乘勝連克城固洋縣兩城軍威頗振惟城固敗竄之賊多往西鄉一帶盤逆餘黨復竄華陽勢將徑趨藍屋以圖合併劉蓉現飭何勝必蕭慶高等各營由西鄉一路跟蹤躡剿著卽督飭步步緊躡乘賊喘息未定痛加勦洗將此股餘賊殄滅淨盡李雲麟前奏駐軍饒峰嶺兼顧賊由甯陝興安分竄鄂豫兩途此次劉蓉奏報何以有興安以下文報久梗之

旨劉蓉李雲麟務須聯絡一氣覘賊所趨盡力追剿劉蓉身任陝疆無論賊躡何處均屬責無旁貸其藍逆餘黨既竄華陽將趨藍屋尤應與多隆阿聲息相通後追前擊前經疊諭多隆阿速將藍屋一城攻拔以免全軍為所牽掣何以尚未得手刻下尤應迅拔此城以免賊勢合併並可騰出兵力與劉蓉等會合埽除各路逆氛以清全陝曹燦漳一股又由鳳縣所屬之黃牛鋪一帶敗竄郿縣著多隆阿嚴飭陶茂林所部乘勝追擊與劉蓉派往親兵英毅各營合力埽蕩張集馨前奏賊至西鄉石泉地界屢撲甯陝廳城經在城官紳兵勇擊退由東河賈家營向鎮安而去晝夜行走勢不停留現已竄往何處是否卽係何勝必等從後追剿一股劉蓉李雲麟務須嚴督所部悉力窮追官文嚴樹森昨奏各路軍情於漢中等賊分竄甯陝西鄉之路勢趨郿竹尚未深悉道員梁作楫一軍方於郿西

與藍二順股匪相持。鄖邊再有賊股紛乘此軍勢必難以分應。著官本嚴樹森、標遵疊諭嚴密籌布，增兵堵剿。張之萬於秦豫邊界實力嚴防，仍督令張曜之軍速將張總愚股匪力圖翦滅。毋任久延殘喘。又虞句結為患，張集馨毋得以西安防務較鬆稍涉大意。其子午谷等處防賊復竄之路，總須與溫德勒克西等隨時戒備。劉蓉所部各軍已成尾追之勢，如果能不分畛域窮追不巳，而鄂豫各邊

防兵足遏其前。李雲麟之軍及多隆阿所部又復從中攔截，邀擊諒茲羣醜亦不難就地埽除也。將此由六百里諭知官文、多隆阿、嚴樹森、張之萬、劉蓉、李雲麟，並傳諭張集馨知之。○又諭慶昫奏甯夏回匪不宜議撫等語。據稱恩麟據世職金魁請派署提督定安會辦甯夏招撫事宜。業經准令定安等督同回紉馬朝清前往開導，設法招撫，以顧目前。惟甯郡情形今昔不同，從前回漢互疑兩相仇

殺，原可官為調處。今則戕官踞城，逆回叛跡昭著。若再議撫，任令起滅自由，勢必目無法紀，益肆狂悖。且該逆貪囊已飽，正恐大軍前往勦洗，此時一意主撫，適足墮其緩兵詭計。未可再示羈縻等語。所奏不為無見。逆回反側無常，狡謀百出。金魁係甯郡世職，回官尤難保非串同一氣。故設此計以懈我軍心。著恩麟督飭派出之梁生嶽等軍實力進勦，迅埽逆氛。毋得狃於目前專意辦撫一味粉飾。

養癰貽後，日無窮之患。雷正綰到甘後，疊獲勝仗，軍威較壯。著即統率所部由涇州節節埽蕩，迅速北征。將甯夏逆匪痛加殲滅，以申天討而快人心。慶昫惟當就現有兵力嚴密堵剿，不得專待援師。任令逆回益肆蔓延，鹽固賊匪糾合靈州金積堡逆回分股竄擾甯安宣和等堡，賊蹤蔓延及二三百里。玉泉廣武等營均已失陷，情形極為危急。應如何抽撥勁旅前往救援之處，著照麟等悉心籌畫妥

為布置將此由六百里諭知慶昫。熙麟。雷正綰。並傳諭恩麟知之。○又諭。訥欽奏。歸綏地方安堵。請派員帶兵合力會剿。一摺。訥欽帶兵行經歸化地方安堵。訪察並無甯夏回匪。與該處回民勾結情事。並接德勒克多爾濟文稱。歸綏一帶回漢均各安業。如常。訥欽所帶官兵自可毋庸中路撥留。該署提督現由五寨縣取道前進。著即於行抵榆林。部署一定。速行整隊。前赴甘境。妥籌進剿。救援甯夏等城。毋稍延誤。直隸省續調官兵一千名。由固關入晉。據訥欽奏。已咨會劉長佑。於通永鎮總兵徐廷楷。署山永協副將海綬。二員內酌派一員前往統帶。以資得力。即著該督速行派定。何員前往。一面奏聞。並著沈桂芬。將晉省大同鎮備調兵一千名。飭令會合直省官兵一同進發。於太原大同二鎮總兵及副將內酌派一員管帶前往。以專責成。訥欽仍遵前旨。催提前項直晉兩省官兵迅速前進。

併歸調遣。用厚兵力。而利攻勦。訥欽所部之軍所需糧餉。軍火。仍著劉長佑。沈桂芬。稟遵前旨。源源解濟。毋令缺乏。本日慶昫摺內所陳甯夏回匪情形。於中衛靈州一帶蹂躪。幾徧此等匪徒。從未一受懲創。該處地方望援孔亟。訥欽接此旨後。益當催集官兵迅圖進取。仍於奮勉之中。寓慎重之意。將此由五百里各諭令知之。尋劉長佑奏。徐廷楷統轄全標。未便調派遠出。已飛飭海綬統帶續調官兵馳赴甘省報聞。○又諭。前因明誼等奏。遵籌迅辦分界事宜。當交總理各國事務衙門議奏。本日據該衙門覆奏。請飭明誼等妥為籌度。一摺。烏科二城辦法。前已諭令該將軍等務與該使力行辯駁。令其讓出一帶。不可稍存畏難之見。必不得已。再思其次。至伊犁之索倫等營。其耕種遊牧。既稱均在附近卡外。僅令俄人侵占該四愛曼人等生計攸關。難免構釁。即著常清迅將伊犁所屬地方究

應如何安置議分切實咨覆明誼等查照辦理如議分地面與索倫等愛曼生計無礙即著明誼等於該使臣前來時相機辦理速為了結儻萬難令其占踞該將軍等仍當遵照上年十二月二十八日寄諭令俄國讓出數百里安置此項人眾抑或援照東界辦法仍准此項人眾照常遊牧與之反覆辯結俾立字據以免日後波抑如該夷藉口中國已與該住京公使議定不能稍有所讓明誼等即

告以總理衙門前給該住京公使照會內原有妥商照辦之語自因議單原有不妥之處尚應會同商酌且從前該國分界使臣博普考亦有不必盡照議單之說伊犁等處所分地界既於索倫愛曼等生計有礙則兩國自應按照照會內妥商以期彼此均有裨益夷情雖屬狡詐該將軍等惟當查照總理衙門摺內辯駁各情與之反覆辯論庶於讓地安插及照舊遊牧二者或居其一儻該夷於此

二者均堅執不允或即將烏科等城邊界先行勘分其伊犁境內暫從緩辦以期徐圖補救總之分界事宜固不可於原約之外聽其稍有侵占亦不可使其稍有藉口藉端決裂明誼等摺內所敘常清咨送奏稿各節至今尚未見常清奏到此摺係何時拜發沿途有無遲誤均著常清明誼等查明具奏明誼等所稱不能照常清所擬會同該公使前赴伊犁等節自係實情即由明誼等斟酌妥辦可

也總理衙門摺著鈔給閱看將此由六百里各諭令知之○以正紅旗蒙古副都統奕貴署鑲黃旗護軍統領鑲黃旗漢軍都統春佑署鑲紅旗滿洲都統正黃旗滿洲副都統恩醇署鑲白旗滿洲副都統○賞前任江西南贛鎮總兵官阿隆阿頭等侍衛在大門上行走○以陝西攻破上元觀賊壘克復城固洋縣兩城予提督何勝必等儘先提奏賞總兵官蕭餘勝譚獻定鍾玉勝一品封典副將毛



尚陞參將周東興。彭基秀遊擊李遂勝。巴圖魯名號知州蕭德綱。花翎餘加銜升敘開復有差。○賞江西等省壬戌恩科鄉試年老諸生王汝開等二十八人。舉人副榜有差。○加賞普濟堂功德林。煮賑小米二百石。展期兩月。○辛巳遣官祭昭忠祠。○諭內閣。御史官亮奏。聞直隸灤州稻地村有地棍郭俊傑與鹽店管事鄭九德勾通書吏捏作該州諭帖。令屠戶尹朝等夥充落花生行科。派勒索請

飭查拏嚴懲等語。御史風聞言事苟於國計民生稍有補益。未嘗不立見施行。即使其中偶有毛舉細故。以為塞責者。亦皆優予含容。期於言路無稍阻塞。若如官亮所奏。細民夥充落花生行科一節。瑣屑已極。即使有干例禁。亦不過為州縣衙門所應查辦之事。何得輒行登諸奏牘。似此任情紛紛。撫拾將來伊于胡底。且據所陳該處能否添設落花生行。稱請飭查明辦理。可得牙稅歸公。所見尤為

猥鄙實屬不知大體。姑念該御史本日所奏摺片內尚有可採擇之處。官亮著姑免其置議。即傳旨嚴行申飭。○諭議政王軍機大臣等。有人奏請飭查冒獎一摺。據稱直隸滄州自咸豐三年後。捐輸軍餉至七八萬兩之多。自捐勇費亦有二十萬串。聞有該局紳士呂經翰等通同作弊。於請獎一事蒙混。那移請飭查辦等語。朝廷借資民力。勸辦捐輸。亟應查明獎敘。以資鼓舞。若任令劣紳弊混。殊非

覈實之道。且恐各州縣冒獎之弊尚不止此。著劉長佑確切查明。如果屬實。即行據實奏參。毋稍徇隱。原摺著鈔給閱看。將此諭令知之。○又諭有人奏京北一帶。有地棍高住兒綽號滾地雷。素行不法。有在鄉間燒房搶劫之事。請飭拏辦等語。地棍生事擾害。最為閭閻之患。若如所奏燒房搶劫等情。該地方官何以不嚴行拏辦。著步軍統領衙門順天府各飭幹役嚴密查拏。解交刑部審辦。毋任聞

風遠颺將此各諭令知之○以江蘇官軍救  
援安徽蒙城出力賞總兵官陳國瑞郭寶昌  
一品封典總兵官姚廣武副將陳振邦巴圖  
魯名號遊擊劉鶴年等花翎守備楊九皋等  
藍翎餘加銜升敘開復有差

大清穆宗繼天開運受中居正保大定功聖智  
誠孝信敏恭寬毅皇帝實錄卷之九十三

大清穆宗繼天開運受中居正保大定功聖智  
誠孝信敏恭寬毅皇帝實錄卷之九十四

同治三年甲子二月壬午

孝康章皇后忌辰遣官祭

孝陵○諭議政王軍機大臣等張之萬毛昶熙  
奏汝南各軍攻克息縣八寨並續克五寨暨  
勦辦李青店踞匪情形各摺片汝南官軍所  
在克捷勦辦甚為得手著張之萬毛昶熙仍  
卽督飭各軍乘勝進勦務將息縣境內伏莽  
一律肅清毋留餘孽張總愚盤踞李青店雖  
經張曜等率軍迎勦殲斃悍賊多名該逆眾  
仍負隅死拒未能十分得手該撫等現派蘇

克金等馬步各隊分路布置以防出竄仍恐兵力尚單無以固嵩洛之防復將尹嘉賓步隊從南陽移赴馬市坪以防要隘所籌均尚妥協此股逆匪依山踞險抗拒官兵實屬異常狡悍現在漢中賊匪紛竄圖擾南陽一帶若復與張逆勾結將來辦理更形棘手著張之萬察度賊情如山中之糧將盡卽應實力進攻滅此朝食否則圍師必闕或虛其一面誘賊出險令蘇克金等馬隊遙為設伏並令各隊分路兜擊以期一鼓殄除斷不可任令四竄再有蔓延將此由六百里各諭令知之○又諭毛鴻賓奏官軍攻勦三山賊巢生擒首逆一摺匪首鄧二尺七於廣東連陽一帶糾眾肆擾恃險負隅歷年進勦官兵均以山勢深阻未能覆其巢穴此次臬司張運蘭移得勝之師乘勢亟進竟將積年巨憝一鼓蕩平勦辦迅速甚屬可嘉惟該處界連數省峻嶺危灘萬重險阻若不將餘匪搜捕淨盡恐

官軍一撤必至又成嘯聚餘燼復燃著毛鴻賓郭嵩壽督飭在事文武實力搜捕務絕根株並將應辦善後事宜詳細妥籌認真區畫以期一勞永逸將此由五百里各諭令知之○引見內務府三院等處保送京察一等人員得旨此次內務府三院等處京察一等人員著該堂官再行出具切實考語帶領引見鈐出之堂主事茂林斌安御茶膳房主事海緒堂委署主事文銘造辦處六品庫掌英俊堂筆帖式連英恆杰雙有海金玉桂祥豐那隆阿鍾需文璫富銘廣敏海齡祥慶文熾稽察內務府事務監察御史衙門筆帖式定安廣儲司筆帖式存壽保英都虞司筆帖式廣熙會計司筆帖式連福掌儀司筆帖式延啟營造司筆帖式廣裕官房租庫筆帖式慧秀御藥房筆帖式詳通御茶膳房筆帖式吉拉明阿造辦處筆帖式富祥上駟院筆帖式端樸武備院委署主事桂陞武備院筆帖

式長有舒瑞奉宸苑六品苑丞明山。八品苑丞質善靜明園六品苑丞平治靜明園筆帖式廷樑俱著交吏部記名照例選用。所有一等官員筆帖式達他等員俱著准其一等加一級。至年已逾歲之奉宸苑主事吉成靜明園七品苑副長斌年力就衰均著以原品休致。○以廣東攻克三山賊巢生擒首逆予按察使張運蘭等升敘有差陣亡遊擊易永茂守備熊萬隆把總劉明輝祭葬世職。○以河

南李青店辦團出力賞同知銜葉型曾等藍翎予陣亡千總李永元王朝元把總王金智祭葬世職。○予廣西節年殉難紳民婦女一萬二百九十二名口分別旌卹如例。○癸未諭內閣何廷謙奏遵保勤學敦品之貢生請量予錄用等語。江西廬陵縣歲貢生胡友梅據該學政奏稱品端學粹年力正強著卽飭令來京交吏部帶領引見。○又諭張集馨奏分別舉劾官員以昭勸懲一摺除單內保薦

各員另行存記外陝西榆林縣知縣楊廷翰性情貪鄙輿論沸騰著卽行革職永不敘用。懷遠縣知縣鄒常泰病體戀棧諸事廢弛紫陽縣知縣呂生律行同市井難膺民社分缺間用知縣李恩錫嗜好甚深不堪造就均著勒令休致候補知縣岳熙前神木縣典史高鳳岡同辦郭工貪鄙罔利候補府經歷縣丞魏紫封任性妄為聲名狼藉均著一併革職署醴泉縣知縣梁書城質性麤浮辦事草率

著以府經歷縣丞歸部銓選。○諭議政王軍機大臣等李鴻章奏官軍克復宜興荆溪縣城乘勝進圖溧陽並進規嘉興克壘獲勝各摺片宜荆二縣濱臨太湖界連三郡此次戈登奮勇自效李鴻章復抽派精銳會同前往先破附城十餘壘擊退溧陽大股援賊遂拔名城從此蘇錫之防益固常州之克可期實與大局有裨據該撫片稱宜荆既復自應乘勝進圖溧陽戈登郭松林等水陸六七千人

業於二十七八日陸續進發。惟該處為李逆老巢。金陵後路。羣賊所必爭之地。儻孤軍深入。面面受敵。深可危慮。著李鴻章密飭戈登等步步為營。務須謀出萬全。不可輕進貪功。致有疏失。曾國藩當檄飭鮑超東壩。深水防軍。前後兜擊。以期聲勢聯絡。西路賊情。地勢以常州為關鍵。常郡果能得手。則旁郡更成破竹之勢。李鴻章即催令李鶴章。劉銘傳。設法攻取。先破城外賊壘。自必更有把握。嘉興賊糧尚足。逆酋志在死守。程學啟等已攻破東北門外賊壘多座。督軍直抵城根。賊眾雖多。殲斃我軍亦不免傷亡。崇逆前此詐降以緩師期。今復堅守以待援賊。實屬異常兇狡。該撫務令程學啟等妥速籌攻。毋稍鬆勁。湖州踞逆圖擾盛澤。平望。撲犯後路。為李朝斌等水師擊敗。並著督飭各軍認真防剿。毋令與嘉興城逆勾合。正在寄諭間。據沈葆楨奏。髮逆分股內竄。精毅等營截剿。大獲全勝。餘

逆從歇嶺翻山。竄德興。南鄉。入玉山。界現在淳遂一帶。後股仍源源而來。該撫飛催各營迎剿。惟人數尚單。恐不足濟事。又咨曾國藩另調一軍守祁門。俾繼果營得以回顧本省等語。髮逆上竄江西。關係左宗棠後路。該省又為曾國藩軍營餉需所自出。若有疏虞。牽掣東南全局。其患不小。刻下江路肅清。彭玉麟。楊岳斌二軍。數月以來。水師均無戰事。著曾國藩即派楊岳斌酌帶戰船數百號。駛赴鄱湖。擇要駐紮。江忠義所部現歸陳鳴志等統帶。威望尚輕。而所調之江忠朝一時恐難赴營。此軍即可交楊岳斌兼行統帶。該提督謀勇素著。諒能認真督辦。力顧江防。曾國藩仍當隨時與沈葆楨商酌。妥籌策應。以期萬全無失。沈葆楨即就現有兵力。嚴飭各路將弁。實力堵剿。毋稍鬆懈。左宗棠仍遵前旨。密防衢嚴一帶。並於江浙交界處所。添派勁旅。會同江省防軍。合力夾擊。其由歇嶺竄德興

入玉山之賊人數究有若干。官軍戰守情形並著沈葆楨續行馳奏。以慰廛念。將此由六百里各諭令知之。○又諭。憚世臨奏黔省髮逆及苗教各匪日益猖獗。請留田興恕辦理鳳晃防務一摺。覽奏不勝詫異。田興恕殺害教民一案。法國使臣哥士者及柏爾德密從前均主抵償之說。詞意甚屬決絕。迨經總理衙門援引中國逢恩減等之例。與之極力剖辯。柏爾德密意漸活動。惟稱拏問之人並未

監禁。必須監禁後。照中國例辦理。給予照會。方可辦結等語。此事已有轉機。仍須慎密。未便令各教士等知其底蘊。致有阻撓。是以疊經密諭崇實駱秉章將田興恕查提到川。羈禁。並令勞崇光張亮基迅速查辦。奏結。田興恕在黔數年。未嘗不著有戰功。惟其驕侈荒淫。貽誤軍務。疊被彈劾。若律以軍法。原應從重治罪。第既有牽涉外國之案。又不得不曲予矜全。以維中國體制。田興恕既知自悔前

非。自應聞命即行赴川。聽候查辦。豈可逍遙事外。疑畏不前。致令可以通融了結之案。枝節復生。又成固結不解之禍。憚世臨在楚有年。豈不稔聞田興恕此案原委。乃必欲為田興恕飾詞。瀆奏。意圖見好。顧僚友之私情。忘國家之大計。為封疆大臣者。豈可如此耶。著傳旨嚴行申飭。並著憚世臨派員將田興恕押解入川。聽候崇實駱秉章查辦。或選其平日相信之人。密告以朝廷曲全之意。使之知

感。知懼。帖然就道。儻該撫不能督令田興恕赴川。仍任其違旨逗遛。必惟憚世臨是問。至黔省髮逆及苗教各匪。疊經諭令楚粵黔三省督撫合兵會剿。鳳晃邊防緊要。湖南武弁中豈無一人可派。必欲用一斷不可再往之田興恕辦防。不知憚世臨是何居心。著該撫另選妥員。酌撥勁旅。前赴該處扼要堵截。其田興恕所帶之勇。及該撫令其新募之勇。並著留於湖南。以厚兵力。毋令田興恕攜帶入

川致外國人有所藉口。另生枝節。憚世臨接奉此旨。止許親自折閱。詳慎妥辦。不准幕友及湖南紳士得以與聞。卽該撫選派田興恕相信之人。亦應擇慎重可靠者前往。儻機事不密。致令稍有傳播。必將憚世臨治罪。決不寬貸。將此由六百里密諭知之。○復引見京察一等鈐出人員。得旨。除文增洪調緯董文溥孫家鼐全善王祺海桂明師長灼寅賓威麟李文敏希凱海容陳夢蘭李新蔭增壽榮光壽昌承繼華祝三毋庸記名外。宗室載慶麟書均著以四五品京堂補用。英良昆厚該二員本係專用道員。著交軍機處記名。仍專以道員用。扎拉豐阿許庚身沈秉成梁肇煌丁培鑄胡瑞瀾廣壽趙新嵩連恆明耑崑張觀鈞舒濟色普哲訥高貢齡林述訓王文韶瑞琛海鍾英祥奇克慎德恩謝榮熙國英福兆泰逢年續慶恩聯定祥劉惠人嵩壽丁壽祺溥泰于凌辰杜義山鄂雲布錫璋松瑞文

吉金鈞延楷裘德俊王蘭谷呂序程綸恩方學蘇俱著交軍機處記名。以道府用。福善著記名。以關差道府用。○補行引見京察一等人員。得旨。內閣典籍何承禧袁鴻耑均著交部。照例以應升之缺升用。所有何承禧等三員。俱准其一等加一級。○理藩院奏阿拉善親王貢桑珠爾默特報稱。甯夏逆回猖獗。該旗逼近賊氛。請飭鄰近旗分領兵赴援。並懇賞賜大礮火器。以資防勦。得旨。著理藩院卽行轉飭鄰近內外各盟。厚集兵力。迅卽馳抵阿拉善。協力嚴防。毋稍延緩。其所謂大礮火器。卽著理藩院行知綏遠城將軍德勒克多爾濟酌量撥給。仍飭該王懍遵前旨。認真防堵。勿任回匪闖入本境。至鄂爾多斯旗為該旗東界。地方遼闊。著一併由理藩院轉飭該處一體嚴防。毋令東竄。○以衰劣不職。江西都司常安守備胡功成等。分別勒休革職。○以庸劣不職。廣東參將黃維寶李新明等。分

別革職降補○以克復江蘇宜興荆溪兩縣城賞總兵官俞卿一品封典總兵官李恆嵩副將黃武壽宋德鴻高占彪遊擊廖玉林巴圖魯名號餘加銜升敘有差○以陝西鎮安縣城被賊竄陷旋即收復免已革知縣張勤罪革典史馮永泰千總馬進喜職仍留營予殉難署遊擊金鎮西祭葬世職加等○予江西歇嶺陣亡守備龍有勝祭葬世職加等○予江西因公淹歿知縣夏掄謨祭葬卹廕

○甲申春分朝

日於東郊遣順承郡王慶恩恭代行禮○荊州將軍富明阿奏遵旨前赴揚防得旨該將軍已赴揚防惟傷口尚未全愈仍須調治江北情形稍鬆該將軍在揚防坐鎮指揮調度之餘兼可安心攝養所盼日就痊愈以慰廑念○以鑲黃旗滿洲副都統克興阿署正紅旗滿洲副都統○乙酉諭議政王軍機大臣等前因崇實駱秉章奏密陳西藏情形請權宜

辦理當經密諭崇實等催令滿慶等到川卽令李玉圃迅速來京並諭福濟景紋趕緊赴藏茲據福濟奏遵旨起程行抵雅郡據吏致康稟稱在鑪城竭力開導明正土司已允設站支應烏拉裏塘土司因藏中復派糧員李玉圃帶兵出勦瞻對據裏塘土司呈出藏中來信現有大兵來勦瞻對復狡懇調兵助勦又執拗不卽設站等情現在由鑪城以至乍察惟遞送文報夷人可以單身往來中間夾

壩橫行商旅裹足卽文報亦常被劫失實難隻身前進惟藏事敗壞由於李玉圃暗為主謀滿慶任聽愚弄該二員如不卽離藏必仍藉勦辦瞻對以逞狡謀不特土司撤站有所藉口驛路終難疏通更恐瞻對邊釁愈啟愈大李玉圃與汪曲結布朋比為奸兵權在手其意更不可測請飭滿慶速將李玉圃所帶藏兵撤回並諭滿慶李玉圃迅速赴京等語滿慶等懷私挾詐把持藏務福濟景紋一日



不能到藏。禍患一日不了。著福濟景紋仍遵前旨。趕緊由川起程前往。毋再遷延推諉。若仍一味畏葸。置大局於不顧。恐福濟景紋不能當此重罪也。前次寄諭。恐崇實等尚未接到。著再鈔給閱看。前照崇實駱秉章所請。另有寄滿慶等諭旨一道。仍將崇實駱秉章福濟景紋四人銜名敘入。以釋滿慶等疑慮。亦未識曾否奉到。並再一併鈔給閱看。此次仍有另寄滿慶等諭旨一道。著崇實等迅即行文知照。將此由六百里各密諭知之。○又諭前因呼徵控訴各語。難以憑信。並辦理藏務不能秉公。斷難復令回藏。諭令滿慶等責成汪曲結布協辦藏務。勦辦瞻對之藏兵。即行撤回。查明李玉圃勞績。會同崇實等保奏。送部引見。並令滿慶回京。催福濟景紋迅速赴藏。茲據福濟奏遵旨起程。行抵雅郡。因裏塘土司不肯設站。未能前進等語。藏中事務。關係緊要。福濟等亟應星馳前往。以資安輯。著

福濟景紋仍遵前旨。趕緊赴藏。並著滿慶等曉諭明正等土司。照常安設驛站。毋令再有阻滯。所有一切辦法。已於本年正月初三日寄諭內詳細指示。著崇實駱秉章福濟景紋滿慶恩慶懍遵前旨。迅速妥為辦理。即行奏聞。毋再稍涉遷延。將此由六百里各諭令知之。○丙戌。遣官祭文昌帝君廟。○諭內閣。恭親王等奏各省欠解工程銀兩。請將解銀未足四成及絲毫未解之各該督撫監督。分別議處等語。除山西省已於本年正月照數撥解外。所有限內交齊四成銀兩之山東巡撫著交部議敘。其解銀未足四成及絲毫未解之河南陝西四川廣東各該督撫監督等。均著交部分別議處。定陵工程。關係緊要。豈容任意遲延。該督撫監督等。務當激發天良。趕緊完解。仍限於本年四五月間。掃數解齊。不得再有帶欠。致干重咎。○山西巡撫沈桂芬奏前調東省楚勇。毋

庸赴晉得旨此項勇丁既無須撥赴北路卽著該撫轉飭該帶勇員弁徑赴多隆阿軍營以資防勦○以正紅旗漢軍副都統增慶署鑲白旗護軍統領○以署直隸通永鎮總兵官徐廷楷署提督○予湖北節年陣亡殉難外委劉日新暨紳民婦女等一千四百六員名口分別旌卹如例○展緩山西臨汾縣歉收地方舊欠額賦○丁亥遣官祭

關帝廟○諭內閣僧格林沁奏幫辦大員懇

請回旗補行穿孝等語杭州將軍國瑞著准其回旗葬親補行穿孝俟孝滿後仍著前赴僧格林沁軍營幫辦軍務○又諭僧格林沁奏審明苗逆黨與定擬罪名等語苗黨潘塏並其子潘立勳前被擒匪裏去投誠後因其勦擒出力辦理霍邱一帶團練給予官階自應實心報效乃苗逆叛亂後膽敢助給船隻運送銀米管理三河尖釐卡又復倚勢把持明隨官軍辦事暗與苗逆勾通覈其情罪萬

難寬貸姑念苗逆此次圍攻蒙城該犯等並未同往助逆尚可稍從末減五品藍翎候補知縣潘塏參將銜藍翎遊擊潘立勳均著卽行革職發往烏里雅蘇台交該將軍嚴加管束苗逆倡亂兇燄甚張其間被徧脅從者在多有而潘塏父子以一團民因勦擒微勞屢保官職乃竟不知大義首鼠兩端非若鄉愚被徧出於無奈是用從重懲辦此外被脅小民業已悔過自新真心歸正朝廷斷不苛

其既往也將此通諭知之○諭議政王軍機大臣等僧格林沁奏撥兵赴豫會勦各摺片張總愚等擒股負嵎山中該大臣已撥步隊兵勇二千三百餘名派提督傳振邦督帶前往魯山一帶會同蘇克金勦辦於正月二十八日起程惟因雨雪泥濘未能迅速前進僧格林沁擬俟喬松年月內到皖將皖北事宜面為商定卽行移紮豫境所籌均屬周妥傳振邦一軍連日應已到豫著張之萬嚴催張

曜會同傅振邦等設法進攻務將張總愚一股就地殲除毋再延緩干咎該逆乞降之說無非冀緩師期懈我兵力萬勿為其所惑致有疏失漢中髮逆陳得才大股本日據多隆阿奏前隊已到山陽後隊尚在甯陝一帶刻下曾否竄近豫境何以未見張之萬奏報著遴派妥員勤加偵探早為防備以免臨事掣肘喬松年計可卽日到皖僧格林沁務當趕緊部署俟與喬松年見面商酌辦法後卽行移紮豫境相機調度以資控制將此由六百里各諭令知之○又諭多隆阿奏連日圍攻盤屋及各路防剿情形一摺據稱盤屋城身甚厚賊守甚堅官軍連日併力進攻受傷至三千餘人之多仍未得手各情該逆固係積年猾賊長於守禦惟前據奏稱盤屋業已合圍何以賊之米糧火藥未見匱乏多隆阿頓兵堅城曠日持久又何以不知出奇用計絕其糧道使之內亂徒令傷損精銳如此之多

覽奏實深憤懣著多隆阿迅卽相機妥辦趕緊攻克以期轉敗為功如再有挫失或日久不能得手惟多隆阿是問鳳翔北山回逆經陶茂林剿敗西竄官軍已抵汧陽著飭陶茂林盡力勦洗毋再輕易言撫貽誤事機並飭曹克忠由招賢鎮進剿雨亭寺等處之賊期與雷正綰等會同夾擊肅清陝境進規平涼髮逆陳得才大股前隊已到山陽後隊尚在甯陝一帶劉蓉現至漢中自應恪遵前旨緊躡賊蹤分投追剿此股逆匪因金逆首調回棄城東竄剽疾異常若追軍少事遷延勢必蔓延楚豫劉蓉務當激勵諸軍迅速前進不得以收復漢中郡縣遂可塞責李雲麟駐紮饒峰嶺曾否與賊接仗東路之防是其專責何以日久竟無奏報著卽督率所部偵賊所向與劉蓉追賊之軍前後兜剿盡殲醜類儻勦辦不力任賊東趨恐劉蓉李雲麟均不能當此重咎也將此由六百里各諭令知之○

復引見內務府三院等處京察一等鈐出人  
員。得旨除祿安綸增世榮英綬文哲歡崇禮  
文錦文明永存毋庸記名外。師曾廣順容保  
錫祉蒿林啟裕春年慶林廣麟連明恆延錫  
奎英履忠廣俱著交軍機處記名。○山東巡  
撫閻敬銘奏請停止畝捐。得旨著照所請。該  
撫卽出示曉諭。其應徵地丁正項務當實力  
催解。不得意存觀望。○戊子諭議政王軍機  
大臣等。王明等奏續獲首夥各犯正法。並酌

撤官兵一摺。逆首滾地雷王五餘黨被擊潛  
匿。經王明等派令協領穆錦等帶兵按捕。陸  
續拏獲李青山等九十二名。訊明就地正法。  
辦理尚屬認真。其朱廣幅等三十名。現交地  
方官審訊。卽著飭令趕緊訊明。按律懲辦。前  
經王明等酌留官兵三百名。交穆錦管帶。按  
捕餘匪。茲既據該將軍等奏稱。餘匪遠遁無  
蹤。此項官兵久留在外。未免虛耗糧餉。著卽  
照所議裁撤歸伍。以節經費。惟此股首夥各

匪多係邊外奸民。官兵旣撤之後。難保不復  
行潛回勾結。不可不隨時嚴密訪察。以杜亂  
萌。著王明寶善寶珣德椿景綸麟瑞嚴飭奉  
天吉林兩省接壤地方官。無分畛域。實力躡  
緝。以期盡絕根株。使奸宄無從託足。並著王  
明等飭令署昌圖廳通判劉景醇激勵民團  
隨時防範。毋令日久稍形疏懈。將此各諭令  
知之。○又諭張凱嵩奏官軍按勦梧州府屬  
賊匪次第戡定。並派兵會勦李七匪黨。遵覆

各屬賊股及擬分別撫勦情形。各摺片。粵西  
梧州一府。界連東省。壤接潯州。積年兵燹。為  
寇盜出沒之區。其間被脅及甘心附賊各村  
寨。均經該撫督飭文武及地方官紳。乘容岑  
兩縣收復。軍威克振。次第勦撫。蒼梧藤縣各  
屬之桃源垌鶯兒寨糯洞等賊巢。其蒼梧所  
屬匪徒最多之古薩等村。亦已歸誠反正。廣  
平一墟。賊勢尤悍。復經攻破。僅餘逆首李木  
火率其殘黨。遁匿墟外高巖。苟延殘喘。著張

凱嵩仍督各軍乘勢圍攻務將李木火殲擒掃除餘黨毋留餘孽其各從逆之處究竟有無遺孽未清就撫之民如何方能約束盡善尤須督飭帶兵文武及各地方官徹底清釐妥實經理岑溪縣屬之撫民梅新一股尚在逗遛未回西甯本籍尤須防其反側復生著飭令道員蔣澤春唐啟蔭勒催起程沿途並飭嚴加鈐束仍將容縣善後一切徹底妥辦李幅猷餘黨李七盤踞黎平之四寨河句結頑苗為患經該撫派兵會同黔楚官軍合力進剿該匪復由丙妹渡河折竄蔓延古州之三百生苗地方與羅城思恩兩縣毗連著卽督令派出副將黃仲慶等迅速探明賊蹤徑趨黔境與楚黔各軍奮力兜剿痛加掃除此次越境援剿尚能竭力籌兵撥餉畛域不分所辦尚屬妥協其遵查粵西各屬股匪剿撫將次肅清所擬善後八條通行辦理亦屬妥善第須實力奉行教養兼施以求實效毋得

徒託空言以為塞責仍將黃三踰伏平天一寨督飭劉坤一激勵各軍迅速攻擣掃穴擒渠一俟該逆削平卽將潯軍分起進剿思南鎮太各屬土匪以次戡除速清邊圉泗城一屬雖無股匪尚與滇黔毗境時虞鄰匪侵軼卽著嚴飭該地方官吏聯絡鄉團實力備防桂平柳慶等屬現在雖已無賊而瘡痍滿目百廢未舉且與貴州黎平仍屬毗連張凱嵩當加意撫輯整頓不得以為地方遂可無事隨時慎選廉能之吏能知教養者以善其後毋任闖茸濫厠以致閭閻擾累復滋事端此次梧州所屬剿撫出力人等准其擇尤彙案保奏毋許冒濫將此由五百里諭令知之○神機營奏請儲備旗兵器械並置造款項豫行撥借得旨均著照所議辦理八旗新補兵丁所領庫銀原為酌置器械之用嗣後八旗滿蒙兵丁應如何一半置備弓箭一半酌添火槍及添置火槍後應如何逐時操練及酌

定合操各項章程之處。即著八旗滿蒙都統妥議具奏。至置造款項。現由神機營暫為撥借。應如何於新補兵丁庫銀內酌定成數扣還借款。並不致苦累兵丁之處。並著一併議奏。各該旗滿蒙都統務當振刷精神。力求實效。以期有備無患。不得畏難苟安。奉行故事。至八旗漢軍兵丁。本經置有火槍。該都統等仍當隨時教練。亦不得有名無實。所請簡派監造大臣。著派醇郡王景壽。奕山。覈實辦理。

○補鑄福建臺灣道廣西潯州府知府經歷儒學太平府儒學桂平縣知縣儒學武宣縣知縣儒學崇善縣知縣儒學左州儒學甯明州知州龍英土州州同安平土州州判穆樂墟大黃江大烏墟秦川鄉廓鎮盧司等巡檢潯州協副將濱州營參將守備隆林營遊擊各關防印信條記。從巡撫徐宗幹張凱嵩請也。○庚寅以神靈顯應。頒江蘇通州城隍廟扁額曰宣威盪寇。

僧伽大聖殿扁額曰功昭淮海。○諭議政王軍機大臣等。都察院奏江蘇士民殷自芳等以要工久緩。懇請興辦等情。赴該衙門呈訴。據稱該生等田畝坐落山陽鹽城二縣境內。市河十字河小市河等處。市河上通郡城文渠十字河小市河皆其分支。蜿蜒百里。東注於馬家蕩。沿河民田數千頃。旱則資其灌溉。潦則資其宣洩。自乾隆八年大挑以後。迄今一百餘年。河淤田廢。水旱均易成災。同治元

年。該士民公稟府縣。請挑濬築壩。引運河水入市河。經該府批准。轉詳漕督。詣勘二年正月興工。嗣因御史以地方官勒捐等情入奏。工即停止。雖經漕督查明覆奏。並無辦理不善之處。而承辦官紳亦遂畏累遷延。現在要工久懸。懇請奏明興辦。以蘇民困等語。該處市河等渠。關繫民田數千頃。淤墊日久。小民生計維艱。自應趕緊興修。藉資灌溉。著曾國藩吳棠李鴻章迅速查明。酌覈辦理。該處曾

經吳崇親勘興辦何以旋即停工。是否有無窒礙。並著該督撫據實奏聞。原呈著鈔給閱看。將此各諭令知之。○又諭曾國藩奏官軍攻克鍾山石壘。遂合金陵城圍一摺。另片奏竄賊窺伺撫建。並防侍堵等逆。接續上竄等語。正月十六七等日。曾國藩親督諸將攻取鍾山石壘。奪回天保偽城。派營戍守。並紮營扼斷神策太平兩門大路。金陵城北之圍。自此始合。所辦甚合機宜。惟是官兵不滿五萬。分布地段甚長。深慮困獸猶鬪。急思一逞。曾國藩務當飭令曾國荃督率諸將。穩慎進攻。晝夜嚴防。必須就地殄除。毋任竄突他處。以竟全功。而膺懋賞。該大臣所稱侍逆漂陽老巢。新為蘇軍所破。聞該逆率其黨與歸併湖州。目下湖州賊數極多。由安吉孝豐昌化遂安以竄江西。毫無阻隔等語。著左宗棠添調得力兵勇。遏截由昌化遂安上竄江西之路。並嚴防衢嚴等處。俟餘杭克復。設法進規湖

州。以牽賊勢。侍逆之黨。分股內犯。雖屢經江西防軍擊敗。而絕無返顧之心。現已繞至廣豐。又繞至鉛山湖坊。勢將蔓延腹地。窺伺撫建兩郡。曾國藩已調席寶田軍援廣玉撫建等處。又與沈葆楨咨商添調繼果等營。回顧江西腹地。即著沈葆楨從長計議。飭令在防將弁認真堵剿。勿令一賊闖入腹地。如侍堵等逆接續上竄。江西防兵單薄。曾國藩仍當調派勁旅。趕緊援救。以固藩籬。而維大局。前諭曾國藩派楊岳斌酌帶戰船數百號駛赴鄱陽湖。擇要駐紮。並將江忠義舊部歸其統帶。此時江省防務十分喫緊。該督撫務即籌商妥調。以期萬全無失。將此由六百里各諭令知之。○又諭富明阿奏布置江防情形一摺。另片奏逆眾竄奔楊庫常熟。妥籌北岸防剿等語。丹句逆眾添集黨與。窺犯江陰。屢撲包港小河等處。雖經水師擊退。而逆計詭譎時圖一逞。現在忠逆之子及偽潮王等率眾



五六萬從江陰南山外花山直奔楊庫常熟等處賊蹤飄忽散布沿江難保不聲東擊西肆志北竄富明阿現派撥兵勇二千駐紮四墩子靖江兩處分為犄角以為廖長明一軍策應並飭吳全美嚴督師船晝夜梭巡加意防範又恐揚防兵分見單擬調蔣壩防軍回揚藉資抽撥所籌均尚周妥即著該將軍督率在防將弁實力防剿毋任該逆得以竄越總兵安勇所部一軍既經富明阿撤回揚防

其蔣壩地關緊要應否仍設防兵即由吳棠就近酌度情形妥籌辦理江陰防務前據李鴻章奏有駱國忠一軍足資守禦此時賊蹤已徧縣城且分竄楊庫常熟一帶該處軍情日形喫緊該撫務當督飭在事文武兵勇痛加勦洗盡殄賊氛毋令蔓延為患都興阿現已起程北上所有江甯將軍印務即著富明阿暫行兼署以重職守揚防現形喫重自應先顧藩籬總兵詹啟綸著照富明阿所請俟

防務稍鬆再行前赴鎮城密探軍情妥籌會剿將此由六百里各諭令知之○又諭李雲麟秦川楚各軍齊進髮逆避擊狂奔及收復西鄉各情形一摺髮逆分股東竄經李雲麟督帶兵勇在饒峰嶺截剿進赴土門埡扶逆餘黨尚踞兩河官軍奮擊逆眾宵遁偽天將馬逆繼至亦被官軍擊敗該逆等知中路難犯欲由石泉漢陰交界之三官廟直犯興安抄楚軍後路官軍分投防堵該逆在鎮安屬

之手爬巖一帶游弋其啟逆一股因石泉有備仍折回甯陝邱逆亦率黨北趨併歸一處已由鎮安至西鄉之子午汛首尾不斷繇互三百里而藍二順股匪復由鄖西擾至洵陽縣屬之蜀河是興安上下均形喫重雖經李雲麟分派水陸各軍聯絡鄉團嚴密防守第賊勢太盛必須前後夾擊始可遏截狂氛著李雲麟嚴飭各軍認真堵禦固守興安郡縣毋為該匪所乘洋縣城固業經劉蓉收復李



又復收復西鄉。計兩軍相去不遠。何以劉荅李雲麟奏報聲息仍未相通。著劉荅懍遵前旨。速飭何勝必蕭慶高等。迅卽督勇前進。緊躡賊蹤。務與李雲麟會合。兜剿就地殲除。儻任意遷延。不以追賊為事。將來東路稍有疏失。必惟劉荅李雲麟是問。甯陝一帶之賊。前據多隆阿奏相機遏剿。不任蔓延。現在邱逆又復北趨。西安門戶之防。最關緊要。多隆阿務當妥籌防剿。毋稍大意。並著張集馨將省垣防守事宜。豫作準備。仍協同溫德勒克西等。嚴防子午谷等處要隘。毋得稍有疏虞。藍二順一股。現已折竄洵陽。鄭西情形稍鬆。官太嚴樹森當不分畛域。飛飭梁作楫等。越境追剿。毋得坐視興安之急。不思設法應援。該逆圖救金陵。銳意東竄。不走湖北。必走河南。節經諭令該督撫等。先事籌防。著官太嚴樹森張之萬。分飭派出將領。隨時偵探賊蹤。迎頭截擊。毋令該匪竄越。張之萬仍當嚴飭張

曜等。迅將張總愚股匪殄滅。俾得騰出兵力。分路嚴防。該逆既有欲出荊子關。由鄂豫等省直竄金陵之說。不可不豫為防範。著僧格林沁曾國藩。不動聲色。將皖豫地方隘口。密為布置。以備不虞。李雲麟另片奏請將派往受降中途遇害之營弁議卹等語。據稱逆黨蕭克城率眾千餘投誠。經李雲麟派劉連陞等前往受降。何以行至中途。猝有另股逆匪蜂擁而至。蕭克城曾否被殺。此股逆匪是否卽係蕭克城。豫先埋伏。李雲麟等為其所給。著卽詳晰聲明。據實具奏。將此由六百里諭知僧格林沁官太曾國藩。多隆阿嚴樹森張之萬劉荅李雲麟。並傳諭張集馨知之。尋李雲麟奏遵查蕭克城乞降之事。為賊首黃姓所覺。伏兵殺之。劉連陞同時被害。並非蕭克城豫設埋伏報聞。又諭熙麟奏甯夏滿城被圍緊急。現籌救援情形一摺。據稱甯夏滿城被圍日久。待援孔殷。該逆馬化澂攻陷州

郡以後甯夏也。北賊巢偏地，並據慶昫咨稱。恩麟已派代辦甘肅提督梁生嶽馳往救援，行抵中衛縣境，被回匪阻隔，不能前進。所帶兵勇僅止千餘，賊氛逼近縣城，萬分喫緊。各等語。甯正綰一軍為涇州及平固一帶之賊所阻，一時未能北顧。訥欽現已由榆林一帶馳赴甯夏，仍恐兵力尚單，副將趙延烺既據熙麟奏稱，布置定邊防守，深合機宜，即著飭令趙延烺酌帶官兵五百名、勇丁三千名，救

援甯夏。統歸訥欽調遣。甯夏情形既如此之緊，訥欽務當督率各軍，刻即探路兼程邁進，救援甯夏滿城，不得稍涉延緩。趙延烺一軍可否作為嚮導之處，著訥欽酌度辦理。馬化澂屢撲中衛，均經梁生嶽帶兵擊退，並著訥欽酌量情形，儘能出其不意，以成夾擊之勢。更資得手。沈桂芬於地丁項下撥銀一萬兩，委員取道草邊小路徑解甯夏，此路能否行走無礙，著沈桂芬與熙麟妥籌辦理。現在各

路大兵剋期赴援，足資攻勦。慶昫務當固守待援，毋稍疏懈。將此由六百里各諭令知之。○以詹事府詹事桂清為內閣學士兼禮部侍郎銜。○以棄隊潛逃革陝西遊擊桂洪元千總王蘭坡職，永不敘用。仍嚴拏懲辦。○予陝西受降遇害都司劉連陞守備李玉忠等祭葬，世職如陣亡例。○辛卯諭議政王軍機大臣等前因宗室奕劻等奏

定陵栽種樹株所需款項，請由部支領，並照數

請給實銀各摺片，當經降旨交部議奏。茲據戶部奏稱，該部無款可籌，所需銀兩例由永濟籌備兩庫徵收租銀內動支。請飭直隸總督勒令各州縣趕緊完解等語。此項租銀為辦工要需，豈容該州縣任意拖欠。現在陵工就竣，應種樹株等項需款甚殷。著劉長佑飭令遵化等州縣迅將欠解永濟籌備兩庫租銀勒限兩箇月埽數完解，儘再延不解交。即著劉長佑指名嚴叅，務期絲毫無欠，以濟

要工將此諭令知之。○又諭前據羅惇衍奏已故布政使銜候選道伍崇曜捐輸銀三十二萬兩。該與咪國要在粵海關索本息銀四十七萬餘兩。今該紳病歿恐海關印票一落外國之手。則持券來索。又費唇舌。請令兩廣總督察看妥辦等語。廣東紳士伍崇曜前代籌銀三十二萬兩。當時給與海關印票收執。初無借自咪國之說。近來廣東情形公私交困。海關所入稅項不敷撥解。豈能有此鉅款撥還陳欠。伍崇曜身列衣冠。素明大義。豈能豫存挾制之心。致為鄉里所不齒。今該紳雖已病歿。而其家尚稱殷實。自當力圖報效。趕緊清釐。以成該故員未竟之義舉。著毛鴻賓卽行諭令該故員家屬。將此項銀兩。妥為籌措。自行經理。其海關印票一律收回。償伍氏子弟明白曉事。剋日清還。是其好義急公。與捐輸軍餉無異。該督仍當據實奏聞。請旨給與優獎。以示鼓勵。將此諭令知之。○又諭前

因步軍統領衙門奏李際晟呈控知府李逢春劣款一摺。降旨交官文密查具奏。茲據官文奏李逢春被控情節重大。請暫行斥革。提解等語。湖南候補知府李逢春業經丁憂回直隸景州原籍。該員係李際晟呈控案內最要人證。亟應查提質訊。明確以成信讞。李逢春著暫行革職。並著劉長佑選派妥員將該革員迅速押赴湖北歸案質訊。將此諭令知之。○又諭左宗棠奏賊由蘇皖突竄浙境。官軍截剿疊勝。並擊退嘉興城外賊匪。暨嚴防江皖浙三省交界各摺。片昨因曾國藩奏侍逆率黨歸併湖州。由安吉孝豐昌化遂安以竄江西。當經諭令左宗棠添調兵勇分投遏截。著該督仍遵昨日諭旨。檄飭派出各軍將後股賊匪實力截剿。毋令接續上竄江境。逞其撲犯撫建之謀。至侍逆是否行至昌化。又復折回抑尚在績溪地方。著偵探明確分飭各軍奮力追擒。以除巨慝。蔣益澧一軍收復

桐鄉縣城後連克嘉興城外賊壘分軍駐紮嘉城西南與李鴻章之軍會同夾擊是杭嘉之賊勢已斷著督飭該藩司等迅圖攻拔嘉城以孤杭賊之勢花旗股匪前已竄入江境雖經沈葆楨派令韓進春等在玉山一帶堵遏尚慮兵力單薄且該匪現又竄及鉛山湖坊地方駸駸乎漸入腹地必得一支勁旅前赴撫建遏截方可力挫兇鋒臬司劉典既經左宗棠飭其在湖南本籍募勇赴浙即著飭

欽此

二十六

令迅速督勇起程即於路過江西時察探賊蹤迎頭勦擊以保完善而維大局所請飭令張運蘭帶勇赴任一節本日已寄諭毛鴻賓催令起程桐鄉降將何培章仍令帶所部駐紮烏鎮雙橋是否可靠仍著該督隨時加意察看將此由六百里各諭令知之○又諭官文等奏官軍克復厲山立解棗陽霸山之圍並鄖軍收復上津堡一摺皖捻闖入鄂疆在隨棗一帶肆擾此次官軍被圍至六晝夜之

久幸各將士堅守苦戰援軍奮勇馳救立解重圍軍氣復振勦辦甚屬出力著官文嚴樹森激勵各軍乘勝窮追務將此股悉數殄除肅清邊境上津堡雖經克復而藍二順首惡尚在稽誅漢南大股髮逆悉數東下張總愚已越棗陽若再上窺襄樊或直走新鄧勢將不可收拾官文等現飭成大吉等水陸各軍分駐襄鄖互相聯絡其荊門荆宜一帶又飭

欽此

二十六

周鳳山六營居中控扼所籌均尚周密即著飭令在防將士嚴密堵剿聚殲醜類不得稍有疏虞張總愚一股前據僧格林沁等奏飭蘇克金等誘令出險抄擊此時該逆既已出山即可用馬隊衝突著該大臣嚴飭蘇克金等迎頭截擊痛加勦洗張之萬嚴飭張曜等軍會合夾攻總期一鼓殲滅毋任旁竄紛趨又成滋蔓楚豫軍情萬分喫緊張之萬務當振刷精神督率各軍會合楚師認真防剿以

保疆圉。將此由六百里各諭令知之。○又諭閻敬銘奏請將赴晉楚勇仍舊提回東省一摺。據稱連接沈桂芬來咨。東省勇丁暫緩來晉。改赴多隆阿軍營。惟曹正榜等楚勇二營與多隆阿所部湘楚各軍心志未合。不免扞格。兼恐到陝領餉無期。深虞譁潰。本境伏莽未淨。豫皖餘賊須防東竄。前項勇丁不如留東備用等語。前因晉防已敷分布。陝省勦賊正在喫緊。是以將曹正榜等所帶楚勇改赴陝省。茲據閻敬銘奏稱此項勇丁雖有楚鄂之人。實多江南徐宿之眾。調赴晉防為途較近。尚可易於控制。若遠赴多隆阿軍營。必不能與所部之勇聯為一氣。陝省餉糈支絀。加以此項勇丁更覺餉難應手。且豫皖餘匪未滅。東省斷難疏防。所奏自係實在情形。此項勇丁既毋庸派赴晉防。改調陝省亦難得力。仍著閻敬銘提回東省以備緩急。將此由五百里各諭令知之。○又諭毛鴻賓奏接奉寄

諭謹將前後擬辦情形縷晰密陳一摺。所籌不為無見。已照該督所請。另降諭旨。著即妥為宣示。密籌辦法。以弭後患。另摺奏官軍追勦陽春客匪連戰大捷。卓興已帶隊進抵陽春縣屬古良水口等情。著即責令該副將乘勝進攻。一律掃蕩。蔣朝剛侯勉忠兩軍併歸該副將節制調遣。方可事權歸一。俟此股辦有頭緒。即將戴梓潰等股匪。按除淨盡。其老弱良善。不敢抗拒官兵者。即飭地方文武各員妥為安撫。以收一勞永逸之效。本日據左宗棠奏侍逆李侍賢一股由溧陽廣德分股竄至溇安績溪一帶。其前隊廣東花旗股匪已竄入江境。福建之崇安浦城光澤等處皆與江浙毗連。防務亦關緊要。請令福建臬司張運蘭赴任等語。廣東信宜克復逆首伏法。地方漸就肅清。而福建界連江浙。現在髮逆分股上竄。必須有得力大員督防。方能保全完善。著毛鴻賓傳知張運蘭即赴福建臬司

本任並將所部勇丁挑選二三千名一併帶

赴閩省以資得力將此由六百里密諭知之

○以江南揚州防軍節年堵勦出力賞參將

胡世英巴圖魯名號知府孫恩壽等花翎守

備谷沛霖等藍翎餘加銜升敘開復有差○

以浙江官軍截勦竄匪獲勝賞提督黃少春

巴圖魯名號副將王開琳以總兵官簡放○

以收復浙江桐鄉縣城招撫出力予都司張

其光升敘賞守備陳紹知州廖安之花翎免

丁集卷三

四

投誠賊目何培章罪○以湖北攻克厲山賊

寨棗陽霸山解圍復已革提督成大吉職與

副將蕭勝南均賞還勇號賞副將蕭翊參將

黃祖淦巴圖魯名號遊擊王德光等花翎餘

加銜升敘有差○予廣東陽春陣亡千總莊

富發外委周忠海祭葬世職加等○予浙江

杭州殉難佐領昇音訥等暨舉人沈塏等紳

民婦女二百四十二員名口分別旌卹如例

○追予浙江杭州殉難在籍道員俞焜建立

專祠妻女一併附祀

實錄卷九十四

四十一

大清穆宗繼天開運受中居正保大定功聖智  
誠孝信敏恭寬毅皇帝實錄卷之九十四

大清穆宗繼天開運受中居正保大定功聖智  
誠孝信敏恭寬毅皇帝實錄卷之九十五

教

同治三年甲子二月壬辰諭議政王軍機大

臣等張之萬奏請飭查拏案內要犯等語已  
革副將教天印因所部勇丁口角微嫌輒敢  
將副將孫之友戕害實堪痛恨該犯藉稱照  
料散勇回籍難保非畏法飾詞回楚為脫身  
潛逃之計著官文嚴樹森迅飭所屬大冶黃  
陂孝感等縣務將教天印及案內在逃之要  
犯吳正啟一併嚴緝獲解豫省審辦以肅軍  
律毋令聞風遠颺將此由五百里各諭令知  
之○河南巡撫張之萬等奏法軍攻克息縣

光州賊寨得旨息縣東南一帶賊巢仍著嚴  
督將弁乘勝迅速掃蕩毋留餘孽又奏籌防  
漢中竄逆先期派兵扼守荆子關批昨據官  
文等奏張總愚自南魯逸出逼近南陽已寄  
諭該督嚴飭張曜等軍會合勦洗該撫擬即  
移營魯山著仍遵昨日寄諭將此股捻匪剋  
期殄滅一面騰出兵力確探髮逆所向迎頭  
截剿毋令闖入邊境○予河南南召陣亡參  
領胡爾東阿守備連吉錦祭葬世職加等○

癸巳諭議政王軍機大臣等御史呂序程奏  
請將叛跡昭著之潘壇等正法一摺據稱潘  
壇係積慣訟棍其子潘立勳著名捻匪率眾  
投苗占踞三河尖招匪數萬偪脅光固官圍  
歸伊調遣勒令良民蓄髮東西數百里燒搶  
一空率眾數萬助苗攻破壽州復於光州固  
始各城門衙署張貼偽示語多狂悖請飭僧  
格林沁將該犯等一併正法等語潘壇父子  
勾通苗逆罪本難宥前據僧格林沁奏稱苗



逆圍攻蒙城。該犯等未往助逆。尚可稍從末減。曾經降旨將潘壇潘立勳發遣烏里雅蘇台。茲據該御史奏陳潘壇父子種種悖逆兇惡情形。殊堪髮指。該御史籍隸河南羅山縣。距三河尖一帶甚近。見聞較確。所陳自係實情。若不將該犯等立予誅戮。無以申國法而絕後患。著僧格林沁即將潘壇潘立勳立行斬誅。如該犯等業已起解。即著迅派委員馳追。無論行抵何處。即將該犯等就地正法。毋

得先行洩漏。致令聞風遠颺。至查抄家貲。多係有名無實。該犯惡黨。亦業經解散。該御史所請查抄老巢家貲濟餉。並查辦惡黨之處。著毋庸辦理。以免驚擾而定人心。原摺著鈔給閱看。將此由五百里密諭知之。○以恭辦定陵暨順水峪工程出力。予戶部郎中王文韶等升敘有差。○甲午。諭議政王軍機大臣等。沈葆楨奏髮逆闖入腹地。自請嚴議。並各軍截剿獲勝。續籌辦理情形一摺。前據曾國藩

奏逆匪已繞至廣豐。又繞至鉛山湖坊。窺伺撫建。茲據沈葆楨奏該匪合股竄至弋陽貴溪之南鄉。經官軍在錦雞嶺黃茅嶺等處扼截獲勝。而逆之頭隊已至金雞之蕭公廟。並擄至東鄉界上。該撫現派劉于浚等軍到撫。楊錦斌率衛民軍赴建郡協守。撫建兩郡諒可無虞。惟該匪已深入腹地。狼奔豕突。蹂躪實多。著沈葆楨即飭派出各軍實力勦辦。務期就地殲除。毋任蔓延為患。劉典曾否由湘

起程。著惲世臨催令迅將勇丁募齊。由江西赴浙。一路察探賊蹤。迎頭截擊。左宗棠仍遵前旨。飛飭該臬司趕緊赴援。以資得力。道員王文瑞請假回籍。已經數月。現在江浙軍務均屬喫緊。著左宗棠沈葆楨檄調回營。並著惲世臨催令迅速前進。毋任逗遛。後股賊匪經黃少春王開琳兩軍扼之於瀉遂之交。累戰皆勝。賊不得渡。左宗棠仍當激勵各將弁認真截擊。不得任令上竄。與前股合夥。致辦



理又形棘手。竄江逆股。知大兵緊躡其後。已由瀘溪小路翻山潛入閩地。光澤邵武俱形喫重。頃據徐宗幹奏臺灣南北兩路肅清。各軍按勦餘孽。將次竣事。著左宗棠徐宗幹卽將臺灣撤回得勝兵勇。派赴邵武一帶扼要設防。如有匪蹤闖入。卽行擊勦。並飛飭該府縣文武員弁晝夜嚴防。不得稍有疏失。臺屬匪首林晟等現尚在逃。並著該撫飭令在事文武嚴密按捕。毋任漏網。此股逆匪。希圖牽掣蘇浙官軍後路。奔竄靡定。恐其被勦窮蹙。或南竄粵東。西擾湘南。毛鴻賓惴世臨並當豫為防範。以保完善。唐義訓現守徽郡。毛有銘亦抵休甯。著曾國藩飭令該員等嚴扼要隘。毋令續來匪股得以肆行擾竄。江忠義舊部現紮何處。未據沈葆楨奏及楊岳斌能否統帶水師前赴江境。並令兼帶江忠義所部勇丁。以資督率之處。著曾國藩迅速籌商。並隨時與沈葆楨會商辦理。以保東南大局。沈

葆楨自請交部嚴議之處。著加恩寬免。將此由六百里各諭令知之。○賞故杭州將軍伊勒東阿子雲麾使景昌侍衛。在乾清門行走。○以福建臺灣南北兩路肅清。賞護提督副將曾元福巴圖魯名號。道員丁曰健二品頂帶。○予江西玉山陣亡把總李國珍等祭葬。世職加等。○乙未遣官祭  
歷代帝王廟。○丙申遣官祭賢良祠。○予江蘇常熟等處殉難布政司理問張倬等紳民婦女二百三十二員名口分別旌卹如例。○丁酉  
孝昭仁皇后忌辰遣官祭  
景陵。○戊戌以太僕寺卿朱蘭為詹事府詹事。○予甘肅甯夏殉難道員侯雲登祭葬。世職加等。○己亥清明節  
上詣  
奉先殿  
壽皇殿行禮。○遣官祭

永陵

福陵

昭陵

昭西陵

孝陵

孝東陵

景陵

泰陵

泰東陵

裕陵

昌陵

昌西陵

慕陵

慕東陵○遣官祭

文宗顯皇帝

孝德顯皇后暫安寢殿○遣官祭

端慧皇太子園寢○諭議政王軍機大臣等。  
平瑞奏陝甘驛路梗塞摺報阻滯請暫行改

道接遞一摺邊疆重地值此多事之秋摺報  
往還最關緊要若因驛路梗阻致請旨遵行  
之件日久稽滯必至貽誤事機平瑞現擬暫  
行改道由蒙古臺站行走並將古城迤北之  
北套橋等處戈壁臺站添撥兵役常川駐守  
接遞文報所籌均合機宜即著准其暫行改  
道行走以昭便捷本日業經諭知兵部理藩  
院轉傳各該處一體遵照辦理外並著明誼  
麟興車林敦多布錫霖廣鳳奎昌阿克敦布  
等於烏里雅蘇台科布多及察哈爾各臺站  
實力整頓督飭各該盟長總管等一體接遞  
毋稍遲誤此次麟興奏摺到京不過一月有  
餘視上年所遞各報遲速迥殊是西南各城  
亦可仿照辦理即著烏里雅蘇台將軍咨行  
伊犁將軍塔爾巴哈台葉爾羌參贊大臣及  
所屬各城嗣後奏報均著暫行改道由烏里  
雅蘇台科布多所屬蒙古臺站挨臺遞送至  
張家口轉遞進京以期迅速將此各諭令知

之○山東巡撫閻敬銘奏遵旨妥議逆絕各產擬將白蓮池劉貫莊頃數較多之處招佃收租撥歸營用其館陶臨清等處零星田畝招佃收租作為書院經費得旨著照所擬辦理總期利歸於公慎始圖終以收實效○四川總督駱秉章奏井竈疲憊請免加釐得旨依議陝省需餉甚緊仍著該督將陝甘捐輸認真督辦解濟餉需不可稍存膜視○烏魯木齊都統平瑞奏豫調官兵候伊犂咨調並

飭屬嚴防俄人暨派員接署各缺得旨所有豫備官兵聽候咨調著即照辦仍飭所屬認真防範不得有名無實文永著准其接署庫爾喀喇烏蘇領隊大臣篆務扎克當阿等已降旨嚴催令各赴本任矣又奏烏魯木齊地震傷人批被災處所著分飭各該地方官查明撫恤毋令失所○以奉天承德緝盜出力賞防禦松林花翎知縣文景等藍翎餘升敘有差○庚子以神靈佑助頒陝西甯陝廳

城隍廟扁額曰功昭三輔○諭內閣倭仁泰據呈代奏革員洪貞謙條陳善後章程並將原呈呈覽一摺所有洪貞謙寄呈倭仁泰豫交界地方善後事宜辦屯田整團練籌建置通賦稅四條前經張之萬奏據丁憂詹事府右庶子袁保恆所陳皖北善後各條大略相同當經諭令曾國藩喬松年妥籌辦理仍著該督撫將洪貞謙所呈與袁保恆摺會同張之萬一併籌議具奏○諭議政王軍機大臣

等張之萬奏進剿李青店踞逆獲勝該匪翻山夜遁現在探蹤截擊一摺張總愚股匪會合李青店逆黨窮蹙紛竄張曜等親當其衝未能力加遏截致令賊蹤橫逸實堪痛恨現在陝西漢中髮逆日夜銳意東趨已擾及內鄉境內陳大禧擒股欲向樊城老河口逸出儻任其乘勢勾結賊氛愈形蔓延防剿更難分布著張之萬嚴飭張曜葛承霖吳再升等軍星速繞出賊前會合夾擊並飭宋慶等軍

馳赴嵩縣。與張曜等前截後追。痛加勦洗。務將張總愚股匪悉數就地殲除。儻再任令遠颺。或致與髮逆另股勾合。復行滋蔓。必重治張曜之罪。聞近來張曜大不如前。遇賊不肯奮勇接仗。勿謂朝廷一無聞見也。其陳大禧一股。並著官文嚴樹森張之萬督飭楚豫邊防各軍嚴密扼截。毋令逸出竄合為患。蘇克金一軍赴豫助勦張逆股匪。屢據聲稱俟偪賊出險。卽行馳擊。此次該逆拌死出竄。蘇克

金馬隊何以並未躡追。實出情理之外。現在陝中髮逆日偪豫邊。經張之萬商令蘇克金傅振邦由南陽進兵。嚴防內鄉之西峽口。卽著僧格林沁嚴飭蘇克金等迅速進剿。如再遷延貽誤。卽行嚴參懲辦。僧格林沁久未見有奏報。曾否拔隊起程。何時可以前往豫省。著卽迅速具奏。楚省鄖西一帶邊防。並著官文嚴樹森飭令派出之梁作揖等軍與豫省官軍聯絡防範。張之萬仍當督飭李殿元一

軍嚴防荆子關要隘。毋令髮逆闖入豫疆。如兵力尚單。卽著酌量添派。以資扼剿。毋得稍涉大意。致有疏虞。將此由六百里各諭令知之。○又諭張集馨奏甯陝道路已通。城防弛嚴。境內肅清一摺。漢中髮逆竄撲甯陝廳城。自正月初八日至二十六日。賊取盤踞城外附近一帶。窺伺城垣。均經該廳文武督兵集團屢次擊退。此股係羅逆及偽扶陳逆不下十餘萬賊。偽端藍逆斷後。其偽啟增諸逆黨

約二三萬人。均於二十日夜間。由賈家營梁家堡分竄鎮安縣孝義廳各境。又西鄉另股馬逆二萬餘人。於二月初一日。由石泉銀杏壩續竄關口。亦由賈家營東竄甯陝廳境。已無賊蹤。由子午谷直至省門。一律安靜。該廳文武紳團相持一月之久。卒能擊退大股逆匪。尚屬出力。著劉蓉迅卽查明奏請獎敘。此股逆匪志在回援金陵。日夜東竄。亟須力籌堵截。以遏逆氛。劉蓉督兵追擊。現在行抵何

處李雲麟扼紮石泉何以任令馬逆一股竄向關口由賈家營東去未見奏報現在進剿情形究竟如何著卽迅速馳奏並著繞赴賊前奮力堵截毋得有名無實徒託空言自干咎戾本日據張之萬奏稱髮逆逼近荊子關經總兵李殿元堵剿斃賊多名又探稱髮逆欲從內鄉竄合張總愚股匪現已擾及內鄉交界之石樓地方本日已諭僧格林沁嚴督蘇克金等軍實力堵截張之萬嚴防本境官

文嚴樹森嚴扼襄樊以防陳大溥等股匪勾合皖粵各逆前經疊諭劉蓉不分畛域盡力窮追著卽懍遵前旨星夜東進會合李雲麟一軍緊躡賊蹤兩路夾擊毋稍鬆勁至賊蹤分竄靡定儻被楚豫各軍阻截難保不折回陝境以窺晉疆沈桂芬當督飭蒲津一帶在防文武加意嚴防以備不虞所有商雒潼關等處仍著多隆阿檄飭在防各軍嚴密扼守其子午谷及西安省防仍應加意備豫甯陝

廳屬圍取張集馨不可遽令解散蓋屋巖爾一城賊匪並不甚眾多隆阿圍攻日久迄未克復以致全局為賊所牽多隆阿初膺簡命銳不可當近來何以頓兵縣城日久無功殊不可解著卽速行設法攻拔毋再遷延貽誤將此由六百里諭知多隆阿劉蓉沈桂芬李雲麟並傳諭張集馨知之○署陝西巡撫張集馨奏漢中髮逆東竄沿途無所侵掠實獲團練之益得旨所稱石泉漢陰一帶皆因堅壁清野未遭蹂躪是團練已著有成效仍著嚴飭各屬於建堡築寨事宜一律認真興辦同心禦侮毋得徒託空言或因獲有小效輒沾沾自喜也勉之○河南巡撫張之萬奏遵訊已革副將教天印營勇戕害副將孫之友一案係因營勇互鬪都司教明愷千總郭連升暨勇丁但高升等乘夜將孫之友殺害實屬目無法紀教明愷等三犯卽於訊明後正法在逃各犯俟緝獲究辦下部知之○以伊

聿參贊大臣明緒為內閣學士兼禮部侍郎  
銜仍留伊犁參贊大臣任○以陝西甯陝廳  
城解嚴予副將謝正球以總兵官升用賞同  
知龔銜齡花翎○以陝西高陵縣城被賊竄  
陷革知縣梁書麟職遣戍新疆○以諱盜疏  
防撤浙江定海鎮總兵官袁君榮同知葉寶  
田都司姜秉鉞任均摘頂帶勒緝○以營私  
骫法陝西知縣莊治安革職逮問○予河南  
李青店陣亡都司胡德亮祭葬世職加等○

實錄卷五

五

予江蘇蘇州等處殉難文生張榮綬等紳民  
婦女八百九十七名口分別旌卹如例並予  
建祠

大清穆宗繼天開運受中居正保大定功聖智  
誠孝信敏恭寬毅皇帝實錄卷之九十五

實錄卷五



已革道員捐助軍餉。懇請獎勵一摺。據稱已革陝西陝安道張由庚。現因病請假回籍醫治。所有補發該營兵勇積欠餉銀三萬兩。該革員於領到後。即傳集各營將弁。諭以勇丁既經遣撤。無可報效。即以此項銀兩捐助軍需。眾勇丁欣然樂從。請旨開復原官。仍以道員留於陝西補用。可否並賞加布政使銜等語。張由庚所捐餉項。雖由其信義素孚。所部士卒樂於從命。然究係各弁勇餘欠月餉。不

得即指為該革員捐輸之款。惟據劉蓉奏稱該革員任事實心。才本可用。即應酌與恩施。張由庚著即開復原官。仍以道員留於陝西儘先補用。以示獎勵。所請賞加布政使銜之處。著毋庸議。○諭議政王軍機大臣等。富明阿奏。水師擊退竄賊。及水陸布置情形。馮子材等奏。官兵攻克白兔。博洛水湖等處逆壘。擊退援賊。各一摺。逆眾由青山南牘等處。攻撲江陰。未得逞志。另股紛竄浮橋。直奔江口。

經李德麟等開礮轟擊。賊始敗退。並據探聞楊厘福山先後不守。常昭戒嚴。現在淮揚水師已抵福山南路。官軍已進紮焦甸。青陽合力兜剿。此股賊匪。鋌而走險。現既薙髮冒戴頂翎。難保不假充官軍。冀圖溷跡。江北地屬完善。富明阿已派兵分防水陸兩路。並知照吳棠。令藩司萬啟琛通飭所屬文武一體嚴防。所籌均尚周密。福山一帶有黃翼升水師駐紮。諒可無虞。其江陰等處要隘口門。防守

是否嚴密。著富明阿、吳棠嚴飭水陸各軍認真防剿。不准令一賊竄犯江北。以保完善。程學啟帶兵素稱得力。現在何處。此次賊眾竄陷福山。忠逆如在其內。李鴻章正可設計抽調。程學啟並得力各軍截其歸路。設計將其擒獲。則賊勢瓦解。未復各城自成破竹之勢。想該撫必能見及。吳棠擬將黃開榜一軍入江協剿。調度亦合機宜。著即飭令該鎮統帶所部師船前往通州一帶沿江分段駐泊。與



江防艇師互為犄角。以壯聲援。富明阿另片奏。刁經明會攻丹陽城賊。及收撫白兔降賊情形。本日亦經馮子材等奏報。惟富明阿據刁經明稟稱。白兔降眾。因偽賢王二營不降。併歸寶堰。會同願降各營。合攻偽賢王逆壘。其白兔及水湖降賊。家屬輜重。均先送往鎮城。一律薙髮投城等語。與本日馮子材所稱攻取白兔。該賊匪棄壘而遁各情。均不相符。仍著富明阿。馮子材。加意防範。毋稍大意。並

著馮子材。魁玉。即督在事諸軍。攻拔寶堰賊巢。其南路博洛水湖。業經攻克。馬陵一帶肅清。官兵可徑達丹陽。著即相機進取。以期節節掃蕩。仍應穩慎進取。毋為窮寇所乘。並隨時咨商富明阿。調派各軍。聯絡聲勢。揚營所製開花礮子。係攻堅利器。並著趕緊運赴鎮防。以資得手。正在寄諭間。據李鴻章奏。官軍收復溧陽縣城。各路敗賊。竄併常州西路。圍撲江陰。常熟。無錫各城。調派各軍援剿。次第

解圍。連獲大捷。並程學啟督軍攻克嘉興各摺片。覽奏欣慰。逆眾乘隙內竄。幸各軍防守甚嚴。該逆受創而去。侍逆逃往湖州。四安一帶。其所部死黨。有帶赴湖州者。有併入常州者。難保不再圖大逞。仍當飭令在事各員。加意嚴防。穩紮穩進。其楊庫等處之賊。是否尚在盤踞。著督飭黃翼升。郭松林等。前後夾擊。務將此股敗賊。悉數殲除。毋留餘孽。李鴻章。劉銘傳。即飭乘勝偪攻常州。以期一律削平。嘉興已復。餘匪飭即就地掃除。湖州援賊黃老虎等。被擊回遁。即著督令李朝斌等。會同浙軍。設法進取。程學啟受傷甚重。其督軍奮勇。深堪嘉尚。務當妥為調治。冀速就痊。將此由六百里各諭令知之。○又諭。沈葆楨奏。官軍攻克金谿情形。及逆匪分撲建郡。經水陸各軍迎剿擊退。請飭福建。廣東。湖南。合力防剿。各摺片。此股髮逆。竄陷金谿。原欲踞為巢穴。以待侍逆之來。經席寶田攻克。後該逆知

撫郡不可犯。遂潛趨建昌。復被劉子潯等率水陸各勇進援。賊不得逞。遁入山谷中。其偽王宗一股。亦由白港翻山而遁。此時建郡諒可無虞。但逆眾尚未殄除。豕突狼奔。則廣昌南豐等縣城。在在可慮。著沈葆楨嚴飭派出之普承忠。督率兵勇。由宜黃相機前進。迎頭截擊。並飛飭席寶田等緊躡賊蹤。以收前後夾擊之效。偽王宗一股。尚踞白港。蔓延潭溪。經席寶田與劉勝祥分路進剿。該逆將越新城而西。逼近閩境。著左宗棠徐宗幹。仍遵前旨。調派得力弁兵。嚴密堵剿。俾免蔓延貽患。溧陽業經克復。該匪悉數上竄。合計附近十萬。據沈葆楨奏。現因侍逆未至。心志難齊。江省兵力漸集。大局不至決裂。惟銑而四散。則福建廣東湖南。恐將受其流毒。所籌不為無見。著毛鴻賓。郭嵩壽。譚世臨。分飭所屬豫籌防剿。以備不虞。張運蘭一軍。計已啟行赴閩。左宗棠等務當酌度緩急。調派該臬司扼要

嚴防。劉典所募之勇。應已成軍。著譚世臨催其由江前進。遏截該匪西竄之路。於江楚軍務。兩有裨益。本日據富明阿奏。福山楊庫。復被忠逆竄擾。圖抄李鴻章後路。已飭該撫迅派勁旅。力遏兇鋒。曾國藩前奏溧陽已克。楚滬各軍。業已聯絡一氣。即著飭令鮑超等規取廣德。以分賊勢。侍逆如有上竄信息。該大臣尤當分飭皖南諸營。沿途堵截。斷不可令其竄入江境。左宗棠仍當扼守徽嚴各隘口。俾該匪不能接續南竄。則竄江之匪。自不難剋期撲滅。將此由六百里各諭令知之。○又諭多隆阿奏。攻拔蓋屋外城。受傷請假。並靈臺境內。已無賊蹤。又奏。攻克蓋屋。並傷重調治各摺片。雷正綰奏。沂麟等處。剿賊獲勝情形。劉蓉奏。收復西鄉。賊勢全數東竄。現籌布置防剿情形。各一摺。蓋屋城小而堅。米糧頗足。藍逆以積年巨寇。悍死負隅。多隆阿督率兵勇。晝夜圍攻。奮不顧身。竟將堅城攻拔。具

見忠勇過人。惟該大臣頭眼俱受槍傷。槍子尚未取出。曷勝塵繫。本日已降旨賞假調理。並由內府發去如意拔毒散四料。以資敷治。所請伊子雙全赴營隨侍一節。已寄諭黑龍江將軍。令其傳知雙全赴營隨侍。並因道途遙遠。命其馳驛赴陝。藉資迅速。該大臣務當體朝廷眷注之意。安心靜攝。加意調治。以慰馳塵。多隆阿或在營調養。或因醫藥較便。須赴西安省城。均著自行斟酌辦理。其欽差大臣關防。准其交穆圖善暫行護理。督辦軍務。卽督令將盤屋餘匪。悉數追捕。毋留餘孽。至首逆藍大順是否殲斃。抑乘閒逸出。並著查明具奏。雷正綰回軍靈臺。截剿汧麟竄逆。攻破上梁鎮逆巢。曹克忠一軍。復將雨亭寺花廟一帶賊巢。全行平毀。靈臺界內。已無賊蹤。雷正綰當乘此聲威。亟將崇信一帶餘匪肅清。會合曹克忠及陶茂林隴州之師。殄除羣醜。以期迅速赴甘。規取平固。西鄉收復。業

由李雲麟奏到。此次劉蓉所奏情形。大略相同。此股髮逆。因回援金陵。一意東竄。而偽天將馬仕榮尚在安康北境游弋。藍逆二順。又由鄖西竄及洵陽之蜀河。難保不意圖回竄。劉蓉擬留蕭慶高何勝必兩軍駐紮興安。所籌係為川陝兩省門戶起見。著駱秉章卽飭令蕭慶高等實力扼紮。相機防剿。劉嶽昭所部九營。現已回蜀。並著駱秉章會商賈洪詔妥籌調遣。劉蓉新募楚勇三千人。已抵萬縣。該撫現今徑趨商州。扼要堵剿。著照所議辦理。惟此項楚勇由萬赴商。正可攔腰截賊。不可徒成尾追之勢。且須兼顧鄖防。不可稍分畛域。盤屋現已收復。劉蓉所派知縣黃鼎等五營。或先赴商州扼堵。或令東趨追躡。並著劉蓉多隆阿妥商調派。昨據張之萬奏。髮逆已竄內鄉等處。是楚豫兩省防剿萬緊。前已疊諭劉蓉令其東下追賊。以收夾擊之效。該撫擬欲進省接篆。固為整頓起見。惟賊匪未

受大創。若無大員總統進剿。恐致復形鬆勁。又將回竄陝疆。況徽縣兩當。賊氛未淨。洵陽一帶。業有回竄之虞。該撫曾否派兵妥籌堵剿。其漢南防務。布置是否周密。以上各節。均應悉心區畫。如該撫已赴西安。卽著將應辦事宜。迅速籌畫。仍察看賊勢軍情。出省督兵。毋稍延緩。李雲麟扼守興安。何以任賊東趨。不思扼擊。著懷遵前旨。妥籌會剿。毋稍疏虞。將此由六百里各諭令知之。○又諭。多隆阿

奏請飭令伊子來營隨侍等語。多隆阿現在攻克陝西盤屋縣城。頭面受傷。醫藥一切。所在需人。伊子齊齊哈爾。披甲雙全。著特普欽飭令迅速赴陝。西多隆阿軍營。以便隨侍調養。並著加恩准其馳驛前往。將此由五百里諭令知之。○陝西巡撫劉蓉奏遵查同知王義樟人尚正派。其在定遠廳官聲亦好。第賊至之日。先以出城守險為名。實則有心規避。遊擊閔長申所部兵弁。於上年十二月間。

膽敢糾匪圍城。勒減錢糧。是否該遊擊指使。雖未可知。然其毫無約束。已可概見。至署南鄭縣知縣周蕃壽。才具明幹。果敢有為。實無挾制鎮道之事。其初志在守城。迨城陷時。盡驅其妻妾子女。投入井中。而自坐堂上。被賊剖腹而死。實屬忠烈可嘉。除俟另案請卹外。所有叅款。請免置議。得旨。王義樟著卽行革職。閔長申著革職。拏問治罪。周蕃壽被叅各情。著免其置議。○以聞警潰退。降江蘇福山

鎮總兵官鞠耀乾為參將。以記名提督郭松林為江蘇福山鎮總兵官。○欽差大臣多隆阿督攻盤屋縣城受傷。賞假調理。並賞內府藥料。○以陝西收復漢中府城出力。免署知府楊光澍查議。仍革職留任。○予陝西盤屋陣亡總兵官桂學高祭葬。世職加等。○以克復江西金谿縣城。予道員席寶田優敘。陣亡副將金國泰祭葬。世職加等。謚壯節。千總張青連。把總蘇世揚等。祭葬。世職加等。○予江

蘇溧陽等處陣亡副將劉起等十一員祭葬世職加等○予浙江嘉興陣亡總兵官何安泰祭葬世職加等建專祠傷亡副將郭興發祭葬世職○予河南各屬陣亡殉難紳民兵勇婦女等一千五百七名口分別旌卹如例○蠲緩陝西南鄭褒城沔城固洋西鄉甯羌佛坪留壩略陽鳳十一廳州縣被擾地方新舊額賦有差○癸卯賞已革直隸按察使孫治六品頂帶隨同副都統文煜赴甘肅慶陽糧臺聽候差委○追予江蘇殉難巡撫徐有士建立專祠家屬幕友一併附祀○甲辰諭議政王軍機大臣等順天府奏特參疏防搶案之州縣一摺據稱懷柔順義固安通州各州縣先後有馬賊結隊成羣攜帶洋槍弩弓銅礮器械搶掠過客銀物拒傷各州縣捕役兵丁多人外委孫環被賊扎傷民團亦被拒傷等語畿輔地方從前馬賊肆行屢經嚴諭申誡該地方官弁宜如何認真整頓以重緝

捕乃此次馬賊竟敢大隊縱橫分擾州邑拒傷弁兵若不迅速兜拏近畿重地貽害又將胡底所有此次疏於防範之懷柔縣知縣陳斯馨署順義縣知縣馮瑋署固安縣知縣李應選通州知州鄧錫恩均著先行交部議處其北路外委唐玉崑南路外委龔世忠及未經受傷之兵丁等並著順天府查明情節從嚴懲辦即著順天府直隸總督迅速各派幹員督帶兵役務將此股馬賊協力兜拏毋任漏網不准視同尋常捕務遷就了事馬賊行蹤剽疾誠恐官兵緊捕該匪或回竄京營地面以圖潛跡並著步軍統領衙門飭令各營汛員弁分按地面實力擒捕毋任竄匿順天府另片奏捕盜兵役不敷請將上年添設馬匹裁去一百二十四匹即以所裁馬乾及每年買補例倒馬價酌添步兵五十名等語即著照所擬辦理仍當隨時認真教練毋得有名無實將此各諭令知之○乙巳祭

先蠶之神。遣總管內務府大臣明善行禮。○諭內閣。安徽候補同知直隸州知州成福前經尚書羅惇衍保奏。發往直隸差委。嗣因直隸軍務告竣。經劉長佑奏請將該員留於直隸以原班補用。復經降旨允准。茲據吏部奏稱。軍務省分人員。向不准改指無軍務省分。該督所請將該員留於直隸以原班補用。數與定章不符。請飭成福仍赴安徽候補等語。成福係奉特旨發往。嗣因軍務告竣。准留直

隸補用之員。與軍務省分人員。自行改指無軍務省分跡涉規避者不同。候補同知直隸州知州成福。著仍遵前旨留於直隸以原班補用。該部所奏。著毋庸議。嗣後奉旨發往各省差委等項人員。如有與例不符者。仍著吏部按照奏定章程。隨時酌覈。奏明辦理。惟不准入於彙奏彙題案件內。牽混開列。以杜弊端。○諭議政王軍機大臣等。前因多隆阿於攻拔蓋屋縣城時。頭面受有槍傷。賞假一箇

月安心調理。現在該大臣受傷處所槍子是。否業已取出。傷口調理。能否漸就痊愈。朝廷甚深懸繫。如槍子業已取出。即著飛速奏聞。以慰廬念。藍逆是否已在誅數。如由蓋屋竄出。即著多隆阿傳諭穆圖善派兵嚴拏。毋任漏網。將此由五百里諭令知之。○又諭。前據沈葆楨奏。偽王宗一股。將越新城而西。逼近閩疆。諭令左宗棠。徐宗幹。派兵嚴密堵剿。茲據徐宗幹奏。建甯府屬接壤江西浙江。逆匪

意圖竄越。閩疆防務喫緊。現飭署總兵袁艮帶兵四百名。馳赴浦城。調金門鎮標等營兵五百名。俟蔡潤澤巡洋回省。督帶繼進。派知府張文斌募勇數百。併交袁艮調遣。並以閩浙交界。關隘甚多。委候補道張啟煊馳往建甯會剿等語。賊匪因江浙兩省。不得逞志。圖竄閩境。以遂其遠遁之謀。且此股竄賊人數甚眾。閩省與浙江江西毗連處所甚多。徐宗幹派出之兵。恐兵力尚形單弱。張文斌所募

壯勇倉卒湊集。未必卽能得力。著左宗棠徐宗幹。懍遵疊次寄諭。於浙江江西接壤福建地方。嚴密堵禦。如兵力尚屬不敷。應如何添派勁旅。擇要扼守。以期穩固之處。並著妥籌辦理。前諭左宗棠等。將曾元福所部兵勇。由臺灣撤回。派赴邵武一帶。著卽飛檄曾元福。飭令星速前進。擇要駐紮。以厚兵力。該督撫務當慎益加慎。布置周密。毋令該逆闖入閩疆。致全局又形掣動。張運蘭一軍。當已在途。著左宗棠徐宗幹飛催該臬司趕緊趲行。迅回閩省。以資攻剿。丁曰健已赴臺灣。道本任現在內山四塊厝。北投海口小埔心林晟。洪欉陳啞狗等。匪巢未破。曾元福一軍。如尚未起程。卽著催令迅速內渡。丁曰健卽與林文察曾玉明等會商。分督兵勇前往搜捕。毋留餘孽。丁曰健現回府城。如有應須親出彈壓督勦之處。仍著隨時親往。毋得安居府城。致令首惡稽誅。復行滋蔓。該道所籌善後各事。

宜務當認真辦理。不得有名無實。將此由六百里諭知左宗棠徐宗幹。並傳諭丁曰健知之。○以江西萍鄉縣捐輸軍餉。永廣學額三名。○丙午諭議攻王軍機大臣等。僧格林沁奏統軍赴豫。相機進剿。曾國藩奏。彙報各路軍情。請飭閩粵兩湖一體嚴防。沈桂芬奏。豫捻竄近陝洛。撥兵赴防。並遵防陝省竄匪。張集馨奏。彙報各路軍務。省門左近一律肅清。各摺片。張總愚竄至嵩縣屬之龍王廟。有奔黑峪藥川之信。髮逆竄至西坪。並有水陸之賊。自漢中沿江直下。鄧州新野亦屬喫緊。陳大澹一股竄至襄陽所屬之榆山一帶。欲向樊城老河口奔竄。僧格林沁恐各匪勾結為患。已親統全軍赴豫。先至許州一帶探剿。所籌深合機宜。著卽督同蘇克金傅振邦等誘賊出險。先將此股殄滅。以次削平羣寇。張之萬督飭地方文武團練。協同剿辦。均聽候僧格林沁調遣。糧餉軍火。隨時籌濟。不得遲誤。

漢中賊匪沿江而下較旱路尤為剽疾若過鄖陽指日可到老河口鄖州新野均屬緊要張之萬當抽撥兵勇赴防毋任闖入句合為患此股竄賊既有竄過鄖陽可到老河口之說而陳大濬一股亦欲由樊城老河口奔竄是楚北防務十分喫重何以近日未據官文等續報情形著官文嚴樹森飭令在防將士晝夜防範儻兵力尚有不敷應即相機籌調樊城一帶儻需水師防勦亦應一併籌派不

可稍有疏虞沈桂芬因張總愚有分股竄河洛之謠已調兵分防曲裏洪陽等渡口如匪蹤逼近即令和昌等隔河堵擊各口渡船嚴飭一律提歸北岸並著張之萬張集馨通飭所屬照辦以免奸匪搶船北渡漢南髮逆東竄恐因豫省有大軍堵截避兵而行或竄晉或回陝俱在意中沈桂芬仍當認真設防劉蓉李雲麟務當派兵出境會勦不得以驅賊出境遂謂可以卸責李雲麟前奏調澄漢九

營水師防河何以此股賊匪沿江而下直犯鄖陽窺伺老河口足見水師不能得力著即統率所部盡力追勦毋得區分畛域貽患鄰封多隆阿傷痕曾否就痊蓋屋餘匪應已埽除淨盡潼關等處防務至要該將軍當與劉蓉張集馨咨商分兵籌防以期有備無患劉蓉派援蓋屋之五營亦可另行改撥分防要口該撫仍當懍遵前旨察看軍情賊勢剋日出省督勦以資得力曾國藩奏鮑超東壩之

師久無戰事檄令分營進取句容丹陽一帶如復句容即以全軍駐紮專防金陵城賊冒死外竄所籌亦甚周密惟東壩為江浙門戶現在廣德踞匪歸併湖州皆思上犯江西沈葆楨設防嚴密該逆計無復之難保不回竄廣德由東壩圖援金陵均不可不慮鮑超一軍自當力保東壩方能進取現在廣德已經收復應即派兵駐守以防復踞該大臣請飭閩粵兩湖一體嚴防免成流寇前已諭令毛



鴻賓憚世臨。徐宗幹等嚴密偵探堵禦。著官文。嚴樹森一體豫為防範。以免疏虞。江忠朝業已起程。楊岳斌水師。即著毋庸上駛。仍飭於江面嚴斷濟賊之路。金陵城大而堅。圍攻不易。曾國藩能否親往督辦。俾各營將士有所稟承。以期迅速奏功。並著酌度辦理。將此由六百里諭知僧格林沁。官文。曾國藩。多隆阿。嚴樹森。張之萬。沈桂芬。劉蓉。李雲麟。並傳諭張集馨知之。○又諭本日據曾國藩奏。鮑

超東壩之師。久無戰事。檄令分營進取。句容丹陽等語。前據富明阿奏。丹句二城。非厚集兵力。不能節節掃蕩。已派詹啟綸帶兵前赴鎮營。與馮子材等會議。並函商馮子材等。加派熟識路徑諳練賊情之大員。妥籌會剿。是揚防鎮江之師。亦以規復丹句為己任。現在鮑超一軍。業已分營進取。正宜乘機兜剿。以期迅拔堅城。著富明阿。馮子材。魁玉。速派得力將弁。各率所部兵勇。或進攻句容。會同鮑

超兩面夾擊。或分攻丹陽。俾賊匪有所牽掣。不能與句容之賊聯絡救援。則剿辦亦易得手。富明阿。馮子材等。務當酌量情形。相機妥辦。仍一面將城防江防各事宜。布置妥協穩固。再圖進取。毋稍掉以輕心。將此由六百里各諭令知之。○又諭僧格林沁奏。密陳李世忠遣散部勇情形。豫籌控制一摺。曾國藩奏。接准李世忠來函。請俟五城勇散後。開缺引退等語。李世忠因皖北肅清。先將天長五河兩城交出。歸地方官妥辦善後。並將五河兵勇三千名。一律遣散。其滁全來各城。亦擬於三月底全數移出。散遣練勇。如果言行相符。消患無形。固屬妥善。第據僧格林沁奏。查覈所稟。雖屬馴順。而語多剖辯。心猶未平。曾國藩亦有該提督平日攬權專利。詭詐多端之語。是其畏罪輸誠。未可盡信。且其部下人數眾多。一朝盡行撤遣。難保不遲疑畏沮。滋生事端。僧格林沁現擬飭陳國瑞全軍駐紮徐

州藉資控制所辦甚是該大臣已赴豫省督辦所有一切撫綏駕馭機宜著曾國藩喬松年會商妥辦五城兵勇屆期能否遣散李世忠屆期是否前赴安慶軍營該提督果能自實其言輸忱效順卽照曾國藩所擬辦理儻陽奉陰違潛圖反側亦不得謂事所必無曾格林沁曾國藩喬松年亦當悉心籌畫先事防維不可稍涉大意喬松年日內計已自安慶赴任卽著照該撫前奏迅速馳赴臨淮駐

於營中以資鎮撫將此由六百里各密諭知之○兩江總督曾國藩等議覆湖北巡撫嚴樹森條陳停兵糧以補練勇查安徽省原設額兵自軍興以後潰散殆盡卽間有存者多半孱弱現擬一律裁撤俟軍務大定或挑選勇丁或招募鄉民次第簡補以復舊制如所請行○丁未諭內閣大常寺卿署都察院左副都御史王拯奏敬舉所知以供器使一摺其單內所開之江西舉人尹繼美陝西舉人

張樹炎均著文史部行文各該省調取帶領引見餘著軍機處存記○又諭御史佛爾國春奏倉儲米色黴變請飭查辦一摺南新倉散放正藍旗滿洲本月分大檔粟米不堪食用若非從前驗收草率必係該花戶等抵換攙雜亟應徹底根究以重倉儲著戶部會同倉場侍郎查明嚴叅懲辦○戊申諭內閣左宗棠奏甄別不職知縣請旨革職一摺浙江署富陽縣事甯波府通判胡定傑心存鄙詐

不堪造就署於潛縣事候補知縣程炳恆猥瑣不堪又多嗜好署金華縣事永康縣知縣吳江照性情怠緩不知振作署樂清縣事長興縣知縣李純葵信用官親緝捕廢弛著一併革職以肅官方○諭議政王軍機大臣等戶部奏遵議劉長佑奏總兵李明惠募勇來直行賞請仍由湖南廣東籌給撥還一摺前因劉長佑奏調湖南總兵李明惠募勇來直所需口糧降旨由湖南廣東籌給原期以利

進行。湖南本有應協直餉。惲世臨請將前項墊給行貲銀二萬一千餘兩。即於協濟直隸餉內劃扣。業經降旨允其所請。劉長佑所請分撥籌還之處。著毋庸議。惟湖南廣東奉撥直隸協餉。尚欠解銀二萬有奇。現在直省派援甯夏。並本省留防兵餉。需用至為緊要。著官文。惲世臨。毛鴻賓。郭嵩燾。迅將欠解協直月餉。照數陸續補解。以資接濟。而重畿輔。毋稍遲延。並著官文。嚴樹森。沈葆楨。徐宗幹。沈桂芬。各將該省欠解餉數。迅速委解直隸。以應急需。毋再遷延。劉長佑另片奏請欽定安兩軍月餉。請以山東山西應協直餉。就近抵撥等語。前因畿輔練兵募勇。山東山西每月各應提銀五千兩。解交直隸藩庫。該督所請就近抵撥。訥欽定安月餉之處。實為領解胥歸簡易起見。即著依議行。其該兩軍月餉不敷之數。仍著劉長佑隨時籌解。以濟軍需。將此各諭令知之。○又諭曾元福奏肅清嘉義

克復斗六。林文察奏擒獲首逆。內山肅清。各一摺。嘉義縣境各逆莊。經曾元福督兵攻破。並將附近斗六各逆莊。及斗六土城。陸續攻拔。其內山四塊厝林逆老巢。亦經林文察督軍攻克。生擒首逆林晟正法。臺灣軍務漸次肅清。嗣後於出力人員請獎之件。著丁曰健等查明。歸左宗棠。徐宗幹彙覈具奏。以免互相歧誤。曾玉明攻破北勢湍賊巢。首逆洪欉逃往埔裏社一帶。陳啞狗堅踞小埔心。著丁曰健即會同林文察。曾玉明。迅拔賊巢。將首逆斬擒。並將在逃餘匪。搜捕淨盡。毋留餘孽。本日林文察報內。於林文明一員。因係林文察胞弟。未經請獎。該員應得獎敘。著左宗棠。徐宗幹查明具奏。臺事悉平之後。所有督勦之林文察等。應如何獎敘之處。及攻勦情形。並著左宗棠。徐宗幹查明彙奏。現在髮逆由江西分竄閩疆。防堵正形喫緊。曾元福一軍。仍著左宗棠。徐宗幹遵奉前旨。迅速檄飭內

渡以資防勦。毋稍稽延。將此由六百里諭知左宗棠徐宗幹。並傳諭丁曰健知之。○以太常寺卿王拯為通政使司通政使。○以藉病規避浙江同知程鍾英革職。永不敘用。革罔上營私知縣沈際樹職。並逮問。○以福建臺灣攻克四塊厝賊巢。擢生員蔡懷斌以同知用。賞遊擊王世清等花翎。守備林廷棟等藍翎。餘升敘開復有差。○己酉。諭內閣。賈洪詔奏滇省歷年軍務。徇私濫保。輕棄名器。請飭

一律更正一摺。軍興以來。各直省保舉軍營打仗出力。收復城池。實在著有勞績者。一經奏到。無不立沛恩施。以昭激勸。乃據賈洪詔奏徐之銘在滇。奏報戰功。無非任意鋪張。以為保舉地步。其所保之人。有並未到營。並未入滇。而得邀獎敘者。至賞給功牌。五品以上。即應奏明給獎。而該撫等竟有賞給功牌至二三品者。其司道府及武職等官。亦公然以四五品功牌充賞。該撫濫賞二品頂帶。不下

百餘人。甚至與臺賤役。無不濫膺頂帶。尊卑等級。蕩然無存。疊據自滇來川官紳。眾口僉同。姓名確鑿。實難枚舉等語。朝廷名器。以待有功。徐之銘在滇。竟敢以國家賞功之典。為該撫市恩之具。等威凌替。廝役混淆。壞法亂紀。至於斯極。不但開僭濫之門。啟徼幸之漸。即該省實在出力著有勞績人員。亦無以自別。軍心士氣。何由而振。現在徐之銘業經革職。飭令來京聽候治罪。該撫前後所保文武

各員。即著該部概行一律註銷。其有實在立功者。仍准勞崇光賈洪詔於抵滇後。查明覈實保奏。以示區別。至該省各督撫所賞功牌。除六品以下。仍准戴用外。所有擅賞之二品至五品功牌。並文武各員擅賞功牌。均著一併革去。以重名器。而肅官方。嗣後滇省人員。惟當爭自濯磨。仰副朝廷維新之治。於勞崇光賈洪詔到滇後。振刷精神。力圖報效。毋得沾染舊習。自蹈愆尤。朝廷論功行賞。仍當覈

實加恩。不至沒其實在勞績也。○諭議政王軍機大臣等。李鴻章奏克復嘉興詳細情形一摺。沈葆楨奏。竄賊屢窺建郡均被擊走。欲由甯都窺贛各等語。杭州省城據奏探報。業經浙軍攻克。想左宗棠必已奏報在途。所有石門縣及湖州踞賊。自必膽寒。浙師可以乘勝攻取。李鴻章暫令劉東璋留守嘉興。潘鼎新分守海鹽乍浦平湖各城。其前由常州丹陽竄抵江陰常熟股匪。經郭松林等兜剿斷其歸路。而賊尚有二三萬眾。屯踞楊庫一帶。李鴻章卽飭提督劉士奇等代統程學啟所部。會同郭松林等之軍。奮力進剿。務將楊庫等處股匪。迅卽掃蕩。乘勝會攻常州。並著左宗棠將攻克杭州及布置各情。迅速奏聞。仍督飭浙軍進克石門。分兵替防嘉興海鹽等城。以便李鴻章所部各軍。併力剿辦蘇境之賊。並蘇浙諸軍。合力以取湖州。漸次肅清蘇浙地方。以慰廬望。前由皖南竄入江西之賊。

窺伺建昌府城。疊經韓進春及席寶田等軍剿殺甚多。賊遁兜港。蔓延於新城南豐各鄉。前旗已入廣昌地界。據沈葆楨奏。獲賊供。賊不得逞於撫建。思由甯都以窺贛州。著沈葆楨督飭署贛南道蔡應嵩等。將城守嚴密布置。以資捍禦。並飭席寶田所統各軍。跟蹤追剿。總期就地翦除。方為善策。韓進春留於上湖。嚴防回竄。曾國藩於蘇浙兩省軍情。均應妥籌兼顧。能否親赴金陵。督辦攻剿。以期迅克老巢。仍遵前旨。自行酌奪辦理。程學啟受傷。曾否就痊。據李鴻章奏。稱所傷極重。服藥已有轉機。仍著飭令妥為調理。一經痊愈。隨時奏聞。戈登前由溧陽進攻金壇。散受槍傷。並著李鴻章存問慰勞。諭令休息。俟傷痊再圖協剿。以期得力。將此由六百里各諭令知之。○又諭多隆阿奏攻克蓋屋詳細情形。並漢南髮逆下竄各摺片。該大臣於圍攻蓋屋時受傷甚重。此次摺內未據提及。朝廷廕繫

殊深現在槍子是否取出。傷病曾否漸痊。該大臣已否回省就醫。均著迅速馳奏。並一面安心調攝。以慰馳廑。盤屋既復。藍大順巨逆是否殲斃。抑係脫逃。並著飭令穆圖善等將該逆下落查明。及盤屋餘匪一併認真搜捕。毋令漏網。漢南髮逆下竄。前隊已入豫境。擾及內鄉屬之巡檢司等處。後隊仍在龍駒寨一帶。南陽情形喫緊。該大臣現檄藍斯明扼紮商州。飭劉漢秀等扼守潼關。以防西竄。所籌尚屬周妥。此股賊勢甚剽疾。並有水路之賊。自漢中沿江直下。以犯鄖陽。劉蓉李雲麟務當懍遵前旨。督軍痛剿。越境窮追。並會合多隆阿一體分兵嚴行截擊。與楚豫官軍聯絡夾剿。痛殄逆氛。毋得以驅賊出境為了事。僧格林沁督軍赴豫。業已起程。豫省張逆及東竄髮逆尤恐被剿。回竄商維一帶。多隆阿當飭各員認真防剿。毋稍大意。陶茂林進剿隴州回匪。連獲全勝。與雷正綰定期夾剿。卽

著飭令一鼓殲擒。肅清陝境。以便進兵甘省。規復平固。毋得遲延。將此由六百里各諭令知之。○又諭賈洪詔奏籌辦滇省事宜。俟漢南防軍凱撤。再行舉辦。並昭東防回情形一摺。雲南軍務以昭東二府為進兵門戶。昭通自更換鎮府後。回匪仍前滋事。該鎮府聯絡紳團同心禦侮。東川一帶由楊盛宗與回和好。頗可相安。賈洪詔擬俟川省陝防凱撤。卽親統大軍由昭通進兵。分別剿撫。所籌尚屬妥協。現在漢中髮逆全股東竄。劉嶽昭所部九營已由劉蓉飭令回川。唐友耕現在南川剿匪。亦由駱秉章派員前往接替。滇省進剿機宜正可妥籌舉辦。該二員或統所帶舊部。或尚須增募兵勇。卽著駱秉章賈洪詔會商妥籌。此時滇省進兵總以兵多餉足一鼓蕩平。不至另生枝節為要。儻或稍失機宜一有挫失。反為回逆所輕。剿辦更形棘手。駱秉章賈洪詔務宜謀定後動。計出萬全。固不可濡

滯稽延。亦不容冒昧失機。是為至要。岑毓英本附回黨。該員所稟克復楚雄情形。殊難盡信。並著賈洪詔確查具奏。其幫辦迤南道夏家疇等。即據該撫奏稱勇於任事。素不附回。現克他鄉鎮沅等廳城。甚為得力。即著飭令上緊攻克思普城池。以清邊圉。賈洪詔另摺奏。徐之銘。歷年徇私濫保文武各員。請飭部一概註銷一摺。本日已明降諭旨。照所請辦理矣。但此時滇省尚未進兵。若遽將此旨宣示。殊恐其失職缺望。或愈堅其附回之心。甚至造言惑眾。致成固結不解之勢。殊於滇事關繫非輕。此旨著發交賈洪詔收存。何時可以宣布。著相機妥為辦理。仍一面於宣布後具奏。以便補行發鈔。將此由六百里各諭令知之。○又諭滿慶恩慶奏買巴扎倉喇嘛槍去已革待審之總堪布。照繕夷匪搶去摺件呈覽。改委陳靖暫署拉里糧務。請飭催議補僧俗番目。並催四川餉項各摺片。據稱二年

八月十一夜間。已革總堪布羅布藏稱勒拉木結。帶喇嘛數百名脫逃。經官兵拏獲同逃之喇嘛洛桑曲扎。據供羅布藏稱勒拉木結。由色拉寺行抵噶納山。有喇嘛二人。將該已革總堪布。從馬上抱放平地。餘眾及羸馬。概令前行。惟吐多卜降巴等十餘人。在彼耽延多時。將該已革總堪布之騎馬。空牽至噶納山打尖。云羅布藏稱勒拉木結行至山頂已死。又碩第巴等報稱。十八日在噶納山東北尋見石板圍圈。有羅布藏稱勒拉木結屍身。凡坐其中。現將屍身搬回。當經派員查驗。棺殮寄埋。旋經官兵在達木屬畢納地方。追殺逃犯沙克嘉盡巴等六十七名。生擒吐多卜降巴等一百六十五名。押解回藏。查明首從。照夷例懲治等語。色拉寺現已將不法喇嘛交出。呈繳軍械。其寺中誤受拖累之領袖及眾僧。均在神前盟誓具結。永遠不敢妄為。即著滿慶恩慶。迎機開導。妥為彈壓。毋令再滋



事端。福濟景紋。務當星速起程前進。不得任意遷延。致干咎戾。前被夷匪搶去之滿慶等摺件。業已照繕呈覽。所有遺失佛匣。著滿慶等飭知班禪額爾德尼毋庸補具。拉里糧務嚴清榮撤任後。經滿慶等劄委巴塘糧務張啟昌署理。該員因巴塘事件。尚難交卸。一時未能前赴署任。著駱秉章迅選賢能之員。前往接管拉里糧務。其未到任以前。卽照滿慶等所請。准其以卸任察木多糧務陳埴暫行署理。總理商上事務各員。現在止有噶布倫白瑪結布一人。係實授之缺。其餘均屬署任。據滿慶等奏呼應不靈。深恐別滋事端。請飭催議補僧俗番目等語。自係實在情形。著福濟景紋。於到藏後迅速辦理。將此由六百里各諭令知之。○又諭滿慶。恩慶奏賈巴扎倉喇嘛搶去已革待審之總堪布。改委陳埴暫署拉里糧務。請飭催議補僧俗番目各摺。滿慶等所奏該已革總堪布身死情節。甚屬含

糊支離。難保非被人謀害斃命。滿慶等捏詞入告。亟應徹底根究。以期水落石出。著崇實。駱秉章福濟景紋。將羅布藏稱勒拉木結身死情形。嚴密訪查。據實具奏。其所稱生擒吐多卜降巴等。並色拉寺之領袖僧眾。具結永遠不敢妄為。亦未必盡皆確實。並著一併查奏。滿慶等奏請飭呼徵呼圖克圖及隨伊犯眾。仍遞解回藏。以便將兩造互相訊究。萬無如此辦法。並著該將軍等。仍遵本年正月初

三二月十四等日密諭。妥為辦理。福濟景紋。務當星速起程前進。以弭藏中禍患。寄諭嚴催。業已至再至三。毋再遷延推諉。致干咎戾。滿慶等前將拉里糧務嚴清榮撤回。劄委巴塘糧務張啟昌署理。該員因巴塘事件。尚難交卸。現在改委已經交卸之察木多糧務陳埴署理。已照滿慶等所請。准以陳埴暫署。仍著駱秉章迅選賢能之員。前往接管。以重責守。據滿慶等奏稱現在止有噶布倫白瑪結



布一人係實授之缺其餘均屬署任呼應不靈請飭催議補僧俗番目等語著福濟景紋酌量情形或懍遵前旨於到藏後查明覈辦或權衡緩急豫行揀補均著妥籌辦理藏地餉項萬分支絀本日滿慶等奏請撥餉已於另行寄諭內催令該督籌撥惟此項餉銀可否撥給應否解交滿慶恩慶抑由福濟等赴藏時帶往著駱秉章斟酌情形妥為辦理將此由六百里各諭令知之○又諭本日據軍

機處呈遞常清咨送二年七月以後具奏摺稿除七月二十四日八月十九日兩次所發摺報業經於遞到時分別降旨批示茲仍命軍機處將上次批旨照錄咨會至其餘摺報現均未經遞到自係中途延誤而閱時已久不可再事稽遲已先據奏稿所陳各情分別降旨施行摺稿內有俄人遠遁凱撤兵勇並辦理善後請飭明誼會俄使赴伊犁商辦讓地派員勘界繪圖貼說各摺片俄人現均退

至阿里木圖喀怕勒等處地方過冬常清現將守卡官兵移於奎屯等各卡倫暫駐每月更換一次防範尚屬周密惟此時業已春融雪化難保該夷不再來侵犯著常清隨時加意嚴防毋稍疏忽內附之哈薩克布魯特等仍著隨時獎勵以堅其心其餘部落有首鼠兩端者亦當加意嚴防鐵色克如知悔懼即當設法確探招令內附以散俄人黨與巴哈善將偽稱說和猝傷我兵之夷人轟斃七人旋將該夷餘眾驅逐出卡並未盡數殲滅以防俄人誣我剽奪用意亦頗周密在防兵丁確守紀律並不越營往掠該夷輜重而出隊輒挫兇鋒自應加以鼓勵著常清查明出力之官弁兵勇奏請獎勵至俄夷於分界一事蓄意侵占所議單內於索倫營地面相距僅二十餘里勢難相安前已諭令常清明緒明誼與該夷商酌讓出數百里並將內附之哈薩克布魯特招徠撫輯著仍遵前旨辦理伊

犁自用兵以來。該夷頗有忌心。將來夷使前來分界時。難免不種種逞刁。明誼等自當剛柔互用。相機妥辦。毋令決裂。常清仍當督飭防邊將士。嚴密備禦。毋為所乘。常清擬令明誼會同該使臣。前赴伊犁商辦一切。恐該使臣未肯前往。該將軍現就山川形勢。道里遠近。繪圖貼說。咨送總理各國事務衙門。並明緒。明誼等。本日已諭令總理各國事務衙門酌辦矣。並著明誼。明緒。俟俄使到塔時。按照

送到地圖。詳晰定議。速行辨結。前據平瑞奏。陝甘驛路梗塞。摺報阻滯。擬改道由蒙古臺站行走。已諭令兵部理藩院轉傳各該處一體照辦。並著烏里雅蘇台將軍。咨行伊犁塔爾巴哈台葉爾羌各參贊大臣。及所屬各城嗣後奏報。均改由烏里雅蘇台科布多所屬蒙古臺站。遞至張家口轉遞進京。常清明誼等。嗣後奏報。即著遵照前旨。改道遞送。並著轉行知照各城一體辦理。以期迅速。將此由

六百里各諭令知之。○又諭常清奏請飭陝甘總督將應行補製軍械等件。迅解伊犁備用等語。伊犁上年回務稍定。又值俄夷犯卡。所用軍火等件。或動用官項。或出自捐辦。種種苦情。實屬一時權宜之計。現屆辦理善後。亟應設法籌解。以濟要需。著熙麟接奉此旨。後。即將從前應行補製軍械等項。趕緊派員解赴伊犁。以重邊防。而資應用。將此由五百里諭令知之。○以正藍旗漢軍副都統穆隆

阿署正藍旗護軍統領。○賞頭等侍衛阿隆阿副都統銜。為伊犁領隊大臣。○補鑄浙江台州協副將。河南夏邑縣知縣。各關防印信。從署總督徐宗幹巡撫張之萬請也。○以江蘇官軍克復浙江嘉興府城。賞提督程學啟白玉翎管一支。白玉搬指一箇。玉柄小刀一把。荷包一對。提督李助發一品封典。總兵官熊殿元。副將吳長慶。潘國揚。張家瑜。楊宏勝。張行科。參將左日昇。徐道奎。黃仕林。道員吳

毓芬邑圖魯名號翰林院編修劉東璋都司  
萬重暄等花翎餘加銜升敘開復有差予陣  
亡參將趙三德等二十六員祭葬世職加等  
○以克復陝西藍屋縣城予提督姜玉順遇  
缺提奏賞總兵官卹時成副將程興烈蔣萬  
順參將劉均成魏大舍邑圖魯名號遊擊張  
友恭等花翎餘升敘有差予陣亡協領穆騰  
額祭葬世職加等○予江西建昌陣亡六品  
軍功吳定邦祭葬世職如外委例○庚戌諭  
議政王軍機大臣等訥欽奏馳抵榆林整隊  
前進一摺甯夏滿城被圍日久亟待援兵訥  
欽現雖馳抵榆林俟至定邊探蹤進剿惟定  
邊渡河三十里卽是靈州該處回匪眾至數  
萬逆首馬化隆賊巢卽在金積堡靈州附近  
四面俱為回逆占踞非攻破靈州不能進援  
甯夏訥欽現擬派副將趙廷琅作為嚮導直  
指靈城設法攻剿所辦尚合機宜卽著督率  
在事將弁實力進攻並於勇往之中加以慎

重毋致輕進失利第訥欽原帶兵二十名續  
調直晉兵各一千為數無多未經戰陣恐難  
深恃該署提督前次奏撥馬隊五百名業據  
多隆阿以無可抽撥覆奏此時藍屋業已攻  
克漢南髮逆全股東竄陝省防務漸鬆自可  
酌撥馬隊前赴訥欽軍營會剿以厚兵力著  
多隆阿妥籌調撥毋分畛域陝省回匪自多  
隆阿督兵痛剿次第削平其汧隴餘氛有曹  
克忠等軍分兵掃蕩不難剋日蕆事而甘肅  
自回匪起事後地方官徃於議撫遂至賊氛  
日熾到處蔓延若非威望素著之大臣統兵  
進剿大張撻伐不足以埽羣醜而靖邊陲本  
日已明降諭旨命多隆阿督辦陝甘軍務矣  
該大臣務當統籌兼顧俾陝甘兩省迅就肅  
清用副委任訥欽所部各軍並陝甘帶兵各  
員均歸多隆阿節制以一事權訥欽現督兵  
進攻靈州其雷正綰一軍應由何路進取會  
合攻剿之處著多隆阿酌量調派訥欽所部

恐無得力之將。多隆阿如能揀派數員前往。於大局必更有益。多隆阿傷病。近日是否漸就痊愈。日深塵繫。劉蓉計已抵省。陝西防剿事宜。該撫所部各營。足數分布。著隨時與多隆阿妥籌辦理。多隆阿馬隊分撥訖。欽。後。如兵力不敷。卽著劉蓉將所部之兵。分撥多隆阿若干。以資助剿。訥。欽。摺內所稱。續調晉兵十名口糧。應否仍照晉省防兵之例支發。抑照直隸徵兵口糧給支。並趙廷琅所統兵勇。

軍機處

軍機處

三千月餉。應由何省籌撥之處。請旨遵行等語。著戶部妥速議奏。將此由六百里各諭令知之。○以詹事府詹事朱蘭充日講起居注官。右春坊右中允邵亨豫署日講起居注官。○命欽差大臣西安將軍多隆阿督辦陝西甘肅兩省軍務。

大清穆宗繼天開運受中居正保大定功聖智誠孝信敏恭寬毅皇帝實錄卷之九十六

軍機處

軍機處

大清穆宗繼天開運受中居正保大定功聖智  
誠孝信敏恭寬毅皇帝實錄卷之九十七

臣等謹將本年內各款恭摺具奏  
一、欽此。奉 諭旨。著照所請。杭州府知府一缺。准其以薛時雨升署。仍著該督隨時察看。如果整頓撫綏。悉臻妥善。即行奏請實授。○諭議政王軍機大臣等。有人奏。安徽巡撫喬松年近於巧宦。從前在江南北軍營。為和春等所委任。頗聞簞簋不飭之譏。請飭察看等語。安徽地方新復。全賴疆臣得人。方能經畫咸宜。弭後患而蘇元氣。喬松年平日操履如何。辦事能否結實可靠。著曾國藩隨時察看。據實具奏。毋得稍涉徇隱。將此密諭知之。○又諭。富明阿奏。添撥馬步兵勇渡江。分路進取丹陽。並嚴防江面。及籌濟北渡難民一摺。另片奏丹陽城外。接仗情形等語。前因曾國藩奏。檄令鮑超移東壩之師。進取句容。丹陽一帶。當經諭令富明阿。馮子材等。派兵會剿。現在富明阿添派馬步隊渡江。分路進取。詹啟綸帶領馬隊。由辛豐直抵丹陽北門外。頗有新獲。

同治三年甲子三月辛亥。

孝賢純皇后忌辰遣官祭

裕陵○祭

先農之神遣禮親王世鐸行禮○諭內閣。前因杭州府知府一缺。必須為地擇人。曾經諭令左宗棠酌籌人員。請補請調。不必拘定資格。要以得人為要。俟奏到再行降旨。茲據左宗棠奏。遵員升署。省會要缺。知府一摺。浙江儘先補用同知薛時雨。據該督奏。歷任繁劇。久著循聲。以之升補杭州府知府。可期勝任。

然必須南北兩路會同攻擊。勦辦較易得手。鮑超一軍。曾否進攻句容。抑或先取丹陽。著曾國藩酌量調派。務與鎮防各營聯絡聲勢。迅速奏功。如鮑超進逼句容。兼防金陵城賊外竄。卽著富明阿。馮子材等督率諸軍。察看丹陽地勢。合力兜剿。俾丹句路匪不能互相援應。自不難剋期攻拔。揚防渡江兵勇。旣經富明阿飭令聽馮子材等調遣。馮子材等尤當審度賊情。穩紮穩進。毋稍大意。或為窮寇所乘。屯踞楊庫周莊花市之匪。竄及長壽等沙肆。意焚掠。著李鴻章速派得力將弁。實力掃蕩。悉數殲除。此股賊匪歸路。已為官軍截斷。勢必乘虛而北。並著富明阿嚴飭水師。晝夜巡防。毋稍鬆懈。如江防喫緊。富明阿仍當酌撤南渡之軍。沿江填紮。力保裏下河完善之區。難民紛紛北渡。泰興土橋七港圩一帶。已有一萬數千人。靖江尤眾。該難民等兵燹餘生。殊堪憐憫。現經富明阿提捐廉俸。籌撥

米石。藉資接濟。仍恐不敷。散給著吳棠李鴻章督飭藩司。萬啟琛分飭各地方官設法賑濟。毋令一夫失所。仍令在防兵弁認真盤詰。毋使奸宄溷跡。有人奏江蘇抽收釐稅設局過多。商販甚累。請總設一局。將各卡所收之稅併於一處徵收。於課項旣無短缺。而弊竇更易稽查等語。著富明阿。吳棠李鴻章將抽釐各局。逐加查察。應如何裁撤歸併之處。並著該將軍等會商妥籌辦理。原片著鈔給富明阿。吳棠李鴻章閱看。將此由六百里各諭令知之。○又諭左宗棠奏截剿湖州援賊獲勝。並會克嘉興府城。及杭州餘杭攻剿情形各摺片。湖州大股援賊。竄犯桐鄉烏鎮。經將益澧調派各軍截剿獲勝。破其堅壘。餘賊竄遁。並會合蘇軍攻克嘉興府城。在事員弁均屬出力。著左宗棠擇尤奏請獎勵。惟嘉興克復後。李鴻章派員留守。並分守海鹽乍浦平湖各城。現在江陰楊庫一帶。尚有賊眾屯踞。

常州尚未克復。曾經諭令左宗棠分兵替防嘉興海鹽等城。以便李鴻章所部各軍併力勦辦蘇境之賊。著左宗棠仍遵前旨。迅派得力將弁駐守各城。俾蘇軍得以騰出兵力。痛勦江陰屯踞之賊。進規常郡。昨經李鴻章奏報杭州省城業經浙軍攻克。茲據奏稱蔣益澧督飭水陸各軍攻薄餘杭縣城。斃賊甚眾。遙見杭城西南一帶濃煙四起。知官軍業已得手等語。杭城此時是否收復。著左宗棠確

探詳細情形。迅速具奏。江皖敗賊。麇聚湖州。如杭州餘杭均已克復。卽著左宗棠督率全軍。約會蘇軍。迅圖湖州。殲除巨憝。毋令一賊旁竄。以期肅清全浙。同膺懋賞。前次上竄江西之賊。已至新城。距閩省光邵一帶甚近。左宗棠須會商徐宗幹調撥兵將。嚴密布置。不可令其竄擾完善。降人蔡元吉。既據奏稱自投誠以後。屢著戰功。此次求保文職。以自別於降人。卽著照所請。准其以通判歸部候選。

以示獎勵。將此由六百里諭令知之。○又諭劉蓉奏。通籌現在兵力。遵旨分路追勦。並布置情形一摺。據稱漢南踞匪東竄。前隊扶端各逆首竄往商南浙川一帶。後路馬啟各逆伺間圖犯興安。經李雲麟調兵截勦。馬逆一股狂竄而北。其啟逆餘黨及石逆中旂一股亦經官軍擊敗。分道竄入鎮安。興安以西始就肅清。惟蔡逆二順一股欲由蜀河偷渡回川。經澄漢營水師各軍擊走。退紮雙河口一帶。李雲麟擬將蔡逆破滅。再行東下追賊。曹燦漳與洋縣賊匪竄合之後。游弋於佛坪地方。繞入老林。時窺甯陝。現飭湘果營扼要堵勦。各等語。蔡逆二順一股眾約二萬人。由鄖西上犯洵陽。若不先將此股殄除。勢必乘虛竄擾。復致蔓延。李雲麟既指畫與圖。謂蔡逆已入穀中。可期必滅。卽著責成該京堂督率所部與劉蓉所派湘果等營會合夾擊。迅殄賊氛。毋得徒託空言。致干咎戾。其曹燦漳等

餘逆亦應力圖按剿以絕根株。劉蓉務飭駐守各軍悉力勦捕。迅速肅事。仍恪遵前旨。東下追賊。以收夾擊之效。蔡逆既有偷渡蜀河回川之謀。駱秉章當飭在防員弁兵勇認真防遏。毋令匪蹤得以入境。端扶各逆勢極悖悍。疊經諭令楚豫兩省督撫派兵迎勦。劉蓉李雲麟現擬分派各營由洵陽安康鎮安三路並進。為尾追之師。李雲麟擬俟蔡逆破滅。順流下駛襄樊。相機邀擊。為攔截之師。著官文嚴樹森張之萬添派勁旅。會師夾勦。毋令賊蹤深入腹地。致成燎原。髮逆裹脅之眾。多係德安襄陽黃州之人。未必甘心從逆。楚軍如能嚴扼襄樊。相機截勦。則被脅者自必望風解散。著官文等妥籌辦理。漢南山路崎嶇。被擾之後。米糧一空。劉蓉現統各軍。既以轉運為難。將來出境追賊。實有師不宿飽之虞。著官文嚴樹森張之萬於秦軍行抵各該省境內。即著先行籌備一月口糧軍火。毋令缺

乏。將此由六百里各諭令知之。○又諭嚴樹森奏解餉委員經過地方。請飭派兵護送等語。湖北籌解奉撥同治二年京餉。及直隸固本軍餉。部飯照費並漕折等項。飭委知縣楊宗時熊啟詠分起管解。赴部赴直隸藩庫交納。嚴樹森因恐河南南陽一帶道途梗塞。已飭該委員等改道由信陽州一路行走。並飭本省經過地方妥為護送。第該委員等一經出境。鄂省勢難照料。所有經過河南直隸各州縣。自應一體護送。以重餉需。著劉長佑張之萬飛飭經過各該地方州縣。俟該委員等解餉到境。迅即多派兵役車輛。小心護送。毋稍疏虞。昨據御史蔣彬蔚奏。適年近畿一帶。時有騎馬賊匪搶劫行人。請飭該地方官嚴拏窩頓。免致釀成巨寇等語。直隸馬賊節經降旨嚴飭按捕。而根株未絕。總由辦理不得其法。未能清源之故。著劉長佑按照該御史所奏。督令各州縣嚴查密訪。該匪聚集材莊



窩藏處所。立即派兵搜勦。並飭鄰近州縣四面兜拏。毋任一名漏網。原片著摘鈔閱看。將此由五百里各諭令知之。○以江西攻克陶家渡。並彭澤守城出力。賞副將徐士巍一品封典。副將劉光文。邊曉堂。羅章才。蕭得龍。戴奉聘。參將哈必發。李運勝。守備鍾元興。巴圖魯名號。知府何應祺。都司劉怡卿等花翎。縣丞黃炳堃等藍翎。餘加銜升敘。開復有差。○壬子。諭內閣。御史賈鐸奏。請剔除積弊。整頓

吏治。敬陳管見四條一摺。據稱各省題補州縣本章。由通政司送交內閣。例應依次繕清。按限票籤進呈。乃近來漢本堂。有不過十日半月。即送至票籤。擬者。有壓至累月經年。並不送票者。任意遲速。情弊顯然。又各部書吏。於應題應行事件。任意逾限。每藉口某司查付未回。某部片覆未到。弄權亂法。百弊叢生。其各省首府首縣要缺。督撫大吏。往往以捐班軍功人員。工於應酬。奏請調補。鑽營巧

滑。而同寅謀差。謀缺之弊。無不代為夤緣。又各省考試分發到省人員。不立定規。辦理殊致。尤恐捐生望而卻步。各等語。致治之要。首在除弊。近來公事之積壓。書吏之蒙蔽。各省州縣之不得人。疊經嚴諭中外臣工。認真整飭。何止三令五申。乃竟積習相沿。流弊滋甚。殊堪痛恨。嗣後著大學士嚴飭內閣。漢本堂。於各州縣補缺題本到閣日期。專立檔簿。登記註明。挨次繕清。票擬進呈。統不得逾一月之限。並於每年奏請欽派內閣學士二員。內閣侍讀學士二員。常川赴閣。稽查檔簿。如有逾限。即行嚴叅。其如何嚴定章程之處。著大學士妥議具奏。至各部院應題應行事件。原有定限。豈容縱令書吏任意把持。各該堂官亦宜常川入署。稽查各司積壓。立予叅處。以後如何申明舊例。嚴定限期。並遲延處分之處。並著各部院堂官會同妥議章程。奏明辦理。各省首府首縣缺出。該御史請以正途出

身人員。奏請升調。又考試分發人員。請飭到省。先行書寫履歷。俟輪補到班。再試。以時務策論等語。並著吏部一併妥議。章程具奏。以除積習。而肅官方。尋內閣等衙門奏各省題補題署本章到閣後。予限一月。仍准餘限十日。繕清呈進。各部院衙門題奏之件。有駁查需時者。亦不得逾一月之期。各省首府縣缺出。應令督撫於正途人員內選調。如實無合例。始准以各項出身人員調補。分發人員。務

於到省後。即行考覈。勿待輪補到班。始行考試。以免擇缺趨避之漸。從之。○又諭。前因御史佛爾國春奏。南新倉散放正藍旗滿州本月分大檔粟米。不堪食用。當經降旨交戶部會同倉場侍郎查明嚴叅懲辦。茲據稽查南新倉給事中何兆瀛奏。稱南新倉三月分應放正藍旗粟米。先由本倉監督送到米樣。經該給事中拆看。與二月分所放正白旗米樣相同。誠恐花戶人等另有撓換情弊。將原送

米樣呈覽。請飭查辦等語。南新倉所放粟米。既據該給事中先期收存米樣。何以放出之米。又復微變。不堪食用。該倉花戶人等。難保無抵換撓雜等情。亟應徹底根究。著戶部會同倉場侍郎。將此摺所陳各情。彙入前次交查案內。一律嚴查懲辦。尋奏。遵查南新倉原存粟米五千三百餘石。其米色與查倉御史何兆瀛所呈米樣相符。該花戶等尚無撓雜抵換情弊。請免查辦。惟該倉挨近牆根處所

間有潮溼發塊之米。應飭全行挑出。以備開放。至正藍旗應領三月分兵米。已改劉海運倉另行開放。從之。○又諭。左宗棠奏。攻克杭州餘杭兩城一摺。杭州餘杭兩城踞逆。經官軍於二月二十一日攻勦得獲大勝。賊勢極為窮蹙。蔣益澧復親督水陸各軍。於二十三日乘勢奮攻。慶春艮山等門。晝夜不息。賊膽愈寒。是夜五更。亟啟武林門。向德清一路竄走。蔣益澧督隊入城。殺賊無算。即於二十四

日卯刻將杭州省城克復。餘杭之賊亦於二十四日卯刻由東門逃竄。經左宗棠豫飭各營整隊以待。是日見城中火起。各營分路跟追。餘賊敗竄瓶窯鎮。此次官軍將杭州餘杭二城同日克復。辦理甚為得手。所有竄逃餘匪。即著左宗棠督飭兵勇迅速追剿。盡殲醜類。毋留餘孽。閩浙總督左宗棠自督辦浙省軍務以來。連克各府州縣城池。茲復將杭州省城餘杭縣城攻拔。實屬調度有方。著加恩賞加太子少保銜。並賞穿黃馬褂。浙江布政使蔣益澧。自調任浙江以來。戰功卓著。屢拔堅城。茲復親督各軍克復杭州省城。實屬奮勇異常。著賞穿黃馬褂。以示優獎。所有在事出力將士。著左宗棠查明擇尤保奏。○諭議政王軍機大臣等。昨據御史蔣彬蔚奏。馬賊橫行。請飭各將軍總督府尹查拏等語。著玉明寶珣。德椿。督飭所屬嚴密查訪。如有此等匪徒。即行調派兵勇會合兜剿。毋任漏網。其

邊牆頽壞處所。並著趕緊修整。以防竄逸。原片著鈔給閱看。將此各諭令知之。○又諭左宗棠奏官軍攻克杭州餘杭兩城一摺。杭州敗匪竄向德清。餘杭敗匪亦竄踞瓶窯鎮。左宗棠現擬親赴瓶窯鎮督剿。著即馳赴該處迅速進攻。務乘該逆喘息未定之時。將此股悉行殄除。其竄往德清之賊。亦著左宗棠派兵剿除。毋留餘孽。昨據左宗棠奏稱。淳安咸坪股匪續圖竄越江西者。現仍折回甯國竄入湖州之孝豐縣。侍逆亦由甯國竄入湖州等語。是各路悍黨業已歸併一處。正宜乘此軍威四面兜剿。著左宗棠迅速派撥兵將進規湖州。以期一鼓殲除。肅清浙境。左宗棠既須剿辦瓶窯之賊。又須赴杭城布置。兼須進剿湖州。用兵處所甚多。且距浙省邊界漸遠。賊氛四逼。深恐或有疏虞。所有浙江及江西交界邊防。著曾國藩左宗棠會商妥籌兼顧。嚴斷賊匪竄越之路。斷不可為其所乘。致掣

全局廣信一帶地方。卽著沈葆楨分布兵勇。嚴密堵扼。以防湖郡敗匪竄入。毋稍大意。蘇省常郡。尚未克復。楊庫股匪。為數眾多。前經疊諭左宗棠分兵替防嘉興海鹽等城。以便李鴻章所部各軍。併力勦辦蘇境之賊。惟湖州一城。悍賊麇聚。若徒以浙省之師圍攻。恐其力不厚。諸悍賊尚得伺隙旁竄。著李鴻章酌量移調兵勇。會同浙省之師夾攻。以期迅速克捷。湖郡既克。則蘇省無後顧之憂。嘉興等處駐防之軍。均可撤回。洋將戈登。上年冬間。隨同官軍克復蘇州省城。曾經給與賞銀一萬兩。並由李鴻章另給銀兩。以酬其勞。此次攻拔杭城。洋將德克碑。曾於饅頭山開礮。先行轟坍城垛數丈。亦應給予獎勵。惟德克碑與戈登情形不同。應如何酌給獎勵之處。著左宗棠李鴻章會同商酌。妥籌辦理。以免歧異。將此由六百里各諭令知之。○又諭恩麟奏堵剿甯夏賊匪。催陶茂林進攻秦清兩

縣訪查官員從賊。勸諭紳民捐辦糧草。道員和祥病故。請卹各摺片。甯夏賊匪。屢次竄撲。滿城及平羅縣洪廣營等處。靈州一帶。賊蹤紛駛。聲息不通。中衛地曠兵單。不敷防剿。恩麟酌撥官兵一千餘名。交代辦提督梁生嶽統帶。前往中衛。又續調前次派赴安定之川黔勇丁千餘名。一併交梁生嶽調遣。著恩麟恩麟督飭派出各軍實力進剿。迅殲醜類。並知會慶昫就現有兵力認真固守。以待援軍。

甯夏平羅等處匪目遞稟。以漢圍仇殺。被偏生事。藉口狡辯。梁生嶽以官兵未集。權示羈縻。卽令禁止燒殺。繳獻城池。以緩其謀。一面相機布置。密籌進剿。著恩麟恩麟飭令梁生嶽統率所部。力圖埽蕩。一俟得有援師。卽可奮力攻剿。不得專事羈縻。致滋貽誤。甯夏滿城糧餉鉛藥缺乏。恩麟現將皋蘭等處村莊所捐小麥。酌提三千石。撥充甯夏滿城兵糧。另籌銀一千兩。解交阿拉善王貢桑珠爾默

特咨令雇辦駝隻。派員由草地前來裝運。解往應需鉛藥。恩麟亦飭甘涼各營量為分撥。仍由阿拉善所部轉運。該滿城危如累卵。亟應速籌接濟。即著照恩麟所擬一面知照阿拉善王貢桑珠爾默特安設臺站。疏通文報。甯夏滿城嗣後兵食僅有不足。仍著照恩麟設法源源接濟。毋令缺乏。南路之西和鹽關鎮賊匪與官軍久持。屢出奔竄。著照恩麟督率林之望痛加勦洗。迅殄逆氛。清水縣

之張家川。秦安縣之蓮花城等處賊匪。時聚時散。肆意衝突。非厚集兵力。不能迅期殄滅。陶茂林一軍。本俟汧隴歲事後。即當移師赴甘。著多隆阿檄催陶茂林轉戰而前。會合林之望。張華之兵。將張家川蓮花城之賊。次第勦辦。悉數殲除。然後由秦安徑赴隆靜。與雷正綰之師東西夾擊。以收破竹之效。雷正綰務當節節進勦。俾該逆腹背受敵。應接不暇。方可痛殲羣醜。多隆阿現在督辦陝甘軍務。

應如何分撥勁旅。妥籌兼顧之處。著該大臣酌度辦理。都司王錫爵投入靈州賊巢。署甯夏縣知縣彭慶章遊擊保亨。自甯夏失陷後。徧張偽示。勒令官民從逆。且聯名與洪廣營遊擊甯貴私互。勸其投賊。以保身家。王錫爵等身任職官。受國厚恩。甘心叛逆。實堪髮指。著多隆阿。照麟。雷正綰。恩麟設法拏獲。於訊明後。即行凌遲處死。以昭炯戒。據恩麟奏甘肅大營糧餉。雖由陝省籌撥。甘省仍當盡力

圖維。現飭平涼以西東南各廳州縣。勸諭紳民捐辦糧餉草料。其所捐之數。或與照例議敘。或准其抵收本身應交地丁銀糧。隨時分別辦理等語。該紳民如能急公好義。踴躍輸將。即照恩麟所議行。至該護督請照川陝章程興辦。畝捐甘省本屬瘠苦。現又瘡痍滿目。民不聊生。豈可再加朘削。恩麟所請辦理畝捐之處。著毋庸議。署甯夏道和祥帶兵前赴中衛。在途病故。奏請議卹。和祥尚有被參各

案未經辨結。所請照軍營病故例議卹之處。著俟定案時再降諭旨。至甯夏道一缺。卽照恩麟所請。准以朱百川暫行護理。卽赴中衛會同梁生嶽併力進剿。將此由六百里諭知多隆阿。熙麟。雷正綰。並傳諭恩麟知之。○補鑄直隸杜勝營都司。山東陵縣安邱縣等知縣各關防印信。從總督劉長佑巡撫閻敬銘請也。○予甘肅甯夏殉難署副將勒豐額。署知府呂際韶。署同知蘇常存。署知縣趙長庚。

祭葬世職加等。○癸丑諭議政王軍機大臣等。馮子材。魁玉奏楚軍克復句容。現擬移軍會擣丹陽一摺。鮑超官軍由東壩進剿句容。馮子材等復派陶茂森各軍由東昌街直擣句容之北。進薄北門。鮑超之軍已由南門攻入。立將縣城克復。句容與丹陽互為犄角。此次鮑超督軍進剿一戰而下。堅城勦辦甚為迅速。深堪嘉賞。其句容餘賊竄往何處。未據馮子材等奏明。著卽飭令鮑超等查明追剿。

丹陽之賊。此時聞風喪膽。著曾國藩卽檄飭鮑超移得勝之師。疾擣丹陽。使該逆不得喘息。富明阿所派渡江兵勇。先後八千餘名。詹啟綸已直抵丹陽北門外。頗有新獲。富明阿卽飭該總兵與鮑超之師。南北夾擊。迅圖攻拔。馮子材以寶堰屯甸一帶。尚有逆壘未平。飭陶茂森移軍埽蕩。著迅將寶堰屯甸逆壘削平。卽乘勝併力丹陽。以期功收破竹。其金壇一城。賊勢自己窮蹙。如機有可乘。各路官

軍亦可分兵掩襲。使各城次第收復。早奏膚公。李鴻章派攻常郡之師。前以賊氛內竄。致稽戰事。此時丹句敗逃之逆。更恐窮極鋌走。思犯毗陵。如能早將常郡攻克。或不至為所牽掣。現在攻剿情形若何。著飭李鴻章等一面迅圖克復常州。一面嚴備丹陽之賊。續行內犯。毋稍疏虞。將此由六百里各諭令知之。○又諭。前因甘肅甯夏失守。回氛甚惡。該處可由蒙古草地直達歸綏。該二城官兵深不

足恃。因諭令都興阿由揚防前往。該將軍奏明取道京師較為直捷。茲據到京。查其所帶兵力僅止三百名。為數甚單。因思僧格林沁派駐山東恩縣定安所部有黑龍江營總依能額等所帶兩起黑龍江官兵三百六十餘名。若令調赴歸綏。交都興阿統帶。則兵力較厚。庶足以資鎮壓。至歸綏乃係扼要地方。亟應妥籌防勦。著僧格林沁即飭定安將所帶黑龍江官兵三百六十餘名。交營總依能額管帶。即由恩縣拔隊前赴歸綏。歸都興阿調遣。該將軍尅日由京起程。此項官兵由東取道直境。甚為便捷。並著飭催迅速啟行。其定安所部駐紮恩縣之兵。如須添補。即著該大臣另為籌撥。以資彈壓。僧格林沁自蒙赴豫。何日啟行。何日可到許昌。張總愚股匪出山以後。各路官軍兜勦如何。陝省漢中出竄逆匪。已由商南竄越豫省內鄉等境。尤恐其與張總愚等勾合。而鄧州新野又恐為沿漢下

竄之賊。紛擾陳大澐股匪。擾及襄樊。亦恐其與漢中竄匪潛謀合併。該大臣抵許昌後。作何籌布。鄂豫各軍堵勦是否得力。應令如何協同勦辦之處。著即迅速奏聞。以慰懸廑。將此由五百里諭令知之。○又諭。前據都興阿奏。派協領莫爾賡額等管帶吉林黑龍江遣撤馬隊官兵各三十員名回旗。請飭該兩省挑換精壯赴營補額。並在該兩省調撥西丹一百名。前赴揚州等語。當經諭令景綸。特普欽。俟揚防抽撤歸伍官兵到後。按數挑換。馳赴揚州軍營。其西丹能否如數挑選。並令酌量辦理。嗣據景綸奏稱。吉林無兵可撥。擬將遣撤官兵三十六名。照數選派。特普欽奏稱。西丹未經戰陣。已將抽換防兵三十名。照數派撥。並挑選正兵七十名。共挑足一百名。以上挑選各兵。均據景綸。特普欽聲明。俟莫爾賡額到時。再由該員備帶銀兩項下。發給裝費各等語。莫爾賡額此時計已可抵吉林等

省。著景綸特普欽。卽將該員備帶銀兩。速卽發給挑選兵丁。飭令趕緊起程。都興阿現已由揚州來京。卽行前赴山西歸綏一帶防堵。並著景綸等飭令該兵丁。改道由附京一帶。前赴歸綏防所。聽候都興阿調遣。毋庸前赴揚營。如該兵丁業已起程。卽著玉明於該二省兵丁過境時。飭知該帶兵官改道行走。以免歧誤。將此由五百里各諭令知之。○以克復浙江省城。賞奏事官暨兵部捷報處司員

等加銜加級有差。○減免貴州各府廳州縣被擾地方上年額賦。○甲寅以神靈佑助。頒陝西鳳翔府

關帝廟扁額。曰靈昭秦雍。

風雨神壇扁額。曰永甘永慶。

城隍廟扁額。曰福蔭岐陽。○諭內閣前因浙江嚴州等府及蘭谿等州縣克復。浙東肅清。曾降旨將同治二年分錢漕均行蠲免。嗣因衢州一府雖未失陷。而西安縣各鄉被匪焚

掠。復降旨將該縣錢漕蠲免。茲據左宗棠疊次奏報嘉興杭州兩府先後克復。該府屬地方久為賊踞。小民慘遭荼毒。蕩析離居。田土荒蕪。殊堪憫惻。自應一體施恩。保此遺孑。所有杭州嘉興兩府屬新復各州縣地方。著加恩將同治二年及三年分應徵錢漕悉行蠲免。其未經克復之湖州一府暨石門等縣。並著於克復後。查照杭嘉兩府蠲免章程。一律辦理。該督撫卽刊刻謄黃。徧行曉諭。並督飭

各地方官吏。安集流亡。妥籌撫恤。務使實惠及民。毋任吏胥舞弊。用副朝廷軫念殘黎至意。○又諭御史阿克丹奏漕糧漸次抵通。請嚴別積弊一摺。漕糧為天庾正供。豈容攙和偷漏。虧短那移。乃積習相沿。踵而愈甚。據該御史奏稱近來漕糧由津起剥。已有攙雜等弊。抵通交納。及運倉之日。沿途層層剝削。入倉以後。又復舞弊虧缺。上年通州中西兩倉。竟虧至二萬數千石之多。雖經部議著賠。該



二倉現仍任意懸宕。轉瞬新糧入倉。難保不巧為那移。彌縫賠款。所奏自係實在情形。著倉場侍郎督同坐糧廳大通橋監督於今年漕糧抵津運通時認真查驗。務令一律乾潔。如查有潮溼攪雜虧短等弊。即著嚴參懲辦。其虧數較多之通州中西兩倉。並著暫停收入新糧。俟上屆所收糧石放竣。查明有無虧短。劃清界限。以除積弊。該二倉應收糧石。著與各項米石一律搭運入京。此項新糧應歸何倉收儲。著戶部酌覈辦理。○又諭。前因升任順天府府丞卞寶第奏。參山東東昌府知府秦際隆貪劣各款。當經諭令閻敬銘查明參辦。茲據閻敬銘奏稱。秦際隆在東昌府任內有革縣鹽梟滋事。時因局門考試。不克分身。派員先往查拏。並非委員說和。不肯拏辦。捻匪竄陷莘冠等處。該員帶兵進剿。曾在沙鎮受傷。回郡醫治。實無畏賊逃遁情事。所稱撤任後夤緣回任一層。查該員係因傷請假。

並未撤任。傷痊奉飭回任。亦非夤緣。至宋景詩勇隊滋擾。該員即據實稟覆。查無受賄消弭確據。惟於所屬失守四縣。咎有應得。請交部議處等語。秦際隆著交部議處。仍著送部引見。○諭議政王軍機大臣等。張集馨奏。陝省回務漸就肅清。南山髮逆尚未竄盡。調兵嚴防潼關一摺。據稱多隆阿右眼鉛子尚未取出。不時疼痛昏迷。覽奏實深廕繫。茲特降旨。命穆圖善署理欽差大臣關防。並幫辦多隆阿軍務。俾該將軍得以調理。多隆阿當設法醫治。以期剋日痊愈。用慰懸念。穆圖善現已幫辦軍務。署理關防。一切相機調度。責無旁貸。著即督飭各軍。西剿回匪。南防髮逆。務當妥籌兼顧。毋稍疏虞。雷正綰督勇援甘。責任甚重。現在靈臺汧隴。埽蕩肅清。涇州後路無虞梗阻。該提督尤當督率陶茂林曹克忠激勵各營。鼓行而西。盡力勦洗。毋得任意遷延。自干咎戾。逆匪曹背時現與藍逆合股。分

踞甯陝廳之金雞河八斗坪等處。雖經該廳兵勇民團擊卻。該逆尚在鎮安。而藍二一股游弋於蜀河一帶。逼近洵陽。是漢南餘孽勢尚披猖。著劉蓉恪遵前旨。會同李雲麟迅將曹藍各逆悉數殄除。僅任其盤踞蔓延。蹂躪不已。或聽其結隊東竄。徒事尾追。以塞責。必惟劉蓉李雲麟是問。曹藍等逆均由川省竄入漢南。劉蓉等攻勦緊急。難保不遁回蜀境。駱秉章仍當督飭在防將領。嚴密防範。期於迅殄逆氛。豫西捻匪竄至盧氏縣之漫川鎮。該縣毗連閬鄉盧靈關一帶。防堵最關緊要。著僧格林沁張之萬嚴飭諸軍速將此股迎頭截勦。埽除淨盡。毋令窺伺秦疆。參將雷顯揚已到潼關防所。著穆圖善張集馨嚴飭該參將等認真堵禦。不准稍涉鬆懈。沈桂芬仍恪遵疊次寄諭。分飭各營嚴防河岸。毋稍大意。駱秉章等奏官軍攻勦松潘逆番克復疊溪一摺。疊溪營城業經克復。賊目日吉亦已

被殲。該逆首自必聞風喪膽。著駱秉章檄飭蹇聞聯昌等移得勝之師。乘機進勦。務將逆首擒斬。以杜後患。並飭該文武員弁嚴防西北兩路。毋令竄入甘肅等處。前據劉蓉奏川省秦江縣復有黔匪竄擾。該督本日奏報。何以尚未提及。著卽星速奏聞。仍飛飭劉嶽昭督率所部前往截擊。毋令闖入蜀境。將此由六百里諭知僧格林沁多隆阿雷正綰穆圖善駱秉章張之萬沈桂芬劉蓉李雲麟並傳

諭張集馨知之。○命西安副都統穆圖善幫辦欽差大臣多隆阿軍務。並暫署欽差大臣。○以陝西定遠辦團力力賞同知汪兆侗花翎遊擊閔長申等升敘有差。○以克復四川疊溪營城。予同知蹇聞優敘。賞縣丞王恩格等藍翎。餘加銜升敘有差。予陣亡守備董占元等祭葬世職加等。○予山東博山被戕在籍道員李澤長祭葬世職。○予陝西藍屋殉難知縣慶麟傳恩煦祭葬世職加等。並建專

祠慶麟妾劉氏妹大姑旌表如例○乙卯諭議政王軍機大臣等雷正綰奏疊平賊壘靈崇後路肅清分軍規取平涼一摺另片奏請將西南之清水等處兵勇交陶茂林就近節制請飭陝西勸捐糧石濟餉各等語慶昫奏甯夏近日防守情形一摺雷正綰由靈臺截勦汧麟竄逆後復自崇信連克雙廟集神浴河白水鎮眉現鎮等處賊巢更番移營前進靈臺崇信後路一律肅清現與陶茂林晤商

該提督由東北白水鎮四十里鋪一帶陶茂林由西南華亭一帶分道規取平涼府城所辦均屬妥協著即會同陶茂林剋日進取平涼以期漸次埽蕩被脅難民自應准其反正如有真心從賊者仍應分別嚴懲該提督由東北路進兵與西南聲息不通所有清水安定隆德靜甯一帶兵勇即照所請交陶茂林就近節制訓練以專責成即著熙麟雷正綰傳知陶茂林認真統率並須兼顧蘭州省城

不得稍有疏失所請於陝西北山一帶勸捐糧石以濟軍食著張集馨遴派妥員會同雷正綰所派之員實力勸辦但不得指定十分之一以免騷擾並著熙麟設法接濟雷正綰營糧石籍收飽騰之益曹克忠現在駐軍何處應由何路進勦著多隆阿等迅飭進兵以收夾擊之效多隆阿傷病疊經寄諭詢問如子已取出傷可無礙即著迅速馳奏仍一面督飭穆圖善雷正綰等分道進勦迅速奏功

以副委任穆圖善既已幫辦軍務暫署關防不獨勦辦陝省回逆是其專責即漢南髮逆亦應幫同劉蓉妥籌截勦不可顧此失彼慶昫等奏甯夏匪眾情形時來撲犯該將軍等固守待援現據恩麟咨稱已左中衛左近捐籌小麥三千石馱運接濟著該將軍等嚴催運送仍督率在城文武固守待援毋稍疏忽恩麟所籌麥石不過暫濟一時之急此後仍著熙麟會同恩麟隨時設法陸續解濟以蘇

民困。訥欽一軍。前經諭令速援甯夏。並著派員催提。內外夾擊。以保危城。訥欽之兵。未經行陣。該署提督恐難獨當一面。前諭多隆阿。揀派大員。幫同訥欽帶兵勦賊。即著多隆阿。穆圖善迅速妥籌調派。馬隊五百名。曾否派往。並即催令起程。以資得力。雷正綰攻勦平涼。如已得手。即分軍前赴甯夏。會同慶昫痛殲醜類。規取郡城。毋失戎機。將此由六百里諭知多隆阿。雷正綰。穆圖善。慶昫。熙麟。並傳

諭張集馨知之。○補行引見京察人員。得旨。上駟院卿誠明武備。院卿廣毓。均著照舊供職。○以甘肅伏羌勦擊回匪獲勝。賞都司張玉春等花翎。千總楊煦等藍翎。餘升敘開復有差。予陣亡知州談葆和祭葬。世職加等。○丙辰。諭議政王軍機大臣等。現在蘇杭均已克復。金陵圍攻日緊。前閱李鴻章奏。內有三四月可以克復之言。當此大功垂成。各路統兵將帥及各該督撫等。允宜同心協力。以期

共濟。自陝省漢中之賊。出竄甯陝商州一路。並有分由漢江水路下竄者。節據多隆阿。張集馨等奏報。漢南賊欲回救金陵。約於鄂省襄陽老河口等處會齊。官文等前奏克復厲山。並東陽霸山解圍。收復上津堡等情形。摺內具稱。藍二順首惡稽誅。漢南逆匪悉數東下。張總愚股匪自南魯山中逸出。逼近南陽。豫省敗捻又越棗陽。或由王家河以窺襄樊。或由雙溝司以達新鄧。均未可知。襄樊為全

鄂上游。南北鎖鑰。東西北三面之賊。紛沓而來。鄂軍能否自固藩籬。猶無把握。所派成大。吉。歐陽正。壩。梁作楫。及副將龍藻琦。都司周有全。總兵周鳳山等。水陸各軍。分駐襄鄖。並當陽各處。以上各軍。是否均已到防。何以各軍戰守情形。經月全無奏報。當此金陵垂克之時。若令賊得肆其狡謀。於襄樊一帶會齊。乘上游建瓴之勢。順流直下。將使圍攻金陵大軍。為所牽動。豈不又礙全局。官文嚴樹森

如不能將此賊嚴密防勦致誤大局自問當得何罪軍情緊要鄂省各路官軍深恐事權不一為兵家大忌官文嚴樹森二人內即當商定一人出省督辦防勦毋得安生省垣一任賊之紛竄俟得有勝仗一奏塞責以為了事並著於商定出省後一面迅速奏聞曾國藩能否親往金陵督辦攻勦現在襄樊喫緊該處為金陵及皖省上游亟應豫為防範不可稍涉大意該督前奏楊岳斌統帶師船嚴防江面不能調往他處此時江面上游有事著即於楊岳斌彭玉麟二人內酌留一人防江一人泝流而上以資防勦如鄂省派出成大吉等軍無所統率楊岳斌等無論何人前往均可登岸將鄂省各路陸軍併歸統帶調遣以期得力僧格林沁日內當已行抵許昌該處與襄樊較近軍情賊勢諒能偵查明晰張總愚股匪出山以後勦辦若何漢中竄匪逼近內浙境地一犯南陽與襄樊賊股又虞

串合而張逆一股前據張之萬奏竄及嵩縣等境該處又與河朔切近有關北路之防究竟中州軍務現以何路最為緊要著僧格林沁於抵豫後酌量緩急將各軍分別調遣並著一面迅速奏聞其襄樊一帶竄賊官文嚴樹森必當嚴督將士勦除淨盡不准有以鄰為壑之心並不准以有僧格林沁在豫稍存推諉曾國藩為國重任身繫東南全局安危官文等向來辦理軍務尚能不分畛域均屬有功之人值此大功垂成尤應始終罔懈同濟艱難以維全局若令垂成之功又有中變事屬何人貽誤必將該督撫重治其罪不能以前此有功稍從寬宥也將此由六百里加緊各諭令知之○又諭前因沈葆楨奏江右軍務緊要請將茶稅牙釐仍歸本省徵收諭令戶部妥速議奏茲據奏稱蘇浙敗賊奔突堪虞儻防禦稍疏不獨江西遭其蹂躪即曾國藩亦添西顧之憂曾國藩軍營各省協餉

及釐金等款。為數甚鉅。通盤籌畫。尚可補苴。措挂。其江西茶稅牙釐。請擬照該撫所請。歸本省分提一半等語。江西防勦。現在極形喫緊。與其糜爛之後。分兵籌餉。不如先事豫防。俾江省得以自固藩籬。即曾國藩亦可專力東南。著照該部議。准如該撫所奏。將江西牙釐茶稅。由本省分提一半。作為該省防餉。其餘一半。仍歸曾國藩軍營。俾得各資接濟。原摺著鈔給閱看。將此由五百里各諭令知之。

○又諭前因德興阿奏。旗營月餉馬乾。暫給二成。勢難餬口。並幼丁人數不足。請變通辦理一摺。當經交該部速議具奏。茲據戶部等部會議覆奏。擬照該署將軍所請。辦理等語。西安滿兵。拴養馬匹。因頻年徵調。軍營倒斃。致有缺額。現經暫給二成月餉。合馬乾統計。每兵一月所得。不過一兩有零。困苦異常。勢難將未補馬數。實行覈減。且自上年正月。至本年二月。飢斃男婦子女六千六百五十四

名之多。顛連情狀。尤屬可憫。所有該滿營月餉。著即照該部所議。自本年四月起。以四成實銀支放。俟兵餉充裕。馬乾一項。再由該署將軍奏請覈實辦理。至西安馬甲。前後出缺一千餘名之多。丁壯不敷挑補。著即照該部所議。先將十歲以上幼丁充補。如補完後。再出之缺。無人頂補。再以十歲以下幼童。暫行改補。步甲。儘再挑補。無人。即著咨部扣除。俟將來人口眾多時。仍行照舊挑補。所有該營

步甲。仍照舊章。每月給發月餉實銀一兩。米折三錢。以恤兵艱。而符定制。現在西安軍務。已就肅清。籌措餉銀。較易。著劉蓉張集馨。即行設法籌撥。毋稍推諉。並著德興阿。將現挑幼丁。分別操演。以收實效。將此諭知德興阿。劉蓉。並傳諭張集馨知之。○丁巳。諭內閣。倉場侍郎鍾岱。宋晉奏。漕糧掣欠過多。自請分別議處。察議等語。據稱向來掣欠一項。每屆一年。漕糧收竣後。查明確數。於經紀車戶應

領脚價內扣出賠補。乃近來久未查辦。流弊滋多。遂至掣欠之數。年甚一年。現據查出自咸豐七年。至同治元年。已不下三十餘萬。其同治元二兩年掣欠米粟豆麥等項。約計已在十萬之外。虧短尤多。似此任意欠缺。毫無顧忌。若不嚴行查辦。勢將伊於何底。著倉場侍郎逐一詳細查明。掣欠確數。嚴定章程。分別賠補。該經紀車戶。如有偷漏舞弊等情。並著嚴行懲辦。毋稍輕縱。宋晉在任已將兩年。於倉儲積弊。未能整頓。著先行交部議處。鍾岱到任未久。著交部察議。尋議宋晉應降二級留任。鍾岱應罰俸一年。得旨。均著准其抵銷。○又諭本日據多隆阿由八百里馳奏。全陝回務肅清一摺。此奏殊涉鋪張。陝西回匪自多隆阿入關後。節節掃蕩。地方漸就肅清。惟此項匪徒逃入甘省。根株尚未淨絕。前經明降諭旨。命多隆阿督辦陝甘兩省軍務。該將軍正宜乘此聲威。督飭各軍分路進剿。將

回匪悉數殲除。俾漢民良回。得以安居樂業。仰慰朝廷除莠安良之意。漢南竄匪。尚未殲除。亦應會同劉蓉分兵截剿。俾全省一律肅清。方為不負委任。現在朝廷但求實際。不尚虛文。該將軍仍當督飭各將士奮力進取。以竟全功。而膺懋賞。有厚望焉。○諭議政王軍機大臣等。李鴻章奏。兜剿楊庫一帶竄匪。殆盡。沿江腹地肅清一摺。常州丹陽股匪。竄擾江陰常熟。經李鴻章添兵援剿。斷其歸路。常州丹陽踞逆。屢次由江陰青山等處。銜入接應。均經張樹聲劉盛藻等。設伏擊回。李鴻章復由蘇州馳赴長涇督戰。將華市周莊楊庫踞賊擊敗。餘匪竄聚雲亭花山一帶。復經官軍分路截剿。殲除殆盡。此股逆匪。為金陵常州外援。官軍於兩日間。將該逆二三萬眾。悉行剿除解散。賊中偽王侯及大頭目。鮮得脫者。沿江腹地一律肅清。辦理甚屬妥速。此時常郡賊援已絕。李鴻章正宜移得勝之師。會



攻常城。迅拔堅城。以斷金陵外應。仍一面分軍規取金壇。毋稍延緩。鮑超自克句容後。進攻丹陽。此時曾否得手。並著曾國藩檄飭該提督。並飭知馮子材等軍會同夾攻丹陽。迅將該城克復。以期肅清金陵東路。現在金陵賊勢當更窮蹙。值此功在垂成。務當慎益加慎。曾國藩當飭圍攻金陵各營將士嚴密防範。以杜該逆出竄。毋稍大意。程學啟槍子取出後。續據李鴻章奏。漸有轉機。此次報內未經提及。是否痊愈。著李鴻章遇便奏聞。戈登輕進失利。情形如何。何以幾覆全軍。並著李鴻章詳細具奏。道員張樹聲。前經李鴻章奏請記名簡放。與吏部奏定章程不符。此次復由常州分兵堵紮要口。擒斬甚多。著交軍機處存記。候旨簡用。降調總兵鞠耀乾。前失守福山。李鴻章因其熟悉江面水師情形。且前次曾有戰功。奏請以水師參將降補。當經降旨允准。茲據給事中王憲成奏稱。該撫前奏

懲處該總兵之處。與條例不符。請照例治罪一摺。著李鴻章將鞠耀乾功罪是否可抵之處。查明覆奏。原摺著鈔給李鴻章閱看。將此由六百里各諭令知之。尋李鴻章奏。鞠耀乾功過尚足相抵。請仍以水師參將降補。從之。○又諭多隆阿奏。全陝回務肅清。及攻破神峪河等處賊巢各摺片。多隆阿傷病情形。屢降諭旨詢問。此次謝恩摺內。具稱奉到賞去如意拔毒散。當即敷治。神氣稍清。可有生機。而受傷處所。槍子尚未取出。覽奏彌深廕念。陝省回匪。雖就肅清。而漢南竄匪。尚肆擾於鎮安蜀河一帶。甘省逆回。盤踞平固甯夏等城。多隆阿遽以陝省肅清。鋪陳入奏。且由八百里馳遞紅旗報捷。而所保之員。又非專指藍屋克復案內而言。殊屬夸張失實。甚非該大臣向來忠勇樸誠。辦事情狀。且於張集馨等各員附片陳請。特予鼓勵。覽奏之餘。深恐多隆阿傷病昏迷。於此等奏報。失於察奪。尤



難保非其左右辦事之人。欲得保舉。意存見好。乘其病中。督亂所為。姑免深究。仍著多隆阿趕緊設法。將傷口槍子取出。調治速愈。以資倚任。張集馨係棄瑕錄用之員。現以臬司暫護撫篆。德興阿亦係棄瑕錄用。現以副都統署理將軍。卽官銘亦監司大員。且係官丈之弟。其為賢否。與平日辦事情形。朝廷豈不深知。予奪用舍。自有權衡。何必該大臣特為陳請。至雷正綰等各員。自係銜鋒打仗。及隨營辦理軍務出力之人。亦經疊次優加獎敘。如果陝甘兩省回匪軍務普律肅清。仍當覈其勞勩。論功行賞。此輩著卽留中。俟陝甘軍務全行肅清。再行降旨。穆國善署理關防。於軍務一切。自當懷遵前旨。督飭各軍。西勦回匪。南防髮逆。相機調度。妥籌辦理。劉蓉身任陝撫。於陝省收復各郡縣地方善後事宜。尤屬責無旁貸。著卽督飭藩臬兩司。妥籌辦理。鎮安一帶竄匪。劉蓉前奏與李雲麟商定督

率各軍分投截勦。究竟能否得力。不至任賊再行紛竄。肆擾鄰疆。此時盤屋旣克。多隆阿所部諸軍。應如何商同諸遣。著卽與多隆阿穆國善會商布置。雷正綰與陶茂林均已師偏平涼。該提督前請與陶茂林分路統率。以專責成之處。當經寄諭。准如所奏辦理。著卽迅速進兵。攻拔平涼。以次漸圖埽蕩。熙麟尚駐慶陽一隅之地。於全甘地方。不足以資控制。恩麟暫權督篆。為時已久。恐於一切呼應不靈。致多貽誤。現在雷正綰等之軍。已偏平郡。慶陽不過糧臺轉運。如有明幹道府之員。卽足以資任使。著熙麟酌量刻下慶陽無甚緊要事件。卽當作速前往蘭州。接篆視事。或慶陽糧臺一時未有更替得力大員。卽俟文煜到後。交其管理。亦卽速赴蘭州。以慎封守。而重委任。將此由六百里各諭令知之。○以江蘇楊厚等處勦賊獲勝。江岸肅清。賞總兵官李正佩從一品封典。副將周河清參將向

順福易華元。邑圖魯名號。總兵官楊鼎勳等升敘有差。○戊午。諭議政王軍機大臣等。通政使司通政使王拯奏。江浙路逆。日就削平。事機至緊。第皖軍仰食。仍惟江省總臺是賴。以兩湖捐釐之數。為皖軍十萬養命之原。不特浙餉不能分撥。即曾國藩所部月餉亦止能放數成。粵東情形。迥非昔比。釐捐一項。籌辦甚難。近日沈葆楨又因江西勦賊緊要。請將協皖餉銀酌定分數。並於茶稅牙釐項下。

分提其半。以為本省之用。誠恐軍前將卒。傳聞餉源將窒。眾心或生缺望。殊於大局關係非輕。請飭江皖楚粵各疆臣。同心勦力。以求共濟各等語。近日蘇杭疊復。金陵合圍。江浙地方可望以次肅清。惟常郡丹陽尚相犄角。浙賊悉萃湖州。其竄入江西之賊。又蔓延於撫建一帶。並有由瀘溪新城而潛越閩境者。若非在事諸臣和衷共濟。迅將金陵老巢剋期攻拔。並將各路竄距餘匪悉數殲除。萬一

師老財匱。必致餘燼復然。不可收拾。從前和春張國樑等大軍之潰。即由司計者掙克月餉所致。王有齡困守杭城。亦以王履謙等不能接濟。致浙省淪陷於賊。前車之鑒。可為寒心。著官文嚴樹森。憚世臨將辦有成效之釐捐。隨時整飭。源源接濟皖餉。毛鴻賓。郭嵩燾於粵省釐捐一項。恪遵疊次諭旨。妥為區畫。務令利歸公家。毋資中飽。以裕餉源。沈葆楨因本省勦賊亟需。暫將稅釐提出一半充餉。

亦是實在情形。第皖軍關係全局。沈葆楨平日公忠體國。畛域不分。仍著於無可籌畫之中。力圖撥解。皖北地方新復。如有可以設法接濟之處。並著曾國藩。喬松年酌度辦理。原摺著摘鈔給與官文等閱看。將此由六百里各諭令知之。○又諭富明阿奏。揚防官軍擊退丹陽援賊。並續撥兵勇渡江助勦。馮子材等奏。官軍會擣丹陽。連日接仗情形。各一摺。丹陽一城。與常州金陵互為犄角。現在詹啟

綸。張文德已直薄城下。揚鎮兩營之兵。共有一萬五六千名。富明阿此次又添派營總富陞等馬步兵勇一千一百餘名。兵力已不為少。著卽督率詹啟綸等實力進攻。迅拔堅城。盡殲醜類。鮑超自克句容後。曾否會攻丹陽。並著飭令詹啟綸等與鮑超一軍聯絡一氣。毋任窮寇復竄他處。致辦理又形棘手。偽英王叔陳逆兇狡為諸酋之冠。此時悉眾來援。勢必拌死力關。圖解城圍。在事各員。務令嚴密防維。相機痛剿。毋為所乘。將此由六百里各諭令知之。○又諭勞崇光奏確查鎮省近日實在情形。官軍勒辦回逆。克復景東元謀等廳州縣暨楚雄府城各一摺。另片奏馬如龍忠義自許。必能殄除巨憝。擬卽以回攻回。及新選維西協副將尚阿布等不宜署理。昭通鎮等缺各等語。前據賈洪詔奏先後克復楚雄他郎鎮沅景東等廳縣。當經諭令該撫將官軍如何攻克情形確查具奏。並據賈洪

詔奏徐之銘徇私濫保。請將所保各員撤銷。經明降諭旨照准。當因滇省尚未進兵。恐失職人員心懷怨望。諭令賈洪詔將此旨收存。相機宣布。茲據勞崇光奏馬如龍彈壓省垣。籌濟糧餉軍火。岑毓英帶兵出省。數月之中。克復堅城十數處。請溫語褒嘉。將馬如龍賞加提督銜。岑毓英賞加布政使銜。仍將該二員一併賞加勇號。自係為鼓勵人材起見。惟馬如龍岑毓英均曾經徐之銘保奏。前次所降諭旨。應在撤銷之列。若徑照勞崇光所請辦理。不免與前旨兩歧。著勞崇光賈洪詔速將官軍攻克楚雄府及景東廳縣出力各員。確切查明具奏。再降諭旨。前旨仍著賈洪詔暫緩宣示。勞崇光奏稱訪察馬如龍岑毓英行事不過因初登仕版。不諳體制。小節多疏。而其心實皆勉圖上進。其才亦尚可用。馬如龍擬俟勒除杜汶秀後。再將馬崇馬聯陞二犯設法檢斬。勞崇光現在責成。馬如龍岑毓

勞就本地選募回練土練。次第勦辦。既不至多糜官餉。而已撫之良回。又不至心生疑忌。等語。勞崇光如確有把握。即著嚴飭馬如龍等迅速進攻大理府城。將杜逆剋日誅滅。以自明其心跡。且徐之銘係奉旨革職。拏問之員。何以日久尚未起解。並著該督責令馬如龍等速將徐之銘派員押解來京。毋得任意延玩。自取罪戾。尚阿布係部選人員。既據勞崇光奏稱該員於滇省情形未能熟悉。即著

照該督所請。仍委楊盛宗署理昭通鎮篆。王棟是否聽回人指揮。左葆真於昭通府一缺。能否勝任。著勞崇光、賈洪詔會商委署。期於地方有裨。各省武職。凡有總督駐紮者。向由總督專政。巡撫並不與聞。嗣後滇省委署鎮將以下各缺。即著勞崇光斟酌辦理。如賈洪詔有所見聞。亦不妨彼此函商。以盡同舟共濟之誼。其文職各員。該督撫仍當和衷商榷。會同委署。斷不准各存意見。致有齟齬。福陞

闡茸無能。已於上年據駱秉章奏將其革職。雲南提督一缺。已放唐友耕。勞崇光何以尚未知悉。勞崇光現駐黔省。於滇省聲息尚能相通。成都則非滇撫駐紮之地。且去滇較遠。此時蜀境防務已鬆。劉嶽昭所部九營。前已由秦回蜀。賈洪詔當督同該臬司馳赴昭通府城。將勦匪事宜次第辦理。勞崇光俟交查之件。辦理完結。亦即前赴昭通。與賈洪詔面商進止機宜。較為有益。勞崇光等奏。滇黔

兩省餉項萬難。各省協餉屢催不到。請仿照湖南東征局章程。於川省水路設局抽釐。即委川東道吳鎬專司其事。各摺片設局抽釐。原屬萬不得已之舉。湖南創設東征局。照該省釐金減半抽收。以為接濟楚軍之用。楚人自樂於從事。若於川省大江要路。夔州、重慶、敘州、瀘州。凡有釐金之處。添設滇黔釐局。所收之項。滇黔兩省各半支用。恐不無窒礙難行之處。如果於川省無損於滇黔餉需。大有

裨益。自可照湖南章程。妥為興辦。勞崇光現已委派大員赴川省會議。著駱秉章察度情形。據實具奏。該督素顧大局。當不以事屬鄰封。稍存畛域之見。勞崇光等原摺。著鈔給駱秉章閱看。前寄賈洪詔諭旨及明發諭旨。並著鈔給勞崇光閱看。將此由六百里各諭令知之。○貴州古州鎮總兵官楊巖寶因病解職。以記名提督劉士奇為貴州古州鎮總兵官。○己未。諭議政王軍機大臣等。前因訥欽奏。續調晉兵口糧。應否仍照晉省防兵之例支發。抑照直隸征兵給支。並趙延煥所統兵勇月餉。應由何省籌撥。請旨遵行等語。當經諭令戶部妥速議奏。茲據戶部奏稱。訥欽赴甘援勦。共帶直隸兵三千名。山西兵一千名。所需月餉一萬四千餘兩。自應由該兩省各按原調兵數。陸續供支。如有短絀。仍惟直隸山西是問。其解餉委員。人少官卑。若令隔省辦理糧臺。呼應必多牽掣。應令訥欽自行調

派人員。專司支發。至直隸征兵。月支糧銀二兩八錢。數與定章相符。惟山西防兵。月支糧銀四兩。向無此例。現在訥欽所帶直晉官兵四千名。均應按照二兩八錢之數支發。以歸畫一。其趙延煥所統兵勇三千五百名。月需餉項。請飭熙麟通籌支發各等語。著照所請。所有訥欽援甘兵勇四千名。月需餉銀。即著劉長佑。沈桂芬。按照各該省原調兵數。源源籌解。毋得稍有缺乏。至山西防兵口糧。每月四兩之說。訥欽係於道出保德時。得之詢悉。其中有無傳訛。著沈桂芬查明具奏。趙延煥所部一軍月餉。著熙麟在甘省糧臺籌款給發。惟甘省餉源甚窒。深恐停兵待餉。致誤戎機。並著責成沈桂芬。統籌兼顧。於應解甘餉。隨時籌畫。陸續接濟。毋誤要需。至糧臺支應人員。著訥欽於隨營委員內揀派。或酌調甘省人員。專司支發。以免推諉。將此由五百里各諭令知之。○又諭。富明阿奏。水師上下游

疊獲勝仗。江防布置情形。並詹啟綸擊敗丹陽援賊各摺片。逆賊因人眾糧絕。趨重上下游。為擄糧謀生之計。雖經吳全美等師船擊敗。難保不悉數回撲。沿江紛竄。著富明阿仍飭吳全美督帶師船策應江面。並於各沙要隘上下梭巡。以期聯絡聲勢。北岸一帶尤須加意嚴防。前據富明阿奏稱詹啟綸等軍業已直薄丹陽城下。此次截勦援賊。頗有新擒。即著富明阿、馮子材、魁玉仍遵前旨督令詹

啟綸等並添派之富陞等軍。與鮑超之師聯絡進剿。迅拔堅城。盡殲醜類。偽英王叔陳逆悉眾來援。既據賊匪供稱。現在逆眾五六萬。散布錢家廟等處。打館擄糧。並欲會合城賊夾攻官軍營盤。又在港口搶奪民船。冀圖外竄。使官兵首尾不能相顧。各情逆謀兇狡。著富明阿、馮子材等嚴飭在事員弁。務須嚴密防維。不得稍涉大意。將此由六百里各諭令知之。○又諭張之萬奏髮逆圍攻內鄉。官紳

竭力解圍。陳大禧未遂。句結張總愚竄盧氏之欒州。現飭繞前截勦一摺。豫省宛洛一帶寇氛四集。防不勝防。目前軍務以先勦張總愚為要領。張之萬已飛飭張曜、宋慶等軍繞出其前。扼紮桃灣。以防西竄朱陽關之路。並令善慶等馬隊會合勦洗。著即嚴飭該將領等卷甲疾趨。滅此朝食。毋再任其蔓延。張曜前由黑峪追勦張總愚。擒斬甚少。盡成尾追之勢。此次若再不得力。即由僧格林沁、張之

萬嚴參懲辦。陳大禧回竄浙川之李官橋。襄陽之老河口。髮逆竄商南之竹林關等處。是襄鄖二府均屬十分喫重。官文等一月無報。實屬不知緩急。究竟所派之梁作楫等軍能否得力。應否添調新軍。均須認真布置。不至縱匪深入。蹂躪地方。該匪本為圖救金陵而來。若由隨棗黃麻直趨英霍。或由水路順流而下。則曾國藩不能不力爭上游。恐於金陵垂成之局。又生枝節。襄鄖一帶地勢寬廣。官

文所派防邊各將職分相等。無所統率。必將貽誤事機。漢南前車可鑒。官文嚴樹森當懷遵十六日諭旨。即日商定一人出省督師。一人留辦防務。不准稍有遷延。致干咎戾。並仍遵前旨。飛咨曾國藩移調楊岳斌等水師於襄樊一帶。督同陸師夾剿。僧格林沁現已由許州取道長葛新鄭等處。進紮洛陽。該親王威望素著。各逆自必望風逃避。惟當通籌數省大局。移緩就急。妥籌調度。並嚴督各軍會合豫軍。剋日將張總愚一股先行剿除。再將各股以次埽蕩。現在陳大澹一股及漢中竄逆一股均聚內鄉。內鄉以北有僧格林沁駐紮。洛陽之師足資捍禦。其由內鄉以東係髮捻圖援金陵之路。著僧格林沁一面迅飭蘇克金等軍由南陽進兵勦洗。一面嚴飭張之萬等派撥重兵扼其東竄。免致由豫入皖。掣動金陵大局。其分竄老河口捻股著官文等督飭嚴密截剿。以上各路竄匪如由何路掣

動大局。惟何省督撫是問。其應於何路扼要設防之處。並著僧格林沁官文等悉心調派。彼此知照。毋誤事機。張之萬另片奏汝南各軍攻克小鄭寨。現在圍攻趙寨及信陽州知州官國勳勦捕龍井餘匪。正陽縣知縣白槩攻克周寨各情。著該撫會同毛昶熙督令汝防各將士及地方團練將趙寨及未復各寨次第攻克。以靖地方。原奏稱攻克信陽州之龍井寨有出示安良另派首事之語。信息一帶圩寨林立。總因首事者不得其人。往往投誠後旋即反覆。聚眾為害。張之萬諒已深鑒此弊。所派首事務須慎選安分馴良之人。不得數行目前。意存遷就。將此由六百里各諭令知之。○又諭多隆阿奏全陝軍務漸就肅清。所統全軍應赴援何省。請旨遵行一摺。另片奏軍餉支絀。派員赴同朝一帶試辦捐輸等語。前因盤屋克復。陝省逆回埽除殆盡。降旨命多隆阿督辦陝甘軍務。原以該大臣征

勦髮逆。戰功卓著。自調赴陝西。勦辦逆回。屢戰皆捷。逆眾望風披靡。俾各處踞匪次第蕩平。而甘省回匪。勢尚猖獗。陝南餘匪。尚未撲滅。必得該大臣總統諸軍。運籌決策。乃能所向克捷。迅奏膚公。多隆阿此次摺報。自係未接奉前旨。故有請旨遵行之奏。據奏槍子雖未取出。久之與氣血相屬。即於身體無傷。並據穆圖善奏。稱多隆阿自敷貼拔毒散後。頓覺痛減神安。覽奏頗為欣慰。仍著發去如意拔毒散兩料。交該大臣祇領。趕緊醫治。以冀速痊。所稱部曲均係南人。每以北地苦寒。不服水土為慮。自係實情。惟刻下陝省匪回。逃入甘省者不少。甯夏平涼等處。均尚為回匪占踞。其餘亦皆徧地伏莽。未受大創。僅恃雷正綰。陶茂林兩軍。其力尚薄。且無所稟承。亦恐呼應不靈。進勦未能得力。甘肅勢據上游。回氛一日不靖。則山陝皆難安枕。督辦車最關緊要。多隆阿本係西安將軍。又有督辦

陝甘軍務之責。而回匪又皆震懾。該大臣之威。自應以廓清兩省為己任。惟據稱所部不服水土。若強令入甘。恐多渙散。著該大臣無庸親督各軍。深入甘省。仍駐西安。調理傷病。一面將勦辦甘肅回匪事宜。妥籌調派。劉蓉所部兵勇。為數不少。川勇固可調赴甘肅。即楚勇亦在川日久。習慣自然。著該大臣與劉蓉等商。調其所部得力。宜於入甘者數千名。可否即派穆圖善統帶前往。或另為一路。或即為雷正綰後路聲援。其入甘以後。應由何員統率各軍。總歸該大臣節制調度之處。均著多隆阿妥籌辦理。漢南路賊。尚與劉蓉李雲麟相持不下。仍恐乘虛窺伺。陝西腹地。及楚蜀邊境。多隆阿所部不宜入甘之軍。正應移勦此股賊匪。或繞出潼關。迎頭截擊。或於陝南一帶。攔腰截擊。儻賊匪東竄。即可追出。陝境盡力勦洗。如在豫境。則此軍可即交僧格林沁調遣。在鄂境。則此軍即可歸官文等



調遣。如此量為移調。兵力既可因地制宜。餉項亦可於楚豫兩省分任兼籌。係屬兩有裨益。多隆阿所部各軍。由東南而西北。轉戰數省。均甚得力。此次如能截勦髮捻。不令東竄。掣動大局。則金陵指日可以克復。將來該大臣所統之軍。亦必同膺懋賞。多隆阿即將此旨。豫行宣示諸軍。俾各奮勉圖功。以副委任。同朝一帶殷實之戶。漸次復業。該大臣因餉需不繼。勸辦捐輸。著劉蓉督率地方官會同多隆阿委員妥為經理。昨有旨令熙麟迅赴蘭州省會。期於整頓一切。茲據奏稱慶陽係糧臺重地。為甘省東北屏蔽。陝省西北保障。等語。著仍遵前旨。赴蘭州接印任事。酌派一軍駐紮慶陽。以資防勦。熙麟或俟文煜到慶陽接辦糧臺後。再赴蘭州。並著該督斟酌辦理。另片奏雷正綰由涇拔營赴靈。留步隊四營。令成祿統領駐涇等語。雷正綰現與陶茂林等分道進取平涼。即著該提督奮力進攻。

迅拔堅城。毋稍延緩。將此由六百里各諭令知之。○以甘肅慶陽勦匪獲勝。予參將馬天祥等優敘。陣亡五品軍功謝得勝祭葬世職。如守備例。○旌表守正捐軀山西甯遠廳民趙元幅妻王氏女白鞘仔。○命五城黃賡展期兩月。○庚申。諭議政王軍機大臣等。前據左宗棠奏報。攻克杭州餘杭兩城。業經明降諭旨宣示。茲復據左宗棠將攻克詳細情形具奏。將益澧前已賞穿黃馬褂。現復賞給雲騎尉世職。記名提督高連陞亦賞穿黃馬褂。以示優獎。左宗棠當飭令蔣益澧等益加奮勉。立功自效。杭州餘杭之賊。併竄瓶窰。經左宗棠督兵攻克該逆路壘。並將安溪關要隘攻奪。敗匪分趨德清武康。該督現已派兵追躡武康之賊。而令蔣益澧督兵連攻石門德清。以期進拔湖州郡城。著即嚴督各營將士奮勇進攻。毋稍遲緩。湖州為各路賊匪膺聚之區。黨與尚多。必思出竄江西。不肯坐困孤

城。左宗棠當會同蘇皖各軍分布要隘。杜賊出走之路。以期聚而殲殲。毋得任令紛竄。徒成尾追之勢。上年十一月間。英國總兵戈登隨同官軍攻克蘇州。曾經明降諭旨。賞給該洋將頭等功牌。並賞銀一萬兩。復以外國本有寶星名目。諭令李鴻章將賞給戈登頭等功牌。仿照製造。變通辦理。嗣據李鴻章奏稱。於賞銀一萬兩外。先已允給常勝軍犒賞洋銀七萬元。均經如數籌給等語。英法兩國向

聖諭卷七

三

來互相爭勝。中國駕馭之法。惟在一例相待。不可歧異。致令有所藉口。左宗棠請賞加德克碑提督銜。並賞給大小荷包衣料之處。與前次獎敘戈登諭旨不符。未便互有參差。本日已於前降諭旨內。將德克碑一例賞給頭等功牌。並賞銀一萬兩。以示嘉獎矣。所有頭等功牌式樣。亦應與前賞戈登式樣一律。即著左宗棠向李鴻章咨取前式。仿照製造。並著左宗棠無論何款。動用銀一萬兩。一併賞

給。其片內所稱由該督另行籌給德克碑銀二萬兩。分賞所部常捷軍出力弁兵之處。與李鴻章前次另籌銀七萬元。給與戈登犒軍辦法相符。即著照所議辦理。至德克碑雖權授中國總兵。尚歸甯紹台道節制。故能聽浙省統率指揮。若徑加以提督銜。則該洋將官職較崇。難保不漸生驕縱。恐以後難於駕馭。是以未經照准。如該洋將以得受賞物為榮。即著左宗棠備辦衣料等物。傳旨賞給。以示

聖諭卷九

六

鼓勵。此中操縱之法。全在體察洋人性情。相機辦理。將來浙省軍務肅清後。亦須將該洋將撤回本國。庶免日久另生枝節。降目錢貴仁既經事前通款投誠。尚可貸其一死。餘黨即著分別遣散挑留。將此由六百里密諭知之。○以浙江攻克杭州府城暨餘杭縣城出力。賞布政使蔣益澧雲騎尉世職。提督高連陞黃馬褂。總兵官王月亮劉榮合從一品封典。總兵官楊和貴。副將簡桂林羅啟勇。劉清

望。巴圖魯名號。道員楊昌濬等加銜升敘開復有差。賞洋將德克碑頭等功牌。並銀一萬兩。予陣亡參將古捷芳遊擊蔡盛恩祭葬世職加等。○予兩江各屬殉難把總徐宗勝等紳民婦女一千三百五十七員名口分別旌卹如例。

實錄卷九十七

六十一

大清穆宗繼天開運受中居正保大定功聖智誠孝信敏恭寬毅皇帝實錄卷之九十七

大清穆宗繼天開運受中居正保大定功聖智誠孝信敏恭寬毅皇帝實錄卷之九十八

教修

同治三年甲子三月辛酉諭議政王軍機大臣等

實錄卷九十八

臣等昨日曾國藩奏江西牙釐仍應歸該督經收以竟金陵將歲之功並將各信各件鈔呈一摺及報近日軍情片沈葆楨奏賊竄南豐新城等處現飭各營會剿摺均經覽悉沈葆楨所奏南豐新城等處剿賊情形曾國藩片內亦經陳及即著該督撫督飭席寶田劉勝祥等軍並精捷等營趕緊會合聚殲羣醜速將南豐縣克復使賊前股不能立定巢穴則後股亦不得跟蹤上竄不至勒辦又形棘

手。其徽浙之交。曾國藩與左宗棠所部節節布置。並著嚴密堵扼。毋使羣賊再行越犯江境。鮑超一軍克復句容。後是否飭令進攻丹陽。金陵一有可乘之機。曾國藩自當督令曾國荃激勵諸軍。迅圖攻拔。揜渠埽穴。以成全功。至曾國藩此奏。以該督所部各軍。自聞截去江西釐金之信。人心惶惑。大局實虞決裂。恐致功虧一簣。請將江西釐金仍歸該督經收。以竟將戡之功。自係實在情形。惟所稱沈

葆楨截留釐金之奏。並未與該督商酌。詞氣涉於激切。鈔錄往來文函各件呈覽。沈葆楨前因江西軍務緊急。懇請將該省牙釐茶稅等款。仍歸該省經收支用。如窒礙難行。請分提其半。以應急需。經部臣酌覈覆奏。准其分提一半之請。朝廷亦因江西與金陵需餉同一緊急。不能顧此失彼。降旨准行。嗣因通政使王拯陳奏此事。復經寄諭曾國藩沈葆楨等。仍當同心共濟。以維全局而竟成功。今曾

國藩所奏。既以江西釐稅一歸本省經收。恐致軍心惶惑。著卽照所請。江西省牙釐茶稅。仍舊歸曾國藩經收。並准沈葆楨分提一半。以為本省防兵之用。江西防兵席寶田等軍。卽無庸曾國藩再籌分給。此項釐稅。本係曾國藩創立章程。抽收有年。若一改歸本省經收。事屬紛更。亦恐替換生手。必致所收之數。不能如前。沈葆楨前奏。未能先與曾國藩商酌辦理。似疑曾國藩不允所商。而然事屬因

公。各督撫臣同膺疆寄。遇有交涉之件。縱意見稍有不同。亦應往復參酌。以歸一是。方為同寅協恭之道。若自恃因公。而各執一是。不肯相下。則均屬非是。朝廷本無所用其調停。止恐該督等意見各存。被左右所窺伺。從中播弄。貽誤事機。屆時縱重治該督等之罪。亦已無及。此次所奏。業經朝廷持平定議。曾國藩沈葆楨務各欽遵辦理。毋得各存意見。惟經手抽收釐稅之員。必須廉明公正。能知大

體者。方可派往。著曾國藩慎重選擇為要。本日總理各國事務衙門奏為金陵現在攻勦得手。公同設法籌濟餉需各摺片。該衙門以金陵功在垂成。而餉需短絀。竭力籌濟。以期迅速蕆事。著卽照所請。將該衙門總稅務司赫德所呈上年奏撥輪船回國經費等項銀五十萬有奇。如果均係實存。卽全數撥歸曾國藩軍營充餉。又據聲稱此項內有二十萬兩零。本係現存有著之款。著李鴻章查明。先行儘數撥解曾國藩軍營。該大臣亦可暫資散放。以上銀兩。如已起解來京。卽照該衙門所請。作為江皖鄰近各省前奉部撥解充京餉之款。並准於各該省將奉撥京餉照數劃抵。撥解曾國藩軍營。以期簡捷。其各該省應如何劃撥之處。著李鴻章俟戶部覈定。再行諭知辦理。此項銀兩。係應解京師歸庫之款。刻下部庫尚不免於支絀。京旗兵餉亦籌放維艱。該衙門止以金陵一簣之功。顧全大局。

先其所急。以資轉注。江西誼切輔車。沈葆楨更當不分畛域。均勻協濟。而曾國藩得此協餉。尤當飭令曾國荃奮力圖功。相機穩慎進取。激勵將士。速奏膚公。以副厚望。將此由六百里各諭令知之。○以光祿寺卿潘祖蔭為都察院左副都御史。○予江西南豐陣亡在籍翰林院編修吳嘉賓。把總黃永全。袁正泰。祭葬世職加等。吳嘉賓並建專祠。○壬戌。諭議政王軍機大臣等。前因多隆阿奏全陝回匪肅清。所統全軍。應赴援何省。請旨遵行。當經諭令多隆阿。將所部不宜入甘之軍。移勦陝南竄匪。現在曹藍各逆。勢尚猖獗。劉蓉所部近日勦賊情形。未據該撫馳奏。實深廬念。此股匪徒。若不及早撲滅。不獨興安商州等處。受其蹂躪。將來會合髮逆。必至竄擾鄂豫腹地。陝省回務。旣已肅清。多隆阿所部。多係南人。勢難進勦甘肅。卽著多隆阿商同穆圖善。於所部酌調兵勇四千名。交姜玉順。余福

象統帶馳赴陝南。會同劉蓉各營。迅將曹藍各股匪徒盡力勦洗。仍遵前旨。追賊出陝。行抵鄂境。卽歸官文調遣。並著官文將此起兵勇四千名。催提赴鄂。以資得力。劉蓉務當激勵諸軍。督飭李雲麟肅清漢南餘孽。毋得任令盤踞蔓延。致辜委任。漢中一郡。關繫緊要。余福象係漢中鎮總兵。如須留兵彈壓。自應令余福象酌帶親兵百數十人。速回本任。其所帶之勇。一併交姜玉順統帶。並著劉蓉妥

籌調派。擒匪張總愚一股。竄擾盧氏。勢將乘間西趨。而陳大禧及漢南竄逆。均聚內鄉。勢將句合。亟需一軍由陝省迎頭截擊。並著多隆阿等速飭蕭河清。孟宗福等。酌帶四千人。由雒南一帶確探賊蹤。分投迎擊。僧格林沁現已駐紮洛陽。此軍卽可催提赴豫。歸僧格林沁調遣。期將張總愚等股迅速剪除。蕭河清既帶兵勦賊。潼關一帶。應派何員帶兵駐守。著多隆阿。穆圖善。劉蓉。張集馨酌量調派。

穆圖善本係西安副都統。省城根本重地。不可無兵駐守。多隆阿馬隊。除酌留四五百名。交穆圖善統帶外。其餘均著交蘇倫保。常星阿。溫德勒克西等分起管帶。由陝赴豫。遇賊卽擊。抵豫後。一併歸僧格林沁調度。以一事權。穆圖善留省後。著卽會同德興阿將存城之兵。認真操演。以備緩急。其酌留之馬隊。四五百名。並著穆圖善等隨時訓練。如省城防兵已數分布。卽著將此項馬隊。派赴訥欽軍

營。以資攻勦。前諭多隆阿選派得力之員。前往訥欽軍營。幫同帶兵。可否於蘇倫保等數員中。酌派一員前往。著多隆阿。穆圖善。劉蓉。張集馨妥商調派。曹克忠一軍。著暫留陝省。以為遊擊之師。張集馨仍將善後事宜妥為布置。並將省標兵弁勤加訓練。以備不虞。襄陽軍務緊要。不可無大員總統。疊經諭令官文嚴樹森酌定一人。出省督師。尚未據官文等覆奏。其陳大禧現由老河口竄往何處。陳

得才等匪。曾否與陳檢會合。亦未據官文等馳陳。西望不勝焦急。官文威望素著。卽著該大臣剋日出省。將襄樊等處水陸各軍力加整頓。迅殄逆氛。所有在事文武員弁。如恒怯無能。迎勦不力。該大臣務當從嚴叅辦。毋得諱飾瞻徇。貽誤事機。自取咎戾。官文出省後。省城防務。嚴樹森責無旁貸。並著認真經理。期於有備無患。不可稍涉大意。多隆阿前次所保各員。曾交軍機處存記。該員弁等卽調往他省。如續有功績。仍當格外施恩。甘肅回氛甚熾。僅恃有雷正綰。陶茂林等軍節節進勦。著劉蓉迅卽酌量情形。如兵力尚單。卽仍遵前旨。將該撫所部兵勇。分撥數千名。派得力大員統帶前往。分路進勦。以資接應。正在寄諭間。據穆圖善奏。多隆阿傷病增劇。勢甚危篤。須重用蒞茂。以固其氣等語。覽奏益深廬繫。著發去人蔭六兩。交該大臣祇領醫治。安心調理。用冀速痊。另片奏連日據百姓報

稱藍逆受傷。十分沈重。此股敗匪。現趨甯陝。圖與藍曹二逆合股。匪數無多。卽著劉蓉派兵截擊。悉數殄除。毋稍疏懈。將此由六百里加緊諭知僧格林沁。官文多隆阿。穆圖善。嚴樹森。劉蓉。並傳諭張集馨知之。○又諭傳諭暫署陝西巡撫張集馨。張集馨奏。統兵大臣傷病難救。謹陳該營詳細情形。密籌辦法。與十九日寄諭多隆阿等諭旨。大致暗合。本日已另降諭旨。作為特旨。照所陳辦理矣。該署撫請令姜玉順。余福象率諸將將四千人赴鄂。惟余福象係漢中鎮實缺。當令赴任。歸劉蓉節制。以資鎮守。所統親兵。不得過多。該處如須留兵防守。劉蓉自能量為調派。姜玉順卽令帶兵四千名。由子午谷過甯陝。將甯匪節節掃蕩。迅至湖北。交官文調遣。蕭河清等卽令率四千人。由雒南進兵。將盧靈關一帶西竄之匪。迎頭勦擊。並會同常星阿等各帶馬隊。赴河南歸僧格林沁調遣。已令僧格林

心官文分別檄調至穆圖善係西安副都統  
應回本任並酌留馬隊數百名在省令與德  
興阿將存城之兵認真訓練操防以備不虞  
欽差大臣關防仍歸穆圖善暫署再降諭旨  
曹克忠卽令至藍屋將來留在西安附近該  
署撫當與之妥為聯絡以資指臂之助當此  
主將創深軍情不靖誠恐一朝有變將士從  
而生心張集馨歷練有年務當不動聲色豫  
遏亂萌如多隆阿竟至不起該署撫或親往

藍屋拊循將士於應行辦理之事一面妥辦  
一面奏聞劉蓉現未到任該署撫責無旁貸  
務須籌策萬全以副委任正在寄諭聞穆圖  
善奏多隆阿病勢危篤覽奏彌深廬繫著張  
集馨隨時探悉奏聞穆圖善另片奏藍逆傷  
重竄至甯陝圖與藍曹二逆合股等語張集  
馨卽飛檄姜玉順等將此股敗匪會合劉蓉  
所派之兵盡數殲除藍逆下落並著確探具  
奏○錫綬陝西藍屋鳳翔汧陽隴麟遊寶雞

岐山扶風郿九州縣被擾地方新舊額賦○

癸亥

萬壽節遣官祭

太廟後殿○遣官祭

福陵

昭陵

昭西陵

孝陵

孝東陵

景陵

奉陵

奉東陵

裕陵

昌陵

昌西陵

慕陵

慕東陵○遣官祭

文宗顯皇帝



孝德顯皇后暫安寢殿○遣官祭

顯佑宮

東嶽廟

城隍廟○

上詣

大高殿

壽皇殿行禮○詣幾履殿

慈安皇太后前行禮平安室

慈禧皇太后前行禮○御乾清宮王以下文武

大臣蒙古王貝勒貝子等行慶賀禮取官於

午門外行禮○諭議政王軍機大臣等前因

總理各國事務衙門奏請將上年奏撥輪船

經費銀五十萬兩有奇全數撥歸曾國藩軍

營充餉當經諭令李鴻章等將此項內有著

之款二十萬兩零先行儘數解赴曾國藩軍

營如已起解來京即於鄰近各省奉撥京餉

項下劃抵撥解其如何劃撥之處俟戶部覈

定再行諭知辦理茲據戶部片奏曾國藩營

餉除湖南等省應協之餉仍令照常協解外

所有此項輪船餘款等銀兩先經總理衙門

剴飭解部現在奏充曾國藩軍餉如未起解

北上應由李鴻章迅速委員分批解往如已

起解即責成李鴻章分晰奏明再由該部查

照總理衙門原奏將原撥江皖鄰近各省解

部京餉照數劃出飭令就近解交等語著李

鴻章按照該部所奏將現存未解之輪船經

費儘數先解曾國藩軍營如已起解來京即

將所解關平規平各銀兩及洋銀一款統合

共庫平若干兩迅速分晰奏明由戶部查照

將原撥江皖鄰近各省解部京餉照數劃出

就近解撥曾國藩軍營以資應用曾國藩一

面傳知各營俾各奮勉圖功一面催提此項

未解之銀將月餉散放以收飽騰之益而竟

垂成之功沈葆楨當懷遵前旨將江西牙釐

稅項仍歸曾國藩經收江西分提一半以濟

本省之用至江海關零稅一款究係何項稅

銀並著李鴻章查明報部。將此由六百里各諭令知之。○又諭僧格林沁奏馳抵河洛相機剿辦張逆翻山南竄。現擬督兵截剿一摺。張總愚股匪盤踞盧氏縣之藥川。經張曜尹嘉賓等帶領兵勇連日進攻。斃賊無算。該匪越嶺南趨。由大坪頭一帶狂竄。亟宜跟蹤追剿。該大臣現已前紮嵩縣。著卽飭令傅振邦督同張曜等軍奮力追擊。偏賊出險。蘇克金所部馬隊現紮南陽。俟該逆竄出山險。卽令

由南面迎頭截剿。以期盡殲醜類。並著張之萬嚴飭南陽鎮府率領在防兵勇會同蘇克金迅速兜剿。毋任紛竄他境。致滋蔓延。前據張之萬奏陳大澧一股回竄浙川之李官橋襄陽之老河口。漢中髮逆竄往內鄉之下瓦亭。相距甚近。曾否勾合。著僧格林沁張之萬派兵分投堵擊。迅速殲滅。毋令勾結東趨。擾及腹地。昨日諭調多隆阿所部蕭河清孟宗福蘇倫保常星阿溫德勒克西等各帶步隊

兵勇共四千名。馬隊除酌留西安四五百外。約有千名。分起由陝赴豫。著僧格林沁迅速催提前進。以資攻剿。將此由六百里各諭令知之。○又諭徐宗幹奏閩省籌辦防堵情形一摺。皖南賊匪由浙入江。復由江西之玉山等縣分股四出。擾及崇安相近之黃公橋等處。經遊擊劉朝太等督團截剿。小有斬擒。該逆旋由鉛山竄往弋陽等處。前據沈葆楨奏賊竄南豐新城。已諭令該撫等嚴密防剿。江

西辦理軍務尚屬認真。該匪窮無復之必圖擾及鄰境。新城與光澤邵武等處均屬毗連。徐宗幹現派已革參將蔡潤澤等帶領兵勇赴浦城之二渡關等處扼防。道員陳維漢等防光澤邵武等處。布置均尚周密。著卽督飭在事各員勤加偵探。擇要防守。遇賊卽擊。毋令入境滋擾。並令地方文武聯絡鄉團輔助官兵以收眾志成城之效。如其賊蹤竄越邊防緊急。卽著徐宗幹相機出省督剿。浙省軍

務漸平。左宗棠身任兼圻，自應力圖兼顧，能否撥兵助防，並著酌量辦理。張運蘭屢經有旨飭催赴任，著徐宗幹迅行咨行毛鴻賓，催令帶勇起程。英桂簡任福州將軍，為日已久，現在因病請假數日，著俟假滿，即行起程赴閩，與徐宗幹會商辦理，以期格外周妥。將此由六百里各諭令知之。○以福建臺灣攻克四塊厝賊巢出力，予參將林文明以副將用。○以福建建甯等處防剿竄匪出力，賞道員丁杰花翎，知縣游鳳臺等藍翎，餘加銜升敘有差。○以福建興化勦辦土匪出力，復知府蕭作霖職，餘升賞有差。○甲子安徽巡撫喬松年奏楚豫接壤之區，皆須嚴為防範，已革帶兵官添募勇丁千名，勤加訓練，藉資調遣，得旨：張總愚一股，句合髮逆，恐其竄擾皖北，該撫當嚴飭張得勝等將所部兵勇勤加訓練，備豫不虞，毋稍鬆懈。○乙丑諭議政王軍機大臣等：富明阿奏官軍連敗丹陽，援賊添

兵渡江，並水師勦賊情形一摺，與馮子材等前奏情形大略相同。現在賊勢尚眾，復於黃墟村一帶搶築賊壘五座，意圖牽掣官軍，阻遏進攻之路。富明阿現已調派總兵楊心純等勇丁九百名渡江助剿，著即飭令詹啟綸等聯絡鎮江各營，速將賊壘埽除，以期會攻丹陽。至鎮江之師，前已將丹陽湖埂逆壘攻克，進逼西門，著馮子材、魁玉、卽嚴督張文德等前敵各營會合揚防援師，互相策應。一面聯絡鮑超所部諸軍，迅將丹陽城池攻拔，毋稍遲緩。沿江一帶屢有逆匪出竄，並有大股欲由江干紮壘，為竄渡太平洲之地，經揚防水師擊敗，其竄往恤蔴沙武家橋等處之賊，亦經師船迎擊，轟斃甚眾。現在沿江下游之賊，既併竄上游，太平洲江面又極狹窄，尤須防其搶渡北岸。富明阿已飭吳全美酌撥師船添赴上游堵剿，著即嚴督水師各營將士梭織巡防，毋任該逆於太平洲偷築營壘，致

勦辦又形費手。江蘇釐局應如何歸併裁撤之處。著富明阿會同吳棠李鴻章力行整頓。務將積弊訪查明確。奏明覈實辦理。將此由六百里各諭令知之。○又諭富明阿奏揚防馬隊前經都興阿調赴歸綏。並先後調赴江南。現在所存僅一百數十名。老弱傷殘。無以應敵。擬將殘弱過甚者遣撤百餘名回旗歸伍。仍由各該省如數更換。並於吉林黑龍江兩省添調正兵二百名。並委員攜帶銀二千兩及空白功牌。以為整裝及捐辦馬匹之用。等語。吉林黑龍江馬隊頻年徵調。已屬過多。惟揚防之兵。現在進勦丹陽。將來會攻金陵。騎兵尤不可少。且據富明阿奏稱。咸豐六七八九等年。各路軍營。因兵遣撤回省之馬隊官兵。數年之久。病應就痊。該兵等隨征有年。較西丹尤為得力。擬將此項添調赴揚所籌似尚可行。著景綸特普欽於富明阿此次撤回官兵百餘名。照數更調外。並各於該省

添調曾經出征之正兵一百名。一俟該營委員到省。即將所備銀兩。放給挑換及添調官兵。為製備行裝之用。如馬匹尚有不敷。即將該委員所帶六七品虛銜功牌。籌捐足額。由該二省照例派委官弁帶領。仍交該營委員統帶。迅赴揚州。以資防勦。將此由五百里各諭令知之。○又諭多隆阿奏。擒斬首逆。並該大臣養傷情形各摺片。藍大順由藍屋逃出。負創甚重。沿途裹脅二三百人。意圖徑窺甯陝。與曹逆等合股。經佛坪圍練擊斃二百餘人。復經漢陰廳紳士管湧等在該處齊圍邀截。立將藍大順殲斃。並將逆黨王老么等擒獲。實足以快人心。該逆餘黨。仍恐復有漏網。著多隆阿檄飭將士嚴行按捕。毋任一名免脫。該大臣在營調理傷病。連服葠芪。漸有轉機。覽奏稍紓廬繫。前經頒給人葠六兩。諒已遞到。著卽安心靜攝。以冀速痊。將此由四百里諭令知之。○又諭熙麟奏甘省軍情緊急。

餉糈告匱。請飭催各省迅速協濟一摺。甘省軍務喫緊。近日兵勇雲集。餉項最關緊要。現在慶陽糧臺存銀。將次告罄。各該省豈能膜視。張集馨於疊次嚴奉諭旨。飭令接濟餉糈。乃不但不能設法籌解。轉將山東解甘餉銀任意截留。種種掣肘。於西北大局。必至不堪設想。刻下盤屋業已克復。漢南髮逆無多。陝中漸就肅清。甘省正在軍務緊急。餉糈告匱之時。該署撫斷不得意存膜視。置甘省於不顧。著張集馨懍遵前奉諭旨。實力籌解。接濟甘省兵糈。並照舊支應陶茂林一軍。毋稍延誤。所有解甘餉銀。嗣後張集馨不准再行截留。並著駱秉章。閻敬銘。沈桂芬。張之萬。各懍遵前奉諭旨。迅將指撥並歷年欠解甘餉。無論何項。每省各先湊撥銀三十萬兩。星速委員解赴慶陽軍營。以救眉急。均不准再存膜視之心。貽誤大局。將此由六百里諭知。駱秉章。熙麟。閻敬銘。沈桂芬。張之萬。並傳諭張集

馨知之。○予江南丹陽陣亡委參領圖普新祭葬。世職加等。○丙寅。諭議政王軍機大臣等。左宗棠奏官軍克復武康德清石門三縣一摺。武康德清為湖州屏蔽。石門為通杭湖要道。現經左宗棠督飭各軍次第克復。該逆疊受懲創。官軍自可乘勢進取湖州。惟賊首李侍賢。楊輔青。陳炳汶等。圖竄廣德。孝豐。李逆遠繼。又欲由安吉以竄甯國。而竄往孝豐之賊。已繞從千秋關太陽埠竄至昌化縣境。該逆窮無所之。希圖竄犯上游。擾及完善之區。為苟延殘喘之計。左宗棠現調康國器。張聲恆兩軍赴臨安截剿。並派劉清亮各軍由新城馳赴嚴州防剿。唐學發。彭大光督帶水師。於桐嚴一帶梭巡。布置尚屬周密。即著嚴飭水陸各軍前截後追。乘該匪喘息未定。聚而殲旃。不至漏網他竄。方為妥善。江忠朝曾否已抵江省。陳鳴志等所統江忠義舊部。現紮何處。著沈葆楨酌度機宜。或即派此軍赴

江西浙江毗連處所。扼要駐紮。以杜該匪上竄之路。如已乘閒闖入江境。卽著左宗棠檄飭諸軍。迅速越境追剿。務將此股竄匪悉數殲除。俾江省得以悉力南豐新城。肅清腹地。高連陞等率師進趨湖郡。離郡城四十里地方。擊賊獲勝。羣賊望風潰竄。此時計已緊逼城下。官軍自必倍加奮勇。左宗棠卽當乘機鼓舞。令其迅拔堅城。廓清全浙。前因嘉興克復。諭令李鴻章督率李朝斌等會同浙軍。設法進取湖州。現在浙軍業已前進。並著李鴻章分兵會剿。兩路夾擊。用收速效。該撫派兵援浙。向能不分畛域。此時機有可乘。尤當激勵軍士。協力兜剿。以竟前功。現派何將何營會剿湖郡之處。著李鴻章迅速奏聞。廣德甯國一帶。係湖賊出竄要衝。李侍賢等現又有圖竄廣德等處之議。該處防剿正緊。曾國藩前有會同浙師。在徽浙之交。節節布置之奏。刻下廣德甯國等城防兵。是否足資分布。著

該大臣妥籌調派。務將廣德甯國一帶賊竄之路。嚴密堵截。毋稍大意。致羣賊續犯江西。又成不了之局。鄧洸明束身待罪。左宗棠見其左手已廢。疴瘠特甚。准暫免一死。辦理自屬正大。所部悍黨。現經分為數營。隨赴湖州攻剿。並著左宗棠密飭湖州各營將領。隨時加意防範。毋令別滋事端。江西大兵雲集。所有竄踞南豐蔓延新城之賊。著沈葆楨激勵將士。痛加剿洗。務使前竄股匪盡皆殄滅。庶後股不敢接踵而來。於東南全局大有裨益。左宗棠另片奏進駐省垣。籌辦善後事宜等語。杭州兩次淪陷。被禍尤酷。存留遺民及陸續逃歸者。合計不過數萬。覽奏曷勝矜憫。左宗棠現已設局賑撫。收養難民。並將善後各事宜逐一興辦。卽著督飭在事官紳認真經理。不可有名無實。前據左宗棠奏訪查前署布政使麟趾。湖州府知府瑞春。均於城陷時殉難。諭令將該員等死事情形查奏。此時杭

城已復。著左宗棠卽將麟趾殉難詳細情形及道員退福有無下落一併查明據實奏聞。知府瑞春著俟克復湖州後再行確查具奏。將此由六百里各諭令知之。○又諭劉蓉奏官軍追勦曹藍各逆獲勝一摺。另片奏團勇擒斬藍逆全股撲滅等語。曹逆燦漳與洋縣餘黨竄合。游弋於佛坪之松花坪等處。經劉蓉派令彝字營折往追勦。沿途勦洗賊壘。平毀賊巢多處。追至洵陽壩。該逆步隊連夜由腰竹溝楊泗廟小路奔竄。藍屋克復。藍逆潰圍。分起由新口峪奔板房子。圖竄金雞兩河。與曹逆餘黨合股。經黃鼎等設伏邀擊。因夜雨未能窮追。藍逆帶傷逃遁。旋竄紫溪河地方。經在籍主事管芳率團勇擒獲首逆藍朝璧。並殲斃偽統領林姓等多名。辦理均尚得力。藍逆是否正身。仍著劉蓉查明具奏。藍曹餘孽竄入北山。該處林深箐密。路徑紛歧。若不趕緊撲滅。恐致復曠燎原之患。該撫已派

蕭慶高等就甯陝鎮安一帶分道搜捕。並派廖溥明前往誘降。著卽飭令迅速妥辦。曹燦漳一犯務須擒獲。毋任漏網。蔡逆竄擾蜀河。恐為川邊之患。著李雲麟會同相果各軍剋日掃蕩。並著劉蓉督飭該京卿妥為辦理。以期早日奏功。多隆阿受傷並未回省。仍在藍屋養病。劉蓉欲赴西安與多隆阿籌商勦回事宜。卽著酌量辦理。並仍趕緊赴潼關一帶妥籌防勦。陝西邊患方亟。羣賊如毛。奔竄靡定。該撫當慎以圖之。切不可自鳴得意。致負委任。將此由六百里各諭令知之。○又諭都興阿奏派員管帶官兵先行起程請飭歸綏大員暨山西巡撫豫籌餉項一摺。都興阿所部揚防馬隊三百名現派副都統杜嘎爾頭等侍衛色楞額管帶先行由京起程。前赴歸綏防所擇地駐紮。惟該官兵等應領月餉亟須豫籌接濟。著德勒克多爾濟沈桂芬督飭歸綏道先行籌備款項以濟軍食。毋任缺乏。



所有續調駐紮山東恩縣之黑龍江馬隊官兵。都興阿現已派員迎提。俟續調官兵到京後。該將軍亦即親身統帶前往。此項續調官兵到防後。所需月餉。應如何接濟之處。並著德勒克多爾濟。沈桂芬妥籌辦理。將此由四百里各諭令知之。○以克復浙江武康德清石門三縣城。予知府李耀南等升敘有差。○贈陝西洋縣被戕生員呂岱雲訓導。投誠賊目袁子龍千總。均予祭葬世職。○丁卯。諭議政王軍機大臣等。官文等奏。擒逆兩次。圖踞襄樊。官軍援勦獲勝。一摺。襄樊為形勢之地。久為羣寇垂涎。此次擒逆。陳大禧等由棗而西。力爭上游。其勢甚熾。幸成大吉。梁洪勝等軍援勦獲勝。襄樊賴以復安。惟敗擒西趨老河口。而漢南髮逆已竄至鄧州之厚坡。將與陳大禧一股會合。後股竄至雒南。又將與竄往嵩廬之張總愚擒逆合股。楚豫各邊。千有餘里。數十萬之賊。麇聚其間。防務萬分喫重。

官文等現派水陸防兵。嚴防上游要隘。並於下游黃岡等處相機扼堵。所籌均尚周密。第賊勢正盛。而官軍分布各處。必須總統有人。方能事權歸一。著官文恪遵疊次諭旨。即日出省督師。分飭各路將士。將西趨老河口。擒股乘勝勦滅。並偵探髮逆蹤跡。迎頭截擊。毋令與擒匪勾結。蔓延為患。嚴樹森居守省垣。務將漢黃一帶防守。先事豫籌。督飭水陸各營嚴密防範。毋稍疏虞。僧格林沁前已移軍嵩縣。計張總愚一股。不難剋日殄除。惟髮逆頭起竄擾鄧州境內。其後股又竄雒南。必須痛加勦洗。方能遏其兇鋒。不至竄擾腹地。著僧格林沁會同張之萬。督飭南路各軍。與楚師兩路夾擊。速殄賊氛。前諭將多隆阿軍營馬步各隊。約共五千餘名。調赴僧格林沁軍營。此時勦辦大隊擒逆。正宜厚集兵力。仍著僧格林沁將此項馬步兵勇。迅速催提赴豫。漢南勦賊之姜玉順一軍四千名。並著官文



迅速飛調赴楚。藉資策應。將此由六百里各諭令知之。○以江西捐輸軍餉。永廣南昌府學額五名。撫州府四名。崇仁縣十名。豐城縣五名。○以湖北捐輸軍餉。永廣興國。沔陽。荊門。咸甯。漢陽。江陵。六州縣學額各四名。蒲圻。崇陽。孝感。蘄水。鍾祥。監利。六縣各三名。武昌。漢川。黃陂。黃岡。麻城。京山。天門。應城。松滋。宜城。南漳。當陽。十二縣各二名。江夏。嘉魚。通城。大冶。黃安。羅田。廣濟。潛江。安陸。公安。棗陽。東湖。長樂。恩施。遠安。十五縣各一名。○予湖北襄陽等處陣亡遊擊朱心俊等二十三員祭葬。世職加等。附祀死事地方。暨各原籍昭忠祠。○命陝甘總督熙麟撥銀三萬五千九百兩有奇。解赴葉爾羌。巴爾楚克。備同治四年經費。○戊辰。以神靈顯應。加江西浮梁縣唐臣張巡廟封號曰靈佑。○諭議政王軍機大臣等。李雲麟奏。首逆伏誅。餘黨勒盡。通籌現在賊情。次第追剿。請改前次保獎各摺片。所

陳主事管滂率領團勇。於紫溪河地方。合剿藍逆股匪。殲除匪首等情。與前日劉蓉所奏略同。而管滂等由規溝場追賊餘黨。及之於葉家坪。與舉人張承燮等團勇相遇。併力夾擊。將賊餘黨全行殄滅。並軍功王重良率勇擒拿藍大順正身。並其偽巡部藍三順。四順等八人。同時殺斃等情。較劉蓉前奏為詳。劉蓉前奏。本有先於紫溪河殲斃。眼有肉瘤之藍大順。外間傳說。並非該逆正身之語。茲據李雲麟奏。獲賊供係屬偽都統王包包假名。此次王重良所殺藍逆正身。割驗首級。實屬確切。當為可信。主事管滂及張承燮。王重良等。帶團勒賊。殲斃賊首。自應量予獎敘。惟據李雲麟奏。稱管滂將常垣二員。前經劉蓉保獎之處。均與新例不符。應行改正。著劉蓉將李雲麟此次所保之管滂等各員獎敘。並管滂將常垣前保應如何改正。一併覆覈擬定具奏。再降諭旨。前諭令李雲麟會同湘果各

軍速勦蔡逆股匪。今該京堂所奏。既以痛勦此賊自任。劉蓉仍遵前旨。督飭迅速掃蕩。藍曹餘孽。竄入北山。並飭蕭慶高等軍趕緊勦滅。毋令深入林菁。日久蔓延。致成棘手。何勝必駐軍興安。防賊回竄。自可與蕭慶高相果各軍相為策應。其主簿李百魁所部各營。將已抵商。即當與藍斯明一軍合力追勦東竄逆股。至李雲麟所稱多隆阿現又派兵三千赴商會勦。是否即姜玉順等所帶之兵。抑係另有派往何項官軍。均即督令會合藍斯明等。迅將竄賊併力痛殲。以絕延蔓。將此由六百里各諭令知之。○又諭毛鴻賓奏官軍追勦客匪情形。及留張運蘭一軍駐粵。密陳添募楚勇緣由各摺片。卓興之軍追勦陽江等屬分竄客匪。疊有殲戮。並將匪首曾白面豬擒獲。而餘匪尚復分竄信宜東安所屬各地。信宜久為賊擾之區。甫經歲事斷不可令賊再行煽亂。東安富霖洞新甯天堂墟地勢如

何。粵地率多山險。尤不准任賊久踞。又成負隅。致滋棘手。即著毛鴻賓郭嵩燾督飭卓興及侯勉忠等各軍實力進勦。痛殲醜類。客匪與逆匪究屬不同。其應如何勦撫兼施。妥為安插。總期畏威懷德。得以一勞永逸。彌其釁隙。免滋事端。方為妥善。其由皖南竄越江西逆黨。早有由新城等處圖越閩境光邵一帶者。並有欲回竄粵東之說。不可不豫為之防。前據左宗棠奏請飭令福建臬司張運蘭一軍前赴本任。以資防勦。節經諭令毛鴻賓等遵照辦理。茲據奏稱張運蘭一軍此時不可輕離粵境。並據陳現令知府劉德謙添募楚勇各情。朝廷不為遙制。第張運蘭既不能即赴任。而閩省防勦亟須豫為籌布。著左宗棠徐宗幹催督曾元福內渡之軍。迅移得勝勁旅回顧腹區。以資調遣。由江甯聞賊勢如何。並著隨時馳奏。張運蘭之軍馳往英德。於該處零星股匪。自當迅速掃蕩。劉德謙楚勇即

准其添募與為犄角。速將各處伏匪翦除。嚴布粵東毗連江閩邊境。以防逆匪回竄。其南韶與嘉潮兩路均屬不可大意。而嘉潮民俗尤悍。逆匪由閩之邵汀一路奔趨。路尤徑捷。且恐其黨與散歸者。於該處為多。張運蘭如移紮此路。相機堵剿。於閩省較為聲息易通。卽以劉德謙新募楚勇。專防南韶。亦覺便捷。應卽如何辦理之處。著毛鴻賓等妥籌辦理。該督既稱潮勇多不可靠。其將方耀所部駐紮鎮平。以顧嘉應一路。是否合宜。並著毛鴻賓妥籌調度。毋稍疏虞。將此由六百里各諭令知之。○命翰林院修撰孫家鼎提督湖北學政。○湖北按察使武蔚文因病解職。以候補布政使唐訓方署湖北按察使。○補鑄陝西興安府知府照磨甄坪廳通判巡檢甄坪營都司。各印信關防。從署巡撫張集馨請也。

○  
上以孟夏時享

太廟。自是日始齋戒三日。○己巳。諭內閣李鴻章奏統兵大員。因傷出缺一摺。遇缺提奏。提督江西南贛鎮總兵程學啟。由安慶來歸。帶隊攻克皖城。上年復隨李鴻章督兵由滬赴蘇。所向無敵。兩年之間。先後克復蘇州省城。嘉興府城。及江浙名城十數處。實為東南戰功。稱最。朝廷見其謀勇兼優。勲勞卓著。疊擢提鎮。賞給世職。殊恩異數。屢錫褒嘉。乃於本年攻克嘉興時。該提督躬冒矢石。首先登城。致槍子貫腦。絕而復蘇。屢經降旨詢問病狀。方冀安心調治。就痊。重資任使。詎意竟因傷重出缺。將才難得。悼惜殊深。程學啟著追贈太子太保銜。照提督陣亡例從優賜卹。任內一切處分悉予開復。加恩予諡。入祀昭忠祠。所有戰績及死事情形。宣付國史館立傳。並於安慶蘇州嘉興各府城建立專祠。靈柩回籍。地方官妥為照料。並著李鴻章酌派司道大員。前往賜祭一壇。伊子程建勳著俟及歲

時帶領引見。候旨施恩。用示眷念勳勞。優加褒卹之至意。尋予祭葬。加三等輕車都尉世職。諡忠烈。○又諭前因前任漕運總督袁甲三在陳州防所積勞病故。當經降旨從優賜卹。嗣因官文之請。復准在陳州府地方建立專祠。茲據喬松年奏稱鳳陽府紳民稟請在臨淮建立袁甲三專祠。除批准外。附片陳明等語。袁甲三從前統軍淮甸。克復鳳陽府縣各城。功績卓著。至今遺愛在民。允宜俯如所

請。准在臨淮地方建立專祠。以順輿情。惟以統兵大員。生著勳勞。歿膺廟祀。係屬朝廷曠典。豈臣下所得專擅。喬松年既據紳民呈請。自應據情上達。候旨遵行。乃未經奏明。先行批准。片內並無可否。請旨字樣。殊屬礙率。喬松年著傳旨申飭。○又諭沈葆楨奏勒休知縣可否仍留世職一摺。前任江西進賢縣知縣星聯。因任內公事廢弛。經沈葆楨奏參勒令休致。茲據奏稱該員被劾因公。年力尚強。

可否仍留世職。援例請旨等語。星聯著准其仍留雲騎尉世職。卽飭令回旗當差。○又諭前因哈密辦事大臣興泰與署副將恩賢互相參計各情。當經先後降旨。將恩賢與泰革職。交保恆文祥查辦。茲據奏稱查明恩賢被參各款一摺。此案已革試用參將署哈密協副將恩賢。於歷任中軍都司那墊應存錢糧。率行允准。眾兵缺餉。稟請查算。而該革員並不立時查辦。實屬任意徇隱。罔恤兵艱。迨兵

丁上控被撤。復敢抗不交印。捏遞悔呈。並稟控稅務。以圖挾制。種種乖謬。尤出情理之外。該大臣等僅請發往新疆。不足蔽辜。恩賢著從重發往黑龍江充當苦差。已革護都司全齡。於眾兵稟控清算錢糧。顛預了事。被撤亦復抗不交印。實屬藐玩。業經革職。著毋庸議。已革把總張積慶。於眾兵上控後。意圖息訟。捏寫悔呈。並不能約束兵丁。亦屬不合。張積慶除革職外。著照擬杖責發落。字識李兆幅。

教唆恩賢稟控稅務意存挾制。膽玩不法。著照擬枷號三箇月。發近邊充軍。字識亢傑。劉配。李登瀛。於歷任官員借支應存錢糧。並不呈請咨催歸款。亦有不合。均著照擬杖責發落。其千總全瑞等及都司鍾齡那借銀兩。業經照數繳還歸款。著免其置議。所有歷任失察之總兵副將等。著該部查取職名。分別議處。○又諭。前因哈密辦事大臣興泰被已革副將恩賢稟許匿稅分肥各款。降旨令保恆會同文祥查辦。復因興泰袒護家丁。不將帳目交出。續經降旨將興泰革職。歸案審辦。茲據保恆文祥奏。訊明興泰被許各款。按律定擬一摺。此案興泰家丁王廷傑。周喜將稅局陸續收存備用耗銀二百二十二兩。竟敢託言主人賞需。提取應用。雖將侵盜銀兩加倍完繳。惟係長隨所犯蒙蔽情節較重。仍著杖一百。流二千里。書吏方俊。楊華。陳鏡。於王廷傑。周喜。屢次提取銀兩。不卽攔阻。亦未稟明。

雖無朋分情事。究有不合。均著革役示懲。羅滿倉等借用天平砝碼不準。並不呈明更換。惟究非私製舞弊。所賸平餘銀兩無多。業經交出。應與並未掌平管帳之書吏魯玠等四名。均免置議。稅局委員哈密通判恆齡於稅局事務。雖由興泰專派。書吏家丁等經理。究有失察之咎。著交部查議。已革辦事大臣興泰。於恩賢撤任後。呈遞管見。牽涉稅務。輒行意存迴護。許以撤稟免參。又於恩賢撤稟後。始行具摺參奏。並將店帳遺失。迨保恆等查辦時。又袒護家人。投遞私函。其於家丁隱匿耗銀。書吏使用平餘等弊。始終不能覺察。實屬昏庸荒謬。業經革職。著毋庸議。○諭議政王軍機大臣等。馮子材等奏。鎮軍會勦丹陽逆匪。馮子材親往布置等情。李鴻章奏。踴平常州城外賊壘。官軍四面合圍。各一摺。李鴻章親督將士。兜勦江陰東南竄賊。殲除殆盡。旋由青陽赴常。督籌攻勦。將城西南門外賊。

營數十座全行蹋毀。官軍分壘屯駐。業已四面合圍。諸軍連日倍加奮勇。踊躍用命。甚屬可嘉。惟城賊陳坤書與各路敗賊所餘。驍悍麇集其中。且多兩廣積年頑惡死黨。勢必拚命死拒。此時官軍長圍已合。賊之飛走路窮。諒不復能鋌而出竄。李鴻章仍當穩慎圖功。以策萬全。該撫所調劉士奇。王永勝。帶五營行隊與戈登等分攻各門。是否能相浹洽。俾資其力。著隨時妥為駕馭。該撫摺內所稱湖州之賊全數上竄。究係竄往何處。湖州曾否收復。李鴻章如果探實。卽先行馳奏。馮子材等所奏鎮揚各軍會勦丹陽城援各逆。疊有殲滅。丹陽之賊內衝外撲。其氛甚惡。而詹啟綸等各營均能持重堅定。復經馮子材親往西北各路察看布置。飭令各軍聯絡堵剿。奪毀賊之附城營卡。並據探聞金壇賊已紛紛外竄。鮑超紮營西陽。大加截殺。是金壇一城已為鮑超攻拔。丹賊更必聞風喪膽。著曾國

藩卽飭該提督迅移金邑得勝之兵與鎮揚各軍會攻丹陽。以期速拔。則兩邑連下。常賊之勢益孤。攻勦更必得手。馮子材以鎮防緊要於各路布置稍定。旋卽回城。著仍嚴密周防。以備賊氛潰逸。毋稍大意。將此由六百里各諭令知之。○又諭前因常清奏請調烏魯木齊阿克蘇官兵當經寄諭平瑞挑選官兵一千五百名。奎棟於換防兵內挑選五百名聽候伊犁咨調。茲據奎棟奏該城駐防各營官兵不上千名。除分布各卡局差遣及城門堆鋪各差外。所賸尚不敷五百名之數。請通咨各城如數攤派等語。阿克蘇為南路咽喉。防範亦應嚴密。該處官兵為數無幾。不敷挑派伊犁卡外。現在尚屬安靜。如須豫調官兵以備緩急。卽著常清通咨各城如數攤派。聽候該將軍咨調。以資防剿。將此諭令知之。○又諭文祥奏查辦墾荒開渠大概情形。並郡王伯錫爾捐辦渠工暨哈密虧短鉛丸軍械

各摺片。哈密地方籌辦開墾地畝。經文祥先赴東路塔爾納沁。蔡巴什湖兩處查勘。除原額屯地外。沁屯共得荒地五千六百六十畝。蔡屯共得荒地一千七百餘畝。均可開墾。惟患水利不足。文祥現擬將老渠挑挖。子渠加濬寬深。使水流通暢。藉資灌溉。並首先倡率設法勸捐。以濟工需。著卽照所擬辦理。所有按戶升科一切事宜。並著詳細妥定章程。以期經久。其西路一帶。查有蕭爾齊火石鐵圖。

茨梅花湖三段荒地。均皆肥沃。擬將北山五道溝水源開渠引水澆灌。此項工費浩繁。籌辦不易。該回子郡王伯錫爾現願自雇夫工。捐備口糧木料。設法開挖渠道。情詞出於至誠。殊堪嘉尚。著文祥卽會同伯錫爾妥籌商辦。俟將來工竣時。由文祥奏請獎敘。至哈密庫存鉛斤軍械。舊有虧短。前經易崇飭令該營自行賠補。除賠交外。尚有虧短鉛丸一萬四千七百餘斤之多。實屬疲玩。著文祥卽嚴

督該營將虧短鉛丸並所虧軍械各件趕緊賠補。以重軍儲。並查明虧短緣由。從嚴懲辦。毋稍徇隱。將此諭令知之。○又諭本日據文祥奏遵查可墾荒地。籌辦開渠引水大概情形。並郡王伯錫爾會勘荒地。捐備渠工各摺片。業經諭令文祥卽照所擬妥議章程實力舉辦。並著平瑞隨時妥為籌商酌量辦理。本日據烏魯木齊領隊大臣保恆奏。已於正月十七日拜摺後起程。一俟回抵烏魯木齊。著

平瑞卽行奏聞。平瑞代遞武隆額德明密摺一封留中。將此諭令知之。○以鴻臚寺少卿劉崐為太僕寺卿。○以記名提督王永勝為江西南贛鎮總兵官。○命陝甘總督熙麟撥銀四萬七千三百兩有奇。解赴烏魯木齊。七萬一千九百兩有奇。解赴喀什噶爾。英吉沙爾備同治四年經費。○庚午。

上以孟夏時享

太廟。前期親詣行禮。○諭內閣。玉通奏遶訪賢



才。請送部引見一摺。署西甯府知府循化同知達昌著卽送部引見。○諭議政王軍機大臣等。張之萬奏張總愚股匪翻山南竄。現飭緊躡追剿。並擬移營進紮南陽一摺。捻逆張總愚盤踞藥川。經官軍進剿。踣平賊壘。該匪立腳不住。翻山由大坪頭一帶狂奔。張曜督兵追躡。該匪由下關出馬山口。直奔鎮平內鄉山內。雖係震懾兵威。亦欲勾結髮逆。且頭股倪逆已由鄧州竄至新野。圍撲縣城。端逆

一股與後股鍾得終先後攻撲內鄉縣城。而陳大禧大股由鄧州永青山孟家樓南竄。亦有勾合髮逆之勢。宛屬西南處處伏莽。張總愚一經勾結。其禍蔓延。僧格林沁現由嵩縣馳赴南陽。勦辦並派傅振邦統帶前敵各營。所籌均合機宜。惟新野係四達之區。張之萬現派永奎等前往援剿。設該匪被剿他竄。南窺襄樊。北走葉裕。在在可慮。僧格林沁自應與張之萬分投扼剿。方可力遏狂氛。惟北路

之防。仍宜兼顧。僧格林沁若久駐南陽。恐漢中之賊伺隙向東北奔竄。有鞭長莫及之勢。著僧格林沁酌量情形。可否仍駐嵩縣。控制諸賊東北竄路。而調度張曜等軍。會合馬步將張總愚一股剋日殲除。並調派各軍。將廬聚內鄉鎮平鄧州之髮捻。及陳大禧各股。分投掃蕩。多隆阿部下蕭河清常星阿等管帶之馬步。約共五千名。前經諭令調赴僧格林沁軍營。嗣又據劉蓉李雲麟奏。派駐紮商州

之英毅六營。會合藍斯明一軍。赴鄂豫越境追賊。此軍入豫。亦可歸僧格林沁調遣。通計前後所調之兵。數已不少。著僧格林沁酌量布置。調派來豫。偵賊所向。迎頭截擊。兼顧商雒邊防。毋令回竄。張之萬現駐汝州。應由何處會剿。抑或專顧東北兩路。並著該大臣相機商辦。斷不可令該匪闖入腹地。致官軍反落賊後。又成尾追之勢。官文接奉疊次諭旨。計已出省督師。此時鄂豫邊境。羣賊聚集。窺



伺奔突靡定。襄樊隨東一帶均關緊要。著官文馳檄各路將領認真防勦。毋得稍有疏失。致負委任。如髮擒各匪。被僧格林沁勦敗。遁入楚境。卽著嚴飭諸軍越境追躡。會同官文派出之師。併力兜勦。庶兩路夾擊。可收聚殲之效。嚴樹森仍遵前旨。將省城防守及下游堵勦事宜。豫為籌辦。毋稍大意。將此由六百里各諭令知之。○又諭恩麟奏關外匪徒聚眾滋事。踞堡戕官。經官軍勦捕。立時撲滅。並

平定回疆

三

東路賊匪勾結河狄匪徒生事。派兵勦辦。各一摺。嘉峪關外匪首馬三娃等。因甘省回氛不靖。輒敢糾集多人。攻陷赤金堡地方。經護總兵德祥等督兵掩捕。旬日之閒。立將全股殲擒撲滅。辦理尚屬迅速。至逸犯楊春係起意謀叛賊目。斷不可任令漏網。著嚴飭該員弁等設法緝捕。務獲置之重典。以絕根株。河州狄道一帶回匪。怙惡不悛。必須痛加懲創。恩麟現今道員趙必達統領新募果義營一

平定回疆

三

軍五千餘人。馳往勦辦。並飭都司王勇等聯絡民團。以壯聲勢。著卽督飭趙必達等乘新軍銳氣正盛之時。迅速進剿。務將河狄賊匪悉數殄除。庶可分兵直趨東北兩路。與雷正綰等合師夾擊。恩麟另片奏頃接探報。鳳翔回匪又復蠢動。陶茂林回軍勦辦。因而汧隴賊蹤紛擾。各等語。鳳翔回匪。疊經陶茂林等勦辦。據報陝省一律肅清。陶茂林現已由清水等處進規平涼。恩麟此奏。是否係未經肅清。以前情形。著恩麟等確查具奏。將此由六百里諭知恩麟。並傳諭恩麟知之。○又諭恩麟奏甯夏滿城糧餉缺乏。請飭阿拉善親王挽運小麥。以資接濟等語。甯夏滿城孤立待援。需餉甚殷。經恩麟於程途較近之紅水縣丞酌撥捐輸倉斗小麥三千石。運充滿城兵糧。並另籌馱脚銀一千兩。解交阿拉善親王貢桑珠爾默特。令其雇覓蒙古駝隻。由草地運往甯夏。以濟兵食。旋經恩麟咨催。僅據該

親王派來紅水乏駝五百隻運送小麥二百一十石其餘小麥迄今未運實屬任意遲延不知緩急著理藩院轉飭貢桑珠爾默特仍照原議督飭屬下辦事蒙古官員多備駝隻將未運小麥二千七百九十石趕緊挽運甯夏滿城不得藉詞推諉致滋貽誤原片著鈔給閱看將此諭令知之○又諭玉通奏西甯西南二川漢民被害過重設法倡捐辦理並親往各莊履勘節次辦理撫恤地方漸靖各

書奏

奉

解散漢民而不能解散回民則辦理既不得其平亦豈能從此相安無事誠恐玉通一經回城句結報復又在所不免仍著責成知府達昌等將未結各案及應辦一切善後事宜妥速辦理以期一勞永逸其東北兩川果莽果隆吹布藏等寺並著照該大臣所請卽帶同委員前往會同章嘉呼圖克圖等悉心勸解務令永釋忿爭各安生業並將現辦情形隨時奏聞以慰朝廷西顧之憂將此由五百

書奏

奉

里諭令知之○以甘肅捐資募勇賞前任四川按察使牛樹梅布政使銜知府趙必達等升敘有差○予甘肅赤金堡陣亡護都司雷舉祭葬世職○予四川各屬陣亡殉難知縣郭瑛等暨紳民婦女五千五百十二員名口分別旌卹如例○追予四川綿州殉難提督占春參將文梅勝建立專祠

大清穆宗繼天開運受中居正保大定功聖智  
誠孝信敏恭寬毅皇帝實錄卷之九十八

大清穆宗繼天開運受中居正保大定功聖智  
誠孝信敏恭寬毅皇帝實錄卷之九十九

教修

同治三年甲子夏四月辛未朔日食○享

太廟遣醇郡王奕譞恭代行禮

上詣綏履殿問

慈安皇太后安平安室問

慈禧皇太后安至己亥皆如之○諭內閣鍾郡

王於本月十五日分府孚郡王於本月二十

七日分府均著在內廷行走仍在上書房讀

書○又諭前因御史阿克丹奏漕糧漸次抵

通請嚴飭積弊一摺當經降旨命倉場侍郎

於漕糧抵津運通時認真查驗茲據鍾岱宋

晉奏稱由津起剝一節。已嚴飭委員等盡心稽查。力懲積弊。至通州中西兩倉。甫經盤查清楚。分別懲辦。著賠與現在新收之米。畧畫分明。毫無干涉。且自盤查後。新收舊存各米數目。早經劃明。無可牽混。該御史所稱搭運京倉一節。不特庫款支絀。運腳難籌。且沿途拋灑偷漏。層層剝削。白米質性柔嫩。一經雨淋。號壓易致朽敗。請仍照舊制辦理等語。白米存儲通倉。歷年已久。自未可遽議更改舊

章。轉滋弊竇。所有阿克丹請將通州中西兩倉暫停收入新糧。並將該倉存米搭運進京之處。卽著毋庸置議。○又諭。前因給事中徵麟奏。參東省文武庸劣各員。當經諭令閭閻。銘秉公查辦。茲據閭敬銘奏。遵查各員被參款蹟。請旨辦理一摺。鹽運使銜記名道陳顯彝。查無與崇恩門丁秦彥臣換帖。及在淄川擁兵自衛各情。惟語多誇張。行涉輕浮。著勒令休致。候補道童挺。經團練大臣杜翻派辦

籌防局務。並無與杜翻結拜師生之事。其派辦鹽務。亦無捏名販鹽。及私自借貸情事。守備金國寶。並未統領各營。原參招權納賄各情。均無實據。惟據閭敬銘奏。道員童挺。雖無借貸等事。詳加訪問。該員浮靡虛飾。敗壞風氣。金國寶。雖無擅作威福情事。惟人本平常。操練營伍。難期得力。童挺。金國寶。均著卽行革職。充沂曹濟道盧朝安。由府經歷累保直隸州知州。因隨僧格林沁防剿出力。保升道

員。雖屢次被參。而詳細訪查。實無鑽營卑鄙確據。恩縣知縣陳恩壽。提補萊陽縣知縣。係照例序補。非由鑽營謀幹。撫標中軍參將玉山。儘先守備馬凌霄。千總唐文箴等。皆由勦匪出力。歷次保升。其充當巡捕。亦無擅作威福情事。守備馬榮標。千總李夢岐。並未棄置主將。首先潰退。其保升一節。係譚廷襄論功保獎。並非蒙混。以上各員。并均著免其置議。○諭議政王軍機大臣等。富明阿。奏水師連

獲勝仗。並揚防官軍。擊退丹陽援賊。踣平賊  
壘一摺。南岸逆眾。直奔江口。經吳全美等督  
帶水師擊退。另股逆匪。復在薛家橋等處焚  
掠。又屢於江口紮筏搶渡。均經各防水師隨  
時剿敗。賊不得逞。仍著富明阿督飭吳全美  
等各防師船。晝夜梭巡。毋稍疏懈。丹陽援賊  
經各軍四面兜剿。斬馘無算。金壇縣城亦被  
鮑超攻拔。丹陽賊勢更蹙。著卽嚴飭詹啟綸  
會合鎮軍。聯絡鮑超之師。相機進拔。丹陽以  
期迅速。肅清事。該將軍傷疾已愈。步履尚艱。惟  
當選派得力將弁。奮勉圖功。卽為不負委任。  
無庸親身督剿。以昭慎重。將此由六百里諭  
令知之。○山東巡撫閻敬銘奏。遵查匿名公  
啟所陳各款。均無實據。至譚廷襄辦理降眾。  
勦撫互用。並非袒護勝保。一意主撫。報聞。又  
奏。遵查道員鍾文條陳。除查辦惡團。訓練兵  
勇。業經舉行。畝捐業經停止外。其釐稅一項。  
現止留河卡數處。軍餉攸資。未便裁撤。至整

頓漕運。改復錢糧二條。跡涉加賦。事不便民。  
應無庸議。緝拏鹽梟一節。自當悉心籌畫。次  
第辦理。得旨。東省一切應辦事宜。該撫仍當  
隨時整頓。實力辦理。以期無負委任。○予江  
蘇長灣岡陣亡驍騎校烏德等祭葬世職。加  
等。○予山東淄川殉難紳民董珍等暨婦女  
八百五十四名口。分別旌卹如例。○士申諭  
內閣。沈葆楨奏。道員勦賊出力。請仍照原獎  
鼓勵等語。留於浙江補用道王德榜。前因援  
勦浙江。克復湯溪等城。經左宗棠保奏。降旨  
留於浙江補用。嗣因該員勦賊江西。攻克陶  
家渡賊壘。出力復降。旨以浙江道員儘先補  
用。茲據沈葆楨奏。准吏部咨稱。王德榜係候  
選道。以儘先道員指省浙江。與例不符。查該  
員係由留浙補用道。續得儘先。非由候選道  
請保指省。恐係部議錯誤等語。道員王德榜  
前經奉旨留於浙江補用。吏部並未奏駁。此  
次由留浙補用道。續得儘先。於奏定章程。並

無不合。王德榜著仍以道員留於浙江儘先補用。至吏部於王德榜前次留浙補用之旨何以似未之知。於此次始行議駁。且尚指為候選道之處。並著吏部查明具奏。○諭議政王軍機大臣等。曾國藩奏官軍攻克勾容。及陳近日軍情。因病請假各摺片。沈葆楨奏攻克新城。並合圍南豐一摺。沈葆楨摺內於記名提督黃仁遺徐生德二員。係請旨獎勵。前經諭令軍機處知會各路軍營。遇有奏請特

旨獎勵之員。須將該員履歷及歷次所得獎敘隨摺開送。以備稽查。今黃仁遺徐生德二員履歷未據開送。已於明降諭旨內將該二員先行交部優敘。仍著沈葆楨將該員等履歷查取開送。俟南豐攻拔再行候旨加恩。曾國藩所陳賊酋陳炳汶汪海洋等分道犯徽其氛甚惡。雖圍攻郡城力戰卻之。而侍逆大隊復由昌化踵至。徽州嶺內徧地賊氛。徽休祁黟四城危急等情。江浙軍務正當得手。賊

之分竄皖南江西。前後踵接。甚為可慮。曾國藩現已飭令鮑超全軍回援江西。調石埭二營青陽四營之兵入嶺援徽。著即嚴飭各員趕緊分投援剿。鮑超援江路途太遠。恐落後著勢未必能繞越賊前。沈葆楨所奏新城克後南豐一城尚未攻克。即著沈葆楨督飭席寶田韓進春等乘此各軍雲集之時。速將南豐縣城攻克。以絕後股竄匪。希圖入江合併之意。劉典已酌帶所部起程赴浙。是否已入

江西界內。著沈葆楨飛催前進。江西得此一軍。剿賊必更得力。黃仁遺等所帶係江忠義舊部。此次獨力克拔新城。甚為得力。並著沈葆楨相機調遣。迎探後股竄賊。攔頭截擊。新城餘匪與南豐分竄之賊均已由江竄走。閩境建甯地方。前諭左宗棠徐宗幹催調曾元福內渡之軍以資防剿。此軍何日內渡。該督撫等作何調度。隨時奏聞。仍恐由江竄閩之賊其勢過重。則曾元福一軍力尚薄弱。前以

張運蘭之軍。勦辦逆匪。向稱得力。諭毛鴻賓等。卽飭該員酌帶所部。速回福建。臬司本任。以備閩防。嗣因毛鴻賓奏留此軍。未可驟離粵境。復經諭令酌量調赴粵閩毗連境地。駐紮。俾與閩省聲息相通。相機防勦。現在由江竄閩之賊日多。如由邵武汀州一路奔趨閩省。官軍恐難堵截。著毛鴻賓飭令張運蘭。卽速回本任。帶領所部迎頭堵勦。使賊之竄閩者。不得肆行奔突。卽所以保完粵境。並著將知府劉德謙添募楚勇。酌定如何調撥。豫防賊由江境竄粵之路。粵東勦除各處餘匪。兵力如何不敷。須行另募。道員唐啟蔭現在何處。該員是否得力。能否籌給勇貲。飭令添募西勇及楚邊各勇。以資調遣之處。著毛鴻賓郭嵩壽酌量辦理。曾國藩本日奏片內有湖州克復。賊悉由徽竄江。金壇丹陽業經鮑超會同鎮揚兩軍克復。常州亦有克復之信等語。湖常兩郡克復。左宗棠李鴻章想各奏

報在途。此時全局通籌。李鴻章克常州後。卽可移軍助攻金陵。以圖速拔。毋令大股再得竄逸。擾及他處。自是第一要著。如兵力有餘。尚可分撥由宜溧東壩入皖助勦。兼防本省邊境要隘。其皖南賊勢已眾。惟左宗棠克湖州後。將蔣益澧等各軍。由浙派赴徽境所屬會同曾國藩調往之青陽石埭各營。併力截勦。尚為捷近。著該督等安速籌辦。並著催令劉典之軍。迅卽取道江西。與江省各軍規賊所向。以為迎擊之師。暫歸沈葆楨調遣。曾國藩患病。自屬實情。當此事機緊切之際。全在該大臣運籌決策。以竟成功。著賞假一箇月。安心在營調理。其於軍務要件。仍可照常督辦。金陵圍師。卽責成曾國荃一手經理。務令拊循士眾。奮勉圖功。如果克復。准其先由曾國荃彭玉麟楊岳斌會銜馳奏。襄樊賊勢亦眾。官文等前奏鄂省勦辦。未卽大挫其鋒。賊本有於該處聚齊回救金陵之說。亦屬不可

不防。曾國藩所慮賊由豫皖陸路至鳳潁廬巢一帶。擄船南渡之處。本日已寄諭僧格林沁。檄令陳國瑞之軍。遇有逆捻等股。由豫竄皖。卽自徐宿一帶移軍援剿。以備不虞。楊岳斌彭玉麟水師。江面布置。仍著曾國藩隨時籌商辦理。兵部侍郎崇厚奏。江浙新復郡縣。請飭籌辦賑濟一摺。其中所奏。是否可行。著曾國藩左宗棠李鴻章查覈辦理。崇厚原摺。均著鈔給閱看。將此由六百里各諭令知之。

○又諭前有旨令僧格林沁調派陳國瑞之軍赴豫。嗣據吳棠奏。請將陳國瑞一軍駐紮徐宿。當經允照所請。仍令聽候僧格林沁隨時調遣。嗣經僧格林沁覆奏。仍令暫駐徐州鎮撫。屆時酌量調派。茲據曾國藩奏。稱漢中髮捻各匪。竄至鄧州內鄉之交。襄樊賊勢甚眾。慮由豫皖陸路。衝至鳳潁廬巢一帶。擄船南渡。圖解金陵之圍等語。皖北防剿各軍。節經官文。曾國藩移調湖北。皖南現存皖北各

營兵力。已不甚厚。金陵功在垂成。漢中髮逆人數眾多。設由豫省竄入皖北。勢將掣動大局。關繫非輕。鳳潁廬巢一帶。為該逆救援金陵陸路所必經之處。防堵均形喫重。喬松年雖在臨淮。所部未必可恃。陳國瑞一軍。素稱得力。且距鳳潁廬巢一帶較近。著僧格林沁酌量情形。陳國瑞應否移紮何處。兵力是否足數堵剿。卽由該大臣檄令。遇有髮捻各逆。由豫竄皖時。卽就近由徐宿一帶移軍援剿。

以資得力。將此由六百里諭令知之。○江西巡撫沈葆楨奏。防剿喫緊。請將本年鄉試展緩舉行。從之。○以克復江蘇句容縣城。賞參將黃海清。孫開華。巴圖魯名號。總兵官馮標等。加銜升敘有差。予陣亡知府田芬。參將陽茂。都司易新。勝守備向忠。國等。祭葬世職加等。○以克復江西新城縣城。予提督黃仁達。徐生德。優敘。陣亡都司邱采芹。守備谷開文。把總王豐河等。祭葬世職加等。○以廣西



克復潯州府城出力。賞道員張銑花翎。府經歷王向榮藍翎。餘加銜升敘有差。○癸酉。諭內閣。閣敬銘奏。請重名器。以裕京餉一摺。據稱捐例之開。藉以籌備餉糈。近來行久弊滋。如道府州縣等官。責任均重。自減成收捐以來。以官為貿易者。得廁其間。明效輸將。暗虧帑項。請飭將道府州縣四項。仍按籌餉定例減二成章程。呈繳實銀。均在京銅局報捐等語。所奏不為無見。道府有表率之責。州縣為親民之官。均應慎選廉能。以襄治理。近因捐數較輕。遂致所收易濫。在挾貲干進者流。且自視為無足重輕。一經得官。於地方吏治民瘼。漫不加察。恣情侵蝕。罔利營私。下則朘削民生。上則虧那國帑。總緣收捐太易。人品混淆。亟應明定章程。以示限制。嗣後各省捐局除丞倅雜職。仍准照常收捐外。其道府州縣四項官職。著戶部按照籌餉定例減二成章程。收捐實銀。並令均在京銅局報捐。各省捐

局。即將收捐道府州縣四項官職之處。一律停止。○又諭沈桂芬奏。特叅州縣佐雜等官。請分別降革撤任一摺。山西渾源州知州李鏡清貪鄙性成。民情怨怫。代理靈石縣事。提補交城縣知縣蕭汝霖。不知立品。物議沸騰。前署甯遠廳司獄分缺。間用典史趙從陶。任性妄為。不自檢束。均著即行革職。高平縣知縣單寶書才具尚可。輿論未孚。著以府經歷縣丞降補。萬泉縣知縣宋寶樹實地謹厚。辦事未能精細。甯武縣知縣譙厚慶。地方公事尚無貽誤。惟才欠開展。均著撤任留省察看。○諭議政王軍機大臣等。陝西巡撫劉蓉。前經胡林翼駁奏。章歷次保薦。朝廷簡任封圻。畀以陝疆重寄。現在陝西回務甫清。餘孽未殄。漢中逆匪。勦除未淨。竄豫之賊。尤賴陝援。關中據天下形勝。籌畫軍務。與民更始。關係非輕。朝廷為地擇人。自當慎之又慎。劉蓉為駱秉章所素知。且漢南距川密邇。聞見倍確。

究竟該撫入陝以來於一切軍情有無貽誤以現在陝省情形而論該撫能否勝任卽著劉切據實奏聞毋稍徇隱又前廣東布政使文格現調來京引見前浙江鹽運使朱孫詒先經派赴多隆阿軍營襄辦營務嗣據多隆阿以回務告竣奏明給咨送部引見駱秉章前在湖南有年文格朱孫詒均久屬屬下其才具操守必能洞悉底裏又鹽運使銜候選道李概已有旨飭令來京引見該員前在湖

南本籍辦事是否足資任使駱秉章諒亦知之有素以上三員並著該督就所見聞悉心評論其性情才識何如若膺簡用能否有濟務期覈實覆奏以副朝廷旁求慎簡之意本日又據張凱嵩奏粵軍派援黔省之副將楊廷桂七營月需餉銀請飭就近解濟等語粵省援軍入黔需餉孔亟著駱秉章卽於未解粵餉內按月籌撥銀一萬兩或數千兩委員就近解至黔省交楊廷桂軍營以資接濟將

此由五百里諭令知之○又諭張集馨奏彙報軍情分別咨飭堵剿並盤屋營中情形各摺片曹燦漳股內偽統領游飛熊等三百餘人既從鎮安縣赴甯陝廳投誠何以復折竄該廳屬之腰竹溝續又由洵陽佛坪廳等處竄至鄠縣之澇峪口現在賊眾已驟增至二萬餘人是否該地方官為賊匪偽降所誤堵剿鬆懈致令該逆任意肆竄復行蔓延張集馨原奏殊不明晰劉蓉不日卽可到省著卽

查明具奏鄠縣距省甚近防堵最宜嚴密張集馨現已咨明穆圖善撥兵進剿著多隆阿卽飭令穆圖善迅速籌兵馳往遏截毋令延入腹地並著劉蓉飭令該縣多集鄉團固守要隘以固省城門戶川兵現在濠溝西峪溝等處兜剿若再得一軍進峪夾擊則此股可期殄滅著劉蓉迅卽撥兵與穆圖善所撥兵勇前後夾攻將該匪全股掃除毋得縱令他竄省城既有奸細徐澍揚冒充職官濶跡城

內則防守稽查。益宜慎密。張集馨務當隨同。劉蓉妥籌布置。不可稍涉大意。隴州回匪。前已據多隆阿。張集馨。疊報肅清。何以此時馬鹿鎮等處。又有逆回屯踞。陶茂林一軍。現與雷正綰合攻平涼。疊獲大勝。逆首木三。已為雷正綰兵勇生擒。若陶茂林所部不返隴州。則平涼郡城。指日可復。甯夏滿城。亦可進籌援應。曹克忠現已由兩亭拔營前往隴州。劉蓉卽日到省。亦可酌撥所部將士。分防鄠縣。城池及滂峪口一帶。俾穆圖善等軍。移勦汧隴並峽口等處回匪。以通甘省糧路。著多隆阿。穆圖善。劉蓉與雷正綰斟酌情形。會商籌辦。雷正綰所需餉銀五千兩。並軍火器械等項。卽著張集馨與林壽圖等設法妥籌。源源接濟。毋令稍有缺乏。山陽商南鎮安各踞賊。雖已東竄。難保不復行折回。盧氏之木陽關瓦穴。皆與商南各隘口相連。卽著多隆阿。劉蓉嚴飭在防文武。嚴密防堵。整屋營中將士。

仍著多隆阿飭令穆圖善整齊約束。以肅營規。將此由六百里諭知多隆阿。穆圖善。雷正綰。劉蓉。並傳諭張集馨知之。○又諭張凱嵩奏圍攻貴縣賊巢。擊退援賊。現籌進取情形。陽春客匪。擬竄西省。楊廷桂一軍援勦黔匪。各摺片。貴縣黃逆踞伏平天寨。抗拒全軍。經劉坤一等設法圍攻。殲滅援賊。購覓內應。直逼該寨而營。逆勢益形窮蹙。著張凱嵩督飭各軍。乘此聲威。直搗堅巢。務將該寨迅圖克復。以竟全功。陽春縣屬客匪。經東省官軍擊敗。現擬逃竄西省。陽春毗連信宜。西省容岑兩縣。緊與信宜接壤。不可不豫為之防。著張凱嵩檄飭西省毗境文武。督率兵練。嚴密防守。並飭令蔣澤春確探賊蹤。迎頭截勦。並聯絡東省官軍。兩面夾擊。以圖聚殲。黔省匪徒。廖萬服。楊通潮等。率黨千餘。竄越西林之路。城地方。著張凱嵩卽飭知府吳其達激勵紳團。實力勦辦。並著勞崇光。張亮基嚴飭該地。

方文武跟蹤緊躡以期迅殄逆氛黔省賊匪句結李逆併股圖擾省垣其八寨之賊竄入獨山之霸街八蒙一帶又進踞已賴旁寨等處該處一由獨山可達南丹土州一由荔波可達思恩楊廷桂現已進軍荔波黃仲慶亦折回獨山分路進攻著張凱嵩卽飭該員等先將李七一股殲除仍視黔省緩急情形相機援勦並著勞崇光張亮基檄令本省各軍與粵西派出官軍聯絡聲援次第勦除毋令

匪蹤益形滋蔓將此由六百里各諭令知之○廣西巡撫張凱嵩奏遵查賊酋潘炳實於上年十月初五日在蒙洞村前中礮身死報聞○以陝西鳳翔守城出力賞知府鄭尊仁等花翎餘升敘開復有差○

上以常寧祀

天於

圍丘自是日始齋戒三日○甲戌諭議政王軍機大臣等慶昫奏接奉寄諭行知阿拉善旗

就近接濟及近日防守情形一摺另片奏遵旨將佛爾果椿正法援兵漸近賊勢漸蹙等語阿拉善旗現撥粟米一百石銀二十兩陸續運濟省城前撥小麥及山西撥解協餉均可解到著慶昫安派兵弁探路迎提以濟眉急並著嚴催代辦提督梁生嶽催集兵勇移營納家牐先分賊勢且可通府城迤南各鄉堡糧路仍設法勸諭沿山一帶紳富捐輸以顧兵食而保危城訥欽一軍現已行抵何處

並著慶昫等迎探催令迅速進兵務須內外夾擊免致日久懈生或生他變城上防軍雖尚得力殲賊並不能多賊未大創該匪故作進退相持之狀恐是誘敵之計城外焚掠愈甚則城內之糧草更難且恐各路解濟為賊所截不可不慮該將軍等惟當慎守待援多發偵探毋恃賊之不攻遂謂可以大意也將此由五百里諭令知之○乙亥諭內閣昨據御史常凱奏道員貪劣不職請飭查嚴究一

摺所稱直隸口北道等官。秉性貪鄙。並未指名何人。亦未聲明前任現任。又稱懷來縣知縣。係前湖南學政錢寶廉胞弟。錢寶廉已報丁憂。該道授意該縣。暫可延閣。旋又揭叅。亦未聲明懷來縣知縣名姓。當經諭令議政王軍機大臣傳旨詢問。本日據議政王等奏稱。傳詢該御史於口北道名姓。雖能指出。而於摺內所叅各節。敘述之下。語多參差歧異。似於其事尚未了然。且稱湖南學政丁憂。口北道並未詳報。其懷來縣知縣不知姓名。業經病故等語。繼閱其親筆所書覆奏一紙。又稱風聞懷來縣丁憂回籍離任。同丁寶蓮回籍。口北道於學政丁憂遲報日期。其懷來縣名實不知悉等語。該御史摺內所稱係錢寶廉而親筆所書。何以又係丁寶蓮。湖南學政丁憂。又何以應由口北道呈報。種種多不可解。御史原准風聞言事。惟必須將事之原委了然於胸。方可登諸奏牘。何以該御史所陳各

節。與面詢各情。前後參差。語多不能明晰。仍著常凱明白回奏。○諭議政王軍機大臣等。有人奏。前署貴州遵義縣知縣鄧爾翬。在任辦理捐輸。私置站籠班卡。數年之久。監斃不可勝計。請飭查叅辦等語。州縣擅用非刑。本干例禁。若如所奏各情。實屬任性妄為。草菅人命。亟應徹底根究。以肅吏治。著勞崇光張亮基確切查明。據實叅奏。毋稍徇隱。原片著鈔給閱看。將此各諭令知之。尋奏遵查鄧爾翬前在署遵義縣任內。勸捐助餉。並無私置站籠班卡等事。惟將抗捐之戶管押辦理。稍形激切。請交部議處。從之。○兵部議覆定邊左副將軍明誼奏。塔爾巴哈台綠營屯田。久經停止。換班現在屯兵出缺。無人應募。請暫於差操兵內撥補。並請飭陝甘總督烏魯木齊提督。轉飭各原營迅速招募前來。以符原額而重屯防。應如所奏辦理。從之。○丙子常

寧祀

天於

圉丘遣禮親王世鐸恭代行禮。○諭內閣。昨因御史常凱奏。參直隸口北道等官貪鄙。及授意署懷來縣知縣延閣。不報丁憂。旋又揭參等情。當因摺內未將口北道署懷來縣姓名聲敘。諭令議政王軍機大臣傳詢。而該御史面覆。並親筆所書覆奏一紙。又各前後參差歧異。語多不能明晰。當降旨。仍著常凱明白回奏。茲據奏稱。昨在軍機處回話。實係倉卒之間。一時記憶不清。以致語多參差歧異。請旨將其議處等語。查直隸候補知縣錢葆廷。前經劉長佑奏。參革職。常凱所指為湖南學政錢寶廉之胞弟。自應卽係其人。據稱於應行具報丁憂時。經口北道授意延閣。及至開傳通省。遂歸過於該縣。反為揭參一節。匿報丁憂。顯干例禁。若如所奏。該署知縣錢葆廷。因人授意延閣。居心已不可問。儻甘心匿報。以授意歸過他人。尤屬險詐。錢葆廷究係如

何匿報丁憂之處。著劉長佑查明嚴行參奏。並將常凱原摺所參之口北道振麟。令署赤峰縣。事宣化府。經歷童鶴齡。於各屬索取陋規。派令出銀修理衙署。濫薦乾館脩金。勒加糶價。解費各情。一併查明。秉公究辦。毋稍徇隱。御史風聞言事。必須將事理了然於胸。方可陳諸奏牘。常凱面稱各語。及親筆所書。與原摺毫不相符。及覽其明白回奏一摺。則又字句了然。其非出自本人之手。已無疑義。且

原摺既指署懷來縣知縣為湖南學政錢寶廉之胞弟。而始終不肯指實該署縣之名。顯係故作遁詞。意存掩飾。難保無受人指使情弊。若竟將此事交部研訊。何難水落石出。惟現在言路宏開。姑免深究。常凱不勝御史之任。著回原衙門。以主事降補。用示薄懲。○諭議政王軍機大臣等。前因閩省防務喫緊。並江西賊匪闖入閩省。光澤等處。疊經諭令左宗棠。徐宗幹。催令總兵曾元福。由臺灣內渡。

茲據左宗棠等奏稱臺屬彰化斗六等處。按捕善後事宜。均須籌辦。曾元福在臺年久。為紳民素所信服。應留臺郡。並委總兵曾玉明署理水師提督一摺。福建水師提督。即著曾玉明署理。所遺臺灣鎮總兵。著曾元福署理。現在江西新城克復。南豐疊獲勝仗。該二處竄匪陸續竄越閩省之建甯一帶地方。黨與眾多。必須厚集兵力。方足以資堵剿。曾元福既留臺郡。著左宗棠徐宗幹。即速催令曾玉明督率所部將士。趕緊內渡。馳赴建甯一帶相機進剿。昨據曾國藩奏稱。偽侍逆大隊由昌化竄擾徽郡。並有湖州克復後。侍堵輔三逆。悉數由徽竄江等語。湖州郡城。於何日克復。左宗棠此時諒已奏報在途。現在浙境是否一律肅清。著即迅速奏聞。唐義訓。毛有銘。兩軍在徽郡剿賊。竟至大挫。徽休祁黟四城。岌岌難保。前經諭令左宗棠於湖州克復。將蔣益澧各軍。由浙派赴徽境。惟此時皖南賊

蹤徧地。非厚集兵力。不足以殄寇氛。該督前奏。有逆眾他竄。當督飭各軍出境追剿。務當此股肅清之語。著即調集各路兵勇。馳往徽郡。會同曾國藩。現調之青陽石埭等營。聯絡夾攻。務將該逆就地殲除。不可再任紛竄。他處左宗棠既以追剿湖郡竄賊自任。自當不分畛域。與皖南各軍。併力齊心。同殲醜類。毋稍遲延。所有浙界防務。仍著左宗棠飭令王開琳劉清亮等軍。嚴密堵遏。毋令賊蹤再行入浙。繞竄江西。是為至要。將此由六百里各諭令知之。○又諭。訥欽奏。馳抵定邊。偵探回情。並請派有任大員。接統軍務。各一摺。甯夏逆首馬化澂。現於靈州金積堡操演馬隊。並分布各隘。阻我進兵之路。訥欽現抵定邊。擬俟續調直晉官兵二千名到齊。並趙廷烺勇丁招募成軍。再行前進。直晉官兵前已疊報起程。即著訥欽迅速飛催。一俟兵勇到齊。妥籌部勒。與雷正綰會商進取。互為聲援。以資



犄角。其多隆阿馬隊已疊次諭令調撥。並著一面迎提以資攻剿。訥欽統兵赴陝去直隸日遠。營伍一切事宜勢難兼顧。幾輔地方緊要提督一缺。故令徐廷楷署理。訥欽帶兵援甘。是其專責。所部兵勇仍當妥籌駕馭。不得以無任無權。呼應不靈。意存推諉。將此由五百里諭令知之。○又諭都興阿現在由京起程。前赴歸綏。原令即在歸綏籌辦該處防務。本日訥欽奏報馳抵定邊偵探回匪情形。因續調直晉兩省官兵尚未到齊。署總兵趙延燾定邊招募勇丁亦未募足。均須催調。並候多隆阿馬隊到營方能籌畫進攻靈州。並有自卸署直隸提督篆務一切深恐呼應不靈等語。馬化澂逆蹤鴟張甯夏滿城待援孔亟。日前雷正綰奏到進兵已偏平涼可期得手甯靈一路尤須從定邊及早進兵。期與雷正綰等軍共收夾擊之效。都興阿老於兵事諳練較深著即趕緊由京起程直赴定邊接統

訥欽所部各軍速籌進取甯靈一路該將軍到後即行傳諭訥欽回駐歸綏會同德勒克多爾濟籌辦歸綏防務。訥欽所部兵勇現有七千餘名著該將軍酌量如兵力已敷可酌撥千餘名交訥欽帶往歸綏以資守禦。都興阿行抵定邊續調直晉官兵定可到齊。趙延燾勇丁募足成軍堪資嚮導應即如何調度進兵之處著即迅速籌辦一面奏聞。雷正綰進圖平郡屆時能否攻克該將軍應與如何聯絡進取並著妥為籌商將甘省回氛迅圖掃蕩以副委任。將此諭令知之。尋奏續調馬隊現已到京遵卽剋日赴防前起馬隊業已派員帶赴歸綏一俟各軍會合卽由歸綏取道前進報聞。○補鑄江蘇陽湖無錫宜興等縣知縣太倉州儒學甘肅巡檢浙江金山場鹽課司臨海縣縣丞奉化縣儒學山陰縣巡檢各印信條記從巡撫李鴻章左宗棠請也。○丁丑諭議政王軍機大臣等沈葆楨奏



髮逆傾巢西竄。續入江境。辦理情形一摺。江西官軍自克復新城後。南豐一城尚復堅持未下。而廣饒警報接踵而來。陳炳汶、汪海洋等逆已竄至德興之海口。李侍賢、黃汶金等逆已及休甯之巖市。賊氛過重。岌岌可危。沈葆楨現以韓字等營留圍南豐。而檄精毅精捷繼果三營東馳。探賊所向。穩紮穩擊。卽著嚴飭各軍迅速拔營。前赴德興一帶攔頭截剿。仍一面飭韓字等軍迅拔南豐。以免後股跟蹤踵至。致前股賊勢復張。益形棘手。此次賊以大股並犯江西。其氛甚惡。曾國藩前奏賊犯徽城。而唐義訓、毛有銘兩軍竟至大挫。以徽浙之軍層層布置。尚不能力遏奔突。此時賊已入江。而侍逆等復陸續上犯。江右兵力單微。復須剿除腹地賊氛。豈能當此巨寇。曾國藩前於句容克復後。飭鮑超全軍回援江西。此軍是否業已拔營。著曾國藩檄令迅赴事機。與江西官軍前後夾擊。並飭皖南防

軍將竄至休甯之李侍賢等逆。攔腰截擊。以免其接踵上竄。左宗棠前於桐巖一帶已調劉清亮等軍馳往扼守。而賊之由昌化入徽者。絡繹而來。在防各軍曾否扼剿。湖州克復之信亦尚未據。左宗棠奏報現在湖賊悉數由徽竄江。是湖城自己攻克。其蔣益澧等各軍能否卽令馳赴徽境。與皖南之軍將後股竄賊聯絡堵擊。卽著該督速籌辦理。劉典已酌帶所部起程。王文瑞新募之勇亦由湖南籌給行貲。催令趕緊料理。何以至今均無入江消息。著左宗棠、惲世臨檄飭飛速兼程前進。並由沈葆楨一面迎催。飭令視賊趨重何路。卽由何路截剿。江忠朝已報起程。因舊傷觸發中止。著惲世臨催令該總兵趕緊醫調稍痊。卽行迅速赴江。接統江忠義舊部以資得力。沈葆楨摺內新城克復。偽王宗一股蔓延於福建之建甯、泰甯兩縣地面。徐宗幹前派閩邊防軍為數畸零。深恐堵剿不能得力。

曾元福現已留臺。其曾玉明內渡之軍。徐宗幹迅卽催令督率所部。馳建甯一帶。痛加勦洗。如曾玉明年老不能得力。卽著左宗棠。徐宗幹另選將才派往。張運蘭前為毛鴻賓奏留粵省。嗣經寄諭。仍飭赴閩。現在閩邊喫重。著毛鴻賓仍飭張運蘭速回本任。迅統所部。卽赴建甯。與曾玉明妥籌會擊。不准堅留。續請展轉耽延。貽誤大局。其粵東毗連江閩各邊。並著毛鴻賓。郭嵩燾嚴密布置。豫籌分扼。以杜窺伺之路。正在寄諭間。據李鴻章奏。溧陽官軍。截勦金壇竄逆。殲滅大股。並常州湖州軍情各摺。片。金壇敗賊。與常州西路餘逆。將竄赴廣德。圖合侍逆之黨。於道經南渡。為駐防溧陽之吳毓芬等截勦。全股殄除。勦辦甚為得手。各路官軍。若於敗賊紛竄。均能如此勦除。不令善脫。則賊數日減。何至殘寇復張。嗣後遇有此等竄賊。著李鴻章卽飭各軍攔截聚殲。毋任竄逸。常州圍攻甚緊。轟坍

城垣數處。皆為偽護偽誌等逆糾眾堵護。丹陽未克。湖州踞賊未除。曾國藩前奏丹陽湖州收復。常州亦有收復之信。自係傳聞之誤。現在常賊米糧雖可支數月。而油鹽子藥久將缺乏。已成坐困。李鴻章籌備攻具。剋期再舉。卽著督飭諸軍。穩慎轟擊。期拔堅城。仍當嚴斷竄路。以免旁逸。湖州既未克復。而賊之大股。已陸續上竄。湖賊勢難堅守。浙軍勦辦情形。現在究竟若何。著左宗棠速催蔣益澧等軍。乘賊勢瓦解。併力攻擊。以圖克復徽浙之交。一面催令防軍嚴密堵遏。以防敗賊踵竄。如兵力不敷。擬或添派數營前往。與皖軍聯絡扼截之處。卽著左宗棠不分畛域。妥速調派。李朝斌太湖水師。疊破湖州濱湖之錢淩楊淩等處賊壘。仍著李鴻章督令相機進取。並於濱湖地方。嚴密梭巡。防其內犯。蘇浙軍情。左宗棠李鴻章務須隨時咨會曾國藩。與皖軍聲息聯絡。通籌大局。援勦兼施。是為

至要。將此由六百里各諭令知之。○又諭官文嚴樹森奏。捻逆勾結繞竄棗陽。出省調度。總兵梁洪勝於光化縣境續獲勝仗。各摺片。逆捻自襄樊敗走之後。復欲北竄。經梁洪勝等軍擊敗。竄向河南浙川之李官橋等處。漢中逆股竄至鄧州新野之交。適與之合。乘虛闖入棗陽縣境。而賊尾股仍在河南內浙鄧州等處。其眾數十萬。蔓延數百里。逆氛頗熾。其地由湖北之安麻靳羅。可達英霍。由河南之信羅光固。可達六安。到處空虛。賊之欲繞豫楚。以擾皖軍後路。而解金陵之危。計頗狡毒。官文等以先保漢黃安德四府。及力扼長江廣漢。為切要之圖。派令周鳳山等軍分駐襄陽等處。布置均為妥協。官文現在出省督師。自應擇要駐紮。以便居中調度。惟分布各路兵力尚虞單薄。前諭多隆阿等派令姜玉順等帶兵四千名。由甯陝迅赴湖北。交官文調遣。曾否起程。即著多隆阿穆圖善催令姜

玉順等星速前往。官文即飛檄迎提。以厚兵力。穆圖善暫署欽差大臣關防。節經諭令將各軍分投調撥。何以隻字未見覆奏。所有前諭將蕭河清帶領之四千餘人。由雒南一路會同常星阿等馬隊前赴河南。歸僧格林沁調遣。是否亦已派往。並著飛催前進。僧格林沁亦即迎提到豫。以資臂助。官文等所奏賊竄情形。與前日張之萬所奏略同。漢中逆匪恐與張總愚陳大喜等均已勾合。捻逆蜂屯蟻聚。盡竄鄂疆。僧格林沁由嵩縣督軍馳赴南陽。與鄧新及棗陽一帶漸近。賊勢一片恐慌。鄂軍獨力所可支。僧格林沁大軍並傳振邦所帶前敵各營。應與鄂軍如何聯絡。前截後追。著即迅速籌辦。仍遵前旨。兼顧北路之防。以備賊復回竄豫境。張之萬前奏髮逆曾在荊子關為李殿元等設伏邀擊。繞竄內鄉。何以近日復有豫軍在荊子關為髮逆攻破之事。是否前奏諱敗為勝。著該撫查明具奏。

並著卽與僧格林沁趕緊商定。督率張曜等與傅振邦等軍分投堵剿。如須越境窮追。毋得遷延觀望。坐失事機。致干罪戾。曾國藩前奏派往鄂省之李濟清萬化林二營。已據官文等分派襄涓一帶。其咨商楊岳斌彭玉麟於浦口以上津渡節節布置。以防賊之東援。部勒諒臻嚴密。此時捻逆羣黨。麇集鄂境。其由水陸下竄。圖擾皖軍後路。以解金陵之危。均須加意防維。不可稍涉大意。諒曾國藩必能籌畫萬全也。陳德才等股。既已攻破荊子關。偏擾鄭境。恐其後股尚復游行商確一帶。多隆阿所派藍斯明等軍。自應由後追躡。與楚豫官軍前後夾擊。藍二順逆黨。尚在蜀河。鄂軍憑漢堵擊。僅能扼使不得東渡。李雲麟前奏以專剿此賊自任。此時正可與鄂軍合力痛殲。若再坐失事機。避賊而行。又復任意枝梧。該京堂自問當得何罪。正在寄諭間。劉蓉奏到連日追剿曹逆疊勝。現飭免圍。及赴

多隆阿軍營相視情形各摺片。曹逆股匪由孝義一帶入山。經劉蓉飭令蕭慶高等軍。派隊率團進剿。賊勢已蹙。惟賊尚踞文公廟老巢。亟須乘此聲威。搗穴擒渠。毋留餘孽。多隆阿傷病猶劇。殊增廕念。現在派撥諸軍分道征剿。事宜至關緊要。劉蓉到省接篆後。不准在省耽延。著卽親赴多隆阿軍營。會同穆圖善妥為籌布。催督各軍分投前往楚豫各路奮勇剿賊。毋稍稽延。如各將士有依戀主帥未忍遽離等情。卽可告以多隆阿傷病就痊。亦當覘賊所在。前往統率。以慰其心。劉蓉出省。著卽奏聞。所有省城日行事件。照例飭司代辦。其防禦撫輯等事宜。仍飭各該文武加意整飭。毋許鬆懈。襄鄖與陝毗連。而潼商等處。仍恐餘氛未靖。事機均極喫緊。劉蓉責無旁貸。惟當妥籌調度。嚴飭各路官軍。勦力滅賊。豈可安坐省垣。轉形諉卸。本日又據張之萬奏報。追剿張總愚股匪至馬山口。突遇逆

匪大股截勦獲勝。現在分兵勦辦等情。正與此諭多相符合。張總愚股果與逆匪竄合。其由內新唐鄧一帶疊被勦擊。竄去大股。卽係陳得才陳大濬等全股南趨。僧格林沁已抵馬山口。督率蘇克金張曜等軍於赤眉城西大獲勝仗。餘賊折入山陬。避我馬隊。著僧格林沁卽飭各軍將此入山殘匪埽除。以便分兵擇要堵截。逆捻大股張之萬已由汝州移營南陽。著卽飛飭宋慶萬承霖之軍由內鄉等處跟追。期與楚軍合力會勦。並令連美李承先馬步各隊馳赴信陽。實力堵截。總當不分畛域。越境追擊。共殄逆氛。毋得徒託空言。南北賊氛本相一氣。值此游氛四合。其勢雖張。各路官軍亦須會合四面兜勦。以期聚殲。該大臣督撫等其各同心齊力。以赴事機。是所殷望。將此由六百里各諭令知之。○以正黃旗滿洲都統惇親王署鑲黃旗滿洲都統。○以江蘇截勦金壇竄逆獲勝。賞參將陳占

榜等花翎。守備姜全政等藍翎。餘升敘有差。○予江蘇各屬殉難候選同知程松等紳民婦女一萬二千五百八十二員名口分別旌卹如例。○戊寅諭議政王軍機大臣等。憚世臨奏楚師越境收復貴州古州廳城。連克尤洞等處賊巢一摺。據稱二月十三日。周洪印戈鑑派隊焚毀尤洞賊巢。賊併趨筆架山等處。周洪印復會合彭炳武等連克順寨漂寨。賊棄筆架山受洞巢穴。遁往古州。趙福元等亦先後趕到。會同代理古州鎮穆雙有等直搗古城。城賊分門擁出。官軍截殺多名。遂將古州州城克復。賊股遁往平江等處。周洪印等派隊猛進。焚毀賊寨。官兵窮追。因荒山小寨無處覓糧。且貴州總兵金太文尚無成軍。拔營信息。前途無迎勦之兵。楚師跟追不及。飭拔回古州。相機進止等語。湖南官軍屢次入黔勦賊。若貴州派軍會合痛勦。何難將黎平匪股盡行撲滅。此股逆眾究竄何處。何以

未據勞崇光張亮基奏報殊不可解。總兵金太文現在何處。何以日久未見拔營赴防。著該督撫催令迅速赴任。責令將竄匪悉數殄除。如再遷延觀望。或致賊眾竄擾完善地方。卽著從嚴叅辦。以肅戎行。惲世臨仍飭援黔各軍酌度前進。會同黔軍將此股匪徒全數殄滅。毋任回竄。包茅仙一股。勾合多人屯聚孟溪悶頭坡。踞松桃城止五六十里。又有黃號教匪任五等各股。在松桃印江交界之天馬寺一帶滋擾。伍雲召圍貴東道於石梁黨眾盈萬。知府陳昌運撥練勇馳援。曾否得手。所圍貴東道係屬何人包伍等逆。數均不少。何以均未據勞崇光等馳奏。著將黔省賊勢並現辦情形據實查奏。毋再遲延。髮逆及余唐等匪擾及荔波三洞。粵軍副將楊延桂赴荔波搜剿。惲世臨卽飭周洪印戈鑑等與之聯絡。會剿此股。諒不難悉數蕩平。將來黎古肅清。援軍應赴何處協剿。仍著不分畛域出

境追剿。以固邊防。江西防剿十分喫重。王文瑞劉典兩軍已募齊勇丁陸續入江。著惲世臨卽催令帶勇迅速前進。毋稍延緩。江忠朝因疾尚未起程。而江忠義舊部需人統帶。該撫仍遵前旨。催令力疾起程赴江。以期得力。湘省東路各邊仍照舊布置。如兵力尚單。卽調回趙福元等軍力顧東防。保全大局。以副委任。將此由六百里各諭令知之。○又諭惲世臨奏遵催田興恕赴川並添派知縣呂鳳藻馳赴鎮筵會同川省委員押解前進等語。田興恕押解入川據惲世臨前奏本有二月十六日起程之說。何以至今尚無就道確期。當此事有轉圜之際。豈容該革員遲延不前。致生枝節。惲世臨務當恪遵前旨。迅飭胡鏞等催令田興恕剋日起身。並飭呂鳳藻會同四川委員姚寶銘押解前進。儻敢再有稽延。必惟惲世臨是問。駱秉章仍當派員迎提。將田興恕在川羈禁一面馳奏一面飛咨黔省。

迅速查辦。勞崇光張亮基於田興恕到川後。即將教民一案。趕緊審辦奏結。事關中外大局。稍涉因循。必至波瀾又起。想該將軍督撫等。自能恪遵迅辦也。將此由六百里各密諭知之。○又諭。前因勞崇光奏賈洪詔委新選維州協副將尚阿布署昭通鎮篆。恐於滇省情形未能熟悉。請仍令楊盛宗署理。當經降旨允准。並諭令嗣後滇省委署鎮將以下各缺。卽著勞崇光斟酌辦理。其文職各員。該督撫仍當和衷商榷。會同委署。茲據賈洪詔奏用兵之道。事權宜一。現當籌議進兵。如以勞崇光身任總督。統兵是其專責。請飭迅速由黔籌辦。儻勞崇光未能兼顧。請明降諭旨。交賈洪詔專辦。其武職提鎮等官。均歸調遣等語。覽其所奏。似不以勞崇光委楊盛宗兼護昭通鎮為然。殊屬非是。各省武職。凡總督駐紮省分。向由總督專政。賈洪詔豈不知之。勞崇光以尚阿布係部選人員。恐人地未宜。仍

委楊盛宗署理。亦係因公起見。賈洪詔何得因撤退尚阿布。遂以事多牽制。意抱不平。且黔省兵餉兩絀。匪徒充斥。勦辦尚無從著手。賈洪詔請令勞崇光由黔督兵赴滇。明知事不能行。故為此奏。不免意存嘗試。該撫甫膺疆寄。輒悻悻自好。動與總督齟齬。將何以副朝廷委任。賈洪詔著懷遵前旨。迅卽馳赴昭通駐紮。督同臬司劉嶽昭及地方文武將勦匪事宜。次第籌辦。毋得安坐成都。遷延觀望。於滇省軍務。僅憑地方官稟報。一奏塞責。且據該撫另片奏。參將梁士美會同夏家疇等分攻思普。破賊寨七八處。現在出示招徠。漢人以孤賊勢。已飭隨營藩司。儘力撥發經費。以資接濟。其出力各員。俟到滇後。詳查另奏等語。是賈洪詔亦以梁士美等所稟打仗情形。未可盡信。更當速赴滇境。俾將士有所稟承。而所撥餉需。庶可功歸實用。較之千餘里外。徒事遙制者。當有裨益。並著勞崇光將奉



旨交查之件迅速催辦完案。一俟奏結後卽遵前旨前赴昭通一帶與賈洪詔將進止機宜妥籌熟計。期於萬全無失。勞崇光久任封疆深於閱歷。如賈洪詔於用人調兵各事確有所見。該督仍當虛懷採納。以收集思廣益之效。斷不可豫存成見。貽誤事機。將此由五百里各諭令知之。○雲南巡撫賈洪詔奏軍務未平。請將本年鄉試展緩舉行。從之。○以正紅旗漢軍副都統增慶署右翼前鋒統領。

○命江甯將軍都興阿在紫禁城騎馬。○予貴州古州陣亡把總吳起恒祭葬世職加等。○己卯諭議政王軍機大臣等。富明阿奏水師擊退沿江竄賊。及揚軍進攻丹陽。連日獲勝。並遣散降眾情形一摺。另片奏請調臨淮馬隊來陽等語。偽英王叔負固丹陽。意在與金陵常州相為犄角。牽掣我軍。而句容金壇餘黨及常州西門擊敗悍賊五六千人。屯聚於斗城東南門外。並據降賊頭目等供將來

金陵常州如實不能支持。亦必麇集丹陽。併力出竄。是丹陽一城為該逆必爭之地。富明阿請令鮑超會兵攻取丹陽。策亦頗善。惟因侍堵各逆由皖南上竄江西。前經曾國藩奏請令鮑超一軍上援江西。已允其請。是鮑超之軍不獨不能助攻丹陽。並不能固守東壩。仍著富明阿。馮子材督飭詹啟綸等就現有兵力。實力攻拔。不准耽延。並不准任賊出竄。蹂躪他處。劉巷木橋等處降眾。富明阿等捐

廉貲。遣設局辦理。飭令該委員等實心經理。不得有名無實。臨淮馬隊無多。前經喬松年奏請遣撤更換。當諭以吉林等處官兵調出已多。不能再調。如須添兵。可於附近軍營酌商奏調。是臨淮現存馬隊不甚得力。已可概見。若調赴揚營。則該處更形空虛。現在楚豫賊匪圖犯皖疆。以援金陵。不可全無備虞。除富明阿本日所請。如有警信。南渡之軍尚須酌撤回揚。准其照辦外。陳國瑞現已銷假。前



據吳棠奏令其駐紮徐宿著僧格林沁酌量將該提督一軍調赴臨淮一帶扼要駐紮以備不虞如楚豫賊匪有竄近皖疆之信即可飛調陳國瑞一軍截剿並遵照疊次諭旨催提陝西所撥之常星阿等馬步各隊迅速赴豫一俟到營卽酌撥馬隊數百名赴皖交喬松年調遣以防賊匪下竄喬松年卽可騰出克蒙額所統馬隊全數赴揚歸富明阿調遣以資得力將此由六百里各諭令知之○又

諭總理各國事務衙門奏遵議明誼等陳奏分界事宜妥籌辦理一摺西路分界事宜曾經總理衙門將讓地安插及照舊游牧兩層奏飭明誼等相機辦理並將前給俄國住京公使照會內原有妥商照辦之語指出以備辯論今該國使臣及西悉畢爾覆文竟謂伊等前遞單內所指界址業經廷臣允許而疆臣不肯行且以酌量情形妥為商辦之語誣為明誼等擅添實屬狡賴已極明誼等現復

給與照會辯論議單內所指地名與原約不符之處不能不合同妥商且指出游牧安插兩層為應商議之處措詞甚屬周妥儻該國接到此次照會卽肯派員前來明誼等務當查照總理衙門本年議覆各摺詳為剖辯所有烏科二城及塔城所屬關礙情形或讓地安插或照舊游牧均可相機辦理妥為定議至伊犁有礙索倫四愛曼人等生計之處已由常清繪圖咨送明誼等查照矣議單所指灣入內向將常住卡倫包去多處實與條約相背萬難任其侵占仍應力與駁辯或令於卡倫外讓出若干方為妥協如該國不肯派員前來明誼等仍須給該西悉畢爾照會詰以總理衙門照會內明明有妥商字樣何得誣謂強行添出並告以照會所准者係指議單與條約相符之處非不符之處亦可一概允許該將軍所駁者係議單與條約不符之處若相符之處豈能一概阻止中國在京在

外大臣總以條約為主。毫無歧異。今俄國既不派員前來。則條約內原有西界商辦不限日期等語。止好暫緩商辦。上年該國分界大臣曾言中國兵不出卡。俄國兵亦不來等語。此時界址未分。中國暫停官兵出卡巡查。俄國兵隊不得前來卡外。更不得私壘鄂博。儻有此等情事。中國仍須派兵攔阻。如此明白曉諭。該國知要求萬不能遂。或竟自思轉圜。則此事即可相機辦結。該將軍大臣等身膺

重寄。總當通籌熟計。庶挽回得一分。即受一分之益。至官兵雖有暫停出卡之議。常清、明誼、明緒等仍當督飭所屬。並咨行科布多等城。不時嚴密偵探。如有俄國兵隊前來卡外。或私立鄂博。即當妥為攔阻。不得稍有疏懈。各城所屬人眾地方。應如何各就本境豫籌妥辦之處。著常清等知會各城大臣。迅速查明具奏。以備明誼等酌量情形。籌議辦理。免致臨時趕辦不及。明誼等片奏請派各城大

臣四員。以便換約後各赴本境。建立界牌等語。自係為先事籌備。俾伊等熟悉形勢。日後有所依據起見。除明誼、明緒業經特簡外。本日復派廣鳳、榮全、托克、奈三員。以專責成矣。明誼等可節咨行廣鳳等一體欽遵辦理。原摺著鈔給閱看。將由由六百里各諭令知之。○以鑲黃旗蒙古都統明慶署鑲藍旗蒙古都統。○增置江南駐防協領二員。佐領防禦各四員。經制筆帖式候補筆帖式各三員。

從署將軍富明阿等請也。○予江蘇丹陽陣亡儘先參將守備李慶圖祭葬。世職如副將例。○予四川興文殉難揀選知縣石文卓祭葬。世職加等。並予建祠。陣亡生員陳廷銓等賞卹加等。一併附祀。○庚辰諭議政王軍機大臣等。前據熙麟奏稱張集馨任意截留甘餉。當經諭令張集馨實力籌解。不得意存膜視。茲據張集馨奏動支山東協甘銀兩。並供給赴甘官軍餉項數目。及盤屋營中情形各

摺片。甘省軍務正當喫緊之時。所有援勦甘肅之雷正綰、陶茂林、曹克忠等軍人數眾多。應需兵餉。前經疊諭張集馨設法接濟。今張集馨於山東、河南等省解甘餉銀。就近截留提用。分撥各營。移緩就急。原無不可。第照麟在慶陽軍營。兵勇亦有數千。待餉孔亟。前項協甘餉銀。既經該署撫截留分撥各營。分毫未能解到。勢將懸釜待炊。立形譁潰。除協甘餉銀業經截留供給甘軍外。所有照麟慶陽軍營餉需。仍著劉蓉、張集馨實力設法籌解接濟。不准意存膜視。稍涉推諉。所有此次張集馨摺內陳明動支山東等省協甘餉銀數目。著卽咨明照麟。劉蓉按款詳查。以備報銷。嗣後各省續解甘省餉銀。劉蓉、張集馨惟當迅速轉解慶陽糧臺。不得再行截留。其雷正綰、陶茂林等援甘各營軍火餉需。並著劉蓉、張集馨仍由陝省另行籌款。源源接濟。亦不得稍存膜視。照麟於雷正綰等營餉需亦當

設法兼顧。毋任缺乏。多隆阿傷病尚未全愈。務當善為調理。以冀漸就痊可。現在髮捻各逆。麇集楚豫邊界。意圖東竄。該處防勦萬緊。前諭多隆阿等令余福、象姜、王順帶兵四千名。由陝南赴鄂。交官文調遣。蕭河、清孟、宗福等酌帶四千。人由雒南一帶探明賊蹤。追擊歸僧格林沁調遣。著多隆阿、穆圖善仍遵前旨。飭令該總兵等迅速前往。毋稍遷延。將此由六百里諭知。多隆阿、穆圖善、雷正綰、照麟

軍機處

二十

劉蓉並傳諭張集馨知之。以鑲黃旗滿洲副都統克興阿署正紅旗漢軍副都統。

大清穆宗繼天開運受中居正保大定功聖智  
誠孝信敏恭寬毅皇帝實錄卷之九十九

實錄卷之九十九

三

大清穆宗繼天開運受中居正保大定功聖智  
誠孝信敏恭寬毅皇帝實錄卷之一百

秋

同治三年甲子四月辛巳諭內閣左宗棠奏

覈減紹興府屬浮收錢糧一摺浙東各屬錢糧以紹興徵數為最多而浮收之弊亦最甚經左宗棠查明覈減除正耗仍照常徵解外共減去錢二十二萬有奇米三百六十餘石民困諒可稍蘇即著照所議辦理嗣後並著為定章永遠遵行其地方官吏尤當潔已奉公剔除積習儻敢陽奉陰違添設名目格外需索及大戶不遵定章完納者即著該督撫覈實查叅懲辦以重國賦而恤民瘼○諭議

政王軍機大臣等。玉明等奏請將防緝不力之旗民地方官。分別革職摘頂勒緝一摺。鳳凰城盜首王幅薜。勾結楊汶滿等。聚眾至四五十名之多。在藍河峪一帶。陸續焚搶。致傷人命六名。口殃及七十餘家。該管界官防禦安邦阿等。未獲一犯。署通判吳富春並未勘報會緝。又鳳凰城所屬之龍王廟地方。有匪徒蔡玉崙與回匪馬幅薜爭霸市集。互相械鬪。經官兵查拏追緝。竟被拒傷五名。該界官

並未督兵追緝。城守尉奕榕等督兵堵緝。亦被匪槍傷兵勇五名。該匪乘隙逃逸。興京接界之樺樹坡子地方。復被匪徒焚搶。該管界官及通判等於委員勘查後。始行呈報。又未獲犯種種玩誤情形。實屬廢弛已極。盛京為根本重地。若不力加整頓。將來盜風日熾。匪徒益無顧忌。流弊伊于胡底。著玉明等即嚴督帶兵之佐領柏林。並鳳凰城地方文武各員。前往邊外跟蹤追緝。務將蔡玉崙等首夥

各犯悉數殲擒。毋任一名漏網。回匪馬幅薜盜犯王幅薜等。並著嚴督該地方官。迅速按名弋獲。務當盡絕根株。毋留餘孽。至此二案。係上年十二月及本年正月間事。玉明等於三月三十日。始將緝捕勘報延誤之該管各官。具摺參奏。殊屬遲延。嗣後該將軍等於地方吏治。務當振刷精神。實力講求。儻再仍前積習。日就因循。自問當得何罪。前因金州副都統希拉布奏參協領訥欽布廢弛營伍摺

內有訥欽布稟稱兵丁索取奠儀等語。恐希拉布操守平常。諭令玉明等查奏。經玉明等於同治元年十一月間。奏請將希拉布撤任。調省查辦。本年三月。復據奏請添派寶珣會訊此案。日久未經訊結。似此疲玩。亦屬不成事體。著玉明等速將此案訊明奏結。毋再延閣。致干咎戾。將此各諭令知之。○又諭左宗棠奏官軍截勦竄賊獲勝。並規取湖郡情形一摺。所奏蘇皖餘逆李侍賢與杭餘漏刃之

陳炳沅汪海洋等賊竄至皖南圖擾江西與節次曾國藩沈葆楨所奏大略相同而左宗棠此奏稱於昌化小川深渡截勦疊有殲戮餘賊竄向小川裏山及由深渡悉竄屯溪當是皖南迤東一帶情形曾國藩前奏皖南賊勢甚重唐義訓毛有銘兩軍均有挫失祁黟休婺岌岌堪虞當是皖南迤西各境逆氛更肆左宗棠所派王開琳等軍由馬金街出嶺以截賊於婺源之南德興之東又因汪逆折

竄浙境遂安一帶勢不能不回軍合隊迎頭截擊其所續派劉清亮之軍赴馬金街若能趕到賊前速與諸軍併力截勦將康逆此股就地殲除則由皖竄江之賊勢又稍輕即飭王開琳王德榜等各軍速赴江西會同劉典之軍助勦江境之賊其黃少春劉清亮兩軍自應留防遂安等境俟湖賊勦平賊蹤稍定乃可移動惟皖南迤東之廣德甯國以至績溪一路空虛不但蘇境餘賊全由此路竄走

卽湖州之賊以長興安吉為出路亦可由此竄徽以入江境毛有銘等近日軍威是否重整堪資截擊丹陽尚未卽克鮑超一軍赴援江西曾否啟行著曾國藩將皖南徽甯一路之防加意布置嚴督諸軍節節截勦但能勦滅一賊卽少貽江境一賊之患湖州官軍漸次合圍著左宗棠督飭高連陞等軍迅圖攻克浙省惟餘此城及安長兩邑未復並著速行掃蕩全清浙境李鴻章派赴助攻湖郡各

軍前奏破賊錢淩楊淩著卽飭令乘勝會合浙軍併力攻擣以資得力江西南豐一城曾否攻克著沈葆楨嚴飭席寶田等各軍實力進攻所派精捷等營東馳前赴德興一帶攔截皖南續竄賊股並著飭令會合皖浙諸軍前截後追共收夾擊之效其劉典王文瑞兩軍並遵前旨催提星速來江以憑調遣該撫前奏又有飭令席寶田添招二千五百人此項新軍係由何處召募現在曾否招齊作何

布置並由江甯聞之賊。有無續往。兵力能否支持。均著隨時馳奏。將此由六百里各諭令知之。○又諭。昨據惲世臨奏。楚師收復古州。廬城克復。尤洞等處賊巢。惟貴州總兵金太文尚無成軍消息。粵軍亦尚未入黔。前途無迎勦之兵。其勢必將不及。各等語。當經諭令勞崇光。張亮基。迅催金太文赴防。勦匪。茲據勞崇光等奏。黎平髮逆。經官軍擊敗。後竄至古州。平江地方。焚掠洋洞。尤洞一帶。亟須迅

圖兜勦。免與苗匪土匪勾結等語。似係尚未知楚軍收復古州之信。著勞崇光。張亮基。迅飭總兵金太文。馳赴防所。會同湖南粵西兩省援軍。嚴密勦洗。分路堵遏。將該逆逼入古境。為一鼓聚殲之計。毋令匪蹤旁竄。致官軍著著落後。徒事尾追。如金太文遲延不進。即著勞崇光等。嚴叅懲辦。昨據惲世臨奏。楊廷桂已抵荔波。飛飭周洪印。戈鐔。彭炳武等。探蹤前進。與廣西之軍。聯絡會合。著勞崇光。張

亮基。惲世臨。即檄令周洪印一軍。仍於黎平古州一帶。會合貴州派出之梁成珍等軍。聯絡。按勦。迅殄逆氛。張凱嵩派援黔省之副將楊廷桂一軍。據奏。業已師次羅城。本可直趨黎平。惟髮逆現竄古州。周洪印楚軍。已由黎平前進。若粵師亦由此道進勦。則大兵皆萃於東路。西路未免空虛。該逆伺隙蹈瑕。銳意西竄。恐由獨山。荔波。逸入定番。廣順一帶。即可窺伺省城。且該處毗連思恩。河池等處。粵

省亦有防不勝防之患。著勞崇光。張亮基。張凱嵩。檄飭楊廷桂所部。由思恩一路赴黔。在獨山。荔波一帶。扼要駐紮。與黔楚各軍。兩面夾攻。迅殲醜類。興義克復。賊首張喙。三率死黨。竄僻新城。著勞崇光。張亮基。飭令官軍乘勝跟追。殲除首惡。務絕根株。將此由六百里各諭令知之。○雲貴總督勞崇光等奏。貴州軍務未平。請將本年鄉試展緩舉行。從之。○以故圖謝圖汗頭等台吉。那木濟勒多爾濟

子烏爾津扎布襲職。○以陝西攻克光泰廟逆巢出力。賞防禦祥格等花翎千總趙汝璧等藍翎。餘加銜升敘有差。○以克復貴州興義縣城。予署知縣陳聘儒以同知直隸州知州用。並賞花翎。舉人胡爾昌等藍翎。餘加銜升敘有差。○以緝匪不力。革奉天防禦廣福知縣吳富春職。○予貴州古州陣亡武進士顧本立賞卹加等。○壬午。諭內閣。貴州布政使龔自閔。湖北糧儲道吳煒。福建延建邵道

夏家泰。興泉永道曾憲德。江西九江府知府景惠。升用道四川甯遠府知府李祐。貴州安順府知府沈丙榮。均著開缺送部引見。○引見刑部員外郎張樹葵。得旨。著發往浙江交左宗棠差遣委用。○癸未。以貴州按察使裕麟為布政使。糧儲道承齡為按察使。○甲申。以神靈助順。頒江蘇常州府關帝廟扁額。曰蘭陵永佑。○諭內閣。李鴻章奏官軍攻克常州府城。生擒首逆。全股撲滅。

一摺。江蘇常州踞逆陳坤書等擁眾死守。經李鴻章親督各軍。於四月初三等日。乘雨搭造浮橋。四面環擊。初六日。戈登。劉銘傳等將南門等處城垣轟塌。屋瓦皆飛。賊甚夥。各軍同時奮勇登城。該逆率悍黨數千。拚死抗拒。劉銘傳等揮兵直前。將陳逆大股。逼入街心。節節追剿。賊屍枕藉。追至護逆住處。官軍圍之數重。殺傷無算。龔生陽等衝入賊隊。生擒偽護王陳坤書。偽佐王黃和。錦餘。眾奔潰。

棄械投降者。六七萬人。其時偽費天將一股。復由小南門蜂擁來撲。周壽昌等合力夾擊。該逆亡命亂走。墮落城下數百人。經周盛傳等截殺淨盡。其潛伏城內悍賊數百人。悉數殲戮。並將費逆擒獲。自未至酉。將逆黨全股擒殺。無得脫者。當將常州府城克復。勦辦甚屬得手。此次李鴻章親督各軍。痛殲巨股。克拔堅城。實屬謀勇兼全。深堪嘉尚。著加恩賞給騎都尉世職。道員李鶴章遇缺提奏。提督



劉銘傳記名提督郭松林王永勝儘先提奏提督劉士奇俱能親冒矢石奮勇爭先均著賞穿黃馬褂以旌勞勩遇缺提奏提督黃翼升著交部從優議敘權授江蘇省總兵戈登帶隊助勦疊著戰功此次協同攻克常州尤為出力著賞加提督銜並著照李鴻章所請頒給旗幟功牌以示優異仍俟將所部常勝軍部署妥協再由李鴻章奏請嘉獎○諭議政王軍機大臣等李鴻章奏克復常州府城

及籌布一切各摺片馮子材魁玉奏克復丹陽縣城一摺賊首陳坤書聚黨負隅與金陵賊窟為犄角李鴻章督軍苦戰克復郡城克將賊首生擒就戮全股殄滅無一漏網江南大局得以漸定所辦至為周妥現在丹陽亦已克復雖據馮子材等奏稱斬擒不少恐竄出之賊尚多且未將賊竄往何路明晰聲敘丹陽城中悍賊甚眾若任其奔突又將貽患他處現在賊股竄往皖南江西等處者其勢

已重尤當防其陸續竄往合併著李鴻章即飭劉銘傳等軍迎探賊蹤攔頭截擊並著富明阿馮子材等嚴飭揚鎮各軍奮力追勦丹陽竄賊與劉銘傳等軍前後夾擊務將餘股全數殄除毋得以克復丹城遂置竄賊於不顧曾國藩調鮑超一軍赴援江西而令李鴻章酌撥勁旅接防東壩東壩為賊竄要道該撫以丹陽未克先令提督周盛波等八營由溧陽進紮南渡與東壩聯絡截勦此時丹陽已克北路防鬆是否即可調派各軍進紮東壩二溧一帶以便騰出鮑超一軍及早援江抑將丹陽出竄之賊勦滅淨盡再行調派著曾國藩李鴻章會商妥籌相機辦理戈登帶隊協勦常州之賊甚為出力該撫所奏前項賞銀一萬兩戈登不肯收領擬仍作遣散洋弁經費固係該洋將為要好起見惟洋人素性嗜利究竟是否出於本心尚不可知現在常州攻克該洋人不言進攻金陵竟肯先行

遣散免將來許多枝節實屬不可失之機會該撫自應乘勢利導妥為遣散如戈登將所部布置妥協洋弁均皆回國則是戈登真心要好始終如一僅止頒給旗幟功牌不獨無以酬其勞且恐無以饜其欲即著李鴻章飭令丁日昌李恆嵩等與戈登妥為辦理一俟辦有就緒即將如何再行嘉獎戈登之處迅速奏聞另片奏遵撥輪船經費劃充軍餉等語此項輪船經費據赫德所稱現時所存止

能起解十五萬兩左右餘款須俟該稅務司回滬查覈辦理即著李鴻章飭將現存銀款迅即繳解曾國藩軍營仍令轉催閩粵各關陸續撥解及將江海關欠撥之款飭令關道設法分起湊解並著曾國藩隨時提催以資散放而勵軍心正在寄諭間富明阿奏到克復丹陽一摺與馮子材等奏大略相同摺內所奏偽英王叔身受重傷先期逃往常州等語未知獲賊所供是否確實仍著富明阿馮

子材查明首逆如尚在逃務須擒戮毋任漏網降眾人等尤須設法妥為安插遣散以絕後患毋稍大意將此由六百里各諭令知之○以故朝鮮國王李昇世子熙襲爵命戶部左侍郎阜保為正使正白旗漢軍副都統文謙為副使往封○以委散秩大臣文壽為鑲藍旗蒙古副都統乾清門侍衛德長署鑲紅旗蒙古副都統○以克復江蘇常州府城賞提督張樹珊總兵官陳忠德易用剛鄭國魁

一品封典總兵官徐得勝畢乃爾副將朱聯陟韓殿甲彭連陟鄭龍彪參將劉朝幹覃洪陟羅榮光駱金榮陶位中朱寶元遊擊曾明魁李長樂舒義志鄧明遠鄭國榜宋雲龍都司劉玉龍巴圖魯名號知縣史書青以知州用並賞花翎守備廖德旺等藍翎餘加銜升敘開復有差○以克復江蘇丹陽縣城賞提督詹啟綸白玉四喜搬指一箇火鏢一件大荷包一對小荷包兩箇侍衛訥依楞阿副將

楊青山參將霍名陞李耀光遊擊鄭啟貴葉廣全杜日新都司李福興巴圖魯名號餘加銜升敘有差予陣亡千總許惠祭葬世職如都司例○予故都察院右副都御史前江西學政巡撫張芾入祀名宦祠從巡撫沈葆楨請也○豁免江蘇武進陽湖二縣三年額賦○乙酉諭內閣前因沈葆楨奏道員王德榜係由浙江候補道續保儘先補用奉旨允准吏部以候選道不准指省議駁恐係錯誤當經降旨將王德榜仍以道員留於浙江儘先補用並令吏部將議駁錯誤之處查明具奏茲據奏稱王德榜一員係因當月司員鈔錄諭旨時誤作候選道管股司員亦未將前次留浙補用之案查出率照候選人員辦理請將該司員等分別懲處等語所有傳鈔錯誤之當月司員未能校對詳明實屬疏忽著查取職名交都察院嚴加議處管股司員於傳鈔錯誤之件未能詳查更正亦屬草率著一

併交都察院議處另片奏王德榜先因恒怯無能經沈葆楨奏參革職嗣因攻克湯溪等城出力經左宗棠保奏開復革職留於浙江補用按照章程應令補繳加倍捐復等項銀兩送部引見承辦司員遲至一年之久未經奏奏並請將該司員議處等語王德榜前於浙江克復湯溪等城江西攻克陶家渡賊壘等案內疊次出力且據沈葆楨奏稱該員冒暑遙征埽蕩江境厥功甚偉所有該員應繳捐復銀兩即著加恩寬免並免其送部引見吏部辦理遲延之司員著查取職名交都察院議處○諭議政王軍機大臣等前據賈洪詔奏稱徐之銘徇私濫保請將所保各員撤銷當經降旨允准嗣據勞崇光奏稱滇省近日情形並請將出力之馬如龍岑毓英分別賞加提督布政使銜一併賞加勇號當以該二員均係徐之銘保奏應在撤銷之列未便徑照勞崇光所請致與前旨兩歧諭令勞崇

光賈洪詔速將攻克楚雄府及景東廳縣出力各員確切具奏再降諭旨並令賈洪詔將前旨妥為收存暫緩宣示本日據趙光奏滇省現在情形一摺據稱馬如龍岑毓英保護省城厥功甚偉馬如龍並令馬德新同岑毓英往攻杜汶秀收復楚雄府景東廳及各州縣地方各回眾用言煽惑怵以危詞勸令與杜逆聯和共拒官軍馬如龍力排邪論決計討賊惟勢成孤立非優加獎勵假以事權恐

呼應不靈難以濟事並將滇省紳耆等公函一併呈覽等語馬如龍深明大義力杜邪說以回攻回為同教所忌勢處孤危若不亟與鼓勵恐其懷疑自畏銳氣阻消眾心因而解體於滇省全局關係非輕著勞崇光賈洪詔迅速會商如馬如龍立志不欺眾共信任即應權宜辦理不可錯失機會馬如龍以前應得獎敘著勞崇光賈洪詔迅即會銜奏請不必俟楚雄等處出力各員查明後始行彙請

給獎以安人心而資鼓舞岑毓英帶兵出省屢克城池亦宜先行給獎以期呼應較靈並著勞崇光等一併先行請獎前旨仍著賈洪詔妥為收存暫緩宣示趙光原摺並滇省紳士等公信一件均著鈔給勞崇光賈洪詔閱看將此由六百里各諭令知之○以本年鄉試考試應開列試差人員於保和殿○改河南會亭營參將為永城營參將並中軍守備移劉永城以甯陵城守汛隸左營睢州城守

汛隸右營各派駐把總一員移甯陵把總於胡家莊睢州把總於會亭驛改設馬頭寺塢牆集千總各一員白馬驛黃塚馬牧集十字河外委各一員鄴縣城額外外委一員從巡撫張之萬請也○丙戌諭內閣國家廣開言路整飭官常惟期內外臣工奉公守法屏除私見若身為大員則平日束身立行益當謹飭自愛不授人以指摘之端至被參人員尤宜知止謫自修之義痛自愧厲豈可意圖報

復許人陰私。本年三月間。通政使司通政使王拯曾以僉壬濫列。請將侍郎崇綸恆祺董恂。薛煥。安徽巡撫喬松年。內閣侍讀學士王維珍。量加裁抑。除摺內所稱喬松年一節。業經寄諭曾國藩察看外。其所參崇綸恆祺王維珍等事。無指證。至薛煥巡撫任內被參各款。前此業經曾國藩查明覆奏。尚無實據。惟辦理通商事務。頗為熟悉。而此次王拯摺內。亦未能指實款蹟。是以將摺留中。暫緩查辦。

乃本月初九日。薛煥奏參王拯吸食鴉片煙。請加懲處等語。昨命議政王軍機大臣傳旨詢問王拯。據王拯呈稱。從前因係治疾。曾經吸食有癮。現在疾不復作。舊染亦即痛加屏絕。惟向來持躬弗謹。致被糾參。請旨卽予懲辦等語。職官吸食鴉片。例禁綦嚴。王拯從前雖因治病沾染。究屬有干例禁。本應照變通新章。官員吸食者。卽予罷斥。姑念王拯一經奉旨傳詢。卽據實直陳。尚無欺飾。且係原參

薛煥等之員。若竟予嚴懲。恐因事糾彈者。聞而緘口。言路將因此而塞。王拯著從寬實降三級調用。並毋庸在軍機章京上行走。以示懲儆。薛煥被人參劾。不能捫心自反。輒將王拯吸食鴉片。列入彈章。顯係意存報復。有為而為。非因公論。列者可比。此風斷不可長。薛煥著實降五級調用。以為逞私攻訐者戒。並著仍在總理各國事務衙門行走。以觀後效。該二員當知朝廷格外之恩。感激奮勉。力贖

前愆。現在大小臣工。沾染鴉片惡習者。恐尚不止王拯一人。亟應痛自改悔。前除錮習。儻仍前苟且偷安。一經發覺。定卽照章嚴懲。斷難再邀寬典。至許人陰私。易開攻擊之風。於政體大有關係。如此後再有犯者。亦必從嚴懲辦。決不姑容。王拯摺內所參董恂在順天府尹任內。向其所屬月索薪米。遂為規例等語。著萬青藜。卞寶第查明據實覆奏。毋許徇隱。又諭前因錦州大凌河收羣翼領烏

雲泰侵蝕擅權降旨發往新疆不准援免茲據刑部奏稱業經錦州副都統將烏雲泰解部轉發惟據兵部咨覆以西道梗阻礙難轉發烏雲泰一犯應否遵旨發往新疆抑或照奏定章程暫行改發黑龍江之處請旨遵行等語烏雲泰著仍發往新疆由該部探明道路迅即起解○又諭前因降調御史常凱奏參直隸口北道授意署懷來縣知縣錢葆延延閣不報丁憂旋又揭參當經降旨交劉長

佑查明錢葆延如何匿喪之處嚴行參奏茲據劉長佑奏稱查據已革前署直隸懷來縣知縣錢葆延稟稱同治二年三月間曾經伊叔指定其胞兄前任湖南學政錢寶廉為副該員因見卹鈔湖南巡撫譚世臨奏報湖南學政錢寶廉之父錢塤病故誤作錢鹽未敢遽憑呈報迨至十二月十三日接到訃信並知伊叔並未過繼錢寶廉為嗣始行呈報等語此案既經譚世臨摺內聲明錢塤病故錢

寶廉係屬親子例應丁憂雖其父名字卹鈔傳寫偶誤其為錢寶廉並未過繼已無疑義該革員何至因一字之訛即涉遲疑更難保非有心匿喪枝梧掩飾希圖懲棧仍著劉長佑將該革員調省查訊如果屬實即行嚴參懲辦至振麟是否授意該革員匿報丁憂及至聞傳反為揭參等款並著歸案究辦○諭議政王軍機大臣等僧格林沁奏馬隊追勦髮捻疊獲勝仗現抵隨州調楚陝步隊跟追

並飭豫軍躡勦後股髮逆官文奏楚北兵力不敷請催調秦軍來鄂另片奏髮捻合股闖入棗陽等處水陸各軍先後獲勝並現在布置各情形覽奏均悉髮逆梁姓股匪七八千人張總愚匪股萬人及陳得才陳大喜等股疊經僧格林沁指揮馬步各軍痛勦斃賊甚多張總愚已身帶重傷餘匪越嶺逃遁僧格林沁以棗隨一帶地勢狹窄馬隊難以施展請飛調蕭河清孟宗福等所帶之四千人迅

速赴楚此項步隊屢經飭令多隆阿等撥赴豫省軍營交僧格林沁調遣何以至今尚未起程實屬不知緩急著多隆阿、穆圖善、劉蓉迅卽懍遵前旨將馬步各隊照數調派飭蕭河清等改赴楚省交官文調遣官文俟此項步隊到後飭令與楊朝林之軍追擊各股逆匪以資得力其常星阿等馬隊仍歸僧格林沁調度儻該逆被勒回竄一至平闊地方該親王當扼要豫為布置迎頭截擊為一鼓聚

殲之計金陵已成孤注旦夕可克該逆眾如向英霍一帶奔竄曾國藩、喬松年自當遵奉前旨嚴密防剿誠恐皖南軍事方殷皖北兵力不厚急切難以分撥僧格林沁仍當妥籌截剿並催調陳國瑞一軍駐紮臨淮一帶以備緩急之用總不可令該匪東趨得遂其回救金陵之計張曜此次追斬各逆亦頗奮勇張之萬務當飭令該總兵實力搜捕不得恃有僧格林沁大兵稍耽安逸豫省無賊地方

當嚴飭文武各員督同紳團協力守禦毋令敗匪再行闖入張總愚近往何處蘇克金由唐縣等處追剿之匪係屬何股曾否得手著僧格林沁查明馳奏髮捻各逆由秦入隨經楊朝林督隊追擊連獲大勝該逆由鍾祥縣屬之洋梓地方分股撲城經梁洪勝等水陸堵截該匪竄曰口鎮及馬梁內湖等處亦經張啟基等設伏敗之現在隨秦鍾京賊氛偏地武漢戒嚴官文現飭石清吉移紮楊店成

大吉馬步十二營移紮溝口分紮涇口楊朝林俟後路稍定由鍾祥水路下馳會合江長貴節節進攻又將舒保馬隊分布於孝感之楊店等處先顧省垣兼扼東趨皖省之路孝感黃陂水路各分撥破船扼防布置已極周密著卽督飭派出各軍認真剿辦並卽督帶親兵沂流而上先保襄河水面俟安陸、京天等處掃蕩卽由陸路往雲孝、德安一路督剿其慎固封守以紓朝廷南顧之憂省城防守

事宜著嚴樹森妥籌辦理毋稍大意。所調之姜玉順等楚勇四千名著多隆阿、穆圖善迅即催令起程。前撥常星阿等馬隊迅催前赴僧格林沁軍營。到營後應如何分撥湖北交官文調遣，即由僧格林沁妥籌辦理。李雲麟所勦蔡逆蜀河一股曾否殄滅，近日軍情何以未據奏報。陝南藍曹餘孽如犯興安，或圖回蜀，李雲麟當認真勦洗，不得觀望粉飾，致誤事機。劉蓉曾否出省，商雒潼關一帶防勦

情形若何，多隆阿病勢曾否輕減，均著劉蓉即行具奏，以慰馳廑。將此由六百里各諭令知之。○又諭雷正綰奏官軍攻毀平涼鎮原兩處賊巢，擊退援賊，進佔平涼一摺。平涼之四十里鋪及鎮原屬之新城兩處賊巢均被官軍平毀，悍賊木仲沅、訥三亦俱斬於陣。賊膽已寒，亟應乘匪眾懼怯之際，進佔平涼郡城。陶茂林留勇駐紮華亭，以顧後路。自率八營前來會勦，即著雷正綰督同陶茂林奇正

兼施，迅將平涼郡城剋期攻拔。毋任久踞甯夏漢城被陷，未復滿城被圍已久。自應亟圖援救。且官軍由靈甯進取，則東北各匪皆有所顧忌，不敢援應平涼。而雷正綰之師勦辦更易得手。前因訥欽所帶兵勇未經戰陣，恐難得加特派都興阿馳赴定邊接統其眾。該將軍業已由京起程，而所部馬步各軍尚恐不敷調撥。著多隆阿、穆圖善恪遵疊次諭旨，將前此留省之馬隊五百名迅速撥赴定邊

交都興阿統帶，並著劉蓉酌撥楚勇數千前赴都興阿軍營聽候調遣，以厚兵力。熙麟現派遊擊羅元勳管帶楚勇一千名與趙廷烺力圖援勦。著即嚴飭該遊擊認真整頓，俾成勁旅。雷正綰如已攻拔平涼，即移得勝之師迅赴甯靈一帶與都興阿兩路進攻。庶各路逆氛不難漸次撲滅。將此由六百里各諭令知之。○以翰林院侍讀學士延煦為詹事府詹事。○以甘肅平涼鎮原攻克賊巢提督雷



正綰得旨嘉獎賞參將雷恆巴圖魯名號總兵官魏添應等加銜升敘有差予陣亡都司石錦玉等十一員祭葬世職加等○予湖北隨州陣亡妾防禦西林佐領三丕勒祭葬世職加等○丁亥

孝端文皇后忌辰遣官祭

昭陵○諭議政王軍機大臣等馮子材等奏續陳克復丹陽擒斬首逆追勦竄匪一摺丹城既克首逆亦除金陵自成孤立之勢不難合

力攻克惟竄匪必須搜捕淨盡殘黎必須加意安輯該提督等卽飭在事文武妥為籌辦以靖地方馮子材現擬撥隊移防金壇以揚軍專守丹陽惟江北空虛楚豫賊匪仍思東竄皖境以救金陵前據李鴻章奏俟丹陽克復後卽可派撥所部進紮東壩二漂一帶現在常州丹陽均已克復李鴻章所部兵力有餘前所派由溧陽進紮南渡之周盛波等軍及助攻丹陽之劉銘傳郭松林等軍除派赴

金陵皖南等處助勦外其餘卽著酌量調赴東壩二漂駐紮以固江蘇門戶鮑超一軍卽可騰出趕赴江西丹陽一城卽著馮子材魁玉派兵就近駐守其富明阿所統江北之軍卽可調回揚防以備截勦楚豫東竄之賊以上布置情形是否妥善著富明阿李鴻章馮子材魁玉通籌大局妥為辦理一面迅速奏聞將此由六百里各諭令知之○又諭穆圖善奏遣軍迎勦南山竄匪一摺覽所奏情形

於疊次寄諭聲覆殊未明晰前因陝省回匪肅清楚豫軍務緊急疊諭多隆阿等調派姜玉順等帶勇四千赴鄂蕭河清等帶勇四千並常星阿等督帶馬隊前赴豫省軍營歸僧格林沁調遣多隆阿傷病未痊穆圖善署理關防自應將遵旨調派情形呈速馳奏本日據穆圖善奏稱屢奉寄諭深以陝省餘孽未清仰勞聖慮現派姜玉順統帶十營由鄠縣滂峪口進勦曹背時股匪等語而於屢次催

調馳赴鄂豫馬步各軍諭旨竟無一字提及實屬不知緩急現在陝南髮逆句合捻股竄擾鄂境隨秦鍾京賊氛徧地其滋擾陝省者僅曹藍兩逆耳藍二順一股前已責成李雲麟趕緊撲滅至曹背時一股劉蓉責無旁貸且部勇甚多自應嚴飭蕭慶高等認真勦洗俾姜玉順一軍剋期赴楚方是正辦乃於派兵援鄂一事劉蓉等竟漠不關心殊不可解該撫身受厚恩務當力顧大局以副委任卽

著督飭各軍迅將盤踞兩郎一帶之曹逆悉數殲除毋再遷延干咎李雲麟亦當懷遵前旨將蜀河等處逆股殄滅淨盡昨據僧格林沁奏俟蕭河清等步隊到楚始可將馬隊撤至豫境以防北路是楚省需兵甚為緊要著穆圖善商同劉蓉速飭姜玉順蕭河清等督帶步隊遵照昨日寄諭趕緊赴楚歸官文調遣常星阿督帶馬隊速赴僧格林沁軍營以資攻剿東治兩營據穆圖善奏現派總兵陳

天佑接統其軍並咨商德興阿將所部馬隊兩起交副都統西蒙克西克統帶馳赴訥欽軍營助剿等語此項馬隊是否係多隆阿軍營留防西安之兵抑係德興阿部曲兩起共幾百名聲敘亦未明晰均著迅速奏聞訥欽所部現歸都興阿統帶將來陳天佑西蒙克西克到定邊後卽歸都興阿相機調度都興阿接奉此旨卽著星馳前進以資統攝多隆阿所統馬隊一千五百名前已照數分撥僧

格林沁及定邊軍營此外步隊除撥給姜玉順蕭河清等八千名帶赴鄂省外現存陝省者尚有若干如果調撥各省後所存無多不敷防剿卽著劉蓉將所部兵勇勻撥若干將陝省邊防妥為布置仍一面迅速奏聞將此由六百里各諭令知之○以候補侍郎宜振為工部右侍郎兼管錢法堂事○以大理寺卿賀壽慈署都察院左副都御史○以江蘇克復丹陽縣城出力提督馮子材得旨嘉獎

與將軍富明阿均賞黃馬褂副都統魁玉巴圖魯名號勇目黃先知杜玉成三品頂帶花翎○予杭州駐防殉難協領隆鏘等暨兵丁婦女一百九十九員名口分別旌卹如例○戊子諭議政王軍機大臣等劉蓉奏追勦曹逆○破寨壘一摺曹逆時股匪竄踞大莊坪等處經蕭慶高黃鼎等督軍先後攻克其文公梁八里坪曹逆老巢亦經黃鼎等約期進攻將各賊營焚毀連蹋賊營六座並將曹逆矛傷勦辦尚屬得手惟曹逆雖經受傷仍行逃竄非跟蹤追勦迅速殲擒恐致復形滋蔓劉蓉務宜督飭將士乘該匪窮蹙之時盡力窮追毋任漏網現在曹逆敗殘之餘劉蓉所部兵勇已數勦辦鄂省隨棗鍾京一帶賊氛徧地前經諭令穆圖善劉蓉將派赴豫省之蕭河清孟宗福等所帶楚勇四千人改派赴楚與原派赴楚之姜玉順等所帶四千人一併前往交官文調遣其常星阿馬隊仍派赴

僧格林沁軍營著卽懷遵前旨迅飭蕭河清姜玉順常星阿等軍剋期起程毋稍延緩鄂省賊勢甚重專盼前項派撥助勦之兵穆圖善等何以置若罔聞於奉到諭旨後尚未見有覆奏儻因調派遲延緩不及事致令楚疆有失必惟穆圖善劉蓉是問多隆阿病勢若何劉蓉何日出省卽遵前旨迅速奏聞將此由六百里各諭令知之○山東巡撫閻敬銘奏現赴兗沂曹一帶察看地方情形得旨東省吏治民風之壞幾有積重難返之勢該撫旣出省察看情形務須實力整頓卻又不可操切從事去其太甚隨時徐圖補救冀收月異日新之效方為不負委任○以陝西攻克文公梁等處賊壘予知縣黃鼎以同知直隸州知州卅與守備劉國富均賞花翎訓導張玉文等藍翎餘升敘有差○蠲緩江蘇上元江甯句容溧水高淳江浦六合儀徵江都甘泉沛泰興靖江十三縣暨各屯衛被擾地方

上年額賦有差○己丑諭內閣曾國藩奏提督李世忠遣散部眾交出城卡呈請開缺回籍一摺江南提督李世忠自任事以來屢著戰功上年春間髮逆沿江上竄該提督力保滁州全椒天長六合等城逆不得逞官軍乘勝克復浦口江浦九洑洲江北得以肅清迨苗逆復叛該提督慷慨誓師親統所部赴淮助平巨憝此時江淮軍務大定復能將所部弁勇發貲遣散並願廣散貲財捐助軍餉實

屬深明大義誠悃可嘉該提督現因傷病舉發親柩未葬懇請開缺回籍若不允其所請無以恤勤勞而慰孝思李世忠著准其開缺回籍○諭議政王軍機大臣等曾國藩奏徽軍挫失並克復金壇暨辦理竭蹶情形懇請皖鄂分任軍餉各摺片浙省賊股上犯徽郡毛有銘等軍既經挫折歛休境內無地非賊是該處軍情正當喫緊之時皖南兵力尚單前諭左宗棠籌撥蔣益澧各軍馳援徽境著

卽酌量情形多撥勁旅前往與該處防軍聯絡夾攻務將該逆速行剿洗並飭令黃少春劉清亮兩軍嚴扼遂安要隘以防湖賊續竄徽境飭令王開琳等截賊婺源德興之交毋令南竄嚴州西竄饒郡曾國藩慮鮑超馳援江西不能速到現派周寬世七營金國琛九營先從饒州一路往援著卽飭迅速前往力籌堵剿並著沈葆楨飭令在防將士與周寬世等軍嚴密布置互相援應此時竄江之賊

糧食不繼號令不一多有紛紛逃散者劉典王文瑞各軍陸續到後聲勢更壯諒已足敷勦辦髮捻竄近隨棗黃德曾國藩已派彭玉麟統率師船上赴九江防剿北岸鄂皖江面兼顧南岸鄱湖都昌一帶江路當可無虞惟皖北陸路僅賴六廬巢等處置有防兵其餘潛太英霍桐舒等縣皆空虛無兵深慮楚豫境內髮捻大股乘隙東竄鮑超一軍自攻克金壇後該處敗匪及常州餘逆均為駐防漂

陽之吳毓芬等截勦於南渡全股殄除。現在常丹兩城已克。東壩二漂已經李鴻章派兵扼守。鮑超一軍自可騰出移援徽郡。或即令渡江北防勦潛太英霍桐舒一帶。著曾國藩酌量情形妥為調度。至皖北潁亳廬壽等處與豫楚邊境甚近。防兵空虛。喬松年身膺疆寄。責無旁貸。如何撥兵防守各城如何堵禦髮捻之處。惟當力籌布置。不准觀望推諉。曾國藩亦仍當隨時兼顧。以期互相策應。前經

諭令僧格林沁將陳國瑞一軍調赴皖北。為截勦髮捻東竄之備。本日據曾國藩奏。皖北空虛可慮。自應即以此軍移紮截勦。著僧格林沁相機酌度。迅即檄令扼要駐紮。如果髮捻竄近皖疆。即可令其截擊。此外或有另有勁旅。可以扼要駐紮。備豫緩急之處。著僧格林沁曾國藩隨時會同籌商辦理。淮徐一帶。即著吳棠豫籌布置。撥兵駐守。並與臨淮各軍聯絡聲勢。毋稍大意。天長六合一帶。即著富

明阿將援勦鎮江之揚營兵勇撤回。移紮該處嚴密堵遏。仍著曾國藩與富明阿吳棠喬松年互相援應。至髮捻大股現在廣聚於隨東鍾京等處。鄂省兵力尚敷堵勦。官文嚴樹森總當嚴督諸軍。將該逆就地殄盡。萬不可令其竄入皖境。金陵官軍攻破朝陽等門。月圍賊甚眾。正當乘該匪窮蹙之時。力籌攻拔。並著李鴻章將丹陽常郡餘匪搜捕淨絕。分布諸軍嚴扼要路。以防金陵逆股外竄。值

此功在垂成。各路將帥及封疆大吏俱宜振刷精神。統籌兼顧。以期及早蒞功。曾國藩聲稱戶部覆奏摺內。所稱湖北等省協濟月餉等款。為數甚鉅。實則所得極少等語。本日已交戶部覈辦矣。所請將楊岳斌蕭慶衍蔣凝學。毛有銘梁美材諸軍。仍由鄂省照舊供支。於六成之外酌添一二成之處。著官文嚴樹森速籌發給。其普成堯何紹彩兩軍。著即交喬松年調遣。餉項即由臨淮糧臺支發報銷。

李世忠既經散財遣服交出城卡心跡已明其赴安慶謁見遲早之處即可聽其自便李世忠交還之五河六合滁全來各城著曾國藩吳棠喬松年將善後事宜妥為經理孫家泰一案著俟喬松年會同曾國藩具奏時再降諭旨將此由六百里各諭令知之○以鑲藍旗滿洲副都統靈桂署鑲白旗護軍統領正黃旗蒙古副都統富明署正紅旗滿洲副都統○以浙江處州鎮總兵官李朝斌為

江南提督遇缺提奏提督黃翼升為江南水師提督記名總兵官陳國瑞為浙江處州鎮總兵官擢江南狼山鎮右營遊擊陽利見為淮揚鎮總兵官○以克復江蘇金壇縣城擢遊擊張遇春以副將升用予陣亡參將鮑昌齡都司宋連陞主正禮祭葬世職加等○以安徽徽州堵勒竄匪不加革署總兵官唐義訓職仍留任道員毛有銘以知府降補奪勇號花翎仍留營予陣亡參將金茂榮等十三

員祭葬世職加等○庚寅諭內閣御史富稼奏運河一帶兩岸住戶多於院落開掘地窖藏竊銅米比戶皆然聚眾搶糧之案正犯聞拏遠避完案復歸怙惡不悛仍為沿河之害其慣竊銅米積匪雖經拏獲多名而竊藏之銅並未按獲今南漕尚未抵京請豫除積匪以清河運等語著鍾岱宋晉遴派員役實力按查將窖藏一律平毀並飭各該管營汛及沿河委員節節校巡儻有棍徒夥竊及攬雜

浸灌等弊即行嚴拏從重懲辦廳橋各役如有與賊通氣者亦即嚴究革懲以清積蠹而重運務○又諭欽差大臣西安將軍多隆阿前在湖北帶兵勦賊疊著戰功同治元年率師赴皖攻拔廬州匪首陳玉城敗竄被擒伏法旋由湖北督師入陝授為欽差大臣將同朝一帶回匪巢穴悉數削平先後克復城寨十數處並分兵解鳳翔之圍俾陝省回匪一律肅清厥功尤偉嗣因藍逆占踞盤屋縣城

屢攻不下該將軍忠勇奮發躬親督戰力拔堅城頭面致受槍傷節經賞給內府如意拔毒散及人蔘等件交該將軍祇領方冀醫治速痊長資倚畀茲遽因傷出缺披覽遺章實深悼惜多隆阿著加恩追贈太子太保照將軍陣亡例從優賜卹賞給一等輕車都尉世職任內一切處分悉予開復應得卹典該衙門察例具奏並准入祀京師昭忠祠其曾經立功省分著各該督撫查明建立專祠賞銀

一千兩經理喪事由陝西藩庫給發其靈柩回籍時著沿途地方官妥為照料伊子孫幾人著黑龍江將軍查明俟百日存滿後由該旗帶領引見以示篤念忠蓋至意尋予祭葬諡忠勇○諭議政王軍機大臣等穆圖善奏陝省軍務漸就肅清全軍遵旨馳援楚豫並曹克忠一軍攻克馬鹿鎮等處賊巢各摺片曹背時一股經提督姜玉順殲滅殆盡曹逆亦在誅數穆圖善現檄姜玉順先行統帶九

營由南山拔隊援應楚省飭藍斯明蕭河清各率所部赴豫自尚未接到本月十六日令蕭河清等改赴楚省之諭著懍遵前旨令蕭河清姜玉順所帶步隊八千人一併馳援楚省多隆阿部下馬隊除酌留撥給都興阿外其餘悉令常星阿等統帶仍赴僧格林沁軍營僧格林沁現馳隨州俟西省馬步到齊應如何分撥策應並派防豫省東北兩路之處均著妥為籌畫穆圖善欲親督馬步出關分

勦奮勇可嘉該將軍卽妥為部署親率各營赴楚並須激勵各軍認真出力陝西未盡事宜移交劉蓉辦理多隆阿欽差大臣關防著劉蓉派員齎赴京師恭繳官文於陝西兵勇到後兵力益足務當妥籌分布將楚境賊氛節節掃蕩毋留餘孽嚴樹森仍慎固省防不可稍涉大意劉蓉已派英毅六營赴襄樊此軍何日到楚亦可歸官文調遣現在陝西地方雖可漸次肅清而統帥傷亡兵勇分散誠

恐甘省逆回及本境餘匪從而生心再圖滋事不可不豫為之防劉蓉所部之湘果十四營現屯漢郡著分飭帶兵各員將各路餘匪搜捕淨盡俟甘省回匪勒辦得手不至復行回竄再議一律撤遣回蜀潼商等處防守緊要著劉蓉選派得力兵將分股駐紮以便藍斯明蕭河清起程赴楚澇峪口匪蹤是否淨絕曹背時是否伏誅該撫何日出省調度並著迅速奏聞曹克忠已將馬鹿鎮等處賊巢

勦洗著飭令仍行回駐隴境如省城附近需兵彈壓即調回駐紮盤屋一帶以資控制都興阿統兵日久持重老成現帶重兵赴定邊一帶本日已令督辦甘肅軍務著即趨程前進與雷正綰會商妥辦以期節節肅清雷正綰自陝入甘屢獲奇捷勞勩卓著現在圍攻平涼諒可即日得手著即督率將弁迅速圖功甘省匪勢尚熾該提督一軍恐尚單薄是以添派都興阿辦理都興阿尚不能即日

甘俟其到後或在一處會商或議分投辦理均須和衷共濟以紓朝廷西顧之憂蔡逆一股經劉蓉派令湘果各營會商李雲麟擊勦聞已敗竄鄖西著責令該京卿跟蹤躡剿不得稍留遺孽貽患鄰封若縱令與楚豫各匪合股定惟李雲麟是問將此由六百里各諭令知之○調荊州將軍都興阿為西安將軍以西安左翼副都統穆圖善為荊州將軍○命西安將軍都興阿督辦甘肅軍務署陝西

提督雷正綰幫辦軍務



大清穆宗繼天開運受中居正保大定功聖智  
誠孝信敏恭寬毅皇帝實錄卷之一百

實錄卷一百

十一

大清穆宗繼天開運受中居正保大定功聖智  
誠孝信敏恭寬毅皇帝實錄卷之一百一

臣等謹將本年以來各省督撫奏報各款恭摺具陳伏乞聖鑒訓示謹奏  
光緒二十九年十一月二十二日奉 諭旨 著照所請欽此  
光緒二十九年十一月二十二日奉 諭旨 著照所請欽此  
光緒二十九年十一月二十二日奉 諭旨 著照所請欽此  
光緒二十九年十一月二十二日奉 諭旨 著照所請欽此  
光緒二十九年十一月二十二日奉 諭旨 著照所請欽此  
光緒二十九年十一月二十二日奉 諭旨 著照所請欽此  
光緒二十九年十一月二十二日奉 諭旨 著照所請欽此  
光緒二十九年十一月二十二日奉 諭旨 著照所請欽此  
光緒二十九年十一月二十二日奉 諭旨 著照所請欽此  
光緒二十九年十一月二十二日奉 諭旨 著照所請欽此

教修

同治三年甲子四月辛卯諭內閣順天府府

尹卞寶第奏董恂被叅一案請添派大臣會  
同查覆一摺著添派倭仁會同卞寶第據實  
查覆毋稍徇隱尋奏逐細查訪董恂並無向  
各屬月索薪米確據得旨王拯所奏著無庸  
議○諭議政王軍機大臣等戶部奏豫籌江  
南財賦以紓國課一摺據稱東南地利素饒  
自遭兵燹一切應辦事宜均未舉行現在皖  
北肅清江蘇境內亦將剋期底定亟宜釐定  
成規以為長治久安之計查釐捐一項有礙

正賦。應請將從前糧捐畝捐草捐花布捐等項。概行禁止。至正賦錢糧除蠲緩外務令認真收納。年清年款。至灘地沙洲二事。為利甚溥。懇請飭下督撫大吏。遴員馳往查勘妥辦。以盡地利各等語。所奏係為興利除弊起見。自應先事籌畫。以為善後地步。著曾國藩李鴻章按照該部所奏各節。確切查明。實力興辦。以蘇民困。而裕國計。原摺著鈔給閱看。將此諭令知之。○以記名副都統海羣為西安

左翼副都統。○壬辰。以神靈顯應。加江蘇揚州露筋祠封號曰護國。○諭內閣。前因畢道遠等呈奏。山東已革知府吳載勳等。勦辦淄川逆匪。恒怯通賊各情。疊經降旨交譚廷襄查辦。茲據閭敬銘奏。查明各該員被叅各款。並將親供呈覽。請旨辦理。一摺。山東已革候補知府吳載勳。前署濟南府任內。於淄川逆匪劉得培起事之初。親往查辦。因未帶兵勇。回省請兵。劉得培已踞城作亂。該革員到淄

後。屢次督隊攻襲。尚無恒怯乖謬及通賊情事。吳載勳前經譚廷襄以該革員耽延貽誤。業經奏叅革職。著無庸議。前署淄川縣事候補知縣麟威。於劉得培率眾入城時。因將卸事。並未設法拏辦。又不據實稟報。實屬意存推諉。著即行革職。以示懲儆。道員陳顯彝督勦淄川。屢次攻襲。尚有斬擒。原叅通賊各情。亦無確據。陳顯彝前經閭敬銘奏叅勒令休致。即著無庸置議。已革遊擊謝炳。因勇丁索

餉退隊。不能約束於前。又不能激勵於後。實屬咎無可辭。業經革職。被叅通賊之知縣李鳳韶。業經被害。著一併免其置議。○諭議政王軍機大臣等。富明阿奏追勦丹陽竄賊情形。並統籌防勦一摺。官軍克復丹陽後。追勦竄賊至珥村地方。突有逆壘出賊四股迎拒。均經我軍擊敗。踣平賊壘。即著富明阿督飭將弁。乘勝跟追。務將丹陽餘匪。挖殺淨盡。悉數殄除。楚豫擒匪。竄擾隨州。號稱數十萬眾。

圖援金陵意由江北繞道前進該將軍現將泰興防兵撤回並於南渡之軍抽回四千以防西路留總兵楊心純守丹陽令詹啟綸統帶五千人暫紮丹邑以便馳助金陵卽著照所擬妥為布置金陵逆援如犯江北萬一兵力不敷堵禦應如何抽撥勁旅遏賊紛竄之處著富明阿妥籌辦理不可稍有疏虞致令掣動金陵全局丹陽降眾卽著妥為遣散毋令滋生事端將此由五百里諭令知之○又

諭沈葆楨奏縷陳近日軍情並樂平肅清玉山解圍各摺片髮逆續竄江西雖經官軍截剿樂平邊境業已肅清玉山亦已解圍而東路賊氛仍未殄滅至西路情形南豐踞逆負隅如故竄建甯之偽王宗出窺廣昌經官軍擊敗遁向石城甯化交界之分水坳而去惟南豐堅城未拔則此次擊退之賊難保不復來窺犯現在江忠朝已抵安仁卽著沈葆楨飭令統率所部會同王沐一軍前赴弋陽貴

溪一帶相機夾擊迅殄賊氛王文瑞已抵袁州派隊進扼永豐並著飭令該道員與席寶田韓進春等妥速進兵迅將南豐攻拔並將建昌一帶要隘力籌布置毋令賊蹤紛竄曾國藩慮鮑超馳援江西不能速到現派周寬世七營金國琛九營先從饒州一路往援著卽飭催迅速前往並著沈葆楨恪遵前旨督飭在防將士與周寬世等軍互相援應毋稍疏懈左宗棠所派副將劉明珍安武軍四營

已抵廣信卽著該督飭令劉明珍與王開琳一軍嚴扼要隘截賊續竄江西之路不得稍有疏虞將此由六百里各諭令知之○補鑄奉天昌圖廳通判照磨廣西河池州州同各關防印信從將軍玉明巡撫劉長佑請也○以山東剿匪出力全省肅清賞知府龔易圖佐領塔克蘇堪等花翎知縣何亮清等藍翎餘加銜升敘開復有差○以截剿竄匪不力山東已革副將春祺都司王宗元均遣戍軍

臺。予江西樂平玉山等處陣亡千總王貴發把總廖衍柏祭葬世職加等。○癸巳諭內閣。官文奏嚴樹森把持兵柄剛愎用事等語。據稱嚴樹森自履任以來。招募湘勇馬步水師五十餘營。號衣旗幟均用撫標名目。各營官俱發給撫標鈐記。調度文檄用巡撫關防。或自主臺而會總督之銜。或徑自劄行。此次官文出省後。該撫輒將黃陂當衝兩營調回省城。並將官文派赴上游之水師總兵李濟清等兩營阻止。不令遠移。復代官文劄調曾紹霖礮船八隻。隨營上駛。其沈俊德等楚省舊營亦皆改隸撫標調遣等情。各省巡撫如與總督同城。遇有緊要公事。均須與總督會商。巡撫豈可任意專擅。若遇總督統兵出省。則一應調度機宜。設非事機迫不及待。即當會商統帥以期事權歸一。俾將士有所稟承。至督標撫標兵數。均有定制。豈可率意移改。楚勇亦係總督巡撫公共之勇。豈得率書

撫標字樣。乃嚴樹森招募湘勇五十營。俱令隸歸撫標鈐記等項。均用撫標名目。文劄多不與官文會商。意在把持兵柄。其於官文帶兵出省後。又復任意檄調各營。互相易置。並將楚省舊營一併改隸撫標。似此爭權競勢。實屬任意妄為。現在髮捻大股各匪竄擾湖北。正當勦辦喫緊之時。官文以欽差大臣督兵進駐漢川。所有各營將士均應歸該督節制。庶號令不致紛歧。若如嚴樹森之種種牽掣。率意更張。必至貽誤大局。該撫前在河南時。坐擁重兵。株守汴梁。於省城以外各郡縣任聽髮捻各匪焚掠。一籌莫展。不敢出省垣一步。其於省城防守事宜。亦復措置乖方。疊經御史劉毓楠以勦匪未善。侍郎毛昶熙以膽怯見偏。量狹性愎。據情奏。比調任湖北巡撫時。又經御史陳廷經以性情剛愎。人地不宜。陳奏。朝廷因嚴樹森於軍務雖非所長。而操守尚好。於吏治亦能講求。未經即予撤

任並經諄諄訓誡。冀其湔濯自新。乃竟怙過不悛。挾私妄作。深負委任。嚴樹森著以道員降補。以示薄懲。○諭議政王軍機大臣等。左宗棠奏官軍進規湖郡。並截勦上游竄賊。獲勝。及大股逆賊分竄江西。情形緊急。並延平等處告警。調派得力員弁防勦。各摺片。髮逆羣竄江西。雖經江浙兩省官軍會合防勦。惟南豐踞賊負隅如故。上饒玉山一帶。亦未肅清。而李侍賢一大股。已由歙休地界竄入江

西。其由常州丹陽竄出之林彩新。矮惠陳等。股如蟻如蠅。亦將由長興四安一帶取道績歙。圖竄江西。若不迅圖掃蕩。該逆竄聚一方。裹脅日眾。必仍狡焉思啟。圖救金陵於全局關繫甚巨。此時江省援兵日集。江忠朝王文瑞等軍均已入境。浙軍劉明珍等已抵廣信。曾國藩所派之周寬世金國琛等營。左宗棠此次改派之劉清亮一軍。亦已先後赴江。惟該將領等才智不相上下。彼此位望相等。非

有威望素著之大員。統率調度。恐難迅奏膚公。本日已命楊岳斌督辦江西皖南軍務。並令劉典幫辦軍務矣。曾國藩接奉此旨。卽行咨商楊岳斌。令其迅赴江西。現在彭玉麟前赴九江。扼要布置。為髮捻東竄之備。若楊岳斌卽日赴江。則下游水師。統帶乏人。著曾國藩李鴻章酌量情形。於黃翼升李朝斌二員內。揀派一人。統帶楊岳斌水師。以資得力。楊岳斌馳赴江省後。卽於江皖交界扼要地方

駐紮。督率諸軍。實力勦洗。一切軍情有應由楊岳斌專摺具奏者。有應與曾國藩沈葆楨會銜具奏者。均著隨時酌度緩急。分別辦理。沈葆楨於各該營應用餉需。務當力籌接濟。曾國藩楊岳斌沈葆楨均受朝廷倚畀。想能和衷商辦。共濟時艱也。劉典回湘募勇六營。前據譚世臨奏。四月中可以入江。此時該臬司行抵何處。並著楊岳斌沈葆楨飛速催提前進。以厚兵力。曾國藩前因責任太重。屢請

派員分任仔肩。此時江皖軍務既派楊岳斌前往督辦為該大臣分任其勞。惟一切應勘機宜。曾國藩仍須隨時與楊岳斌籌商。通籌兼顧。金陵官軍攻破月圍之後。賊勢已蹙。著督飭曾國荃等迅速進攻。仍當於勇猛之中。寓以慎重。李鴻章恪遵前旨。分軍嚴扼要隘。毋令金陵潰賊外竄。江浙敗賊悉萃湖州。意在以一隅牽掣浙師。而以全股竄徽歙。擾及江西。其謀甚狡。此時進規湖州各軍。業於菁

山下施村等處獲勝。著左宗棠督飭高連陞等軍迅速合圍。力拔堅城。庶上竄之賊退無所踞。埽蕩自易為力。王開琳一軍既經留駐華埠。著左宗棠迅飭劉清亮等於馳抵玉山沙溪後。會合該處防兵相機堵剿。遏賊續竄江西之路。泰甯縣被賊竄陷。旋即收復。賊蹤擾及將樂縣境。延平軍務萬分喫緊。左宗棠擬調林文察內渡剿賊。並令康國器率師入閩。與張運蘭由粵赴閩之師會合夾擊。所籌

甚屬周密。即著左宗棠徐宗幹妥速商辦。飭催林文察迅速由臺內渡。趕赴延邵等處迎頭截擊。康國器現已取道嚴衢入浦城。達閩。即著飭令確探賊蹤。迎頭痛剿。毋令蔓延腹地。將此由六百里各諭令知之。○又諭前因賊匪由江竄閩。如由邵武汀州一路奔趨。官軍難以堵截。諭令毛鴻賓等飭令張運蘭仍即速回本任。茲據左宗棠奏江西收復新城後。餘賊悉趨閩界竄陷邵武府屬之建甯。現

在雖經克復。賊蹤業已闖入將樂縣境。延平軍情喫緊等語。閩境賊勢甚重。而該省兵力甚不足恃。若無大枝勁旅前往勦辦。一經蔓延腹地。勢將不可收拾。著毛鴻賓郭嵩壽懷遵前旨。迅即檄令張運蘭一軍星馳前進。由潮州入閩。協同勦洗。迅殄逆氛。閩省軍情萬緊。該督撫毋得再行任意奏留。致誤戎機。豫省捻匪。漢中髮匪。併趨鄂疆。隨棗鍾京一帶。偏地賊蹤。官文現已出省督師。唐訓方署理

巡撫當此事機喫緊之際恐不足以資坐鎮著毛鴻賓郭嵩燾催令吳昌壽趕緊交卸兼程前進迅赴湖北巡撫新任毋稍遲延將此由六百里諭令知之○又諭官文奏隨州等處續獲勝仗張之萬奏截擊髮逆獲勝並堵勦信陽等處竄匪毛昶熙奏連克賊巢息縣漸次肅清各一摺楚軍隨同僧格林沁馬隊在隨州擊敗髮捻股匪斬馘甚多與僧格林沁前奏情形大略相同該逆由天門京山雲夢一帶擄掠民船意圖搶渡均為水師擊退是楚省防堵尚屬嚴密惟髮捻前股現據張之萬聲稱已竄至豫省之信陽州屬黃土平靖兩關距城二十餘里之楊柳河等處張之萬前派連美賈文田馮聖傳李承先等營馳扼三關並派遣員葛承霖一軍馳往現已行落賊後僧格林沁所派之蘇克金恐亦未能繞及賊前該逆蓄意東趨皖北兵力甚單深為可慮前經諭曾國藩能否騰出鮑超一軍

防勦皖北一帶此時事機緊急著即檄令該提督統率所部迅速前往楚皖交界地方嚴密堵遏由信陽東竄之賊並著官文將天門等處股匪力行掃除嚴防東竄皖省之路不得令該逆闖入致滋蔓延仍一面派兵與豫省派出各軍聯絡盡殲醜類多隆阿舊部八千人業已陸續起程赴楚兵力足資勦辦如何接替分撥著官文妥籌布置僧格林沁當督催馬隊星夜窮追並仍遵前旨檄調陳國瑞一軍赴皖北扼要駐紮以備截擊喬松年當就近分撥兵勇將竄近皖北之匪竭力勦洗暫紮丹陽之揚營兵勇著富明阿迅即調回移紮嚴密堵遏仍與吳棠喬松年互相援應協力堵截張之萬並當檄令連美等軍嚴扼東竄股匪毋稍鬆懈毛昶熙已將汝南賊巢攻克斬戮巨擒趙幘良等並將降勇王廷幹等悉予駢除息縣境內漸次肅清自可騰出兵力移堵髮捻股匪著即統率所部隨同

僧格林沁一軍。隨地截擊。毋令蔓延。至髮逆後股。由浙川敗至板橋。經張曜會同色爾固善馬步各軍。截殺甚多。復追入楚境。鄖陽所屬之羊皮灘。疊獲勝仗。該逆勢已窮蹙。著僧格林沁官文張之萬。檄飭色爾固善並楚豫各軍。前截後追。務將此股殄除。毋留餘孽。唐訓方久在戎行。熟諳軍務。一切戰守布置機宜。著與官文悉心籌商。以臻妥善。將此由六百里諭知僧格林沁官文曾國藩富明阿吳

棠李鴻章喬松年張之萬毛昶熙並傳諭唐訓方知之。○河南巡撫張之萬奏遵查李殿元等前在荊子關擊退另股髮逆。實有其事。並非諱敗為勝。報聞。○命福建水師提督楊岳斌督辦江西皖南軍務。浙江按察使劉典幫辦軍務。○以廣東布政使吳昌壽為湖北巡撫。未到任前。以署按察使唐訓方暫署。以廣東按察使李瀚章為布政使。鹽運使李福泰為按察使。○以河南攻克息縣賊巢。予遊

擊蔣東才等升敘有差。○以河南浙川勦賊獲勝。復遊擊蔣希夷頂帶。○以浙江遂安江西玉山等處勦匪獲勝。予副將劉明珍等加銜升敘。有差陣亡參將黃應春等祭葬世職。○修補浙江海甯州石塘。從閩浙總督左宗棠請也。○蠲緩浙江富陽新城於潛昌化臨安餘杭海甯仁和錢塘嘉興秀水嘉善海鹽石門平湖桐鄉德清武康孝豐西安龍游建德淳安桐廬壽昌分水金華蘭谿東陽義烏

永康武義浦江江湯溪諸暨三十五州縣被擾地方。本年額賦。○甲午諭內閣前因袁甲三奏淮北監掣同知許惇詩取巧牟利。請革職罰捐。當經奉

旨將許惇詩卽行革職。並勒令捐銀十萬兩。接濟清淮防費。本日據吳棠奏稱查明前次賊竄清江西壩鹽棧實係被焚。該革員公寓焚毀一空。原籍兩遭兵燹。家產蕩然。除兩次遵繳銀七千二百餘兩外。現在無力完繳。數與



恩詔豁免之例相符。可否准予援免。聲明請旨等語。此案前經袁甲三派委升任運司喬松年委員密查鹽棧。並未被焚搶失。亦屬無多。且清江職官於擒匪警報已至時演戲宴會。係該革員起意逢迎。並在普濟寺延請上司寅僚宴樂。迭為賓主。以致防務廢弛。厥咎甚重。已革淮北監掣同知許惇詩著准其免繳罰捐銀兩。卽行發往新疆效力贖罪。○諭議政王軍機大臣等。都興阿奏接奉寄諭。趕

緊赴防。並改道前進一摺。據稱本月十九日。行抵大同。接准德勒克多爾濟函稱。自歸綏進兵。中有草地無水可汲。亦無鍋帳宿處。道經榆林。山路崎嶇。仍須折回殺虎口。由關內方可前進。並准訥欽文稱。亦以榆林地方極苦。所有續調直晉官兵。應由汾州永甯渡河入陝。擬照訥欽所擬路程。改道前進等語。草地榆林一帶。均屬難行。該將軍所奏。自係實情。卽著照所請。迅由太原汾州馳赴定邊。毋

稍延誤。該將軍行抵定邊。著卽將先後派撥各軍相機調遣。規取靈甯。以副委任。餉項軍裝均關緊要。著沈桂芬酌派妥員辦理。俾資接濟。晉省所製炸礮火箭。甚為得力。並著酌量撥給。交該將軍隨帶赴防。以資攻勦。將此由五百里各諭令知之。○又諭毛鴻賓奏勦捕菱角塘一帶土匪。生擒逆首。北江一路肅清一摺。英德等縣交界之菱角塘石街蔣洞一帶。有馮九指等在彼久踞。經張運蘭等設

計誘擒。餘匪遁入老虎徑之水仙巖洞。亦俱困死洞中。北江英德陽山一路大致肅清。該督擬令張運蘭駐紮南雄州防堵。張運蘭一軍疊經諭令帶赴閩省。勦辦江浙竄匪。江西自新城收復後。賊眾悉趨閩界。闖入將樂縣境。延平軍情喫緊。昨復諭令毛鴻賓郭嵩燾檄令該臬司星馳前進。由潮州入閩勦賊。著卽懷遵疊次寄諭。飭令赴閩。不得瀆請奏留。貽誤戎事。其翁源英德交界之壠口鄉。尚有

零星土匪逃匿著飭地方文武實力擒拏以期淨絕根株勿任漏網另片奏花旗股匪林正楊由廣德州竄擾江西兼及閩境探聞汀州之甯化甯都之石城皆有賊蹤廣東邊防此時以嘉應州為最已飭吳贊誠等辦理沿邊團練總期遏賊境外等語所籌尚屬妥協著即督令派辦各員認真經理先清內匪以免外匪勾結不可有名無實如本境邊防已固仍須派兵出境勦洗毋得稍存畛域之見

將此由五百里各諭令知之○乙未諭內閣前因內倉米石被竊諭令該管直班官兵之大臣飭令長安門直班官兵晝夜嚴防茲據戶部奏稱本年三月二十三等日開倉放米在迤北殘臺庫內拏獲賊犯趙有兒一名訊係由長安門內朝房檐際窺穴而入倉神廟復失去什物多件殘臺庫檐際又有窺透情形各等語內倉重地該管官兵宜如何加意嚴防以昭慎密乃既經嚴諭之後仍屢有賊

犯由長安門內朝房檐際窺穴出入實屬膽玩已極著步軍統領衙門並前鋒護軍統領派員實力稽查晝夜巡邏毋得仍令宵小乘間出入其附近倉牆地勢較高易於攀援處所飭令加意防範以免疏虞儻敢仍前玩忽即著該管大臣將該班官兵等指名叅辦毋稍姑容並著工部將內倉迤北殘臺庫坍塌之處趕緊修理以昭嚴密○又諭倉場侍郎鍾岱宋晉奏花戶放米含混恐有情弊查倉

御史瑞亨奏書吏稟稱花戶放米有積壓多放情弊各等語向來各倉放米先行傳片定日開放原以杜奸胥積蠹從中舞弊乃本月二十一日海運倉花戶竟將未經傳片亦未起票之中營巡兵及四成孤貧粟米先行開放而於業經傳片之鑲黃旗包衣甲米轉延壓不發且並未稟知漢監督到倉其為意圖弊混形跡顯然該倉書吏張慶盈雖據稟稱並未到倉亦難憑信花戶楊時和書吏張慶

盈均著交刑部嚴行審訊。滿監督德賡於應放米石有無傳片起票毫無覺察。且並不候漢監督到倉。卽行開放。難保非知情徇隱。德賡著先行撤任。聽候傳質鍾岱等另片奏運。旨派員偵訪運河米窖等語。卽著飭令派出各員認真辦理。以重運務。○諭議政王軍機大臣等。前據景綸麟瑞奏查明覆勘圍場邊荒情形。當經諭令該部查議具奏。茲據戶部奏該將軍等原奏內稱。東由伊勒們河起。西

至伊通河止。並其間裁撤伊巴丹等五處廢圍。除留建公所外。淨可墾地二萬八千六百六十五晌。又東自廟嶺起。至一座毛地方。復由該處南面折至地西之釣魚臺止。西以伊勒們河為界。北以舊設卡堆為界。並其間裁撤之孤拉庫等二處廢圍。除留建公所外。淨可墾地八千二百三晌五畝。此項地畝既據該將軍等查明並無開礙情形。應請飭令照辦等語。著景綸麟瑞督飭承辦各員認真經

理。仍隨時稽查。毋任偷種私占。亦不得藉端滋擾。致累閭閻。至該將軍等擬將倒木河之北舊有佛斯亨海蘭兩圍。那移並將薩倫河等處各圍一併移設。所有空曠閒荒地畝一併開墾。此項地畝是否與邊界圍場毫無關礙。其所招各佃人數眾多。能否與該處民人日久相安。不至別滋事端。至移設各圍能否妥協。日後有無流弊。著景綸麟瑞詳細酌覈。總期於邊界圍場兩無關礙。方可斟酌辦理。

僕或利少弊多。仍行奏請封禁。毋稍隱飾。其土門子阿勒楚喀雙城堡等處閒荒事宜。仍著景綸等轉飭承辦各員詳晰查覆。原摺著鈔給閱看。將此各諭令知之。○盛京將軍五明奏。

永陵神樹。娛枝發葉。老幹萌芽。謹繪圖貼說進呈。得旨覽奏敬悉。仍著隨時加意培護。以昭慎重。圖留覽。○旌表守正捐軀直隸曲陽縣民王洛壽妻王氏。雞澤縣民郝迷子妻趙氏。

○丙申。以正黃旗蒙古都統義道署鑲黃旗漢軍都統。正紅旗蒙古副都統奕貴署左翼前鋒統領。正藍旗漢軍副都統安興阿署正藍旗護軍統領。○以陝西蘇家溝等處勦辦回匪出力。賞協領倭興額富貴委參領穆隆阿佐領德福員滾保博明阿副管齊耆副將彭忠國參將陳廣德舒榮華楊明高鄧萬勝曹殿揚聞玉貴傅先宗遊擊魯得興丁長勝都司何大發張鳳山易得勝劉國龍巴圖魯

名號。同知銜知縣樊繼英等花翎。委驍騎校全勝等藍翎。餘加銜升敘開復有差。○以辦團橫恣。革安徽在籍同知高錫齡職。遣戍軍臺。○丁酉。諭議政王軍機大臣等。富明阿奏江防下游肅清。擬裁師船節餉。並籌防天長一帶情形各摺片。江南一帶。自蘇常各郡及江陰常昭丹陽等處相繼克復。敗賊遠遁。下游一律肅清。其江北一帶。自瓜洲以至通海。亦均安謐。所有江面駐防之紅單拖罾等船。

自應乘此酌裁。以節餉需。該將軍擬將此項大船。分為三起。先擇其朽爛者。遣撤二十五隻。派員統帶回粵。卽以在防礮划。移泊防堵。俟頭幫起程後。如果江防穩固。再將餘船分作二、三起。陸續裁清。以免擁擠。而重江防。並由江南糧臺。籌給一月實銀口糧。籌畫尚屬周妥。卽著照所議辦理。惟糧臺拮据。各船前欠餉銀。為數甚多。著富明阿卽移會糧臺查明。取具各幫積欠細冊。迅卽分咨廣東江蘇

兩省。由毛鴻賓郭嵩燾李鴻章分別補發。遣散各船兵勇。務須妥為安插。毋令滋生事端。富明阿因下游江面肅清。難民均經南渡。請弛封江之禁。以期貨物流通。著卽照所請行。惟金陵尚未克復。難保無竄突之虞。富明阿仍當督飭現有水師。嚴密巡防。不得稍存大意。漢南髮捻各逆。現已竄至豫省之信陽州。勢將東趨皖省。江蘇裏下河地方。素稱饒富。難保不為賊匪窺伺。揚防西路來六全滁等

處既經曾國藩分兵扼紮。而天長一帶尚覺空虛。富明阿已將太平洲一帶大礮船全數調回邵伯。並擬抽撥隊伍相機勦辦。著曾國藩富明阿隨時聯絡聲勢。互相策應。務期遏賊東竄。毋令擾及完善。是為至要。將此由六百里各諭令知之。○又諭駱秉章奏黔匪闖入邊境調兵勦辦。疊獲勝仗一摺。黔省正安州號匪竄撲四川南川縣城。經唐友耕等督飭官軍民團會合夾擊。該逆遁回新州老巢。

復因巢穴攻破。由桐梓境內繞竄至綦江連界之松坎一帶。又敗竄扶歡壩。乘間圍撲綦江縣城。屢經官軍擊敗。仍向溫水退走。勦辦尚屬出力。惟該逆尚游弋於仁懷境內。難保不再圖奔突。且黔省桐梓地方尚有另股號匪。亦應防其紛竄川邊。駱秉章現留唐友耕在南川等處居中策應。調劉嶽昭果後十二營分顧江合兩縣邊境。並令成耀星等各率所部駐防綦境。所籌甚屬周密。即著督飭唐

友耕劉嶽昭等認真防勦。毋令賊竄腹地。致成蔓延。至滇邊土匪及黔省苗教各匪分擾敘永包茅仙等又擾及秀山邊界。並著嚴飭許蔭棠曾志友等軍實力堵遏。毋稍疏虞。滇匪何金瀧等既有蠢動之信。敘南防務即責成提督胡中和妥籌兼顧。不可稍涉大意。將此由六百里各諭令知之。○戊戌諭內閣。劉長佑奏豫省懸岸現僅滑縣一處。仍請停止捆運。並查明運司委無私加各款一摺。據稱

豫省各處懸岸業由長蘆一律招商認辦。僅懸滑縣一處整頓較易。若一經豫省捆運。本處未能盡銷。勢將浸灌他處。於全局大有關係。所有豫省懸岸著統歸長蘆自行經理。豫省毋庸捆運。以清引岸而專責成。至長蘆滯引例准融銷。既據查無私加私用各項情弊。又據各商呈出領告應交銀數清單。查對相符。公同出具甘結。所有前次張之萬奏蘆商把持運使受其蒙蔽各款均著無庸置議。該

督仍當隨時細心訪察。實力稽查。如有前項情弊。卽行從嚴懲辦。以整嵯綱。○諭議政王軍機大臣等。恭親王等奏請飭催各省積欠工程餉銀一摺。

定陵大工。將次告竣。需餉甚殷。上年六月間。曾諭令各該督撫監督等。將欠解餉銀依限完解。不准再事延宕。茲據恭親王等奏。工程餉銀共計積欠一百二萬兩之多。請飭嚴催各該督撫監督等。將欠解餉銀。仍按限期報解。

如逾限不解。卽行叅處等語。

定陵工程。關係緊要。該督撫監督等身受國恩。自應激發天良。將應解餉銀移緩就急。源源接濟。似此任催罔應。勢必停工待餉。貽誤殊非淺鮮。著駱秉章。毛鴻賓。張之萬。劉蓉。郭嵩燾。毓清。將欠解之餉。按照銀數。先解四成。限於八月以前解到。其餘六成。限於十二月以前。埽數解清。經此次分立限期之後。若再仍前蒂欠。有誤要工。卽將各該督撫藩司監督

等。按照戶部奏定處分章程。分別嚴加議處。決不寬貸。將此由五百里諭知駱秉章。毛鴻賓。張之萬。劉蓉。郭嵩燾。並傳諭毓清知之。○

又諭總理各國事務衙門。奏請派京營弁兵。學製火器一摺。據稱練兵之要。製器為先。洋人所製炸礮炸彈等項。尤為行軍利器。現在李鴻章軍營。製造此項火器。已有成效。擬請飭火器營。於曾經學製軍火弁兵內。揀派武弁八名。兵丁四十名。發往江蘇。一體學習等

語。所奏自係為思患豫防起見。本日業經諭令火器營。照該衙門所請派撥矣。此起弁兵。俟抵江蘇後。卽交李鴻章差委。專令學習炸礮炸彈。及各種軍火機器。如能留心學習。著有成效者。准該撫從優奏請獎勵。其有怠惰偷安。不遵約束者。卽照軍法治罪。該撫務當明定勸懲。俾該弁兵等盡心講求。以期備得西人之妙。該弁兵等到蘇後。該撫務須加意稽察。妥為防閑。俾秘妙之傳。不致稍有漏洩。

方為妥善。所有應給薪水等項。卽由江蘇酌定支發。准其作正開銷。原摺著鈔給閱看。將此諭令知之。○又諭御史富稼奏奉天府屬新民廳。素有旗匪馬泳邦。窩養馬賊朱姓多名。肆行焚竊。並糾合覺羅德貴等。夥霸范家屯旗人張殿福田地百頃。有奇。屢經控案。筆帖式王嘉全為之請託不究。反將張殿福管押。馬秉宜等帶兵催租。毆傷佃戶張喜發斃命。而王嘉全等復賄串撫民廳書任洛等。私

放正兇。嚴押屍親。刑逼認誣。捏文送部。中途詭報屍親逃走。案懸莫結。請飭嚴拏究辦。各等語。奉天為根本重地。豈容棍徒窩藏馬賊。奪產斃命。若如該御史所奏各情。實屬大干法紀。著玉明、寶珣、德椿嚴飭所屬。速將該犯等逐名拏獲解京。交刑部訊辦。並將承種佃戶張殿福等訊明。計地升科。以重國課。原摺著鈔給閱看。將此各諭令知之。○又諭有人奏前暫署陝西巡撫按察使張集馨奸邪險

詐。諂媚卑污。於多隆阿初到省城時。獨迎於十里以外。並不與司道同見。致使陝省有巡撫公服跪接。欽差之謠。縱使並無其事。而眾口已傳為笑柄。其所奏文武官員。均係仰體多隆阿之愛憎。如提督馬德昭、臬司劉鴻恩。及各州縣等。其中儘有循聲素著有功無過之員。而馬德昭尤為陝甘兵民所悅服。屈列彈章。公論無不惜之。漢中鎮總兵余福象。為多隆阿所狎比。捏報戰功。保獎提督銜花翎

勇號。儘先遊擊陳東霖。緯號陳鐵匠。以緝拏逃勇為名。妄殺民人。沒其貲財。且過一州縣。必索重貲。陵虐官民。無所不至。候補道李宗壽。並有跪求多隆阿。緩攻藍屋。保全家小等事。是否實有其事。著劉蓉確切查明。據實具奏。單內所傳奇方一張。有薑桂劉寄奴。陳皮李核等藥名。係指何人而言。其傳方之呂洞賓。又係何人。並著劉蓉一併查明。詳晰陳奏。毋稍徇隱。原單著鈔給閱看。將此密諭知之。

○又諭劉長佑奏邊牆地方遼闊請飭熱河等處嚴查奸宄等語據稱北界邊牆廣延千里關隘雖有駐兵日久難免疏懈長城坍塌處所易於偷越巡察尤難比年山東曹州等府及直隸滄青各屬游民出口謀生流為盜賊甚至乘馬持械結夥剽掠從前馬賊之多蓋由於此至蒙古遊牧之區該匪等強借棲身此擎彼竄莫可蹤跡且其中回民尤多難保不勾結甘肅回匪由草地竄往邊牆致成

巨患所奏自係實在情形著麒麟阿克敦布德勒克多爾濟桂成慶春連成嚴飭所屬官兵一體認真查拏務獲究辦毋任奸匪涸跡以杜亂萌將此各諭令知之○又諭劉長佑奏湖南湖北兩省防剿喫緊現擬裁撤陳飛熊一軍赴官文軍營調遣等語湖北雖甚緊要現有僧格林沁大軍及官文出省調度兵力尚不為薄惟該逆人數眾多恐鉅而走險東竄堪虞所有現擬撤裁之陳飛熊一軍五

百名著卽飭令迅速赴皖北地方歸喬松年調遣喬松年於此項勇丁到後卽酌量派駐扼要地方與陳國瑞等軍及皖北各軍聲勢聯絡毋任楚氛侵入皖疆回救金陵方為妥善將此由五百里各諭令知之○又諭沈葆楨奏玉山解圍樂平肅清並收復弋陽縣城暨南豐踞逆情形各摺片玉山樂平均當賊衝現在德樂雖已肅清而分竄之賊復擾及貴溪沙溪賊復分路南渡擾及上饒鉛山之

上瀘坂湖坊等處是東路賊勢仍形喫重亟須極力勦辦提督黃仁達等現入貴溪繼果營道員王沐紮營於貴溪南岸著卽督飭該提督等分投堵剿力圖掃蕩南豐踞逆負隅如故而偽王宗一股復由閩境回竄新城之樟村林正揚一股復竄入甯都州界是東路情形愈形喫重王文瑞已抵袁州派隊進扼永豐卽著督飭道員席寶田韓進春等妥速進兵迅將南豐攻拔並將由閩回竄之賊亟



圖埽除。毋令紛竄。昨已有旨。命楊岳斌督辦皖南江西軍務。劉典幫辦軍務。所有由皖浙續竄江西之賊。當可以資堵截。該撫俟該提督到後。可卽與之會商。勦辦機宜。一面嚴飭本省現有之兵。迅克南豐。保全完善。是為至要。將此由六百里諭令知之。○又諭嚴樹森奏遵旨籌辦省防。布置漢黃一帶水路情形。並請將陝西所派英毅等二十營撤回各摺片。髮捻各逆竄楚。股數眾多。德安雲夢應城

隨州京山天門等處。縱橫數百里。而大股則麇集於德安之三里店等處。切近城池。官文已抵漢川。涓漢一帶。當可無慮。著官文嚴飭水陸各軍。認真勦辦。德安等府縣城池。責令各該地方官嚴密防守。不可稍有疏失。嚴樹森所派駐防涓漢之師。悉歸官文調遣。如何路有失。定惟何路帶兵官是問。防省之成。得升等營。歸唐訓方調遣。唐訓方接署撫篆。辦理省城防守事宜。務當隨時稟商官文。以一

事權。嚴樹森所募之湖南勇丁。如已將次到鄂。卽歸成世音等訓練調撥。如尚未募齊。卽可停止。並著官文等酌量辦理。另片奏劉蓉前派之英毅六營。業由商州徑赴襄樊。現有添派湘果馬步十四營。東下追賊。月需餉銀五萬七千餘兩。屬由鄂省先行籌撥。一月扒濟。鄂省餉源將竭。不能為秦軍籌此鉅款。請飭陝西將英毅湘果二十營兵勇。卽日截回。李雲麟一軍。五月以後月餉。由秦籌給等語。

劉蓉所派之英毅六營。已入楚境。應否留楚。卽著官文知照劉蓉辦理。至湘果十四營。前經劉蓉議令撤遣回蜀。當以甘省餘孽。恐被勦回竄。必須暫緩撤遣。本未令其留楚。著劉蓉仍遵前旨。責令揀勦各路餘匪。將來如何區畫遣撤。並須妥為籌辦。李雲麟軍餉。五月以後由陝西支發。劉蓉籌解。毋誤。正在寄諭間。據僧格林沁奏督飭馬步各隊。移向應山信陽一路。追勦髮逆。疊獲勝仗。並函會官文。

劄飭楚豫官軍躡剿敗殘餘匪一摺。陳大澐與藍范等逆合股。在英山一帶廣聚。僧格林沁親督大隊痛剿。擒斬無算。復經傳振邦等馬步追躡。逆眾向正南狂奔。該親王已飭候補道葛承霖等帶隊追剿。而自帶舒通額等馬隊暫紮信陽。以固北路之防。所辦極為周妥。著卽督飭各將弁分投躡剿。務期節節肅清。毋任竄入腹地。該親王卽在信陽州居中調度。儻該逆被擊東趨。卽可督率舒通額。恆

齡等盡力追擊。以收聚殲之效。陳國瑞一軍應令扼紮何處。截剿竄賊。並著僧格林沁酌量調派。官文務當督飭水軍。力固江防。陸路迎剿竄逆。豫軍到楚。一併歸官文節制調遣。以資得力。將此由六百里諭知僧格林沁。官文。劉蓉並傳諭唐訓方知之。○又諭熙麟奏慶陽情形緊要。不能迅赴蘭州。慶防兵勇在環縣擊賊獲勝。甯夏滿城被圍日久。亟待援兵。陝省截留甘餉。並鈔錄林壽圖原函呈覽。

暨遵查恩麟奏報鳳翔回匪情形各摺片。前因甘省軍情緊要。慶陽僅辦糧臺轉運。文煜到後。已有大員接辦。是以疊諭熙麟迅赴蘭州省城。接印任事。茲據奏稱平涼大軍將次合圍。定邊兵勇將次進征。恐敗匪紛竄肆擾。分我兵力。且近獲賊供。刻有東竄之志。慶陽之防。勒喫緊。實倍往昔等語。所奏自係實在情形。卽著熙麟暫駐慶陽。會同文煜等。於徵兵籌餉各事宜。妥為調度。恩麟暫權護篆。辦

理有無偏謬。仍著留心隨時察看。不得存兩人分任之見。稍存諉卸。現在漢中髮逆悉數東竄。鄂北襄隨一帶。到處傳烽。僧格林沁駐紮楚豫之交。勒辦髮捻。斷不能移師西向。都興阿由定邊一路前進。計現在已入甘境。雷正綰尚稱能戰。陶茂林亦已抵甘。著熙麟會同該提督飭令各營將士。迅克平涼。節節掃蕩。以期早日肅事。慰朝廷西顧之憂。甯夏滿城被圍日久。望援綦切。訥欽兵勇雖有七千

餘名之多。大都未經戰陣。趙延煥所募勇丁。既不能符三千之數。熙麟令先招勇丁一千名。並飭遊擊羅元勛等管帶環縣防勇一千名。馳往定邊。與趙延煥之兵一同進剿。卽著照該督所擬。迅飭該員弁分路前進。訥欽之軍。已歸都興阿統帶。著都興阿酌量先挑勁兵一千名。力解甯夏滿城之圍。並分兵越花馬池而西。逼近黃河駐紮。扼賊東竄。並催梁生嶽拔隊前進。儻仍前逗遛。卽著嚴叅懲辦。

雷正綰攻克平涼後。卽鼓行而西。與都興阿會合進兵。熙麟籌解軍火。遇事和衷籌商。以期共濟。甘省餉糈不繼。關繫非輕。前經張集馨奏動支山東河南等省解甘餉銀。截留分撥各營。當經諭令咨明熙麟等按款詳查。所有熙麟慶陽軍營餉需。仍著劉蓉懷遵疊次諭旨。實力接濟。斷不准膜視推諉。貽誤事機。鈔呈林壽圖信函二件。著鈔給劉蓉閱看。案入前次交查之件。一併查明辦理。熙麟請令

穆圖善帶馬隊由定邊草地赴甘。穆圖善前已授為荊州將軍。令其帶勇赴楚。該將軍現已屯兵瀟橋。著卽統率姜玉順等軍。仍遵前旨。迅赴楚北會剿。正在寄諭間。據雷正綰奏。請飭多隆阿所部數營。撥歸都興阿統率。援勦甯靈。並曹克忠平毀長甯驛馬鹿鎮兩處賊巢。劉蓉奏生擒曹逆。並將餘匪挖捕淨盡。蔡逆被勦西竄。官軍追剿堵擊情形。督催姜玉順等拔營赴楚等摺片。雷正綰屢獲大捷。俟攻克平涼。仍遵十九日諭旨。與都興阿和衷商榷進兵。多隆阿所部。除姜玉順等馬步各隊。已撥赴楚北。此外如尚有餘兵。固可撥赴甘省。如無兵可撥。卽著劉蓉將所部酌撥若干。赴雷正綰軍營。以厚兵力。平郡城外援賊。勦滅淨盡。城賊之勢自孤。著雷正綰飭令陶茂林等乘勝進逼。迅奏膚公。曹克忠一軍。著仍遵前旨。飭令回隴。或駐紮藍屋。以資控制。逆首曹燦漳既經擒獲。餘黨挖斬殆盡。仍

著劉蓉分飭各將士。將零星匪匪悉數殲除。蔡逆被勒西犯。探悉不能偷越興安。思由鎮安竄入甯陝老林。趨佛坪褒沔。南出昭廣。以逞回川之謀。現已闢入鎮安大小心川。並將小心川附近一寨攻破。逆眾尚有三萬之多。設使偷渡漢江。則川陝之蔓延滋甚。著李雲麟由後追躡。毋令賊匪得以喘息。劉蓉卽檄飭蕭慶高等移得勝之師。分扼江口一帶。截其上竄之路。何勝必等會合邀擊。儘竟竄近

川疆。著駱秉章分飭在防將士。並地方文武。嚴密截擊。以收聚殲之效。劉蓉俟穆圖善起程後。卽出省督師。或徑趨潼商。或先赴鎮安。著斟酌緩急情形。隨時具奏。將此由六百里各諭令知之。○又諭熙麟奏接據阿拉善親王貢桑珠爾默特咨稱。賊匪大隊在甯夏滿城西南兩處紮營。圍攻甚緊。請飭該王選精壯蒙兵親身統領從磴口進邊列陣等語。甯夏滿城被圍甚急。靈州等處賊氛甚熾。現命

都興阿督辦甘肅軍務。由定邊取道馳援甯夏。大兵一到。諒不難迅解重圍。據生擒賊供。回匪有東竄之意。設或被勒鋌走。肆意東趨。勢將蔓延為患。愈難收拾。著理藩院轉飭貢桑珠爾默特。挑選精壯蒙古兵丁數千名。親身統帶。從磴口進邊列陣。嚴扼竄越。遇賊卽擊。以勒為防。其北路平洪孤城等處。並著撥兵實力防守。毋得有名無實。貽誤事機。致干咎戾。將此諭令知之。○考試應開列試差滿

漢二品以下京堂各官於上書房。○以江西玉山縣城解圍出力。賞遊擊曾光榮巴圖魯名號。署知縣候補同知直隸州知州章澂等花翎。知縣余汝霖等藍翎。餘加銜升敘有差。○以陝西漢中生擒首逆曹燦漳。賞提督蕭慶高白玉翎管一枝。火鐮一件。大荷包一對。小荷包二箇。總兵官謝正球。副將趙緒慶一品封典。總兵官蕭德見等加銜升敘有差。○以甘肅涇州勒賊獲勝。賞遊擊徐定邦等花

翎知縣容貴等藍翎餘加銜升敘有差○以陝西克復盤屋縣城出力賞副將張紹武楊正義榮立茂楊順惠鄭開發參將彭文林蘇長青鄧得源徐德光胡勝得張仕順廖順得陳祥盛姚文廣遊擊羅懷玉王占勝都司周大華劉魁元高得勝鄭國富陳時芳巴圖魯名號委參領常存等花翎驍騎校果勒敏等藍翎餘加銜升敘開復有差予陣亡參將張榮德等一百三十四員祭葬世職加等○予

湖北應山陣亡哲里木盟三品台吉阿爾薩朗祭葬世職加等○己亥

孝慎成皇后忌辰遣官祭

慕陵○諭內閣據僧格林沁奏用兵之道首貴嚴明偵探知己知彼調度戰守方能合宜近見各路軍營奏章每以賊眾兵單為詞獲捷之報絡繹不絕而賊勢愈眾蔓延愈廣總由領隊之員不能確探賊情賊至不肯迎頭堵擊賊去又不肯跟蹤追剿但敷衍出境卽報

勝仗故意以少報多諱敗為勝豫為冒功邀賞地步握兵符者既不能身臨前敵復不知詳加查考率行據稟入告相沿成習亟須認真整頓等語各路軍營惡習以少報多諱敗為勝疊經通諭各該統兵大臣及督撫大吏痛除積弊不啻三令五申茲覽僧格林沁所奏是各路軍營積弊仍未革除該統兵大臣等仍不能認真整頓似此積習日深何以殄滅賊氛又安黎庶僧格林沁此次督師由豫

入楚所言軍營各弊自必確有見聞該大臣老於用兵惟能真實不欺故能所向克捷洵足為各路軍營之法嗣後各路營員及統兵大臣等於賊勢之多寡接仗之勝負均須字字從實奏報如仍任意鋪張未能掃除積習一經有人參奏必將捏報軍情之營員及統兵大臣等一併從嚴懲治決不姑容僧格林沁督師皖豫楚三省之交如有似此情弊一經見聞所及卽著指名奏參懲一儆百以挽

顏風庶幾各路軍營不敢視朝廷諄諄誥誡為具文也。○又諭麒慶奏請飭土默特旗迅將應行質訊旗員解案一摺。前因土默特貝勒旗老頭會綽金汰那木薩賚等聚眾滋事。及該旗塔布囊察固特古爾圖等呈控綽金汰等抄搶斂錢等情。先後交麒慶查辦。經麒慶飭令該旗貝勒將案內干涉旗員按名解案質訊。迄今半年之久。並無一名解到。實屬有心延玩。著理藩院迅即行知土默特旗扎

薩克貝勒散巴勒諾爾贊速將老頭會案內干涉各旗員按照麒慶前次單開名數勒限迅速提齊解赴熱河。交該都統歸案質訊。儻再抗不交出。即著理藩院將該貝勒從嚴奏叅。○諭議政王軍機大臣等御史宗室載清奏風聞北新倉花戶王得志影射身後辦事郁三梆子等把持倉務。仍恐有撓合偷抵惡習。請飭嚴拏懲辦等語。現在漕糧將次抵通。自應將倉蠹隨時拏懲。以清積弊。著步軍統

領衙門順天府五城御史按照摺內所指首要各犯。選派員役嚴密查拏。務期悉數弋獲。盡法懲治。毋任一名漏網。儻承緝吏役私縱賣放。致令聞風遠颺。即著將該吏役從重究辦。原摺均著鈔給閱看。將此各諭令知之。

大清穆宗繼天開運受中居正保大定功聖智誠孝信敏恭寬毅皇帝實錄卷之一百一

大清穆宗繼天開運受中居正保大定功聖智誠孝信敏恭寬毅皇帝實錄卷之一百二

臣等謹將本年十月內奉 上諭旨開列如左  
一、諭旨：著將前據吳棠奏業已拔營前赴徐州聽候僧格林沁調遣此軍驍勇善戰前諭僧格林沁調赴臨淮此時賊雖未入皖疆而軍情旦夕變遷逆跡慄悍尤宜先為籌畫以備不虞著僧格林沁即飭該提督一軍擇要駐紮或即調赴臨淮如賊勢東趨即行馳往援應以資扼截毋稍疏虞本日據穆圖善奏已飭常星阿六起馬隊徑赴僧格林沁軍營聽候調遣此軍到後著該大臣妥為調度飭令與前敵馬步各軍迅將楚豫交界之賊四面圍剿毋任東竄並遵前旨酌撥馬隊數百名赴喬松年軍營喬松年即將克蒙額馬

同治三年甲子五月庚子朔

上詣綏履殿問

慈安皇太后安平安室問

慈禧皇太后安至己巳皆如之○以神靈助順

頒湖北荊州府

關帝廟扁額曰靖寇綏疆○諭議政王軍機

大臣等喬松年奏皖北布置防守情形一摺

髮捻麇聚楚地聲言回救金陵若由楚東竄

皖北則六安首當其衝現在駐守六安有道

員蔣凝學六營喬松年復派總兵王才秀帶

所部一千五百人駐守三河尖為六安接應並飭駐紮正陽關之總兵朱淮森整頓聽調其壽州定遠等處亦皆有營防守所籌尚屬妥協惟髮捻股數眾多現在楚省德安雲夢應城隨州京山天門等處縱橫數百里徧地皆賊而皖北防兵究嫌單薄恐不足以資堵禦陳國瑞一軍前據吳棠奏業已拔營前赴徐州聽候僧格林沁調遣此軍驍勇善戰前諭僧格林沁調赴臨淮此時賊雖未入皖疆而軍情旦夕變遷逆跡慄悍尤宜先為籌畫以備不虞著僧格林沁即飭該提督一軍擇要駐紮或即調赴臨淮如賊勢東趨即行馳往援應以資扼截毋稍疏虞本日據穆圖善奏已飭常星阿六起馬隊徑赴僧格林沁軍營聽候調遣此軍到後著該大臣妥為調度飭令與前敵馬步各軍迅將楚豫交界之賊四面圍剿毋任東竄並遵前旨酌撥馬隊數百名赴喬松年軍營喬松年即將克蒙額馬

隊騰出。飭赴揚州。聽富明阿調用。喬松年另片奏李世忠所散勇丁。歸農者不少。亦有游手之人。誠恐流而為盜等語。除全來等處。甫經交出。該地方久為李世忠盤踞。官民不相聯屬。歷有年所。此時控取撫字。及一切善後事宜。至關緊要。喬松年身任皖撫。責無旁貸。務即飭令各該地方官妥為整頓。撫綏善類。驅逐匪徒。毋使無業游民。復行嘯聚滋事。以靖地方。其署滁州知州關平相在任有年。

既無裨益。即著另選賢員接署。以資治理。將此由六百里各諭令知之。○又諭徐宗幹奏。髮逆竄入閩省。建甯縣城被陷。旋復。現派司道大員。出省督勦一摺。另片奏林文察即日內渡。並催曾玉明回省各等語。此次髮逆由江西竄入建甯縣境。署都司佟慶帶兵堵截。力戰陣亡。而該縣文武員弁。乃以分駐關隘為辭。置城守於不顧。以致賊氛一至。城即被陷。賊去之後。又捏報克復。以為請獎地步。種

種畏葸粉飾。甚屬可惡。乃徐宗幹並不實力查辦。輒據屬員稟報之詞。含混入奏。封疆大吏辦事如此。顯預安望其整飭戎行。綏靖疆圉耶。著傳旨嚴行申飭。所請將已革參將吳連陞開復原官。並克復縣城出力文武存記。彙獎之處。著不准行。其失守地方之文武員弁。並著徐宗幹查明。有無聞警逃避情形。從嚴參辦。至各該員等分駐關隘一節。何以先期並不稟報。迨至縣城失守。始藉口於此。希

圖卸罪。徐宗幹務當認真查出。按律懲辦。並著左宗棠查明。如有前項情節。即將各該員弁嚴行參辦。該逆既有分股由汀回粵之說。甯化歸化一帶。防務喫重。該撫當嚴飭在防員弁。實力堵剿。不可再有貽誤。自干重咎。此次所派之道員張啟煊。從前帶兵。甚不得力。徐曉峰在皖營時。疊次被人參奏。徐宗幹於該二員。何以如此信任。仍著隨時察看。如始終不知奮勉。即著另選妥員。接統其軍。毋令



債事。左宗棠前奏請飭林文察內渡勦賊。令康國器由浙入閩。會合張運蘭粵師夾擊。曾諭令該督等照辦。現在賊氛正熾。左宗棠務當妥籌兼顧。儻張啟煊徐曉峰等不甚可靠。著左宗棠另行選擇知兵之員。酌量改派。徐宗幹當恪遵前旨。迅速催提林文察康國器兩軍。剋日馳赴延邵一帶。迎頭痛勦。毋令蔓延腹地。不可收拾。將此由六百里各諭令知之。○又諭徐宗幹奏請飭催廣東等省欠餉。一摺。逆匪由江入閩。軍情甚形喫緊。儻令餉項缺乏。勢必貽誤戎機。於全局甚有關係。著駱秉章毛鴻賓郭嵩燾張之萬沈桂芬劉蓉迅將欠解前項閩餉。趕緊籌措。派委妥員。星馳解閩。以資接濟。並著毛鴻賓郭嵩燾將應解添撥援浙軍營按月協餉銀十萬兩。一併陸續籌解。毋再遲延。前因江西餘賊悉趨閩界。延平軍情喫緊。諭令毛鴻賓郭嵩燾檄令張運蘭由潮州入閩勦賊。現在閩省賊勢甚

重。兵力不敷。勦辦亟須添撥勁旅。藉資埽蕩。著毛鴻賓郭嵩燾懍遵疊次諭旨。飛催張運蘭督率所部。星馳赴閩協勦。儻再任意逗留。或任令延不起程。致令閩省賊匪蔓延腹地。掣動全局。恐毛鴻賓郭嵩燾不能當此重咎。也將此由五百里各諭令知之。○又諭穆圖善奏遵派馬步官軍援楚。現已起程。並請飭河南備辦糧草等項。各摺片。陝省援楚官軍。經穆圖善派撥藍斯明蕭河清步隊。作為頭起。姜玉順步隊。作為二起。剋日陸續前進。均歸官文調遣。常星阿等六起馬隊。徑赴僧格林沁軍營。姜玉順一軍。已於四月十七日起程。其藍斯明蕭河清並常星阿等軍。究於何日起程。未據穆圖善聲敘。著該將軍卽飭藍斯明等馬步各隊。迅速分赴僧格林沁官文軍營。不得稍事延緩。現在分撥楚豫各營兵勇。為數已不為少。甘省兵力尚單。不敷攻勦。且刻下甘省回氛尤熾。亟應移緩就急。昨據

雷正綰請調陝營兵勇助勦。著穆圖善卽於所部之現存十營內分撥數千。飭令迅赴甘省。聽候雷正綰調撥。毋得藉詞推諉。西蒙克西克兩起馬隊並陳天佑所統東治兩營均於十六七兩日拔隊赴定邊堵勦。著都興阿於此起兵勇到時妥為布置。其金順所部馬隊四百名經穆圖善派令赴省以補西蒙克西克之缺。惟西安省垣現已安堵如常無須多兵防守。所有金順馬隊仍著穆圖善飭令前赴都興阿軍營其前往定邊之各營馬隊應需軍火糧餉卽著劉蓉飭令陝西糧臺按月支領。至蕭河清等援楚兵勇應從豫省地方經過現已由穆圖善糧臺備銀數千兩帶赴河南一帶會同經過州縣豫行備辦尚恐價值不敷著張之萬速飭河南一帶州縣設法墊辦准其作正開銷卽在該省欠解協濟穆圖善軍營餉下劃扣歸款。穆圖善俟分撥各營事竣卽著剋日起程赴楚。官文俟穆圖

善到後妥商調度務當力遏賊匪東竄皖疆之路就地殲除毋任蔓延。將此由六百里各諭令知之。○又諭勞崇光等奏官軍追勦何二逆股獲勝清鎮解圍長寨等城被陷卽復下游各屬勦匪疊勝各摺片開州逆匪何二糾黨復圍清鎮縣城經林自清等軍認真守禦城圍立解賊仍向開州遁去其被匪竄擾之定番廣順長寨等城亦經趙德昌等先後收復卽著勞崇光張亮基嚴督派出各軍乘勝進攻由朱昌堡五里橋等處跟蹤追勦務將此股賊匪聚殲毋留餘孽。下游之龍泉湄潭並石阡府清江廳思州府等屬之匪雖經官軍疊獲勝仗惟該逆並未殲除淨盡亟應分投勦洗以期早就肅清著卽飭各路官軍實力埽除為一鼓蕩平之計。獨山州屬之已賴旁寨等處賊匪恃險負隅必須厚集兵力方足以資攻勦。所有全祖凱姚華勝所部兵練四千餘名卽著該督撫飭令帶往獨山荔

波分界處所。會同楊廷桂等分投勦辦。並催周洪印等軍。由黎平古州一路跟追。以收夾擊之效。另片奏。林自清隨同官軍勦匪。所向有功。實堪嘉尚。著俟該員起病後。准其以原官酌量簡用。以示鼓勵。將此由六百里各諭令知之。○以正黃旗漢軍副都統載崇署正紅旗滿洲副都統。正藍旗滿洲副都統綿宜署正黃旗蒙古副都統。○補鑄陝西孝義廳城守營都司關防。從署巡撫張集馨請也。○

以貴州下游各屬勦匪獲勝。予知縣李廷璧以同知直隸州知州用。並賞花翎。府經歷蕭樹滋等藍翎。餘升敘有差。○以貴州定番長寨廣順各廳州城被賊竄擾。革知州劉琦。知縣德慶。白墉職。仍戴罪效力。○以貴州清鎮縣城解圍。並收復定番各城。予總兵官趙德光以提督用。賞同知張軸新等花翎。餘升敘有差。予陣亡千總王柏齡等十二員祭葬。世職加等。○予福建建甯陣亡都司佟慶祭葬。

世職加等。○辛丑。諭議政王軍機大臣等前據御史周恆祺奏。稱奉天省吏治民風漸不如前。宜籌豫防之策。一摺。當交寶琨查明具奏。茲據寶琨查明。先將辦理大概情形覆奏。據稱奉省積案之多。由於奏交咨交及省控各案。均委治中糧廳承德縣三處審辦。該員等本任政務。已屬殷繁。不免顧此失彼。是以愈積愈多。現擬另設讞局。擇候補中聽斷優長者。分案審理。並擬將委審各員。分別獎懲。又州縣界址遼闊。捕役無多。營兵數少。捕務難望起色。擬令旗署提捕營兵。與地方有司聯絡聲勢。相輔而行。又擬揀調各省廉能各員。並陳明州縣政績。候旨升用等語。所籌尚屬周妥。所有設立讞局。獎懲委審各員。及派委旗兵捕盜各條。均著照所議辦理。其揀員籌餉統兵督緝章程。即著玉明寶琨德椿妥速定議具奏。至捕役及捕盜營兵丁。素與盜匪暗通聲氣。尤當責成營員及地方官隨時

訪察。若因兵役為數無多。遽議增添。恐其中愈多流弊。不可不詳加斟酌。至所請於各省州縣中著名廉能各員內。揀調四員。飭發奉省補用之處。著俟該將軍等奏到時。再降諭旨。其所稱於州縣歷任三年。據其政績事實。陳明候旨錄用。並不得列入保舉案內。以杜瞻徇冒濫一節。亦著照所請行。惟立法固期周密。而致治尤在得人。奉省吏治捕務廢弛已極。非力加整頓。不足以除積習而挽頹風。

王明等務當振刷精神。實力奉行。總期吏治捕務日有起色。方為不負委任。儻有名無實。僅以更定章程。一奏塞責。致地方事務益形廢弛。恐該將軍等不能當此重咎也。將此各諭令知之。○又諭。熙麟、文煜奏糧臺用款浩繁。供支雷正綰各營。以及慶環等處兵勇之餉。每月約需銀十餘萬兩。目下存款僅有一萬餘金。而軍火器械糧石虧斤。毫無儲蓄。各省協撥之餉。除山東解到銀一萬兩。山西河

東道報解起程銀五萬兩外。其餘杳無消息。請旨飭催等語。甘肅回氛徧地。攻勦正當喫緊。而餉需奇絀。又為他省所未有。若不力籌接濟。萬一飢軍譁潰。於西北大局。關係甚重。著駱秉章、閻敬銘、沈桂芬、張之萬、懷遵前旨。迅將指撥甘省軍餉。無論何款。移緩就急。各湊銀三十萬兩。星速委解慶陽糧臺。不准再有延誤。並著劉蓉督飭藩司實力籌解甘省兵糈。其陶茂林一軍。仍照舊供支。毋得稍存

膜視。將此由五百里各諭令知之。○引見前陝西知府齊琮。得旨著發往陝西交劉蓉差遣委用。○撥直隸山東火藥各五萬斤。鉛丸各二萬五千斤。火繩各五萬丈。解赴甘肅慶陽糧臺備用。○壬寅。

孝誠仁皇后忌辰。遣官祭。

景陵。○諭內閣。奎棟奏葉爾羌參贊大臣景廉於正月初四日起程進口就醫。順道回旗等語。覽奏實堪詫異。前據常清奏景廉因病咨

請開缺。當經降旨賞假一箇月調理。毋庸開缺。並據景廉自行陳請開缺。亦經批示賞假調理。景廉如果病勢沉重。亦應再行具摺陳請。靜候諭旨遵行。乃於發摺後。迫不及待。徑自交卸起程進口。殊屬輕率。景廉著傳旨嚴行申飭。卽著無論行抵何處。迅速折回。葉爾羌本任。毋得任意遷延。致干重咎。○又諭。奎棟奏署任大臣因病請開缺回旗調理一摺。署英吉沙爾領隊大臣前烏什幫辦大臣文藝在防所患病。經奎棟派員查驗屬實。文藝前已因案降調。著准其回旗調理。並著現署葉爾羌幫辦大臣托克托布。卽回英吉沙爾領隊大臣本任。現署伊犁察哈爾領隊大臣武隆額。卽回葉爾羌幫辦大臣本任。烏什幫辦大臣。前已有旨簡放伊昌阿。卽著該部催令伊昌阿迅赴烏什幫辦大臣本任。以上各員。均著奎棟迅速咨催赴任。以重職守。○諭議政王軍機大臣等。文興奏烏什兵餉缺乏。

請飭阿克蘇辦事大臣迅籌接濟一摺。現在伊犁軍務未竣。烏什尚未撤防。儻因餉項不繼。致令該兵丁等枵腹荷戈。不但防守不能得力。轉恐別生事端。著富珠哩。崇恩將該處所徵稅務。無論何項。隨徵隨撥。接濟烏什兵餉之用。儻稅課不足。卽於鼓鑄項下。每月籌撥錢五百串。以濟兵食。毋得稍事推諉。致滋貽誤。將此各諭令知之。○盛京將軍玉明等奏籌添馬匹。以備偵探遊緝得旨。著照所擬派設馬匹。認真緝捕。不准有名無實。稍涉含混。○以山西潞安澤州圍防出力。賞參將伊克唐阿花翎。按察使鍾秀等加銜升敘有差。○癸卯。諭內閣。張之萬奏請將規避延不赴任之武弁革職一摺。河南彰德營安陽汛千總武恪銘。經前任巡撫瑛榮題補歸德鎮右營守備。時閱三載有餘。屢經張之萬飭催赴任。該員膽敢無故逗遛。實屬有心規避。僅予革職。不足蔽辜。武恪銘著卽行革職。從重發

往軍臺效力贖罪。以肅功令而儆延玩。○諭議政王軍機大臣等。馮子材等奏。分兵戍守金壇丹陽各城。並請分撥兵勇一摺。丹陽攻克之後。經馮子材等派出將弁。將潰賊捕斬殆盡。張文德現在駐守金壇。陶茂森現在防守丹陽。著卽飭令該總兵等統領在防將士。嚴密梭巡。查拏土匪。與句容東壩等處防兵。聯絡聲援。嚴扼上游竄賊。毋稍疏懈。所稱鎮防兵勇。除留戍鎮江丹陽金壇三城外。尚可抽出四千名。或派往江皖各省。或分起遣撤等語。現在髮逆層聚楚疆。時思東竄。皖北防兵。究嫌單薄。此項兵勇四千名。著曾國藩。喬松年。酌量情形。如可得力。卽咨行馮子材等。調往臨淮。歸喬松年調遣。以資防剿。如體察皖北情形。無須添兵。此項兵勇。卽可不必調往。著一面奏聞。一面咨會馮子材等。分起妥為遣撤。以節糜費。將此由五百里各諭令知之。○又諭慶昫奏。接奉二月寄諭。並近日防

守情形一摺。據稱甯夏滿城被圍日久。聞派訥欽往援。人情欣盼。近日賊數已減。賊情亦渙。聞有援軍。蒼黃情形畢露等語。自尚未知。簡派都興阿督辦甘肅軍務。進援甯夏之旨。甯夏情形。雖較前稍鬆。而賊未解圍而去。必尚為困獸之鬪。著都興阿仍遵前旨。由定邊一路前進。並先挑勁兵一千名。疾趨甯夏。迅解城圍。該將軍大兵繼進。卽酌度情形。或分兵越花馬池而西。逼近黃河駐紮。扼賊東竄。此股賊匪已成強弩之末。該將軍先聲所到。賊膽早寒。必能立奏膚公。保全合城生命。慶昫常陞所籌勸辦各節。均尚周密。著仍就現有兵力。實力防守。並探明援軍已至何處。約期夾擊。熙麟卽飭趙廷烺。羅元勛等兵勇。進援甯夏。訥欽之兵。已到何處。悉歸都興阿節制。都興阿軍火。由慶陽糧臺支發。雷正綰餉需。著劉蓉隨時籌解。不得延誤。平涼援賊已盡。諒可卽日得手。著雷正綰催督各兵一鼓

攻拔。以便騰出兵力。節節掃蕩。慶陽需餉甚殷。沈桂芬遵照昨日諭旨。速解三十萬兩。赴慶陽糧臺。並將晉省所製炸礮火箭等項。酌量解赴都興阿軍營。以資利用。將此由六百里各諭令知之。○以捐備京倉米價。賞還已革江南河道總督潘錫恩原銜。○予江蘇蒲千村被戕千總李鴻鈞祭葬世職。如陣亡例。○甲辰。諭議政王軍機大臣等。曾國藩奏東壩防軍截擊丹陽竄賊獲勝。蘇賊續竄徽州。被擊潰敗。並各路軍情賊情各摺片。丹陽敗賊意在衝出東壩。由皖南併竄江西。經鮑超等督軍痛剿。大挫兇鋒。江陰等處敗賊。續竄徽郡者。亦經唐義訓。金國琛。毛有銘等於鍾塘嶺五弓橋一帶。疊獲大勝。擒斬解散。約去十分之八。勦辦甚屬可嘉。蘇浙羣賊。由徽上竄。約分六股。第一起偽溥王等尚踞南豐。並分竄汀州等處。第二起陳炳汶。汪海洋等延蔓於鉛山境內。第三起偽侍王攻陷弋陽。退

至金谿。將與南豐一股會合。第四起股匪。雖經唐義訓等所破。而丹陽逸賊。悉趨廣德湖州。其湖郡之堵輔二悍酋。亦將接踵併犯江西。是目下軍情。江西之待援。實比皖北為尤急。曾國藩調周寬世。金國琛兩軍分駐祁門。漁亭等處。迎堵續至之賊。而檄鮑超全隊上援江西。並撥餉銀十萬。以速師行。斟酌緩急。甚合機宜。即著飭令鮑超剋日拔隊援江。毋稍延緩。楊岳斌督辦江西皖南軍務。責無旁貸。即著懍遵前旨。迅赴江皖交界扼要處所。居中駐紮。督率諸軍。會同劉典力圖掃蕩。沈葆楨督飭江右諸軍。實力防堵。並將南豐攻拔。盡殲踞賊。毋令旁竄。曾國藩力疾強起。照常治事。具見公忠體國之忱。此時上游髮捻。圖援金陵。而金陵圍師。與江西羣賊。亦均在危疑震撼之際。軍事方殷。非該大臣督率調度。不能竟此全局也。將此由六百里各諭令知之。○又諭。官文奏官軍追剿獲勝。下游情



形喫緊。派兵分勦。請截留英毅湘果各營各摺片。隨州賊匪盤踞八里畈。經總兵楊朝林擊敗。逃竄馬平港。僧格林沁馬隊馳往應山。楊朝林移營德安。總兵梁洪勝將棗陽南竄之賊擊敗於安郡。白口尹澄河等處。並將圍逼天門縣城及竄擾阜市之另股各匪擊退。現在天門應城德安等處賊勢甚重。其擊敗之賊復回竄隨州之南山。官文現咨商僧格林沁駐軍德安。會軍夾擊。著僧格林沁卽酌量情形移軍前往。四面兜勦。並分兵繞出賊前。力遏賊匪東竄之路。總期就地殲除。毋令闖入皖境。武昌省城防守事宜。卽著唐訓方嚴密布置。不可稍涉大意。前據穆圖善奏派藍斯明姜玉順蕭河清等步隊。剋日起程。此時計已行抵鄂境。僧格林沁現調蕭河清一軍赴該大臣軍營。著卽飭令該總兵前往聽候調遣。其餘步隊各軍應分隸何路。著僧格林沁官文會商調度。常星阿所統馬隊俟到

鄂後。卽著歸僧格林沁調遣。前據嚴樹森奏請將陝西所派英毅等二十營撤回。當因英毅六營已入楚境。應否留楚。諭令官文知照。劉蓉辦理。現據官文奏稱賊蹤去秦較遠。陝軍勢成尾追。不能繞前迎擊。應需餉糈亦難籌給。著官文。劉蓉卽檄令此軍無論行抵何處。迅卽撤回陝境。其李雲麟所統湘果等十四營。前經劉蓉議令暫緩撤退。本未令其留楚。著劉蓉仍遵前旨。責令在陝南搜捕餘匪。毋庸飭令赴楚。所有英毅六營勇丁。應否留防陝境。或飭令赴援甘省。及酌量裁撤之處。著劉蓉酌度辦理。將此由六百里諭知僧格林沁。官文。劉蓉。並傳諭唐訓方知之。○又諭官文奏請飭吉林挑選馬隊赴楚等語。秦豫髮捻合股竄擾楚疆。亟需馬隊分途策應。官文現因副都統安圖等管帶遣撤傷病官兵回旗。卽令更換精壯赴楚。另籌銀二千兩。交安圖帶赴吉林備用。惟吉林邊防緊要。所有



存營馬隊。疊經各路軍營奏撥。在防者已屬無多。楚北髮捻紛乘。應需馬隊兜擊。亦屬萬不容緩。卽著景綸酌量情形。務於萬難分撥之中。設法抽撥精壯官兵一百名。交安圖帶赴楚省。以厚兵力。其吉林邊防。如經此次調撥。兵力或形單薄。並著妥為籌畫。嚴密布置。毋稍疏懈。將此由五百里諭令知之。○兩江總督曾國藩奏。江南軍務尚未肅清。請仍展緩本科及應補戊午辛酉壬戌各科鄉試。下部知之。○以光祿寺少卿鄭錫瀛為廣東鄉試正考官。翰林院侍講學士惠林為副考官。編修黃錫彤為廣西鄉試正考官。吏部郎中王祺海為副考官。○予江南丹陽陣亡副將張遇春等四十四員祭葬。世職加等。○乙巳諭內閣。前因逆回闖入甘肅靈州所屬之惠安堡。駐紮該處之甯夏鹽捕通判秦自德先期公出。恐有捏飾。當經諭令恩麟查叅。茲據恩麟奏稱。查明秦自德於軍務喫緊之際。借

督催鹽課為名。先期遠出。以致地方失陷。且於收復後。並不卽時回堡。又不靜候查辦。輒復攜眷遠徙涼州。似此行止自便。置官守於不問。殊出情理之外。秦自德著卽行革職。從重發往新疆效力贖罪。以為規避取巧者戒。○諭議政王軍機大臣等。富明阿奏撤回南渡各軍。及水陸布置情形。並催調克蒙額馬隊各摺片。丹陽一城。前據馮子材等奏已派陶茂森前往接守。現在髮捻麇聚楚境。天門應城德安等處。賊勢甚重。該逆不能南竄。勢必東趨。是江皖各境之防。關係尤為緊要。富明阿前留守丹邑之楊心純五營。並詹啟綸所部五千人。卽著全數撤回。分籌布置。以資扼守。該將軍擬派副將劉成元等營。馳防天長等處。並令吳全美師船移泊瓜洲。以防上游竄賊。所籌均尚妥協。惟天六儀揚一帶。皆係坦途。無險可扼。務當飭令各營。互相犄角。聯絡聲勢。以防竄突。並隨時與曾國藩吳棠

喬松年所派分防皖北各軍聲息相通妥籌  
勦辦毋稍大意將此由五百里諭令知之○  
又諭喬松年奏續報皖北情形並派兵駐守  
滁州等處各摺片楚北賊匪分竄信陽應山  
等處賊蹤飄忽靡常不可不嚴為戒備該撫  
已飭臬司英翰駐守亳州以防土匪布置尚  
妥普承堯何紹彩兩軍經曾國藩派令分駐  
廬州巢縣斷難移動鮑超一軍昨據曾國藩  
奏稱仍遵前旨赴江西援剿亦未能分顧皖  
境陳國瑞一軍該撫擬令扼紮潁六之間著  
卽東甯僧格林沁辦理如兵力尚單可卽將  
馮子材派守金壇等處所餘兵勇四千名仍  
遵前旨酌量調赴臨淮以資防剿滁州天長  
等處業經吳棠等派遊擊張從龍等帶勇前  
往駐紮所有善後事宜卽著該撫飭令各州  
縣實心經理克蒙額馬隊前有旨俟僧格林  
沁酌撥馬隊到臨淮後再令赴揚茲據富明  
阿奏此項馬隊僅存八十人留於臨淮不能

成隊若早調來揚可以合成勁旅尚屬實情  
所請於常星阿未到之先卽飭克蒙額管帶  
赴揚以資得力之處著喬松年酌量辦理將  
此由五百里諭令知之○又諭徐宗幹奏逆  
匪竄陷甯化旋卽克復並分路追剿布置情  
形一摺江西竄匪闖入閩疆分股竄陷甯化  
縣城經官軍會合鄉團壯勇馳往攻剿卽將  
縣城收復餘匪分擾將樂歸化建甯縣境其  
皖浙逆匪李侍賢等股分由徽州開化竄至  
上饒鉛山廣豐等境內逼近崇安浦城等縣  
現經徐宗幹飭令署臬司徐曉峰等駐紮延  
平建陽策應北路道員張啟煊駐紮泰甯援  
應中路道員陳維漢駐紮將樂並飛催署總  
兵祿魁等援應清流長汀以顧南路卽著督  
飭徐曉峰等軍嚴密布置相機策應惟賊蹤  
飄忽靡常此次竄陷甯化之匪雖經諸軍擊  
退並未大受懲創此後恐尚有另股逆匪陸  
續竄入閩境徐曉峰張啟煊等軍是否得力

能否遏截兇鋒。著左宗棠、徐宗幹仍遵前旨。隨時察看。儻始終未能奮勉。卽另選妥員接統其軍。毋得稍有瞻徇。致滋貽誤。左宗棠前派援閩之康國器一軍。計已起程。林文察一軍。前據徐宗幹奏稱。卽日由臺內渡。卽著左宗棠、徐宗幹迅速催提。剋日馳往延邵一帶迎頭截擊。並飛提張運蘭所部。卽日由粵入閩。會同康國器等軍。儘力兜剿。毋任逆蹤紛竄。腹地江西賊勢蔓延。曾國藩所派之周寬世、金國琛等軍。前據奏稱。留紮祁門、漁亭等處。未卽入江。卽著飛催鮑超迅率所部。剋日馳援江西。毋再延緩。楊岳斌前經諭令馳赴江皖交界駐紮。督辦江西皖南軍務。本日據熙麟奏。衰病難支。陳請開缺。當經降旨允准。並將楊岳斌補授陝甘總督。甘省回氛甚熾。亟需大員前往勦辦。惟現在江皖軍務正形喫緊。著楊岳斌仍遵前旨。迅赴該二省適中之地。擇要扼紮。督率各軍。會同劉典所統之

師。力圖埽蕩。俟江皖毗境肅清。卽行奏請馳赴新任。其江西與閩省界連各境。著沈葆楨嚴飭在防各軍。與閩軍實力防剿。不得稍分畛域。並迅飭席寶田等將南豐攻拔。盡殲醜類。毋任擾及他境。徐宗幹奏稱建甯甯化相繼失守。雖旋即克復。究屬防堵不力。自請議處等語。徐宗幹著交部議處。該二縣失守地方。文武各員。並著左宗棠、徐宗幹查明參辦。毋稍寬縱。將此由六百里各諭令知之。尋吏部議。徐宗幹照例降二級留任。案關軍務。無庸查級紀議。抵從之。○又諭都興阿奏遵旨赴防。行抵太原。趨程前進一摺。另片奏請調兵勇人員。及抽撥洋槍各項等語。熙麟奏通籌甘省軍務。仍請派令僧格林沁督剿。恩麟奏籌辦甯夏軍務情形摺片。都興阿行抵太原。接奉寄諭。刊刻木質關防。著卽照辦。並著督率各兵。星馳前進。遵照疊次諭旨。迅解甯夏之圍。毋稍延緩。所請抽撥洋槍八百桿。已

諭知管理神機營王大臣照數撥解另單請調文武各員。除候選道榮祿另有差委其侍衛額爾登布等四員均諭令赴甘肅軍營差委矣。該將軍又以曹克忠勇敢善戰請令赴營並令劉蓉另派駐防隴邊等語。曹克忠駐守汧隴一帶係為豫防甘肅逆氛回竄秦中而設能否另派勁旅防守抽出該總兵所部赴都興阿軍營調遣著劉蓉酌度具奏。熙麟奏哀病情形並懇暫派文煜代理現辦公事。

本日已有旨令熙麟開缺回旗調理。熙麟起程以後所有慶陽防守及糧臺一切事務均交文煜辦理。文煜係棄瑕錄用之員務須振刷精神力圖報效以副委任。熙麟所請令僧格林沁督師赴甘其摺內所稱河南僅賸零匪該王現駐嵩縣自係得自傳聞均未確實。河南匪勢趨重湖北且時有東竄皖疆回救金陵之意該親王駐軍信陽州責任極重斷難西行甘肅現有都興阿督辦雷正綰幫辦

如果申明紀律節節剿辦無難立奏膚公也。思麟奏。滙陳籌辦甯夏軍務情形並密陳辦法一片殊嫌嘵辯梁生嶽辦撫賊匪既未獻城歸順則慶昫之不再羈縻嬰城固守自屬正辦。梁生嶽定安二員主撫無功是否藉以緩師意存畏葸著都興阿查明叅奏。思麟另片奏軍營鼓舞人材惟恃爵賞前奏各件或因道路羈延未據奉到或經部議駁斥未能盡准一切呼應不靈懇請於所奏事宜及保

舉人員俯賜准行等語朝廷用人行政一秉大公思麟前後所陳及保升各員亦多有奉旨俞允者他省軍營所奏亦多有奉旨駁斥者惟在權衡當否歸於至善該護督如果保舉與例相符措置悉無乖謬自當照行俾資觀感否則賞罰者天下之公器亦斷不能為該護督曲徇也將此由六百里諭知都興阿熙麟劉蓉文煜並傳諭思麟知之。○綏遠城將軍德勒克多爾濟等奏派撥歸綏防兵改

道前赴定邊。得旨所有一切操防事宜。仍當加倍整飭。不得稍形鬆懈。○漕運總督吳崇奏。遵旨布置淮徐防務。及撥兵赴滁助守。得旨。皖北防務緊要。陳國瑞一軍。著懷遵疊次諭旨。聽候僧格林沁檄調。卽行拔隊。其淮徐一帶。著姚廣武等嚴密布置。派防滁州之張從龍一軍。卽令趕緊赴防。以資扼守。○陝甘總督熙麟因病解職。以福建水師提督楊岳斌為陝甘總督。未到任前。以西安將軍都興阿署理。都興阿未到任前。仍以布政使恩麟暫行護理。○命前任廣東布政使文格赴署陝甘總督。都興阿軍營聽候差委。○予甘肅軍營病故提督經文岱祭葬卹廕。○丙午。諭內閣。古今治亂得失之源。聖賢身心性命之學。莫備於經。君臨天下者。所當朝夕講求。期有裨於治理。著倭仁。賈楨。選派翰林十數員。將四書五經。擇其切要之言。行為講義。敷陳推闡。不必拘泥排偶舊習。總期言簡意賅。仿

照大學衍義體例。與史鑑互相發明。將來纂輯成書。由掌院學士裝帙進呈。以備觀覽。○又諭。前因前任閩浙總督耆齡。叅劾福建詔安縣知縣錢寶懿等貪劣不職。當經降旨革職。所有捐釐舞弊等案。各歸本案查辦。嗣經徐宗幹奏稱。錢寶懿在詔安縣任內。勸捐運本。另收貼費。浮銷薪水等項。屬實。責令陪繳銀兩。茲復據徐宗幹奏接據錢寶懿稟稱。前署汀漳龍道汪如鑑。委員候補知縣方壽鏡索借不遂。架詞妄稟。並有指稱該署道派送節壽及勇糧巡費等事。請另派大員訊究等語。此案已革知縣錢寶懿。於捐釐舞弊一節。業經訊結之後。輒復翻控。牽涉道員。派送各費等情。虛實均應徹底根究。著英桂會同徐宗幹切實訊究。分別懲辦。以成信讞。○又諭。前據左宗棠。徐宗幹奏。叅總兵周萬遠與叅將陳英互相稟訐等情。當經降旨將周萬遠等革職審辦。茲據左宗棠等訊明定擬具奏。

此案已革總兵周萬遠雖訊明所部勇丁缺額及折扣勇糧係為藍旗小隊及長夫等項支用尚無剋扣入己情事究屬有違定例周萬遠業經革職著無庸議其扣支短額勇糧不准報銷卽著勒限追繳已革參將陳英冒支勇糧銀五百餘兩復向局員姜德興偏索薪糧形同無賴其牽控周萬遠謀害一節訊明毫無確據尤為誕妄陳英著卽發往軍臺效力贖罪其多領銀兩勒限監追照例辦理

○又諭前因左宗棠等奏參革員石棟等貪橫不法等款降旨令左宗棠徐宗幹嚴行審辦茲據奏稱查明該革員等被參各款分別擬結此案已革副將石棟因其子石渠得缺送給丁書謝銀二百四十兩且私託上司幕友交接書吏門丁鑽營謀缺又受莊煥文情託將莊元慶莊元高莊金提挑補額外實屬貪鄙不職著發往新疆效力贖罪並不准援免革書吳慶雲充當督署稟書起意擅騙收

受石棟銀二百四十兩實屬藐法著發近邊充軍並不准援免已革遊擊石渠代理參將係伊父石棟代為營求石棟被參各節該革員久已渡臺實不知情業經革職著免其置議前任浙江鹽運使莊煥文前在督署襄辦公事輒與石棟互相請託倚勢招搖實屬罪有應得該員業於浙江鹽運使任內殉難所得卹典著卽撤銷前任閩浙總督慶端失察幕友丁書舞弊例應議處業經另案革職著

無庸議莊煥文屬託拔補額外之莊元慶等三名均著卽行斥革○以浙江温州鎮總兵官吳全美為福建水師提督○丁未諭內閣官文奏都統銜鑲紅旗護軍統領舒保由湖北楊家河地方追剿紛竄髮逆斬賊甚多復於四月二十一日分路追擊二十餘里斃賊無算直抵壽山時已薄暮層岡深澗不利馬戰舒保見賊來甚眾直前賈勇力擣中堅與德隆阿等陷入重圍力竭陣亡等語舒保自

到湖北帶兵以來。屢卻悍寇。疊復名城。十餘年來。戰功卓著。此次因極力追賊。陷陣遇害。覽奏殊深悼惜。舒保著照都統陣亡例從優。賜卹任內一切處分。悉予開復。並加恩予謚。入祀昭忠祠。於湖北武昌漢陽黃州德安襄陽建立專祠。歷年戰績。並著宣付史館。伊子倭克吉訥侯及歲時。由該旗帶領引見。候旨施恩。以示篤念勲臣至意。尋予祭葬世職。贈太子少保。謚貞恪。○諭議政王軍機大臣等。官文奏護軍統領舒保力戰陣亡。並分飭鎮將遏賊東趨各摺片。已明降諭旨。將舒保優卹。建祠予謚。並將德隆阿等一併附祀專祠矣。髮捻合股。闖入楚疆。雖經僧格林沁等督率馬步各隊。累戰皆捷。而大股虜聚於阜市。巡檢司等處。擾及京山。復分股一自宋河至隨州之南山。一自楊家河至德安。互延二百餘里。擒首歐老洪圖犯德安。窺伺黃孝。其黃土關一股。復由東簞店廣水驛竄至孝感縣。

屬之二郎畈等處。是漢江以北。羣賊如毛。亟宜盡力勦洗。著僧格林沁官文等遵照前旨。督飭各軍。四面兜剿。務將下游武漢。及大江北岸竄路。竭力遏截。並分飭蘇克金傅振邦等。繞出賊前。毋令竄入皖豫邊境。光固一帶。著張之萬派撥勁兵。豫為防範。以備不虞。英霍毗連楚境。更覺喫緊。著曾國藩蔣松年督率地方文武。嚴密布置。俾該匪無隙可乘。惟該逆等以援救金陵為名。故能號召匪徒。固結不解。為今之計。若將金陵迅速攻拔。則該逆失所依附。眾心渙散。勦滅必易。是攻拔金陵。洵為目前第一要務。曾國荃率師合圍。已經數月。布置自必周密。著即督率諸軍。會合彭玉麟水軍。奮勇進攻。迅拔堅城。以副委任。金陵城內醜類尚多。圍攻斷不可稍有瑕隙。致令乘間出竄。貽患他省。如由何處衝突而出。即惟何處統兵之員是問。李鴻章所部兵勇攻城奪隘。所向有功。礮隊尤為得力。現在



金陵功在垂成。髮捻蓄意東趨。遲恐掣動全局。李鴻章豈能坐視。著卽迅調勁旅數千。及得力礮隊。前赴金陵。會合曾國荃圍師。相機進取。速奏膚公。李鴻章如能親督各軍。與曾國荃會商機宜。勦辦更易得手。著該撫酌度情形。一面奏聞。一面迅速辦理。曾國藩身為統帥。全局在胸。尤當督同李鴻章。曾國荃。彭玉麟。和衷共濟。速竟全功。埽穴擒渠。同膺懋賞。並著左宗棠嚴飭蔣益澧。高連陞等。迅拔

湖州郡城。肅清全浙。騰出兵力。馳援江皖一帶地方。俾免蔓延貽患。江北天六等處。地廣兵單。該處為裏下河一帶門戶。恐賊匪垂涎。完善前諭。富明阿將援勦江南之師。悉數調回。分投布置。現在計已到防。如果賊有竄近消息。而兵力尚有不敷。卽著李鴻章調派得力之兵。妥籌兼顧。陳國瑞一軍。應令移紮何處。仍著僧格林沁酌量調派。一面迅速奏聞。徐宿清淮等處。並著吳棠隨時整飭。加意籌

防。期於有備無患。將此由六百里各諭令知之。○又諭崇厚奏。日斯巴尼亞國遣使來津。請立通商條約一摺。日斯巴尼亞國使臣瑪斯。呈遞照會。請立條約。並呈出所奉全權憑據。崇厚現令該國使臣在津候旨。所有通商立約事宜。卽著薛煥崇厚與該國使臣妥為辦理。並發去全權大臣諭旨一道。如該使索取卽可照案鈔錄。給予閱看。俟立約事竣。仍將此旨繳回。將此各諭令知之。○以正藍旗

滿洲副都統載驚為鑲紅旗護軍統領。鑲藍旗蒙古副都統恩齡暫署正白旗護軍統領。○以記名副都統金順為鑲黃旗漢軍副都統。未到任前。仍以正藍旗蒙古副都統伊精阿署理。○以鑲白旗滿洲副都統載容兼署鑲白旗蒙古副都統。○以記名總兵官劉連陞為浙江溫州鎮總兵官。○以救援主將不力。革湖北軍營營總烏勒喜布。保升凌祥職。並逮問。○予湖北壽山陣亡營總德隆阿。驍



騎校額爾根扎普圖興阿等祭葬世職加等  
均附祀護軍統領舒保專祠○戊申諭議政  
王軍機大臣等穆圖善奏督軍分起赴鄂一  
摺據稱現在馬步各營均已先後出關該將  
軍定於五月初六日督隊拔營起程等語多  
隆阿所部前經諭令以八千步隊赴楚如尚  
有餘兵撥赴甘省助剿茲據穆圖善奏多隆  
阿所部一萬餘人全行赴楚自未便令其折  
回著卽催令各軍迅速前進到後交僧格林  
沁官文分別調遣楚北羣盜如毛得此兵力  
自無難剋日奏功惟皖北地方仍形空虛該  
匪不能逞志於楚恐蓄意東趨由英霍以救  
金陵不可不慮陳國瑞曾否到潁六駐紮著  
僧格林沁曾國藩喬松年速為布置並著曾  
國藩喬松年悉心籌畫如兵力實有未敷或  
函商官文酌撥楚軍或仍遵前旨撥鎮防兵  
勇四千人扼紮要地均須早為籌策萬不可  
任令逆匪闖入致誤戎機楚軍旣由穆圖善

全行帶回鄂境自未能撥赴甘省雷正綰兵  
力不充待援頗切劉蓉所部兵勇為數不少  
著卽酌撥數營赴甘交雷正綰調遣以厚兵  
力蔡逆一股闖入鎮安大小心川思欲偷渡  
漢江前諭李雲麟追躡並令劉蓉檄蕭慶高  
等遏其竄路何勝必等會合邀擊近日情形  
若何久未據李雲麟奏報若此股逆眾迅殄  
亦可騰出兵力赴援甘省著劉蓉李雲麟督  
飭將弁速將此股殄滅毋任蔓延川陝交界  
地方致辦理又形棘手楚省兵力已厚官文  
督飭唐訓方設法寬備餉需以收飽騰之效  
所有劉蓉李雲麟前派追剿髮逆已入楚境  
各營著劉蓉李雲麟迅速檄調回陝毋令前  
進將此由六百里各諭令知之○補鑄廣東  
嘉應州州同開建縣知縣太平鄉連山廳宜  
善司南雄州百順司等巡檢各關防印信從  
巡撫黃贊湯請也○己酉諭內閣歷代史書  
皆以帝王本紀冠諸簡端我朝

列聖相承均經國史館恭修

本紀敬謹尊藏伏念

皇考文宗顯皇帝至德鴻謨耿光大烈業經特命開館纂修

實錄現已進呈至五年允宜恭修

本紀垂示後昆著國史館總裁遴派提調等官

督率謄錄詣

實錄館將業已進呈之書照副本恭繕一分恪遵編纂隨時進呈於

實錄告成後陸續辦竣所繕

實錄副本即恭藏史館以資考證○諭議政王

軍機大臣等沈葆楨奏侍逆突犯撫州血戰

解圍並弋陽克復廣信等處擊賊情形進攻

南豐各摺片侍逆由金谿犯撫州猛撲東門

外之文昌橋經劉于浚等奮勇截擊賊仍敗

回金谿撫州之圍遂解惟侍逆自撫州受創

後循河而南圖窺建昌勢尚鴟張著沈葆楨

督飭劉于浚等軍乘勝跟追擒斬首逆務將

此股賊匪就地殄除毋令蔓及他境官軍圍

攻南豐追至城下守備楊明發等奪門而入

均經中槍殞命該縣城池未能即復是否後

隊不克繼進以致未能得手著沈葆楨檄飭

席寶田韓進春等激勵各營迅復南豐縣城

以期節節掃蕩偽王宗一股由新城瀘溪入

金谿界以會侍逆林正揚一股由石城甯都

折而西趨為瑞金雩都興國兵練所擊南入

福建之甯化界陳炳汶尚在弋貴之南鄉汪

海洋於陳坊湖坊築壘尾隊出沒於弋鉛交

界之黃沙港金壇句容竄賊復至德興江省

羣賊如毛勢殊岌岌若非及早殄除於全局

殊有關繫著曾國藩統籌布置妥為兼顧並

飛催鮑超帶領所部迅速馳援江西王文瑞

現紮永豐劉典已抵袁州應如何厚集兵力

分路進剿之處著楊岳斌沈葆楨妥籌辦理

江皖情形甚屬喫緊著楊岳斌懍遵前旨速

赴該二省適中之地扼要駐紮力圖掃蕩將

此由六百里各諭令知之。○山東巡撫閻敬銘奏訪獲臨邑縣偽團趙汶煥訊明正法得旨所辦甚為妥速。東省所屬偽團似此者恐尚不少。該撫如有訪聞。卽當嚴飭地方文武相機密捕。盡法懲治。以儆兇頑而安良善。○以江蘇捐輸軍餉永廣鹽城縣學額七名。高郵州三名。○以湖北通城縣捐輸團練永廣學額七名。○以四川捐輸津貼銀兩永廣洪雅縣學額二名。簡崇慶廣安。印。瀘。瀘。綿。竹。達。

渠仁壽。南充。三臺。中江。樂山。犍為。茂。眉。樂。宜。賓。富。順。蒲。江。二十州縣各一名。○以江西弋陽縣城被賊竄陷。旋卽克復。革署知縣葉琳署外委劉步瀛職。仍留任。○以短交截曠兵糧。革江蘇千總劉萬清職。並逮問。○以江西撫州府城解圍。予按察使劉子潯總兵官普承忠優敘。賞參將施從善遊擊黃名揚。邑圖魯名號。餘升敘有差。予陣亡參將胡迪堂守備彭稱發千總賀長發。把總趙洪勝等祭葬。

世職加等。○予江蘇常州陣亡總兵官張行科等祭葬世職加等。○予江西南豐陣亡守備楊明發祭葬世職。如參將例。千總李典發祭葬世職。如遊擊例。○予江西新城陣亡守備李敬玉祭葬世職加等。○予江蘇各屬陣亡殉難官紳知府李慶琛等暨士民婦女二千九十八名口分別旌卹如例。○予浙江各屬陣亡殉難員外郎王泰等紳民婦女六百九十八名口分別旌卹如例。

大清穆宗繼天開運受中居正保大定功聖智誠孝信敏恭寬毅皇帝實錄卷之一百二



遣常勝軍後擬撤劉東璋七營移防松滬摺  
內又稱擬添調數營駐守上海附近地方未  
知數營是否卽在七營之內未據聲稱明晰  
至松滬一帶既有防兵而上海附近地方尤  
應分撥勁兵數百駐守至程學啟所部之軍  
素為洋人信服駐防上海非此軍不可本日  
據總理衙門王大臣奏已與住京公使言定  
李鴻章可卽照辦不可再行更調他軍是為  
至要另片奏調派郭松林等三十營由宜興

分路進取長興調李朝斌督帶水師四營由  
夾浦口會合進攻以掣湖城賊勢並派劉銘  
傳等營接防句容東壩等處要隘豫截金陵  
竄賊等語長興一城得郭松林等水陸進攻  
不難立拔一俟克復長興後該撫卽當激勵  
各軍直抵湖郡與浙軍兩路夾擊迅拔堅城  
惟金陵城大而堅曾國荃所部兵勇圍攻恐  
未能周匝李鴻章仍遵前日寄諭酌調勁旅  
數千並礮隊數百前往會剿期於速克該撫

能否親赴金陵仍著酌度機宜迅速籌辦將  
此由六百里諭令知之○又諭林文察奏官  
軍擒斬首逆彰化解圍丁日健奏擊散彰化  
餘匪暨攻毀曾厝崙一帶賊莊各摺片前因  
髮逆竄入閩疆疊經諭令林文察率眾內渡  
嗣因徐宗幹請催曾玉明回省亦經照該撫  
所請令該署提督回省督辦內地防勦事宜  
茲據林文察奏逆匪陳在揚金環等襲陷犁  
頭店員林街各汛地攻撲彰化縣城雖經兵

團擊退首逆就擒而張三灝陳弄等逆尚各  
糾黨嘯聚洪逆亦未弋獲丁日健奏稱內山  
招撫太濫賴林各逆復句結洪橫並各招撫  
股首分撲彰化縣城內山棟東貓霧犁頭店  
仍多賊蹤曾厝崙竹園等賊莊平毀後彰化  
撲城各匪復思遁往內山是臺灣逸匪尚須  
趕緊按捕惟江浙髮逆擾及建甯甯化等處  
閩省西路之防尤為喫重著左宗棠徐宗幹  
仍遵前旨催令林文察曾玉明統率所部迅

速內渡以資攻剿。其臺灣勦匪善後各事宜。卽責成曾元福。丁曰健督飭兵勇。會同地方文武。聯絡鄉團實力辦理。曾元福。丁曰健係鎮道大員。均屬責無旁貸。儻日久因循不能竣事。以致死灰復燃。再煩兵力。必惟該鎮道等是問。將此由五百里諭知左宗棠。徐宗幹。並傳諭林文察。曾玉明。曾元福。丁曰健知之。○又諭喬松年奏。臨營餉需支絀。請將山西淮關兩處協解李世忠月餉。改解臨營一摺。

髮捻逼近皖境。臨淮添兵防剿。均關緊要。李世忠一軍。既經裁撤。所有山西淮關向解該營月餉。卽著沈桂芬。希曾改解臨淮軍營。如數籌撥。毋稍蒂欠。喬松年務當振刷精神。整頓營伍。籌防籌剿。毋令髮捻擾及完善。是為至要。將此由五百里諭知沈桂芬。喬松年。並傳諭希曾知之。○以福建彰化縣城解圍。予參將湯得陞等升敘有差。○辛亥。諭議政王軍機大臣等。憚世臨奏審察江西賊情。請力

保贛江遏賊西渡等語。據稱江西贛東廣撫建三郡。已被賊闖入。無險可扼。獨贛江尚可憑河設守。力保贛西七郡。憚世臨前飭王文瑞。劉典兩軍分防該處。現經沈葆楨將劉典調赴省城。恐賊乘虛竄渡。收拾愈難。請仍令劉典扼守臨江。與王文瑞及水師聯絡布置。所籌不為無見。惟江省軍情。前據沈葆楨奏。贛江以東賊氛甚熾。省城防範不可稍鬆。沈葆楨將劉典一軍調回。自係為回顧根本起

見。但贛江一帶防兵單薄。應否添派勁兵駐紮。與王文瑞分投防守。仍著沈葆楨酌量調派。劉典抵省後。卽當視賊所向。帶兵迎剿。不得株守省垣。江省羣賊如毛。勢甚岌岌。楊岳斌督辦江皖軍務。當懍遵前旨。力圖掃蕩。應如何進剿設防之處。並須通盤籌畫。隨時與沈葆楨悉心商酌。妥籌辦理。憚世臨原片著鈔給沈葆楨閱看。將此由六百里各諭令知之。○又諭憚世臨奏楚師分道入黔。克復都

江上江各城。定旦高就壩。飛各賊巢。並勦撫四脚牛苗寨一摺。都江上江城池。逆匪叛踞有年。經憚世臨派出各軍。越境收復。著准其擇尤保獎。毋許冒濫。湖南官軍入黔後。連克城寨。勦擒首逆各情。既未據貴州督撫入奏。亦未聞派兵會勦。殊不可解。包伍各逆。蔓延日久。復由秀山縣屬。擾及黔楚交界之盤石營。竄突靡定。徐河清營壘失陷。前經勞崇光等奏報。未能明晰。當令查明具奏。現在賊勢

逼近銅仁。黔省下游一帶。徧地賊氛。勞崇光等何得漫無布置。專待客兵。不知該督撫所司何事。著卽迅派得力之軍。選募勇練。分路進勦。將黎古思銅等處各股匪。次第勦除。儻仍前玩泄。任令賊蹤肆擾。毫無阻遏。勞崇光等其能當此重咎耶。總兵金太文業抵王嶺。離洪州不遠。著憚世臨檄令卽赴洪州接辦防勦事務。以便趙福元等回顧東防。古州軍務。卽著責成戈鑑等實力辦理。將此由六百

里各諭令知之。○又諭德興阿奏大股髮逆。逼近省垣。請截留赴楚兵勇勦辦。並擬挑撥馬步旗兵。出城迎擊各摺片。覽奏實堪詫異。陝南髮逆。前據劉蓉奏報肅清。並據穆圖善奏曹背時一股。殲滅殆盡。遵飭兵勇赴鄂。是省垣附近一帶。已無賊蹤。其蔡逆一股。游弋於鎮安等處。疊經責成李雲麟剋期殲滅。並據劉蓉調派蕭慶高。何勝必等。分路截擊。諒可力遏狂氛。乃本月初三日。忽有大股髮逆

竄出大峪口。焚掠尹家衛一帶。逼近省垣。劉蓉身任陝撫。何以毫無布置。亦不據實馳奏。殊不可解。著卽督飭所部兵勇。迅圖撲滅。毋得遲延干咎。前有旨令劉蓉出省。赴東路防勦。現在省垣喫緊。劉蓉自當將此股匪徒。勦滅後。再行出省。毋得以奉旨在先。藉詞諉卸。李雲麟前次奏稱蔡逆已入穀中。何以勦辦尚未得手。著激勵兵勇。實力殲除。毋得徒託空言。自取罪戾。穆圖善赴楚各營。計距西安

尚不甚遠。著即將後隊酌量調回。以資攻勦。該將軍等務當和衷共濟。力圖埽蕩。儻各存意見。任令蔡逆日久稽誅。大峪口股匪復行滋蔓。則是自外生成。即將穆圖善。劉蓉。李雲麟。按照軍法治罪。決不寬貸。大峪口賊匪。果係何股。初三日以後。曾否接仗。李雲麟。勦辦蔡逆情形若何。並著穆圖善。劉蓉。李雲麟。迅即明白回奏。曹克忠一軍。前在馬鹿鎮等處。勦賊能否調回西安。以資防勦之處。著雷正

綰。劉蓉。妥籌辦理。西安省城戰守事宜。仍著德興阿會同劉蓉。妥為布置。毋稍疏虞。金順所統馬隊。即著歸德興阿調遣。都興阿現赴定邊。所有陝省後路軍情。仍著隨時偵探。毋稍大意。將此由六百里各諭令知之。○又諭。明誼。明緒等奏遵旨籌辦勘界事宜。並請飭伊犁揀派兵弁。兼程赴塔及奏調協領等員。差委各摺片。前因西路分界事關緊要。曾於四月初九日。諭令明誼等查照總理衙門議

覆各摺詳為剖辯。所有烏科二城及塔城所屬闕礙情形。或讓地安插。或照舊遊牧。相機妥辦。如俄國不肯派員前來。則告以條約內原有西界商辦不限日期之語。冀該國知要。求不遂。自行轉圜。至各城所屬人眾地方。應如何各就本境豫籌辦理之處。並令常清等迅速查奏。茲據明誼等奏接准科布多烏里雅蘇台咨文。卡內蒙古遊牧。現均設法籌畫安置。其塔城所屬地方。亦尚有空地。可以暫

為安插。惟伊犁卡外情形。據委員色布貞泰聲稱。若以常住卡倫為界。不惟索倫四愛曼人等生計有礙。且卡內實係無地安置。請飭伊犁將軍速籌辦法。各等語。自係尚未接奉四月初九日諭旨。故有此奏。俄國議單所指灣入內向。將常住卡倫包去多處。實與條約相背。明誼。明緒當恪遵前旨。力與駁辯。或令於卡倫外讓出若干。如該國不肯派員前來。亦當給與照會。遵照前諭各節。明白曉諭。待



其自轉不可稍有遷就。至豫籌安置人眾地方。最關緊要。常清既咨照明誼等。以常住卡倫為界。大有關礙。究竟常住卡倫之外。必以何處為界。方無關礙。常清何以並不咨明明誼。殊屬顛預。著常清迅速咨照明誼。並將安插哈薩克布魯特人眾。及約束四愛曼人等。不准向該夷構釁之處。迅速妥籌辦理。並著該將軍及麟興廣鳳奎昌等嚴束所部人眾。如俄國兵隊。不來侵占地方。概不准先肇兵端。以弭邊釁。現在俄兵駐紮卡外。將來會議時。恐有逞兵要約之意。不可不豫為之防。明誼等現調伊犁佐領防禦六七員。各帶兵丁若干。以備派守卡倫。著常清飭令揀派各員。迅速兼程前赴塔城。毋稍遲誤。明誼等所調協領扎珠哩穆克德柯烏勒西春三員。並著常清迅飭赴塔。以備差委。將此由五百里各諭令知之。○湖南巡撫譚世臨奏。探聞江西軍情。現募勇籌防東路。得旨著飭王永章等

增募營練。力防東界。劉德謙著暫留湖南。並飭楊澍等嚴拏永寶銜三屬會匪。毋留餘孽。○予貴州都江等處陣亡遊擊曹開先守備蕭茂才。把總周仁。外委趙正祥。祭葬世職加等。○壬子遣官祭關帝廟。○諭內閣寶珣奏。忝不職之州縣。請分別勒休降補一摺。奉天署甯遠州知州候補知縣馮立模。年老身弱。聲名平常。著勒令休致。鐵嶺縣知縣額勒和訥。才識迂庸。難膺民社。著以筆帖式降補。○又諭賂東章奉革員撞騙得贓。審明定擬一摺。前任四川合州知州陳彥坤。於咸豐十一年間。因案革職。勒令回籍。不准逗遛。茲據奏稱該革員並未回籍。並因原任越嵩營參將舒洪元之妻馬氏。李氏爭產構訟。該革員輒將李氏銀兩金飾。誑騙甚多。不肯退給。致被控告。各等語。陳彥坤係不准在川逗遛之員。乃敢潛匿省城。復指稱衙門。誑騙財物。實屬寡廉鮮恥。行同無

賴陳彥坤著照擬從重發往新疆充當苦差。以為敗檢者戒。○又諭張凱嵩奏請將庸劣不職各員分別革職勒休改補一摺。廣西博白縣知縣曹穆來輕佻暴戾。物議沸騰。開復留粵補用知縣陸費蔭貌似有才。行多不檢。均著卽行革職。鎮安府通判汪桂體弱多病。不能振作。著以原品休致。東蘭州知州李興讓性緩才庸。不能整飭。著以州判降補。署天河縣知縣王日烜才識拘滯。難膺民社。著以教職歸部銓選。試用府經歷龐熙相遇事顛預。龔鄙嗜利。賀縣信都司巡檢田亦森狡詐營私。行同市儈。宣化縣金城寨巡檢廖謙昏庸荒謬。不守官箴。均著一併革職。以肅官常。○諭議政王軍機大臣等。張之萬奏葛承霖等軍追勒各股髮逆至楚。並張曜等現調回馳援東路。仍留兩營駐防浙川一摺。髮逆自竄入平靖黃土兩關之後。分踞信陽西南鄉一帶。窺伺州城。經僧格林沁督率葛承霖等

疊次勦殺。追出武勝關外。此股賊匪出關。現奔何處。著僧格林沁查明具奏。並著飭令葛承霖等跟蹤躡勦。務期掃除淨盡。毋任再竄。他處偽啟王一股。經張曜色爾固善等追過鄖西。因山路崎嶇。無從覓食。而光州羅山一帶正當喫緊。髮逆各股由大新店竄至羅山之姚家坂。宣化鎮及光州之白雀園一帶。張之萬已派副將徐連陞等前往堵勦。並飛調張曜色爾固善等隊馳赴信陽。歸僧格林沁調遣。並留李世玉兩營駐防浙川。著僧格林沁相度賊情。妥為調度。以期節節掃蕩。豫省西路防兵甚單。多隆阿所部楚軍已悉數起程赴楚。著僧格林沁官文穆圖善酌量情形。南陽浙川一帶如無重兵。可卽分撥數營前往駐紮。張之萬請俟催調各軍東行。布置一切。擬卽親赴信陽。會同僧格林沁熟商防勦。惟汝南地方並未肅清。亦關緊要。信陽州有僧格林沁在彼。可無庸該撫前往。如須會商

辦理商定後仍以分駐為妥。南陽地當衝要。應否扼要駐紮。該撫妥籌辦理。昨據德興阿奏大股髮逆逼近省垣。請截留赴楚兵勇。勦辦已諭令穆圖善將後隊酌量調回。以資攻勦。其先行起程之馬步各隊。如已到楚。豫著僧格林沁官文分別調遣。陝省兵力無多。穆圖善務當抽調所部折回。會同金順等馬隊及劉蓉步隊實力痛勦。不得意存膜視。致誤戎機。前據劉蓉奏稱。派防各路之軍似甚周

密。何以大峪口逆股二萬餘眾。突如其來。先事既絕無偵探之人。臨事又未能出奇制勝。該撫向以知兵自許。乃於此等重大軍情。毫無防備。並不趕緊奏聞。抑何聾瞶若是。著即懍遵。昨日寄諭。與穆圖善德興阿。妥速籌辦防勦事宜。曹克忠一軍。如可調回。西安助勦。並著一面奏聞。一面飛調。近日軍情。並著趕緊馳奏。以慰懸繫。山陽鎮安交界。有無匪股竄犯。亟須趕緊布置。不可稍涉大意。此股賊

匪奔馳飄忽。恐其疾趨山西。著沈桂芬勤加偵探。妥籌防勦。本日據訥欽奏。已帶兵行抵靈州之花馬池。據奏情形。靈州一帶四面皆賊。著都興阿、雷正綰迅速與之會合聯絡。以免孤軍深入之慮。西蒙克西克馬隊已撥歸都興阿軍營。計已可到。此項餉銀著劉蓉按月籌解。毋令缺乏。張之萬另摺奏盤獲冒充職官私募勇丁沿途滋擾之勇目李泉恆。著即將其正法梟示。並著張之萬咨照各省嗣後如有似此劣弁一體拏辦。不得姑容。張之萬另片奏請將江北餉銀一萬六千餘兩。並陳國瑞營餉停解等語。江北各軍未撤。仍須嚴防。前項欠餉一萬六千餘兩。著仍行報解。陳國瑞現令駐軍潁六。力固皖北地方。是此軍餉項尤關緊要。著張之萬督飭藩司妥籌接濟。毋誤軍食。將此由六百里各諭令知之。○又諭駱秉章奏官軍攻勦滇匪獲勝。並包逆竄入秀山。調兵馳勦一摺。覽所奏情形。辦

理尚為得手。惟滇邊羣盜如毛。雖經大創。猶虞此滅彼起。該督現擬將胡中和湘果三營抽回敘南。飭參將許蔭棠一軍暨敘永廳文武嚴防邊隘。即著飭令各軍嚴密豫備。毋稍疏虞。黔逆包茅仙羅發榜大股竄至秀山之濫橋地方。守備楊再經等力戰陣亡。此股逆匪為黔中歷年悍賊。昨據悍世臨奏。該逆由秀山回撲松桃廳。遊擊朱衣接仗失利。楚軍進援。復傷亡兵勇五十餘人。該逆進至黔楚

交界之盤石營屯踞。是其兇獾狡悍。已可想見。駱秉章前調總兵曾志友楚勇千名。計已馳抵秀山。復添調總兵楊耀關等三營暨重慶鎮標兵四百餘名。馳往會剿。諒不難力殄狂氛。著即激勵諸軍。迅將秀山境內之賊。掃除淨盡。以防內竄。並與黔楚各軍聯絡聲勢。妥籌夾擊。毋任蔓延。將此由五百里諭令知之。○又諭前因崇實等先後陳奏西藏情形。並滿慶等奏買巴扎倉喇嘛搶去已革待審

之堪布等情。疊經諭令崇實等查明辦理。並催福濟景紋迅速赴藏。茲據福濟景紋奏稱。由爐城以至乍察。道途仍難行走等語。由川赴藏道路。現在仍前梗阻。福濟等尚難前進。惟藏中禍患日深。福濟景紋一日不到。變亂一日不了。著崇實、駱秉章、福濟景紋嚴飭吏致康、向明正等土司妥為開導。即令迅速設站。以期疏通驛路。福濟景紋仍一面設法前進。懍遵疊次密諭。妥速查辦。若專以道路未

通為詞。一味遲延推諉。置大局於不顧。朝廷法紀具在。福濟景紋其能當此重罪耶。所有揀補僧俗番目等缺。既據奏稱尚未身歷其境。虛實難以懸揣。即著福濟景紋於抵藏後趕緊辦理。一秉至公。毋稍遷就。拉里糧務嚴清。榮所稟李玉圖馬騰蛟與壁喜等狼狽為奸各情。其言是否確實。著崇實、駱秉章、福濟景紋查明具奏。嚴清榮原稟。著鈔給崇實、駱秉章閱看。將此由五百里各諭令知之。○河

南巡撫張之萬奏汝南官軍攻克徐汶田等寨得旨仍著毛昶熙將時玉璽一寨迅卽督軍攻拔肅清新蔡全境○廣西巡撫張凱嵩奏擊獲興安縣屬會匪正法得旨所辦尚為妥速仍著飭令郭垣督同官紳認真團練清查餘匪毋得有名無實○以屢著戰功賞還已革廣西副將黃仲慶頂翎○予四川秀山等處陣亡遊擊楊再經都司任會標守備徐洪亮千總彭正發等祭葬世職加等○癸丑

諭議政王軍機大臣等穆圖善等奏暫留赴鄂後起馬步各營劉蓉奏髮逆與蔡逆合併逼近省城各摺片偽啟王梁城富等由荆子關竄鄖西經官軍扼截回遁土門與蔡逆勾結徑由鎮安孝義一路出大峪口逼近西安前據劉蓉屢次陳奏布置情形一似防勦均有把握此次髮逆大股突偏省垣劉蓉毫無準備任令賊匪來往自如如入無人之境該撫平日所派各路防軍不識所司何事且此

股賊匪眾至二萬有餘而自荆子關鎮安孝義一路長驅直入該撫先事毫無偵探及至逼近省垣始知該逆回竄似此昏愎糊塗實屬有負委任李雲麟專辦蔡逆一股前據劉蓉奏李雲麟聲稱該逆已入穀中可期必滅此次由鎮安句結啟逆出竄李雲麟不但不能力圖勦滅並任令窺伺省城該京卿言大而夸一味紙上空談實堪痛恨劉蓉李雲麟均著先行交部嚴加議處穆圖善等現調孟

宗福黃金山等步隊六營折回赴省卽著檄令該員等迅速回援會同省城防軍實力勦洗楚省調去兵將為數不少計已足敷勦辦而陝省竄賊麇聚勢甚危急穆圖善著暫時毋庸赴楚仍駐西安會同德興阿劉蓉辦理防勦事宜以嚴省城之防俟陝省肅清再行奏請石泉甯陝漢陰各隘著李雲麟嚴加防守以遏該逆下竄之路一面將蔡逆一股趕緊殲除毋令匪勢益肆蔓延穆圖善德興阿

劉蓉李雲麟惟當會籌戰守。督飭各軍實力  
勦洗。先將竄近省垣之賊斬截淨盡。節節掃  
蕩。如再有疏失。必將劉蓉李雲麟按照軍法  
治罪。穆圖善德興阿會同勦賊。均屬責無旁  
貸。如不能得力。定將穆圖善德興阿一併治  
罪。決不寬貸。將此由六百里各諭令知之。尋  
吏部議。劉蓉李雲麟均應照溺職私罪例革  
職。得旨均著加恩改為革職留任。○又諭。都  
興阿奏接奉寄諭。並沿途探悉形勢。擬辦情

形一摺。據稱近日於沿途探訪情形。詳按圖  
勢。靈州左近山路崎嶇險要。必為賊守。由定  
邊至甯夏四百餘里。又阻黃河。賊情叵測。未  
必遙聞援軍將至。即露蒼黃情形。恐有詭計。  
怠我軍心。查甯郡漢城在北。滿城在南。必得  
一軍由北山進剿。方有制勝之機。若西蒙克  
西克等過渡。會合甯夏官兵。與北山前後夾  
擊。可斷該逆往來之路。請飭綏遠城將軍豫  
行知會鄂爾多斯各旗稍濟駝隻。並派兵會

合阿拉善兵相機兜剿。該將軍進規靈州。兩  
岸進攻。始於援甯有裨等語。所奏不為無見。  
著都興阿催督各軍規取靈州。訥欽已到靈  
州之花馬池。該將軍當與之聲勢聯絡。量為  
調遣。如察看該員不能得力。或將其兵勇裁  
撤。或調派赴北路防堵。均著察覈辦理。西蒙  
克西克等如已到營。著即催令迅速援甯。並  
分撥馬隊由安邊堡一帶出邊。急趨鄂爾多  
斯。副盟長扎薩克郡王棟魯布扎木素居處

之地。探明過渡設法會合甯夏滿城官兵。與  
北山前後夾擊。先通官軍糧道。兼斷該逆往  
來之路。慶昫仍當就現有兵力。嬰城固守。俟  
援軍到後。會合勦擊。賊情如果惶懼。何以未  
見解圍他竄。恐是裝點羸弱情形。懈我軍心。  
慶昫不可墮其術中。是為至要。官軍由南路  
進剿。若北路無兵阻遏。必不能收聚殲之效。  
前已諭理藩院飭阿拉善王統兵數千。從磴  
口進邊列陣。嚴扼竄越。遇賊即擊。其北路平

洪孤城等處並令撥兵防守。著都興阿、德勒克多爾濟等遵旨傳知該王，迅即派兵赴防，並令多備駝隻，以資運解軍需之用。桂成尚稱勇往，著即統帶勁兵，會合阿拉善王部下防兵，出甯夏北山，進紮險要，相機兜擊，歸綏本處之防亦關緊要，恐有外來奸回，勾結滋事。著德勒克多爾濟實力經理，毋得稍涉大意。平涼之圍已久，雷正綰當力圖攻克，以便進兵甯夏。都興阿將次入甘，該提督當與之

聲息相通，會商妥辦，以期早日竣事。都興阿另片奏調員赴營差委一片，翁同書未知已抵何處，並准都興阿行文直隸山西陝甘各督撫，傳知該革員，即赴軍營效力。前諭令赴營之藩司文格，俟到營後，著都興阿飭令即赴蘭州一面附報奏聞。將此由六百里各諭令知之。○以故賽因諾顏貝子津巴里克什特弟通噶拉克瓦齊爾襲爵。○命鑲黃旗頭等侍衛謙禧赴署陝甘總督，都興阿軍營聽

候差委。○撥山西蒲州火藥五萬斤解赴陝西軍營備用。○甲寅諭內閣：御史孫翼謀奏軍務省分投效隨營人員良莠雜出，既不身臨前敵，復得濫支薪水，捷書一報，薦牘即膺。即間有奉派赴剿，亦復巧為趨避，甚至釐局捐局糧臺軍需局安置多人，清談坐食，窟穴利藪，復邀獎敘，或患京秩之清苦而來，或畏遠省之險巇而至，或重咎獲譴之員，藉圖開復，或年好世交之子，冀博升階，捷徑爭趨，相沿成習，請飭各督撫認真甄別，各等語。軍營積弊之深，保奏之濫，疊經明降諭旨嚴切申儆。若如該御史所奏，是各路隨營委員及辦理局務人員，仍未能力加刪汰，以致荷戈之士枵腹從戎，而濫竽充數者，轉得坐飽囊橐，濫廁軍功。將何以作士氣而奏膚公耶？嗣後各路統兵大臣及各該督撫，務當恪遵歷次諭旨，於隨營各員隨時認真甄別，使軍營少一冒濫之人，即少一虛糜之款。其派辦糧臺

勸捐抽釐各員並著詳列官職姓名加具切實考語開單呈覽以備稽覈將來如被人叅出劣蹟查明屬實除將該員嚴辦外並將原派之督撫等科以徇庇之罪決不寬貸懷之將此通諭知之○諭議政王軍機大臣等有人奏風聞福建候補知縣葉為霖因伊父葉鎮久在藩幕聲氣最通曾派辦永豐官局洋藥稅務侵虧庫款舞弊營私於前總督耆齡查辦案內漏網現復委署晉江縣知縣四川

成綿龍茂道鍾峻由福建藩幕捐納出身與葉為霖先後同惡共濟到川未久卽為劉蓉信任請飭該省督撫嚴查等語幕友出身人員鑽營取巧是其慣技前經嚴定章程令其迴避遊幕省分原以杜攀援而絕奔競若如所奏葉為霖捐納知縣仍在伊父遊幕省分是其希圖潛通聲氣已可概見况經手局務尚有營私舞弊等款幸逃法網而復膺民社殊非澄敘官方之道至鍾峻雖已迴避四川

而前在福建時曾與葉為霖朋比共濟到川未久卽為劉蓉信任難保非因揣摩逢迎遂其干進之計且道員職司表率尤非巧滑之輩所可濫竽著駱秉章左宗棠徐宗幹將該員等被叅各款確切查明據實具奏將此各諭令知之○以右春坊右庶子興恩充日講起居注官○

上以夏至祭地於

方澤自是日始齋戒三日○乙卯諭內閣原任杭州將軍瑞昌前在杭州殉難業經降旨從優賜卹並給予世職茲據左宗棠奏稱瑞昌之妾吳氏於城陷時逃出現已回至杭州伊子緒成緒恩年皆幼穉當時被賊衝散無蹤現經展轉物色始悉其第三子緒恩為人收養業已給予吳氏領回派員護送回旗等語瑞昌前在杭州守城有功旋復見危授命大節凜然據奏其幼子緒恩散失多年竟能無



恙覽之實深欣慰著俟護送到京時卽由鑲黃旗滿洲傳知瑞昌長子內閣中書緒光領回收養緒光著該旗卽行帶領引見緒恩著俟及歲時由該旗帶領引見緒成尚無下落仍著左宗棠隨時詳細訪查以示朝廷篤念忠良推恩後嗣之至意○諭議政王軍機大臣等左宗棠奏官軍進規湖郡疊勝一挫並派兵馳援江西及弋陽擊賊獲勝各摺片髮逆以全力踞守湖郡經高連陞蔡元吉兩軍

奮勇進剿將菱湖東林山兩處要隘攻克東南之險已為我據惟妙喜鎮營盤為賊所乘致有挫失現在浙師尚未移紮西南而賊勢趨重西路運糧增黨刻刻為鋌走之計李鴻章前奏已派郭松林等三十營由宜興進調李朝斌陽利見等水師進取長興蘇浙官軍會合夾擊自可迅下堅城第長興安吉在在與皖之廣德甯國接壤皖南防兵既單浙師又難越境截堵曾國藩雖派周寬世等駐紮

祁休之間而於廣德甯國守禦事宜尤當妥籌布置力遏上竄其長興湖州等處之賊左宗棠李鴻章督飭在事員弁實力堵剿總當將積年悍賊就地殲除毋令貽患他省堵輔各逆既有分路內竄之謀左宗棠當飭水陸各軍嚴密準備如能力挫兇鋒則羣賊喪膽於攻取湖州自可事半功倍粵逆林彩新一股兩經浙軍截剿一經徽軍截剿竄逸無多惟由浙竄江一股現踞湖坊陳坊等處與前

股合併而竄閩之賊現復回竄江西廣集一方甚屬可慮楊岳斌接奉疊次諭旨計已剋日起程卽著督飭江右各軍次第掃蕩以副委任劉典現已抵江楊岳斌未至以前所有浙師王開琳主德榜兩軍卽著暫歸劉典調度弋陽境內竄賊經江浙官兵擊退餘賊向河西一路竄去著沈葆楨嚴飭在事文武實力追剿毋稍疏懈此時賊勢固結不解必須將金陵迅速攻拔使該逆無所依附自成瓦

解之勢前經臺諭李鴻章撥兵助攻金陵。現  
當事機緊要之時。李鴻章務當不分畛域。不  
避嫌怨。力圖共濟。不准稍有推諉。將此由六  
百里各諭令知之。○以禮部左侍郎龐鍾璐  
為湖南鄉試正考官。翰林院編修祁世長為  
副考官。光祿寺卿胡家玉為四川鄉試正考  
官。山西道御史張晉祺為副考官。○以山東  
長山縣捐輸軍餉。永廣學額二名。○以江蘇  
克復丹陽縣城出力。予總兵官黃武賢副將  
賴鎮海以提督簡放。賞知府王汝諧守備馬  
登超等花翎。州同晏佩琦等藍翎。餘加銜升  
敘有差。○以督戰不力。摘浙江軍營總兵官  
王月亮。知府李邦達。頂翎。革遊擊甯世杰。胡  
榮職。○丙辰諭內閣。御史陳廷經奏詩文敬  
避御名。請無庸兼避偏旁等語。朕御極之初。  
曾經降旨。將御名上一字。無庸改避。下一字。  
凡臣工章奏。著用滔字改避。本未嘗諭令兼  
避他字偏旁。茲覽該御史所奏。近來各省奏

牘及考試詩文。凡字之偏旁從享者。一概改  
作昌字。殊與前降諭旨不符。嗣後諸臣章奏  
及各項考試文字。於御名下一字。仍止敬避  
本字。○又諭御史舒明奏請嚴禁邪術一摺。  
據稱近日京師地方。竟有施用邪術。迷拐幼  
小子女。展轉售賣。為害閭閻。請飭嚴拏究辦  
等語。著步軍統領衙門。順天府。五城御史。一  
體嚴密查拏。如有不法匪徒。用藥迷人。及施  
用邪術誘拐子女。展轉略賣者。一經訪獲。訊  
實。卽行奏明。立予正法。以靖地方。○諭議政  
王軍機大臣等。官文奏擊退阜市。京天應城。  
髮捻並藍逆西竄。及髮逆尾股竄犯鄆西。官  
兵出境追剿各摺片。湖北天門應城等處賊  
匪。經梁洪勝李喜溢等屢次勦擊。紛紛敗退。  
猛撲京山縣城。又經防兵鄉團抵禦。逆向宋  
河奔逸。至馬平港。尾股陸續竄向德安西北。  
之洛陽店桑樹店一帶。現在京天阜市應城。  
已無賊蹤。而德安極為喫重。阜市敗匪。全數

東趨東北東南偏地皆賊自應山之廣水孝感之小河司楊店一帶漸近雲夢有自小河溪分竄黃陂黃安邊境者有由應山而至黃陂站者官文現調成大吉十營為遊擊之師聯絡石清吉楊朝林各營相機堵剿撥李喜溢等防澗口漢口等處並留守京應仍防被勒各賊回竄雲孝一面飛催姜玉順等趨行並催蘇克金傅振邦繞前截擊布置均屬周妥著即嚴飭派出各軍以勒為防並催蕭河

清等迎頭擊剿僧格林沁現紮信陽著即調派勁旅迎剿蘇克金傅振邦馬步隊在應山尚為賊阻必須令其設法繞道務出賊前斷其東趨之路信羅光固一帶逼近賊氛張之萬當嚴防竄越該逆若由黃麻以窺英霍則舒桐潛太路路喫重曾國藩當懍遵疊次諭旨增兵嚴防並令水師嚴防江面毋任窺覷陳國瑞一軍前經喬松年奏請令駐潁六一帶著僧格林沁喬松年飛檄該提督扼紮六

安潁州要隘地方遇賊即擊毋稍疏懈皖北兵力如尚不敷著喬松年即咨商曾國藩等撥鎮江餘兵四千人赴防或商撥揚防兵勇均須趕即籌畫不可臨事張惶致誤大局陳國瑞一軍尚恐單薄由鎮防撤回江北之兵勇為數不少著富明阿酌派勁兵為陳國瑞等軍後路聲援並酌量地勢駐紮若有警報即由富明阿就近調派協同勒洗以資得力以上各路著各該督撫等認真調派飭令實力防剿僅任該逆東竄由何路行走竄越地方不能阻遏必惟該省督撫是問不能因有前功稍從寬貸也懍之慎之官文另片奏藍逆二順向山陽鎮安等處竄逸偽啟王一股撲鄭西縣城梁作揖等率軍擊敗此股敗匪與藍二逆句合業由小路竄至陝西去西安止數十里穆圖善已折回省垣其先行起程之馬步各隊諒可陸續到楚豫境內著僧格林沁官文趕緊催調布置以厚兵力近日軍

情並著各路勤加偵探飛速奏聞以紓朝廷南顧之憂將此由六百里加緊各諭令知之

○丁巳夏至祭

地於

方澤遣惇親王奕誼恭代行禮○諭議政王軍機大臣等前因有人奏恩麟辦事顛預不學無術潘祖蔭奏甘省大吏辦理軍務乖方並都察院奏胡第甲等以徇和殃民等詞赴該衙門呈訴各摺先後交多隆阿秉公查辦茲

又先後有人奏甘肅逆回煽亂焚殺延及附省之狄道河州等處署督臣督辦不力並恩麟專意主撫逆勢愈張知府徐辰告等四員為守兼優足資驅策總兵張華等五員貪鄙各款貽害地方文格素稱廉謹於軍務不甚相宜請旨飭查各等語甘肅吏治軍務廢弛已極亟應嚴行查辦以挽頹風著都興阿將此次所奏恩麟等款並前交多隆阿查辦各案一併秉公確查據實具奏都興阿甫經入

甘無所用其迴護務將交辦各案嚴密訪查

毋得稍涉徇隱諭旨三道摺五件紳士信函一件呈二件條陳一件均著鈔給閱看將此

諭令知之○又諭慶昫常陞奏圍城賊眾忽

退現在辦理情形一摺甘肅逆回自本年二

月間圍攻甯夏滿城暗決城西支渠放水灌

城經慶昫等急令附城民人開田宣洩得保

無虞四月初七日城外南北賊營忽同時拔

退復於夜間決渠灌城因滿城依山且係沙

地滲水並未淹及慶昫等趁賊眾暫退派員

前赴山北提運黃米小麥四百餘石並慶陽

糧臺餉銀五千兩入城暫資支放甯夏賊氛

甚熾此次暫將城圍撤退乘雨決水灌城逆

謀甚屬兇狡訥欽援軍雖已行抵靈州因續

調直晉官兵到者甚少趙廷琅在定邊所募

勇丁亦因前赴慶陽稟請軍械餉項俟多隆

阿營內所撥馬隊到齊先攻靈州始能赴援

甯夏是該處滿城防勦仍形喫緊都興阿前

奏。西蒙克西克等到營。卽令過渡會合甯夏官兵前後夾擊。業經諭令德勒克多爾濟等傳知鄂爾多斯各旗多備駝隻。並諭知桂成帶兵會阿拉善王部下防兵。出甯夏北山夾擊著都興阿懷遵疊次諭旨。迅督各軍趨程前進。會合訥欽所部相機進兵。並著雷正綰督率諸軍。迅將平涼攻拔。與都興阿各營聲勢聯絡。慶昫仍當就現在存城兵力。加意激勵。嬰城固守。以待援軍。毋稍疏懈。滿城兵食不充。歸綏道庫存餉三萬兩。山西續撥餉銀一萬兩。計日應可提到。卽著慶昫等飛速咨提到甯。並著文煜懷遵前旨。將援甘各軍應需糧餉軍火。源源籌解。並將趙廷娘等軍所需軍械餉項。迅速應付。以利師行。至回情反覆堪虞。慶昫等所奏鎮屬回官馬謙遣人單騎來城。甘言求撫。且稱鎮道印信已交中衛縣由梁生猷等齎送省城。必係因雷正綰進攻平涼。疊次獲勝。冀以甘詞邀撫。緩我師期。

斷不可信。慶昫等惟當激勵兵勇。加意防範。毋又墮彼狡謀。致蹈漢城覆轍。雷正綰亦當乘賊情少懈之時。迅圖攻克平涼。以副委任。將此由六百里各諭令知之。○以內閣學士許彭壽署禮部左侍郎。工部右侍郎宜振兼署吏部左侍郎。○命盛京將軍玉明來京陛見。以盛京戶部侍郎寶珣暫署將軍。○戊午。諭內閣。前因曾國藩奏浙江提督鮑超聞計丁憂。當經明降諭旨。毋庸開缺。改為署理。俟江南軍務大定。再行給假回籍營葬。茲曾國藩復據情代奏。懇請賞假回籍葬親等語。情詞懇摯。出於至誠。原應勉如所請。惟念鮑超自轉戰江皖以來。勇略過人。所向克捷。爭關奪隘。屢保名城。現因賊竄江西。復經曾國藩檄令率師往援。江皖軍情緊急。雖經簡派楊岳斌督辦。仍須該提督合力勦賊。方可迅奏膚公。鮑超著毋庸給假回籍。加恩賞銀五百兩。由四川藩庫給發。交該提督家屬祇領。經

理葬事。鮑超務當念移孝作忠之義。勉抑哀思。專意勦賊。俟金陵克復。江皖肅清。再行賞假回籍。以遂孝思。朝廷破格奪情。本屬萬不得已之舉。該提督其勉力圖功。毋再瀆請。○諭議政王軍機大臣等。曾國藩奏近日各路軍情。妥籌布置等語。侍逆一股。攻破建昌之萬年橋卡。疊陷宜黃崇仁兩縣。卽在崇仁繕城擄糧。為久踞計。自樟樹鎮及豐城新淦峽江等縣。處處喫緊。省城戒嚴。沈葆楨調萬泰等管帶得兵進省。彭玉麟派喻俊明等各率師船駛入省河。曾國藩又檄周寬世七營赴援省垣重地。或可無虞。惟賊勢如此猖獗。沈葆楨何以尚無奏報。甚深懸繫。著楊岳斌恪遵疊次諭旨。迅赴江西。與沈葆楨妥籌防剿。總當力保樟樹鎮等處要隘。迎頭截剿。毋令偏近省垣一面。迅催劉典王文瑞等軍向東迎擊。會合鮑超赴援之師。痛加勦洗。將崇仁宜黃迅速攻拔。不使羣賊竄渡贛江以西。致

滋延蔓。南豐圍攻日久。何以尚未克復。著沈葆楨嚴飭席寶田等軍奮力進剿。不准再事遷延。此時各路敗賊麇集江右。其勢岌岌。而湖州之賊時思接踵上竄。曾國藩當恪遵前旨。迅撥勁兵於皖南一帶。力籌堵截。毋使逆股再竄江西。致勢成燎原。不可收拾。左宗棠督飭各軍會合蘇省水陸官兵。迅將湖州長興攻拔。一面分兵截剿。由浙皖邊境上竄之賊。毋令貽患鄰疆。髮捻分竄黃陂孝感之間。逐漸東趨。曾國藩咨商李鴻章撥軍接守建平溧水高淳三縣。騰出李榕王可陞等軍渡江而北。扼紮舒桐所籌甚是。卽著李鴻章迅速撥兵扼守。並著曾國藩飭李榕等迅赴舒桐。力顧藩籬。喬松年督飭皖軍先事布置。不得稍有疏虞。現在羣賊紛竄。總當迅拔金陵。覆其巢穴。曾國藩當嚴飭曾國荃督率所部奮勇圖功。不得再有稽延。李鴻章恪遵前旨。不分畛域。撥兵助剿。或親往會攻。毋稍避嫌。

推諉將此由六百里各諭令知之○以太常寺卿朱夢元為通政使司通政使○己未以神靈助順頒河南安陽縣漳河

河神廟扁額曰宣威河北○諭內閣前因吏部奏道員蔣澤春經張凱嵩保奏請以道員記名簡放數與章程不符應行駁正曾經降旨允准茲據張凱嵩奏粵西逆匪范亞音陷踞容縣十年為東西兩省巨患經蔣澤春督率兵勇攻拔容縣城池兼擒首逆實與尋常

勞績不同請仍以道員記名簡放等語按察使銜廣西補用道蔣澤春著照張凱嵩所請仍以道員記名簡放以示鼓勵○又諭張之萬奏拏獲擾害地方之寨首審明定擬一摺河南已革訓導張盡道充當寶豐縣安樂寨寨首不思保衛鄉里膽敢於寨內私設公堂糾邀匪類勒罰平民肆意詛索先後被控有案實屬倚勢妄為擾害地方著卽照該撫所擬張盡道著發往黑龍江安置遇赦不赦以

儆刁頑○又諭毛鴻賓郭嵩燾奏據實舉劾以肅官方一摺所舉各員已交軍機處存記候旨錄用廣東署雷州府知府朱德澄性情乖張不勝表率候補知縣定啟縱容家丁昏庸貪鄙准補興甯縣知縣郭溶趨向不端難膺民社候補知縣伍中翰行止卑污有玷官箴均著卽行革職候補同知甘槐私累太重難期有守候補知縣方鑑源年力衰邁才具平常均著勒令休致○諭議政王軍機大臣等上年十一月間戶部奏各省軍務未平將本年京餉照歷屆酌減十分之三共撥銀五百萬兩限五月前解到一半十二月初間全數解清當經諭令各該督撫監督等分限解部不准改撥截留茲據戶部奏稱原撥山西地丁銀一百八十萬兩已據奏請截留二十萬兩原撥江漢關稅二十萬兩已據奏請緩解原撥粵海關稅三十萬兩亦據請緩當經分別准駁至原撥湖北地丁鹽釐三十萬兩

內除已解三萬兩外其餘銀兩又據奏請俟軍務稍鬆再行籌解業經委解之漕折京捐關稅鹽課或稱半途折回或稱不敢輕進指撥京餉省分軍務居多若紛紛請緩請留部庫支放從何措手請旨飭催各等語京餉為部庫要需徵解萬不容緩疊經諭各該省關按期報解不准稍延且本年撥款照歷屆成案已酌減十分之三體恤不為不至乃各該督撫監督等仍紛紛請留或藉口道路梗阻

任意遲延當此庫儲匱乏設或放款無著貽誤非輕著各該將軍督撫通商大臣鹽政藩司運司監督等恪遵上年十一月諭旨按限解齊毋再請緩請留致誤開放並著官文唐訓方將本年應解地丁鹽釐等項照江漢關稅限八月前解到一半統於年終解清儻再意存膜視逾限不完即由戶部查照新章叅辦將此由五百里諭知福州將軍辦理三口通商大臣各該省督撫鹽政並傳諭各該關

監督各省藩司運司知之○又諭連成奏本月十一日有馬賊三十餘人在順義縣屬牛欄山大橋口搶刦行車當經塞克通阿選派領催等會同該縣兵役分路追拏行至大興縣孫墩鎮地方遇賊接仗拒傷多人請將傷亡兵丁議卹並請飭直隸一體嚴拏各等語馬賊竟敢在近畿一帶拒捕傷兵實屬兇惡已極若不嚴行查拏必致滋蔓日多且此起馬賊既由潮河川水關闖入該處綠營兵役

何以追趕不及任其竄逸可見捕務全未認真現在賊匪已向孫墩鎮西北一路逸去著直隸總督順天府兼尹府尹嚴飭所屬跟蹤兜拏毋任漏網連成亦當飭令駐防官兵會同各該地方兵役一體協拏以靖地方將此各諭令知之○又諭前因甘省大兵雲集需餉孔殷曾諭令各省於欠解甘餉內每省趕緊湊解三十萬兩以應急需茲據張之萬片奏欠解甘餉先後已解過銀四萬兩現在豫



省勦辦髮捻需餉浩繁各屬錢糧徵解未能踴躍所有協甘欠餉未能一時兼顧查山西藩庫每年應解歸德鎮兵餉銀一萬四千兩同治二年分尚未解到請將此項銀兩改解甘省抵作豫省協餉等語著沈桂芬飭令藩司卽將此項銀兩迅速由晉派員解赴甘省以抵豫省欠款毋稍遲誤惟甘肅軍餉支絀異常此次抵撥之款為數甚微豈能搪塞了事所有河南應解甘省協餉銀三十萬兩仍著張之萬設法陸續籌解毋誤要需將此由五百里各諭令知之○廣西巡撫張凱嵩奏援黔粵軍攻克已賴等處賊寨得旨著督飭楊廷桂乘勝追勦務將逆首李七擒獲盡殲醜類毋令漏網○予直隸順義捕賊傷亡馬甲興文扎克丹賞卹如陣亡例○予河南各屬陣亡殉難紳民婦女一千二百八十三名口分別旌卹如例

大清穆宗繼天開運受中居正保大定功聖智誠孝信敏恭寬毅皇帝實錄卷之一百三

大清穆宗繼天開運受中居正保大定功聖智  
誠孝信敏恭寬毅皇帝實錄卷之一百四

同治三年甲子五月庚申諭內閣朕奉

慈安皇太后

慈禧皇太后懿旨。據御史賈鐸奏。風聞內務府  
有太監演戲。將庫存進貢緞疋裁作戲衣。每  
演一日。賞費幾至千金。請飭速行禁止。用以  
杜漸防微等語。上年七月。因皇帝將次釋服。  
文宗顯皇帝梓宮。尚未永遠奉安。曾特降諭旨。  
將一切應行慶典。酌議停止。所有昇平署歲  
時照例供奉。俟

山陵奉安後。候旨遵行。並將咸豐十年所傳之

民籍人等。永遠裁革。原以皇帝沖齡踐阼。必  
宜絕戲豫之漸。戒奢侈之萌。乃本日據賈鐸  
奏稱。風聞太監演戲。費至千金。並有用庫存  
緞疋裁作戲衣之事。覽奏實深詫異。方今各  
省軍務未平。百姓瘡痍滿目。庫帑支絀。國用  
不充。

先皇帝山陵未安。

梓宮在殯。興言及此。隱慟實殷。又何至有如該  
御史摺內所稱情事。況庫存銀緞有數可稽。

非奏准不能擅動。茲事可斷其必無。惟深宮  
耳目。恐難周知。外間傳聞。必非無自。難保無  
不肖太監人等。假名在外招搖。亦不可不防  
其漸。著總管內務府大臣等。嚴密稽查。如果  
實有其事。即著從嚴究辦。毋得稍有瞻徇。致  
干咎戾。皇帝典學之餘。務當親近正人。講求  
治道。儻或左右近習。恣為娛耳悅目之事。冒  
貢非幾。所繫實非淺鮮。並著該大臣等隨時  
查察。責成總管太監認真嚴禁。所屬嗣後各

處太監。如有似此肆意妄行。在外倚勢招搖等事。並著步軍統領衙門一體拏辦。總管太監不能舉發。定將該總管太監革退。從重治罪。若總管內務府大臣等不加查察。別經發覺。必將該大臣等嚴加懲處。其各懍遵毋忽。此旨並著敬事房內務府各錄一通。敬謹存記。○諭議政王軍機大臣等傳諭護陝甘總督恩麟。恩麟奏蒙古臺站遺棄摺報。檢獲呈進。回匪闖入狄道州城。旋即收復。現時籌辦

情形各摺片。恩麟上年十二月初三日所發奏報。由阿拉善旗轉遞至鄂爾多斯。因何疏失。以致遺棄道旁。亟應徹底根究。以肅郵政。著該護督查明據實奏。隆德泰安等處之匪勢日蔓延。恩麟請飭雷正綰等速撥一軍。馳赴安會。雷正綰現與陶茂林進攻平涼。漸次合圍。攻勦正在喫緊。且該提督等兩軍兵力本單。此時殊難分兵再行駐紮安會。恩麟惟當就現有兵力。嚴密布置。以扼東西兩路

之防。都興阿日內即可由定邊進勦。兵力既集。可期節節掃蕩。恩麟毋得專意主撫。致墮該逆詭謀。貽誤全局。狄道州城被回匪竄陷。旋即收復。著恩麟督飭將弁。將入山敗匪。擒捕淨盡。毋留遺孽。署蘭州道崇保署蘭州府知府豫師於所屬城池被匪闖入。本有應得之咎。惟既隨同收復。所有處分均著寬免。河狄等處回匪披猖。該護督身膺疆寄。不能實力勦辦。屢次陳奏。猶以主撫為得計。殊嫌曉

漬。知州趙必達所募川勇五千。現已由川起程。著即飛催該員迅速回甘。擇要分紮。與省城防軍聯絡聲勢。以壯軍威。恩麟創設宣威營親軍。著即按照章程認真訓練。以期一兵得一兵之用。不可有名無實。○新授陝甘總督楊岳斌奏陳謝恩。並即赴江西整飭諸軍。力籌攻勦。得旨該督懃陳各情。具見誠悃。水師與陸路雖不同。而指麾調度。理無二致。該督膺茲重寄。著遵照前旨。迅赴江西督飭諸

軍力圖埽蕩。俟江皖賊氛淨盡。卽行前赴陝甘任事。一切慎勉。為之。以副委任。○以荒謬巧詐。革甘肅知縣房廷華職。遣戍新疆。○以擅離職守。革甘肅未入流梁棟職。遣戍新疆。○予甘肅狄道陣亡署知州屠旭初。千總陸陞祭葬。世職加等。○旌表守正捐軀吉林民婦陳王氏。○辛酉。以京畿雨澤愆期。上詣

大高殿祈禱行禮。○遣恭親王奕訢詣

時應宮。悼親王奕誼詣

昭顯廟。鍾郡王奕詒詣

宣仁廟。孚郡王奕譞詣

凝和廟。豫親王義道詣

覺生寺。禮親王世鐸詣

黑龍潭。拈香。○以神靈顯佑。頒山東魚臺縣

關帝廟扁額。曰宣威遏寇。

城隍廟扁額。曰濟西保障。○諭內閣。僧格林

沁奏。請留遣犯在營效力。並懇將出力之已

革台吉等分別獎勵等語。所有因案遣戍之郭爾羅斯公旗未經承襲台吉色勒普科布多杜爾伯特汗旗人扎木巴拉等二名。既據奏稱。隨同官兵進剿。尚屬出力。均著准其留營效力。並免發遣。科爾沁旗已革四等台吉吐們巴雅爾。到營數載。勇往向前。著准其開復四等台吉。其奈曼王旗無品級台吉莫楞。羅布桑烏爾棍保岳魯等。從征多年。打仗奮勇。莫楞。羅布桑均著賞還四品台吉頂帶。烏

爾棍保。岳魯均已陣亡。所有四品台吉頂帶。卽賞還該台吉之子嗣世襲。以示鼓勵。○又諭。沈葆楨奏。請將驕妄之記名提督革職留營等語。記名提督黃仁道。由勇丁洊保至記名提督。宜如何申明紀律。為各營表率。乃竟敢徇庇滋事。勇丁屢次違犯將令。且敢於謁見江忠朝時。肆行謾罵。實屬膽大妄為。目無統帥。卽按照軍法從事。亦為罪所應得。姑念該提督平日臨陣。尚屬奮勇。著從寬卽行革

職。仍勒令在江忠朝軍營效力。以觀後效。不准向他處投效。如敢仍前驕蹇。不遵調度。卽著沈葆楨按照軍法從事。不准姑容。其滋事勇丁。仍著嚴拏懲辦。以肅軍律。○諭議政王軍機大臣等。僧格林沁奏。官軍追勦髮逆。屢獲勝仗。一摺。髮捻各匪。分股東竄。豫東楚北。並形喫重。僧格林沁令蘇克金等移軍光山。與張曜等會合進勦。而自紮息縣。以防北路。著卽嚴飭蘇克金等。將竄犯光山之匪。迅卽

勦除。該大臣居中調度。仍當多設偵探。僮逆眾東趨。卽拔隊東下。以固皖省門戶。陳國瑞英翰二軍。卽著僧格林沁。喬松年。催令帶隊駐紮正陽一帶。扼要堵截。偵探賊蹤。所向迎擊。喬松年並當整頓兵勇。備豫不虞。免致臨事周章。又多棘手。現孝感賊賊有直趨黃州之勢。著官文。懷遵。疊次諭旨。嚴飭派出各軍認真勦擊。並令水師於沿江一帶堵禦。毋任一賊偷渡。武昌省城防範最關緊要。唐訓方

督同在省文武悉心辦理。不得稍涉大意。逆竄光山羅山。則商城固始。均屬喫緊。張之萬身任豫撫。何得置身事外。著卽添調勁旅。以勦為防。並催令張曜等會同僧格林沁所派馬隊。遇賊卽擊。毋任賊匪東趨。貽鄰疆以無窮之患。梁逆由鎮安一路竄出大峪口。不過數千敗匪。而德興阿。劉蓉。前奏匪眾二萬餘。究竟匪數若干。是否勾結蔡逆合股。近日西安情形。若何。曾否與賊接仗。著劉蓉趕緊查

明具奏。安貴梁作楫於此股匪徒竄過鄖西。何以不能追擊。並著官文嚴飭該鎮道等。分兵入陝助勦。不得強分畛域。將此由六百里諭知僧格林沁。官文。喬松年。張之萬。劉蓉。並傳諭唐訓方知之。○又諭左宗棠。沈葆楨。先後馳奏。官軍追勦林逆。疊獲大勝。並沈葆楨奏。侍逆分竄。崇仁宜黃各摺片。林彩新一股。由德興直犯弋陽。復竄湖西。希圖南渡。經王德榜等疊次痛勦。殲滅殆盡。林逆亦被水淹。

斃。勦辦甚為奮勇。侍逆一股。襲踞建昌之萬年橋。以大股西渡。分竄宜黃。崇仁。江忠朝。席寶田等。統軍繼進。劉典。王文瑞所部。分駐臨江。永豐。彭玉麟所派之提督。喻俊明等。師船復跟踪上駛。與曾國藩前奏大略相同。賴江以西。諒可無虞。竄渡。惟此股賊匪。著名兇悍。尤宜厚集兵力。痛加勦洗。曾國藩前檄周寬世七營赴援。並令鮑超一軍。取道湖口。九江。統出樟樹鎮。迎頭遏擊。著卽催令該提督等

迅速前進。與劉典。王文瑞。及江忠朝等。追躡各營。縱橫夾擊。務將此股悍賊。就地殲除。迅克宜崇各城。毋任久踞。一面嚴扼贛江之險。杜其西竄。以保完善。省城兵力單薄。沈葆楨。檄萬泰等所部兵千餘入省。咨請曾國藩酌派數營。接防湖口要隘。著曾國藩酌量調派。陳炳汶。汪海洋等股。尚踞湖坊。陳坊一帶。著左宗棠。飭令王開琳。王德榜兩軍。乘勝進勦。毋任紛竄腹地。致勦辦愈形棘手。將此由六

百里各諭令知之。○又諭。熙麟奏。勦辦甯夏回逆。請派兵勇赴援秦州。並請飭四川總督。盤查滇匪各摺片。甯夏滿城。西門已開。城外賊營。全行撤退。惟平羅賊勢。仍未稍鬆。顯係該逆聞大軍漸集。復擬甘詞。求撫。緩我師期。疊經諭令。都興阿。雷正綰。慶昫等。嚴密布置。分路進勦。著卽懍遵前旨。迅速進兵。會同掃蕩。毋為該逆所乘。熙麟所稱。如果逆匪實係畏罪投誠。應先將甘心從逆之官犯王錫爵。

馬化澂。訥忠。赫文選。彭慶章。保立等。連其家屬。按名捆獻。都興阿營。凌遲處死。並令該逆等將所鑄槍礮。及一切軍器。馬匹。盡數呈繳。方可網開一面。法外施仁。等語。逆回果能真心求撫。如照熙麟所擬辦理。有無後患。著都興阿。雷正綰。慶昫。酌度情形。相機辦理。慶陽糧臺。需餉甚殷。前令沈桂芬。籌解銀三十萬兩。並著文煜。派員迎提。催令分起解甘。以濟要需。閻敬銘。籌撥甘餉一萬兩。解赴陝西。藩

庫交納。此項銀兩著劉蓉嚴飭藩司不得再行截留。卽與應解雷正綰營餉項一併解赴甘省。毋得遲誤。秦州所屬之秦安縣張家川蓮花城等處。回匪蔓延。勢甚危急。平固甯靈失陷後。蘭州大道梗阻。專恃秦州一路。為赴省糧運要道。關繫極為緊要。曹克忠一軍。能否赴援。著劉蓉懍遵前旨。酌度情形。趕緊辦理。如曹克忠未能前往。卽著劉蓉另撥勁旅。馳赴秦州協剿。陝省如無兵可撥。著雷正綰

抽調兵勇。兼顧秦州。以通餉道。平涼逆賊已衰。惟每當接仗。漸多兇狠。叛徒聲音服飾。均係雲南回類。難民朱元升。亦供有雲南馬賊七百往攻鞏昌之語。甘回既與滇匪勾結。如果源源踵至。勢將不可收拾。著熙麟文煜雷正綰。檄飭毗連川陝等處各地方官。務於入甘要隘。嚴密盤查。認真防堵。著駱秉章確查甘肅通滇道路。無論驛站大道。偏僻小徑。嚴飭地方官一體盤詰。如有滇省回民及來歷

不明之人。卽行查明懲辦。以靖匪蹤。平涼屢戰皆捷。極為得手。著雷正綰會同陶茂林等軍。迅圖攻拔。並將外來滇匪。殄除淨盡。毋留遺孽。將此由六百里各諭令知之。○閩浙總督左宗棠奏。已革千總管繼湧。借團擾害。業經捕獲正法。得旨。所辦甚好。仍著將在逃餘黨。飭令認真緝拏。務獲究辦。○前任陝甘總督熙麟奏。請將屢著戰功之已革副將王夢麟。暫緩發遣。仍留營效力。得旨。著准其暫緩

發遣。如在營不能得力。仍卽起解。毋稍迴護。○以捐備槍馬。賞圖薩拉克齊。協理台吉巴拉珠爾花翎。○以江西弋陽縣城解圍。賞參將劉世玉。巴圖魯名號。主簿劉廷選等。藍翎道員王德榜等。升敘有差。子陣亡千總修運選等。十六員。祭葬世職加等。○子江西萬年橋陣亡都司范得旺等。祭葬世職加等。○壬戌。

孝恭仁皇后忌辰。遣官祭。

景陵○諭內閣國家命將出師剪除兇逆原期與吾民共樂昇平其甘心從賊者固為法所難容而殲厥渠魁脅從罔治凡被賊偏脅而悔罪自新者皆在可矜可赦之列前經疊諭各路統兵大臣令於誠心歸順者無論從賊久暫均准一律投誠各該大臣亦能仰體朝廷好生之心妥為辦理故大軍肅清蘇浙兩省收撫甚多凡率眾來歸殺賊反正者類皆寬其既往咸與維新此被陷難民所當共聞共見現在金陵合圍指日可克若俟城池既拔則玉石俱焚雖悔何及亟宜及早省悟自覓生機惟念其間有久陷賊中隱懷疑懼未能自拔者用是再行剴諭嗣後如有設計獻城或擒斬首逆即立予重賞其有從賊已久蓄髮較長但能誠心歸順均准薙髮免死給予牌照路費資遣回籍攜帶眷口貲財悉歸本人兵勇不得搶奪無籍可歸妥為安置如私行殺害剽奪財物即將該兵勇按照軍法

從事並將該本管官從重懲辦各處投誠難民均照此一律辦理著各路統兵大臣各省督撫即將此旨刊刻張貼徧行曉諭務令身陷賊中者咸知朝廷寬大之政益以堅其向化之心用副覆幬生成至意將此通諭知之○又諭僧格林沁自上年督師攻拔山東淄川縣城埽平鳳凰山逆壘旋即回軍皖北殲除逆首苗沛霖肅清淮甸厥功甚偉本年髮捻各逆竄擾楚豫交界該大臣親督所部兵勇轉戰而前所向克捷洵屬勤勞懋著因念近日天氣炎蒸該大臣冒暑督兵不辭勞瘁允宜優加賞賚以獎忠勤著發去黃紗馬褂料二件金表一對玉柄小刀一把火鐮一把鼻煙一匣茶葉二匣派伯彥訥謨祜馳驛親齎前往軍營交僧格林沁祇領並傳諭該大臣為國宣勞尤宜善自愛護以隆倚畀○又諭左宗棠奏請將庸劣各員懲處等語浙江松陽縣知縣鄧京鏞操守平常性耽安逸候



補知縣嚴臻居心猥鄙不堪造就署臨安縣知縣陳煥聲聞茸無能不知振作金華府經歷方正發性情鄙詐嗜好亦多開化縣縣丞程泰新狡猾險薄工於營私均著卽行革職以肅官方○諭議政王軍機大臣等富明阿奏軍務竣後請安插散勇解散賊黨一摺據稱江浙等處散勇日多必須分數分起追繳器械給貲派員管帶經過營縣彈壓遞送分交原籍地方官並於將裁之先飭令各哨官詢明該勇原籍有業可歸有田可耕有親戚可依倚者一一登註冊內將原冊發交地方官照冊妥辦其無業無田無親戚者莫若寓安插之法於屯田之中蒙穎鳳泗之間曠野間田比比皆是江浙千餘里中聞亦一片荒蕪若將皖北權鹽之利江浙算緡之利擴充勻撥作為牛具籽種第一年免納捐課第二年繳還借本第四年照常輸將酌中定議興屯卽以救時等語自來軍務將竣遣散勇

丁不得其宜每滋後患若於屯田之中妥籌安插自可一舉兩得惟是有治法尤貴有治人著曾國藩左宗棠李鴻章喬松年吳棠嚴飭所屬悉心酌覈妥議章程派委賢能地方官實心經理不可意存畏難亦不得草率敷衍務令有條有理經久可行盡地之利以消患之萌方為妥善至解散賊黨一節疊經明降諭旨寬其脅從但恐陷賊既久之人疑投誠必無生理賊遂因其疑而固結之以致垂破之城難於攻拔現在金陵城中逆黨尚多楚豫江西大股為數亦眾用特再降諭旨著江浙等省各督撫統兵大臣於奉到此旨時刊刻謄黃剴切曉諭廣為播散或更設局以招撫之務在寬其格而予以自新堅從賊者反正之心卽以破賊固結之計至賊渠狡獪或有假冒含混乘機生變等事亦不可以不防惟在該督撫及統兵大臣等妥慎辦理以靖地方將此由五百里各諭令知之○又諭

官文奏陝師未至。賊勢東趨。現派各營合力截擊。並移營孝感。督勦一摺。與僧格林沁昨日所奏情形大略尚無歧異。此股髮捻闖入楚疆。經僧格林沁督帶馬步於隨州兩戰大捷。楚軍復分投截殺。賊勢敗竄。惟楚境北路多山。南路多水。馬隊難於施展。至德安黃孝之間。地始平坦。又為賊蹤中阻。未能聚而殲。梅僧格林沁昨奏有賊蹤東趨。即拔隊迎勦。該逆竄至淮北。一出稻田。馬隊即可得力之

語。此時隨棗鍾京天應雲孝安應各郡縣已無賊蹤。全股趨重於黃陂。以東黃安麻城黃岡之間。倘得馬隊勁兵迎頭截擊。必可大挫兇鋒。著該親王偵探賊蹤。相機妥辦。官文現派成大吉楊朝林石清吉周鳳山各從黃陂麻城或迎頭截勦。或跟蹤追擊。並拔營至孝感一帶督勦。即著督飭成大吉等星夜跟追。仍設法繞出賊前。會合江皖各軍痛加勦洗。毋令賊匪一意東趨。又成尾追之勢。至由陝

調楚各軍。除孟宗福黃金山等六營經穆圖善等留陝防勦外。其姜玉順藍斯明譚仁芳等所部各營業經分起由豫赴楚。並著官文飛速催提。酌量道路遠近。飭令分投進兵。毋稍延緩。皖北接壤楚境。六安首當其衝。前據喬松年奏。蔣凝學駐守六安。共有六營。並令王才秀所部駐三河尖接應。其壽州定遠廬巢鳳陽一帶亦各派兵駐守。現在賊蹤逼近。防兵究嫌單薄。著曾國藩喬松年妥籌布置。

酌量添調兵勇。扼要防勦。毋稍疏虞。其陳國瑞英翰兩軍並著僧格林沁喬松年恪遵昨日諭旨。飛速催令帶隊駐紮正陽探蹤迎擊。毋落後著。富明阿仍遵前旨。酌撥江北勁旅扼紮上游。以資協勦。徐宿清淮一帶夙為捻匪出沒之所。難保不聞有賊警。又萌反側。著吳棠隨時鎮撫。加意籌防。以期有備無患。賊竄光羅一帶商城固始均屬喫緊。張之萬當催令張曜等會合僧格林沁之軍相機勦辦。

唐訓方已抵署任武昌等處防守事宜。並著嚴密妥籌以防賊匪回竄。不得稍涉大意。將此由六百里諭知僧格林沁。官文。曾國藩。富明阿。吳棠。喬松年。張之萬。並傳諭唐訓方知之。○閩浙總督左宗棠奏浙省軍務未平。請將本年鄉試展緩舉行。從之。○以紀律不嚴。摘湖北總兵官梁洪勝道員梁作楫頂帶。參將蔣榮華革職留營。○癸亥。諭內閣。朕奉慈安皇太后

慈禧皇太后懿旨。從來致治之原。端在以古為鑑。凡用人行政之要。治亂得失之源。載在簡編。足資法戒。前於皇帝御極之初。命南書房上書房諸臣。採擇前史事蹟。纂輯成書。進呈備覽。賜名治平寶鑑。其中援據往事。推闡數陳。尚稱切要。若將此書講貫發明。於治理尤有裨益。著瑞常寶鑒。載齡。李棠階。單懋謙。徐桐。於本月二十七日。起。每日輪派一人。由議政王帶領進講。瑞常等於進講之時。務當剴

切敷陳。言必盡意。毋得稍有避忌。用副集思廣益至意。○又諭。張之萬奏請將差委京員獎勵等語。員外郎銜刑部候補主事李汝鈞。經該撫委辦軍需局務。據稱循名責實。均能考覈精詳。不避勞怨。自應量予獎勵。惟該撫奏請賞加五品卿銜。未免過優。李汝鈞著改為賞加四品頂帶。以示鼓勵。○諭議政王軍機大臣等。前據玉明等奏。滾地雷王五餘黨。被擊潛匿。請酌撤官兵。以節經費。當經降旨

允准。仍著玉明等嚴飭奉天吉林兩省實力躡緝。茲據景給等奏。稱餘匪烏痣李等。在東邊圍場藏匿。復由山徑竄出。百餘人在通溝岡子等處。行劫經官兵追擊。斃賊多名。該將軍復派令署副都統德英等。管帶兵役。練勇設法殄除。疊有斬擒。追至佈爾庫邊門。該匪向昌圖偏臉城逃竄。另股匪徒。在奉天屬界圍場等處滋擾。各等語。首逆王五餘黨被勒。潛匿旋復聚眾滋事。亟宜認真勦洗。以絕亂

萌著玉明實善實均德椿景綸瑞嚴飭該省帶兵將弁無分畛域實力掩捕不准一名漏網將此由四百里各諭令知之○又諭徐宗幹奏髮逆復陷建甯甯化縣城旋即擊退現飭各軍妥籌防守一摺建甯甯化兩城甫經收復何以賊匪回窠又復失陷徐宗幹於軍務重事毫無布置派出各員又復不能得力致賊氛一至城卽被陷以萬餘兵勇各路分防而任賊往來自如曾不能一為堵截乃

以被賊襲入隨即擊退為詞請將該文武等免議如此辦事顛顛安能整頓戎行保守疆圉徐宗幹著傳旨申飭所請將文武各員免其置議之處著不准行仍著該撫查明失事各員嚴參懲辦不得再有粉飾自取罪戾此股賊匪向江西新城石城竄去難保不去而復來徐宗幹當嚴飭徐曉峰張啟煊等實力堵禦如再被賊闖入蹂躪地方該撫等恐不能當此重咎也浦城汀州等處關隘甚多兵

以分防見單前經諭令該撫檄調曾玉明林文察等帶兵內渡併力剿賊卽著催令該員等會同江省兵勇合力兜剿不得再有遲滯康國器一軍計日可到仍著飛催前進現在閩省防剿正當喫緊之時毛鴻賓郭嵩燾當懍遵疊次諭旨迅飭張運蘭督帶所部剋日赴閩毋許逗遛徐宗幹當會商左宗棠就現有兵力嚴密防堵或分兵出境會剿均當認真籌辦毋得再誤事機將此由六百里各諭

令知之○又諭張之萬奏官軍剿辦髮逆克復宣化鎮現飭各軍赴楚會剿一摺前因髮逆竄至豫東疊經諭令張之萬妥籌防剿現在宣化鎮賊巢雖經副將徐連陞等攻克而賊蹤仍在光羅境內必應乘勝痛剿張之萬現飭色爾固善張曜等統率馬步各營馳援東路所辦甚合機宜卽著督飭該副都統總兵等迅速馳抵光羅一帶會合楚軍認真剿辦以收聚殲之效啟逆梁城富一股前據穆

圖善劉蓉奏該逆竄出大峪口。逼近西安。請留孟宗福等六營助勦等語。迄今已逾旬日。尚未將陝軍接仗情形馳奏。此次張之萬摺內所稱。探聞梁城富一股。游駛商州境內。與浙川相距不遠之語。是此股匪徒。業由西安回竄。張之萬已派副將張士元等駐浙嚴防。並著穆圖善劉蓉德興阿迅速派兵追擊。兩面夾攻。毋令賊蹤竄逸。致成蔓延。將此由六百里各諭令知之。○又諭前因勞崇光奏確

查滇省實情。擬以回攻。責成馬如龍岑毓英。勦除杜馬各逆。當經諭令勞崇光賈洪詔會商妥辦。茲據賈洪詔奏。勞崇光以回攻回之舉。有六不可從。刻下川省軍務稍鬆。正擬籌商進兵。惟與勞崇光意見歧異。萬難共事等語。從前勞崇光所陳各節。原不過一時權宜。俟兵力較足。仍須分別勦辦。方竟全功。原不能聽其一意。辦撫遽謂可以了事。此次賈洪詔所陳進兵勦回等情。未嘗不義正詞嚴。

理直氣壯。但滇省糜爛至此。亦非紙上空談所能濟事。且籌兵籌餉。仍須藉川省之力。現在黔匪侵犯川疆。劉嶽昭一軍。亦經該督奏留暫駐合江江津。不能卽赴昭通。恐川省兵力尚難兼顧。駱秉章老成持重。素能統籌全局。不分畛域。且距滇較近。該處實情。必有所聞。賈洪詔擬辦各節。是否能有把握。進兵之後。川省資助餉項。能否源源不斷。著駱秉章體察情形。酌覈具奏。賈洪詔與勞崇光同任封圻。必須和衷協力。方能共濟。乃意見齟齬。至於如此。以後諸事掣肘。貽誤非輕。賈洪詔與該督近至一城。其人才識如何。能否勝此重寄。並著該督據實密陳。毋稍隱飾。將此由五百里諭令知之。○以福建臺灣防勦出力。賞道員史翼久按察使銜。○以福建臺灣疊克賊巢。免已革副將吳鴻源罪。○以安徽蒙城解圍出力。賞按察使英翰副將羅宏元都司徐登善巴圖魯名號。都司陸鴻慶等花翎。

千總宮景堂等藍翎。餘升敘有差。追贈已故知縣俞澍道銜。並建專祠。○以河南息縣捻斬擒首徐汶田。賞都司馬正心花翎。餘升敘開復有差。○予福建建甯等處陣亡縣丞董鍾麟等祭葬。世職加等。○予湖北節年陣亡殉難守備賀習聞等暨紳民婦女九百八十三員名口分別旌卹如例。○甲子。諭內閣。河南學政景其濬奏請飭各省慎選孝廉方正等語。國家於科目之外。設立孝廉方正一途。

原以按羅遺逸。振拔單寒。前經諭令各省採訪真儒。不得有名無實。乃近來各州縣視為具文。不但所舉不實。甚至各衙門書吏任意勒索。致令砥節勵行之士。無力進身。而坐擁厚貲者。反得濫竽充數。積習相沿。亟宜痛加釐剔。著各直省督撫學政。嚴飭各州縣。嗣後選舉孝廉方正。務當禁革陋規。痛除積弊。悉心採訪寒畯。以期名實相符。用副朝廷登明選公之至意。○諭議政王軍機大臣等。李鴻

章奏官軍分勦湖州。攻克吳淞等處。水陸進攻長興。並請俟湖郡克復。再行協勦金陵。各摺片。偽立王黃汶英等。糾眾竄踞吳淞。擾及陸家灣一帶。道員潘鼎新等。派撥隊伍。敗賊於丁公橋等處。復分道猛攻。將吳淞賊卡賊壘。力戰攻毀。其李朝斌進攻長興。水師壘破。夾浦口堅壘。郭松林等陸營。復將東門外上莘橋等處賊卡。埽平。偪紮城下。勦辦甚為得手。湖郡賊勢甚眾。左宗棠進勦之師。尚未偪

城。此次該逆大股出撲。希圖直犯南潯震澤。以掣浙軍後路。並擾蘇防。逆謀甚狡。李鴻章務飭水陸各營。互相犄角。毋為該逆所乘。一面飭李朝斌郭松林等。合力猛攻。迅將長興縣城克復。克復後。酌量派兵駐守。即飭諸軍乘勝會合浙師。迅拔湖州。盡殲醜類。惟兩省共辦一事。誠恐所部將領。各存意見。忌功避嫌。均所不免。現當全浙漸就肅清之際。湖州一城。已成孤注。而悍賊麇集。尤須各軍併力。

迅圖蕘事左宗棠李鴻章務各分飭各營將士同心協力早拔名城一俟大功告竣蘇浙官軍皆當同膺懋賞也前諭李鴻章派撥勁旅協勦金陵茲覽該撫所奏以滬軍協攻湖郡分防句容東壩高淳溧水等處兵力難分常勝軍及程學啟所遺礮隊並劉銘傳礮隊或派往長興或訓練未成均難助勦自係實情惟金陵功在垂成城大而堅未易猝拔曾國荃所掘地道前次攻破月圍復為該逆堵

築非添集得力礮隊勢難早奏膚公仍著李鴻章督飭各軍趕緊操練多製炸彈廣儲攻具一有成效卽飭迅赴金陵協同進剿以蕘全功該撫能否親往金陵之處屆時再行酌量辦理將此由六百里各諭令知之○又諭閻敬銘奏周厯各屬察看情形籌辦善後一摺所稱沿途情形沂屬田多荒廢克屬次之曹屬又次之各屬民情以曹州為難治沂克次之目前惟安撫災黎借給牛具籽種最為

要著擬卽籌款迅速辦理等語覽該撫所奏各節於時事均屬切要著卽督飭地方官迅籌款項廣為招徠以期漸次復業惟當督飭地方官認真經理不可有名無實白蓮池地面既據奏稱不甚寬廣擬將縣丞一缺並界河汎十總一缺一併移設白蓮池藉資彈壓著照所議辦理濮州一城當黃水之衝該撫現議遷徙於舊城乾涸處所並修築金堤以禦北流著卽派妥安員俟伏汎一過卽行妥

籌興辦另片奏接奉批諭詳陳東省吏治大概情形所論亦屬透徹安民必先察吏欲恤民之疾苦先戒官之貪欺而又必先使為廉吏者不至賠累俾中材皆知效法吏治方克振興該撫既知吏治敗壞之原於營私粉飾之吏務卽隨時嚴叅以期淘汰淨盡其尚知自愛賠累難支者卽不妨酌量調劑使人人樂為循吏以成大法小廉之治知之匪艱行之維艱日計不足月計有餘該撫於一切應

行變通各事宜務須實心實力次第慎勉為之。以副委任。將此諭令知之。○又諭劉蓉奏滇髮兩逆被勒奔竄。剋期出省。陳得才一股敗回鄂境。隴防官軍勦賊獲勝。各摺片蔡逆句通髮逆。由子午鎮澧河竄踞郿縣西南兩關。另股西竄之賊。與該逆合股。經勞峪口遁入盤屋之祖菴。被官軍追殺。賊竄終南鎮及田峪口。慈峪口等處。劉蓉現飭英毅六營會同黃鼎超。郿縣統出賊前。蕭慶高。趙鄠縣躡

賊之後。穆圖善。潼關折回之後。起六營由盤屋前進。著卽嚴檄派出各軍分路進攻。痛加掃蕩。以收聚殲之效。昨據張之萬奏。偽啟王梁城富一股。游駛商州境內。與浙川相距不遠。茲據劉蓉奏。偽扶王陳得才與啟逆合股。已至鎮安。經官軍擊敗。回竄鄂境等語。此次竄鄂之賊。究係何股。與張之萬所奏殊出兩歧。著劉蓉查明迅速具奏。匪蹤剽疾異常。難保不由漢窺川。著李雲麟統率所部進駐漢

中。分扼華陽。佛坪。留壩。各要隘。力遏該逆竄川之路。毋得稍有疏失。劉蓉現已出省。所有西安一帶戰守事宜。著穆圖善。德興阿。劉蓉妥籌辦理。曹克忠一軍。既據劉蓉奏。萬難抽動。卽著照該撫所請。飭令馳赴鳳翔一帶。兼顧汧隴。扼要駐紮。毋庸調赴都興。阿軍營陝省。應解工程銀十五萬兩。現在需用甚殷。若非源源報解。恐有停工待餉之虞。著劉蓉督飭藩司趕緊設法陸續撥解。將此由六百里

各諭令知之。○陝西巡撫劉蓉奏。陝甘軍務未平。請將本年鄉試展緩舉行。從之。○以正紅旗漢軍都統載齡兼署鑲藍旗漢軍都統。正紅旗蒙古副都統崇綸署左翼前鋒統領。○予江蘇常州傷亡總兵官張遇春。遊擊靳春和。祭葬。世職加等。○乙丑諭議政王軍機大臣等。本日據議政王軍機大臣文祥寶鑒。呈遞接到德木楚克扎布信函。內稱接本旗稟報。去年十月起至今。紅鬃子賊匪成羣搶



奪並綁去台吉披甲人等數十名當卽派令旗員太平社首人等查拏匪徒與賊交仗打死賊匪三名前後生擒十名本欲解縣究辦恐餘匪勾串路劫現將人犯在旗看管並將案情咨達熱河都統惟無力解送可否恭摺具奏請旨或如何辦理之處示知等語賊匪滋擾蒙古地方肆意搶奪戕害性命綁去台吉人等數十名之多實屬不成事體著麒慶卽飭地方文武會同該王旗設法拏辦以靖

奸宄德木楚克扎布所派旗員社首擒拏匪犯十名自應徑解熱河都統究辦惟長途遠解恐被劫奪亦屬實情著麒慶卽派得力兵弁赴該旗地方提取各犯督同府縣嚴訊按例懲辦並追究黨與一體查拏毋稍寬縱如吏胥人等有刁難勒索等弊並須認真禁止德木楚克扎布信函一件著鈔給閱看將此諭令知之○盛京將軍玉明等奏逸匪烏痣李聚眾復擾現在撥兵勦辦得旨著仍遵前

旨嚴飭將弁會合吉林官兵將竄匪捕斬淨盡毋令此拏彼竄致成滋蔓難圖○丙寅諭議政王軍機大臣等喬松年奏楚境竄賊漸徧皖省派隊駐守六安並暫留馬隊以資防勦暨籌議裁汰鋪兵皖北開徵各摺片前因楚北賊勢東趨六安等處防兵較單曾經諭令添調兵勇扼要防勦其陳國瑞一軍卽令駐紮正陽以資扼守現在髮捻各逆竄擾黃陂黃安等處麻城一帶亦見賊蹤該處皆距

英霍不遠喬松年已飭陳國瑞所派之郭寶昌馳赴六安會同蔣凝學協力防勦兼顧英霍所籌尚妥著卽督飭派出各軍認真堵勦儻逆蹤竄近英霍務須合力截擊以勦為防毋令東竄一步並著催令陳國瑞迅速前進或紮英霍或紮六安擇要駐防妥籌調度以遏逆氛陳飛熊一軍著催提到防以厚兵力鎮營兵勇旣恐不能得力卽著咨商曾國藩辦理克蒙額馬隊旣據喬松年稱其強壯可

用著准其暫留臨淮。俟常星阿馬隊到後再行調回揚營。駐紮臨鳳等處。各隊著督令逐日訓練。以備不虞。毋稍疏懈。鋪兵接遞文報一節。請俟軍務大定。再將能否永遠裁汰之處。妥議辦理。即著照該撫所議行。皖北各州縣開徵者。已有十屬。國家惟正之供。誠能取之而不為虐。小民諒必鼓舞輸將。但百姓復業未久。尚須加意撫恤。培養元氣。務須釐定章程。嚴飭各州縣痛裁浮費。於國計民生兩

無妨礙。方為妥善。將此由六百里諭令知之。○又諭穆圖善奏賊匪被勦。西竄帶兵出省。勦辦李雲麟奏西安省城喫緊。統兵進援。各摺片。昨據劉蓉奏蔡逆髮逆竄踞鄠縣之西南兩關。另股西竄之賊。復與該逆合股。遁入藍屋之祖菴。被官軍擊敗。賊竄終南鎮及田峪口。慈峪口等處。當經諭令穆圖善等實力防勦。現在湘果諸軍陸續趕到。業經劉蓉督帶出省。親赴西路勦賊。穆圖善亦擬即日

省會督金順馬隊併力攻擊。即著穆圖善劉蓉相機會勦。迅殄狂氛。省城防守事宜。仍著德興阿督同在城文武嚴密布置。不可稍有鬆勁。曹克忠適因在省。商令會同勦賊。該總兵之軍現在何員統帶。能否得力。如必須該總兵親自在彼統帶。即著該總兵仍行回顧鳳翔汧隴。毋令回匪乘虛復熾。李雲麟勦辦蔡逆一股。前據劉蓉奏稱該京卿指畫與圖。謂此股可期必滅。現在該逆西趨。兇燄甚熾。

李雲麟又以沿途無糧。未能追躡。為詞可見。從前已入彀中之說。不過紙上空談。毫無把握。此時穆圖善劉蓉已出省。追勦省防情形。稍鬆。李雲麟一軍如再前赴西安。則興漢一帶空虛。恐該逆乘間回竄。窺伺川疆。李雲麟著仍遵前旨。進駐漢中。分扼華陽佛坪留壩。各要隘。力遏逆匪竄川之路。該京卿既貽誤於前。儻再不奮勉圖功。致令此股賊匪旁竄紛趨。自問當得何罪。澄漢等營水師據奏尚

為得力。惟現在賊氛並未殲滅。豈能遽予獎勵。李雲麟所陳水師人員出力之處。著俟陝省肅清。咨商劉蓉。覈實請獎。將此由六百里各諭令知之。○又諭德勒克多爾濟等奏。籌商防剿。並桂成所部擬取道晉省。馳往會剿一摺。前因甯夏滿城被圍日久。諭令桂成統帶勁兵。會合阿拉善王部下出甯夏北山。相機進剿。茲據德勒克多爾濟等奏稱。查自歸化城土默特游牧由口外草地馳赴阿拉善

旗。相距二千里。地多沙漠。水草缺乏。若帶兵由此行走。不惟柴薪無處採覓。駝馬亦難牧放。桂成現帶精兵四五百名。擬由晉省取道。馳赴都興阿軍營。聽候酌撥等語。所奏自係實在情形。桂成所部官軍。即著取道晉省。迅速前赴都興阿軍營。到營後。應由何路進剿。著聽候都興阿節制調遣。歸綏本處之防。亦關緊要。桂成挑帶官兵。僅止四五百名。其餘自可留為操防之用。據奏設有緩急。大同鎮

兵尚可就近撤調。毋庸再調。都興阿訥欽之兵。著照所議辦理。所有沿邊沿河防堵事宜。仍著德勒克多爾濟嚴飭帶兵將弁。隨時偵探。實力嚴防。毋稍疏懈。將此由六百里各諭令知之。○以記名總兵官江忠朝為雲南臨元鎮總兵官。○予江蘇江陰等處陣亡殉難前任浙江稅課大使繆樹棠等紳民婦女一千七百四十八員名口。分別旌卹如例。○丁卯。諭內閣。熙麟、雷正綰奏官軍克復平涼府

城。擒斬巨逆一摺。甘肅平涼府城自被回匪竄踞後。雷正綰督軍進攻。屢次獲勝。會同陶茂林之師。兩路偏城逆眾。併力抗拒。官軍奮勇由西北登城。守賊潰亂。復豫定地道轟塌。東南城隅大隊先後擁入。賊占西北拌死巷戰。我軍縱橫衝擊。鏖戰兩日。將城中悍賊一律掃除。並將著名巨逆鐵酉。羽輕材殲斃。剿辦極為得手。雷正綰自督軍入甘。埽平靈臺。崇信。党原北原及白水局現新城等城鎮。卓

著戰功。此次復督隊攻克平涼。勦除巨逆。實堪嘉尚。雷正綰著加恩賞穿黃馬褂。並發去白玉四喜搬指一箇。白玉翎管一支。大荷包一對。小荷包兩箇。交該署提督祇領。陶茂林會同雷正綰分路進攻。躬冒矢石。立拔堅城。甚屬奮勇。陶茂林著加恩賞穿黃馬褂。以示優獎。○諭議政王軍機大臣等。照麟雷正綰奏官軍克復平涼府城一摺。平涼為自蘭州通陝要道。逆回負隅抗拒。久肆鴟張。經雷正綰督率兵勇。節節勦洗。復會同陶茂林相機攻勦。迅拔堅城。實屬調度有方。深堪嘉尚。該提督現因蓮花城張家川兩賊巢尚在拒守。擬偕陶茂林分路兜勦。所籌甚合機宜。卽著乘勝進搆。迅將蓮花城張家川匪巢攻拔。並將西路各逆壘一律掃蕩。先顧蘭州省垣根本重地。以次肅清。隆靜規復。固原直抵甯靈。毋得稍有鬆勁。現在平涼已復。雷正綰等軍鼓行而西。自能所向克捷。第敗匪西遁。難保

不因甯夏援兵未集。廣聚一方。希圖逞志。著都興阿迅速前赴定邊。催督各軍。規取靈州。以通援甯之路。訥欽已抵花馬池。近日接仗能否得力。並著酌量調派。桂成到營後。應如何調遣之處。著卽仍遵昨日諭旨辦理。慶昫常陞尤當加意防守。慎益加慎。以待援師。不可稍涉大意。照麟另摺奏請飭催四川等省協餉。已寄諭駱秉章等迅解矣。此時照麟業經開缺。所有慶陽軍營糧餉及雷正綰等軍餉需。著文煜妥籌轉運。毋稍缺乏。將此由六百里各諭令知之。○又諭據吳棠奏陳國瑞營餉。經該漕督於上年奏准在晉豫東三省各先撥銀三萬兩。按月各協解銀一萬兩。計自上年九月至本年五月。每省按月協餉。及先撥銀三萬兩。共應各解銀十二萬兩。請飭各該省趕緊籌解等語。現在髮捻大股由楚豫圖竄皖北一帶。已由僧格林沁檄調陳國瑞全軍移紮臨淮。相機堵勦。該總兵所部數

千之眾豈能枵腹荷戈設因餉需不繼致有  
譁潰之虞所關非細著閭敬銘張之萬沈桂  
芬即將欠解該營協撥餉銀迅速剋期籌解  
源源接濟毋誤急需將此由六百里各諭令  
知之○又諭據熙麟文煜奏慶陽糧臺需餉  
浩繁各省撥款不至異常支絀請旨迅催撥  
解以濟兵糈等語甘省大兵雲集需餉甚殷  
因糧臺支銷罄盡兵勇糧鹽等項帶欠孔多  
儻今日久缺乏譁潰堪虞現在平涼業已克

復勦辦正當得手軍餉尤關緊要著略秉章  
閭敬銘沈桂芬張之萬懍遵前旨即將各該  
省欠解甘肅餉銀各三十萬兩無論何項移  
緩就急速籌解並著於接奉此次諭旨之  
日即行派員起解銀十萬兩無分星夜兼程  
馳往慶陽糧臺交納毋再仍前延玩致滋貽  
誤將此由六百里各諭令知之○漕運總督  
吳棠奏陳國瑞一軍已撥隊前赴臨淮得旨  
蔣壩高寶等處該督仍當分飭水陸各軍隨

時嚴防毋稍疏懈○以江蘇克復丹陽縣城  
出力賞遊擊周尚智等二品封典委參領德  
永興善遊擊周得雙都司李金鼐守備田興  
富巴圖魯名號知州善昌守備楊得吉等花  
翎從九品鄭先達等藍翎餘加銜升敘開復  
有差○以克復甘肅平涼府城賞副將趙德  
正閭定邦遊擊沈大興巴圖魯名號知州容  
貴等花翎知縣崔藻藍翎總兵官魏添應等  
升敘有差予陣亡都司余興國守備盧魁元

千總吳春和等祭葬世職加等○以甘肅環  
縣勦辦回匪獲勝賞總兵官馬陞提督銜免  
已革守備謝聯陞遣戍○以甘肅慶陽防勦  
出力賞員外郎秀雯都司王茂華等花翎府  
經歷史致和等藍翎餘加銜升敘開復有差  
○以解餉無誤賞陝西知州余庚陽等花翎  
餘升敘有差○予江蘇溧陽殉難典史張埭  
等祭葬世職○戊辰諭議政王軍機大臣等  
前因劉長佑奏邊牆地方遼闊請飭嚴查奸

允諭令麒慶等認真拏辦。茲據麒慶奏稱。查禁之法。務須不分畛域。口外地方。遼闊盜賊竊發。往往鞭長莫及。請飭協力兜拏。以靖地方。等語。邊外地皆空曠。此拏彼竄。自係該匪慣技。若非各該地方官同心搜捕。則互相諉卸。盜賊仍得來去自如。殊非整飭捕務之道。著萬青藜。卞寶第。麒慶。阿克敦。布。德勒克。多爾濟。劉長佑。沈桂芬。桂成。慶春。連成。嚴飭所屬官兵。於邊牆內外一帶。聯絡聲勢。互相巡緝。

一處有賊。則附近該處之地方官。卽當會同查拏。務獲究辦。毋得稍分畛域。此外尚有沿邊應防處所。並著劉長佑。沈桂芬。查明地界。咨會各該地方官。協同緝捕。一體防範。以清盜源。麒慶所稱。回民雜處中國。久已相安。若以句結甘肅。叛回為疑。豫相逆億。是猜嫌先啟於上官。恐非開誠布公。潛消反側之道。等語。所奏不為無見。應如何不動聲色。暗中嚴防之處。著萬青藜。卞寶第。麒慶。阿克敦。布。

德勒克。多爾濟。劉長佑。沈桂芬。桂成。慶春。連成。妥籌辦理。將此各諭令知之。○又諭。曾國藩。奏遵旨會師。籌勦金陵。一摺。據稱。自蘇常攻克之後。本擬咨請李鴻章。親來會剿。惟以封疆將帥之臣。值苦戰積勞之際。未敢奏調金陵。兩月以來。百計環攻。偏城太近。賊以洋槍狙擊。我軍傷亡至四千餘人之多。所挖地道。亦難奏效。賊糧仍可支持數月。曾國荃。焦勞成疾。飲食漸減。餉項奇窘。尤為可慮。該大

臣已咨調郭松林。劉銘傳。酌帶開花礮。位輔以洋槍隊。就近助攻。請飭催李鴻章。速赴金陵。俟北岸軍事稍鬆。於六月親赴金陵。籌商攻剿等語。具見視國如家。不分畛域之意。前據李鴻章。奏滬軍協攻湖郡。兵力難分。擬添配礮位。操練兩月。俟湖郡克復。再行協攻金陵。當經諭令該撫。督飭各軍。趕緊操練。一有成效。卽飭迅赴金陵。著仍遵前旨。認真操練。多製火器攻具。並於所部各營內。挑選精壯。

便捷善於攻城者二三千人卽交劉銘傳等帶赴金陵其郭松林一軍現在助攻長興能否撥往並著李鴻章酌度調派長興一城最關緊要如能卽日克復蘇省防務自可稍鬆該撫或俟長興得手後統率諸軍助攻金陵不必定俟湖州克復左宗棠自入浙以來戰勝攻取確有把握吳興一郡諒不難剋日攻拔著卽督飭諸軍設法攻克務須就地殄除毋任窮蹙他竄楚賊刻思東犯英霍一帶已

覺喫緊去安慶不遠該大臣自未可輕離根本之地著俟上游軍勢漸平卽赴金陵督師俾各路將帥有所稟承以肅全功金陵餉絀前諭李鴻章將輪船經費五十萬解赴大營據奏已解金陵大營規平十五萬兩解鮑超營四萬兩又解曾國荃營四萬八千餘兩其餘約二十六萬餘兩趕緊飭催儘解安慶大營此項銀兩曾國藩何時收到卽行查奏其餘銀兩著李鴻章認真催提陸續解往用收

飽騰之效曾國荃積勞致疾聞之深為廕念現在大暑炎蒸該大臣務卽傳知該撫善為調攝金陵城大而堅賊悍且眾因獸之鬪不可不防惟當密屬該撫拊循士卒兼須整飭營規嚴防竄突先為不可勝以待敵之可勝又諭總理各國事務衙門奏丹國換約屆期請派員互換一摺丹國前立條約聲明以一年為期或在天津或在上海互換茲屆換約之期據英國住京公使威妥瑪呈遞照會內稱丹國現派水師副提督壁勒前來不日到滬請派員互換等語著派提督銜李恆嵩會同布政使劉郇膏將上年與丹國所立條約妥為互換卽由李鴻章諭知遵辦其條約各本著俟崇厚派員齎送至滬時卽交李恆嵩等祇領辦理李鴻章於一切事宜並著督同商榷以臻妥協並令軍機處將寄諭摘錄一併發往如該使向李恆嵩等索看憑據卽

可給與閱看。俟換約事畢。此旨仍繳還軍機處備查。將此諭令知之。○己巳諭內閣。五城御史奏差委指揮緝捕勤奮。懇請獎勵一摺。據稱候補正指揮朱森。差委又逾三年。先後獲盜多名。捕務實屬認真。惟該員疊經保奏。以知府用。已屬無可再加。該員因陳朱氏案內。經朱永泰呈控伊車夫于二索詐贓物。應行議處。可否飭部覈議。准予功過相抵等語。朱森捕務勤奮。係職分所當為。其迴護車夫

詐贓一案。律有明條。係屬兩事。該御史所請可否准其功過相抵之處。著該部議奏。尋議。朱森迴護詐贓一案。應降三級調用。私罪不准抵銷。且因有應得處分。聲敘從前勞績。請以功過相抵。向來無此例案。得旨該御史等請將朱森功過相抵之處。著毋庸議。○諭議政王軍機大臣等。喬松年奏陳國瑞一軍。催令赴防。鎮防餘兵。酌擬遣撤。請添調揚防馬隊助剿一摺。陳國瑞一軍。業於五月十九日

由徐州起程。現在諒已行抵臨淮。著喬松年與之會商。並稟商僧格林沁酌度地方緩急。何路緊要。即飛飭該總兵扼要實力防剿。該撫仍當隨時督飭。並令各軍與之聯絡聲勢。以期周密。一面將賊情偵探。飛咨僧格林沁。以便該大臣赴皖督剿。鎮營兵勇四千人。既經該撫與曾國藩咨商。恐其不能得力。即著馮子材魁玉。妥為裁撤。惟不可令其羣聚一處。致生事端。若散遣不得其法。致貽後日地

方之患。定惟馮子材等是問。前令富明阿酌撥江北勁旅。豫備援應。皖北若有警信。非馬隊不能得力。記名副都統富陞素稱勇敢。所部馬隊亦皆精銳。著富明阿即派該副都統督帶所部馬隊。馳赴臨淮一帶。與克蒙額合紮一處。現在楚賊東竄。斷不能越皖境而至揚州。是揚防鬆而皖防急。該將軍即趕緊調撥。不得稍存畛域之見。俟皖防無事。再行調回揚營可也。將此由五百里各諭令知之。○



又諭張凱嵩奏官軍攻克貴縣逆巢。潯州肅清。擬進兵分徇南甯思恩等處各摺片。廣西軍務兩年以來。疊平巨寇。此次黃三敗踞平天寨。復經劉坤一等進克堅巢。擒獲首逆。辦理甚為得手。黃逆倡亂十年。潯境久遭荼毒。現在巨憝就殄。全股蕩平。地方善後事宜。亟須妥為籌畫。該撫以左江所屬鄰氛土寇。事尚糾紛。右江之思恩地方。伏莽未淨。擬將貴縣水陸各軍分為三起。以一軍駐潯彈壓。一

軍上沂南甯。一軍分徇思恩。所籌尚屬妥協。即著督飭潯州文武會同駐潯官軍將擒捕餘匪撫綏殘黎各事細心經理。一面飭令劉坤一仍即出省督軍。將思恩南甯等處伏莽分別良莠。勦除淨盡。此時先聲所播。摧枯拉朽。自易為功。但須除惡務盡。毋得稍留遺孽。以期全境乂安。廓清邊圉。將此由六百里諭令知之。○以故扎薩克圖汗鎮國公噶勒桑端多布叔密法木散布襲爵。○以廣西攻克

貴縣賊巢。生擒首逆黃鼎源。巡撫張凱嵩得旨嘉獎。賞頭品頂帶。並賞布政使劉坤一等。將潘忠實遊擊胡時朋。何元鳳。巴圖魯名號。同知劉培一。遊擊楊子吉等花翎把總。車東義等藍翎。餘加銜升敘有差。

大清穆宗繼天開運受中居正保大定功聖智誠孝信敏恭寬毅皇帝實錄卷之一百四

大清穆宗繼天開運受中居正保大定功聖智  
誠孝信敏恭寬毅皇帝實錄卷之一百五

臣等謹將本年內奉 上諭開列於後  
一 諭內閣前因降調御史常凱奏叅口北道等官貪鄙及授意已革前署懷來縣知縣錢葆延匿報丁憂旋復揭叅等事先後降旨交劉長佑究辦茲據劉長佑奏稱遵查口北道振麟並無授意宣化府經歷童鶴齡令各屬加送規禮情事其修理衙署攤派銀兩係屬實用實報該道

同治三年甲子六月庚午朔

上詣綏履殿問

慈安皇太后安平安室問

慈禧皇太后安至戊戌皆如之○諭內閣前因

降調御史常凱奏叅口北道等官貪鄙及授意已革前署懷來縣知縣錢葆延匿報丁憂旋復揭叅等事先後降旨交劉長佑究辦茲據劉長佑奏稱遵查口北道振麟並無授意宣化府經歷童鶴齡令各屬加送規禮情事其修理衙署攤派銀兩係屬實用實報該道

查拏馬賊曾在延慶州借銀給發口糧並非程儀經過懷來縣時勇役因覓屋爭吵非該道縱令丁役騷擾至錢葆延遲報丁憂一節實非該道授意各等語振麟被叅各款均係查無確據惟修理衙署派令所屬捐廉並將糶價銀兩撥發兵餉雖係因公動用究屬辦理錯誤振麟著交部議處仍著送部引見錢葆延之父錢垣病故伊胞兄錢寶廉已在湖南學政任內丁憂該革員因伊父名字卹鈔

傳寫誤作錢鹽是以未報丁憂錢寶廉丁憂曾經湖南巡撫聲明係錢垣親子該革員乃因一字之訛藉口懷疑已見明文延閣月餘俟家信到時始行呈報顯係有心蒙混希圖戀棧錢葆延業經另案革職著永不敘用以示懲儆童鶴齡既無分肥鑽營情事著免其置議○諭議政王軍機大臣等沈葆楨奏老湘等營疊獲勝仗暨金谿等處接仗情形各摺片汪陳兩逆由陳坊湖坊竄向上清宮經

王德榜王開琳等分路猛擊殲斃悍逆多名其分踞柘子峰盛源洞者竄距貴溪城十餘里南鄉經孫昌國等疊次擊敗而賊尚未退著沈葆楨督飭在防諸軍極力埽蕩毋令盤踞要隘日肆蔓延現在侍逆大股仍踞崇仁康聽等逆則在貴溪之南金瀘之北亟宜及早殄滅楊岳斌日內諒已交卸水師起程赴江著卽星夜前進會同沈葆楨督飭江忠朝席寶田等迅赴崇仁毋令逆匪久踞並檄王

德榜王開琳會合江軍將康聽各逆速圖剿滅王文瑞分紮永豐樂安西路雖可無虞而南豐一城日久尚未攻拔其勦辦情形亦未據沈葆楨陳奏殊深馳繫南豐與廣昌宜崇均相毗連若不迅下南豐恐賊氛聯成一片紛竄旁趨愈難收拾著沈葆楨督飭在事文武奮力進攻毋再遲延干咎林正陽一股由甯化福村回竄石城之豐山仍敗踞福村偽王宗一股分黨由甯化之安遠司竄近廣昌

復退池源山背村中負隅不出是福建邊防愈形喫緊著左宗棠等督飭康國器一軍確探賊蹤迎頭截擊徐宗幹懷遵疊次諭旨迅催林文察等飛速內渡合兵會剿並飭在防諸軍嚴扼要隘其不能得力員弁隨時甄汰以肅戎行甯化石城一帶逼近汀州廣東邊防不可不先事防維著毛鴻賓郭嵩燾趕緊籌畫豫為布置張運蘭一軍仍遵前旨催令迅速入閩毋再遲延鮑超周寬世等軍據沈

葆楨奏雨多路阻月底方能抵江昨據曾國藩奏鮑超已至九江著該大臣嚴催鮑超及周寬世全軍迅速援江不得再行遲滯將此由六百里各諭令知之○予江西弋陽陣亡把總劉步瀛祭葬世職加等附祀道員羅澤南廣信府專祠○辛未諭內閣御史朱澄瀾奏政期殷實敬陳管見六條所奏均不為無見國家延攬人才惟恐不及疊經諭令內外臣工覈實保奏酌量擢用惟知人則哲自古

為難。往往有一經超擢。始終易轍者。而原保之人。又因薦舉在先。意存迴護。於吏治官方。殊有關係。嗣後內外臣工。於業經保舉人員。仍著隨時查察。儻有居官不善。聲名平常者。立即據實奏參。不得稍有徇隱。如原保之人。現已去任。例不應陳奏者。准其在步軍統領衙門都察院呈請代奏。庶賢否不至混淆。而朝廷收得人之效矣。軍興以來。各路勦辦。不得不招募勇丁。以輔兵力之不足。而此等招

募勇丁。不免良莠溷雜。嗣後各路統兵大臣。於招募勇丁。務須查明來歷。認真挑選。以資得力。該御史所請將殉難勇丁。照兵丁出征舊例。子弟等挑補兵缺之處。著該部議奏。至各路統兵大臣及各省督撫。於奉到通諭及飭議交查事件。疊經諭令迅速覆奏。而近來各省。仍未能依限覆奏。實屬疲玩已極。嗣後各該統兵大臣督撫等。於奉旨交審交查各案。未能即時覆奏者。隨時聲明外。著按李彙

奏一次。詳細分別開單。以憑查覈。至除秀安良。乃地方之要務。保甲章程。疊經通行各省。如果實力奉行。奸宄無從託足。亂源何自而萌。嗣後各該督撫。務當申明舊章。嚴飭各該地方官力行保甲。認真查察。於新復各州縣。尤宜加意防閑。永杜後患。又如整飭官方。必先嚴懲貪墨。近來各督撫。於不肖屬員。往往瞻徇情面。僅以一二語空參了事。殊非整肅吏治之意。嗣後各督撫等。甄別屬員。必須將

劣蹟查明。從實奏參。不得仍蹈從前積習。以昭覈實。又如崇儉禁奢。於風俗人心。最有關係。道光咸豐年間。疊經部臣議定規條。自當永遠遵行。第恐閱時既久。視為具文。著禮部查照咸豐年間規條。再加斟酌。通行內外各衙門。遵刻曉諭。以端風化。而辦等威。以上六條。內外臣工。務當實力遵行。大加整頓。不可有名無實。致負朝廷諄諄告誡至意。○諭議政王軍機大臣等。前因皖北兵力單薄。諭令

富明阿酌派勁兵為陳國瑞等後路聲援並令富明阿督飭富陞統帶馬隊馳赴臨淮與克蒙額合軍遏賊東竄茲據富明阿奏稱楚豫髮捻下竄若由巢淝定遠等處分路直趨則揚防各路均形喫重且裏下河一帶游兵散勇結隊成羣焦湖船隻到處聚泊防務斷難稍鬆兵力實難遠分等語所奏尚係實在情形陳國瑞一軍日內諒可行抵臨淮如兵力尚單即著吳棠酌撥姚廣武等軍就近援

應徐宿一帶未可空虛即以清淮防軍為姚廣武後路聲援揚防之軍兼為清淮策應著富明阿吳棠督飭各軍聯絡布置互相應援揚防各路兵勇即著毋庸撥赴皖北喬松年即飭在防諸軍密探賊蹤實力堵遏陳國瑞到臨後著喬松年仍遵前旨會商進兵並稟商僧格林沁酌量調度游兵散勇及新降人眾廣聚裏下河一帶焦湖船隻每多生事防範不可不嚴著富明阿飭令派出之孫文友

等校巡盤詰查拏驅逐庶奸宄無從溷跡地方得臻安謐沿江口岸亦著一體嚴查毋任匪蹤淆溷江南散勇遣散五十三營每營五百七百人不等且多降眾在內著李鴻章於遣撤之時妥為管押毋任逗遛滋事該將軍啟行後水陸各防即著飭令吳全美等嚴扼要隘妥為彈壓以靖地方將此由六百里各諭令知之○追予浙江包村等處陣亡在籍道員田祥文生朱之琳建立專祠殉難紳勇婦

女一併附祀○予浙江山陰等處殉難在籍未入流沈廷相等暨巡檢沈廷模妻女分別旌卹如例○予浙江各屬殉難軍功陸寶仁等紳民婦女二百七十四名口分別旌卹如例○壬申諭內閣給事中劉毓楠奏敬陳管見一摺據稱議政王自任事以來日與軍機大臣等講求治道夙夜在公可謂勤勞備至但性量固著其寬宏而風度尤期於嚴肅在王大臣等虛懷謙德下士禮賢原冀博訪周

諮洞悉天下利病。以挽頽敝。而致隆平。竊恐中外大小臣工。日久玩生。難保無懷詐取巧之輩。藉端干進。遇事賣緣。萬一稍失覺察。似不免為人所誤。請飭下議政王軍機大臣等。各矢公忠。破除情面。互相勸勉。宏濟時艱。各部院堂官。務當振刷精神。力求整頓。以期上下交儆。咸有一德。各等語。前因升任御史徐啟文條陳時事。特降旨申諭。議政王軍機大臣等。毋避任事之小嫌。共矢公忠之大節。中

外臣工。於時事闕失。均宜直言無隱。即議政王軍機大臣等。贊理庶務。如未能盡協機宜。亦准其據實指陳。毋稍瞻顧。此次該給事中摺內所稱。該王大臣等。須風度嚴肅。以杜干進賣緣等弊。所奏自係防患慎微。不為無見。從來小人賣緣干進。投閒抵隙。伎倆百出。該王大臣等。膺茲重寄。際此時艱。固不能不下士禮賢。周諮博訪。惟防檢稍疏。恐轉以延攬之心。致啟攀援之漸。嗣後該王大臣等。尤當

勉益加勉。慎之又慎。寬以容眾。收集益之功。嚴以律身。絕奔競之路。交相勸勉。共濟艱難。如該王大臣等。辦事有未盡妥洽之處。仍准有言責者。據實指陳。其或有在外倚勢招搖之人。為該王大臣等所不及覺察者。亦准其指名參奏。至各部院大臣。同受

先朝厚恩。自當激發天良。力圖整頓。今軍務未能盡平。庶事未見咸理。該大臣等。務各懍遵。疊次諭旨。澄敘百工。經理庶務。期於官不曠

而事不廢。毋得仍前泄沓。自蹈愆尤。聖門言政。必曰無倦。王道之要。尤重有恆。自古君臣。未有不慎始敬終思艱。圖易而能成治道者。現在尤當上下交儆。朝夕乾惕。以臻隆平之治。有厚望焉。○諭議政王軍機大臣等。楊岳斌。奏起程赴江日期。並請調員辦理營務各摺片。楊岳斌。現將江面防勦事宜。交提督黃翼升接辦。派彭楚漢等。率水師四營。先往江西省河。擇要扼紮。該督已於五月二十七日

起程。取道安慶上駛。著卽兼程前進。懍遵前旨。會同沈葆楨督飭各軍。將崇仁貴溪等處賊股次第勒除。其鮑超一軍。前據曾國藩奏已抵九江。將繞出樟樹鎮迎頭遏擊。並著該督於鮑超之軍。互相聯絡。會同夾擊。以期盡殄逆氛。廓清全境。請調之湖北候補道吳炳崑。現回湖南湘陰本籍。卽著憚世臨飭令該員迅速前往江西。赴楊岳斌軍營辦理營務。以資得力。將此由五百里各諭令知之。○又

諭滿慶恩慶奏稱。將達賴喇嘛送到首犯吐多卜降巴。及色拉寺買巴。結巴。阿克巴。三札倉各供詞詳覈。雖首從犯眾。均經訊明懲治。惟吐多卜降巴造意糾眾。先奪已革總堪布人財。繼又脅眾拒捕。請卽在藏正法。又色拉寺僧眾滋事時。有在該寺學藝之僧人。深知佛教大體。並未附和。請將該僧人滾多爾呼畢勒罕甲木巴勒丹增拉木結。以呼圖克圖列名冊檔。每屆帕克巴拉呼圖克圖年班貢

期。附同呈進貢品。仍頒給印敕。俾資遵守。及賞加堅隆琿呼圖克圖名號等語。吐多卜降巴罪狀既據滿慶恩慶逐一訊明。自應明正典刑。至該寺僧既知佛教大體。不肯附和滋事。尤應量予恩施。以昭激勸。惟朝廷既派欽差前往查辦事件。此時福濟景紋尚未到藏。若一切刑賞各事宜。不候欽差先行辦結。恐無以折服眾心。著滿慶恩慶會同崇實駱秉章福濟景紋悉心籌商。先將該犯吐多卜降

巴羈禁。俟福濟景紋到藏後。再行請旨辦理。至應行獎勵之滾多爾呼畢勒罕甲木巴勒丹增拉木結等。亦俟福濟景紋到藏後。再行奏請獎敘。原摺一件。供詞信函七件。著鈔給崇實駱秉章福濟景紋閱看。將此由五百里各諭令知之。○又諭據滿慶恩慶奏稱。將達賴喇嘛送到首犯吐多卜降巴及三札倉供詞詳覈。吐多卜降巴造意糾眾。先奪已革總堪布人財。實為此案渠魁。請卽在藏正法等

語該已革總堪布從前身死情節甚屬含糊支離此次滿慶恩慶欲將吐多卜降巴正法難保非因該已革總堪布被人謀害顛末為吐多卜降巴所深悉故欲致死滅口以期含混了結著崇實賂秉章福濟景紋將吐多卜降巴有無不法並所犯罪狀是否應行正法之處嚴密訪查據實具奏滿慶恩慶又請將滾多爾呼畢勒罕甲木巴勒丹增拉木結等獎勵所稱該僧人深知佛教大體並未附和色拉寺且能設法脫身之處恐滿慶恩慶為該寺僧所挾制不得不捏詞請獎欺罔朝廷亦應徹底根究以歸覈實並著一併查明具奏唐古特業已借到廓爾喀國大小礮位藥鉛並所用該國夫役應給口糧據滿慶恩慶奏稱均照議定價值合作漢銀惟礮位如無損壞擬仍退還一節廓爾喀係屬外夷似須示以大方不宜吝惜可否如此辦理即著賂秉章酌量妥辦此次另寄滿慶等諭旨一道

仍將崇實賂秉章福濟景紋銜名敘入以安其心藏事敗壞已極福濟景紋屢經有旨催令赴藏何以尚未前進殊屬任意遲延著崇實賂秉章迅派妥員設法疏通道路福濟景紋等呈馳赴藏將交辦各事迅速秉公辦結毋在稽延將此由五百里各密諭知之○補鑄廣西永安州知州修仁縣賀縣知縣印信從巡撫張凱嵩請也○以福建彰化縣城解圍賞同知曾雲書守備練鋒等花翎守備顏逢春等藍翎餘升敘有差○癸酉諭議政王軍機大臣等官文春賊趨麻城黃岡派兵會剿擬即赴黃州督師曾國藩奏覆陳近日軍情各一摺逆匪不得逞志於漢口分股向東北斜趨官文飭富森保等各軍分投截擊黃安黃陂之賊分竄麻城之岐亭等處擒逆亦分股由黃陂所屬之油榨河竄入羅山縣屬之仙花地方又黃安北路之賊分股竄至光山縣屬之薊家河等處成大吉等現將新洲



及辛家冲併力攻克。水師礮船在黃岡縣境。勦退賊匪。官文擬卽移營駐紮黃州。著卽趕緊馳赴黃州。督飭成大吉等馬步水陸各軍認真勦辦。將黃麻一帶逆匪悉數殄除。毋任蔓延他處。蘄水等處卽責令梁洪勝等實力固守。毋任竄突。該逆未嘗一日忘援金陵。其停頓不卽東趨。必係探聽皖省下游信息。欲以捻逆牽掣上游。便可遂其豕突狼奔之計。僧格林沁現已移紮光州。蘇克金等馬隊皆

在豫境。著卽飭令該員等將光羅各境竄匪迅速勦除。並嚴防楚匪東竄皖境。張之萬當嚴飭各郡縣慎固封守。毋令賊再闖入。應如何添兵會勦之處。著與僧格林沁會商妥辦。皖北之防。喬松年須振刷精神。豫為戒備。毋徒恃其不來。或致臨事掣肘。曾國藩現調周寬世一軍移赴皖北。並因黃麻距皖較近。列城空虛可慮。令陳國瑞駐紮壽州。該處為淮南江北適中之地。有此勁旅。兼可為廬壽舒

六等處遊擊之師所籌均妥。著卽飛飭該員等迅速到防。毋稍延誤。金陵之賊飛走技窮。著曾國藩隨時督同曾國荃相機進勦。周厯巡防該處城池雖高且堅。但使真能斷其接濟。外援不來。內賊不出。又寬為收撫。脅從播散。告示俾令傳入賊中。以破其固結之謀。不久定能蕞事。該大臣等其慎勉圖之。以副企望。聞中外匪徒仍有偷濟賊糧食軍火之事。著卽嚴飭水陸各軍實力嚴防。遇有此等匪

船卽行開礮轟擊。毋稍姑息。曾國藩摺內所稱由李鴻章解到輪船經費銀兩。照數收到。惟兵數眾多。轉瞬卽罄。既願李鴻章統兵來助。復望其攜餉相遺。著李鴻章仍遵前旨。俟長興克復。赴援金陵。並令劉銘傳等督帶選鋒先行馳往助勦。輪船尾項。僅令各處趕解接濟安慶大營。此外如有可籌之餉。仍須寬為籌畫。隨時接濟曾國藩軍營。諒該撫必不稍有畛域之見存也。黃翼升係簡放新設水

師提督所有設官分汛一切事宜。卽著該督撫等詳細定議具奏毋違。將此由六百里各諭令知之。○以江蘇克復高淳等城。隘出力。賞總兵官易開俊一品封典。總兵官王仁和。副將劉祥勝。申元盛。陳春和。邑圖魯名號。遊擊許繩祖等花翎。外委劉清雲等藍翎。餘加銜升敘。開復有差。○以江蘇克復東壩等城。隘出力。賞副將鄧訓誥。黎光照。向世珍。曹志忠。楊忠。周得勝。唐友勝。張麗堂。唐發。朱存義。

葉榮貴。劉順慶。鄒連陞。蔡文望。參將何先得。胡貴廷。王玉良。史宗興。遊擊黎大海。都司胡玉泉。邑圖魯名號。知府李宗潮。都司劉得勝等花翎。通判李元霈等藍翎。餘加銜升敘有差。○予湖北壽山殉難防禦德喜等祭葬世職。加等。○予湖南軍營病故總兵官文恆久祭葬卹廕。並賞一品封典。○甲戌。諭議政王軍機大臣等。都興阿奏。馳抵定邊。察看賊勢軍情。請飭撥步隊一摺。甯夏待援甚急。訥欽

所部又不得力。都興阿所帶除馬隊數百外。僅陳天佑勇丁一千。步隊太單。難資進剿。該將軍請調雷正綰步隊數營。並調曹克忠或陶茂林等軍來定助剿。自係實在情形。第雷正綰與陶茂林新復平涼。現已分路進攻。蓮花城。張家川賊巢。以通靜隆一帶大路。兼顧蘭垣。恐難分兵赴定。曹克忠因滇髮各逆擾及西安。又竄向盤屋一帶。防剿正當喫緊。一時亦未能赴甘。都興阿惟當就現有兵力。嚴

扼定邊。一面偵探路徑。設法進兵。西蒙克西克馬隊已抵定邊。桂成亦擬帶兵數百前赴定營。都興阿均可酌度調遣。惟成師以出。惟敵是求。若前無可進之路。徒將兵勇株守一隅。亦非善策。都興阿如察看定邊一路。未能卽時進剿。或卽前赴雷正綰軍營。合兵一處。規復固原。以期速援甯夏。著與雷正綰妥籌辦理。毋誤事機。都興阿如赴固原。其定邊一帶。卽可飭令桂成及陳天佑等嚴密扼紮。為

訥欽後路聲援。以免疏失。慶昫常陞。仍當竭力固守。以待援師。毋稍疏懈。劉蓉勸辦滇髮各逆。已否悉數殲除。如陝事稍鬆。卽飭曹克忠一軍迅赴都興阿軍營。以厚兵力。都興阿因定邊一帶覓食維艱。飭令各州縣購運米麪。准其作正開銷。軍行而糧不隨。士卒何由宿飽。著沈桂芬督飭地方官趕緊採辦。源源接濟。毋令稍有缺乏。都興阿所請咨調道員三壽辦理行營糧臺之處。著文煜飭令三壽

前赴都興阿軍營籌辦。訥欽兵勇未經戰陣。必應隨時訓練。趙廷烺部勇能否成軍。均著都興阿妥速辦理。將此由六百里各諭令知之。○又諭都興阿現已馳抵定邊。相機進剿。所有隨帶赴甘馬隊及文武人員等。既據奏稱月需銀一萬五千兩。卽著沈桂芬於應解甘餉外。按月如數撥給。以資應用。至協濟都興阿援甘軍餉。並著劉長佑、劉蓉、沈桂芬按月解交都興阿軍營。不可稍有缺乏。將此由

五百里各諭令知之。○又諭總理各國事務衙門奏貴州教民一案日久未結。請旨飭催一摺。教民一案前經總理衙門與法國駐京公使再四辯論。稍有轉機。疊經諭令崇實、駱秉章將田興恕羈禁在川。一面由勞崇光等在黔辦結。嗣據惲世臨奏田興恕已回原籍。並請留辦鳳凰防務。當經傳旨嚴行申飭。諭令該撫趕緊派員解赴川省。並令將朝廷曲予矜全之意。密為宣示。乃旋據惲世臨覆奏。

並未將曲全一節設法曉諭。亦無押解起程確期。復經寄諭嚴催。迄今又閱兩月。仍未據奏報起程。惲世臨於疊奉密諭詳示之件。竟未能悉心體會。迅速遵辦。一味顛預遷就。設因日久稽延。致此事另生枝節。總由該撫冒昧糊塗。將已成之事。敗壞決裂。自問當得何罪。著該撫恪遵前旨。迅飭委員呂鳳藻等押令田興恕剋日起程。不准再有遲延。崇實、駱秉章仍著派員迎提。俟到川羈禁後。迅速馳

奏一面飛咨黔省辦理。勞崇光、張亮基、侯田興恕到川，即將此案趕緊辦結。案關中外交涉，斷不可稍涉因循，致貽口實。該將軍督撫等務各懷遵疊次諭旨，迅籌妥辦，儻再觀望遷延，致令貽誤事機。屆時該將軍督撫縱欲顧全大局，不知何從措手也。原摺著鈔給閱看。將此由六百里各密諭知之。○乙亥，諭議政王軍機大臣等：喬松年奏，皖省軍務喫緊，河南應解陳國瑞月餉，斷難停止，並陳國瑞遵紮正陽。陳飛熊將次抵營，各摺片。皖省西北三面處處逼近逆氛，籌勦籌防，經費極形支絀。陳國瑞軍餉勢難通融勻撥。該總兵所部餉需向由河南每月協濟一萬兩。喬松年奏稱自上年九月起，至今九箇月，河南僅解過銀四萬兩，實屬不敷。現在楚中之賊仍在麻城、羅田一帶，南及蘄水，勢將駁駁東犯。陳國瑞率師來皖，正在用兵喫緊之際，張之萬何得意存吟域，希圖諉卸。著該撫仍遵前

旨，將應解陳國瑞月餉一萬兩，照數按月撥解，不准遷延貽誤。其應解喬松年軍餉亦著酌量撥解。喬松年即派員前往河南迎提，以期迅速。陳國瑞現已到臨，即著會商該總兵酌量情形，妥籌布置。陳飛熊已抵徐州，並著催令迅速到營，以厚兵力。本日有人奏河南被擾情形及軍營官民弊端一摺，係為撫恤災黎、釐剔積弊起見。著張之萬按照原奏認真查辦，不得徒託空言。有名無實。原摺著鈔

給張之萬閱看。將此由五百里各諭令知之。○以翰林院侍讀梁肇煌為湖北鄉試正考官，編修王珊為副考官。○丙子，吉林將軍景綸等奏擒獲王五餘黨，審明正法，得旨仍著督飭各路官兵認真勦捕，不准稍有鬆懈。○丁丑，以甘霖渥霈。

上詣

大高殿行禮報謝。○遣恭親王奕訢詣時應宮，悼親王奕諒詣。

昭顯廟鍾郡王奕詒詣

宣仁廟孚郡王奕譞詣

凝和廟豫親王義道詣

覺生寺禮親王世鐸詣

黑龍潭拈香。○諭議政王軍機大臣等李鴻章奏官軍擊退湖州援賊遂克長興縣城並將胡淩等處賊壘蹋毀各摺片。長興一城為蘇浙要衝。此次援浙各軍竭力攻克。實屬異長奮勉。惟長興賊首是否劉官方。曾否殲斃。

逆眾有無逃竄他處。李鴻章擬親赴長興察看。著即前往督飭諸軍。挖勒餘匪。查明匪首下落覆奏。仍將廣德四安之逆首江姓等殲除。潘鼎新一軍在胡淩等處獲勝。恐其兵力尚單。著即添派勁旅助之。務將湖州協力攻克。以期蘇浙肅清。殄除巨寇。另片奏疊奉諭旨。助攻金陵。並疊准曾國藩曾國荃咨催會商攻勦。本不敢有畛域之分。亦更無嫌怨之跡。惟湖州賊股甚眾。附城數十里內。面面賊

壘堵輔等逆。百戰狡悍。浙軍僅能扼東南兩面。其西北濱臨蘇常。湖城未克。牽掣兵力不少。今若棄湖州而赴金陵。恐賊匪乘間內窺。伺蘇境。若會攻金陵。復須協勦湖州兵力。實有不給。礮隊現未練齊。將來尚須雇用洋人教習。現擬日內由太湖馳赴長興前敵。察看軍情賊勢。相機調撥。仍即折回蘇城。候旨酌奪等語。所籌亦係實在情形。前竄江皖之賊。其勢甚張。左宗棠兵力未免為所牽掣者。

李鴻章於到長興後。即督軍助攻湖州。嚴飭水陸諸軍防賊內竄。俟湖州克復。蘇常無警。再行親統全軍助攻金陵。湖州賊多且悍。左宗棠務即督飭各軍。會同李鴻章助勦各軍同心努力。約期進攻。期於一鼓攻拔。此城為蘇浙關鍵。若旦晚克復。則一勞永逸。不獨李鴻章可以全力協克金陵。即左宗棠兵亦可直注皖南江西。東南全局轉移。大有把握。即著左宗棠李鴻章悉心妥籌。共奏膚公。以慰

朝廷殷盼。曾國藩仍卽督令曾國荃就現有兵力認真防剿。如其機有可乘。仍督率諸軍奮力圖攻。卽或一時不能得手。亦必妥慎嚴防。毋令竄突。俟合兵後。再圖剋期攻拔。以期事出萬全。該督撫等均為朝廷所倚畀。本日覽李鴻章所奏。知該督撫等志切同仇。毫無成見。為之欣慰。更須勉益加勉。和衷共濟。有厚望焉。李鴻章另片奏儘先參將孫家煥訛詐降眾。馬文彪銀洋並接搶難民。江義和財

物。指勒使女等情。實屬目無法紀。孫家煥著卽革去參將。從嚴審訊。審明後卽於軍前正法。以昭炯戒。嗣後如有似此劣弁。並著從重辦理。毋稍姑息。將此由六百里各諭令知之。○又諭勞崇光。張亮基奏克復古州廳城。請留周洪印協剿。並勞崇光奏克復中甸等廳城。疊獲勝仗。各摺片。雲南逆回杜汶秀等分踞中甸等處。經馬如龍等進剿。將中甸維西思茅威遠各城次第收復。並攻克石膏井磨

黑等處賊巢。剿辦尚為得手。思茅威遠既克。則普洱已成孤立。中甸維西既克。則大理之賊益蹙。著勞崇光檄飭馬如龍岑毓英及田仲興等各率所部。將普洱大理等城迅圖克復。擒斬首逆。以期肅清疆圉。古州收復情形。與前惲世臨所奏略同。該逆由古州苗峒繞出獨山州之霸街八蒙。進踞已賴旁寨中寨和寨。擾及荔波縣之三崗地方。經楊廷桂等軍迎剿。疊勝。賊欲向獨山州屬中安一路直

上雞場。該處為上竄貴州。定廣下竄廣西南丹必由之路。亟應嚴密堵禦。以杜賊蹤紛竄。全祖凱一軍已抵獨山。著勞崇光張亮基飭令該總兵扼要駐紮。會同湘粵兩省官軍實力掃蕩。以遏該匪紛竄。定廣南丹之路。並著惲世臨張凱嵩嚴檄派出之周洪印楊廷桂各軍。聯絡聲援。合力夾攻。迅殲醜類。周洪印因軍糧無從採辦。藥鉛亦甚缺乏。拔營撤回楚邊。惟現在正當攻剿喫緊之際。李逆尚在

漏網貴州僅有全祖凱一軍。兵力甚單。楊廷桂孤軍深入。亦難兼顧。若非添撥勁旅。卽無以收聚殲之效。著憚世臨飭令周洪印等仍統湘軍星速馳赴荔波獨山一帶協同勦洗。毋誤戎機。該營所需糧米藥鉛等項。著勞崇光張亮基設法採辦。源源接濟。憚世臨亦當竭力籌措。隨時解濟。以收飽騰之效。將此由六百里各諭令知之。○以鑲黃旗蒙古都統明慶署正黃旗蒙古都統。鑲紅旗蒙古都統

景壽暫署鑲黃旗漢軍都統。正紅旗漢軍副都統裕瑞署正紅旗護軍統領。正紅旗滿洲副都統基溥署鑲白旗蒙古副都統。○以江蘇官軍克復浙江長興縣城。予提督楊鼎勳遇缺先行簡放。賞副將于奇泮參將張正舍都司程祖旺。巴圖魯名號。餘升敘有差。予陣亡參將向大鵬。遊擊周金才。守備王福興。千總劉興隆。祭葬。世職加等。○以貴州克復普安等城出力。賞知州孫清彥。守備徐遇恩等

花翎千總龍汝駒等藍翎餘升敘有差。○予浙江湖州陣亡把總陳順昌等祭葬。世職。○戊寅

上詣

奉先殿

壽皇殿行禮。○諭內閣。恩麟奏甘省道府均係請旨簡放之缺。所有揀發道府各員到省。遇有請旨缺出。可否酌量奏請補用等語。此次揀發道府各員到省後。如果差委實在得力。

人地實屬相宜。卽准其隨摺聲明。候旨簡放。此係為現在甘省軍務需人起見。嗣後不得援以為例。○諭議政王軍機大臣等。恩麟奏陝西敗匪句結甘省東路回匪。圍攻莊浪靜甯等城。請飭陶茂林迅速援勦一摺。莊浪隆靜等處賊匪充斥。恩麟派出防勦各軍。尚形單薄。自應厚集兵力。迅掃逆氛。前據雷正綰奏稱平涼業已攻克。擬偕陶茂林分路進擣蓮花城。張家川賊巢。先通隆靜大路。兼顧蘭

垣現在靜甯等城待援迫切。曹克忠不能赴甘陶茂林一軍。應即馳赴安會遏賊西竄。援勦隆靜等處。力解城圍。著都興阿、雷正綰會商妥辦。恩麟嚴飭成桂等協力固守。以待援師。一面將省城防守事宜盡心籌畫。毋稍大意。南路軍情。責成林之望相機勦辦。甯夏回務責令梁生嶽妥為布置。均不可有名無實。其蕭永祥所部勇丁。因何潰散。著恩麟查明具奏。將此由六百里諭知都興阿、雷正綰。並傳諭恩麟知之。○又諭恩麟奏甘省軍餉異常支絀。請飭陝省趕緊協餉。以濟急需等語。陝西欠發提屬駐甘各營兵餉。已至七季之多。兵情困苦萬分。現在回匪滋擾秦州等處。軍情喫緊。萬一兵餉不繼。致各軍有譁潰之虞。所關非細。陝省現已漸次肅清。所有籌解甘省兵餉。豈容稍緩。著劉蓉督飭藩司。無論何款趕緊籌措若干兩。派員解赴甘肅省城。以濟要需。毋稍延誤。將此由五百里諭令知

之。又諭平瑞奏庫車漢回滋事。派兵救援一摺。依奇哩奏漢回變亂。及庫車失守。請派大員統兵會勦。並匪竄布古爾地方各摺。片覽奏不勝詫異。庫車居南路之衝。此次漢匪逆回倉卒起事。遽將庫車城池竊踞。殺害官民。其蓄意謀叛。決非一朝一夕之故。何以該處辦事大臣平日毫無覺察。臨時又無備禦。以致釀成變亂。實堪痛恨。平瑞現派領隊大臣文永統帶旗綠各營前往援救。並籌備軍械糧餉。以速其行。所辦尚屬認真。文永本日已簡放庫車辦事大臣。即著帶領援兵迅速前赴庫車一帶相機勦辦。惟文永帶兵無多。必應添撥勁軍。方足以資策應。烏嚕木齊提督已簡放文祥。平瑞可傳知文祥迅赴新任。並再撥兵數千。即由文祥帶往喀喇沙爾庫車等處。會同文永一軍認真勦辦。所有旗綠各營官員兵丁。均歸文祥調遣。文祥未到以前。著暫歸文永調遣。惟當乘賊匪初起之時。



迅圖撲滅。規復庫城。不准稍有稽延。致滋延蔓。喀喇沙爾與庫車接壤。此時賊匪既踞庫城。復有馬隊數百名竄至布古爾地方。肆擾喀境邊防。其關緊要。著依奇哩督飭兵弁嚴扼要隘。實力防堵。毋令東竄一步。所調之土爾扈特和碩特兩遊牧蒙古兵二千名。並著依奇哩迅催調集。來城助剿。依奇哩奏已咨平瑞調銀二萬兩。口糧麪三萬斤。據平瑞奏。僅措解銀一千兩。麪一萬五千斤。為數較少。

仍著平瑞將應解喀喇沙爾銀兩口糧設法源源解濟。俾不至有停兵待餉之虞。從前新疆用兵。回子台吉伯克等率能效命前驅。為國出力。此次庫車愛王被執不屈。致被戕害。實屬深明大義。可嘉可憫。依奇哩可將其子台吉阿密特善為拊慰。勉其招集所部。隨同官軍殺賊報仇。庶人人樂為我用。此次啟釁根由。並薩靈阿等大小文武下落。著平瑞等詳查具奏。南路軍情緊急。常清統轄各城責

任綦重。著趕緊籌撥勁兵數千。前往會剿。景廉前已有旨令其折回本任。未知該員現在行抵何處。奎棟署理葉爾羌參贊大臣。責無旁貸。著即籌撥兵餉迅速援應。並傳知阿克蘇和闐等城辦事大臣等一體嚴防。毋得稍有疏懈。喀什噶爾雖相距較遠。惟該處卡倫時有安集延回匪滋事。難保不聲息相通。暗中勾結。奎英尚未交卸。著督飭在城員弁力籌防範。消患未形。不可稍存五日京兆之見。常清另片請將遣勇一千四百餘名援案免罪等語。此項遣勇人數太多。恐釋回時中途恃眾滋事。必須妥為料理。令其分起陸續遣回。或即擇其勇健可用者。籌備口糧。令原帶之人帶赴庫車剿賊。使功不如使過。或於軍務有益。著常清斟酌妥辦。文祥接奉此旨。著即迅速起程。其哈密幫辦大臣明瑞尚未到任。該城領隊大臣一缺。即著文祥於協領內揀選明幹可靠者。暫行署理。將此由六百里

各諭令知之。○又諭依奇哩奏庫車城池失守咨調各路大兵會剿不日即可到境請飭陝甘督臣迅將戶部奏撥新疆銀四十萬兩內先行動撥銀五萬兩以濟兵食等語此項奉撥新疆銀四十萬兩前經戶部議奏應由山西巡撫籌款撥解現在新疆匪徒滋事庫車失守各路大兵雲集需餉甚殷著沈桂芬即將應解新疆銀四十萬兩迅速解往蘭州省城毋稍延玩此項餉銀四十萬兩其已經解到甘省者著都興阿恩麟迅解新疆不准截留動用並著都興阿恩麟在於甘肅欠解新疆餉項銀兩內趕緊措撥銀五萬兩派員趲程解往喀喇沙爾以備供支兵餉之用並將續到之項隨時撥解俾資接濟將此由六百里諭知都興阿沈桂芬並傳諭恩麟知之。○湖廣總督官文等奏湖北防堵喫緊請將本年鄉試展至九月舉行從之。○護陝甘總督恩麟奏請調前任蘭州府知府徐辰告赴

甘肅差遣允之。○伊犁將軍常清奏已革尚書陳孚恩已革總督樂斌在印房並文案處效力當差尚屬奮勉得旨陳孚恩荒誕謬妄因迎合載垣等獲譴樂斌前在陝甘任內聲名狼藉昏庸乖謬貽誤地方禍延今日該二員獲罪甚重均毋庸給予獎勵。○賞已革鑲黃旗漢軍副都統穆克登額三等侍衛為伊犁領隊大臣以署庫爾喀喇烏蘇領隊大臣文永為庫車辦事大臣。○烏魯木齊提督葉布冲額因病解職以哈密辦事大臣文祥為烏魯木齊提督。○調烏魯木齊領隊大臣保恆為哈密辦事大臣賞健銳營委翼長德克吉訥副都統銜為烏魯木齊領隊大臣。○以甘肅莊浪隆靜等處防剿出力予都司李友伏以遊擊用並賞花翎。○己卯諭議政王軍機大臣等張之萬奏豫軍追賊入楚調回一軍扼守光固並裁勇練兵各一摺髮逆竄擾光山等處經副將徐連陞等督率兵勇分投

勦洗該匪避兵遠颺。悉向黃安黃岡一帶竄去。張之萬現派徐連陞。色爾固善。張曜等軍。盡赴東路。聽候僧格林沁調遣。即著僧格林沁嚴飭各軍出境追躡。會合楚師兩面夾擊。務將此股巨匪悉數殄除。毋留餘孽。黃州水陸布置。前據官文奏。已派梁洪勝等營及丁長春等礮船前往扼守。此時該郡徧地賊蹤。官文務當嚴飭各營實力迎勦。痛埽狂氛。毋令蔓延為患。豫軍追賊入楚。豫南門戶空虛。

張之萬現擬於赴楚各隊內抽調一軍駐紮光固。防賊回竄。所籌尚是。即著該撫函商僧格林沁斟酌妥辦。偽啟逆等股竄向靡定。荆子關一路防守甚關緊要。張之萬現駐南陽。當督飭張士元等營力守要隘。毋稍疏懈。所陳練兵代勇。裁勇養兵之法。實為目前要務。而陸續調練尤係整頓兵制之關鍵。張之萬既稱已調歸德一營訓練。業有成效。即著將其餘各營次第挑選。逐日練習。其練成之兵。

或酌量調赴前敵。使之親列行陣。作其膽氣。庶養一兵得一兵之用。不至徒託空言。有名無實。張之萬毛昶熙奏。汝南官軍攻克時玉洗賊寨。並張家大圩。梁家灣寨。擒斬徐錫田。劉周城等逆首一摺。著責成毛昶熙督飭各軍。搜捕餘匪。悉數正法。務絕根株。出力員弁兵勇。准由該撫等存記。彙案請獎。正在寄諭間。據劉蓉奏。另股游匪冒稱扶逆。前由鄖西鎮安竄及鳳凰嘴地方。經官軍擊敗。仍回竄鄖西等語。此股賊匪游弋無常。難保不由鄖西一帶窺伺浙川。著張之萬督飭在防將士妥籌扼堵。毋令賊蹤東竄。將此由六百里各諭令知之。○又諭穆圖善。劉蓉奏官軍進逼賊壘。督勦疊勝。現籌分兵扼堵情形各摺片。蔡逆率其悍黨踞盤屋所屬之店子頭田峪口一帶。與偽啟逆及鄭馬諸逆漸趨而西。經穆圖善等飛咨曹克忠各軍分路環擊。曹克忠復率所部由郿縣槐芽鎮追擊。敗賊於西。

駱谷新口峪等處。雖疊次獲勝。而該逆糾集悍黨。蔓延三四十里。非兩路夾攻。不能收聚殲之效。現在蔡逆移踞樓觀臺一帶。穆圖善等已移營進逼。並令曹克忠由東路緊逼前進。卽著聯絡聲勢。兩路夾擊。以期一鼓殲除。毋令此擊彼竄。又成不了之局。啟逆偽將葉有洸等率部投誠。賊勢並未大衰。難保非別有詭謀。計圖一逞。著飭令黃鼎等分別真偽。斟酌辦理。不可墮其術中。扶啟各逆前竄鎮

安。劉蓉奏稱。係據探報入告。實未探明何股等語。軍營偵探為第一要務。劉蓉何得一聞賊警。不加詳察。率行入告。著再詳細查明。據實具奏。李雲麟前奏蔡逆已入穀中。似此股賊匪。已屬無能為役。何以此次竄出。又稱其狡悍善戰。非藍曹諸逆之比。李雲麟復以無糧之故。折回興安。致該逆由大峪口任意出竄。種種取巧貽誤。殊出情理之外。現在蔡逆與啟鄭各逆業已廣聚一處。著穆圖善劉蓉

督飭所部各營。會同李雲麟合力兜拏。盡殲醜類。儻堵勦不力。致令出竄。必惟穆圖善劉蓉李雲麟是問。劉蓉另片奏湖北前解多隆阿軍火器械。餘賸尚多。請飭移送陝省軍需局等語。現在多隆阿舊部各軍多已回鄂。其存留糧臺及荊子關轉運局軍火等項。著穆圖善酌量情形。轉飭多隆阿軍營糧臺各員。將現存軍火器械查明數目。移送陝省軍需局。以便提撥應用。將此由六百里各諭令知

之。○又諭。據劉蓉奏。陝省自軍興以來。山西每月籌解餉銀三萬兩。直隸山東每月各籌解銀一萬兩。均按月分解潼關道庫。統歸多隆阿支發。嗣因回務肅清。兵勇分赴鄂豫。該三省協濟餉銀亦遂停撥。現在逆匪肆擾各境。勦辦正當喫緊。徵兵購糧需費甚鉅。請仍飭各該督撫等按月如數撥解。以濟急需等語。滇髮兩逆接踵竄犯。盤屋等處各路官軍分投勦洗。需餉浩繁。若不趕緊籌解。必致停

兵待餉貽誤事機著劉長佑閻敬銘沈桂芬  
仍按照從前協撥之數自五月為始按月派  
員解赴陝省源源接濟毋稍延緩將此由五  
百里各諭令知之○予陝西整厘陣亡總管  
米方多爾濟遊擊何萬春祭葬世職加等○  
予湖北應山陣亡千總連允祭葬世職加等

大清穆宗繼天開運受中居正保大定功聖智  
誠孝信敏恭寬毅皇帝實錄卷之一百五

大清穆宗繼天開運受中居正保大定功聖智  
誠孝信敏恭寬毅皇帝實錄卷之一百六

額勒和布兼署鑲黃旗漢軍副都統○補鑄  
安徽宣城當塗盱眙來安英山望江等縣知  
縣英山縣儒學望江縣華陽鎮六安州馬頭  
汛巡檢各印信條記從巡撫唐訓方請也○  
予故工部尚書原任山西巡撫王慶雲入祀  
名宦祠從巡撫沈桂芬請也○辛巳諭內閣  
前因寶珣奏參奉天署甯遠州知州馮立模  
等摺內未與德椿會銜諭令寶珣明白回奏  
茲據奏稱從前查辦叅劾時係因慎密起見

同治三年甲子六月庚辰以理藩院右侍郎

未與該府尹會銜自請議處等語寶珣著交部議處尋議寶珣應照違令公罪律罰俸三箇月從之○兵部議覆密雲副都統連成奏密雲駐防馬甲缺出本旗乏人挑補應如所請准其暫於一翼內通行挑補將來各本旗挑補有人仍復舊制從之○以前任烏什辦事大臣奕慶為國史館清文總校官○予安徽各屬殉難紳民汪鴻猷等暨婦女七百一十四名口分別旌卹如例合門殉難軍功朱

偉孫等並建專祠○壬午諭議政王軍機大臣等有人奏已故四川彭水縣知縣張尚浴歷署青神等縣頗有政聲因前署彭水令王鱗飛任內有虧空銀五千餘兩該員未與出結因此挾恨賄求成綿龍茂道濮詒孫得署酉陽州知州適彭水有警張尚浴帶兵出防王鱗飛遂捏報彭水失守知縣不知下落嗣聞彭水安堵如故王鱗飛又勾串貢生張裕如等以該員侵吞勇糧等情誣控王鱗飛復

以將激民變等情詳請撤印旋經奉文革職交卸張尚浴欲進省投審王鱗飛授意後任知縣姜吉兆搥索交代並招勇圍困扣不准走該員將交代交清仍將該員之子及家丁拴押勒索錢文姜吉兆之子姜興國及張裕如等復派人攔阻搶奪張尚浴受辱不堪遂於三月十七日夜間服毒身死姜吉兆王鱗飛均願說合該員之子張毓崧不允控經總督藩臬曾將姜令撤任而王鱗飛並未提撤

至今尚未審結等語覽所奏各情是張尚浴本係有功無罪之員王鱗飛輒敢挾嫌誣害致令該員情急自盡若不嚴切根究覆盆之冤何由昭雪著駱秉章親提案內人證秉公嚴訊務期水落石出以成信讞不得以叅劾張尚浴在前稍存迴護原摺單均著鈔給閱看將此諭令知之○又諭麒慶奏奈曼旗拏獲賊匪仍請由旗解縣一摺前因德木楚克扎布所獲賊匪無力解送當經諭令麒慶卽

派兵弁提取各犯督同嚴訊。茲據麒慶奏稱。該旗所獲之犯。均在朝陽縣涉訟有案。自應解歸該縣審明辦理。至熱河地方與各蒙古旗相距較遠。若該旗地方獲盜之案。均由熱河派兵往提。不惟勢難兼顧。一切口糧亦無所出。請飭該旗仍將所獲各犯就近解交朝陽縣審辦等語。所奏尚係實在情形。著理藩院傳知該王旗。迅將所獲各犯派員解交朝陽縣審辦。多派官兵護送。並著麒慶飭令朝

陽縣知縣酌派兵役小心迎護。並飭俟人犯解到時。嚴禁吏胥人等毋許刁難勒索。務期有犯必懲。審訊明確。按律究治。毋稍枉縱。將此各諭令知之。○又諭前因嚴樹森奏鄂省餉源將竭。不能接濟秦軍鉅款。當經降旨。李雲麟軍餉。五月以後由陝西支發。劉蓉籌解。茲據李雲麟奏稱。陝省西同鳳三府前遭兵燹。民麥未種。上忙不能徵收。司庫如洗。楚軍將士聞楚餉改歸陝省籌解。大失所望。遂致

殺健六營士卒乘間潛逃。至二百餘名之多。餉源匱乏。焦灼萬分。請飭湖北督撫暫籌接濟等語。現在陝南軍務稍鬆。而蔡逆及啟逆等股尚在陝北游弋。李雲麟所部楚軍駐紮興安。藉資堵剿。儻因餉需不繼。致有譁潰之虞。恐該匪乘虛下駛。於楚省大局頗有關礙。著官文唐訓方。卽將李雲麟所部楚軍五六兩月餉項。迅速籌款撥解。以濟急需。將此由五百里諭知官文。並傳諭唐訓方知之。○候

補四品京堂辦理陝南軍務李雲麟奏。川匪髮逆敗竄。省防已鬆。擬移軍興安等處防剿。得旨著懍遵。疊次諭旨與移圖善。劉蓉悉心籌商。務將各股賊匪盡行殄滅。毋得徒托空言。毫無實際。因循粉飾。一奏塞責。致負委任。○督辦鎮江軍務廣西提督馮子材等奏。遵旨裁撤鎮營兵勇。得旨卽飭令向心照等妥為管帶。分別遣撤回營回籍。補鑄浙江甯波府知府台州府同知布政使司理問庫大

使慈谿縣嵎縣儒學各印信關防條記從巡撫左宗棠請也○癸未諭議政王軍機大臣等德勒克多爾濟等奏拏獲甘回奸細書信口外防務戒嚴請暫停桂成赴甘添調官兵藉資守禦一摺歸綏防務最關緊要此次該城回民劉天明等呈出甘回書信既有窺伺口外欲騎羊皮渾屯涉河東竄之語自應先事豫防妥籌堵遏歸綏兩城存營官兵僅止千餘若桂成再帶四五百名赴甘會剿不惟

守禦力單緩急難恃卽歸化城漢回雜處彈壓撫綏亦難得力所有桂成一軍著照該將軍等所請暫緩赴甘仍駐紮歸化城會同德勒克多爾濟籌辦防守一面與歸綏道貴肇輪流前赴河防認真稽查毋令外匪得以勾結煽惑托薩二廳屬之包頭鎮河口村等處均係沿河要隘並著督飭在防員弁實力巡查毋稍疏懈至所獲奸細尤須徹底根究不得稍有含混支離此次回民違沾虧與丁萬

城卽丁萬倉素不認識何以一遇丁萬倉卽允為之寄信丁萬倉既為逆匪馬和隴寄清真寺阿訇等書句結舉事何以中途輒將書信焚燒樊學動與達沾虧向無認識何以肯為代寫隱語書信至馬和隴等糾眾東竄經阿拉善兵截殺敗退之說從未見諸奏報究竟有無其事達沾虧供出隱語既有北京五掌櫃是京裏殷實回民之語其五掌櫃名姓何以未經究出著德勒克多爾濟沈桂芬桂

成等將現獲之達沾虧哈伏潮馬騾有馬相當等親提研鞫務期水落石出以成信讞其未獲之丁萬倉並著嚴拏務獲與達沾虧等互相質對毋令兔脫至張胡子灘回子馬柏林等是否暗通逆匪必須查有確據方不至株連無辜案關從逆謀叛情節重大該將軍等務當悉心審究廉得確情據實覆奏不准稍涉顛預致有枉縱劉天明等不肯助逆可見良回隨處皆有全在地方官吏善為撫慰



消患未萌德勒克多爾濟桂成辦理防務固不可稍涉鬆懈亦不可徒事張惶總當不動聲色嚴密圖維方為妥善桂成現已暫緩赴甘卽著該將軍等知照都興阿另籌調撥將此由六百里各諭令知之尋奏遵查馬和隴糾眾東竄各情經阿拉善旗及烏蘭察布盟長覆稱並無其事遂沾虧因與歸化城回教有隙捏造回匪勾結隱語書信復以素不識字假稱書信被焚央樊學動代寫往投意圖

訛詐陷害實屬情罪重大應卽正法樊學動以貪利代寫書信往投亦屬不合應予加責發落從之○予江西新建殉難文童伍瑞昭瑞潮賞卹如例○予江西高安殉難紳民張之杰等暨婦女二百六十七名口分別旌卹如例○甲申諭內閣徐宗幹奏甄別庸劣各員請分別降革一摺福建同知捐升知府舒英才具平常前代理福甯府事失查私抽釐卡紳民嘖有煩言著註銷捐升知府仍以同

知選用代理晉江縣候補知縣吳應春辦事頗預不能清理庶獄代理壽甯縣候補知縣來集審斷無能申詳不實保升同知候補知縣陳汝驥沾染習氣差委未能得力前代理大田縣不洽輿情以上三員均著以府經歷縣丞歸部銓選候補通判顧克承性耽安逸前署晉江霞浦等縣催徵不力欠款累累著卽行革職仍查明有無虧那情弊據實叅追候補縣丞捐升知縣吳發源才識短淺不勝

民社之任著註銷知縣仍以縣丞補用候補縣丞楊士龍辦事羈率代理南安縣任內緝捕不力疏縱匪犯多名候補縣丞孟長清辦事虛浮代理麻沙縣丞捏報募勇希冀冒銷候補縣丞李超遇事生風致招訐控代理福甯府司獄候補按察司司獄韓慶達年少無知擅受多事署大田縣典史候補從九品劉嘉璧性情躁妄挾制印官以上五員均著卽行革職光澤縣典史申順齡舉止輕狂同官

不齒著革職永不敘用以肅官方○諭議政王軍機大臣等官文奏官軍會剿逆匪疊獲勝仗並派兵馳援麻城一摺髮捻各逆趨集黃麻一帶經成大吉石清吉等軍分路剿擊疊有新猷惟陳得才大股尚踞麻城白杲沙河等處麻城之圍未解亟宜併力掃蕩著官文飭令成大吉石清吉等營迅將白杲等處之賊痛加剿洗毋任蔓延麻城賊氛四逼城中無糧甚形危急周鳳山楊朝林等援軍並著催令迅解城圍不得稍有疏失前據張之萬奏豫省光山等處之賊已竄黃安黃岡一帶是豫邊情形稍鬆僧格林沁現紮光山蘇克金等馬隊已在光麻之交若橫出與楚軍會剿自更得手著僧格林沁卽飭蘇克金等聯絡夾擊並遵前旨飭張曜色爾固善等軍出境追躡與鄂軍四面兜圍務期盡殲醜類痛殄狂氛第賊勢注意東趨蘄水之雲路口已有梁洪勝五營繞前扼截該逆不能逞志

恐其由麻城直趨皖境僧格林沁官文尤當分飭各軍一面迎頭攔截毋得徒事尾追致賊蹤蔓及皖境其姜玉順蕭河清藍斯明等軍已先後馳抵樊城鄂省兵力不為不厚現在分別遣留自己就緒卽著催令徑赴黃州麻城一帶會同成大吉等併力進取以期厚集毋稍宕延官文俟遣撤勇丁整頓營務辦有眉目卽遵前旨移紮黃州以資調度將此由六百里各諭令知之○又諭楊岳斌奏籌

度緩急先赴要地督勦一摺據稱刻下賊勢併注江西撫建一帶現擬徑赴南昌布置再行馳赴東路擇賊勢最厚之處躬率諸將竭力攻剿俟到江後覈計兵力通盤籌畫再當兼顧皖南等語所籌甚是現在皖南無警自當先其所急力爭上游著該督卽行前赴江西省城會同沈葆楨妥商先將省城防務布置周密隨時偵探賊蹤察度情形於賊勢最重之區督率諸軍奮力剿洗一經得手自不

難迎刃而解。並仍須兼顧皖南。毋任湖州廣德之賊續行上竄。該督撫務當和衷商辦。迅殄賊氛。以副委任。將此由六百里各諭令知之。○乙酉。諭議政王軍機大臣等。憚世臨奏湖南東西兩路邊界分籌防勦情形一摺。據稱晃州邊境空虛。分飭彭炳武等旋師赴衡。周洪印旋師赴晃。前會勦三崗之時。有生苗聚眾扼紮。後路幾梗。而包茅仙股匪愈聚愈多。由永綏以至晃州。烽火相望。雖經滕加洪等迎擊。斃賊多名。而逆眾未受大創。且與伍逆脩分脩合。另有清江苗匪在中寨橫塘滋擾。該撫已密飭周洪印等分道出境。確探逆蹤所在。合力直搗堅巢。著卽責令該總兵等確實偵探。包逆大股。是否悉踞麥地長坪。務須出奇設伏。就地殲除。儻能將包逆擒斬。餘賊自不難望風瓦解。該撫卽督飭周洪印等認真辦理。以清積年巨患。晃州去獨山荔波較遠。既未能前往會勦。著卽飛咨勞崇光等

實力勦辦。俟包逆伍逆就殲。再行酌量援勦。江西賊勢趨重。撫建一路楊岳斌已由安慶赴省。與沈葆楨會籌。先就賊蹤最多之處奮力擊勦。誠恐被擊分竄。則湖南界連江西各屬更形喫緊。著卽飭令派出各軍固守封圻。然後率師出境。以勦為防。更資得力。將此由五百里諭令知之。○又諭常清奏漢回焚燒庫車城池。並探聞文武被害各摺片。與平瑞依奇哩業布冲額所奏情形大略相同。昨諭常清趕緊籌撥勁兵前往會勦。茲據奏稱庫車城陷後。阿克蘇係屬毗境。所居回民倍於他處。防務關係緊要。現派員帶兵五百名馳赴阿城。相機進勦。等語。著卽嚴飭派出官兵迅速起程。會籌勦洗。惟庫城兵力單弱。待援孔亟。非添撥大支勁旅。不足以資掃蕩。著常清懍遵前旨。迅調精兵前赴庫城。會勦依奇哩前調土爾扈特和碩特兵二千名。聞該兩遊牧蒙古兵素稱驍勇。為回匪所畏憚。若能

駕馭得宜。俾該蒙兵樂為我用。則攻勦頗能得力。著依奇哩催令趕緊來城。設法聯絡。藉資協助。依奇哩前調葉爾羌伊犁兵三千名。烏嚕木齊兵二千名。已據平瑞奏報撥兵八百名。業布冲額奏報撥兵二千一百名。前往庫城救援。著平瑞文祥檄令各該官兵星速成行。趨程前往。文永先行帶領援兵。迅赴庫車。文祥接奉前旨。亦即迅速前赴庫車一帶。乘賊匪布置未定。實力殲除。以免延蔓。阿克

蘇係屬衝衢。素稱饒裕。逆回垂涎已久。防守極為喫緊。著崇恩兼程前進。速赴新任。儻再一味畏葸。遷延不進。致誤戎機。必將崇恩從重治罪。富珠哩署理阿克蘇辦事大臣。責無旁貸。即著就現有兵力。妥為布置。不可稍有疏失。文藝薩靈阿及庫城文武均被戕害。衙門倉庫及各鋪面。全行焚燒。所探是否確實。著常清依奇哩詳查具奏。逆匪公舉沙雅爾二阿渾名斜河為頭目。該頭目是否即咸豐

年間謀叛之斜黑河渾。著常清併查具奏。逆回既舉二阿渾為頭目。恐即占踞阿城。以為巢穴。常清以回多民少。暫令回人幫同守城。回眾心志最齊。若令協同守禦。務須以分良莠。不分漢回之說。妥為駕馭。毋墮該逆詭謀。著常清等嚴密籌辦。毋稍疏虞。冰嶺並伊犁北路一帶。常清尤當加意防堵。並著景廉奎棟奎英懍遵。本月初九日諭旨。一體嚴加防範。認真辦理。庫車兵餉缺乏。著常清平瑞竭

力設措。隨時接濟。妥籌兼顧。將此由六百里各諭令知之。○以四川攻克橫江等處逆巢出力。賞總兵官楊得勝。毛尚陞。蕭德揚。劉厚基。蕭德見。毛福益。彭義益。一品封典。總兵官胡日祥。童法三。史定升。曹加正。唐友勝。沈茂勝。朱楚英。副將戴定邦。張大有。黃兆潤。王雲孚。蕭祥勝。彭緒慶。李得本。蕭聚林。胡志旗。蕭品元。李用敬。參將楊仕春。李成龍。宋華美。鄒復勝。巴圖魯名號。同知毛官作。參將鄧顯寅。

等花翎千總方南清等藍翎餘加銜升敘開復有差○予湖南永綏陣亡守備李興舉祭葬世職加等○予湖南排坡陣亡土守備吳正邦把總黃裕海祭葬世職加等○丙戌諭議政王軍機大臣等慶昫等奏提解糧餉到城並偵探近日賊情一摺甯夏滿城自山西由草地解到協餉三萬兩阿拉善旗承運小麥一千餘石沈桂芬續籌銀一萬兩並所撥鉛丸火藥亦將到城該處得此接濟人心諒

益固結附城之賊類多零星小醜不難掃除著慶昫等一面激勵將士慎固城防一面分兵出擊翦除羽翼斷不可以賊勢稍鬆漸涉疏懈逆首赫汶典馬萬選皆左近平羅豪富現遣其黨與回鄉割麥難保非糾眾前往阻截援兵著都興阿仍遵前旨探明道路派兵進剿慶昫奏稱由磴口過河自石嘴山節節前進即可直達平羅等語如由此路進兵較之繞越行走勢更徑捷著都興阿斟酌辦理

馬化澂一股在靈州張貼偽示歸罪赫汶典等自明無罪籠絡鄉民恐其搖惑民心仍圖西竄且與西甯一帶回民聲氣相通若不及早殲除將來肆意勾結其患未已著都興阿雷正綰會商進剿訥欽所部兵勇未經戰陣著都興阿隨時察看訥欽如不勝統率之任即另行派員統帶此軍現存兵勇既不能得力亦豈可坐耗餉糈著逐加挑選認真訓練其不堪驅策者即酌量遣撤以節糜費前因

都興阿兵力較單諭令劉蓉俟陝事稍鬆即飭曹克忠一軍迅赴都興阿軍營以厚兵力如現在曹克忠不能赴甘即酌派數營前往助剿歸綏防務緊要且有甘省回匪東竄之謠桂成所帶之兵已諭令仍留歸化城辦理防守暫緩赴甘矣沈桂芬籌畫甘省餉項甚為得力現在甯夏需餉仍著陸續籌解源源接濟將此由六百里各諭令知之○予江蘇六合陣亡殉難協領常壽等二百九十九員

附祀總兵官羅玉斌等專祠○丁亥以雨澤未霑

上於

大高殿設壇祈禱親詣行禮○遣恭親王奕訢

詣

時應宮惇親王奕誼詣

昭顯廟鍾郡王奕詒詣

宣仁廟孚郡王奕譔詣

凝和廟睿親王仁壽詣

覺生寺禮親王世鐸詣

黑龍潭克勤郡王晉祺詣密雲縣

白龍潭拈香○諭議政王軍機大臣等沈葆

楨奏江席兩軍會勦崇仁踞逆疊勝上清宮

賊匪紛竄官軍迎勦失利遵查圍攻南豐情

形請將席寶田暫革並自請治罪各摺片逆

眾麇集江西占踞崇仁等城意圖久踞經江

忠朝席寶田兩軍會勦崇仁疊獲勝仗殺賊

一千三四百名勦辦尚屬出力惟賊勢尚眾

而官軍又傷亡不少自應乘勝進勦穩慎圖

功楊岳斌前奏先赴南昌會籌防勦此時計

已行抵江西省城卽著會同沈葆楨督飭江

忠朝席寶田各軍實力攻擊迅復崇仁並將

宜黃南豐等處之賊以次殄滅毋稍鬆懈現

在劉典進紮樂安之弓背墟王文瑞進紮樂

安之太平墟皆逼近崇仁鮑超亦擬繞赴瑞

臨進規崇仁以取迎勦之勢並著檄令各該

軍會合江忠朝等所部併力進勦盡殄賊氛

至上清宮之賊紛竄金谿之許灣一帶道員

王沐帶兵進攻中伏失利固屬咎無可辭惟

念其平日打仗尚稱勇往此次蹉跌實因眾

寡不敵所致應得處分著加恩准予寬免以

觀後效此時許灣之賊雖經劉于浚等擊敗

而偽王宗李逆餘黨及林正揚等股復由廣

昌甯化等處下竄與南豐賊合侍逆分黨東

窺撫州經總兵胡占魁等擊退仍踞河西金

谿之賊復分踞東鄉各村是東路賊氛正熾

楊岳斌沈葆楨當督飭王德榜王開琳及周寬世進賢一軍視賊匪最多之處猛力進攻次第掃蕩毋令蔓延席寶田圍攻南豐日久未下本有應得之咎惟該員因建昌有警移軍回顧致兵分見單未能得手尚非攻勦不力者可比沈葆楨請將席寶田暫行革職之處著加恩寬免並著該撫傳知席寶田感激愧奮以贖前愆沈葆楨自請從重治罪之處著一併寬免將此由六百里各諭令知之○

又諭德興阿奏官兵捐購馬匹請暫行改道採買並免交稅項一摺據稱西安軍務緊要亟應籌款購買馬匹以備防勦之用現在八旗官兵等情殷報效將應支月餉銀三千二百四十餘兩儘數報捐該官兵等至誠急公自應迅速購買惟現在軍務未靖西路不通未便遵照舊章仍往甯夏購辦擬派員由山西前赴綏遠歸化採買並請免交稅銀俾得儘數買馬三百匹湊成隊伍以濟緩急等語

西安滿營馬匹不足亟須設法購買惟該官兵等捐項為數無多若由此項銀內劃出稅貨所贖銀兩不敷買馬之用自應准予免稅以示體恤此次西安官兵捐購馬匹由山西前赴綏遠歸化一帶採買應繳稅項著德勒克多爾濟沈桂芬桂成一體免其交納並著飭令於馬匹經過各州縣豫備棚廠草豆毋任缺乏將此各諭令知之○以江蘇捐輸軍餉永廣鎮江府學額四名海門廳二名丹徒

縣十名○以江西攻克貴溪賊壘予總兵官孫昌國以提督簡放知府周溯賢王德權以道員用○以甘肅攻克新城鎮等處賊巢出力賞副將陳繼得王玉林丁洪雲參將周顯承姜秀雲鄧全忠遊擊安志榮張占鼐都司朱淮朝巴圖魯名號參將恆泰等花翎守備葉有林等藍翎餘加銜升敘有差○以甘肅趙家窪勦賊出力予千總陳洪典等以守備用並賞花翎把總何得勝等藍翎餘升敘開

復有差○以甘肅鎮原鄉團守禦出力予五品軍功李文章等三名以守備用○予江西崇仁金谿陣亡副將徐士貴等三十四員祭葬世職加等○予甘肅鎮原等處陣亡守備龔翠華等祭葬世職殉難紳民婦女五十三名口分別旌卹如例○戊子以神靈顯應加廣東高州府譙國夫人廟封號曰慈佑○諭議政王軍機大臣等前因甘省需餉孔亟諭令四川山東山西河南各撥銀三十萬兩以

應急需其雷正綰陶茂林等軍亦疊經諭令劉蓉隨時接濟不准推諉茲據文煜奏甘省各營計月需銀二十餘萬兩自四月以來應發各款已四十餘萬兩而入款僅收到河東道解銀五萬兩山東解銀二萬兩杯水車薪無濟於事各營帶欠累累加以地遭蹂躪硝磺又非土產軍火等項購買尤難奇窘萬分深虞譁潰等語甘省兵勇雲集餉需竭蹶本屬實情雷正綰已克平涼都興阿進規甯夏

軍情正當緊急需餉尤刻不容緩各該省撥解之款豈容始終膜視日久宕延著駱秉章閻敬銘張之萬沈桂芬迅速前旨各將原撥三十萬兩之數源源報解並無論何款各先撥解銀十萬兩迅速委解慶陽糧臺毋得稍分畛域致誤戎機陝甘脅齒和依劉蓉豈得以自顧不遑遂形諉卸嗣後陝省協甘銀兩即著劉蓉明定章程將該省每月究竟能協若干兩奏明陸續按月報解並將軍火等項

隨時接濟以應急需文煜辦理糧臺責無旁貸仍須隨時設法補苴一面飛咨各該省催提前項以供支發毋稍貽誤將此由五百里各諭令知之○漕運總督吳棠奏姚廣武一軍請仍令駐紮徐宿以重要防得肯姚廣武著准其暫留徐宿駐紮惟陳國瑞後路有無援應該漕督仍須隨時察度酌量移調毋致顧此失彼○以甘肅平涼等處防堵出力賞知府葆鏞等花翎知縣韓瑞東等藍翎餘升



敕開復有差○予廣東故宗人府府丞龔駢文入祀鄉賢祠從署巡撫郭嵩燾請也○己丑諭議政王軍機大臣等曾國藩奏遵覆疊奉諭旨一摺據稱李鴻章絕無避嫌之意所稱助攻金陵卽難協勦湖州係屬實在情形轉瞬新秋暑退該撫必可督兵前來至中外匪徒接濟賊糧金陵水陸一百六七十里不敢信其必無疏漏近聞戈登語及白齊文暗回中國招集無賴雇備輪船將赴金陵濟助

意外之虞頗難防禦東趨髮捻已由麻黃等縣竄入英山境內調王可陞等移防無為桐廬等處周寬世一軍已抵南昌令赴進賢防勦新調各軍尚未到防安慶人心震動現催集防兵設法堵遏俟皖北稍安李鴻章會勦有期卽當馳赴金陵商辦各等語李鴻章前奏長興克復湖州賊股仍眾浙軍僅能扼東南兩面其西北濱臨蘇常恐賊匪乘間內竄該撫擬由太湖馳赴長興察看軍情當經諭

令該撫於到長興後卽督軍助攻湖州俟湖州克復蘇常無警再行親赴金陵著李鴻章仍遵前旨會合浙軍共克湖州轉瞬蘇浙肅清礮隊練齊自當親督各軍前赴金陵肅除首惡辦賊之要首在斷其接濟曾國藩務須督飭曾國荃嚴飭水陸諸軍晝夜密防儻有暗中偷濟賊糧之事開礮痛擊毋稍懈忽白齊文前由蘇城投出逐歸本國此次何以又暗回中國招集無賴雇備輪船接濟金陵實

屬怙惡不悛除由總理各國事務衙門王大臣知照住京各國使臣外並著李鴻章查明是否實有其事設法拏辦白齊文屢敗之將無能為役金陵守將惟當遇賊卽擊無恤其他官文等前奏賊在黃麻一帶復糾眾回竄盤踞柳林舊街等處未言東竄英山本日據曾國藩奏賊由麻城黃岡羅田等縣近已竄入英山境內現今王可陞一軍移防無為州咨李鴻章於新克長興各軍中分兵守建平

騰出李榕六營馳赴桐城並調李世忠舊部陳自明四營由池州馳紮廬江均屬妥協著卽催令各軍趕緊到防毋任賊氛蔓延為患周寬世已到南昌卽檄令赴進賢防勦毋庸遽回皖北僧格林沁前奏駐紮光州一帶如賊蹤有東竄之信諒已督軍追勦卽著督令蘇克金等認真躡剿喬松年身任皖撫責無旁貸前調陳國瑞等軍均已到防卽著飭令迎頭截勦儻任其深入蹂躪定惟該撫是問

英霍去安慶不遠此時楚賊下犯恐掣金陵全局果能扼守皖疆自與金陵大有裨益曾國藩本擬六月親赴下游籌商攻勦刻下安慶人心未定自未能卽時前往著將上游軍事布置周妥俟賊氛漸熄皖屬無憂再行約會李鴻章同赴金陵以期膚公迅奏前諭官文等分飭各軍一面迎頭攔截毋得徒事尾追使逆蹤蔓及皖境此股賊匪究由何路入皖黃麻一帶情形若何官文曾否前赴黃州

著卽據實馳奏以慰廛繫將此由六百里各諭令知之○以江西捐輸軍餉永廣鄉試中額四名泰和縣學額七名奉新臨川二縣各四名南昌縣三名進賢靖安新昌清江金谿樂安新城貴溪餘干安義德安贛十二縣各一名○以湖北羅田縣捐輸軍餉永慶學額九名

大清穆宗繼天開運受中居正保大定功聖智誠孝信敏恭寬毅皇帝實錄卷之一百六

大清穆宗繼天開運受中居正保大定功聖智誠孝信敏恭寬毅皇帝實錄卷之一百七

略

同治三年甲子六月庚寅諭內閣楊岳斌彭

玉麟曾國荃由八百里馳奏官軍克復金陵外城大概情形一摺粵逆久踞金陵經楊岳斌彭玉麟曾國荃等督軍圍攻城大而堅賊眾且悍提督朱南桂等窺地道前後轟發均未得手五月三十日曾國荃督飭各將士攻克太平門外之偽地保城六月初一等日各營逼近城根輪流猛攻總兵陳萬勝等死之提督蕭孚泗道員黃潤昌等由龍膊子山麓修築礮臺架礮轟擊總兵李臣典吳宗國

何玉貴楊喜貴等從山麓距城十數丈開挖地道蕭孚泗等進攻益力半月以來礮斃賊酋偽王甚多十四日朱南桂等轟開神策門地道毀其月城而大城屹立未動十六日午刻地道火發衝開二十餘丈朱洪章劉連捷伍維壽張詩日熊登武陳壽武蕭孚泗彭毓橘蕭慶衍等率各營大隊從倒口搶入城內朱洪章等奮勇血戰從中路進劉連捷等搶紮各門由右路進朱南桂梁美材從神策門月城梯攻而入守定城北一帶彭毓橘等立奪朝陽洪武通濟等門羅廷元等從南門旁舊倒口梯攻而入守定城南一帶中關攔江礮石壘亦經提督黃翼升總兵許雲發率水師各營攻入曾國荃由太平門倒口進登龍廣山督陣諸將士倍加奮勇十盞十決縱橫鏖戰賊眾大潰自十六日午時起至日暮礮斃悍賊數萬攻毀各偽府數十處惟逆首偽城未破死黨萬餘踰伏不出官軍四面圍攻

釜底游魂諒難久稽顯戮仍著曾國荃等嚴飭各軍力拔偽城殲擒巨逆以申天討而快人心此次立功諸臣俟曾國藩將詳細戰狀奏到時卽行渥沛恩施同膺懋賞諭議政王軍機大臣等都察院奏貴州內閣中書周之翰等遣抱告以提督竊權肆虐縱賊殃民等詞繕就奏摺開具節略呈請代奏據稱貴州提督沈宏富隨已革提督田興恕入黔數載以來搶掠婦女徧勒捐輸激變民團縱賊

蹂躪勞崇光受其蒙蔽徇情濫保該員恃有兵權愈肆驕橫部下全祖凱等刳開州禦侮之團救六廣被圍之賊以致州牧殉難隘口全失賊氛愈熾直徧省城總兵趙德昌趙德光設法防勦保守危城沈宏富擁兵不出乘亂肆掠復嫉趙軍戰功屢遣部卒行刺包藏禍心尤不可問等語沈宏富在黔帶兵有年疊經該督撫等保奏擢任專閫原冀其感激圖報埽蕩逆氛若如周之翰等所陳各情是

沈宏富濫竊兵權驕恣跋扈又蹈田興恕覆轍該省現在賊氛未靖勦辦正當喫緊若帶兵大員縱寇殃民總督袒護私人張亮基近在同城豈能毫無聞見周之翰等籍隸黔省其縷陳各節決無無因著張亮基詳細查明據實迅速馳奏不得稍有迴護其所稱鄧爾巽等勒捐拷斃多命等款著一併詳查具奏周之翰等原摺並節略均著鈔給閱看將此密諭知之○又諭楊岳斌彭玉麟曾國荃由

八百里馳奏官軍克復金陵大概情形一摺逆首洪秀泉等以數十萬逆眾久踞金陵負隅死守曾國荃等督兵圍攻所部不滿五萬兩載以來將城外賊壘悉數埽蕩茲復於炎風烈日之中傷亡枕藉之餘併力猛攻克拔堅城非曾國藩調度有方曾國荃及各將士踴躍用命不能建此奇勳披覽之餘曷勝欣慰此次立功諸臣俟將偽城攻破巨寇就擒卽行渥沛恩施同膺懋賞現在悍眾萬餘力

守偽城困獸猶鬪難保不拌死竄突曾國藩彭玉麟曾國荃務當督飭水陸官軍乘勝進攻尤當於勇往之中加以慎重不可稍涉大意其洪秀全及著名巨酋必須悉數擒獲毋使乘閒免脫致稽顯戮此外被脅難民仍著妥為撫恤設法安插以示寬大之仁此次應獎應卹人員曾國藩查明具奏日來深盼續到捷報如金陵餘賊掃除淨盡卽著由曾國荃先行馳奏金陵城大兵單敗殘餘匪難保

奏稿

五

不四出奔竄高漂丹句一帶與金陵處處毗連李鴻章當嚴飭在防各軍實力扼勦遇賊卽擊馮子材魁玉飭令陶茂森等軍聯絡聲勢一體截勦總期盡絕根株毋使一名漏網富明阿督飭揚防諸軍嚴扼沿江各口毋令乘閒偷渡金陵巢穴已覆其餘各路逆匪自必聞風喪膽著左宗棠李鴻章乘此聲勢一鼓作氣迅將湖郡攻拔並著左宗棠派兵嚴扼皖南遏賊上竄之路江西援兵雲集楊岳

斌計已行抵南昌卽著督率水陸各營迅將江右逆氛掃蕩兼杜皖南竄賊俾東南數省咸就肅清登吾民於衽席有厚望焉將此由六百里加緊各諭令知之○又諭喬松年奏陳國瑞一軍已抵正陽該撫擬移紮壽州扼勦並布置英翰等軍擇要駐紮暨潁州所屬民間良圩未可平毀各摺片楚境蘄羅賊匪逐漸東趨是皖境邊防愈形喫重陳國瑞已抵正陽駐紮防勦扼賊下竄之路卽著喬松年飭該總兵嚴密堵禦擇要布置並稟商僧格林沁相機調度壽州為六安潁上扼要之區該撫卽擬移紮壽州以居形勝所籌甚合機宜惟賊勢東竄奔突靡定據稱僧格林沁現已派員於三河尖一帶查看駐營地勢如賊竄皖境卽親督追勦該撫現已調英翰等軍駐紮潁上懷遠等處卽著飭令各軍勤加偵探嚴密防守萬一賊蹤東趨務當督飭各路官兵會同僧格林沁之師前後夾擊掃蕩

逆氛毋令擾及完善至潁州所屬太和等縣民間築圩固守自係堅壁清野成法所有舊日良善各圩卽著無庸平毀該撫務須曉諭各圩民使一聞寇警仍各完聚入保俾賊無所據掠官兵自易於勦辦仍隨時偵察有無匪類潛蹤俟軍務稍鬆再令一律平毀將此由五百里諭令知之○又諭李雲麟奏率師援陝事皆棘手並餉源已絕所部軍士留撤皆難各一摺行軍之道首重糧餉李雲麟所

部一軍約六千人每月餉需三萬餘兩前經諭令陝西湖北兩省分任其半山東河南月解協餉銀一萬兩以資接濟何以山東則置若罔聞河南則僅解千兩劉蓉與李雲麟同辦陝賊何以視同吳越並不代為籌畫李雲麟現將各軍暫駐興安該處米麥雜糧諸形昂貴而餉無來源更難購買萬一飢軍潰散陝南門戶空虛於大局殊有關係著閻敬銘張之萬將應解月餉趕緊籌措源源協濟劉

蓉恪遵前旨將該營應需糧餉軍火妥籌接濟不得膜視並著官文唐訓方將李雲麟所部楚軍五六兩月餉需懍遵前旨設法迅速籌解毋稍遲誤刑賞為用兵急務若有功人員過時不賞何以責其用命所有山陽出力及扼堵髮匪川匪之水陸各營著官文劉蓉迅速查明籲請恩施不得稍分畛域李雲麟受不次起擢殊恩應如何感激奮興力圖報稱乃因辦賊無效輒以餉竭糧匱為詞藉思

諉卸况滇髮各逆現竄郿縣一帶將由棧道出漢中是陝南防務正當喫緊該京堂乃稱陝南暫就肅清請將兵勇遣撤或調赴他處於扼勦緊要之時作退避息肩之計不知李雲麟是何居心著仍督飭各軍力籌防勦儻敢縱賊出險致漢中興安各屬復遭蹂躪必惟該京堂是問將此由六百里諭知官文閻敬銘張之萬劉蓉李雲麟並傳諭唐訓方知之○又諭都興阿奏查看地勢賊情繪圖呈

覽並陳連日籌辦情形一摺該將軍以定邊距靈較遠且與前營隔膜督兵進紮花馬池以便聯絡聲威相機進剿並查明該逆自靈州金積堡等處接連占踞城堡蔓延將及千里非分兵三路進剿難期得力所籌甚為周妥惟據該將軍奏稱查探赴援甯夏之路一望沙漠繞路甚遠水草處處不便接見鄂爾多斯副盟長準噶爾扎薩克貝子扎那濟里第面稱前去磴口渡河不過八站與慶昫前奏情節相符該將軍若由此路進兵勢甚便捷著卽探明水草遠近催調各路官兵直搗甯靈毋稍延緩雷正綰進兵固原能否與該將軍合力進攻著都興阿等斟酌緩急妥籌辦理前因都興阿軍營兵力較單諭令劉蓉俟陝事稍鬆曹克忠一軍赴甘或酌派數營前往助剿並前據文煜奏稱前任總督熙麟飭令參將王泰來招募楚勇三千三百餘名歸都興阿調遣此項官兵曾否到營著都興

阿分別催提到營以厚兵力訥欽趙延琅兩軍未經戰陣卽著將老弱兵勇認真裁撤酌留精銳並著勤加操練俾歸實用將此由六百里各諭令知之○又諭依奇哩奏布古爾庫爾勒二汛被匪焚燒並催調烏魯木齊等處官兵會剿各摺片庫車變起倉卒匪蹤漸次東竄擾及布古爾臺其庫爾勒汛亦有漢回變亂放火焚燒復敢直撲喀喇沙爾城池經依奇哩派兵擊散復令土爾扈特和碩特等處官兵分路剿殺多名餘匪逃竄布庫爾汛失守依奇哩失於防範著交部議處前因庫車賊匪竄至布古爾地方諭令依奇哩催調土爾扈特和碩特兩游牧蒙古兵二千名來城助剿該蒙古兵素為回人所畏憚到城以後必能奮勇殺賊著卽激勵籠絡俾克踴躍前驅樂為我用烏魯木齊吐魯番均距該城不遠雖經平瑞派兵四百名榮慶派兵二百名前來防堵尚覺兵力較單不敷勦辦著

依奇哩咨催該二城添派兵弁會剿一面飭令現派各軍將東竄之匪悉數殲除俾前派各軍專意西指迅復庫城免致賊氛日久延蔓愈難收拾文永文祥諒已前後馳抵庫城平瑞等所派之兵務須飭令鼓勇前進迅速進行均著懍遵前旨乘賊匪布置未定奮力進剿毋得遷延干咎常清統轄各城責任綦重前諭撥兵會剿著迅速調派不准稽遲現在庫車所屬軍臺處處失守上城文報改由

冰嶺遞送該處現在情形尤為喫重常清著懍遵前旨加意防堵附近各城並著隨時咨照駐守之參贊辦事大臣等嚴加防範認真辦理毋稍疏失將此由六百里各諭令知之尋兵部議依奇哩應降一級留任從之○以廣東四會縣紳民力保危城永廣學額二名○辛卯以甘澍優霑

上詣

大高殿行禮報謝○遣恭親王奕訢詣

時應宮惇親王奕諒詣

昭顯廟鍾郡王奕詒詣

宣仁廟孚郡王奕譞詣

凝和廟睿親王仁壽詣

覺生寺禮親王世鐸詣

黑龍潭定郡王溥煦詣密雲縣

白龍潭拈香○諭內閣御史朱澄瀾奏荒產

續還業主宜嚴杜弊端一摺前因呂序程奏

請飭查逆產及荒廢地畝安置難民降眾當

經諭令各該督撫妥議章程辦理茲據朱澄

瀾奏稱各省道途梗塞若期限過嚴恐各業

主流落遠方未能趕到凡業主續歸領田者

俱俟到籍後限半年內具呈報官至外省業

主田畝半係祖產糧冊田契類已遺亡尤恐

同姓之人頂名捏造欲除此弊不必盡憑冊

契即令領田之戶取具切實保結由該管官

查明後即行立冊給契以絕紛爭逆產例應

入官特患貪劣之員將賊所強踞及與賊稍



有毗連者牽涉入官產主不敢自明因而失業惟於逆產入官時亦各取切實保結聲明實無誣逆情弊該管官確訪得實方准入官至若租戶人等詭充業主尤為可虞亦令於業主領田時聲明實無私占假冒情弊方准給領如有占冒者即行從重治罪等語所奏有無窒礙著各該督撫等按照該御史所陳各節彙入現議章程一併妥議具奏○又諭閭敬銘奏故員家屬呈告藩司在道員任內

科索陋規查辦情形一摺據稱已故前署壽光縣知縣潘運第子媳潘黃氏呈稱藩司貢璜前在登萊青道任內科索潘運第致送節壽季規等銀六百餘兩請飭藩司賞還等詞提訊潘黃氏供詞游移無據查潘運第歷任交代虧空約有三萬餘兩潘黃氏牽詞呈控難保非先為挾制地步現在詳細查辦等語此案潘黃氏如果因伊翁潘運第任內查出虧空銀兩砌詞控告意存挾制刁風實不可

長至貢璜於登萊青道任內有無收索陋規亦無難確實查明著閭敬銘秉公詳查據實具奏○以聲名惡劣革山東鹽大使徐季昌職永不敘用○予江蘇丹陽傷亡把總劉振興等祭葬世職○壬辰遣官祭

火神廟○諭內閣左宗棠奏查明失事各員分別定擬開單呈覽一摺咸豐十一年間浙江省城失守各屬相繼淪陷失事各員自應一律治罪惟據該督聲稱各該員或困守孤城糧盡被陷或大局先潰獨力難支或事後尚知愧奮隨同克復城池或當時無城可守旋即集團勦退且有接印而並未到任者情節不同自應分別重輕各當其罪所有單開之前署杭州府事候補知府杭州總捕同知姚文墉著即行革職發往新疆效力贖罪已革代理長興縣事候補知縣陳徽章著發往新疆效力贖罪前代理德清縣事候補知縣鄧兆珩署太平縣知縣吳奎祥均著即行革

職發往軍臺前署象山縣事候補知縣嚴家承前署孝豐縣事候補知縣張增文均著即行革職免其治罪已革署東陽縣事候補知縣張用錫著免其治罪前署青田縣事候補知縣吳兆祥前代理遂昌縣事候補知縣趙守純均著即行革職免其治罪前代理嵊縣事補用知縣史致遜前署蕭山縣事候補知縣施振成前署鄞縣事准補壽昌縣知縣臧均之前代理山陰縣事雲和縣知縣莊鳳威

前代理會稽縣事宣平縣知縣邊厚慶前署慈谿縣事補用同知松陽縣知縣牟溫典前署嘉興縣事候補同知彭祖壽均著即行革職免其治罪留營效力以觀後效前署分水縣事候補知縣支恆春著免其置議○又諭張之萬奏序補人員同題異覆攙越名次請旨飭查一摺此案胡廷楨陳寶豐題補各缺係經該撫同日具題何以吏部僅以陳寶豐一缺覆准而名次在先之胡廷楨如何補法

並未聲覆難保非部書有意軒輊高下任心為牟利營私之計若不亟加整頓何以肅銓政而懲奸胥著吏部將因何先後攙越之處嚴查具奏再該撫所稱奎斌准補溫縣部覆迄今未到究係因何延閣著吏部一併查明具奏○諭議政王軍機大臣等富明阿奏江甯省城已克擬派協領恆玉等先赴金陵查看滿城情形再籌布置俟軍事稍定即親赴省垣等語金陵外城業經克復洪逆僅率賊

眾萬餘抗守偽城諒不難剋期攻拔惟該逆計窮勢蹙深恐鋌險出竄江北各口亟應加意嚴防鄂省髮捻東趨前據曾國藩奏已由麻黃等境竄向英山一帶意圖由皖回援金陵僧格林沁已督兵進紮三河夾陳國瑞駐兵正陽關防堵天長六合等防亦當嚴密布置扼賊竄突著富明阿懍遵前旨督飭揚防水陸各軍嚴扼江北各要隘毋令零星賊股乘間闖入擾及完善地方並嚴飭天六等處

防軍慎密防範。遏髮擒東趨之路。該將軍仍當扼紮揚州。安籌分布。毋庸卽赴金陵。俟江甯全城克復。巨逆授首。江南北一律肅清。該將軍如須親赴滿城。籌辦善後。屆時再行奏明請旨。酌量辦理。將此由五百里諭令知之。

○又諭左宗棠奏官軍進規湖州。獲勝並攻克孝豐縣城。生擒首逆一摺。孝豐既克。則湖州安吉賊勢漸孤。左宗棠已令楊昌濬進攻安吉。恐梅溪四安等處之賊。齊心救援。將有腹背受敵之患。著李鴻章檄飭長興得勝之軍。分攻四安。以牽賊勢。必須湖州之賊與安吉劃而為二。方可收功。湖州東路水陸各營已疊獲勝仗。埽蕩賊壘不少。左宗棠卽督飭蔣益澧等各營水陸夾攻。務須一鼓作氣。迅克堅城。此時金陵外城克復。洪逆已如釜魚。併獸恐各處賊匪均無固志。勢必紛紛圖竄。且太湖廣袤數百里。江浙路路可通。尤須嚴密防維。以免疏漏。其廣德之賊。恐與徽浙各

逆互相聯絡。是皖南一路根株殊難淨絕。曾國藩左宗棠均須隨時兼顧。免致臨時棘手。蘇常各屬地方。李鴻章飭各路守將認真防範。毋稍大意。左宗棠另片奏林正陽花旗一股。已由閩回竄江西。惟延建邵汀一帶盜匪素多。亟應速予誅鋤。以清內患。現在康國器之軍已抵邵郡。張運蘭已由江西入汀州。該督卽飭令該員等各將邊境腹地匪徒迅速勦洗。無任續有竄入閩省。將吏如有不能得力者。仍遵前旨嚴為甄汰。均須隨時與徐宗幹咨商會辦。毋稍瞻徇。將此由六百里各諭令知之。

○又諭張之萬奏西路邊防稍鬆。擬移營進紮汝郡。並籌解甯夏甘餉銀數。各摺片。陝省逆匪分竄鄜縣一帶。豫西之防已鬆。而汝南新息烽煙甫靖。馬步各軍均行入楚。會勦後路。空虛。僧格林沁現擬進紮三河尖。張之萬擬卽移軍汝郡。以資聯絡。所籌尚合。機宜。現在髮逆大股屯聚麻城黃安一帶。曾

國藩前奏逆蹤已擾及英山是皖北軍情已形喫重前諭僧格林沁官文督令蘇克金張曜成大吉等軍分兵繞前截擊毋使悉數東趨此時僧格林沁進紮三河尖正可督飭諸軍迎頭堵剿卽著僧格林沁官文檄令馬步各軍聯絡夾擊迅將黃麻英山一帶之賊就地殄除無任竄突其陳國瑞駐紮正陽之軍及皖北各路防兵並著僧格林沁喬松年豫籌布置如賊勢悉銳東竄卽令覘賊所向與

鄂軍前截後追力顧皖北完善之區毋得稍有疏虞張之萬移紮汝甯該處地方久為賊藪且麻城逆匪復有竄至商城新店等情賊蹤飄忽尤難豫料卽著該撫移營進紮以壯豫軍後路聲援並與僧格林沁妥籌策應一面將汝南一帶摻捕餘匪鎮撫地方各事宜督飭地方官妥為辦理其駐防荆子關之張士元一軍仍著飭令該遊擊嚴密扼守以固西路門戶昨據曾國荃等馳奏江南官軍克

復金陵外城此時金陵巢穴已覆由鄂竄皖之賊自己聞風喪膽失所依據該大臣督撫等其各同心勦力迅奏膚公肅清皖鄂有厚望焉至該逆雖係聲言回救金陵難保不伺隙蹈瑕復行回竄鄂省上游及豫南一帶官文張之萬等尤當妥籌備豫慎固封守毋為該逆所乘另片奏拏獲過境陝省兵勇攜帶婦女請移案赴楚審辦等語此次由陝赴楚兵丁周得恩等竟敢攜帶婦女同行實屬大

干例禁其所供並非搶自民間已難憑信况據周得恩等供稱上年追賊在周家口地方救出張孫氏等經總兵邱世成令其分留為妻其劉程氏一名亦係參將朱殿魁由賊中救出收留此等婦女均繫遭難流離殊堪憫惻該總兵參將等以專閫大員輒敢乘人之危擅行收留卽與搶自民間無異似此劣弁若不從嚴重辦何以肅軍律而儆效尤著官文卽將此案於豫省咨送到後嚴行審訊按

照軍法從重治罪毋稍寬縱總兵邱世成遊擊王占勝參將朱殿魁等無論在陝在楚均著官文嚴提審訊其兵丁周得恩李長春熊有得三名卽著張之萬押解赴鄂歸案審辦以成信讞將此由六百里各諭令知之。又諭常清奏官兵起程日期請添兵籌餉據報勦賊獲勝請飭催明緒赴任平瑞奏續撥二起官兵馳赴喀喇沙爾飭屬嚴防奎棟奏庫車變亂派兵堵勦富珠哩奏庫車官員被害

阿克蘇回子聞風滋事各摺片覽奏均悉庫城回匪滋事後布古爾勒等汛相繼失陷逆戢甚張官軍勢甚單弱亟應添撥勁旅以遏狂氛著常清平瑞奎棟富珠哩業布冲額嚴檄派出官軍星速赴援兼程前進乘庫城逆匪立腳未定迅就殄除方為妥善德明管帶蒙兵既據常清奏稱尚屬合宜所有土爾滬特兵二千名卽著飭令該總兵統帶相機進勦各城大臣未到任者尚有十二員之多著

兵部嚴催各該員趕緊前進速赴新任毋再遷延致干重咎常清請飭陝甘總督撥兵五千名助勦並派員專司糧餉現在甘省送回鴟張本省兵力既單而都興阿所部可用者又止馬隊八百餘名步勇千名勦辦甚屬不敷萬難分兵兼顧回疆所請撥兵五千助勦之處著毋庸議現在金陵已克東南大軍指日卽可凱撤更可勝出餉需協濟各該城以收士飽馬騰之效該將軍以軍務緊要請飭明緒速赴伊犁參贊之任卽著照所請行哈拉玉爾流等處官軍勦賊獲勝著常清等嚴飭派出各官兵乘此聲威星速進攻以期迅殲醜類阿克蘇所屬之賽里木拜城無業回子聞風滋事亟應妥為彈壓著富珠哩督飭派出之趙維傑等軍速赴賽里木拜城先行設法撫輯再赴庫車實力進勦該城糧臺事務著常清飭令同知崇熙撙節辦理據平瑞奏稱文永已於五月二十日到城卽著該大

臣統率滿漢官兵前往救援並著文祥帶隊趕緊星馳助勦業布冲額派援庫城之馬步兵一千五百名應需監糧等項平瑞設法籌解烏城南山一帶尚有僻路可通喀喇沙爾等處難保該匪不暗中往來藉圖勾結平瑞務當嚴密盤查認真防守毋令匪蹤闖入其餘該都統所籌布置機宜尚臻妥協即著照所擬辦理伊犁官兵遣勇既為該匪所最畏即著奎棟會商常清酌派大員統帶此項兵

勇由水嶺馳赴阿克蘇會同勦辦迅殄逆氛將此由六百里各諭令知之○又諭常清奏應援官兵分起起程請速飭籌撥軍餉一摺據稱庫車逆回聚眾滋事占踞城垣經常清等調派伊犁等處官兵分起赴勦惟軍餉一節現在所費甚鉅萬難支持請飭山西河東道迅撥餉銀接濟等語伊犁各營官兵赴援庫車現已分起前進亟應籌備餉糈以濟軍行著沈桂芬迅飭河東道於庫存銀兩內無

論何款即行籌撥銀數十萬兩派委妥員分批陸續起解由北路烏里雅蘇台科布多等處解送古城即由常清派員迎提接收以濟要需毋稍延緩將此由五百里諭令知之○又諭業布冲額奏遣勇誑報軍情訊明正法並請將彈壓出力人員獎敘各摺片庫車漢回滋事經平瑞等派兵往援遣勇朱小潰來至烏嚕木齊城關輒謊稱南關魁星樓外有賊匪二三百人將先行遣勇殺傷致城內外

軍民漢回人等驚慌大亂經業布冲額派令署參將索煥章等前往彈壓察看並無一賊朱小潰妄報軍情煽惑人心幾至激成事端實屬大干法紀業布冲額於查明後即將該犯正法辦理甚妥仍著平瑞業布冲額文祥將該城內外居民加意撫綏並嚴密查拏造言生事匪徒毋令人心為所搖惑將此各諭令知之○以克復浙江孝豐縣城生擒偽戴王陳榮賞知府劉璣道銜副將劉端冕谷香

山通判蔡元吉已圖魯名號以浙江定海兵圍接捕海盜出力賞守備盧士煦花翎餘升敘有差○以河南南陽汝甯紳團勦賊出力賞教諭李紹白等藍翎餘升敘有差以失察捏報勝仗河南巡撫張之萬下部議處革副將徐連陞職仍帶隊勦賊請表守正捐軀福建漳平縣民許志誠妻劉氏癸巳諭議政王軍機大臣等李鴻章奏馳赴長興擬遵旨抽調槍礮隊助攻金陵一摺昨據楊岳斌等馳奏官軍克復金陵外城洪逆堅踞大城以內之偽城官軍四面圍攻等語李鴻章以疊奉寄諭飭令助攻金陵擬抽派王永勝等營及劉銘傳等槍隊一萬四千人前往助攻自係尚未接悉金陵克復之捷惟偽城既堅賊窮且悍難保不為困獸之鬪仍著李鴻章探明如金陵全城均經克復即可無庸調往以為協勦湖州之用儻尚未歲功有必須添調槍礮各隊之處仍著李鴻章飭令派

出各軍攜帶炸礮火器星馳前往協力猛攻以期膚公早奏左宗棠昨奏浙軍克復孝豐現今楊昌濬進圖安吉恐梅溪四安之賊齊心赴援腹背受敵當經諭令李鴻章飭長興得勝之軍分攻四安使湖州安吉之賊割而為二著該撫卽遵前旨令郭松林吳毓芬等水陸各營一面留軍扼守長興一面分攻四安與浙軍縱橫夾擊以牽賊勢其太湖東西兩岸潘鼎新劉秉璋等營並卽檄令會同李朝斌水師期會浙軍聯絡並進以期浙合長圍迅圖克復湖州肅清全浙仍嚴扼蘇常等屬以防竄突將此由六百里諭令知之又諭毛鴻賓郭嵩燾奏藩司辦事竭蹶不勝繁劇之任一摺據稱藩司吳昌壽以知縣在粵候補已二十年屬吏半係故交不能破除情面派候補道屠繼烈督催覈算交代該藩司一味遷就含糊搪塞釐務捐輸本供該藩司支放而該藩司茫無策畫於輕重緩急之序

略不置意。避就恩怨。且窘於計畫。兩次引病乞退。經開導慰留。原冀其力加振作。詎料執持意見愈覺一籌莫展等語。吳昌壽現已簡放湖北巡撫。若如毛鴻賓等所奏。辦事顛預。諸務難資整飭。於藩司尚難稱職。又安望其身任封圻。實力整頓耶。惟又據該督撫奏稱。吳昌壽性情耿直。操守廉潔。頗為時譽。所推是其人品。亦尚可取。且吳昌壽從未服官。湖北該省屬員。未必多係故交。或可望其振刷

精神。力圖整頓。吳昌壽到鄂後。是否堪以勝任之處。著官文隨時察看。據實奏聞。原摺著鈔給閱看。將此密諭知之。○福建巡撫徐宗幹奏。遵查建甯失守人員。請將知縣恆銳革職查辦。並擬俟張運蘭康國器兩軍到後。接辦防務。得旨。康國器已有旨補授。延建邵道張運蘭已報到閩。卽著督飭文武各官妥籌堵剿。不得仍前粉飾。致滋貽誤。恆銳著先行革職。認真查辦。據實具奏。○以都察院左都

御史單懋謙暫署禮部尚書。○改丁憂江南福山鎮總兵官郭松林為署任。仍留營。○以江蘇丹徒丹陽官紳辦團出力。賞同知銜知縣張熙花翎。張棟等藍翎。餘加銜升敘有差。○蠲免福建建甯甯化順昌建陽邵武光澤泰甯浦城將樂清流歸化永安沙崇安長汀連城武平甌甯大田十九縣暨邵軍汀軍同知泉上仁壽麻沙嵐下峽陽縣丞所屬被擾各地方上年額賦。○甲午諭內閣。前因恩麟

奏請揀發各員赴甘差委。當經諭令兵部於曾任實缺人員內。請旨揀選總兵二員。發往甘肅差遣。委用。茲據兵部奏該部向無此項揀選之員。請旨辦理等語。著兵部查明曾任實缺總兵在部候補人員。帶領引見。候旨發往該部。請將應升總兵人員發往之處。著毋庸議。○又諭。前因已革黃巖鎮總兵黃彬失察江面游匪運米濟賊。發往軍臺效力贖罪。茲據喬松年奏稱。據該革員之父黃合喜呈



稱伊夫婦均年逾七旬。本有五子。其三子六品軍功黃枝。曾於道光年間隨瓊州鎮出洋捕盜陣亡。四子黃彪。在籍病故。五子儘先守備黃永。六子廣東水師營參將黃威。均於咸豐七年間。在兩廣勦匪受傷病故。現在止存長子黃彬。復奉遣戍。茲請援照呈繳臺費加倍之例。措湊銀三十九十餘兩呈繳。懇請加恩免遣等語。黃彬失察游匪運米罪有應得。惟該革員防江數載。賊尚未能偷渡。且其父母皆年逾七十。諸子或以從軍病故。或以力戰陣亡。侍養無人。情殊可憫。黃彬著加恩免其發遣。並著無庸呈繳加倍臺費銀兩。以示體恤。○諭議政王軍機大臣等。僧格林沁奏髮捻各逆。廣聚麻城一帶。飛調陳國瑞等軍兜勦。並請將張曜暫革留營。喬松年移紮正陽。調楊長春差委一摺。逆匪趨重麻城一帶。張曜奉調作為前敵。並不實力進勦。實堪痛恨。本應從重治罪。此次姑照該大臣所請。張

曜即著暫行革職。仍留營效力。以觀後效。著僧格林沁督飭該總兵實力進勦。儻再不知愧奮。即行嚴參懲辦。已革提督馬德昭。久經行陣。帶隊頗能得力。因熙麟告病開缺。由甘回陝。本日已寄諭劉蓉。飭令馬德昭前赴該大臣軍營到營。後即由該大臣酌量差委。該逆環逼麻城。以閭家河為巢穴。蘇克金等軍現已進紮距麻城北四十里之黃土岡。正可乘此逆眾紛集之時。為一鼓聚殲之計。該處山徑既不利馬隊。該大臣止須多調得力步兵合勦。斷不可親自督軍前進。致有疏失。據該大臣奏。檄調陳國瑞所部。由三河尖商城一路兼程馳赴麻城。會合蘇克金張曜等。併力兜勦。並飭令英翰酌帶兩營駐紮商城。為陳國瑞後路援應。其餘該司所部勇隊。均歸陳國瑞統帶赴麻。如此則兵力較厚。自不難迅掃狂氛。陳國瑞移營之後。正陽關未免空虛。著喬松年帶領皖兵進紮正陽。扼守要衝。

兼為壽州保障。該撫前奏擬移紮壽州扼剿。現在既須移營。則壽州地方應派何員扼守。並著妥為調派。並會商僧格林沁。曾國藩。豫籌布置。以免疏虞。僧格林沁摺內所稱准官文咨稱提督成大吉進紮徐門古北岡。會商楊朝林周鳳山於初六日移紮六合集。被賊包抄後路。新鳳等營挫敗。該提督撥隊策應。將賊擊退。現在髮捻勢將四面合圍。斷我糧道等語。此等軍情。何以未據官文奏報。著官文卽責令成大吉等。將此股逆眾盡力勦洗。新鳳等營挫敗。必須嚴申紀律。重整軍威。方可轉敗為勝。著將挫敗情形據實奏聞。不准一字諱飾。刻下金陵外城已破。而連日未據續報捷音。恐內城各匪仍圖死拒。楚北各逆一聞此信。必將拌死東趨。仍圖回救。東路皖防未可稍形鬆懈。否則占踞麻城。負隅自固。或因首逆巢穴已覆。仍由舊路回竄。均難著手。該大臣等務須通力合作。探賊所向。就地

殲除。毋任日久蔓延。是為至要。河北鎮總兵楊長春打仗尚稱得力。著張之萬卽飭該總兵前赴僧格林沁軍營。聽候調遣。其河北鎮一缺卽由該撫派員署理。另片奏請飭張之萬移紮汝郡。以資鎮撫等語。昨據張之萬奏移營進紮汝郡。已諭令該撫迅速赴汝。與僧格林沁聯絡聲勢。該撫到汝後卽將防守安輯各事宜次第妥辦。陝豫楚交界各隘口應須移兵設防。豫防賊匪竄突之處。並著張之萬悉心布置。不得稍涉大意。將此由六百里各諭令知之。又諭依奇哩奏烏沙克他爾勦賊獲勝一摺。據稱逃匪糾結烏臺回匪數百名。滋擾烏沙克他爾汎地。燒毀軍臺。經依奇哩派令綠營蒙古官兵會同和碩特所派蒙古官兵進勦。斃賊無數。餘匪亂行逃竄。等語。庫爾勒等處逆回勢正猖獗。烏沙克他爾又有逆眾倡亂。雖經官軍勦勝。而山徑紛歧。林木叢雜。設被敗匪潛藏。其中將來出沒無

常於臺站大有關繫且此股逃匪是否卽庫爾勒等處之匪潛越該城也邇而東該大臣所奏殊未明晰著依奇哩一面詳查一面飭令派出各兵嚴行按捕以淨根株和碩特蒙兵既能得力並著依奇哩妥為籠絡俾該蒙兵益加奮勇當更得其臂助喀喇沙爾兵力較單城守最關緊要未能分兵進剿烏嚕木齊所派援軍著平瑞催令星速前進迅掃逆氛依奇哩務當將防守城池安設軍臺疏通驛路各事宜妥為籌備文永已抵烏城文祥當已陸續前進庫車賊氛既熾喀喇沙爾各臺汛復賊眾蜂起文永等進援庫車必由喀喇沙爾經過著卽由該城轉戰而前將沿途之賊勦盡直擣庫城力圖克復毋稍延緩常清前後所派各軍著探明道路趨程進發毋得遷延觀望致誤戎機將此由六百里各諭令知之○又諭據文祥奏稱勘估塔爾納沁等處渠道工程經費浩繁該大臣首先倡捐

官吏紳商等踴躍輸將現已興修過半計期八月杪可以一律完工派出之委員伯克捐生可否俟工竣後酌量保奏各等語此項渠道工程業已辦有頭緒所籌各節均甚周妥文祥前已簡放烏嚕木齊提督帶兵前赴庫車等處會勦所有挑渠建牆等項工程卽著保恆於到任後按照所擬章程飭令該委員等實力接辦務須一律寬深堅固以資灌溉其捐辦渠工之扎薩克郡王伯錫爾及委員伯克捐生人等並著俟渠工完竣酌量奏請獎勵將此諭令知之○兵部議覆御史朱澄濶奏各省招募勇丁請如制兵之例專用土著良民並查明有無親丁註冊存案應如所請飭下各路統兵大臣遵照辦理至所請殉難勇丁子弟挑補兵缺例有明文且未知該勇丁子弟願否入伍應令各督撫體察情形妥為辦理從之○調鑲黃旗漢軍副都統金順為西安左翼副都統以察哈爾佐領富爾

孫為鑲黃旗漢軍副都統。未到任以前。以正藍旗蒙古副都統伊精阿署理。命已革甘肅提督馬德昭赴河南軍營。交欽差大臣僧格林沁差委。○乙未。諭議政王軍機大臣等。李鴻章奏金陵克復。改派各軍分投堵剿。一摺。前據曾國荃等奏。官軍克復金陵外城。不過一二日。即可勦清餘匪等語。連日翹盼捷音。未據續報。殊深廑繫。該逆死黨尚有萬餘。曾國荃於攻克大城時。卽應一鼓作氣。將偽城儘力攻拔。生擒首逆。乃因大勢猶定。遽回老營。恐將士等貪取財物。因而懈弛。萬一該逆委棄輜重。餌我軍士。而潛出別道。乘我不備。冀圖一逞。或伺閒奔竄。衝出重圍。均不可不慮。著曾國藩飭令曾國荃督率將士。迅將偽城剋日攻拔。殲擒首逆。以竟一簣之功。同膺懋賞。儻曾國荃驟勝而驕。令垂成之功。或有中變。致稽時日。必惟曾國荃是問。李鴻章於前日奏到。派出王永勝、劉銘傳等軍並攜

帶炸礮隊。助攻金陵。當經諭知金陵外城已破。而偽城未拔。仍令迅往助攻。乃本日遽奏。接曾國荃飛咨。金陵已於十六日午刻克復。是李鴻章於偽城未拔情形。尚未知悉。軍情變幻。事機緊要。著李鴻章仍遵前旨。飭令派出各軍。攜帶炸礮火器。星馳前往金陵協力攻勦。此外如有逸出之賊。仍著會合分守要隘。各軍分投截剿。毋令一名漏網。將此由六百里加緊各諭令知之。○以江西捐輸軍餉。永廣南康府學額四名。建昌府三名。都昌廣昌二縣各九名。○丙申。諭議政王軍機大臣等。楊岳斌奏。抵江日期。附陳布置大概情形。一摺。侍逆李侍賢自力攻撫。建不下。橫踞崇仁宜黃。與南豐沛逆聯為一氣。以窺撫建西路。康聽兩逆蔓延。金谿東鄉。以窺撫建東路。漸成長圍之勢。現在江忠朝席寶田。偪紮崇仁城下。劉典王文瑞。仍紮樂安。以為聲援。是為西路之兵。周寬世駐紮進賢。王德榜王開

琳均馳駐安仁之鄧家埠。合勦東鄉。是為東路之兵。撫建城內外。復有王沐韓進春等軍。足資固守。布置均尚嚴密。惟侍逆以賊中著名。兇悍金谿東鄉南豐之賊。耽耽環伺。恐其以金陵巢穴已覆。將圖踞有撫建。以為喘息之謀。此時進兵要著。自應先由崇宜下手。擣其要害。使該逆長圍既破。則東西兩路無難迎刃而解。楊岳斌現檄鮑超一軍。由瑞州改趨宜黃。擊其腰背。使崇仁南豐首尾不能相顧。全局可期。震動所籌。深合機宜。鮑超所向克捷。此次進攻宜黃。必能得手。即著檄令該提督悉銳星馳。實力猛攻。期於必得。並著楊岳斌。沈葆楨。飭令東西兩路官軍。同時並舉。迅赴事機。以期一鼓殲除。掃清腹地。該督以陸路親兵單薄。擬添募勁勇八千人。以便督戰。即著與沈葆楨妥籌辦理。此時江南軍事得手。而江右羣盜充斥。如有應須添兵募勇之處。沈葆楨尤當力籌全局。毋得以餉糈支

絀。致兵力或有不敷。貽誤疆事也。將此由六百里各諭令知之。○命杭州將軍國瑞在紫禁城騎馬。○予江蘇海州殉難六品銜孫永盛等紳民婦女七百五十二名口分別旌卹如例。○

上以孟秋時享

太廟。自是日始齋戒三日。○丁酉。諭議政王軍機大臣等。憚世臨奏楚師進勦黔匪獲勝。並清江苗匪攻陷天柱。防堵情形一摺。貴州匪黨石秀坤與號匪句通竄擾毗連沅晃之牛場坡。經周洪印等進攻毀其五壘。其清水哨踞賊分竄牛欄場等處。復經滕加洪等疊次擊敗。惟松桃一帶與楚接壤。賊氛蔓延數百里。此次雖疊有新擒。並未大受懲創。著憚世臨即飭周洪印增募勇丁千名。與保慶黃元齡等軍分路前進。務期大彰捷伐。以勦為防。毋得以零星斬馘一奏塞責。賂秉章前派駐秀各營。並著飭令入黔與楚軍會同夾擊。務

將包伍等逆悉數殲除以清積年巨慝仍一面嚴扼川邊毋令闖入以保完善清江苗匪攻陷天柱縣城知縣方時乾聞已殉難何以勞崇光張亮基並未馳奏現在楚邊黔晃靖會一帶處處須防憚世臨自應先顧疆圉俟松桃勦辦事竣始能移師天柱著勞崇光等迅派得力官軍馳往勦擊迅復城池毋得專待援師貽誤疆事其天柱失守情形及文武下落並著查明具奏江西崇宜之賊堅踞如

故楊岳斌鮑超均已馳抵江右省城不難合力勦洗楚省東路仍當嚴防竄突以備不虞將此由六百里各諭令知之○又諭憚世臨奏派委知縣呂鳳藻赴鎮筵押解田興恕並親筆作書宣布朝廷德意令其不必懷疑自誤並訪知候補道王葆生向在湖南帶勇田興恕係其舊部尚能相信復加委該道前往守催業於六月初一日由呂鳳藻押解自鎮筵起程至四川秀山縣交替接解等語田興

恕既有熟識相信之人何以憚世臨不早為籌計著卽密派妥員速行馳探田興恕何日到秀山交替沿途有無逗遛並催令呂鳳藻等小心護解不得稍涉大意到川後著崇實駱秉章派員接解到省妥為羈禁迅速馳奏勞崇光張亮基於田興恕一事自己籌之至熟著遵照歷次諭旨將該革員應得罪名妥議具奏以便早為完結將此由六百里各密諭知之○又諭平瑞奏軍務緊急請將部撥

新疆經費先行解濟一摺據稱庫車逆匪變亂所派前往防勦官兵應需鹽糧等項甚屬不敷前准戶部文稱奏撥新疆南北兩路經費銀四十萬兩令各該督撫派員統解現在庫城軍務緊要餉需奇絀查新疆遇有軍需向由各鋪商措墊匯至內地兌還歷經辦理有案擬卽援案先行由商借墊並請飭山西撫臣將撥定新疆經費銀十萬兩趕緊籌解等語庫城逆勢鴟張該城臺站疊被竄陷亟

須派兵援勦。若不速籌接濟。勢必停兵待餉。貽誤戎機。著沈桂芬將戶部前在該省勸捐歸補籌解京餉項下撥定新疆經費銀十萬兩。如數籌撥。派委妥員。星速解交歸綏道庫著平瑞派員至烏里雅蘇台咨由明誼派出妥員同赴歸綏道庫承領。如尚未解到。即赴山西催提。將所借該商民款項就近先由晉省匯還。其餘銀兩仍由綏遠城烏里雅蘇台科布多一帶臺站解赴該城投交。並著德勒克多爾濟、明諒、廣鳳一體派員迎提護送。以昭慎重。而期迅速。將此由五百里各諭令知之。○以吉林勦捕竄匪出力。賞同知崇連等藍翎。餘加銜升敘有差。○旌表守正捐軀直隸東光縣民侯得山女大姐。鹽山縣民張從桂妻劉氏。○戊戌

上以孟秋時享

太廟前期親詣行禮。○以紅旗報捷克復江南省城。遣醇郡王奕譞詣隆福寺。

文宗顯皇帝几筵前恭代行告祭禮。○上詣綏履殿

慈安皇太后前平安室

慈禧皇太后前賀喜。○諭內閣本日官文曾國藩由六百里加緊紅旗奏捷。克復江甯省城。逆首自焚。賊黨悉數殲滅。並生擒李秀城、洪玕達等逆。一摺覽奏之餘。實與天下臣民同深嘉悅。髮逆洪秀泉自道光三十年倡亂以來。由廣西竄兩湖三江。並分股擾及直隸山東等省。逆蹤幾徧天下。咸豐三年占踞江甯省城。僭稱偽號。東南百姓遭其荼毒。慘不忍言。罪惡貫盈。神人共憤。我

皇考文宗顯皇帝赫然震怒。恭行天討。特命兩湖總督官文為欽差大臣。與前任湖北巡撫胡林翼肅清楚北上游。胡林翼駐紮宿松一帶。籌辦東征事務。復

特授曾國藩為兩江總督。並

命為欽差大臣。東征江皖賊匪。號令既專。功績

日著十一年七月我

皇考龍馭上賓其時江浙郡縣半就淪陷

遺詔諄切以未能迅殄逆氛為憾朕以冲幼寅

紹丕基祇承

先烈恭奉兩宮

皇太后垂簾聽政指示機宜授曾國藩協辦大學士節制四省軍務以一事權該大臣自受任以來即建議由上游分路勦辦飭彭玉麟楊岳斌曾國荃等水陸並進疊克沿江城隘

百餘處斬馘外援逆匪十數萬人合圍江甯斷其接濟本年六月十六日曾國荃率諸將士克復江甯外城殺賊數萬逆首洪秀泉率其悍黨仍踞內城抵死抗拒茲復據曾國藩奏官軍自得天堡偽城後賊中防守益密五月三十日李祥和等率隊攻克占取龍脖子山六月初一等日各營輪流苦攻李臣典率吳宗國等從賊礮極密之處重開地道蕭孚泗等修築礮臺肉薄相逼十六日黎明曾國

荃將四路隊伍調齊地道火發揭開城垣二十餘丈李臣典武明良等身先士卒直衝倒口而入各弁勇蟻附齊進左路城頭之賊以火藥傾盆燒我士卒死者甚多大隊稍卻彭毓橘蕭孚泗等手刃數人由是弁勇無一退者武明良等率隊從龍廣山與右路太平門之賊排列轟擊賊始卻退李祥和等從太平門月城攻入王遠和等進擊中路攻偽天王府之北劉連捷等亦率隊從神策門地道之

旁梯攻而入相與會合齊進鏖戰至獅子山奪取儀鳳朝陽等門羅達元從聚寶門之西舊地道缺口仰攻而入李金洲等從通濟門月城緣梯而上陳湜等各營則猛攻旱西水西兩門月城偽忠王李秀城率黨狂奔將向旱西門奪路而逃為陳湜大隊所阻遏仍轉回清涼山黃翼升等水師各營攻奪中關攔江礮石壘乘勝猛攻濱江之賊與陳湜易良虎等奪取水西旱西兩門由是全城各門皆



破三更時。偽天府及各偽王府同時火起。煙燄蔽空。洪逆率悍黨千餘人衝出偽殿前。南門竄至民房。袁大升等率隊腰截。斬七百餘名。奪獲洪酋僭用偽玉璽二方。金印一方。四更後。賊股千餘人假裝官軍號衣。向太平門地道缺口衝突。經崑字湘後等營截擊。曾國荃加派馬隊追至純化鎮。生擒偽烈王李萬材。復追至湖熟鎮。將逃賊全數斬刈無遺。據曾國荃親訊李萬材供稱。城破後。偽忠王之兄巨王。幼西王。幼南王。定王。崇王。璋王。乘夜衝出。被官軍馬隊追及。將各頭目全行殺斃。又據城內各賊供稱。首逆洪秀泉實於本年五月服毒而死。瘞於偽宮院內。偽幼主洪幅瑱重襲偽號。城破時。洪幅瑱積薪自焚。李秀城一犯城破受傷。匿於山內民房。經蕭孚泗親自搜出。並按擒偽王次兄洪荏達其餘兩廣兩湖等處多年悍賊。經各將士於十七八日。按殺淨盡。三日之間。斃賊共十餘萬人。

偽王偽主將及大小酋目約三千餘名。無一得脫者。此皆仰賴

昊天眷佑

列聖垂庥兩宮

皇太后孜孜求治。識拔人材。用能內外一心。將士用命。成此大功。上慰

皇考在天之靈。下孚薄海臣民之望。自維藐躬。涼德何以堪此追思

先皇未竟之志。不克親見成功。悲愴之懷。何能

自己。此次洪逆倡亂粵西。於今十有五年。竊踞江甯。亦十二年。蹂躪十數省。淪陷數百城。率能次第蕩平。殄除元惡。該領兵大臣等櫛風沐雨。艱苦備嘗。允宜特沛殊恩。用酬勞勩。欽差大臣協辦大學士兩江總督曾國藩。自咸豐四年在湖南首倡團練。創立舟師。與塔齊布羅澤南等屢建殊功。保全湖南郡縣。克復武漢等城。肅清江西全境。東征以來。由宿松克潛山太湖。進駐祁門。疊復徽州郡縣。遂

拔安慶省城以為根本。分檄水陸將士。規復下游州郡。茲幸大功告成。首逆誅鋤。實由該大臣籌策無遺。謀勇兼備。知人善任。調度得宜。曾國藩著加恩。賞加太子大保銜。錫封一等侯爵。世襲罔替。並賞帶雙眼花翎。浙江巡撫曾國荃。以諸生從戎。隨同曾國藩勦賊數省。功績顯著。咸豐十一年。由湘募勇克復安慶省城。同治元二年。連克巢縣。含山。和州等處。率水陸各營。進逼金陵。駐紮雨花臺。攻拔

偽城。賊眾圍營。苦守數月。奮力擊退。本年二月。克復鍾山石壘。遂合江甯之圍。督率將士鏖戰。開挖地道。躬冒矢石。半月之久。未經撤隊。克復全城。殄除首惡。實屬堅忍耐勞。公忠體國。曾國荃著賞加太子少保銜。錫封一等伯爵。並賞戴雙眼花翎。記名提督李臣典。於槍礮叢中。捨宅地道。誓死滅賊。從倒口首先衝入。眾軍隨之。因而得手。實屬謀勇過人。著加恩。錫封一等子爵。並賞穿黃馬褂。賞戴雙

眼花翎。蕭孚泗。督辦礮臺。首先奪門而入。並接獲李秀城。洪荏達。巨逆。實屬勦勞卓著。著加恩。錫封一等男爵。並賞戴雙眼花翎。記名總兵朱洪章。武明良。熊登武。伍維壽。均著交軍機處記名。無論提督。總兵。缺出。儘先提奏。並賞穿黃馬褂。賞給騎都尉。世職。記名按察使劉連捷。著交軍機處記名。遇有布政使缺。出。請旨簡放。並賞加頭品頂戴。賞給騎都尉。世職。提督張時日。著以提督遇缺。提奏。並加

恩。賞給一等輕車都尉。世職。記名道彭毓橘。著交軍機處記名。遇有布政使缺。出。請旨簡放。並賞給一等輕車都尉。世職。提督朱南桂。蕭慶衍。李祥和。蕭開印。羅逢元。均著賞穿黃馬褂。賞給雲騎尉。世職。記名提督張光明。曾良佐。均著加恩。賞穿黃馬褂。江南提督黃翼升。著賞給一等輕車都尉。世職。發去獎武銀牌四百面。賞給有功將士。李秀城。洪荏達。二犯。即著曾國藩等。派委妥員。檻送京師。訊明。

後盡法處治。洪秀泉屍身。覓獲後。到屍泉示。仍傳首被害地方。以洩眾憤。○又諭本日據。官文。曾國藩。由六百里加緊馳奏。克復江甯。全股悍賊。盡數殲滅。洪逆自焚。並生擒李秀。城。洪。在。達。等。逆。已。明。降。諭。旨。將。曾。國。藩。曾。國。荃。及。單。開。平。逆。首。功。之。總。兵。李。臣。典。等。酬。庸。錫。爵。普。沛。恩。綸。因。思。軍。興。以。來。各。路。統。率。疆。臣。公。忠。體。國。共。濟。時。艱。督。飭。各。軍。掃。穴。擒。渠。將。各。路。逆。氛。次。第。掃。蕩。江。甯。賊。勢。日。孤。卒。就。殄。滅。現。在。紅。旗。奏。捷。東。南。軍。務。卽。可。從。此。底。定。良。由。各。該。統。率。疆。臣。不。分。畛。域。同。心。勦。賊。調。度。有。方。允。宜。特。加。異。數。以。昭。恩。渥。欽。差。大。臣。科。爾。沁。博。多。勒。噶。台。親。王。僧。格。林。沁。前。在。直。隸。山。東。殲。除。髮。逆。林。鴻。祥。李。開。方。等。復。帶。兵。勦。除。擒。匪。肅。清。直。隸。山。東。河。南。全。境。並。督。師。皖。北。將。張。落。利。苗。沛。霖。等。股。勦。滅。近。復。移。紮。豫。皖。之。交。扼。勒。東。竄。援。賊。良。由。該。親。王。忠。勇。性。成。不。避。艱。險。軍。麾。所。莅。威。望。允。孚。僧。格。

林。沁。已。疊。次。加。恩。晉。封。親。王。世。襲。罔。替。著。再。施。恩。加。賞。一。員。勒。令。其。子。伯。彥。諾。謨。祜。受。封。欽。差。大。臣。大。學。士。湖。廣。總。督。官。文。征。兵。籌。餉。推。賢。讓。能。克。復。楚。北。郡。縣。多。處。肅。清。全。境。並。籌。辦。東。征。軍。務。接。濟。餉。需。不。分。畛。域。實。屬。蓋。勲。卓。著。著。加。恩。錫。封。一。等。伯。爵。世。襲。罔。替。並。加。恩。將。其。本。支。無。庸。仍。隸。內。務。府。旗。籍。著。擡。入。正。白。旗。滿。洲。賞。戴。雙。眼。花。翎。江。蘇。巡。撫。李。鴻。章。統。領。中。外。水。陸。各。軍。由。上。海。一。隅。轉。戰。而。前。連。克。蘇。常。府。縣。並。派。兵。出。境。攻。拔。嘉。興。等。處。現。復。協。勦。湖。郡。扼。守。高。梁。一。帶。使。江。甯。逆。匪。進。無。援。兵。退。無。竄。路。實。屬。謀。勇。兼。優。著。加。恩。錫。封。一。等。伯。爵。並。賞。戴。雙。眼。花。翎。陝。甘。總。督。楊。岳。斌。統。帶。曾。國。藩。所。立。水。師。自。九。江。克。復。東。流。建。德。協。克。安。慶。府。城。並。攻。拔。池。州。無。為。銅。陵。等。處。扼。守。江。路。斷。賊。接。濟。實。屬。勲。績。懋。著。著。加。恩。賞。給。一。等。輕。車。都。尉。世。職。並。賞。加。太。子。少。保。銜。兵。部。右。侍。郎。彭。玉。麟。前。在。

江楚等省屢著戰功及與楊岳斌同領水師  
疊克魯港南陵蕪湖金柱關銅城牯東西梁  
山等要隘招撫高瀋漂水降眾克復東壩肅  
清江面實屬勇敢有為著加恩賞給一等輕  
車都尉世職並賞加太子少保銜四川總督  
駱秉章前在湖南巡撫任內薦賢使能創辦  
團練克復城池其於楚師餉項盡心籌畫不  
遺餘力及擢任四川總督後復督飭官兵殲  
滅石達開等逆首洵屬老成持重懋著公忠

著加恩賞給一等輕車都尉世職並賞戴雙  
眼花翎署浙江提督鮑超前在江楚屢克名  
城肅清江西轄境及隨征東下疊克甯國府  
石埭太平涇縣及河西等隘並復江浦浦口  
九洑洲本年復克東壩句容金壇等處使江  
甯蘇常之賊不能聯為一氣厥功甚偉著加  
恩賞給一等輕車都尉世職西安將軍都興  
阿前在揚州督兵屢殲悍賊埽除天長六合  
各路竄匪督率水師嚴扼江面現雖督師甘

肅而從前所立之功自不可泯江甯將軍富  
明阿前在蒙城力除苗匪現在接辦江北防  
務力遏竄賊並派兵渡江協克丹陽均著加  
恩賞給騎都尉世職廣西提督馮子材督辦  
鎮江軍務數年以來固守名城勦除竄賊本  
年復會同江北官軍克復丹陽並著加恩賞  
給騎都尉世職署京口副都統魁玉幫辦鎮  
江軍務協同守禦甚為得力著加恩賞給雲  
騎尉世職漕運總督吳棠勦辦清淮一帶竄

匪並埽除徐宿捻逆地方賴以安謐著賞給  
頭品頂戴仍交部從優議敘閩浙總督兼署  
浙江巡撫左宗棠前在湖南軍營運謀決勝  
迨抵浙江後統領各軍將各該郡縣及杭州  
省城次第克復現惟湖州府城未克指日全  
浙廓清再當渥加懋賞杭州將軍國瑞在僧  
格林沁軍營幫辦軍務打仗得力殺賊甚多  
江西巡撫沈葆楨籌解曾國藩餉需源源接  
濟均無貽誤現在勦辦撫建等處賊匪調度

得宜。勞動卓著。均著俟江皖浙等省軍務平定。再行加恩。至楊岳斌。鮑超。此次雖已加恩。仍俟江皖肅清。同膺上賞。其餘各省統兵將帥。其各慎勉圖功。迅殲醜類。廓清疆圉。共荷恩施。有厚望焉。○又諭。自粵逆洪秀泉糾眾煽亂。闖入兩湖三江。盤踞江甯。遣黨肆擾。疊陷郡邑。荼毒生靈。罪惡貫盈。神人共憤。朝廷命將出師。特申天討。疊經克復城池。殄除巨股。而該逆蔓延既廣。兇猷遂張。自咸豐十一年八月間。克復安慶省城。後官軍乘勢直逼江甯。賊勢漸形窮蹙。上年以來。疊將江蘇浙江各郡縣次第克復。江甯之賊。遂成孤立。而逆酋洪秀泉等。猶敢擁眾負隅。抵死抗拒。今幸將士用命。克拔堅城。元兇授首。從此掃除餘孽。指日蕩平。嘉與薄海蒼生。共享昇平之福。此皆仰賴

昊蒼眷佑。

列聖垂慈。得以建此偉績。宜修告成之典。用昭

寅感之誠。所有

天壇

地壇

社稷壇。盛京

三陵

東陵

西陵

太廟。均著遣官告祭。朕於告祭之前一日。親詣

太廟中殿。

後殿拈香。行禮。並飭所司於祝文內。敬舉受釐

宣捷之忱。用申虔告。所有應行禮儀。及此外

一切典禮。著各該衙門敬謹詳察。例案具奏。

○又諭。本日江甯省城克復。捷書馳奏。八表

同歡。因思前此賊氛擾及數省。官兵所至。仰

賴山川效靈。神祇助順。用能師行。負耆耄定

功成。允宜修舉明禋。敬答鴻佑。所有各省應

祭

嶽

讀諸神著禮部查議具奏○又諭

皇考文宗顯皇帝御極之初卽值粵逆倡亂流毒各省疊次命將出師用申天討雖屢殄悍寇克復多城而匪勢蔓延未卽撲滅我

皇考宵旰憂勞無時不以滅賊安民為念殷殷望捷迨咸豐十一年

龍馭上賓頒示遺詔猶以東南諸省軍務未平百姓蕩析離居時廑

聖慮朕誕膺大統乾惕時深日盼殲誅渠魁廓

清疆宇仰承

皇考未竟之志我兩宮

皇太后親裁庶政教育朕躬翹望捷書夜以繼

日茲於本月二十九日由官文曾國藩等紅

旗報捷克復江甯鎮除首逆是皆仰賴我

皇考貽謀久遠故能勉集大勳用光

前烈感幸之餘彌深悲慟卽擬親謁

殯宮敬申哀感我

慈安皇太后

慈禧皇太后因秋禾正當暢茂蹕路所經車馬

殷聞不免蹂踐田禾一切修墊道途恐致重

煩民力卽日恭奉

懿旨著派醇郡王奕譞恭詣隆福寺行宮

几筵前恭代行禮敬舉宣捷之忱用申虔告○

又諭現在江甯克復全省底定朕於七月初

一日先行親詣

奉先殿

大高殿

壽皇殿行禮景山

關帝廟拈香用申敬悃○又諭軍興以來十

有餘載從前在事諸臣為國宣勤矢志滅賊

或積勞身故未竟全功或臨難捐軀無虧大

節類多卓著勞績為我國家有功死事之臣

現在江甯克復首逆殲除該故員等齋志以

終未克躬逢其盛追懷忠藎良用惻然宜加

身後之榮以表生前之績著議政王軍機大

臣查明從前已故有功諸臣開單呈覽候旨

施恩○又諭咸豐三年洪逆竄陷江甯省城竊踞者十有餘年百姓遭其荼毒慘難言狀或被賊裹脅而鋒刃頻罹或轉徙他鄉而溝壑難免蚩蚩何辜罹此殘酷現在江甯克復全省底定亟宜渥沛恩施蘇此遺孑著曾國藩李鴻章查明江甯地方應徵錢漕分別應蠲應緩據實入奏候旨施恩該督撫等務當實力詳查毋任官吏從中弊混以副朝廷軫念殘黎因時施惠至意○又諭現在江甯克

復首逆殲除所有一切加恩事件及應辦各事宜均須次第舉行著議政王軍機大臣查明嘉慶道光年間勦滅三省教匪及平定回疆

加恩諭旨成案敬謹繕寫呈覽○諭議政王軍機大臣等本日據官文曾國藩由六百里加緊馳奏克復江甯全股悍賊悉數殲滅一摺覽奏之餘實深欣慰已明降諭旨宣布普沛恩綸矣粵逆久踞江甯負隅抗拒實為從來

未有之悍寇此次水陸各軍於溽暑炎蒸之際猛力環攻迅克堅城悍黨悉除渠魁就縛非曾國藩運籌決策督率有方曾國荃等躬冒矢石鼓勇先登未由建此奇功成乃丕續朝廷嘉悅之懷實難盡述除曾國藩等已加恩錫封外其餘出力員弁兵勇並著查明保奏侯旨施恩發去銀牌四百面著曾國藩曾國荃等擇其功績最著者先行頒給以勵戎行各路賊匪皆視金陵為趨向此時巢穴既覆則其餘竄逸之賊自必聞風喪膽僧格林沁現已移紮光州官文度亦進至黃州即著妥籌會剿督率官軍將麻黃一帶賊氛乘勝掃蕩悉行殄滅毋令竄突曾國藩奏稱擬即前赴江甯察看情形日來計已駐師白下即著將一切善後及撫恤難民各事宜次第籌辦廣德等處如尚有踞賊曾國荃尚須駐紮江甯即由曾國藩派撥兵隊乘勢掃蕩毋稍遲緩其逆首李秀成洪仁達等均係內地亂

民不必獻俘第該逆等罪惡貫盈自應檻送京師審明後盡法懲治以洩神人之憤著曾國藩遴派妥員將李秀城洪仁達押解來京並咨明沿途督撫督飭地方文武多派兵役小心護送毋稍大意髮捻各逆尚廣集於黃麻之交奔竄靡定曾國藩赴江甯後安慶地處上游控制皖南皖北不可無大員鎮撫卽著彭玉麟駐紮安慶妥籌防剿如髮逆有東竄之信卽飭防守要隘各軍實力迎擊痛加剿洗俟曾國藩回安慶後彭玉麟應赴何路助剿屆時由曾國藩酌量辦理江甯克後羣醜就殲雖無逸出之賊而楚皖之交賊氛尚熾下游防守不可稍鬆著富明阿懍遵前旨暫緩赴江甯仍督水陸各軍嚴密防守天六等處毋稍疏懈如江甯滿城善後各事必需大員料理卽著魁玉先行前往隨時與富明阿咨商辦理李鴻章馮子材魁玉仍飭丹句等處防軍嚴防湖州一帶竄逸之匪盡力殲

殺毋令紛竄並著李鴻章將王永勝等軍調回長興協攻湖州左宗棠當督率各軍會合蘇師迅將湖州安吉之賊全行殄滅克復堅城毋令一賊上竄楊岳斌抵江省後所籌進剿機宜動中竅要著與沈葆楨會商妥籌迅將崇仁等處踞賊竭力掃蕩此時江甯已復匪勢瓦解乘勝進兵自收破竹之效該督撫等務當同心勦力迅掃欃槍奠定東南渥膺懋賞有厚望焉其餘宿一帶防守事宜著富明阿咨商吳崇安籌辦理將此由六百里加緊各諭令知之○又諭恩麟奏北路回目縛賊獻城一摺據稱北路回目張保澄震懾兵威稟請投誠本年四月間自帶所部賺開固原城門殺賊無算生擒逆賊花萬六等八名並將鹽茶廳城一併收復等語回情狡詐反覆無常惟觀此次該回目殺賊獻城情節似尚可信或因官軍克復平涼震懾兵威因而潛消反側亦未可定著恩麟飭令該回目將



所獲逆匪花萬六等八名解赴省城訊明正法仍當隨時察看防其中變毋得稍涉大意墮其詭謀雷正綰等攻克平涼後已移得勝之師進攻固原現在固原鹽茶已復平郡也北賊氛漸戢即可直指靈州都興阿前奏擬由磴口進兵當經諭令都興阿雷正綰合力前進直搗甯靈卽著該將軍等懍遵前旨妥速籌商以期節節掃蕩迅殄逆氛甯夏回目馬化澂既遣回人馬精忠呈繳鎮道印信並

奏

三

約期繳獻郡城其事雖未可深信若能暫示羈縻紓我兵力亦不妨從權辦理前因熙麟奏甯夏逆匪畏罪投誠當經諭令都興阿雷正綰酌度辦理而慶昫復有中衛縣巡北大堡中馬化澂張貼偽示歸罪赫汝典之奏是甯夏回匪尤為詭譎恩麟等尤須慎之尤慎不可稍為含糊希圖了事如可暫加籠絡卽咨明慶昫妥籌辦理都興阿雷正綰專辦甘省軍務均屬責無旁貸將來或勒或撫進止

奏

三

機宜卽著隨時察看酌辦如鹽固投誠尚可不必致反覆卽不妨予以自新以期併力北征別無牽阻將此由六百里諭知都興阿雷正綰並傳諭恩麟知之○又諭恩麟奏甘省庫款匱竭需餉緊急請飭催陝西等省籌解欠款一摺各省積欠甘餉數逾千萬屢經降旨飭催遷延不解現在甘省軍務喫緊需用數倍於前支持不易若不趕緊籌解致兵勇有誹潰之虞貽誤非輕著曾國藩駱秉章左宗棠毛鴻賓李鴻章沈葆楨張之萬閻敬銘劉蓉沈桂芬郭嵩燾無論如何為難移緩就急先行各籌解銀二三十萬兩迅速派員解往甘肅省城毋稍延緩其餘兵餉仍著各該省督撫等源源籌解以資接濟恩麟另片奏山西赴甘路徑梗阻撥解餉銀請飭交山西客商就近匯兌等語著沈桂芬督飭藩司河東道飭令解餉委員等於司道各庫領銀後交給晉省各商字號就近匯兌以期迅速到甘

俟道路疏通。卽著停止。匪兇將此由五百里各諭令知之。○又諭據都察院奏。江西孀婦陶謝氏呈控。伊子陶綬錦前在署福建永春州知州任內。往捕所轄西南鄉窩匪。被匪首陳汝謙等糾黨拒捕。陶綬錦受傷殞命。稟經委員查拏。該鄉不將各犯交出。並不將陶綬錦屍首獻出。舉人陳邦詹。書陳嘉猷等在該鄉借助餉為名。歛銀行賄。縱庇正兇。另買老勾窮民陳多等五人頂兇抵罪。後任知州

書陳嘉猷

卷三

宋姓受賄蒙詳。迨正犯郭春魁等獲案。復受賄縱放臬司桂超。萬徇情偏斷。反栽贓於陶綬錦門丁鄭春。科之以罪。改供詳奏等語。案關戕官頂兇。賄縱偏聽。如果屬實。大干法紀。著左宗棠。徐宗幹。按照所控各情。嚴切根究。以成信讞。毋得稍有遷就。至所稱知州宋姓將已駁助餉之項。並不發還。與蠹書陳嘉猷。卽陳樹書朋吞分肥之處。著一併查明。嚴叅懲辦。原呈著鈔給閱看。將此諭令知之。○以

克復江南省城。賞總兵官何玉貴。譚國泰。周光正。張定魁。成東。昂武。義山。趙三元。武文清。王上國。鄧吉山。楊西平。羅朝雲。朱文光。葛奇益。陳致祥。蔣照臨。副將吳宗國。蕭清世。吳隆海。張葉江。熊紹濂。正一品封典。總兵官楊喜貴。彭言志。鄧泰福。劉威德。羅雨春。朱惟堂。蕭上林。蕭恆書。朱連甲。道員黃潤昌。知府武明善。易良豹。副將沈鴻賓。李定元。熊上珍。梁美材。戴名山。馮盛德。朱唐洲。羅宣祿。彭克友。王

書陳嘉猷

卷三

佩瓊。李泰山。張正榮。羅興祥。劉定發。周恆禮。李金洲。陳汝俊。譚位高。殷定文。賴迎發。康壽怡。蕭國仕。參將陶立忠。黃廷爵。楊鈞南。黃萬鵬。何鳴高。李臣榮。朱連泗。遊擊易嵩。祝楊友勝。巴圖魯名號。遊擊蕭洪勝等。花翎餘加銜升敘。有差。予陣亡總兵官郭鵬程。副將陳萬勝。參將熊祖泗。都司向進山。守備謝永泰。蔡彝。世職加等。○以紅旗報捷。賞奏事處班領寬略兵部捷報處郎中國英等。加銜加級。有

差郎中慶壽等花翎筆帖式祥安等藍翎並  
予沿途驛站員弁兵夫等議敘獎賞。

實錄卷一百七

六十五

大清穆宗繼天開運受中居正保大定功聖智  
誠孝信敏恭寬毅皇帝實錄卷之一百七

大清穆宗繼天開運受中居正保大定功聖智  
誠孝信敏恭寬毅皇帝實錄卷之一百八

恭錄穆宗皇帝實錄卷一百八  
同治三年甲子秋七月己亥朔享  
太廟遣鍾郡王奕詒恭代行禮  
上詣  
奉先殿行禮詣  
大高殿  
壽皇殿行禮詣景山  
關帝廟拈香詣綏履殿問  
慈安皇太后安平安室問  
慈禧皇太后安至戊辰皆如之諭內閣恭親  
王之第三子著命名載濬諭議政王軍機

大臣等楊岳斌沈葆楨奏官軍力攻崇仁疊勝並進勦東鄉金谿踞賊情形。暨南豐鐵子嶺一帶勦賊獲勝各摺片。侍逆盤踞崇仁。經江忠朝席寶田兩軍分路進攻。殺斃賊目不少。侍逆右臂受傷。江忠朝等復分令各營進攻賊壘。直逼城根。周寬世等亦敗賊於上頓渡。王開琳王德榜移駐七星橋與周寬世合圖東鄉。進規金谿。偽老王宗李沅茂糾合南豐股匪。竄踞鐵子嶺一帶。為崇逆聲援。劉典督令劉勝祥等分左右兩路縱擊。擒斬甚眾。鐵子嶺一帶賊館一律肅清。是崇仁等城雖未遽能克復。而各路進兵均尚得手。前因楊岳斌奏賊圖力攻撫建。橫踞崇仁等處。漸成長圍之勢。擬先由崇宜下手。破其狡謀。當以所籌深合機宜。諭令該督等會商辦理。現在江忠朝等進兵崇仁。侍逆右臂受傷。該逆與李秀城均係一時悍黨。李秀城既經就擒。該逆諒不能久稽顯戮。著楊岳斌沈葆楨督飭

江忠朝等鼓勇前進。迅克崇仁。破賊包抄之計。東鄉上頓渡許灣等處逆勢漸已不支。即著飭令王開琳周寬世等會攻東鄉。乘勝規復金谿。毋稍鬆勁。南豐賊踞已久。若不及早誅鋤。大為腹地之患。鐵子嶺已克。我軍得其要隘。即著督飭劉典會合精毅等營節節進勦。將偽老王宗股逆奮力勦擊。攻克南豐縣城。以期廓清江境。將此由六百里各諭令知之。○又諭現在蔡啟等逆在陝西藍屋一帶

滋擾。雖經劉蓉等督兵勦辦。而賊勢未衰。四川邊界多與陝西毗連。設該逆被擊窮蹙。乘間窺川。不可不豫為防範。昨據曾國藩馳奏金陵克復。全股悍賊殲除。而湖北麻黃一帶賊尚充斥。該逆等聲稱欲救金陵。故銳意東竄。此時金陵巢穴既覆。此股賊匪聞風喪膽。未必仍敢東趨。僧格林沁已移紮光州。官文亦進至黃州。合力進勦。賊見我軍勢大。必將折而西奔。恐其逼近川疆。冀圖竄逸。均不可

以不防。著駱秉章嚴飭沿江防軍。勤加偵探。嚴密守禦。毋令一賊得以闖入。以期盡掃妖氛。將此由六百里諭令知之。又諭熙麟奏。特叅玩誤軍火餉項之知州暨廢弛營務之都司。請旨革職。一摺。本日已降旨。將沈際清等革職示懲矣。甘肅軍務正當喫緊。各省協濟軍火餉項。沿途地方官自應妥為照料。發給牲口馱腳。以利進行。乃陝西署邠州知州沈際清。於山西陝西委員運解軍火餉銀等

項。行抵邠州驛站。該署州竟敢置若罔聞。遲延貽誤。並於過往商賈牲口。每頭徵收制錢八十文。仍令百姓照舊供支馱腳。以致百姓抗不遵辦。貽誤軍需。已屬任意妄為。並據該督奏稱。沈際清原係題補定遠同知。撤省另補之員。今春賞緣得此署缺。更屬巧於趨避。該員現已革職。卽著文煜檄委現在慶陽定邊營中辦理文案之員。馳往暫行代理。並著劉蓉迅速派員前赴該州接署。並將該革員

於徵收商賈牲口馱腳錢文之外。仍令百姓照舊供支。並如何賞緣署缺之處。查明具奏。昨據曾國藩奏。江甯省城克復。髮逆陳得才等由陝竄鄂。聲稱圖救金陵。此時老巢已破。該逆聞風喪膽。自不敢悉力東竄。惟該逆竄突靡定。難保不由湖北邊界回竄。興漢一帶不可不豫為防範。蔡逆一股尚未殲滅。著穆圖善劉蓉妥籌防剿。以期肅清陝境。毋稍疏懈。將此由六百里各諭令知之。以湖南捐

輸軍餉。永廣湘鄉縣學額六名。邵陽縣四名。攸安化清泉衡山耒陽新甯六縣各三名。茶陵衡陽甯遠桃源四州縣各二名。安仁常甯。鄒零陵祁陽道武陵龍陽永順芷江郴永興桂東濃十四州縣各一名。以運送軍火。遲誤革陝西署知州沈際清。署都司景福職。予江西崇仁陣亡把總何東山呂光榮。外委蔣桂元。祭葬世職加等。庚子諭內閣。朕以冲齡踐阼。荷蒙兩宮

皇太后垂慈。特命祁寓藻倭仁李鴻藻在弘德殿授讀。並派倭什琿布伊精阿授讀清文。祁寓藻等均能朝夕納誨。講貫發明。朕於典學之餘。深資啟沃。茲當巨寇蕩平。江南底定。祁寓藻等輔弼朕躬。同深慶幸。允宜共沐恩施。祁寓藻倭仁倭什琿布伊精阿李鴻藻均著賞給紀錄二次。又諭恭親王自簡授議政王以來。於今三載。適值東南等省。兵事方殷。用行政徵兵籌餉。一切深資贊畫。弼亮宣猷。忠勤丕著。軍機大臣文祥等翼贊樞廷。同心輔治。前於蘇杭省城克復。各案內屢欲降旨加恩。均經該王大臣等再三懇辭。不忍重違其意。茲當江甯省城克復。紅旗馳報。殲擒首逆。本欲援照從前優獎成案。降旨施恩。乃該王大臣等仍復懇切力辭。鑒其誠惓。不得已酌中給予恩施。以獎勞勩。議政恭親王著加恩賞加軍功三級。仍加賞一員勒令伊子奉恩輔國公載澂受封。並封伊子載濬入八

分輔國公載澂不入八分鎮國公軍機大臣工部尚書文祥著賞加太子太保銜。伊娃凱肇並賞給員外郎分部學習行走。戶部尚書寶鑒著賞加太子少保銜。並賞戴花翎。工部尚書李棠階著賞加太子少保銜。伊子李鴻並賞給舉人。准其一體會試。兵部左侍郎曹毓瑛著賞加頭品頂帶。賞戴花翎。以示朕慶賞酬庸之意。此次辦理軍務十有餘年。軍報絡繹。事務殷繁。軍機章京等胥夕從公承書諭旨。均無貽誤。尚屬著有微勞。著議政王軍機大臣分別等第酌量從優保獎。候旨施恩。又諭昨因江甯紅旗報捷。省城克復。全股悍逆悉數殲除。業將在事出力諸臣。酬庸錫爵。分別加恩。因思諸王貝勒等分屬宗親。誼關休戚。允宜同被恩綸。用昭篤眷。除恭親王業經加恩外。惠親王之子奉恩輔國公奕詳著晉封奉恩鎮國公。不入八分鎮國公奕詢奕謨均著賞戴三眼花翎。惇親王之子鎮國

將軍載濂著晉封不入八分鎮國公載津著賞給頭品頂帶醇郡王著賞給親王銜鍾郡王著賞給紀錄四次管理武英殿事務孚郡王著賞給紀錄四次管理樂部事務郡王銜貝勒載治貝勒載漪均著賞給紀錄三次定郡王溥煦郡王銜貝勒溥莊貝勒奕劻禮親王世鐸睿親王仁壽豫親王義道肅親王華豐壯親王奕仁克勤郡王晉祺順承郡王慶恩均著賞給紀錄二次御前大臣內廷翊衛

克勤厥職亦應一體恩賚除醇郡王及僧格林沁已分別加恩外景壽著賞還紫纁奕山著晉封一等鎮國將軍德木楚克扎布前經告假現在雖未在京亦應一體加恩著賞給紀錄四次以示嘉賞成功覃敷閭澤至意○又諭總管內務府大臣等平日在內廷行走經理一切事務夙夜在公勤慎妥協茲當江南底定喜報迭來同深慶幸除恭親王寶馨文祥業經加恩外綿春存誠明善均著賞給

紀錄一次○又諭前因江甯克復巨憝就殲疊經降旨將中外宣力王大臣等酬庸懋賞因思自軍興以來凡屬臣工無不志深敵愾同企捷音允宜普沛恩施以昭優賚所有中外大小臣工均著加恩賞加一級用示閭惠覃敷至意○又諭昨因克復江甯紅旗報捷效力行間諸臣業已特加恩賞並頒去獎武銀牌四百面分賞將士以賚有功惟念江南用兵已十餘年所有各營兵勇衝鋒陷陣奮

勇前驅晝夜荷戈俾極勞瘁近日江甯之役復能於炎暑烈日之中誓死殺賊踴躍用命以竟全功而一切在防兵勇或分路馳援或嚴防要隘齊心勦力敵愾同仇念其從征之苦惻然興懷允宜普被恩施用昭體恤著江南各路統兵大臣暨各該督撫等查明各營弁兵勇丁實在出力者除擇尤保獎外餘著分別犒賞以示朝廷沛澤戎行有加無已至意○又諭蒙古三盟馬隊官兵自隨僧格林

沁勒賊以來頻年征戰所向有功上年肅清直隸山東全境削平張落刑苗沛霖等巨逆該蒙古馬隊甚為出力本年復埽清豫省進紮皖鄂之交遏賊東竄該官兵等從征多年立功數省嚴寒酷暑備極辛勞而該大臣向來於蒙古官兵內保舉出力將士人數尤屬無多從不肯稍有冒濫現當江甯克復行間士卒均荷恩施該蒙古官兵際此溽暑炎蒸荷戈力戰允宜優加獎賚普沛恩綸所有僧

格林沁軍營統帶蒙古馬隊各員著該大臣擇其出力者查明酌量保奏候旨加恩其該營蒙古兵丁加恩並賞銀一萬兩由該大臣糧臺給發以示體恤至吉林黑龍江官兵歷年征戰亦屬著有微勞並著由該大臣隨時酌量獎勵以昭激勸俟全功告成定當同加優賚也○又諭昨據官文曾國藩等奏到克復江甯省城元兇授首全股殄除薄海臣民同深歡慶因念八旗兵丁生計未裕早欲恩

加賞賚緣年來軍務未竣支用較繁是以未經降旨今當江南底定捷報馳聞允宜特沛恩施俾霑惠聞所有八旗兵丁著戶部照現放章程加恩賞給一月錢糧用示體恤旗營至意○又諭惠親王奏假期將滿病仍未痊請開缺停俸一摺本年自三月初間疊據惠親王因病請假屢經溫諭給假安心調理茲屆假期將滿據稱骸疾尚未就痊殊深廕繫惠親王係朕叔祖輩分最尊現以身體違和

請開各項差使自應勉如所請以節勞動而示優崇惠親王所管各項差使均照所請開缺並加恩無庸停俸仍在內廷並弘德殿行走俟珍攝如恆自行酌量進內照料無庸拘定日期惠親王之子奕詳奕詢均無庸在弘德殿伴讀以便左右侍奉朝夕承歡王其安心頤養調理順時庶微疾速痊長承優眷也○諭議政王軍機大臣等蒙古三盟馬隊官兵自隨僧格林沁勒賊以來頻年征戰所向



有功現在進紮皖鄂之交嚴扼髮逆東窺時當夏令冒暑遠征軫念行間倍深廩繁本日以江甯克復已將該處兵弁諭令曾國藩等酌加獎賚外茲復明降諭旨將僧格林沁軍營統帶蒙古馬隊各員著該大臣酌量保奏其該營蒙古兵丁並加恩賞銀一萬兩著發去明發諭旨一道該大臣於接奉後卽行繕詳蒙古文宣示該營將士以示朝廷垂念辛勤優加獎賚之意將此諭令知之 又諭都

與阿奏力籌進剿先援甯夏已革總兵定安捏造欽奉事件慶昫奏郡城近日情形各摺片逆匪攻撲平羅縣城決渠淹灌勢甚猖獗該縣為產穀之區僅為賊踞不惟滿城孤立且採辦兵糧備形棘手亟應籌撥勁旅速解城圍著都與阿督飭杜嘎爾帶領派出各軍由石背山渡河繞赴甯夏北山星速前進痛加勦洗援救危城如所調各營陸續到防一面仍著都與阿分兵進剿靈州以期節節堵

蕩都與阿現在花馬池購買黃米五十餘石並飭延安各屬查明倉穀酌量動碾借用駝隻運解米糧鍋帳卽著照所擬妥籌辦理並知照準噶爾貝子扎那濟哩第飭令邊外沿途豫挑井泉備辦柴薪以濟軍行定安以馬化澂在金積堡招集死黨意圖水陸分竄中衛勢單請兵援剿並請調營差委是否該革員畏葸無能取巧規避卽著都與阿確查叅辦該革員所稱於中衛差次經熙麟奏留已

邀允准一節著都與阿將定安交出摺案諭旨鈔錄進呈一面詳細查明據實具奏慶昫奏漢城回匪逐戶搶掠商民失業人心離散賊匪中之強者所搶較多弱者所搶較少是以貧回既無所得轉致廢時失業賊首馬萬選赫汶典亦因分贓不勻貌合心離該匪互相猜忌眾志渙散當此機有可乘如能合兵進剿定當事半功倍著都與阿雷正綰將如何派撥勁兵進剿甯夏漢城以赴事機之處

悉心籌商妥為辦理慶昫常陞就現有兵力嚴密堵剿毋徒株守待援致失戎機現在金陵全城克復殲擒首逆我軍聲勢日壯都與阿等乘此聲威務當大張捷伐如其畏威悔罪捆獻逆首亦可酌度機宜量從寬政總期肅清甘省早紓塵繫以副委任勉之慎之將此由六百里各諭令知之○又諭慶昫常陞奏請飭催部撥山東應解軍需及請飭陝西速撥軍火各摺片據稱甯夏滿城官兵窮困

過久且通城之內力能養馬者甚少慶昫等現查照察哈爾蒙古捐輸馬匹屬德勒克多爾濟於所屬部落勸捐馬一千八百匹不但兵餉必須籌撥即馬乾亦須豫籌上年奉部指撥軍需二十萬兩惟山東至今文移未通其奉撥銀五萬兩尚無起解確耗請予限飭令該省迅速撥解等語著閻敬銘速將部撥甯夏餉銀五萬兩如數派員迅速解赴定邊察看情形或由內地解往或仍由草地行走

一面由慶昫委員迎提俾收士飽馬騰之效至行軍利用火器為先現當戰守分兵之際自應先事豫籌著劉蓉就無事地方迅速挑撥擡礮五十尊擡槍五十桿鳥槍三百桿配齊應用各件務須一律精良即委員解赴定邊由慶昫等派員迎提毋稍延誤將此由五百里各諭令知之○護陝甘總督恩麟奏查明甘省前後招募川貴勇丁分撥防剿並籌定各勇口糧得旨均著准其照辦並著該部

查照立案飭令事竣後覈實報銷至川黔勇丁素多不安分之徒此次招募之舉係屬權宜之計將來各路援兵到齊如何妥為遣散俾無後患該署督亦不可不豫為籌及又奏請將甘省定為軍務省分凡揀發人員概不准捐離省改省下部知之○以御前大臣醇郡王為閱兵大臣○調正黃旗滿洲都統惇親王為鑲黃旗滿洲都統正紅旗滿洲都統恭親王為正黃旗滿洲都統正黃旗漢軍都

統醇郡王為正紅旗滿洲都統以阿勒楚喀副都統舒通額為正黃旗漢軍都統未到任前以正白旗蒙古都統文祥署理○辛丑諭內閣我國家重熙累洽二百餘年世際承平丕基永奠從前康熙二十三年

聖祖仁皇帝以歲逢甲子

渥沛恩綸停止秋審逮乾隆九年甲子再周嘉

慶九年甲子三周

皇高祖高宗純皇帝

皇曾祖仁宗睿皇帝式循

前典

閭閻覃敷均奉

特旨將是年情實人犯停止句決茲又屆甲子

紀年朕紹承

洪緒宸寓同懽允宜恪遵

成憲省歲恤刑所有本年朝審各省情實人犯著加恩停其句決一切條款著該部查議具奏○又諭昨因江甯省城克復首逆就殲業

經先後降旨將在事出力各員及內廷諸王大臣等優加獎勵惟念此股逆匪起自廣西其始不過遊民相聚句結煽惑地方官辦理不善貽患養癰致十數省億萬生民慘罹鋒鏑興言及此疾首痛心現在逆首已就殄除東南漸期底定仰賴

昊蒼默佑

宗

祖垂慈宥感之餘倍深祇懼允宜朝夕乾惕以

答

天庥自古君臣安不忘危治不忘亂卽令今日已治已安猶當戒慎恐懼不自滿假何況浙江安徽尚有賊蹤湖北江西逆氛方熾滇黔陝甘等處回匪教匪句結仍多雖金陵之根株既拔餘賊不難迎刃而解而稍涉大意卽恐難迅速廓清各該處統兵大臣督撫等務須激勵將士奮勉圖功以期普奏凱歌使吾民出水火而登衽席現在江南等省新復地

方閭閻彫敝創鉅痛深老弱轉徙流離尚未復業應如何招徠撫恤遂民生而蘇民困之處著該督撫詳加籌畫慎選守令實心實力辦理其現無軍務省分亦應講求吏治破除積習以期久遠又安著各直省督撫再行認真整頓於州縣中實心愛民講求治理者隨時奏請獎勵不職者立即叅劾並將安插降眾安撫難民各事宜妥為明定章程期於辦理盡善其內外大小臣工各宜兢惕為懷勤

思職業不得以捷書邀至謂海內業已承平因而晏安為懷遂至廢弛公事總期上下交儆共濟時艱慎始圖終無荒無怠以鞏丕基而躋上治有厚望焉將此通諭知之○又諭現在江甯克復巨逆伏誅中外出力臣工疊經降旨分別獎敘因思戶部兵部堂官或籌備軍需餉項或督辦驛傳事宜均臻妥協允宜同沛恩施除戶部尚書寶鋆兵部左侍郎曹毓瑛右侍郎彭玉麟業經加恩兵部左侍

郎崇厚未經到任毋庸甄敘外所有戶兵二部堂官均著交部議敘並著該堂官等將該部出力司員擇尤保獎毋得冒濫○諭議政王軍機大臣等軍興以來各路軍營由兵勇出身打仗得力者歷保參副等官續有勞績無可再加往往奏請以提督總兵記名簡放朝廷破格用人每逢各路統率疆臣奏保無不立沛恩施惟提鎮係事關大員為通省各營之表率關係極為緊要常有戰勝攻取極為

為得力而於平日一切操防各事宜閱歷太淺訓練未免失宜迨至驕縱廢弛貽誤戎機被人叅劾朝廷加以嚴譴致有用之材不獲養成大器以備千城之選殊為可惜嗣後各省督撫各路統兵大臣凡保舉記名提督總兵者須另片密註堪以勝任字樣或其人材堪造就而於提鎮大員尚難稱職不妨給予別項優獎俟其歷練較深再畀以專閫重任如有實在不能勝任者亦即隨時奏叅不得

稍有遷就以仰副整軍經武培植將才至意將此各諭令知之○又諭官文奏髮捻膺聚麻城白果官軍小挫後勝黃麻投誠賊目立功贖罪一摺逆匪盡驅白果麻城閔家集各路之賊猛撲官軍營壘分股包抄六合集周鳳山前軍小挫各情與僧格林沁前奏大略相同周鳳山此次進剿失利雖因眾寡不敵究屬布置失宜著卽拔去花翎以示薄懲麻城之賊由新洲辛家冲擾及歧亭宋埠該處

為各軍後路最關緊要官文現調趙克彰三營並穀桓等三營扼紮歧亭宋埠飭藍斯明由水路前進催姜玉順蕭河清由水陸分道徑赴麻城分軍由江面赴蘄州迎剿著官文卽飭派出各軍協力進剿殄除羣醜以收聚殲之效蘇克金一軍已抵麻城之黃土岡因山路崎嶇馬隊難於施展現由北面伍家河閻家河進逼英山折回之賊大股屯踞麻城勢將回竄黃孝等處均形喫重著僧格林沁

嚴檄蘇克金等會合楚軍實力掃蕩毋令該逆再由舊路西竄復肆蔓延金陵攻拔該逆既不敢東趨皖境若再不得逞志於楚勢必併竄豫疆光羅一帶尤形危緊著張之萬督飭將弁嚴密堵禦不得因僧格林沁大軍在境防剿專恃客兵轉得置身事外若令該匪闖入豫境又成燎原之勢必惟張之萬是問賊目黃桂元等赴富森保等營投誠降目高郭寶等率長髮老賊三百餘人赴麻城東門

乞降官文飭令立功贖罪著照所擬辦理惟逆匪類多叵測其悔罪輸誠自拔來歸者固不乏人而意存反覆往往首鼠兩端亦不可不豫為之防官文當飭屬妥為辦理毋得稍涉大意致墮詭謀將此由六百里各諭令知之○又諭前據步軍統領衙門奏湖南已革巡檢李際晟呈控知府李逢春等挾嫌奏革等款當經諭令官文密查覆奏嗣據官文奏請將李逢春革職押赴湖北歸案質訊亦經

諭令劉長佑遵辦茲據官文奏李際晟已提到鄂省飭司先訊大概供詞詎該革員任意刁狡形同訟棍牽涉多端萬難理諭所控李逢春挾嫌受賄捏飾驛站等款仍當詳細查明折服其心至毛鴻賓納妾一節請令該督自行回奏再所控私提庫銀行賄載垣等一款並無可憑請予免究等語參員挾嫌京控上官照例原係立案不行以戢刁健惟李際晟所控毛鴻賓受妾行賄等款牽涉疆臣案情較重如不切實查辦徹底研詰遽行概予免究致妄控者有所藉口轉無以折服其心著官文仍遵前旨迅即咨提李逢春到鄂按照李際晟所控各情逐一秉公研訊務期水落石出以成信讞毋庸稍涉迴護其所控湖南省劣員倚勢作威夤緣要結等情並著官文咨明惲世臨會同甄覈悉心考察毋稍徇隱另片奏記名總兵王萬年等不勝專閫之任等語覽奏已悉並諭知劉長佑察看余福象

能否勝任覈奏辦理矣原片著留中將此諭令知之○又諭麟興等奏遵旨約束所部人眾並請飭庫倫速繪舊圖咨送伊犁覈對一摺前據明誼等奏接准科布多烏里雅蘇台咨文卡內蒙古游牧現均設法安置茲據麟興等奏稱據唐努烏梁海總管等呈到遵繪各旗游牧圖誌東自固爾弼達巴哈起西至沙弼奈達巴哈界牌止即係唐努烏梁海游牧麟興等因烏里雅蘇台並無存有確切舊

案當即咨查庫倫隨准照鈔雍正五年兩國所換原約畫分界牌地名覈與委員所查大略相同似例載沙弼奈嶺即是唐努烏梁海游牧內之沙賓達巴哈已無疑義而俄國送來議單內載唐努鄂拉達巴哈疊次覈對均無此前項地名難保非俄國故換此名有意欺混如果即指唐努山不特與雍正年間定界舊案不符且與十年新定條約所載地址亦屬相背請飭庫倫將交界原圖咨送明誼

等以憑覈對等語俄人詭譎異常所稱唐努  
鄂拉達巴哈既查無此地名非調取從前定  
界圖誌以備俄使前來持與會議斷不足以  
折服其心庫倫自必存有舊圖著文盛等速  
將已定交界圖誌照繪一分或將原圖徑行  
咨送明誼等以備與俄使會議時反覆辯論  
詳明質證庶俄國不能逞其狡詞是為至要  
將此各諭令知之○又諭麟興等奏接據科  
布多咨文俄人搶去委員及扎薩克等情形

廣鳳奎昌奏俄人越界伐木各一摺科布多  
所屬之霍呢邁拉扈卡倫忽有俄人六十餘  
人前來駐紮聲言照料遊牧又由該國雅什  
達喇城衙門送來俄文內稱阿勒坦淖爾等  
處均係該國遊牧等語其綽羅什拜地方復  
有俄人數名伐木聲稱該處係該國富人前  
來貿易並有該國大喇嘛人前來蓋廟居住  
各等語西北分界事宜尚未定議前恐該國  
堅以常住卡倫為詞致伊犁索倫四愛曼人

等生計有礙諭令常清明誼等力與辯駁如  
該國不允則援條約內有西界商辦不限日  
期之語將分界事宜暫緩商辦以折其任意  
要求此次該夷率行越卡伐木並稱該卡倫  
等均係該國遊牧恐其以分界從緩豫先侵  
占故為虛詞恫喝之謀並私行越卡以圖藉  
端尋釁該大臣仍當不動聲色飭令派出委  
員妥為開導令將越界俄人趕緊退回並告  
以界址未分豈容伐木強占致生事端有傷  
和好務須嚴詞拒絕使之廢然思返方為妥  
善至該夷拘去查閱哈屯河委員及扎薩克  
蒙古兵等十餘名是否在卡倫以內其因何  
啟釁之處何以並未據廣鳳等詳細馳奏著  
廣鳳等一面將詳細原委速行奏聞一面設  
法開導令將拘去弁兵即行放回以免枝節  
叢生該大臣等身膺邊寄疊次諭令將各卡  
倫認真防範何以仍任令俄人來去自如並  
將查卡弁兵任意拘去毫無準備至此嗣後

該大臣等務各先為自強之計於各處守卡  
兵役嚴加整飭有備無患免致辦理諸形棘  
手將此由五百里各諭令知之尋明誼奏已  
據廣鳳來咨業經移知俄人令將滋擾俄兵  
嚴行收管查辦不得仍前尋釁下所司知之  
○調鑲黃旗護軍統領載容為右翼前鋒統  
領正黃旗護軍統領察杭阿為鑲黃旗護軍  
統領以鑲黃旗漢軍副都統恆齡為正黃旗  
護軍統領未到任前以正紅旗漢軍副都統

裕瑞署理○以拉林協領德英為阿勒楚喀  
副都統○壬寅諭內閣御史景霖等奏宗室  
覺羅潛住外城請飭查禁一摺據稱近來南  
城地面頗有宗室覺羅隱匿姓名居住者行  
蹤詭秘不安本分及與民人口角爭訟始將  
真姓名說出以圖挾制司坊官傳訊永不到  
案請飭查禁等語外城地面向不准旗人居  
住至宗室覺羅更不應在外城涸跡若如該  
御史所奏詭託姓名與匪人為伍滋生事端

情尤可惡著宗人府八旗嚴行飭禁宗室覺  
羅人等概不准移居外城如有先經移居者  
即著查明勒限遷回內城居住毋任延玩經  
此次飭禁之後儻再有潛居外城怙惡不悛  
者即著該城御史等訪查確實奏明究辦○  
又諭劉長佑奏甄劾庸劣不職之知府牧令  
典史各官請旨分別降革勒休一摺直隸候  
補知府沈燮同才欠歷練難勝表率著以同  
知降補前署任邱縣候補知縣王錫辦事嚴

率與論未孚候補知縣丁恭陶識淺心虛難  
膺民社以上二員均著以縣丞降補清豐縣  
知縣王學乾聲名平常不諳吏事無極縣知  
縣蔡榮錫偷安廢事不洽輿情長垣縣知縣  
易煥書公事廢弛不知檢束長垣縣典史潘  
岱舉動輕浮居官不謹以上四員均著即行  
革職延慶州知州汪桂年力就衰難期振作  
著勒令休致以肅吏治○諭議政王軍機大  
臣等穆圖善劉蓉奏倡勸蔡逆獲勝現籌添



兵會勦並曹克忠一軍西路截勦獲勝各摺片蔡逆被官軍擊敗後過田峪河移踞焦家巷等處經穆圖善等與曹克忠所部各軍分路截勦連日疊有新擒該逆勢漸窮蹙與啟鄭諸逆合併抗拒穆圖善等現紮田峪河東岸並函商曹克忠偪紮田峪河西擬為兩路夾擊一鼓聚殲之計惟賊勢尚眾官軍兵力較單穆圖善等所調蕭慶高一軍由洋縣取道佛坪會勦卽著催令迅速前進合力兜擊

並著李雲麟迅率所部分駐華陽江口四畝地各隘以杜紛竄蔡逆率賊黨五六百人在黑峪河東岸經曹克忠督隊迎擊將蔡逆閃落馬下為賊眾擁救逃逸據生擒賊供該逆因官軍緊逼意圖偷渡渭河竄往岐鳳一路余福象所部兵力較薄卽著劉蓉等咨商雷正綰陶茂林將曹克忠所部隴防四營星速調紮鳳翔如賊匪乘間偷渡渭河卽行攔頭截擊並嚴飭余福象就現有防兵探蹤堵截

毋稍疏懈蔡逆勢窮思竄正當合力協勦將全股就地殲除著劉蓉李雲麟等嚴飭諸軍與曹克忠一軍併力環攻悉數殄除以靖疆圉儻任令擾及他處致裹脅日眾逆猷復張必惟劉蓉李雲麟等是問降將葉毓廣隨同曹克忠勦賊立功自應量予獎敘劉蓉等請賞給該降目四品翎頂或以都司補用未免過優著改為賞給六品翎頂嗣後葉毓廣續有勞績仍可從優保獎也漢中地方彫敝既據劉蓉奏稱前署守楊光澍於撫綏地方及籌辦善後各事宜頗著成效著照所請改為革職留任仍令署理漢中府知府劉蓉卽飭令該員將地方應辦事宜認真經理使地方日有起色本日據官文奏陝西漢中鎮總兵余福象現年二十二歲於營務毫無歷練而奢華浮動性情未定似未便遽膺專閫請飭查看等語並著劉蓉隨時認真查看能否勝任據實具奏將此由六百里各諭令知之○

以記名副都統安住為正藍旗蒙古副都統  
交神機營王大臣差委○以直隸武邑平鄉  
等縣上年被匪竄陷即行收復免署總督崇  
厚布政使石贊清按察使王榕吉道員錫祉  
祝瑱知府李朝儀署知州高維翰處分○以  
克復江南省城賞軍機章京光祿寺卿胡家  
玉等花翎內閣侍讀瑞廉等藍翎餘加銜升  
敘有差○緩徵直隸東安元城大名三縣被  
水村莊新舊額賦旗租○癸卯諭內閣前因

都興阿奏東臺縣團練與焦湖船械關燒殺  
多人並將採辦軍米船隻燒毀總兵詹啟綸  
之叔詹以安亦被殺害等情當經諭令吳棠  
提案研訊嗣據吳棠遵查大概情形並將武  
舉夏澄夏芳奏請飭革究辦茲據吳棠奏稱  
疊經委員查訊情節參差署運司忠廉訊據  
要證楊道生等供詞以夏澄等並無在場糾  
搶之事而詹啟綸復因客民吳鸞訐控遂以  
上下交蒙等詞稟請另委委員審辦江北現

無可委之員請改發江蘇審訊等語此案已  
閱兩年之久亟應趕緊審結著吳棠將案內  
人證卷宗移交李鴻章督同臬司秉公研訊  
確情按律定擬具奏尋奏審明焦湖船詐稱  
兵勇在東臺縣境騷擾帶有髮逆偽票多件  
被鄉民擒獲互相擊鬪致斃多命總兵詹啟  
綸之叔詹以安採辦軍米適與焦湖船同泊  
誤被焚殺武生吳鸞控已革武舉夏澄夏芳  
乘勢糾搶訊係挾嫌誣告夏澄吳鸞均已病

故夏芳應請開復下部議從之 諭議政王  
軍機大臣等德勒克多爾濟等奏挑選土默  
特壯丁在城駐守請飭山西巡撫籌給銀兩  
等語歸化城向無重兵駐守該將軍因拏獲  
逆回奸細訊有東竄之信當即傳集土默特  
屯居壯丁挑選三百名常川駐城派委參佐  
領等官自六月十五日起按日操演並與鄉  
團聯絡彈壓所籌尚屬周妥惟該壯丁等素  
無錢糧斷難枵腹從事著沈桂芬督飭歸綏

道酌善款項每名壯丁每月發給實銀一兩五錢以資津貼而重防務原片著鈔給閱看將此諭令知之○以記名總兵官李季高為甘肅甯夏鎮總兵官○以內閣學士殷兆鏞為福建鄉試正考官宗人府理事官阿克丹為副考官左春坊左贊善崑岡為河南鄉試正考官翰林院編修王之翰為副考官通政使司通政使朱夢元為山東鄉試正考官翰林院侍讀學士童華為副考官銘安為山西

鄉試正考官內閣中書張興留為副考官○追予故漕運總督袁甲三於江蘇淮安府城建立專祠○甲辰諭內閣議政恭親王奏敬陳感悚下忱請停親王雙俸一摺成豐十一年冬間朕奉

慈安皇太后

慈禧皇太后自熱河旋蹕授恭親王為議政王並以王自留京辦事以來諸臻妥協因仰體皇考文宗顯皇帝酬庸未竟之志宣示

遺命以親王世襲罔替王涕泣固辭不得已降旨從緩俟朕親政之年再行辦理先行賞食親王雙俸以示優禮昨因江甯逆首就殲紅旗告捷我兩宮

皇太后以王首贊樞廷賢親最著亟思丕承先緒仍加恩以親王世襲罔替王乃推功諸將再三懇辭念其情詞諄切俯如所請僅加恩王之三子載澂等於朝廷論功行賞之心初未盡愜茲復據奏金陵雖克而湖北江西賊氛尚熾陝甘雲貴餘孽未平軍餉浩繁庫款支絀且在京王公諸臣之俸稍八旗兵丁之月餉減成支放未復舊章而王公貝勒萃於一門既忝高爵復膺厚祿若不痛自抑損不獨滿則必虧徒增咎戾且何以副知遇之隆而塞天下之望請將支食親王雙俸之處即行停止等語覽王所奏具見忠愛惻怛出於至誠惟爵以馭貴祿以馭富國家詔旨之典古今所同王自簡任樞廷於今三載運籌決

策成效卓然嗣後慎始敬終忠勤匪懈行當廓清區宇丕著全功拭目昇平更加懋賞至此嘉賞成功因王撫抑為懷僅酌中給予恩施未嘗加厚若將從前所降恩命遽爾收回亦恐無以昭勸賞之平而示人臣之則恭親王仍著食親王雙俸其母固辭○又諭前因僧格林沁奏遵查苗逆仇殺徐立壯等案並呈遞黃鳴鐸等稟詞當經諭令兵部傳知翁同書聲覆並交曾國藩喬松年詳查具奏

嗣據喬松年於馳抵臨淮附陳大概復經諭令俟會同曾國藩奏到再降諭旨茲據曾國藩喬松年奏稱遵查孫家泰力拒苗逆仰藥自盡蒙時中慷慨赴難突遭慘害與黃鳴鐸等稟詞均相脗合惟徐立壯被殺情形傳聞異詞出入甚重徐立壯本苗逆部下隊長後因積不相能自願助守壽州以拒苗逆而所募勇丁入城肆行剽掠徐立壯明知故縱又招著名捻首葛小牛竄掠壽城該州人民公

議請於翁同書令其移營城外徐立壯以違令被誅罪由自取其家屬之死係為苗逆所殺與辦團無涉可無庸議博崇武署壽春鎮總兵於苗逆搆亂一意主撫自知眾志不孚與慶瑞尹善廷突圍南去避匿不出坐視苗逆攻城並未堵禦雖查無與苗逆合隊確據而迎合苗逆頓兵不出實屬共見共聞張學醇奉袁甲三檄提孫家泰蒙時中解赴臨淮墮苗逆詭謀一籌莫展卒至壽州城陷孫家

泰等之死雖非張學醇設計偏脅而追原禍始辦理錯誤實無可辭鄒學鏞擬就摺稿偏令翁同書出奏一節查無實據惟隨同附苗款接獻勤實屬昏憤無恥請將博崇武等分別罪名擬結並孫家泰優卹建祠等語此案前署壽春鎮總兵記名副都統博崇武以專閫大員迎合苗逆頓兵縱寇所犯情節較重著卽行革職發往新疆充當苦差永遠不准援減總兵慶瑞尹善廷隨同博崇武避匿坐

視城陷實屬畏葸無能均著卽行革職發往新疆效力贖罪壽春營遊擊鄒學鏞聽從博崇武等指揮獻媚苗逆實屬卑鄙可惡著卽行革職永不敘用前任臬司張學醇身任監司毫無識見甘為苗逆所給致壽城被陷顛倒荒謬貽害地方該員前經袁甲三奏參革職嗣以軍前立功復經奏請獎勵著將前次請獎之案卽行撤銷仍發往軍臺效力贖罪前任漕運總督袁甲三於苗逆攻逼壽州時派張學醇查提孫家泰等解赴臨淮原係權宜辦理冀消反側惟於張學醇等之辦理不善致墮狡謀未能先行覺察亦有應得之咎所有前次降旨准將該故漕督在臨淮建祠之處著卽撤銷其辦團各員除徐立壯罪有應得毋庸議卹外已革刑部員外郎孫家泰力拒苗逆疾惡若仇候選從九品蒙時中挺身就義甘蹈湯火均屬義勇可嘉孫家泰著開復原官追贈四品卿銜照陣亡例從優議

卹蒙時中著追贈通判銜照陣亡例從優議卹孫家泰之父五品封職鹽大使孫贈祖於壽州城破被執罵賊陣亡及國子監典簿孫家德追賊救父力竭被害甘肅候補府經歷孫家彥候選訓導孫家洪候選鹽大使孫傳洙候選從九品孫傳熙在籍辦團均被戕害一門忠節洵堪嘉閭著文部各照本職從優議卹卽在壽州地方建立孫氏專祠並准將蒙時中附祀以慰忠魂其餘殉難官紳人等著曾國藩等續行查明分別請卹又諭前因張凱嵩奏參廣西署宣化縣典史李映松與署南甯府知府陳瀚互相稟訐當經降旨將李映松陳瀚分別革職撤任嚴訊茲據張凱嵩奏稱李映松因陳瀚尚未到省輒赴桂林府等衙門藉詞催審肆無忌憚該撫因應傳人證甚多由南甯赴省動須月餘且與陳瀚等同鄉姻戚應行迴避請就近飭交兩廣總督提審等語此案李映松因挾陳瀚撤任

嫌隙輒列款稟許本應立案不行惟陳瀚是否實有劣蹟抑係李映松挾嫌誣控虛實均應徹底根究著交毛鴻賓卽行提集全案人證卷宗秉公嚴訊確情按律懲辦毋稍徇隱○諭議政王軍機大臣等奏松年奏接奉疊次諭旨並陳近日軍情一摺據稱賊匪盤踞羅田積穀擄人以為久住之計餘賊仍在麻城屯聚是賊踞羅田為巢穴必將逐漸進步與尋常之飄忽亂竄者不同蓄謀甚狡亟應

乘其盤踞未固大張捷伐前據僧格林沁奏駐紮光州之長嶺集居中調度軍情變幻靡常刻下應由何路督率諸軍合力兜剿並聯絡楚師夾擊之處著該大臣相機辦理務將賊氛迅速殄滅陳國瑞一軍蓄銳已久或令從商城進剿麻城攔腰橫截或令由英山進剿羅田迎頭兜擊著僧格林沁妥籌調度檄令速進正陽關地當扼要著喬松年懍遵前旨親往移紮一切攻剿機宜隨時稟商僧格

林沁協力進取壽州地方派定何員駐守並著奏聞將此由六百里各諭令知之○又諭毛鴻賓奏進剿客匪連破匪巢並張運蘭所部勇丁潛逃回籍各摺片陽春客匪自竄入新興後經卓興等軍聯營進剿將古院回龍等處大小匪巢八十餘座盡行攻破斃匪千餘人餘匪向高明縣屬之五阮逃竄此次出力員弁英勇著准毛鴻賓擇尤彙案保獎毋許冒濫客匪挾仇相殺兵連禍結積十數年

勢難一概誅戮且其攫食求生情殊可憫亦與甘心叛逆者有間辦理之法總當勸撫兼施脅從罔治方有了期該匪等現經此次痛剿逃竄五阮而五阮客民復與高明土民相持未下勢將聯為一氣固結不解聞平恩平鶴山等縣處處均虞竄突毛鴻賓郭嵩燾惟當乘此軍威丕振該匪膽寒之時妥為開導飭令將賊首戴梓清連行交出其餘脅從即可分別良莠網開一面以期早就廓清一面

嚴飭卓興等軍妥為布置毋任四處蔓延重煩兵力土客皆朝廷赤子若使窮蹙鋌走雖多行殺戮殊失朝廷勦辦之意毛鴻賓郭嵩燾諒能洞悉辦理也張運蘭起程赴閩該營弁勇竟敢藉欠餉為名私行逃去至千餘名之多實屬目無法紀所有湖南補用遊擊蕭洪任程德亮都司幸萬春唐春山守備言作朋均著拔去花翎都司賀良生守備鄭甫田鄒洪亮官正清陽光武陳有才馮定發千總

蕭福泰李光明易明德郭泰山李玉華把總朱長松均著拔去藍翎與把總顏桂山一併革職卽由毛鴻賓咨行憚世臨嚴密查拏務獲究辦以示懲儆閩省防勦至關緊要並著毛鴻賓等檄飭張運蘭卽帶舊部二千人迅由信豐長甯取道先行赴閩其道員張恆祥等所募桂東之勇並催令趕緊成軍陸續前進毋稍宕延將此由五百里諭令知之○又諭張凱嵩奏匪撲泗城府城經勇練擊退奸

民勾結土匪襲陷歸順州城各一摺匪徒廖萬服楊通潮等由滇黔邊境竄入西林凌雲突撲泗城郡城經知府吳其達督率勇練擊勦該逆退至距城一百六十里之甘村旋竄出鳳凰山邇耶等處我軍斃匪無算追至石里安凝一帶該逆勢將回黔若非合力兜勦勢必於兩省邊界狼奔豕突肆意蹂躪漸至不可收拾著勞崇光張亮基張凱嵩嚴檄派出官兵團勇併力進攻兩面夾擊以期聚而

殲旃匪首廖萬服是否業已殲斃楊通潮現逸何處著張凱嵩查明具奏投誠之張世榮雖經助勦獲勝是否始終可用張凱嵩務當嚴密防範不可稍涉大意勞崇光張亮基當激勵將弁越境追躡不得專防黔省本境徒事株守土匪小張三竄擾天保縣之涼坡等處另股陸侍汰由天保圖撲歸順已革團總鍾啟藩詭稱係奉調鄉團潛抵城下奸民遽開東門放賊竄入歸順州城被陷署天保縣

知縣瑞齡等先後中槍倒地是否業已殉難  
及其餘文武下落著張凱嵩查明具奏惟天  
保歸順被匪竄擾係上年八月至十一月之  
事該處雖距省寫遠亦何至遲至本年六月  
始行入奏辦賊之道偵探最為緊要遲鈍顛  
預至於此極尚望其運籌決勝神速用兵耶  
泗城歸順之賊現在均藉團勇堵禦恐聲勢  
較弱一時驟難得手該省潯州等屬先後肅  
清正可騰出兵力前往勦辦著張凱嵩抽撥  
勁旅星速前赴泗城歸順等城實力進剿殲  
除醜類克復城池以期廓清疆圉將此由六  
百里各諭令知之○署山西巡撫沈桂芬奏  
整飭邊界捕務請力行保甲以靖地方得旨  
口外保甲等事著飭該地方官實力奉行以  
靖奸宄○補鑄福建邵武縣知縣泰甯縣儒  
學各印信條記從巡撫徐宗幹請也○以安  
徽鳳陽等處肅清暨收復懷遠縣城出力賞  
總兵官宋慶提督銜參將何文喜同知唐訓

邦等花翎縣丞田遜忠等藍翎餘加銜升敘  
有差以廣東連州英德勦辦竄匪出力賞  
遊擊王維德等花翎知縣龍甘霖等藍翎餘  
升敘有差○乙巳諭議政王軍機大臣等鮑  
源深奏敬陳考試情形並思南一帶土匪縱  
橫強圍跋扈請飭督撫設法裁制各摺片據  
稱武緣團總林源海因阻抑各團考試滋釁  
屢動干戈該學政按考思恩行至心墟地方  
值林源海與甘墟伊嶺各團開仗該學政折  
回南甯欲將武緣等州縣調至南甯附考署  
知府陳瀚並不稟商輒行請兵辦理實屬乖  
謬陳瀚業經另案撤任提訊張凱嵩已派姚  
翔之署南甯守著即飭令該員設法開導俟  
道路疏通即請補行考試以免生童缺望惡  
團林源海及劣生梁詒遠等著張凱嵩迅即  
拏辦甘墟伊嶺等處匪徒派兵按捕毋稍懈  
忽另摺奏特參貪鄙謬妄之知府並開單臚  
陳劣蹟請飭督撫查辦等語陳瀚前因與李



映松互訐案內已降旨撤任昨又有旨交毛鴻賓提訊茲據鮑源深奏訪聞該署守方蹟如侵那釐局捐項及地丁錢糧縱勇搶劫陵辱生童等款必非無據著毛鴻賓於提訊陳瀚等互訐一案時並將鮑源深所參各款逐一嚴密詳查據實參辦原摺單著鈔給毛鴻賓閱看廣西軍務漸平地方必須認真整頓方可為久安長治之圖若如該學政所奏劣團把持考事紳士代理地方久假不歸恐漸成尾大不掉之勢現在首惡多就殄除該撫自當分兵各路翦除餘匪抑制惡團派委廉幹地方官認真經理不得一味遷就致蹈從前養癰貽患覆轍守令各官如有似陳瀚之貪劣不職者著毛鴻賓張凱嵩隨時嚴參懲辦以肅吏治而靖邊陲將此各諭令知之尋蘇鳳文奏審明陳瀚尚無侵那釐捐各劣蹟惟考試命題率忽於學政按臨時疏防匪黨竄擾應請革職已革宣化縣典史李映松稟

許陳瀚各款係屬懷疑尚出有因惟因充學政巡捕誣稟民人馮宣傳遞文字應按律擬徒下部議從之吉林將軍景綸等奏吉林已無賊蹤現經撤兵歸伍得旨仍應督飭官兵嚴密偵探不得徒託空言以正藍旗滿洲副都統綿宜暫署左翼前鋒統領以雙城堡總管克蒙額為墨爾根城副都統以捕盜無能降吉林佐領舒亮為防禦並撤勇號丙午諭議政王軍機大臣等李雲麟奏楚軍借款急難歸還現擬遣回湖北再行變通辦理一摺據稱援陝後添立隴軍水陸各營餉無所出不得已借用楚餉二萬五千餘兩並因所部義勝三旗豫東協餉屢催不解復將毅健一軍解到餉銀通融墊發總計墊發過義勝軍餉銀一萬一千餘兩合之隴軍各營實借用過楚餉三萬六千餘兩本擬俟陝南肅清籌款補還不意陝南肅清而陝北喫緊省局不能兼顧不但前借楚軍之餉不

能籌還且並無糧米餬口楚軍眾議紛紛久  
恐生變擬於數日內先將楚軍六營交遊擊  
全殿安楊桂芳等分統回楚此項借款暫由  
官文設法彌補俟陝省肅清或豫東欠餉解  
到卽行陸續解還楚省等語毅健六營本係  
湖北撥援陝省之兵李雲麟現因餉項支絀  
恐致譁潰先行撤回楚省自係迫於萬難之  
勢卽著李雲麟嚴飭全殿安等妥為管帶赴  
鄂毋令沿途滋事此軍到後著官文酌量調

遣至借用該軍餉項既據李雲麟奏稱無款  
籌還亦係實在情形卽著官文先行設法將  
前項借用銀三萬六千餘兩籌款分給以贍  
飢軍李雲麟亦當迅速籌措解還鄂省至所  
留隴軍各營仍著李雲麟妥為駕馭一切糧  
餉軍火就近咨商劉蓉隨時接濟以振士氣  
而靖賊氛將此由五百里各諭令知之○命  
前任直隸清任道鮑桂生赴貴州軍營聽候  
雲貴總督勞崇光等差委○緩徵甘肅皋蘭

河靖遠隴西安定岷西河隆德泰安清水成  
靈臺崇信十三州縣被災被擾地方新舊額  
賦丁未

孝靜成皇后忌辰遣官祭

募東陵○諭議政王軍機大臣等富明阿奏派  
員管帶裁撤頭批師船回粵並將二三批師  
船陸續撤回一摺據稱廣東來江紅單拖罾  
各大船七十六隻雜項快艇十九隻現裁出  
二十五隻作為頭批發給一月口糧派令副  
將賴鎮海管帶於七月初三日起程回粵在  
粵守領欠餉經手散放並將二批師船於七  
月中旬交副將林宜華管帶其三批應裁各  
大船由吳全美統帶回粵各等語現在金陵  
克復江北防務既鬆所有裁撤師船業經富  
明阿派員陸續管帶回粵卽著飭令吳全美  
嚴飭賴鎮海等沿途妥為彈壓毋令滋事各  
起師船到粵應發欠款毛鴻賓郭嵩燾當趕  
緊籌措交該管帶官分別散給以清積欠此

項師船已由吳全美修補。毛鴻賓郭嵩壽仍當派委妥員照料免致復有損壞各船勇丁應否酌量裁撤及如何分別調撥均著悉心妥辦。吳全美著俟統帶師船回粵事竣後來京陛見其餘礮划等船應留應撤之處著富明阿妥為辦理。蘇松鎮總兵李起高既據富明阿奏稱現無經手未完事件即著飭令前赴新任以重職守。將此由四百里各諭令知之。予江南軍營病故記名總兵官張茂清

祭葬卹廕○戊申

孝懿仁皇后忌辰遣官祭

景陵○諭內閣戶部奏請將軍需報銷變通辦理一摺據稱軍需報銷向來必以例為斷然其間制變因時亦有未能悉遵之處各省軍需歷年已久承辦既非一人轉戰動經數省則例所載徵調但指兵丁而此次成功半資勇力兵與勇本不相同例與案遂致歧出在部臣引例覈案往返駁查不過求其造報如

例而各處書吏藉此需索糧臺屬員借以招搖費無所出則浮銷苛斂等弊由此而起請將同治三年六月以前未經報銷各案開具簡明清單奏明存案並請飭禁勸捐歸補名目等語所奏係為因時杜弊起見軍需報銷一事本有例定章程惟近來用兵十餘年蔓延十數省報銷款目所在多有若責令照例辦理不獨虛糜帑項徒為委員書吏開需索之門而且支應稍有不符於例即難覈准不得不著落賠償將帥宣力行間甫邀恩錫旋迫迫呼甚非國家厚待勲臣之意著照該部所請所有同治三年六月以前各處辦理軍務未經報銷之案准將收支款目總數分年分起開具簡明清單奏明存案免其造冊報銷此係朝廷破格施恩各路統兵大臣各省督撫具有天良務須督飭糧臺委員覈實開報不得因有此旨任意影射浮冒並著嚴禁勸捐歸補名目及私設釐卡等弊如有不肖

委員仍以前項情弊。巧為嘗試。別經發覺。除將承辦各員嚴辦外。必將各該統兵大臣及各該省督撫等。從重治罪。部中書吏。如有在各處招搖撞騙。蒙混包攬者。並著嚴行拏辦。以懲奸蠹。其自本年七月起。一應軍需。凡有例可循者。務當遵例支發。力求撙節。其例所不及。有應酌量變通者。亦須先行奏咨備案。事竣之日。一體造冊報銷。不得以此次特恩妄生希冀。將此通諭中外知之。○諭議政王

軍機大臣等。有人奏河南項城縣知縣姚亮元。縱役殃民。與該縣外委李振雲毆罵行同惡棍。捕役誣陷良民。王呼囊為盜。妄扳申姓。該縣酷刑嚴訊。索賄株連。無所不至。經知府劉拱宸訊明。將王呼囊釋放。該縣因懷忿恨。傳諭紳民。以後盜劫重案。不必來縣控告。是夜即有賊匪數十人。至主事高欽中家搶掠一空。百姓皆以該令密為唆使。請旨飭查等語。州縣為親民之官。關繫最為緊要。似此縱

役殃民。索賄斃命。且有唆匪搶掠情事。大為地方之害。亟應嚴行懲辦。以儆官邪。著張之萬將姚亮元被參各款。確切查明。據實參奏。毋得稍涉徇隱。原片著鈔給閱看。將此諭令知之。尋奏遵查姚亮元並無行同惡棍通盜殃民劣蹟。已於被參後病故。應無庸議。從之。○引見選用知府原峰峻得旨著以知府發往陝西。交劉蓉酌量補用。○派禮部右侍郎綿宜兼管順天府府尹。萬青藜監臨順天鄉

試。○賞科爾沁貝勒伯彥訥謨祜三眼花翎。



之處著曾國藩一面查明情形迅速奏聞一面督飭地方官酌量興修務令完固整齊用副隆禮勝朝有加無已至意尋奏遵查明陵毀傷過甚修理維艱擬俟修城挑河各工完竣再行籌辦報聞○諭議政王軍機大臣等前據李鴻章奏鎮江考棚現擬改建府城以臻便捷茲據御史王蘭谷奏丹徒首邑繁劇考棚改建應試時士商雲集滋事堪虞且該處近有洋商建蓋房屋尤恐生童畢集易啟

釁端又壇漂士多貧乏地方新復元氣久傷若府院兩試均須遠道跋涉勢必人數寥寥難期滿額文風恐因此日衰請仍將考棚建設金壇以符舊制等語金壇為四邑適中之地丹徒近復華洋雜處該御史籍隸鎮江於地勢人情知之必悉所籌自係實情著李鴻章斟酌情形或將前奏所籌經費即於金壇按照舊址建立考棚以順士心而復舊制或丹徒業已建有成規即以專備徒陽府試另

於金壇建設考棚之處並著該撫妥籌辦理將此諭令知之○又諭據御史陳廷經奏江浙投誠士卒宜妥為安置即如直隸原設有大名鎮近遇宋景詩紛竄徵兵調將幾及二年而後竣事山東原設有兗州鎮兵額無多教匪起事已逾數年蔓延滋甚該二省宜再增兵額以資分布等語各營兵額原有定制大名兗州兩鎮地處扼要兵力是否足資調遣現在江浙軍務漸次肅清投誠士卒亟應

分撥安置以資鈐束著劉長佑閻敬銘悉心體察情形如該二鎮宜酌添兵額或即以此項勇丁撥往防守之處即著妥議具奏將此由四百里各諭令知之○又諭有人奏蘇州勇丁散回廣東佛山等處一月內連劫至數十次番禺等處散勇至千百成羣帆檣絡繹有糾眾攻打花埭情事毛鴻賓不能安插等語該省有如此情形何以未據毛鴻賓等奏報現在揚州師船又經富明阿裁撤分起回

粵當此各路勇丁紛紛遣散。該督撫等自當振刷精神。妥為安插。豈可毫無措置。致告捷之餘。別生枝節。重擾吾民。著毛鴻賓郭嵩燾。一面將各該處被劫情形。據實奏聞。一面將散回勇丁。設法安置。並遵前奉寄諭。將應發師船欠款。趕緊籌給。儻一味顛頑。致散回勇丁。再生事端。惟該督撫是問。原摺著摘錄鈔給閱看。將此由五百里諭令知之。○又諭楊岳斌奏賊勢趨重崇仁。現在出省督剿。並親

赴各路察看形勢。調回水師五營。分布贛河一摺。崇仁之賊。圖犯吉臨等郡。楊岳斌擬由豐城馳赴崇仁督剿。著即會商劉典。督同江忠朝等軍力。圖掃蕩。並令鮑超等將許灣東鄉各踞賊。分投剿洗。毋任旁竄。賊眾我寡。宜黃南豐金谿兵力尚難偏及。該督已調回水師五營。如陸軍單薄。亦可咨商曾國藩等將金陵陸師酌量調派。以厚兵力。省城防務。沈葆楨督率萬泰等認真巡防。務須周密。喬松

年奏陳國瑞已赴麻城英翰馳駐商城。麻城賊勢固重。羅田之賊亦圖久踞。終有竄擾英霍之虞。該撫現擬先赴壽州。即赴正陽關察度形勢。權其緩急。期於兼顧無失。所籌尚妥。著即於到壽布置後。仍遵前旨。馳赴正陽關。妥籌防剿。朱淮森四營。即可令全駐壽州。以備緩急調用。圖一件留覽。另片奏羅田之賊恐竄英山。請調金陵勁旅。從英山進剿等語。金陵得勝之師。休息已半月有餘。著曾國藩

即調派得力將弁。帶精兵萬人。從英山一路前進。與楚師會合夾擊。該撫片內所稱曾國藩不日仍回安慶。已與函商辦理等情。江甯地屬首要。現在甫經克復。一切撫綏安緝。應行辦理之事甚多。曾國藩如不能再赴安慶。即著派彭玉麟曾國荃等酌量帶兵分駐上游。以資控扼。其皖南之廣德等處。恐湖州賊匪續犯江西。並著分派勁兵。迅圖克復。廣德毋任分竄。昨據御史陳廷經條陳善後事宜。

一摺內有疆輿略為變通一條。請以徽州甯國池州太平四府。割屬江蘇。與江甯蘇州松江常州鎮江為一省。以揚州淮安徐州海州通州割屬安徽。與安慶廬鳳潁泗為一省。江南江北分設科場各等情。與地方吏治有無裨益。著曾國藩李鴻章喬松年酌度形勢。妥籌具奏。其安置勇丁一條。疊經降旨。令該督撫等豫籌善策。如何酌量挑補兵額。遣散歸農之處。並著該督撫等妥慎辦理。毋貽後日

無窮之患。又據御史賈鐸奏。請飭曾國藩等。勉益加勉。力圖久大之規。並粵逆所掠金銀。悉運金陵。請令查明報部備撥各等語。曾國藩以儒臣從戎。歷年最久。戰功最多。自能慎終如始。永保勳名。惟所部諸將。自曾國荃以下。均應由該大臣隨時申儆。勿使驟勝而驕。庶可長承恩眷。至國家命將出師。拯民水火。豈為征利之圖。惟用兵日久。帑項早虛。兵民交困。若如該御史所奏。金陵積有鉅款。自係

各省脂膏。仍以濟各路兵餉賑濟之用。於國於民均有裨益。此事如果屬實。諒曾國藩亦必早有布置。惟該御史既有此奏。不得不令該大臣知悉。曾國藩由安慶到江甯。於調兵安民整飭地方各事宜。諒已有奏報在途。江甯城內情形。若何。居人能否漸次復業。實深廑繫。貢院有無損壞。應如何修葺之處。著曾國藩查明具奏。聞江北釐卡畝捐戶捐及一切各捐。均仍照前。疊經降旨裁革。未據地方

官認真辦理。亟應釐剔弊端。與民休息。著曾國藩吳棠李鴻章嚴行禁革。如有委員劣紳藉端苛斂。即行拏辦。以儆其餘。兩淮鹽務。為庫款大宗。曾國藩早經派員興辦。此時江路通暢。可以圖復舊觀。著飭運司招商認運。以期國課漸充。並著飭令藩運司等官。各歸舊駐地方。不得仍前駐紮泰州一隅。圖旦夕晏安之便。致與大局無益。江防師船。已由富明防次第裁撤回粵。浙江之賊。不能越蘇常而



至鎮江楚北之賊不能越英霍而至天六。江西之賊不能越九江而至安慶。此外並無可防之賊。是揚防各軍現屬無事。著富明阿酌量裁撤調撥。以節糜費。楚北麻城等處之賊。勦辦若何。如須增兵助剿。為一勞永逸之計。即著僧格林沁。官文。飛咨曾國藩。將金陵得勝之軍酌量調撥。以期早日肅清。近日軍情賊勢並著趕緊奏報。以紓朝廷南顧之憂。將此由六百里各諭令知之。○庚戌。

慈安皇太后聖壽節遣官祭

太廟後殿

奉先殿○

上率王以下文武大臣詣

慈寧門行慶賀禮。眾官於午門外行禮。○諭內

閣官文奏請將帶兵各員分別懲處等語。總

兵王桐柏統領湖北撫標各營。當賊氛密邇

之時。率行託詞請假。實屬不知緩急。總兵李

喜溢參將張炳德遊擊王德光於所部勇丁

傳令拔隊時。藉詞索餉。持械攔阻。不能約束。實屬庸懦無能。總兵蕭恆勝參將尚秉衡。副將周友勝所部各營。亦因索餉滋鬧。毫無紀律。尚秉衡輒乘隙避匿。尤為狡猾。道員梁作楫前因稟報鄧西勝仗未盡屬實。先經官文奏參摘頂。茲據該督查明。梁作楫赴援鄧西。頓兵未下。迨賊漸遁去。該員帶隊進剿。將新據之眾收降。遣散城圍遂解。與原稟殺賊解圍等情迥不相同。實屬意存捏飾。以上各員。

亟應分別懲辦。以肅軍律。提督銜總兵王桐柏著革去提督銜。撤銷勇號。以參將降補。總兵李喜溢著撤銷勇號。以遊擊降補。道員梁作楫著即革職。暫行留營。以觀後效。並將前奏鄧西解圍出力各員存記。彙獎之案一併撤銷。總兵蕭恆勝參將張炳德遊擊王德光。副將周友勝參將尚秉衡均著革職。永不敘用。並不准再赴各路軍營投效。此外各營員弁如有帶兵不能得力者。即著隨時從嚴參

辦○諭議政王軍機大臣等官文奏官軍勦賊疊勝糧道疏通現擬移營黃岡督剿並英山已無賊蹤暨豫籌出境勦賊擬派大員督軍各摺片髮捻麇集麻城之白果地方環偏營壘阻我糧道經成大吉等防剿兼施疊獲勝仗糧道得以疏通其洗馬畈蔡家河一帶賊匪經梁洪勝等分路追殺敗賊潰入團陂黃岡壇坪踞賊復經富森保派兵狙擊均有斬擒是鄂境各股逆匪勢燄漸衰亟應乘勝

掃蕩僧格林沁所派之色爾固善及善慶兩軍均已抵紮麻城其蘇克金一軍亦在黃土岡由北面進逼而自陝回援之監斯明等各營復分紮蘄黃要隘溫德勒克西等已抵黃陂姜玉順自樊城拔營計日即可到楚大兵雲集聲勢甚盛著僧格林沁官文督飭馬步水陸各軍乘金陵已克賊心震懾之際併力夾擊盡殄狂氛毋留餘孽惟賊計狡獪難保不鋌而走險為避兵之計豫省南路邊防最

關緊要張之萬務當豫籌布置扼要嚴防毋令一賊得以竄越官文現已移營黃岡並著督飭各路將弁會合僧格林沁所派之軍將髮捻各逆四面兜擊毋令餘匪紛竄鄰省致滋延蔓官文另摺奏豫籌出境勦賊擬令唐訓方督帶楚軍等語自係為先事圖維起見惟唐訓方本日已簡放直隸藩司吳昌壽到鄂後該員即須前赴新任將來髮捻萬一他竄必須大員督軍出境追剿屆時再行請旨

辦理將此由六百里各諭令知之○又諭前因李雲麟奏餉項支絀請將毅健六營先行撤回楚省當因所奏尚係實在情形諭令將楚軍六營交遊擊金殿安等妥為管帶赴鄂毋令沿途滋事茲據官文奏湖北先後撥解李雲麟援陝楚軍餉銀已逾十四萬兩截至四月底止並無欠缺五六兩月餉銀陸續籌解後自七月起楚省實難再顧而五月十八九等日已有李雲麟所部毅健營潰勇二百

餘名由水路行抵夾河。陝西白河縣水陸兩路亦有潰勇過境等語。是五月餉銀始議停止。甫及旬餘。即多逃散。可見該京堂約束不嚴。非盡因停餉之故。且紛紛潰散。難保無沿途滋擾情事。著劉蓉迅派妥員確切查明。從嚴究辦。並查明此項勇丁。如未全數啟行。現在留陝若干。即將官文此次解款銀兩。由李雲麟酌量散放。妥為安置。俾遣撤各勇。不致別滋事端。川陝交界防勦正當喫緊。著李雲

麟督率所留隴軍嚴密堵擊。不得因楚勇既撤。藉口兵單。希圖諉卸。李雲麟所部兵勇。前次克復山陽。勦辦回匪出力。曾經諭令官文等查明保獎。茲據官文聲稱。遠在楚省打仗。情形無從詳悉。仍將原保底單。咨送劉蓉就近辦理。並咨覆李雲麟等語。著劉蓉詳晰查明。會同李雲麟覈實保獎。毋許冒濫。將此由六百里各諭令知之。○實授都察院左副都御史鍾岱倉場侍郎。○實授戶部左侍郎沈

桂芬山西巡撫調刑部右侍郎吳廷棟為戶部左侍郎管三庫事。以署河東河道總督譚廷襄為刑部右侍郎。○以直隸布政使鄭敦謹為河東河道總督。湖北按察使唐訓方為直隸布政使。湖北荆宜施道唐際盛為按察使。辛亥諭內閣恩麟奏請將發遣革員暫留差委等語。已革參將鄒學鏞前在陝西城固辦理巡防。輒因兵潰擅離防所。經前任陝西巡撫瑛榮奏參革職。當以鄒學鏞怙愆貽誤。情罪較重。特降旨改為革職發往新疆效力贖罪。恩麟何得以差委需人。輒請將該革員留於甘肅隨營差遣。實屬冒昧。且此等革員留之有何裨益。所請著不准行。○諭議政王軍機大臣等。恩麟奏大兵攻克平涼收復瓦亭東路現就疏通。亟須籌辦西北各情形。一摺。雷正綰等攻克平涼後。餘賊竄入瓦亭峽城內。復經官軍奪其要隘。賊匪北竄。自應乘勝進兵。節節掃蕩。前據都興阿奏督飭杜

嘎爾帶領派出各軍。由石嘴山渡河。繞赴甯夏。而雷正綰自攻克平涼後。一切進兵情形。未據入奏。現在甯夏靈州一帶。匪聚而平涼瓦亭兩處敗賊。又盡數北竄。勢蹙愈張。必須南北兩路大軍。會合夾擊。方可制賊死命。又恐賊匪乘虛西竄。則中衛正當其衝。該處一片孤城。僅有梁生嶽所帶兵勇駐紮。為數無多。恐不足恃。且靖遠又有續到之陝西回目黑牙古赫明堂等。帶領數萬之眾。具稟

乞撫此輩人數過多。勦撫均屬不易。設或包藏禍心。計圖一逞。其患尤不可勝言。著都興阿迅飭杜嘎爾等渡河之軍。由北而南。節節進擊。雷正綰移平涼得勝之師。取道北攻。會合都興阿派出各軍。實力狙擊。立掃狂氛。迅克甯夏漢城。立解甯夏滿城並平羅之圍。並飭陶茂林繞過西面。駐紮中衛靖遠適中之地。約會南北兩軍。併力兜擊。兼防甯靈賊匪西竄之路。黑牙古等率眾乞撫。既據該護督

稱其人數太多。安插不易。即著飭令楊炳鏗暫示牢籠。隨時防其中變。毋稍疏虞。並著雷正綰到後。斟酌情形。妥籌辦理。毋貽後患。將此由六百里諭知都興阿。雷正綰並傳諭恩麟知之。○以正藍旗滿洲都統瑞常兼署鑲黃旗滿洲都統。○以兵部左侍郎曹毓瑛兼署吏部右侍郎。戶部左侍郎吳廷棟兼署刑部右侍郎。○壬子。諭內閣。前諭曾國藩將江甯首逆洪秀泉判屍梟示。並將生擒之逆首

李秀城洪仁達二犯檻送京師。茲覽曾國藩奏各將士於六月二十七日。在偽宮內掘出洪秀泉逆屍。經該大臣等驗畢。戮屍焚毀。該逆雖逃顯戮於生前。難免極刑於身後。亦足以大快人心。其李秀城被擒時。各營降卒及附城居民。人人皆識。並據歷供。髮逆始末甚為詳悉等語。李秀城洪仁達二犯本擬解京訊明處以極刑。惟此等跳梁小丑。本無所用。其獻俘且恐沿途派兵遞送。騷擾驛傳。重累

吾民既據供認明確。著曾國藩無庸派員解京。卽於江甯省城將該二犯凌遲處死。並傳首髮逆所到各省。以申天討而儆兇頑。○諭議政王軍機大臣等。曾國藩奏訊取洪李二逆供詞。就地正法。並籌辦善後一切事宜。一摺。洪荏達、李秀城二逆。前雖有旨解京。惟此等內地叛民。本與獻俘之例不合。且究非洪秀泉可比。該大臣於訊明後。卽在江甯省城將該二逆極刑處死。免致沿途騷擾地方。所辦甚是。惟京外皆知二犯解京。茲忽中止。恐觀聽不明。轉生疑竇。且恐各處逆匪因而造言煽惑。故本日明降諭旨。令該大臣將二逆就地正法。著該大臣仍將洪李二逆首級傳示被擾地方。以快人心而息浮議。仍著該大臣將李秀城供詞及奪獲偽印等物。齎送軍機處備查。逆擄金銀朝廷本不必利其所有。前據御史賈鐸具奏。故令該大臣查明奏聞。今據奏稱城內並無賊庫。自係實在情形。惟

帑藏空虛。兵餉匱竭。而善後應辦之事尚多。應如何籌策萬全之處。該大臣仍當悉心經畫。此時回安慶一次。布置上游軍事。曾否啟行。俟八九月間。仍須回駐金陵。籌辦一切事宜。彼時曾國藩溼疾諒可全愈。卽遵前旨。令與彭玉麟分駐九江、安慶。以固長江門戶。至裁撤兵勇一節。雖為節餉起見。然驟撤至三四萬人。恐此輩久在戎行。不能省事。必致隨處嘯聚為亂。從前川楚善後。積至數年方始肅清。可為殷鑒。不若先汰老弱。而以精壯各軍分赴江楚。俟江楚一律肅清。再議裁撤歸農。或挑補各營兵額。俾不致復生枝節。方為盡善。該大臣其慎以圖之。李臣典開挖地道。得竟全功。前已錫之子爵。今聞遽因傷病身故。殊堪痛惜。著該大臣將該故員生平功績戰略。及此次因傷致病各情形。詳悉具奏。再降諭旨。褒卹。將此由六百里諭令知之。○又諭楊岳斌、沈葆楨奏會勦崇仁、埽平賊壘一

招崇仁逆股在城外添築賊壘。江忠朝一軍擊其左席寶田一軍擊其右。左右兩路之賊皆潰。該逆繞竄潘橋秀才埠一帶。城賊傾巢攻撲。席軍營盤均經官軍擊敗。乘勝攻破賊卡十餘處。礮中偽王宗李元茂左肩。立平四壘。官軍現在進攻崇仁附城賊壘。著楊岳斌、沈葆楨激勵將弁。乘勝蹋平逆壘。迅將崇仁克復。殲滅侍逆巨股。以次進剿。肅清各路之逆。康逆聚悍黨於許灣。以為崇仁聲援。並著

檄令鮑超由撫州先剿許灣。以孤賊勢。王沐即移紮崇仁豐城之交。以固江慶兩軍後路。本日曾國藩奏。由金陵仍回安席料理上游軍事。前諭該大臣等。江省如陸軍單薄。將金陵陸師酌量調派。著曾國藩悉心籌畫。如須添兵赴江協剿。即著迅速調撥。以厚兵力。將此由六百里各諭令知之。○又諭前因甘省軍務緊急。餉需告匱。諭令劉蓉張集馨將陶茂林等軍餉項軍火實力籌解。並令劉蓉明

定章程。將該省每月究竟能協若干兩奏明。報解。茲據文煜奏。稱雷正綰營月餉軍火。陝省從未解過。陶茂林營軍火。昨准該提臣轉接。陝西撫臣咨令向慶陽糧臺支取。都興阿又來慶催提餉銀軍械。其陳天佑步隊。西蒙克西克等馬隊各營需用餉糈軍火鍋帳。甚急。是陝省於各該營並未力籌接濟。嗣又接陝西撫臣咨陳天佑兩營應需軍火帳房。以後改由慶陽糧臺籌撥。甘省餉項奇窘。各路

協餉任催。罔應。且慶陽地處偏僻。布匹硝磺等項必須分赴遠省採辦。現在供支都與阿雷正綰等營能否無誤。尚無把握。若將陶茂林等軍再由慶陽糧臺供給。貽誤即在目前。請飭陝西照舊供支等語。陶茂林等軍餉糈軍火疊次諭令陝西巡撫力籌報解。不啻三令五申。乃劉蓉於甘省緊要軍需一味推諉。遷延並不認真籌畫。若因餉項不繼致甘省全局決裂。該撫自問當得何罪。著劉蓉懍遵

疊次諭旨將陶茂林陳天佑西蒙克西克金順各軍所需餉項軍火帳房等件仍由陝西糧臺照舊供支俟甘省協餉陸續解到再由慶陽糧臺支放其每月究竟能協甘省餉銀若干兩並著劉蓉懷遵前旨明定章程迅速具奏儻再任意諉卸致誤戎機惟劉蓉是問著文煜將各省應協餉項趕緊催提以資接濟將此由六百里各諭令知之○以戶部歷年籌撥軍餉出力予郎中林述訓等加銜升

敘有差○以貪酷虐民四川已革知縣魏元燮遣戍新疆不准援免○以湖北捐輸軍餉永廣鄉試中額二名○予江西崇仁陣亡都司何啟山等祭葬世職加等○癸丑中元節

上詣

奉先殿

壽皇殿行禮○遣官祭

永陵

福陵

昭陵

昭西陵

孝陵

孝東陵

景陵

泰陵

泰東陵

裕陵

昌陵

昌西陵

慕陵

慕東陵○遣官祭

文宗顯皇帝

孝德顯皇后暫安寢殿○遣官祭

端慧皇太子園寢○諭議政王軍機大臣等

左宗棠奏攻勦湖郡安吉踞逆疊次苦戰尚

未得手現籌辦理情形一摺據稱賊在思溪

雙福橋等處築壘蔡元吉東半營盤被圍屢

次猛撲未能得手。蔣益澧親抵菱湖。會合諸軍進剿。飭李邦達等營攻思溪。高連陞等攻雙福橋等處。逆壘分隊進逼。吏番疊戰。該匪鼠伏不出。官軍頗有傷亡。左宗棠現調省城防兵。令副將徐文秀等水陸往救。並據報稱金陵逃出之偽幼主洪填。幅於六月二十一日由東壩逃至廣德。二十六日堵逆黃汶金迎入湖州。為號召賊黨之計。等語。蔡元吉一營孤懸東華。逆賊圍之數重。該營糧已垂盡。

而士氣不衰。亟應乘勝合擊。以解重圍。洪填幅諒即洪幅瑱。昨據曾國藩奏。洪幅瑱積薪自焚。茫無實據。似已逃出偽宮。李秀城供。曾經挾之出城。後始分散。其為逃出已無疑義。湖熟防軍所部斬殺淨盡之說。全不可靠。著曾國藩查明。此外究有逸出若干。並將防範不力之員。弁從重叅辦。此犯已至湖州。必將號召羣逆為久踞之計。左宗棠正可督飭蔣益澧等。令其激勵各軍。許以重賞。果能一鼓

攻拔。將洪逆及諸逆等悉數殲除。則東南全就肅清。朝廷必當破格施恩。若遷延日久。或令他竄。亦必重治其罪。不能因前曾立功。稍從寬貸也。楊昌濬攻安吉之師。既不得手。著即令其先攻梅溪。並著李鴻章督飭派出各軍力攻四安。以分賊勢。前派往金陵之礮隊等一萬餘人。俱係精銳。或派往四安。或分赴廣德。均可期其得力。該撫向來不分畛域。左宗棠亦非妒功忌能之人。即著李鴻章督令

諸將弁認真助剿。以收廓清之效。並一面分兵嚴防湖賊旁竄各路。廣德地屬數省衝要。歷代規取吳興。多由於此。從前各路無兵可分。是以未能派兵駐守。以致偽幼逆及黃汶金等往來無阻。現在江甯得勝兵將甚多。昨據曾國藩奏。述李秀城供內。有廣德不攻自遁之語。可見廣德現在並非無賊。著曾國藩多撥精銳。派得力將弁統帶赴廣德攻剿。如賊已遁去。亦即力遏要衝。以免湖逆出竄。皖



南為江西後路之患。左宗棠、李鴻章均應設法兼顧。嚴密兜圍。毋令旁竄。江西兵力此時亦已厚集。李侍賢注海洋諸逆。不得逞志於江西。則將遁入浙閩。與湖州踞逆相首尾。且聞洪幼逆尚在。難保不圖死灰復燃。楊岳斌、沈葆楨亦當督飭諸軍。妥慎防剿。均須各就本地盡力勦除。俾東南諸郡全就蕩平。以副委任。將此由六百里各諭令知之。○又諭恩麟奏鹽固逆回。北竄甯靈。滋擾中衛。靖遠二

縣暨撒回。句結占踞循化廳城。番賊節次闖入馬廠搶掠馬匹各一摺。甘省鹽茶固原回逆糾眾三四十人。於五月二十五六等日竄至靈州所屬之同心城。旋分股竄撲中衛縣屬之甯安恩和等堡。與甯郡回逆句連一氣。擬將各地麥田搶割後。分走花馬池中衛縣拒敵官軍。其陝西臨渭之賊亦連日焚掠鹽固四鄉。並靖遠北山後一帶。前次率眾乞撫之回目黑牙古等亦聞風煽動。傳知河州東

鄉回匪欲為應援。賊情甚屬狡悍。現在中衛靖遠各要隘防兵不及千名。中衛係四達要衝。靖遠為甯靈等處入省咽喉。省城兵力亦單。防剿均關緊要。雷正綰所部各軍兵數較多。能否酌留數營歸陶茂林管帶。勦辦南路張家川股匪。其餘各營即由雷正綰統帶。星速馳赴蘭州。慎固省防。妥籌分布。或酌派勁旅分扼中靖各要隘。或督率各部擇緊適中地方兼籌戰守。並著都興、阿雷、正綰相度機

宜妥商辦理。都興、阿所統諸軍已漸入甯境。如未能分兵南顧省垣。即專力規復甯夏漢城以牽賊勢。恩麟仍當嚴飭梁生嶽等就現在兵力扼守中衛。靖遠各隘。毋令賊勢復行。煽結僮再有疏虞。必將該員弁從重治罪。循化廳屬街子等上四工撒拉與城內寄居之保安逆回潛行句結。襲撲廳城。護參將陝成英等拒戰受傷。擁護難民出城。旋致城垣失陷。恩麟現調洮州。卓泥土司楊元等壯健番

土兵丁分扼關隘。進襲撒巢。卽著催令同知吳鼎元迅速赴任。與陝成英號召附近良撒。會同番土各兵。力圖克復廳城。並著玉通酌派精銳弁兵。協力助剿。毋得稍分畛域。至清水工等下四工撒拉。自稱願隨官軍助力。是否出於至誠。前據恩麟奏稱。回目黑牙古率眾乞降。此次回擾甯靈。黑牙古卽行煽變。可見若輩詭詞求撫。毫不足恃。惟下四工撒拉等現既安靜如常。總當飭令陝成英等妥為

撫馭。嚴密防維。毋令踞城撒匪。得以乘閒簧惑。至涼州鎮屬平羌口等處。疊有番賊闖入內地。將孳生牧廠營馬。先後搶去多匹。該處防卡弁兵。未能加意周防。實屬疏懈。著恩麟嚴飭遊擊楊逢春等。嚴密緝捕。隨時偵探。毋任再行闖入牧廠。並查明各隘口。疏於防範之營弁。一併交部嚴議。將此由六百里諭知都興阿。雷正綰。玉通。並傳諭恩麟知之。○又諭恩麟奏接准吐魯番領隊大臣咨稱。該城

所屬之托克遜漢回變亂。請將伊犁前調甘肅官兵兼程應援。並准哈密辦事大臣咨稱。吐魯番回匪滋事。哈密存兵無多。請催令伊犁前調官兵星速前往甘肅剿辦。回逆兵力不敷。實屬無可抽派。請飭科布多等處撥兵援剿等語。吐魯番所屬之托克遜漢回變亂。究竟因何啟釁。及現在情形。何以未據榮慶入奏。此時伊犁南路之庫車回匪方熾。而該城地方又復起事。若不迅圖撲滅。新疆各城

均係漢回雜處。誠恐聞風響應。滋蔓難圖。惟甘肅兵力本單。萬難分撥。前據常清奏。該省省兵五千名。往援庫車。已將甘省情形。諭知該將軍妥籌另調。現在吐魯番回匪滋事。城小兵單。需兵孔亟。著麟興。車林。敦多布。廣鳳。奎昌。各於烏里雅蘇台。科布多。二城。屯防。漢蒙古兵內酌撥勁旅二三千名。卽日取道北路。星馳前往。實力援剿。以期便捷。並著保恆另行籌調官兵。設法援應。疏通道路。一面將

哈密防務豫為籌備。毋稍疏虞。榮慶現權邊寄。當此陝甘庫車回氛未靖。尚復毫無準備。該員平日所司何事。著卽就存城兵勇。分別良莠。速籌勦辦。儻任該逆蔓延。惟榮慶是問。伊犁等處遣勇。從前隨勦回疆。頗稱得力。卽著常清平瑞各於所管遣犯內。揀選精健可用。遣勇各數千名。聽候調撥。一面偵探該城賊勢。迅籌援勦。毋得張惶坐視。致誤戎機。將此由六百里各諭令知之。○護陝甘總督恩

麟奏軍務未平。請將甲子科武闈鄉試暫緩舉行。允之。○以工部歷年辦理軍械出力。予郎中錫光等升敘有差。○以甘肅涇甯二州堵勦竄匪出力。賞知州林發深等花翎。擢知縣李超羣以知府用。○以甘肅平羌口等處失防。牧馬被搶。遊擊楊逢春等下部議處。○以甘肅循化廳城被匪竄陷。革護參將陝成英職。仍戴罪效力。署同知吳鼎元等下部議處。子傷亡訓導何雲翹祭葬世職。○予浙江

湖州陣亡參將朱尊賢祭葬世職加等。○甲寅諭內閣。吳廷棟奏金陵告捷。尤宜益加敬懼。一摺。據稱治亂決於敬肆。敬肆根於喜懼。從古功成志遂。人主喜心一生而驕心已伏。宦寺乘此喜而貢其諂媚。左右因此喜而肆其蒙蔽。容悅之臣。屏逐之奸。卽由此工其諛佞。巧其夤緣。於是受蠱惑。塞聰明。惡忠讜。遠老成。戒懼之念。一喜敗之。侈肆之行。一喜開之。歷稽史冊。無不因憂勤惕勵而致治。驕矜侈肆而肇亂者。請始終敬懼。持之以恆。永固長治久安之基等語。前因江甯克復。各路餘氛仍熾。曾明降諭旨。令內外大小臣工。兢惕為懷。勤思職業。不得以捷書適至。謂海內業已承平。因而宴安廢弛。茲覽吳廷棟所奏。於萬方之治亂。百官之敬肆。皆推本於君心之喜懼。剴切敷陳。深得杜漸防微之意。軍興以來。十數省億萬生靈。慘遭鋒鏑。卽倡亂之民。何莫非朝廷赤子。大兵所至。悉被誅夷。言念

及茲良堪矜憫。即使天下已治已安。猶當兢  
兢業業。慎益加慎。矧江楚等省。餘孽未靖。新  
復地方。瘡痍滿目。一切防勦撫綏。正須悉心  
經理。朝廷宵旰焦勞。無日不以冀民生培國  
脈為念。斷不因東南漸就蕩平。稍涉滿假。第  
敬肆之幾。萌於一念。惟當戒慎恐懼。朝夕乾  
乾。期於上下交儆。慎始圖終。中外臣工。亦當  
體朝廷兢惕之心。各矢忠赤。共濟時艱。於吏  
治民生實力籌畫。務策萬全。以期海寓乂安。

閭閻樂業。有厚望焉。吳廷棟摺。著交弘德殿。  
用資省覽。○正白旗蒙古副都統花凌阿。因  
病乞休。以理藩院右侍郎額勒和布兼正白  
旗蒙古副都統。前烏什辦事大臣奕慶署鑲  
黃旗漢軍副都統。○以鑲白旗蒙古副都統  
孟保署正白旗護軍統領。○以江蘇揚州水  
師節年防堵出力。賞總兵官魏麟彪副將吳  
奇勳參將劉連升。巴圖魯名號。守備張禮榮  
等花翎。同知羅家濤等藍翎。餘加銜升敘。有

差 予江蘇軍營病故副都統德明祭葬卹  
廕 乙卯

文宗顯皇帝三周年忌辰。遣豫親王義道詣  
暫安寢殿恭代行大祭禮。

上詣

奉先殿行禮。詣觀德殿。

聖容前供奠。○諭議政王軍機大臣等。據都察  
院奏山東在籍遊擊常啟霽呈控荷澤縣著  
名惡監王克一。本係李燦漳叛時謀主。潛匿

直隸東明縣境內。近來頗不安分。唆訟陷人。  
聚眾築寨。詭詐多端。伊長子王墀當時為賊  
耳目。次子同田。三子藍田。為賊千長。又藉前  
為捻頭之王峰為羽翼。並將該遊擊之次子  
常國泰。偪入夥中。其族姪常國棟。現署城武  
把總。曾因私圖財物。從匪遠颺。請飭查拏等  
語。直隸山東毗連州縣。久為匪眾出沒之區。  
現在兩省已就肅清。猶恐餘孽潛藏。積久生  
亂。若如該遊擊所控。是王克一等漏網之後。

愈逞強橫並有助逆縱匪之人如果屬實大為地方之害著劉長佑閻敬銘密派委員分往查拏按名弋獲懲辦毋任逃匿其所稱清查各寨參以保甲之法不令書役與匪徒潛通消息所言是否確鑿並著妥籌辦理原呈著摘鈔交給閱看將此各諭令知之○盛京將軍玉明等奏遵議揀員籌餉統兵督緝章程得旨著照所擬隨時實力整頓以期吏治捕務日有起色所請揀發各省保奏人員一

節著候旨行○河南巡撫張之萬等奏移營汝郡前敵已抵麻城並圍練大臣毛昶熙來汝會捕得旨馮灣等處匪著督飭趙鴻舉等實力挖捕其招墾荒地訓練營兵各事宜均著妥為經理以收實效○丙辰諭議政王軍機大臣等喬松年奏馳抵壽州並赴正陽關察看形勢現擬仍駐壽州派朱淮森兩營扼紮正陽蔣凝學進紮英山張德勝防守六安等語湖北之賊現膺聚羅田麻城一帶或

由英霍或由固始商城入皖均難豫料該撫既以壽州形勢甚便並可兼顧正陽即著駐紮壽州將所部各營勤加教練仍一面多發偵探視賊趨重何路即由何路進剿並飭朱淮森蔣凝學等軍分扼要隘嚴密堵剿毋稍疏虞一切戰守機宜仍隨時咨商僧格林沁妥籌辦理另片奏李世忠部下記名總兵陳玉安於散勇應領鹽斤扣留不發以致眾勇不服該總兵竟商同副將劉同盛將勇丁王

在綸等三人殺而埋之廟中似此膽大妄為實屬大千軍令陳玉安劉同盛均著即行革職並著喬松年飭屬將陳玉安一犯嚴拏務獲與劉同盛一併嚴審按律懲辦至李世忠遣勇不下數萬朝廷正慮其滋事如該革員等任意剋扣勇丁兼敢逞兇殺害勢必激成事端著喬松年嚴密訪查如再有此等劣員即行從嚴參辦毋稍姑容將此由四百里諭令知之○又諭徐宗幹奏臺灣官軍攻克彰

化小埔心賊壘。生擒渠逆。平毀匪莊。曾元福。丁曰健各奏生擒陳啞狗。並獲偽太子戴能。戴如川。及股首張三。瀨等多名。沿海賊莊。俱已肅清。等摺。曾元福。勦除小埔心賊壘。將陳啞狗等殄除。尚未迅速。惟洪機等皆係著名巨匪。現在逃往何處。裹脅人眾。當亦不少。各摺均未言其下落。著左宗棠。徐宗幹。嚴飭曾元福。丁曰健等。上緊緝拏。務獲免致再行勾結。生事。彰化餘匪。仍著曾元福認真搜捕。各

屬招集流亡。安撫良善。著該鎮道會同妥辦。林天河在籍逞強。橫行無忌。丁曰健有地方之責。應行隨事裁抑。不得任其魚肉鄉里。大為閭閻之害。徐宗幹另摺奏浙省平陽會匪。潛赴福甯窺伺圖擾。經署福甯鎮鍾寶三等拏獲多名。審明正法。並據報溫處道周開錫已由郡帶兵勇前赴平陽泰順一路搜捕。並經平陽縣余麗元等獲犯多名。而股首尚有未獲餘犯。亦未盡殲除。著左宗棠。徐宗幹。嚴

飭周開錫。鍾寶三等。督同府縣紳董。嚴密查拏。務將股首趙辛。卽趙阿虎。及在逃之陳田。壁等犯。按名弋獲。不准任其漏網。致貽後患。將此由六百里各諭令知之。○又諭丁曰健。奏署陸路提督林文察。於破林巢後。安住家園五十餘日。頓兵不出。兼有肥叔。林天河倚勢作威。眾議沸騰。又協勦陳逆。未能攻克。在彰逗遛月餘。勦匪事宜。竟置不問。又與署水師提督曾玉明。紮營彰城。兵勇騷擾。紳民怨

恨。離心等語。林文察等以專閫大員。當此軍務喫緊之時。宜如何振刷精神。激勵將士。若如該道所奏。節次頓兵逗遛。縱勇滋擾。實屬大負委任。著左宗棠。徐宗幹。確切查明。如實有前項情事。卽著嚴行叅辦。毋稍徇隱。原摺著摘錄鈔給閱看。將此各諭令知之。○福建巡撫徐宗幹。奏遵查護汀州鎮總兵官趙連。尚無畏蕙情形。惟甯化失陷。應請革職。得旨。趙連著革職留營效力。如再不知奮勉。卽行

從重治罪○命翰林院編修平步青林天齡  
在上書房行走○以福建攻克小埔心賊巢  
生擒首逆賞同知凌定國都司林文光花翎  
團首張清華等藍翎餘升敘有差予陣亡團  
首羅冠英建立專坊○以福建延平汀州剿  
匪出力賞知州薩保都司祝鑑嵩花翎縣丞  
蕭仲芳等藍翎餘升敘開復有差予陣亡外  
委陳興等三十一員祭葬世職○丁巳諭議  
政王軍機大臣等馮子材魁玉奏江南軍務

大定請將鎮防兵勇七千人全行凱撤至江  
防重地俟全軍遣散後或由曾國藩等派兵  
駐守等語所籌自係為節省經費起見現在  
京口一城自無須重兵扼紮惟江甯新復廣  
德湖州之賊尚未勦平金壇等處防兵應否  
酌留一二營以資彈壓其裁撤勇丁或擇其  
精壯可用者即以挑補該省綠營兵額之處  
著曾國藩李鴻章與馮子材等會商妥籌辦  
理至軍營遣勇關繫至要馮子材等務當飭

令統帶各員分起彈壓妥為資遣不准沿途  
逗遛致滋事端另片奏甘肅西甯鎮總兵黃  
武賢陝西延綏鎮總兵陶茂森懇請開缺回  
籍養親等語該二員平日帶隊尚稱得力現  
在陝甘軍務亦尚未竣當此用人之際殊難  
遽允開缺致投閒散惟念其從征十餘年情  
殷將母詞意懇切黃武賢陶茂森均著賞假  
兩箇月回籍省親無庸開缺一俟假滿即行  
各赴新任以重職守將此由五百里各諭令

知之○又諭都興阿奏官軍渡河勦賊獲勝  
攻克姜家村等賊巢進攻寶豐雷正綰奏通  
籌布置會攻張家川鹽固回匪投誠各摺片  
都興阿派撥各軍由草地繞出石嘴山渡河  
援剿疊獲勝仗賊向寶豐遁去杜嘎爾督軍  
追剿攻克姜家村紅柳堡兩處賊巢現在檄  
催平羅縣趕造雲梯乘勝進攻寶豐縣城即  
著都興阿督飭杜嘎爾等所部奮力攻剿迅  
拔寶豐將賊氛次第掃蕩進規甯夏漢城現

在金陵奏捷。擬將兵勇酌量裁撤。或調赴各營助剿。都興阿久在揚防。從前所部將弁兵勇得力者。諒復不少。如兵力尚覺單薄。即可咨明曾國藩等酌量調撥赴甘。以利攻剿。雷正綰自攻拔平涼平毀固原瓦亭驛賊卡後。與陶茂林等商會軍進攻張家川賊巢。以期堵制鹽固等處竄匪。疏通驛道。兼顧省垣。所籌均尚周妥。現已疊獲勝仗。將張家川木城攻拔。殲除悍逆多名。即著督飭各軍會同陶

茂林所部合力環攻張家川土城。迅圖克拔。進剿龍山鎮蓮花城等處。以期次第肅清。前據恩麟奏稱。鹽固逆回竄撲中衛等境。該二處回民既已投誠。何以復行出境滋擾。並著都興阿雷正綰飭令署臬司楊炳銓等慎密防維。妥為撫馭。固不可激之生變。牽掣我軍。亦不可墮彼狡謀。致誤全局。隆德靜甯在防諸軍。並由雷正綰妥為布置。俟攻克蓮花城等賊巢後。隨時詳察機宜。與都興阿妥籌辦

理中衛靖遠各要隘。並蘭州省垣兵力均單。都興阿雷正綰仍懍遵前旨。妥籌兼顧。毋稍疏虞。將此由六百里各諭令知之。○又諭都興阿奏官軍渡河剿賊獲勝一摺。據稱杜嘎爾率領前敵各軍。由草地繞由石背山渡河。進援甯夏。深入數百里。尚能以少勝眾。惟軍火糧餉未能接濟。慶陽糧臺僅撥銀五十兩。軍火鍋帳等項尚不敷用。此時無論各員鹽折零星雜費無出。即杜嘎爾前敵各營食米。

亦由訥欽營內協餉。湊那千兩。採辦小米。以資濟運。以三千數百馬步。不足十日之糧。各屬籌辦米麵。僅據定邊解到小米一百餘石。實屬籌辦無方等語。甯夏軍情。望援已久而都興阿進兵之際。各營軍火餉糈竭蹶。至於此極。該士卒荷戈枵腹。豈能責以成功。且杜嘎爾等馬步各軍。業已渡河。逼近賊巢。設使餉糈不繼。則孤軍深入。腹背受敵。貽設豈堪設想。著沈桂芬無論何款。先行籌撥銀數萬



兩迅速委員解赴慶陽糧臺以資接濟該省於甘省餉需尚能竭力籌畫惟當此軍情緊要尤當妥速籌解以濟急需陝甘唇齒相依疊經有旨令劉蓉力籌協濟該撫豈能坐視並著劉蓉隨時設法籌濟毋得稍分畛域致誤事機文煜專辦甘省糧臺責無旁貸亦當悉心籌策以贍飢軍著即咨行協甘各省派員迎提並於山陝協項解到時迅即提解都興阿軍營以利軍行而維大局將此由六百

里各諭令知之○又諭保恆奏漢回變亂擾害地方並省垣不靖大概情形一摺據稱奇台地方漢回械鬪大股回匪雖已剿除恐仍糾眾報復古城漢回於六月二十日夜變亂放火鋪戶延燒殆盡滿營兵單調回在奇防堵官兵並知會文光督勇合剿再月之十七日有差兵由烏嚕木齊回營據稱派赴庫車救援官兵內逃回滿兵一名報稱官兵行至喀喇沙爾所屬之烏什塔拉戈壁突遇回匪

官兵被害等語烏垣漢回聞風變亂該差行至距城五六里之紅山嘴地方遙見漢城火光大起居民紛竄保恆專差偵探旋據回稱阜康迤西俱有回匪阻攔道路不通等語覽奏實深詫異各城回匪多有變亂保恆現署古城領隊大臣何以任聽匪徒聚眾放火延燒民房鋪戶甚多而先事毫無準備現雖將賊擊退仍恐復有變亂必須嚴密防維所有派往奇台防堵之滿漢官兵即著調回並飛

速知照文光令其督率民勇速到古城合力痛剿以清餘孽濟木薩派來防堵官兵並准留古城以資得力奇台餘匪未清仍著保恆酌量留兵防剿前據平瑞業布冲額各奏遣勇朱小潰謊報軍情以致烏嚕木齊城外軍民回漢人等慌亂旋將朱小潰正法人心安定等情當經諭令該都統等將內外居民加意撫綏茲據保恆奏稱所探各情似在該都統等奏報以後是否仍因前此謊言致有訛

傳抑係後來復有變亂現在烏魯木齊情形若何未據平瑞等續有奏報著平瑞業布冲額速將烏城實在情形趕緊馳奏以慰懸繫文祥應援庫車現已行抵何處並著探訪烏城情形迅速具奏新疆各城紛紛構釁常清為諸城領袖亟應多設偵探以期聲息相通其已亂之處應如何調兵勦辦未亂之處應如何豫防釁端均係該將軍分內應辦之事豈能莫展一籌任令匪蹤蔓延著即迅速設

法妥籌辦理以靖邊圉喀喇沙爾有僻路可通烏城南山一帶恐有匪徒暗中勾結著依奇哩認真防範毋稍大意保恆摺內所稱派赴庫車官兵內逃回一名報稱官兵行至喀喇沙爾所屬之烏什塔拉戈壁突遇回匪官兵被害等語殊未明晰究竟回匪如何滋事官兵被害幾人現在道路有無梗阻著依奇哩查明具奏將此由六百里各諭令知之○又諭張凱嵩奏越南例貢屆期據情代奏並

密陳南太兩郡尚有梗阻可否照業暫行展緩各摺片越南國王阮福時因現屆乙丑例貢之期請將上二屆丁巳辛酉兩貢一併恭進具見誠惻亟應行令依期入貢以遂其愛戴之忱惟張凱嵩所陳左江南太兩郡道路尚多梗阻繞越無從自係實在情形已照該撫所請准其暫行展緩矣越南國例貢業經三屆展緩恐遠人或生觖望著張凱嵩於軍務完竣道路流通之時即行奏明請旨無庸

遲至下屆例貢之期始行令其併進並由該撫宣布朝廷德意俾該國王知悉以示體恤將此諭令知之○以刑部左侍郎靈桂署戶部左侍郎管三庫事○以內閣學士桂清兼正紅旗滿洲副都統散秩大臣果勒敏署正白旗漢軍副都統前任烏魯木齊領隊大臣慶至署鑲紅旗滿洲副都統○追予江南江甯陣亡守備李鳴和史紀忠祭葬世職○豁免河南陝靈寶閿鄉三州縣被兵地方車戶

應賠麥糧○戊午以兵部歷年督辦驛傳諸務出力予郎中慶愛等加銜升敘有差

大清穆宗繼天開運受中居正保大定功聖智誠孝信敏恭寬毅皇帝實錄卷之一百九

大清穆宗繼天開運受中居正保大定功聖智誠孝信敏恭寬毅皇帝實錄卷之一百十

臣等楊岳斌沈葆楨奏官軍克復崇仁縣城大概情形暨攻克東鄉摺片諒詳細戰狀已奏報在途矣江忠朝等軍疊次偪攻崇仁埽清城外賊壘茲於七月十一日攻克縣城據稱賊向宜黃一路遁走著即督飭各軍乘勝追剿迅克宜黃等城節節掃蕩侍逆李侍賢現在竄往何處務須探明蹤跡併力追擊就地殲除毋令免脫鮑超駐師許灣勦辦康逆一股是否業經得手崇仁既克賊氣已奪想

教修

同治三年甲子七月己未諭議政王軍機大

臣等楊岳斌沈葆楨奏官軍克復崇仁縣城大概情形暨攻克東鄉摺片諒詳細戰狀已奏報在途矣江忠朝等軍疊次偪攻崇仁埽清城外賊壘茲於七月十一日攻克縣城據稱賊向宜黃一路遁走著即督飭各軍乘勝追剿迅克宜黃等城節節掃蕩侍逆李侍賢現在竄往何處務須探明蹤跡併力追擊就地殲除毋令免脫鮑超駐師許灣勦辦康逆一股是否業經得手崇仁既克賊氣已奪想

該提督必能與江忠朝等軍聯絡一氣盡殲醜類東鄉克後踞逆有無逃竄著楊岳斌沈葆楨查明具奏並卽檄令周寬世等軍認真搜捕進規金谿力圖攻拔毋稍鬆勁皖南一帶防剿最關緊要著楊岳斌懍遵前旨妥籌兼顧毋稍疏虞將此由六百里各諭令知之○山東巡撫閻敬銘奏拏獲沂州府屬匪首杜鴻儀等正法得旨所辦甚妥仍著督飭所屬認真搜捕餘匪以靖地方予山東堂邑

陣亡生員楊鳴謙祭葬世職如府經歷例並建專祠陣亡團丁一併附祀予山東臨清殉難紳民婦女一萬六千三百七十二名口分別旌卹如例○緩徵山東博興縣被雹村莊新舊額賦○庚申諭內閣戶部奏蠲免錢糧已輸在官准流抵次年應完正賦則例所載防弊本極周詳無如各州縣積習相沿機詐百出或停閣蠲免詔旨先期催追或藉無流抵明文闖入私橐卽或業戶中偶請示遵

而官吏胥差互相聯絡游詞飾說巧為欺蒙倚勢作威肆其侵蝕故遇免徵之年追呼不已已輸之賦扣抵無期是以歷屆蠲免難需實惠卽如本年四月蠲免江屬諭旨有流抵字樣正月初二日蠲免蘇屬諭旨無流抵字樣載與不載厥例維均恐小民無知或啟猜疑之竇官吏藉端影射巧索強取請申明定例嚴防弊端等語向來蠲免省分其全年蠲免先期輸官者准其流抵次年應完正賦其

蠲免定有分數先期全輸在官者除應徵分數外餘應蠲免分數亦准下年扣抵立法至周乃近來不肖官吏因緣為奸致小民踴躍輸將反飽貪殘囊橐上行其惠下屯其膏喪心昧良莫此為甚嗣後各省官吏如再有隱匿謄黃蒙混流抵各項弊端著各該省督撫大吏查明嚴叅按照侵盜錢糧律治罪並著刊刻謄黃徧行曉諭以後遇有蠲免年分著永遠將此旨一併刊刻宣示仍著戶部查照

從前例案通行各直省以期實惠及民毋資中飽將此通諭知之。諭議政王軍機大臣等恩麟奏勦辦河州回匪獲勝請飭馬德昭赴省帶兵都興阿駐紮省城並番兵助勦情形各摺片狄河回逆勾結撒拉回匪紛擾河州與河北之川城馬營等處回族互相犄角經趙必達率領果義軍進勦連戰皆捷並將川城賊巢平毀而馬營賊勢甚張竟勾結河南撒匪直撲周玉超營盤縱火延燒以致營

盤失守三座陣亡營官及勇丁多名是該逆並未大受懲創官軍亦並未能手現在河州逆匪盤踞如故南岸之賊復將偷渡助援馬營逆勢尚形聯絡而果義軍與河州官軍聲勢中梗亟應迅籌勁旋早殄逆氛著恩麟一面添調兵勇一面檄飭河州文武督率番兵嚴密堵勦並飛飭趙必達迅將馬營之賊實力勦除以次肅清河狄務使南北兩岸之賊不得聯為一氣庶辦理易於得手買吾剛

拭多哈各族番丁助勦甚為得力並拉布浪火力藏等番族已到土門關勦賊斃匪甚多深堪嘉尚惟該番丁等均係裹糧隨征必須資其飽騰方可得其死力著恩麟將一應口糧犒賞之需妥為接濟並加意激勵籠絡俾樂為用馬德昭前已諭令赴僧格林沁軍營差遣勢難再赴蘭州都興阿進勦甯夏前敵業已深入亦難駐紮省垣惟根本重地兵力較單著都興阿雷正綰懷遵前旨妥籌兼顧

恩麟暫權督篆責無旁貸仍當就現有兵力妥籌戰守不准意存諉卸致誤事機肅州回匪馬受海聚眾謀變該地方官勦捕尚為迅速本日已明降諭旨將出力各員照所請獎勵回練馬添才經該匪約為內應當即入城稟報尚屬深明大義已將該練賞給六品頂帶以示嘉獎著恩麟仍飭在事各員將在逃之匪李城包大漢二名嚴拏務獲以靖地方將此由六百里諭知都興阿雷正綰並傳諭

恩麟知之。又諭景綸麟瑞奏俄酋欲至吉林理阻不服一摺。據稱俄官石沙木勒幅等乘坐輪船帶領兵役多名向松花江上駛。聲稱欲由三姓往見吉林將軍議辦要事。經景綸等派員迎阻堅不允從。並在沿途觀繪山川形勢。已於本月初七日行過胡爾哈河向小古洞河一帶上駛等情。並據議政王等面奏總理各國事務衙門。前接到該將軍等咨文時業經照會俄國住京公使據理與之剖辯。現尚未按照覆吉林三姓等處並非條約內所載准行通商地方該酋恃強深入理阻不服。且沿途繪寫山川形勢包藏禍心。深屬巨測。現在該夷輪船已向松花江上駛越過三姓將抵吉林。著景綸麟瑞於該俄官到城來見時告以總理各國事務衙門已照會該國住京公使。由三姓至吉林均非條約內准行通商地方。按約辯論。令其即行回國。並仍揀派兵勇加意防維。如續有夷船肆行闖入。

即當妥為理論。毋任沿江上駛。並飭令三姓副都統等一體嚴密防範。以固邊圉。毋稍疏懈。將此由四百里各諭令知之。護陝甘總督恩麟奏元年靈州守城防勦人員請先給獎。得旨。現在靈州尚未克復。仍難降旨允准。該護督何得任意濫請殊屬非是。著仍遵前旨。俟該州克復後與前請扁額一併再行請旨。○以直隸軍營疊次勦匪出力賞道員劉策先二品封典。以甘肅肅州捕獲要犯賞

道員恆齡花翎餘升敘有差。○予甘肅河州陣亡都司鄧資深守備陳添培千總陳錫昭把總黃龍章等祭葬世職加等。○豁免江蘇安徽各屬被擾地方節年未完錢漕暨雜稅正耗銀。○辛酉以神靈顯應加江西上饒縣鷹武將軍封號曰顯佑。○諭議政王軍機大臣等。自回匪變亂以來陝省受其荼毒。雖經多隆阿盡力勦滅。而甘肅回氛日熾。都興阿等尚因兵單道阻未能十分得手。六月間據

新疆大臣等疊次奏報庫車不守業經諭令伊犁將軍烏魯木齊都統等派兵救援本月復據保恆等奏稱吐魯番古城漢回構釁烏魯木齊亦有回匪聚眾欲先攻漢城再攻滿城圖犯迪化烏魯木齊道路已不能通奏報罕見各城兵力本少近復缺乏將士往往有顧此失彼之慮若不設法急為援救將來回疆各城與甘肅聯成一片於西北邊地大有關繫楊岳斌已授陝甘總督連日疊據該督

等奏報江西克復崇仁東鄉金谿等城是江西情形已有起色楊岳斌如能酌帶所部馳赴陝甘總督本任即可替出都興阿等辦理新疆軍務最為兩得其宜惟楊岳斌起程赴任後督辦江皖軍務不可無人接替鮑超謀勇素裕能否勝督辦之任抑或江西軍務有鮑超劉典等兵力足資勦辦可以無庸再需督辦之人均著曾國藩迅即悉心酌度一面布置一面奏聞並即飛咨楊岳斌催令迅

速起程赴任總須兼顧西北大局仍於江西軍務不至稍形鬆勁方為妥善楊岳斌所部楚勇如於甘省地勢不甚相宜即可酌帶與甘省相宜兵勇湊足數千整旅前進免致抵甘後再與都興阿雷正綰等籌商勾撥新疆一帶絕少將材成發翔係實缺巴里坤鎮總兵著李鴻章迅即飭令酌帶親兵前往赴任不得藉詞奏留本日復據李鴻章奏派援湖州水陸各軍苦戰攻克晟舍等處賊壘大獲

勝仗並長興官軍攻克呂山賊壘深紫尹隆橋各摺片晟舍既以血戰攻克湖東賊勢已衰著即催令各軍乘勢進剿以期節節掃蕩並著飛調開花礮隊渡河助剿將四安之賊悉數殄除以絕竄路廣德為數省衝要之區尤為攻拔湖州進兵要路疊經諭令曾國藩李鴻章派兵扼紮茲據李鴻章奏該州城內外尚有偽王數人帶萬餘賊踞守為賊匪往來要道該撫派現守句容之劉銘傳等由東

壩建平前進以勦為堵相機攻取實能不分  
畛域力爭上游可嘉之至著即飭令劉銘傳  
周盛波認真勦辦仍力顧東壩溧陽等處之  
防沿湖東面防賊內竄派道員張樹聲等營  
進勦毗山等賊營所籌亦妥著飭令在事各  
員穩慎圖功並須聯絡浙軍互為聲援以期  
萬全無失金陵既克兵力已可騰出著曾國  
藩仍遵前旨迅速調派勁軍會同李鴻章派  
出之兵前赴廣德協攻以資得力李鴻章另

片奏署副將駱國忠請給假開缺回籍葬親  
已降旨允准駱國忠由廣德自拔來歸厥後  
堅守常熟苦戰數月卒保危城頗稱得力著  
李鴻章傳旨嘉獎並令其葬親事畢即行回  
營以資差遣曾國藩咨送李秀城供詞一本  
昨因議政王軍機大臣呈進均已覽悉末段  
所載該逆宛轉求生乞貸一命請招降江西  
湖北各賊言招降事宜有十要言洪逆有十  
誤均歸刪節著將原供仍詳細鈔錄咨送軍

機處無須節錄至李秀城供詞內稱張國樑  
遺骸係伊用棺木收埋在丹陽寶塔根下等  
語著曾國藩傳知曾國荃派員尋覓即飭該  
故員家屬認領改葬以示追念蓋臣之意將  
此由六百里各諭令知之又諭富明阿奏  
籌辦江甯京口滿城善後大略情形一摺據  
稱江甯駐防額設官一百二十三員兵四千  
七百餘名自被亂之後僅餘男婦老弱六百  
餘名口雖陸續添設官二十七員兵二百五

十八名營制猶定而顛連困苦遺孑僅存又  
滿城自遭蹂躪兵房公所僅餘四五百間散  
布零星毫無完善擬俟辦理稍有端倪再籌  
撥補江甯兵額至京口駐防官兵雖已陸續  
挑補足額而應領俸餉五成尚不能全支額  
設房屋焚毀無存露宿風餐尤堪矜憫請將  
該兩處駐防旗兵俸餉照例全支並將房屋  
籌款建蓋等語江甯克復旗營駐防事宜亦  
應早籌辦理該兵丁等以兵燹餘生餬口棲



身尚難得所。殊非國家體卹旗丁之意。富明阿現已咨商曾國藩李鴻章。卽著該大臣等妥籌款項。迅將江甯京口駐防房屋。早為建蓋。以資棲止。其兵丁俸餉。能否卽行照例全支之處。並著該大臣等妥籌辦理。現在京旗駐防。生齒日繁。方擬於盛京吉林等處開墾閒荒。以資生聚。如挑其閒散陸續撥補江甯兵額。能否有裨。著曾國藩富明阿酌量情形。妥商具奏。至旗營器械馬匹。富明阿擬將揚

鎮遣撤各軍所繳軍械等項。並揚防馬隊之馬。及黑龍江張家口前次捐買馬匹一併截留。分給江甯京口駐防官兵。照例由藩庫支領。馬乾之處。均照所議辦理。江甯駐防應辦各事。地方新復。案卷無存。富明阿現派員赴京咨鈔底案。卽著戶兵工三部將江甯歷辦冊案。趕緊照錄。飭交該委員領回。毋稍延誤。該將軍現赴江甯。著俟與曾國藩籌商大略。卽行迅回揚營。將防務妥籌布置。另片奏京

口副都統杜嘎爾不識漢文。不通漢語。請與黑龍江對調。或另簡賢員等語。杜嘎爾現在都興阿軍營。一時尚難到任。魁玉署理京口副都統。所有應辦善後事宜。著富明阿督同該員妥為整理。所請另簡妥員之處。著候旨行。將此由六百里各諭令知之。又諭保恆奏烏城援勦喫緊。請迅調蒙古官兵赴援。一摺。據稱本年六月閒。烏魯木齊漢回變亂。後該回匪聚散靡定。四出剽掠。保恆所調民勇。因與漢回接仗。失亡過多。現俱遷延不進。各城防守。均形喫緊。勢難分兵救援。並據由賊營逃回民人報稱。羣賊議欲糾合西路回匪。攻陷漢城。後再攻滿城。然後會合攻取迪化。現在烏垣道路不通。賊氛日熾。請飭科布多揀派精壯蒙古官兵。星馳來古。援勦等語。新疆各城。自庫車漢回構亂。後烏魯木齊吐魯番及古城等處。漢回相繼聞風。煽變。古城倡亂匪徒。雖經保恆派兵擊敗。而奇台餘孽未

清刻下烏城逆眾欲勾結西路回匪次第攻撲滿漢兩城進擾迪化賊情甚屬兇悍古城存防兵勇勢難分撥進援著廣鳳奎昌於科布多屯防蒙古官兵內揀派精銳二千名配帶軍火器械遴委妥員管帶星速馳赴古城迅將該城餘匪勒洗淨盡卽分兵馳援迪化毋稍遷延並由保恆飛咨烏里雅蘇台將軍等迅卽派兵應援烏城以厚兵力常清總統各城責無旁貸豈得一籌莫展坐視不救著

懷遵前旨多設偵探以通各路聲息並將現在業經煽變各城應如何撥兵攻剿其未亂之處應如何豫防釁端一併迅速設法與平瑞業布冲額妥籌辦理烏魯木齊現在情形究竟如何平瑞惟當督飭存城滿漢各營兵勇迅籌防剿仍隨時與常清籌商如就近各城中尚有精壯官兵可資援剿卽一面奏明一面分撥並仍遵前旨將烏城變亂啟釁情形迅速馳奏喀喇沙爾與吐魯番庫車均係

接壤且有僻路可通烏城南山一帶著依奇哩隨時偵探嚴密防範或就現在存城兵力分籌進攻以剿為防如土爾扈特和碩特之兵有可分撥亦卽妥為駕馭應援各路毋得遷延株守坐失機宜文祥進援庫車現已行抵何處著卽星速前進與依奇哩會籌攻剿以期迅掃逆氛廓清邊圉古城未靖餘匪仍著保恆督飭現存兵勇速行勦辦巴里坤地屬鄰近當有可調弁兵亦著相機調撥毋再

致有疏虞將此由六百里各諭令知之○命工部右侍郎宜振提督江蘇學政以浙江湖州攻克嚴舍賊壘賞道員丁壽昌二品封典道員潘鼎新總兵官戴春林參將丁德昌巴圖魯名號餘升敘加銜有差予陣亡總兵官江福山祭葬世職加等建專祠都司蔣正芳等祭葬世職予浙江呂山陣亡提督陳忠德祭葬世職加等建專祠參將廖玉林祭葬世職加等 壬戌諭內閣前據祁寓藻疊

次因病請假先後降旨給假安心調理茲據奏稱假期已滿病仍未痊懇請開缺並退出內廷差使等語祁寓藻年逾七旬精力尚健在弘德殿行走深資啟沃茲因舊疾屢發尚未痊愈奏請開缺情詞諄懇自應勉如所請祁寓藻著准其開禮部尚書之缺仍以大學士銜在弘德殿行走俟調理就痊自行酌量進內無庸拘定日期以示體恤諭議政王軍機大臣等玉明等奏匪眾竄擾昌圖拏獲

首要各犯正法並將出力人員開單請獎各摺片已明降諭旨照所請獎勵矣盜匪劉山東等前經官兵擊散後糾眾竄擾黃花甸楊家大城子一帶復經兵練擊敗擒獲首夥各犯劉山東即劉發好等四十九名訊供分別正法惟逆首烏痣李等在逃未獲自應揔捕淨盡以絕根株前次派出之穆錦恆齡等既據玉明等稱其久留在外虛糜餉需即著准其裁撤歸伍所有勦捕逸匪事宜即責成該

管地方文武各官實力揔拏不得以賊蹤遠颺致形疏懈奉天匪犯旋拏旋起此次雖獲犯多名而首惡未除終成不了之局且所保出力各員朝廷已准予恩施玉明等當傳知各該員弁感激奮興將逸出各犯盡數揔獲毋任漏網儻敢日久懈生致令賊氛復熾必將從重究懲不能因出力在前稍從寬宥也逆首烏痣李等既經在逃昌圖與吉林地界毗連難保不此拏彼竄著景綸麟瑞嚴飭兩

省接壤地方官不分畛域實力協緝以清奸宄而靖地方將此由六百里各諭令知之○又諭都興阿奏渡河援勦官軍暨前赴橫城馬隊均獲勝仗派撥官兵駐紮石嘴山北以資聯絡並請派大員署理陝甘總督各摺片甯靈距匪自煽亂以來屢以畏威投誠之說緩我軍心從未大受懲創此次經兩岸官軍先後勦殺每戰皆捷勦辦尚為得手杜嘎爾現已進攻寶豐參領德勝由橫城順流下駛

都興阿並催令伊昌阿統帶前派各軍由二窩子渡河於石嘴山北擇要駐紮保護糧道即著該將軍督飭在事各軍節節掃蕩以期迅滅賊氛其石嘴山一帶糧道並著妥為保護毋稍疏懈杜嘎爾帶兵援應竟能首先陷陣力挫兇鋒孤軍得以保全實屬可嘉即著飭令該副都統勉力圖功乘勝進剿迅掃逆氛同膺懋賞另片奏現在辦理軍務於地方事宜未能兼顧請簡派大員署理陝甘總督

等語現在江西軍務日有起色昨已有旨諭令楊岳斌馳赴本任不久諒可起程此時即無庸再行派員署理將此由六百里各諭令知之以戶部右侍郎董恂兼署吏部左侍郎都察院左副都御史潘祖蔭署工部右侍郎管錢法堂事以奉天昌圖廳勦匪出力賞協領穆錦二品頂帶佐領扎朗阿等藍翎餘升敘有差（追予奉天榆樹臺陣亡佐領慶吉驍騎校文楷照磨徐崇建立專祠陣亡

兵丁一併附祀 癸亥  
仁宗睿皇帝忌辰遣官祭

昌陵

上詣

壽皇殿行禮 以克復江南省城祇告

太廟前期親詣行禮 諭內閣本年克復江甯

殄除洪逆禮臣諏吉恭擬本月二十六日行

告祭禮朕敬先期於本日親詣

太廟拈香行禮用肅明禋並特降諭旨將軍興

以來有功死事諸臣再沛恩施懋加卹賞俾功在社稷者慶流子孫因念鄭獻親王濟爾哈朗怡賢親王允祥功勳卓著炳耀旂常崇德暨雍正年間所得之

冊文

敕書旌功褒德帶礪河山揭日月而行俾世守勿替乃其後嗣端華載垣因恣肆狂悖跋扈不臣賜死革爵既負國家養養之恩且為乃祖聲名之玷九原有知能無隱痛其所遺爵

秩前經大學士九卿等遵旨會議僉稱端華載垣罪大惡極請將世爵永遠革除爾時如不照議施行恐無以服天下人之心第瞻念成勞心究不忍當經加恩降為不入八分輔國公並令岳靈載泰世襲罔替所以篤念勲舊者固已無微不至哉

慈安皇太后

慈禧皇太后莅政之餘亦時眷懷舊勳愴然動念今當大勲漸集懋賞酬庸之際追維開國

之初鄭獻親王忠義勲名載在史策怡賢親王於雍正年間忠誠輔弼懋著勤勞若因端華載垣之故使親賢後裔弗獲世守舊封其何以紹前光而嚴對越所有鄭親王怡親王世襲王爵均著加恩賞還其一切紅白藍甲數並佐領人等均著仍復其舊並著宗人府照例於始封立官人之後裔內擇其向有襲次房分排列在前僅止有分房分排列在後如各房分均屬相同卽以長幼之序排列並

將岳靈載泰一併帶領引見候旨承襲其端華載垣子孫及親兄弟姪仍不准其揀選又諭軍興以來所有忠良死事諸臣業經贈官廕卹賜謚建祠飾終之典備極優隆朕建元初年復奉兩宮

皇太后懿旨將戰功卓著忠績懋昭足以表式人倫者賜祭一壇並加恩一律予謚以示軫念本年江甯克復已將在事有功之臣渥沛恩綸酬庸錫爵因思從前有功死事諸臣或臨陣捐軀齋志以歿或鞠躬盡瘁未竟全功雖業經分別加恩優予卹典亦足稍慰忠魂而其間封疆將帥功績尤為昭著者追念前勞尤堪憫惻茲據議政王軍機大臣遵旨查明開單進呈詳加披閱如胡林翼等規畫遠大勲績卓然允宜再沛恩施用光泉壤前任湖北巡撫胡林翼著加恩賞給一等輕車都尉世職前任湖北提督向榮著加恩入祀昭忠祠前任浙江布政使李續賓著加恩賞給

二等輕車都尉世職前任安徽巡撫李續宜著加恩賞給伊子直隸州知州照例補用。前任江南提督張國樑著加恩賞給三等輕車都尉世職。前任湖南提督塔齊布著加恩入祀昭忠祠並賞給三等輕車都尉世職。前任安徽巡撫江忠源著加恩賞給三等輕車都尉世職。前任湖南候選道江忠濟前任浙江甯紹台道羅澤南前任西安將軍多隆阿前湖南候選同知曾國華均著加恩賞給一雲騎尉世職。前即用知府曾貞幹著加恩賞給伊子直隸州知州照例補用。前提奏提督江西南贛鎮總兵程學啟著加恩賞給三等輕車都尉世職。用示篤念忠蓋有加無已至意。

又諭步軍統領衙門奏拏獲誘拐子女人犯請交刑部會同宗人府嚴訊一摺。犯婦張任氏即白毛張等膽敢於輦轂之下用藥迷拐子女。可惡已極。更難保無另案同夥不法情事。至應嚴切根究。以懲奸宄。除覺羅松連、松

陳氏已由該衙門送交宗人府收管外。張任氏即白毛張夏段氏夏常亮夏承瑞德富氏田楊氏焦富氏路高氏富得順寶關氏連常奎瑞段氏均著交刑部會同宗人府嚴行審訊。另片奏張任氏等案情較重。請飭部不准收贖罪名等語。著刑部將誘拐各犯婦並知情窩留人犯於訊明後即照該部奏定新章分別從重治罪。不准收贖。以靖奸宄。又諭滿慶等奏達賴喇嘛從伊正師傅羅布藏吉

饒汪曲受格隆小戒呈進佛尊哈達等物一摺。本年四月十三日達賴喇嘛從伊正師傅受格隆小戒實有吉祥之事。朕心甚為喜悅。達賴喇嘛嗣後尤應專習經咒謹守黃教永受朕恩。著加恩賞給達賴喇嘛黃哈達一箇。椰子捻珠一串。玉盃一箇。大荷包一對。小荷包二對。著滿慶接奉此旨。諭知達賴喇嘛照數祇領。再達賴喇嘛仍將照例應進貢物。交班禪額爾德尼年班堪布來京呈進。即照所

請辦理。諭議政王軍機大臣等有人奏順天香河縣知縣黃曾人本庸闇性耽安逸復信任丁役攬權納賄包庇賊匪收受月規代為掩飾致閭閻商旅無不受害請飭查拏等語。畿輔一帶甫經肅清方期間閭安堵商旅暢行如所奏在獲潛逃之王金隴糾夥搶劫擾害民間復買通捕役人等收受賊銀若不從嚴查拏恐復成為隱患著萬青藜卞寶第密派委員前往該縣務將逸犯王金隴迅速拏獲並提同該縣捕役門丁人等嚴訊確情按律懲辦據實具奏另片奏直隸肅甯縣地方有盜匪黃殿舉自號混天王與夥黨張輝廷等二十餘人招集亡命之任二匪等包運私鹽搶奪商旅上年該匪等赴桂花村搶掠並將該村練榮學孔擄去押禁現在餘匪俱逃至該縣所屬之達子房村避匿等語並著劉長佑嚴密查拏務獲究辦不准一名漏網將此各諭令知之。又諭穆圖善劉蓉奏招

降賊眾攻克堅堡現籌分路追剿並穆圖善奏請親督所部前赴湖北助剿各摺片啟鄭諸逆與蔡逆合併之後經穆圖善等移軍進逼招降賊眾五千餘人並將樓觀東堡等處逆壘攻克該逆向秦嶺一帶逃竄追斬甚眾現籌分路雕剿惟據該將軍等奏稱此股逆匪經曹克忠由寶雞一路節節緊逼將逆黨聚於一隅並布列長圍絕其糧道計日即可殲除自當激勵將士一鼓成擒乃因大雨收隊縱令樓觀各堡之匪乘機潛竄總由該將軍等督勦不力致勦辦又形棘手劉蓉現擬由子午谷入山堵剿著卽會同穆圖善嚴飭所部各軍分路勦洗迅將敗竄南山等處賊匪悉數殲擒儻徒事尾追令賊蹤竄入甘省惟劉蓉等是問鄂省軍務雖關緊要現有官文等在彼督兵勦辦該大臣營內不乏帶兵之將穆圖善惟當督率將士先將南山竄匪掃除淨盡俟陝省軍務肅清再行請旨。李雲

麟一軍尚未到防佛坪甯陝四畝地等處必至無兵堵截劉蓉何以不參前因川陝交界防勦喫緊諭令該京卿督率隴軍防勦何以至今尚未到防實屬畏葸遷延不知振作李雲麟著摘去頂帶迅卽親率隴軍與劉蓉所派之兵嚴防佛坪甯陝等處毋任賊匪竄越儻縱賊出山毫無堵截必將該京卿從重治罪決不寬貸招降人眾為數太多著穆圖善劉蓉隨時妥為防範並設法分別賞遣毋稍

大意所有進攻大玉西堡尤為出力之降人鄭永和著賞給五品頂翎以示鼓勵穆圖善所部各營軍餉著劉蓉妥為籌畫毋任缺乏逆匪前由棧道前進意在窺伺川境此次竄至南山距川甚近著駱秉章仍遵前旨嚴密防守毋稍鬆勁將此由六百里各諭令知之又諭駱秉章奏體察滇省情形一摺據稱雲南回患變詐百出杜逆竊踞大理馬德新近在省城已成固結莫解之勢馬如龍岑毓

英日以勦除杜逆為詞曾無寸效籌辦滇事必須兵餉充足方能聲罪致討川省現在兵餉難於兼顧並探聞馬德新至姚州議和允將迤西地方分給杜逆不日攻取建南請飭馬如龍等進攻大理誅滅杜逆以明心跡等語滇省糜爛既久岑毓英馬如龍等把持全局已成尾大不掉之勢近雖聲稱以勦回自任不過託之空言惟現在兵餉皆未充裕不可先露風聲生彼疑懼至馬如龍岑毓英等

之助順助逆總以能否攻拔大理勦滅杜逆為斷著勞崇光賈洪詔迅卽分檄馬如龍岑毓英等往攻大理將杜汶秀等逆悉數殲除如馬如龍等果能踴躍用命迅速蕩平則心跡既明朝廷必予以優獎若遷延觀望陽奉陰違是仍與逆回暗地勾結以虛言為要求地步屆時勞崇光等惟當大申捷伐豈可再事姑容惟兵餉兩層勢必取資川省馬如龍等既不可恃斷不能置滇事於不問將來定



議進勦徵兵籌餉事事仰給於川省駱秉章當隨時設法兼顧不得因本境餘孽未平稍存歧視卽馬如龍等人尚可用借以勦回亦必須派撥大兵直入滇境分別勦撫為伊等聲援仍須川省籌餉接濟駱秉章亦不可視為緩圖前曾屢諭賈洪詔令卽駐紮昭通相機辦理該撫何以遲至此時尚未前往川省距滇甚遠一切事務鞭長莫及必須駐紮昭通就近酌辦何得因該處偏近回氛現無重兵未可輕進遂徘徊川省莫展一籌殊負委任著懷遵疊次諭旨迅卽前往昭通確探滇省近日情形次第妥辦不准再有遲誤至杜逆有攻取建南之說是否確鑿著駱秉章密為偵探先事防範聞徐之銘近已病故岑毓英已具稟賈洪詔而巡撫關防未據送交著勞崇光等嚴飭岑毓英卽將巡撫關防送交賈洪詔祇領毋得自重罪戾前有旨將李季高簡放甘肅甯夏鎮總兵甘省軍務緊要著

駱秉章卽飭該員迅赴新任以重職守將此由五百里各諭令知之又諭文祥奏吐魯番南北各路軍務喫緊並哈密防堵情形一摺據稱奇台木壘漢回滋事烏魯木齊所屬之哈必爾罕布拉克等臺漢回搶去馬匹前途喀喇巴爾噶遜營漢回變亂吐魯番至烏魯木齊道路不通而托克遜漢回亦乘機肆擾喀喇沙爾烏魯木齊文報梗塞文永帶兵進援庫車行至距喀喇沙爾所屬之烏沙克他爾軍臺三十里之新井子遇賊接仗失利等語新疆自庫車不守迤東各城紛紛煽亂竟欲成燎原之勢文永帶兵往援又復挫敗其詳細情形並文永下落著依奇哩查明具奏並著懷遵前旨催調土爾扈特和碩特兩處遊牧蒙兵助勦以厚兵力常清統轄各城責無旁貸疊經諭令派撥勁兵並得力遣犯歸圖庫爾管帶星馳往援著仍遵前旨督飭該員弁等探明道路趨程前進一面查明文

永現在何處會同招集兵勇合力進剿如兵力不敷再行添撥勦旅陸續進發毋稍疏虞吐魯番至烏魯木齊賊氛四起若不趕緊撲滅更恐滋蔓難圖著色普詩新飭令何璟趕緊挑派滿漢官兵前往援應禁慶就近催調援兵並整飭鄉團實力守禦平瑞業布冲額亦當就現有兵力妥籌勦辦一面迅速馳奏保恆另籌一軍前往助剿並將本城未淨餘孽實力勦洗以靖地方哈密為新疆門戶防務尤為緊要扎薩克郡王伯錫爾能將哈密所屬小回子嚴行約束甚為可嘉著文祥即會同該郡王妥籌防禦慎守嚴疆文祥雖已簡放烏魯木齊提督現在保恆不能到任文祥即不能交卸起程所有一切防勦事宜務須謹慎圖維毋稍大意將此由六百里各諭令知之四川總督駱秉章奏遵查道員鍾峻派辦軍米各務尚臻妥協並無鑽營違迎等情仍當隨時察看報聞 命戶部右侍郎

董恂充

實錄館副總裁官 調工部尚書李棠階為禮部尚書以都察院左都御史單懋謙為工部尚書刑部左侍郎齊承彥為都察院左都御史調禮部右侍郎王發桂為刑部左侍郎以都察院左副都御史汪元方為禮部右侍郎未到任前以宗人府府丞溫葆深署理以山西捐輸軍餉永廣鄉試中額二名以江西德安縣捐輸軍餉永廣學額一名以

天

地

太廟

社稷 遣官告祭

永陵

福陵

昭陵

昭西陵

孝陵

孝東陵

景陵

泰陵

泰東陵

裕陵

昌陵

昌西陵

慕陵

慕東陵

諭內閣左宗棠奏覈減甯波府屬浮收錢糧一摺浙省甯波各屬所徵地漕南米等項浮收之弊在所不免經左宗棠查明覈減將甯波所屬一廳五縣六場所有錢糧收納實數暨流攤各款除正耗仍照常徵解外其一切攤捐名目及各項陋規概行禁革共

減去錢十萬四千有奇米八百餘石民困諒可稍蘇卽著照所議辦理嗣後並著為定章永遠遵行其從前以錢數收納者悉令統照銀數收納不准有大戶小戶之分至地方官吏尤當潔己奉公剔除積習儉取陽奉陰違添設名目格外需索及大戶不遵定章完納者卽著該督撫查叅懲辦以重國賦而恤民瘼又諭左宗棠奏查明失察會匪釀變之文武員弁從重擬結一摺咸豐十一年十二月間浙江温州府屬突有金錢會匪闖入平陽縣城經前任閩浙總督慶端奏叅將署平陽縣知縣翟維本等分別革職查辦並據辦團紳士孫鏘鳴等聲稱翟維本與已革把總李鳴邦通同庇賊已革知縣高標材奉委往查又復得賄庇縱賊擾瑞安副將趙振昌署知縣孫杰閉城不出賊首趙啟因被官軍擊敗遁回平陽翟維本復縱令逃逸並翟維本幕友何丹成等把持公事袒護會匪等情茲

據左宗棠奏稱飭司親提案內人證研訊明確從嚴定擬除趙振昌孫杰業經病故高樑材訊無得賄縱賊證據均無庸議外此案已革署浙江平陽縣知縣翟維本已革把總李明邦卽李鳴邦雖訊無通匪故縱及任令幕友袒護會匪各情惟於趙啟等結會聚黨並不認真掩捕意存彌縫以致釀成巨患迨該匪闖入縣城先事既未能防範事後又任令首犯逃逸未能設法緝獲非尋常失察本境

盜賊竊發者可比亟應從嚴懲辦翟維本李明邦均著照所擬從重發往新疆充當苦差以示懲儆○諭議政王軍機大臣等楊岳斌沈葆楨奏官軍掃蕩許灣賊壘並克復東鄉崇仁金谿宜黃等處各摺片江西各股賊匪分距金谿東鄉宜黃崇仁南豐五城不數日間已克其四鮑超於削平許灣後卽進攻金谿破數萬賊眾如拉朽摧枯實屬勇敢異常戰功卓著著楊岳斌沈葆楨傳旨嘉獎仍飭

各軍乘勝進攻南豐以期一律掃蕩摺片內所稱擒斬之偽平東王翟添鳳等十一名成天豫莫自城等九十八名均非著名賊首所有李侍賢汪海洋陳炳汶等逆均未聲敘曾否傷斃抑已另竄他處著該督撫查明具奏宜黃收復情形賊竄何路諒已有奏報在途南豐一城無難唾手而得該逆不窺甯都必擾建甯甯化如竄至閩境務須不分畛域認真追剿並飛咨閩省督撫嚴飭防軍會剿毋

令再擾完善另片奏韓進春一軍駐守建昌在新豐之上塘等處獲勝而東路長興地方復有賊擾著卽督飭該參將實力防堵現在西北之患甚於東南甘肅及回疆軍情均甚緊急昨已諭知楊岳斌能否卽赴陝甘總督新任計奉到前旨該督卽當與曾國藩通籌大局如江西軍務稍鬆接替有人卽著該督仍遵前旨酌帶所部得力兵勇數千整旅前進抵任後將良莠各回分別勦撫仍著與曾

國藩妥商奏聞以期周密將此由六百里各諭令知之○又諭李雲麟奏通籌興漢防剿機宜請飭興安官民捐備倉儲並管滂等辦理團練各摺片據稱蔡逆自竄至陝北後與啟逆梁城富偽天將馬仕榮范立川等懼勦協謀如由陝北入山處處可達興漢惟有居中策應駐軍石泉甯陝西鄉一帶擬於七月十五日以後將水陸各營分紮該處等語昨因李雲麟一軍日久尚未到防當將該京卿

摘去頂帶著李雲麟仍遵前旨親率隴軍與劉蓉所派之兵嚴防佛坪甯陝等處該京卿於防剿失利及縱賊竄逸往往以兵單餉絀事權太輕呼應不靈等詞藉口以遂其文過飾非之計經此次嚴諭之後如再一味畏葸任意遷延縱令該逆出竄必將李雲麟從重治罪懷之建毅六營前已諭令李雲麟准其先行撤回著仍遵前旨應撤者妥為裁撤交金殿安等管帶回鄂以免虛糜餉項該京卿

請飭四川督臣於分防川界各軍中酌撥一二千人移紮漢中昨以該逆竄至南山距川甚近已諭令駱秉章嚴密防守矣李雲麟擬於興安府城設立團練總局將所屬各縣各舉公正紳耆按照安康漢陰章程一律辦理而以管滂蔣蔣常垣黃加焜總司其事即著劉蓉酌度情形責成管滂等妥為辦理興安倉庫俱無毫無布置若派兵駐守新舊兩城非二千人不敷分撥無兵留守興城萬不可保

李雲麟擬於興安附城內外中上各戶派捐銀穀所收之穀立為義倉專備守城之用所收之銀製造器械修補城垣該京卿所籌是否可行著劉蓉斟酌辦理盧又熊於漢中失守時開城出走縱勇恣掠情罪極為可惡前諭陝西湖北四川各省一體嚴拏務獲就地正法時閱七月之久尚無該革員下落著劉蓉趕緊緝拏懷遵前旨於拏獲後即行正法以昭炯戒將此由六百里各諭令知之○聞

浙總督左宗棠奏浙省紹興金華衢州嚴州處州等處水災甚重現籌撫恤得旨兵燹之後復遇水災哀此遺黎殊堪矜憫著該督派委賢員分赴各屬履勘將災民分別妥為撫恤毋令失所又奏請將奏調來營之戶部郎中顧菊生留於浙江以道員補用允之○福州將軍英桂奏遵旨於到任後會同撫臣徐宗幹籌辦防堵得旨南豐未克賊氛終恐延及閩省該將軍當會商徐宗幹飛催張運蘭

曾玉明林文察等到防與江西水陸各軍約期會剿毋令闖入閩境○予江西許灣等處陣亡遊擊楊維慶等四十六員祭葬世職加等○乙丑諭內閣前因喬松年奏保蒙城解圍出力各員業經降旨均照所請獎敘茲據僧格林沁奏稱查覈該撫奏獎單內按察使英翰請賞勇號該員帶兵止在小澗集紮營嗣經援軍大至始行移營會剿並未身先士卒都司施紹恆請以副將儘先補用該員係

由該大臣派往援剿未及數日城圍即解在蒙並未續有戰功徐登善請以遊擊儘先補用並賞加勇號該員係由捻黨於克寨後投誠即有勞績亦應先免其為匪之罪不應以先得官階接續請獎守備李勤邦請賞換花翎並賞加都司銜六品軍功楊步斗請以守備儘先補用該二員均經該大臣於蒙城解圍後保奏有案該撫請獎係出重複請旨撤銷各等語所有英翰施紹恆徐登善李勤邦

楊步斗五員此次獎勵之案均著即行撤銷仍俟續有勞績再行奏請近來各省軍營出力人員一經保奏朝廷無不立沛恩施在統兵各大員自應覈實奏獎豈容稍有冒濫此次保獎之案喬松年到任未久未能深悉底蘊其原摺內稱係據英翰開單呈報英翰久歷行間乃竟重複開報浮冒請獎喬松年並未詳覈率行具奏均有不合若非僧格林沁悉心察覈浮濫之弊何由上聞喬松年英翰

均著交部分別議處以為冒濫請獎者戒。此外各省保獎之案似此者諒亦不少。各路統兵大臣及各省督撫務宜留心察覈一有聞見即當隨時奏聞如再有濫請獎勵者一經查出除將該員獎案撤銷外必將原保之員從重懲處決不寬宥。毋謂朝廷名器可濫邀也。懷之慎之。尋吏部議喬松年應降一級調用英翰降三級調用俱係私罪無庸查紀。級議抵得旨喬松年著加恩改為降三級留任。

英翰著改為降五級留任。諭議政王軍機大臣等僧格林沁奏麻城剿匪獲勝翼長因病出缺並請將玩視軍務之總兵嚴議前賞蒙古馬隊官兵銀兩請旨辦理各摺片麻城北路賊匪經官軍由黃土岡伍家河八道河紅石堰等處節節進逼疊獲勝仗擒首宋朝如率眾乞降經英翰擇留四百名充當前敵餘皆遣令還鄉即著該親王妥為辦理毋令再生反側。惟宋朝如投誠後賊眾驚恐正可

趁該逆惶懼奔竄不定之時乘勝進兵以收破竹之效。官文身任兼圻勦辦本省賊匪是其專責。此次僧格林沁所部疊獲大勝並未見官文派出各軍協同勦洗。蓋斯明等本分紮蘄黃各隘姜玉順早由樊城拔營得力步隊甚多何以並不進兵會勦。官文所司何事似此任意遷延殊屬不知緩急。著官文嚴檄各軍會同僧格林沁官兵聯絡聲援將麻城南路白果一帶之賊實力進剿為一鼓聚殲

之計毋得專恃僧格林沁客兵轉得置身事外以致日久無功。蘇克金所部將士該親王現令成保暫為接統惟成保前在直東帶隊頗不得力。此次派令管帶蘇克金馬隊未知能否勝任。著即責令該革員奮勉圖功以贖前愆。仍著隨時察看如不得力即行更換。據獲賊供稱該逆圖竄東北是商城光山一帶又形喫重。著張之萬激勵將弁實力堵剿毋令匪蹤再行闖入豫疆前賞蒙古兵丁銀一

萬兩。據該親王奏稱現在哲里木、昭烏達兩盟隨營征勦。至土默特官兵亦在營隨同出力等語。此項銀兩卽照僧格林沁所請將該兩盟及土默特官兵均勻分賞。其管帶各盟馬隊人員及吉林、黑龍江帶隊員弁、僧格林沁擬俟麻黃股匪撲滅再行奏請獎勵。該親王慎重名器不肯稍涉冒濫。具見公忠體國之忱。陳國瑞已據該親王調令來營。仍著隨時酌量差遣。僧格林沁密摺一件留中。將此

由六百里各諭令知之。○又諭曾國藩奏李臣典出缺、蕭孚泗丁憂及料理善後布置上游並李秀城等業經正法各摺片。本日已分別降旨。將李臣典、蕭孚泗准開缺回籍守制矣。各處勇丁有募無散有增無減原因兵額不敷不得已而用之。今江甯已克大功猶成。該大臣酌量可以裁撤二萬餘人。且體察各員弁久在行間厭苦兵事不至另生枝節。自屬實情。著卽籌發欠餉酌量遣撤。總須

有約束之法。鈐制之人方不至游騎無歸。另謀嘯聚致貽異日無窮之患。其酌留之二萬數千人卽令分守金陵、蕪湖、金柱關各要隘兼作為遊擊之師進勦廣德等處並著妥為調派以資得力。據奏曾國荃於克城之後心血過虧困憊殊甚欲請回籍調理部勒散勇南歸求所為善始善終之道等語該撫所見雖合於出處之道而於蓋臣謀國之誼尚未斟酌盡善。況遣散勇丁止須分派妥靠之員

沿途照料而現在江甯、安慶等城均須督兵鎮守該撫正宜駐紮江甯安心調理一俟就痊卽可幫同曾國藩分任其勞卽著曾國藩傳旨存問毋庸遽請開缺回籍江南北應辦善後之事甚多曾國藩現回安慶著卽趕緊料理上游事務布置稍定卽仍回駐江甯鎮江揚州防兵應撤應留均照所議辦理江西已克宜黃、崇仁、金谿、東鄉等四城惟賊首尚未就殲近日新疆各城警報疊至是以前諭



楊岳斌馳赴新任楊岳斌能否離江江西軍務應交何人督辦該大臣卽遵疊次諭旨迅速籌奏李秀城等就地正法所辦甚是前已有旨宣示矣洪秀泉首級未經傳示各省卽由該大臣自行咨明各處可也片一件留中備覽將此由六百里諭令知之○以火器營營總倭和為福州副都統○准丁憂福建陸路提督蕭孚泗回籍守制以江南福山鎮總兵官郭松林為福建陸路提督記名總兵官

熊登武為江南福山鎮總兵官○以記名總兵官朱南桂為河南歸德鎮總兵官○補鑄安徽壽州知州壽春鎮右營都司合肥縣官亭巡檢福建邵武府同知各印信關防從巡撫唐訓方徐宗幹請也○以赴調遷延浙江處州鎮總兵官陳國瑞下部嚴議○予江南江甯傷亡記名提督河南歸德鎮總兵官李臣典祭葬世職加等謚忠壯於江甯暨江西吉安安徽安慶各地方建立專祠○予湖北

軍營病故副都統蘇克金祭葬卹蔭加等謚莊介○予湖北麻城陣亡守備閻樂天把總蔣慶祥祭葬世職丙寅諭議政王軍機大臣等前因平瑞奏庫車軍務緊要餉項奇絀諭令沈桂芬將戶部前在該省勸捐歸補籌解京餉項下撥定新疆經費銀十萬兩如數籌撥復因烏魯木齊提督文祥奏請飭部將前經動撥新疆銀四十萬兩速催各省及早起解諭令戶部妥速議奏茲據戶部奏稱擬

在山西截留防費銀內除已劃撥新疆經費十萬兩外尚餘十萬兩請飭山西巡撫迅速解往作為新疆軍餉至前撥軍餉十萬兩經費四十萬兩並請飭四川山東山西河南各督撫分批起解另片奏分別已解未解數目一併請飭四川等省各督撫轉飭藩司批解甘肅各等語現在新疆庫車等城軍務喫緊餉項需用浩繁若不趕緊撥解必至停兵待餉貽誤事機於邊陲要地大有關係著沈桂

芬於前次截留防費銀內除已劃撥新疆經費銀十萬兩外下餘十萬兩趕派委員迅速解往作為新疆軍餉至前撥軍餉十萬兩並由部撥定山東銀七萬兩河南銀七萬兩山西銀十萬兩四川銀十六萬兩共四十萬兩除山東解過銀一萬兩外下餘銀六萬兩山西解過銀二萬兩外下餘銀八萬兩河南原撥銀七萬兩四川原撥銀十六萬兩著駱秉章閻敬銘沈桂芬張之萬轉飭各藩司迅速

籌解甘肅安肅道庫一面咨明陝甘總督委派委員兵役遞解鎮迪道庫以濟新疆各城急需如各該省視為具文仍前延玩即著戶部從嚴叅處常清接奉此旨即咨明迪東各城遞派委員前往甘省迎提此項出關時嚴飭各臺站小心護解烏魯木齊當南北各城要路之衝尤當疏通臺站俾餉道暢利無阻文祥現在哈密距關較近著飭令各委員節節迎護以期妥速現在古城以西道路不靖

該大臣等務須慎之又慎毋令中途失事致有疏虞將此由五百里各諭令知之 又諭官文奏髮捻勢已窮蹙欲循舊路回竄現飭各軍合力進剿並官軍築壘續獲勝仗各摺片髮捻各逆疊聚於麻城白果等處經成大吉等軍與僧格林沁派出各軍分路剿洗賊糧將盡勢已窮蹙兼之金陵克復無巢可歸其自拔來歸者亦復不少自應乘此賊心渙散之際合力兜剿以期迅就肅清官文現飭

姜玉順等馬步各軍嚴扼黃孝要路會合楊朝林等軍三路進兵為聚而殲之計即著督飭諸軍實力進剿一鼓滅賊不得稍有遲延僧格林沁派出之軍轉戰而前所向奏績即著飭令色爾固善張曜等乘勝進兵會合楚師將髮捻各逆全股殲除毋稍鬆勁惟該逆詭譎異常避兵而行是其慣技官文奏稱逃出難民僉稱賊匪備十日乾糧並紫草人圖由舊路回竄而羅田蘄水等處之賊悉數

竄至道觀河沙河一帶沿村打館是其急欲上竄情形畢露現在富森保石清吉等雖於道觀河扼紮營壘偪賊而軍第該處道路紛歧難保不來虛竄豫著張之萬恪遵厯次諭旨激勵將弁實力堵剿毋令匪蹤再行闖入豫疆致勦辦又形費手將此由六百里各諭令知之 丁卯諭內閣禮部奏遵照定例請舉行釋奠典禮一摺本年克復江甯殲除首逆自應遣官釋奠

先師孔子用告成功所有應行典禮著該衙門照例辦理 又諭前經降旨將鄭親王怡親王世襲王爵賞還令宗人府照例於始封立官人之後裔內分別排列與岳靈載泰一併帶領引見茲據宗人府奏稱前次辦理承襲鄭親王怡親王所降不入八分輔國公時曾將英俊載堉等依次排列帶領引見此次應否仍將英俊載堉等復帶引見抑或另行揀選並將英俊載堉等依次排列等語著宗

人府另行揀選合例之人並將前次揀選列名之英俊崇吉文霖承歡載堉載揆載熙依次排列一併帶領引見 諭議政王軍機大臣等前因土默特貝勒旗老頭會綽金汰那木薩賚等聚眾滋事及該旗塔布囊察固特古爾圖等呈控綽金汰等抄搶斂錢等情降旨飭交熙慶會同卓索圖盟長派兵查拏懲辦茲據熙慶奏稱半年以來應提之人犯未齊續控之呈詞尙至且人數太眾頭緒繁多

刁狡之徒恃有頭銜往往不服鞫問請簡派大員會同卓索圖盟長就近查辦等語本日已明降諭旨派理藩院侍郎額勒和布馳驛前往熱河會同色伯克多爾濟熙慶嚴行審辦矣此案情節較重非洞悉蒙古情形之員會同訊辦不足以成信讞除熙慶有地方之責毋庸前赴該旗會審外著額勒和布於行抵熱河後即帶同司員馳赴土默特貝勒旗提集卷宗及應訊各員會同色伯克多爾濟

嚴切根究務期水落石出毋稍寬縱並著理藩院傳知喀喇沁王色伯克多爾濟欽遵辦理將此各諭令知之 又諭明緒等奏烏魯木齊一帶地方回匪肆擾貢馬不能呈進麟興等奏劉調蒙兵馳赴古城聽調各一摺烏魯木齊漢回變亂業經保恆等馳奏明緒等現據護送貢馬官兵旋回報稱烏魯木齊迪化漢城關外回匪縱火紅山嘴子一帶火光皆起滿城城門封閉護馬官兵被賊衝散是烏魯木齊匪勢正熾啟釁根由暨現在若何情形仍著明緒平瑞業布冲額等查探明確迅速具奏一面將塔城回眾妥為撫馭各安生業毋受外匪煽惑致啟猜疑該處回民既肯隨同官兵分路防堵即令該掌教擇派妥靠之人隨同各營員前往以釋其疑該兵丁應領鹽菜銀兩務須設法籌給麵斤錢文以資接濟石金斗陳生福等既為回眾敬服即著責令彈壓回眾如能始終出力即行奏請

獎勵以堅其向化之心塔城鄰氛不靖自應先事豫籌該處兵力較單著常清挑選精壯兵丁五百名聽候該大臣咨調以備緩急明緒等亦須時加嚴防毋稍大意所貢馬匹著俟明年補行呈進以免疏失烏城變亂情形未據平瑞等陳奏其為城垣戒嚴道路梗阻可知著平瑞業布冲額懍遵前旨就存城滿漢各營兵勇迅籌防剿以期痛殲醜類毋任蔓延古城待援甚急現在南路各城不能兼

顧著麟興車林敦多布即行飛劄西兩部落盟長於各旗內挑選精壯官兵五百名由麟興等發給軍火馳赴古城應援此項官兵口糧著保恆照例妥為豫備毋令缺乏將此由六百里各諭令知之 又諭總理各國事務衙門奏荷蘭國換約屆期請派員互換一摺荷蘭國前立條約載明一年期內或在天津或在上海互換茲屆換約之期據該國公使蔡大何文呈遞照會內稱請派員前往廣東

互換等語著派郭嵩燾將上年與荷蘭國所立條約妥為互換其條約各本俟崇厚派員齎送至廣東時即著郭嵩燾祇領辦理並令軍機處將寄諭摘錄一併發往如該使索看憑據即可給與閱看俟換約事畢此旨仍繳還軍機處備查總理各國事務衙門摺一件崇厚遞到該使照會一件著鈔給閱看將此由五百里諭令知之引見前任貴州布政使龔自閔得旨著以四品京堂候補以故

四子部落卓哩克圖郡王伊什齊黨子那木凱多爾濟襲爵命理藩院右侍郎額勒和布前往熱河會同都統麒慶喀喇沁郡王色伯克多爾濟查辦事件仍以刑部左侍郎王發桂兼署工部左侍郎戊辰諭議政王軍機大臣等有人奏湖南巡撫譚世臨陽託正直陰受苞苴自知府以至升任巡撫營私亂法任性妄為官局之外另抽商稅聽信戚黨現保知縣張昆祁等招權納賄於委署外

另添代理名目並侵那局款勒派屬吏剋減火槍價值以候補道員胡鏞在籍道員黃冕為爪牙用硃筆標籤將各局帳簿調至署中私行改易民怨沸騰各等語封疆大吏表率羣僚責望綦重宜如何激發天良正已率屬若如所參譚世臨貪污各款殊屬有玷官箴大負委任著胡家玉張晉祺於川省料場事竣即行馳赴湖南省城按照單開各款秉公嚴密查辦據實參奏並將交通賄賂之官親

張昆祁等提案嚴訊務期水落石出不准稍有瞻徇毛鴻賓現已升任粵督其前在湖南巡撫任內有無反手取財賄和控案及收納部民之女各款並著詳細訪查據實參奏原摺單著鈔給閱看毛鴻賓在湖南時又有人奏曾因道員李明墀結交肅順私書甫發肅順伏誅該督派武弁張遇恩連夜馳驛追回故免敗露等語李明墀現任湖南糧道著即提訊明確一併具奏毋任狡飾又有人奏湖

南地方近來軍功保舉冠蓋相望士習民風漸多驕悍現在東南軍務漸平各營楚勇將次裁撤此輩習於戰陣人數又多回籍後恐難安靜全賴地方大吏賢能公正方足資彈壓而弭變亂若貪污大吏先為士民所不齒安望其能有所整飭耶惲世臨等被叅款蹟胡家玉等必須徹底查辦一俟奏聞即可另簡賢員畀以重寄以冀有所挽救該京卿等當仰體此心斷不可敷衍了事所有該省士

習民風是否驕悍並著於抵省後訪察具奏原片並著鈔給閱看將此由五百里各密諭知之○又諭據惲世臨奏派委知縣呂鳳藻押解田興恕於七月初一日行抵秀山即將該革員交四川委員姚寶銘接替管解各等語田興恕由湘入川疊次遷延為日已久目前計已行抵川省著崇實駱秉章妥為羈禁不可稍涉大意並將該革員到省日期先行馳奏此事從前業已延閣此時亟宜迅速完

結免致別滋事端著崇實駱秉章等懷遵疊次諭旨悉心辦理並咨會勞崇光張亮基將該革員應得罪名妥議速奏事關中外大局該將軍等必能斟酌盡善也將此由五百里各密諭知之○又諭惲世臨奏楚師越境剿辦黔匪獲勝另股苗教匪徒竄徧沅晃邊界增兵防剿並官軍入江籌防一摺楚軍自攻克盤石營長坪後由銅仁松桃轉戰而前疊破賊巢包茅仙帶領三四百人循山僻小路

竄入梵淨山包逆之子業已殲斃著惲世臨督飭周洪印等實力按捕務將包逆拏獲以期盡絕根株天柱城賊退出後復有偽九大王統苗教二三千人圖犯晃屬涼傘等處經官軍擊退並將由拉那下竄之偽大王龍政邦等悉數擒獲惟天柱所駐黔兵糧盡各散柱屬四境徧地賊氛沅靖見三屬邊隘到處喫緊勞崇光張亮基於該省官兵糧食缺乏何以一籌莫展並不豫為籌畫任令紛紛潰

散黔匪一日不滅卽楚邊一日不安若非兩省合勦該逆任意奔突勢必終無了期著勞崇光張亮基激勵將弁奮勉圖功會同楚軍認真埽蕩不得專恃楚省客兵轉得置身事外仍著惲世臨督飭派出各軍將黔省賊匪痛加殲滅以勦為防庶可次第肅清邊圉江西金谿東鄉宜黃崇仁均已攻拔勦辦極為得手惟該逆弗獲逞志於江勢必改圖他竄秋深水落贛河可以鳧渡誠不可不豫為之

防惲世臨擬飭趙煥聯分軍進駐袁州兼顧吉安將守城三營調赴萍鄉王永章一軍亦分營出境省城防務改委李光燦接辦卽著照所籌妥為調撥如江省賊勢已蹙無須越境籌防仍著惲世臨酌度情形相機辦理將此由六百里各諭令知之 又諭景綸等奏俄酋石沙木勒幅等乘坐輪船駛抵吉林欲面見該將軍商辦要事經景綸等派令佐領那斯洪阿等諭令該夷酋與常明明祿相見

商議並詢以因何公事該夷酋並不實言旋遞來清字俄文一紙稱該將軍不與接見與約不符遂卽回帆東去其因何前來始終亦未洩露等語吉林三姓本非通商地方此次俄夷違約越界其曲在彼該夷酋既稱欲面見將軍商辦要事景綸等固不宜自行往見致乖體制然亦何妨傳其來見責以違約越界之罪以折其虛憍之心並可詢悉該夷來意以憑辦理乃計不出此反令該夷得所藉口且任令沿途繪畫山川形勢來去自如究竟因何前來該將軍等仍茫不知悉似此畏首畏尾豈不令外國人輕視邊臣益復毫無顧忌耶至總理衙門與該國住京公使爭論若不知該夷因何前來亦無從與之辯難該將軍身任地方既不能阻其不來又不敢傳見該夷據理駁斥殊不知所辦何事現在俄夷船隻尚未駛出三姓烏蘇里江口難保不復回帆上駛著景綸等卽將以後續辦情形

隨時馳奏如該夷仍欲求見即著傳令來見  
按據條約與之駁詰毋再仍前顛預了事將  
此由五百里各諭令知之尋奏查明夷船已  
回俄界沿途探無滋擾已嚴飭三姓甯古塔  
各副都統勤練兵勇先事籌防如再遇俄船  
越境當即據理阻止以靖邊圉而守定約下  
所司知之予貴州銅仁等處陣亡遊擊王  
國學千總滕傳有外委傅慶有祭葬世職加  
等

大清穆宗繼天開運受中居正保大定功聖智  
誠孝信敏恭寬毅皇帝實錄卷之一百十

大清穆宗繼天開運受中居正保大定功聖智  
誠孝信敏恭寬毅皇帝實錄卷之一百十一

同治三年甲子八月己巳朔

上詣綏履殿問

慈安皇太后安平安室問

慈禧皇太后安至戊戌皆如之諭內閣恭親

王奏披瀝下忱請更正坐次一摺恭親王於

道光三十年錫封親王彼時惇親王係在郡

王班次欽奉

皇考文宗顯皇帝諭旨嗣後除朝祭大典外內

廷行走及各衙門請派差使單內惇親王奕

諱著在恭親王奕訢之前嗣於咸豐六年惇



郡王由貝勒賞還郡王咸豐十年惇郡王由郡王晉封親王經宗人府禮部奏請坐次奉硃批合坐坐次在恭親王奕訢之次當時均未奉有內廷班次之

旨茲據恭親王奏王與惇親王分屬宗室情關手足每逢朝祭之典以及內廷行走班次常懷踰越之慚懇恩更正朝祭大典及內廷行走班次等語我

慈安皇太后

慈禧皇太后因奉有咸豐十年

皇考硃諭未肯遽允所請慰勉再三恭親王以昆季之誼不欲以弟先兄殷殷籲懇不得已推原道光三十年前奉

諭旨變通辦理俯如所請俾克盡友恭之義藉以順秩敘之常嗣後朝祭大典內廷行走及各衙門請派差使聯銜奏事摺件恭親王均著排列在惇親王之次以遂誠悃又諭宗人府奏請欽定醇郡王朝班坐次分繕清單

請旨一摺據稱諸王朝班坐次向由禮部奏定現在醇郡王已賞加親王銜其坐次似應再行覈議查咸豐年間定郡王載銓賞加親王銜時宗人府所辦彙件俱列銜在親王之次郡王之前當即據查禮部旋據覆稱載銓加銜時並未另奏坐次例內亦無郡王加銜應奏坐次明文此次醇郡王坐次應否移易之處伏候欽定等語朝班坐位典禮攸關自應次序合宜方符體制所有醇郡王坐次如

遇兩翼合坐除恭親王本日已俯如所請移在惇親王之次外醇郡王即著在恭親王之次克勤郡王晉祺之前其左翼坐次著仍在惇親王之次孚郡王之前嗣後如有特旨加銜者均著宗人府照此次成案奏請辦理著為令又諭前因南城御史景霖等奏宗室覺羅潛住外城滋生事端當經明降諭旨飭查究辦並勒限遷回內城茲據宗人府奏稱例載宗室覺羅在城外居住者應由該城坊

編查列入甲冊隨時查覈儻於編查時不遵約束或查有不安本分及任意容留閑雜人等卽由巡城御史密呈都察院堂官酌其情節較輕者知照宗人府派員會同城坊查究其情節較重者卽由都察院奏聞辦理現在居住外城之宗室覺羅請仍照舊例並著擬章程辦理等語宗室覺羅居住外城原屬例所不禁惟該御史等前奏所稱近有詭託姓名滋生事端不知自愛者亦不可不嚴行查

辦嗣後居住外城之宗室覺羅等除業經編入保甲者仍照舊例辦理無庸概行遷回內城外如有詭託姓名潛居外城滋生事端不知自愛者卽著照宗人府所擬一面由該城御史查明姓名旗分開單知照該衙門查傳究辦一面由宗人府飭傳各旗族學長佐領等勒令卽時遷回內城嚴加管束經此次明定章程之後儻該宗室覺羅人等仍有未經報明城坊編入甲冊潛居外城滋事怙惡不

悛者一經各該城御史查拏送交宗人府卽著該衙門從嚴懲辦以肅禁令○諭議政王軍機大臣等楊岳斌沈葆楨奏官軍攻克南豐縣城大概情形一摺據稱參將韓進春等稟報南豐縣城已於七月十八日經官軍克復一切詳細情形諒已奏報在途前此奏報克復宜黃等處所有著名賊首李侍賢汪海洋陳炳汶等逆未據聲敘曾否傷斃此次攻拔堅城該逆等是否殲擒抑已於宜黃等處

殲斃該縣接壤甯都與福建建甯甯化處處毗連韓進春駐守建昌前報東路長興地方復有賊擾現在賊由何路竄逃著楊岳斌沈葆楨查明具奏並檄飭各路防兵嚴防竄越毋令再擾完善之區如賊逼近閩境仍遵前旨飛咨閩省督撫嚴飭防軍會剿毋稍疏虞江西逆踞五城俱已克復楊岳斌於何時起程赴陝甘總督新任並著迅速具奏將此由六百里各諭令知之○又諭滿慶恩慶奏接

奉寄諭遵飭汪曲結布撫輯僧俗現據協理商上事務諾們罕汪曲結布稟稱遵查三大寺啟釐根由實因呼徵徇私作弊與色拉寺眾僧無涉現在三大寺甚屬和睦藏地亦安靜肅清惟當謹遵諭旨協辦商務隨同達賴喇嘛撫綏僧俗等情並懇轉進哈達佛匣暨鈔錄商屬僧俗番眾切實甘結呈覽請將呼徵並其從人在京作何發落及呼徵寺院土地人民應否歸達賴喇嘛收管降旨遵辦各

等語前因呼徵剋扣布施辦理不善致僧俗激成事端汪曲結布素為眾情所服諭滿慶等飭令協辦商務茲據滿慶等奏汪曲結布遵諭撫綏僧俗全藏安靜辦理甚為妥協著滿慶等傳旨嘉獎仍責令將商上事務並合藏僧俗番眾人等隨同達賴喇嘛妥為綏輯以期永遠相安儻此後辦理未盡合宜或致別啟釐端卽惟滿慶恩慶等及達賴喇嘛汪曲結布是問呼徵業已在京病故其從人等

如令卽行回藏恐其復行造言生事反致煽惑人心是以仍令在京居住至呼徵所管寺院土地人民著照滿慶等所擬歸達賴喇嘛收管卽由滿慶等傳知妥辦前經疊諭福濟馳赴西藏幫同景紋勘辦瞻對與土司互鬪情形日久尚未前往著俟道路疏通各土司均已安設驛站卽行懷遵前旨迅速前進毋得再有稽留滿慶俟景紋到藏卽將藏務移交起程回京並著崇實駱秉章選派委員接

管拉里糧務以便李玉圖交替回川俟該員到川後卽由崇實駱秉章會同滿慶等將該員勞績查明保奏候旨錄用本日據崇實駱秉章奏唐古特借用廓爾喀礮位並藥鉛夫役口糧等項共需銀七千餘兩現因道途通塞靡常川省勢難剋期解到請飭藏中先行籌給等語著滿慶恩慶於藏庫現存無論何項先行籌款撥給俟道路疏通卽由駱秉章於撥解藏餉時搭解歸款將此由五百里各

諭令知之。又諭崇實駱秉章奏前奉諭旨飭查已革總堪布身死情節。因川中距藏寫遠不特此案無從懸揣。卽藏中實在情形亦難知悉。現據史致康稟稱。明正裏塘各土司現已具結安站。由打箭鑪以至裏塘大路可通。惟一到乍了。卽入藏地。福濟等能否前進。尚未可知。且恐番官與各土司串通。故為設站。俟福濟等到後。任其要挾。此時汪曲結布等已成固結莫解之勢。請暫予羈縻。將從前

各案暫緩深求。俟滿慶李玉圃進關再行查辦等語。本日又據滿慶等奏。接奉寄諭飭令汪曲結布協理商上事務。該達賴喇嘛及汪曲結布均各感激。並商屬僧俗公同出結。永遠和睦各等語。西藏情形。本非內地可比。朝廷所重。惟在全藏乂安。是以厯次所降諭旨。雖暗諭崇實駱秉章福濟景紋將從前各案密行查辦。而於滿慶等寄諭內。仍將汪曲結布暫示羈縻。令其協理商上事務。並將李玉

圃嘉獎。令滿慶等會同駱秉章保奏送部引見。原以安藏俗之心。而撤滿慶李玉圃之權。令其離藏。以便查辦。駱秉章所奏各情。卽係朝廷命意所在。本日復將呼徵在京身死一節。諭知滿慶所有商上事務。卽責成汪曲結布妥為撫輯。永息爭端。仍將崇實等銜名敘入以釋其疑。惟滿慶李玉圃把持藏務狼狽為奸。已成滇省之勢。非調令進關。無從辦理。滿慶本日摺內。復稱李玉圃應俟川派接管

糧務之員到來。並景紋等抵藏。再會同該將軍總督聲敘勞績。保奏。並該大臣亦卽交卸回京等語。是景紋等一日不能抵藏。滿慶等反得以交卸無人。藉詞延宕。藏務終無了期。現在各土司均已具結安站。是由川赴藏道路業已疏通。福濟景紋屢經有旨嚴催。尚復任意遷延。畏首畏尾。實屬不知緩急。著卽星馳前進。抵藏後。宣布朝廷德意。將僧俗人眾妥為安撫。以便滿慶交卸回京。一面將交查

各案嚴密訪查會同崇實駱秉章覆奏辦理並著駱秉章迅速揀派接管糧務之員星馳赴藏令李玉圖交卸回川使該二員無所藉口呼徵雖死其隨從人等若令其即行回藏恐為滿慶等謀害滅口此時仍暫羈京師俟福濟景紋抵藏後如有應行對質之處再將該隨從人等遞解回藏以憑質訊將此由五百里各密諭知之○命禮部左侍郎龐鍾璐提督順天學政翰林院編修歐陽保極提督

河南學政趙佑宸提督山東學政鍾寶華提督陝甘學政侍講學士楊秉璋提督四川學政國子監司業劉熙載提督廣東學政翰林院編修孫欽昂提督廣西學政黎培敬提督貴州學政奉天府府丞兼學政王映斗江蘇學政宜振安徽學政朱蘭浙江學政吳存義江西學政何廷謙福建學政章鋈湖北學政孫家鼐湖南學政呂朝瑞山西學政黃鈺均留任補鑄浙江金華協副將福建龍巖營

守備江蘇寶山縣管糧主簿河南南召縣巡檢各關防印信條記從巡撫左宗棠徐宗幹李鴻章張之萬請也○庚午諭議政王軍機大臣等常清奏回匪肆擾三城伊犁危急請催調各路官兵援剿一摺庫車及喀喇沙爾兩城被匪占踞由伊犁至烏魯木齊中間庫爾喀喇烏蘇烏蘭烏素及毗連之綏來昌吉各縣逆回肆擾文報不通六月二十六日烏魯木齊漢城失守滿城被圍新疆逆燄日張勢甚岌岌伊犁為各城領袖防守最關緊要常清現將圖庫爾所帶之兵一千餘名調回守城並將蒙古等兵交德明管帶防堵要隘又派蒙古兵丁防守精河等處即著照所擬嚴飭各軍扼要嚴防毋稍疏懈巴燕岱等八城回民句煽堪虞著隨時彈壓毋令生事塔爾巴哈台關繫伊犁北路著錫霖速為接印任事調集所屬蒙兵護守城池會同博勒果素安籌辦理再調蒙古兵二千名交明緒統

帶來伊與常清會籌防勦明緒務卽星馳前進不可稽延葉爾羌蒙古罕等處待援急切此時伊犁無兵可撥務須飛咨各該城固守待援毋稍疏失烏魯木齊為東西大路咽喉若不將漢城迅圖克復滿城之圍何由而解且東西大路梗塞更阻我進兵之路著麟興車林敦多布廣鳳奎昌迅派喀爾喀兵二萬名馳赴烏魯木齊迅克漢城立解滿城之圍如一時不能足數先其所急籌撥數千亦可

稍壯聲勢並著該大臣等迅速籌辦漢城失守後葉布沖額等如何下落平瑞困守危城著嚴行守禦以待援師俟烏科二城兵到卽著會合夾擊以收聚殲之效一面將漢城失守情形詳查具奏現在江甯克復全股髮逆殲滅南路大兵可以騰出已飭令各路抽調精兵出關勦賊並飛催四川等省督撫迅將前撥餉銀源源籌解不日兵餉俱到回逆諒不難次第殄除常清當就現有兵力並調到

各兵統籌勦辦以保巖疆將此由六百里各諭令知之又諭常清等奏回匪肆擾失陷三城伊犁危急一摺新疆回匪滋事占踞庫車喀喇沙爾並陷烏魯木齊漢城圍攻滿城賊勢甚熾因思新疆回匪與甘省逆回聲氣相通難保不暗中勾結擾及關內都興阿勒辦甘回雖入境以來疊獲勝仗丕振軍聲而所部究形單薄若新疆回匪與甘回潛通意欲窺伺則分兵堵勦必至臨時掣肘難於分

應不可不豫為籌備以厚兵力陝西藍逆一股現已敗竄南山軍務已有起色劉蓉以巡撫帶兵事權專一足可勦辦卽責令該撫將此股敗匪悉數殲除穆圖善前有請回湖北勦賊之語具見勇往任事甚屬可嘉此時鄂省兵力厚於甘省而甘省軍情較鄂省尤為緊要卽著該將軍統帶所部馬步各營兼程馳往甘省會同都興阿雷正綰妥籌勦辦並著駱秉章於川省得力兵勇挑選數千籌備

軍裝口糧揀派知兵大員統帶前赴都興阿軍營聽候調遣。藍逆竄入南山恐其乘隙窺川又成滋蔓。駱東章當飭沿邊將士妥為防範毋稍疏懈。新疆一帶偏地回氛恐其愈熾愈東入關滋擾。恩麟當督飭員弁勤加偵探先事防維不可稍涉大意。將此由六百里諭知都興阿穆圖善駱東章雷正綰劉蓉並傳諭恩麟知之。○又諭前因新疆回氛不靖疊經諭令楊岳斌酌帶所部馳赴陝甘替出都

興阿帶兵出關勦賊。本日據常清奏庫車及喀喇沙爾兩城被回匪占踞後兇燄大張六月十二日烏魯木齊漢城失守滿城被圍伊犁民心震動防勦兼籌情形萬分危急請速調大兵前來援救各等語。伊犁兵單餉絀而回匪變起倉卒連陷三城賊氛甚熾若不迅速往援後患不堪設想。都興阿一軍已抵甯夏之花馬池距關較近惟該將軍所部人數無多且初到卽獲勝仗軍聲已振若遽令其

出關則甘回又將復熾此時江右連復五城賊鋒大挫軍務稍鬆楊岳斌務當懍遵前旨酌帶勁兵數千剋日起程赴甘會合雷正綰等軍將該處回氛迅速埽蕩以副委任。鮑超一至江省卽奏奇勦實屬奮勇可嘉。沈葆楨當會同鮑超及劉典等督率諸軍將敗殘餘匪一氣勦除淨盡毋令擾及閩疆又成不了之局。楊岳斌帶兵赴甘後江皖一帶如有必須添兵防勦之處著曾國藩斟酌情形妥籌

調派毋稍疏忽將此由六百里諭知曾國藩楊岳斌沈葆楨並傳諭鮑超劉典知之。○又諭前據戶部奏遵旨議撥新疆軍餉請飭山西於截留防費內餘銀二十萬兩撥補新疆及庫車軍餉並請飭四川等省將前撥軍餉計四十萬兩分批起解當經諭令駱東章等將前項奏撥銀兩解往甘肅轉解新疆茲據常清等奏回匪肆擾占踞庫車喀喇沙爾兩城並烏魯木齊漢城失守滿城被圍伊犁危

急軍餉涓滴皆無等語。新疆各城軍餉久經支絀。此次回匪肆擾失陷三城。軍情萬分緊急。需用浩繁。實非尋常可比。著沈桂芬即遵前次諭旨。將截留防費內下餘銀二十萬兩。迅派妥員解往。作為新疆軍餉。並著駱秉章將原撥銀十六萬兩。閻敬銘將原撥未解銀六萬兩。沈桂芬將原撥未解銀八萬兩。張之萬將原撥銀七萬兩。遵照前旨迅速如數解交甘肅安肅道庫。咨明陝甘總督。遞解鎮迪。

道庫以濟急需。不得稍有遲誤。當此新疆軍務喫緊待餉迫切之際。各該督撫等務當竭力籌措。迅速起解。免致貽誤大局。是為至要。將此由六百里各諭令知之。○辛未諭內閣。刑部奏本年奉旨停句情重各犯。是否仍行查辦。抑或一併停辦。請旨遵行等語。著該部查照嘉慶甲子年間成案。將情罪重大各犯。仍行查辦。○又諭都興阿奏甘省難回過多。請派大員查辦。妥為安置一摺。據稱陝西回

眾前經大兵勦辦。望風逃入甘省。自平涼固原鹽茶收復後。兇悍之徒多就誅滅。其餘被脅之眾。扶老攜幼。尚不下數萬人。甘省無從安插。現經署臬司楊炳銓等。飭令該頭目等查明籍貫人數。造具清冊。請派大員赴甘。查明准將該回眾解回陝西原籍安插等語。前因陝西回匪煽亂。荼毒生靈。朝廷命將出師。無非欲除暴安良。登斯民於衽席。疊經諭令統兵大臣。但分良莠。不分漢回。初未嘗因回

民中偶有逞兇藐法之人。即將安分良回概行誅戮。茲據都興阿奏稱。陝省回民逃入甘省者。其中被脅難回。尚盈數萬。此等回民大率因大兵進剿。惑於奸回謠言。被其偏脅。紛紛遠竄。此時天戈所指。疊克堅城。悍黨業就殲戮。而該難回等。蕩析離居。罄罄待哺。朝廷一視同仁。豈忍令數萬生靈展轉溝壑。因思此等回眾。籍隸陝西者已數百年。與該省漢民相安已久。且邱墓田廬均在原籍。該回眾



等自必樂歸故土。卽該省漢民亦斷不至因遭逆回荼毒致與安分良回稍存嫌隙。總之漢民回民皆吾赤子。初未嘗稍存歧視。該地方官果能宣布朝廷德意。使漢回居民各安生業。永息爭端。民雖至愚。豈有不為感悟之理。著派陝西按察使張集馨馳赴甘肅。將陝省難回詳細查明。如實係被賊倡脅。現已投誠者。概准免罪。其有原籍可歸者。卽分別解回安插。並著劉蓉於此起回民回籍時酌量

情形妥為安置。儻該回眾等回籍後仍敢懷疑搆釁不遵約束。或漢民中有意存歧視逞忿尋仇者。均著該地方官分別從嚴懲辦。該督撫卽刊刻謄黃。徧行曉諭。用示朝廷胞與為懷。秉公辦理至意。諭議政王軍機大臣等。都興阿奏官軍連獲大捷。攻克寶豐縣城。固鹽收撫回眾過多。安置為難。請派大員來甘查辦。並飭恩麟妥籌守禦。行知阿拉善王等將應派蒙兵暫緩派往各摺片。杜嘎爾督

軍深入沙磧背水成軍。旬日之間連獲五捷。立將寶豐縣城攻克。實屬勇敢。有為勤勞懋著。卽著都興阿飭令杜嘎爾統帶各軍節節進剿。以竟全功。甯靈地廣賊眾。該將軍務當嚴飭各軍穩慎圖功。毋稍大意。陶茂林一軍進剿張家川賊匪。近日接仗情形未據。雷正綰奏報殊深塵繫。著雷正綰卽飭陶茂林激勵將士迅速掃蕩。以孤賊勢。平涼雖經克復。西北逆氛尚熾。雷正綰當督率所部各軍相

機進剿。俾賊匪有所牽制。不敢赴援。甯靈是為至要。恩麟防守省垣。並著督飭將士扼要駐守。不可以徃於撫議。稍涉鬆勁。鹽固回匪就撫。本日已明降諭旨。准予投誠免罪。並派張集馨前赴甘省查辦。惟據該將軍奏稱降眾不下數萬。甘省漢回仇隙已深。無從安插。必須遣回陝省本籍。各復本業。方可設法安置。所奏自係實在情形。張集馨接奉此旨。卽著迅赴甘省悉心籌畫。妥為辦理。前據張集

營奏西同兩府概不准回逆復回再行入境以杜釁端等語原為保衛閭閻起見現在就撫回數甚多若不准其還籍復業難保不別生事端張集營辦理此事毋得膠執已見惟當分良莠不分漢回如果該回眾真心反正即派員查明該回人原籍州縣陸續護送回籍俾復故業該回到陝後著劉蓉妥為安插毋致失所該降人等經此次特恩免罪務各洗心革面永安生計儻敢別滋事端即著從

重懲辦陝省漢民亦不得與回人尋仇啟釁致生枝節如敢故違即著隨時認真懲辦毋稍寬縱發去諭旨一道著都興阿劉蓉刊刻謄黃宣布德意伊克昭盟長固山貝子巴達爾呼應派杭金鄂多克二旗兵一百餘名著都興阿飭令嚴防本境無庸派往助剿沿途運送軍火米糧仍飭鄂爾多斯各該旗豫備駝隻妥為護送將此由六百里諭知都興阿雷正綰劉蓉並傳諭恩麟張集營知之○又

諭明緒奏回匪肆擾連陷三城現擬統帶蒙古官兵赴伊會商軍務並請將塔城回漢掌教鄉約等賞給頂帶及行文俄國准照議單分界各摺片所奏回匪變亂情形與昨日常清摺報大略相同惟西路兵單餉絀變起倉卒籌辦防剿萬分棘手明緒此次所帶察哈爾厄魯特等弁兵五百名並巴霞管帶之土爾扈特兵五百名籌備鹽菜口糧已屬左支右絀兼之軍火器械亦不齊全殊難望其禦

侮著明緒再於塔爾巴哈台存留軍器內酌量添撥或於現在無事各城撥給若干俾榮全妥為駕馭以利軍行想該大臣必能斟酌辦理也回民掌教石金斗鄉約陳生福等既能稽查匪徒彈壓回眾始終不懈自應量予恩施石金斗著賞給五品頂帶陳生福海玉珍著賞給六品頂帶馬義等十名蔡以涵等四名均著賞給空金頂以示獎勵明緒現赴伊犁即著錫霖博勒果素等宣布朝廷德意

將止分良莠不分漢回辦法。妥為撫輯。俾漢回永遠相安。毋令他處回匪潛來塔城煽惑滋事。伊犁為各城領袖。常清身膺疆寄。責無旁貸。務當與明緒統籌熟計。就現有兵力及調到各軍實力防剿。烏魯木齊滿城危急。平瑞等當力籌守禦。迅解城圍。毋稍疏懈。麟興車林敦多布恪遵昨日諭旨。將應調喀爾喀蒙兵會商科布多辦事大臣速行調派。前赴烏城以厚兵力。此時新疆地方回氛猖獗。而

俄國兵隊又節節移近吐爾根河西駐紮。強占卡內地方。明緒等以內憂外患相逼而來。已行文西悉畢爾衙門。准照該國議單分界。自係因勢處萬難。不得不從權籌辦。且既已行文即屬無可挽回。將來俄使到塔。明誼錫霖等務當妥為辦理。迅速定界。以安人心。不得於議單之外。再生枝節。將此由六百里各諭令知之。江西巡撫沈葆楨奏江省軍務稍鬆。擬將本年甲子科並補行辛酉科鄉試

於十月舉行從之。以克復甘肅寶豐縣城。副都統杜嘎爾得旨嘉獎。並賞白玉搬指一箇。翎管一枝。火鐮一件。大荷包一對。小荷包兩箇。江紬馬褂料袍料各一件。以二等侍衛色楞額為頭等侍衛。予江西新城殉難主事鄧桂榮庶母李氏妻王氏暨子女等分別旌卹如例。蠲緩江西湖口彭澤鄱陽南昌新建豐城進賢新淦清江新喻蓮花萬安安福永新餘干樂平建昌德化德安十九廳縣被水被旱被擾地方新舊額賦暨雜課有差。壬申諭議政王軍機大臣等官文奏官軍約期會剿連獲勝仗。並派兵豫扼黃孝要隘。一摺。另片奏攻克銀家官塘等賊壘。並克白果老巢等語。七月十九等日。成大吉等三面進攻白果及夫子河等處。髮捻楊朝林等率軍橫攻將沙河等處賊壘踣平多座。該逆奔逃無路。伏匿於銀家官塘三角灣壘內。姜玉順等進剿密耳山大股賊匪。亦獲大捷。賊向

鵝籠司安家寨等處北走。其中館驛聚賊亦經姜玉順等擊敗。髮逆馬融和等竄蘄水縣屬之關口蔡家河一帶。梁洪勝等抄入賊館。頗有斬擒。二十一日各軍將銀家官塘等處賊壘悉數毀平。並克白杲老巢。餘匪東西分竄蔡家河及淨瓶山等處。官文已飛咨僧格林沁等會合夾擊。著僧格林沁督飭馬步各軍將麻城賊匪認真勦洗。其竄光山新集之賊趨向未定。僧格林沁現駐光州。諒可確探。

賊蹤派兵迎擊。張之萬責任封圻亦不得坐視。逆匪闖入並著於光羅等境嚴密防勦。毋稍疏忽。賊蹤飄忽靡常。恐不得志於楚豫。將犯皖疆。曾國藩喬松年當督飭派出前敵各軍遇賊即擊。如防勦不力。查由何路入境。即將派防之帶兵官嚴行叅處。或仍圖由舊路回陝。卽著劉蓉李雲麟扼要設防。以杜回竄。現在由白杲山內東竄之賊。由大坳小坳竄蔡家河等處。鵝籠司安家寨各賊股尚未盡。

除是楚北賊氛仍熾。未可稍涉鬆勁。官文當指揮各軍多設偵探。視賊所向跟蹤躡剿。未可復任擾及完善。致滋蔓延。正在寄諭。聞據張之萬等奏。豫軍會勦麻城獲勝。並擒獲汝正新息境內餘匪一摺。麻城之賊如敗竄東北。卽係豫之商城地面。疊經諭令張之萬派兵防堵。現經僧格林沁派令張曜徐連陞所部前往商城駐紮。著張之萬嚴飭該總兵等實力守禦。如能出境迎擊。更勝於本境設防。

如由黃孝折而西北。卽是豫省之信陽羅山。著卽飭令派出之張士元馳赴信羅嚴扼要隘。其荆子關一路毗連陝境。陝賊未靖。仍應加意防範。毋稍大意。汝正新息餘匪時名書等解營正法。辦理尚為認真。此外餘匪難保不潛匿各處。仍圖煽亂。著張之萬毛昶熙督飭趙鴻舉等認真搜捕。務須盡絕根株。毋留後患。將此由六百里各諭令知之。○癸酉諭內閣。御史富稼奏吏部銓政紛歧。恐滋弊竇。

並臚陳辦理歧異各條請飭查覈一摺據稱前任河南考城縣知縣鄭榮禧本係例應歸選人員該部准其仍發原省調補河南商邱縣知縣朱焜前在內鄉縣任內已有四叅起限處分該部未據實指駁卽准調任江蘇海州運判一缺本應陳照補授而以沈炳擬補河南候補知縣王簡山東候補知縣任敬均應補交捐免保舉銀兩而辦理兩歧各等語吏部總司銓選必須細查成例恪守定章况

近來月選較繁稽查尤宜嚴密若如該御史所奏准駁淆亂蒙混遷就何以懲奸蠹而敘官方所有該御史指陳各條著該部詳細查奏如有吏胥舞弊等情卽著嚴究懲辦此外有無辦理歧異之處並著該部堂官督率司員等隨時稽覈以肅銓政○諭議政王軍機大臣等譚廷襄奏汶河戴村等處壩工請旨辦理一摺據稱東平州戴村壩遏汶入運該處有玲瓏亂石滾水各石壩相連又有三合

土壩均為遏汶而設現在玲瓏石壩間有損壞土壩衝成決口汶水洩入鹽河運道日形淤淺覈實估計補修玲瓏石壩需實銀四千五百餘兩拆修三合土壩需實銀一萬五千三百餘兩如照部咨卽在每年歲搶修並咨案酌減實銀內撥給則全河坐廢如欲彼此俱為覈減勢成兩誤請旨辦理等語此項壩工關繫極為緊要如將就了事旋修旋決勞費將無已時既據該河督奏稱就現時籌得

實銀加以藩運兩庫再為續籌或將兗沂道庫存儲河銀酌量提用均可集事著照譚廷襄所請就現籌各款辦理無庸照部議在每年歲搶修並咨案酌減實銀內撥給並著該河督嚴飭承修各員認真興築限令汛前辦竣務期工堅料實毋得稍涉草率致誤要工將此諭令知之○又諭恩麟奏隴西漢回民團互相戕害同城文武稟報兩歧一摺甘肅隴西縣西鄉武生李耀榮等聚眾萬餘名為

海團圍攻鞏昌府城由西關擁入與回民互相戕害署遊擊周勝近在同城何以所稟海團來城焚殺情節與該府知府斌越等率多兩歧至西鄉海團與府城回民究竟平日因何結怨並因何事啟釁均著恩麟確切查明據實具奏該護督現派都司鄒玉標所帶調省黔勇八百名留駐鞏昌並經林之望添派勇目文象奎帶黔勇一千二百名馳援卽著恩麟檄飭林之望統率兵勇將一切防勒事

宜妥為籌辦俾鞏城速臻安謐毋令再行滋擾知府斌越等辦理不善實屬咎無可辭至誘執團首李耀榮等欲行正法尤難保無殺團媚回情事代理隴西縣知縣黃國錦著先行革職鞏昌府知府斌越著一併撤任恩麟卽督飭林之望徹底根究嚴行懲辦回疆匪勢鴟張軍情萬分危急亟須添撥勁旅以資埽蕩著都興阿雷正綰懍遵疊次諭旨將甯靈等處賊匪迅速殄滅庶可騰出兵力勦辦

新疆之匪新疆回逆如入關暗圖勾結與甘省回匪聯絡一氣防勒愈形棘手著都興阿雷正綰酌度情形調派精兵嚴扼要隘使口外之賊與口內之賊不能勾串聯為一氣方為妥善俟川陝兵到再行派員統帶進剿將此由六百里諭知都興阿雷正綰並傳諭恩麟知之又諭恩麟奏兵餉緊急請飭催各省協撥銀兩並新疆回氣猖獗請並催各省協餉各一摺現在甘省回氣尚熾而製械之

貲養軍之用羅掘俱窮實有朝不謀夕之勢疊據呼籲再三各該省豈容以應解之款日久宕延著曾國藩駱秉章左宗棠毛鴻賓李鴻章沈葆楨張之萬閻敬銘劉蓉沈桂芬郭嵩燾懍遵本年六月二十九日寄諭無論何款各先撥銀二三十萬兩迅解蘭州省城以應急需其餘欠款仍著源源報解以資接濟至新疆回匪大肆猖獗庫車喀喇沙爾烏魯木齊漢城疊報失守古城又復被圍軍情喫

緊萬分餉需尤刻不容緩甘省自顧不遑更難望其協濟著駱秉章閻敬銘張之萬各將原撥銀兩懍遵前旨迅速解交甘肅安肅道庫轉解新疆並著沈桂芬仍遵前旨將截留防費內下餘銀二十萬兩及欠解之八萬兩迅卽派員解往作為新疆軍餉以濟軍食毋得再有延宕致誤事機將此由五百里各諭令知之 又諭慶昫等奏杜嘎爾援兵從紐家溝渡河與賊接仗獲勝應卽遵照前旨妥

籌夾擊惟城防不容稍鬆兵丁不能多撥又甯郡迤南之納家牯王家團莊兩處為逆首納萬鑑占踞與郡城為犄角之助擬派團首入山招集數百人湊合官軍共千名以上卽由常陞統帶先將納家牯之賊與郡城劃而為二等語杜嘎爾之軍渡河後五戰皆捷並克寶豐縣城北路援兵軍威丕振該將軍等擬先攻郡南之納家牯賊巢亦牽制賊勢之一法杜嘎爾之兵如已進攻甯郡卽著常陞

迅帶所撥兵勇嚴斷該逆往來道路疏通郡南各鄉堡運糧要道使賊兼顧不遑一面飭令平羅縣知縣長謙多備雲梯攻具以備杜嘎爾援軍進攻之用並卽嚴檄梁生嶽將中衛靖遠一路要隘嚴密扼守遏賊西竄並將西路援賊力籌堵截以分賊勢慶昫仍將滿城守禦妥籌布置毋稍疏虞將此由五百里各諭令知之 又諭保恆奏賊勢猖獗官兵挫失自請議處並請飭派署哈密印務各摺

片古城逆匪糾眾滋擾經官軍擊退後餘匪盤踞濟木薩泉子西南山依險紮營保恆派協領巴哈布等督率滿營會同古城綠營官兵暨知縣文光所帶民勇等分路進剿遇賊接仗頗有斬擒賊眾大亂奔潰因山路崎嶇時已薄暮卽行收隊詎文光管帶在東西兩溝堵禦之民勇見賊敗竄貪取財物舍營直擣賊巢致被賊隊四面圍攻由中溝敗回將官軍隊伍衝亂該逆乘勢繞出谷口從後夾

攻官軍腹背受敵亦即敗亂傷亡及遺失軍械甚多現在逆氛甚熾計已蔓延山外該城兵勇新經挫衄防勒更形喫緊亟須添撥勁旅赴援以厚兵力著麟興車林敦多布懋遵前諭即行飛劄前調蒙古部落盟長挑選精壯官兵五百名配發軍火星速馳赴古城並著廣鳳奎昌於科布多屯防蒙古官兵內迅速揀調精銳二千名懋遵前次諭旨配給軍火器械星馳赴援古城毋得稍有稽延致誤

事機常清統轄各城值此匪蹤肆擾豈得莫展一籌束手坐視前經諭令與平瑞等籌商如就近各城中有精壯兵勇可資調派即一面奏聞一面分撥仍著常清平瑞遵照前旨迅籌辦理烏魯木齊漢城被陷平瑞固守滿城惟當激勵存防弁兵嚴行守禦以待援軍麟興車林敦多布廣鳳奎昌迅將前日諭撥之喀爾喀官兵即行儘數調派馳援保恆因聯捷未到未能即赴哈密著平瑞悉心籌畫

如烏垣有可派往接署之員即行委赴哈密接授印務文祥即可馳赴古城與保恆籌勦該處逆匪以次進援迪化均著平瑞文祥妥籌商辦保恆於所派員弁進勒回逆未能先事妥籌以致傷兵失械咎無可辭著先行交部議處協領巴哈布佐領德壽尚阿本驍騎校訥爾精額前任奇台縣知縣文光濟木薩營參將倭賀縣丞陶珙著一併交部覈議分別按律懲辦正在寄諭間據恩麟馳奏六月

十九等日奇台漢回搆亂回匪逃竄古城將街道全行焚燒傷斃民人一千餘名刻下圍困滿漢二城萬分喫緊又迪化回匪於六月十二日將烏垣漢城焚毀業布冲額已被戕害平瑞帶領滿兵在紅山背接仗幾至失利逆賊方張已成不可撲滅之勢請飭烏科二城迅速派兵援勒等語著麟興車林敦多布廣鳳奎昌於接到此旨時迅即遵照調撥馳赴烏魯木齊古城以資援勒儻敢稍涉觀望



貽誤戎機必將麟興等從重懲處業布沖額被害暨烏魯木齊漢城失陷詳細情形並著常清平瑞查明馳奏將此由六百里各諭令知之尋兵部議保恆應降二級留任從之○又諭新疆地方緊要近來簡放各城大臣除哈密辦事大臣保恆本在古城即可赴任烏什幫辦大臣伊昌阿在都興阿軍營外新授伊犁領隊大臣阿隆阿烏魯木齊領隊大臣德克吉訥巴里坤領隊大臣訥爾濟吐魯番領隊大臣扎克當阿古城領隊大臣聯捷庫爾喀喇烏蘇領隊大臣惠慶葉爾羌幫辦大臣常績喀什噶爾辦事大臣常明和闐辦事大臣奎章烏什辦事大臣慶明阿克蘇辦事大臣崇恩哈密幫辦大臣明瑤先後奉旨簡放為日已久俱尚未據報抵任新疆回匪紛紛變亂占踞多城軍務正當喫緊各該大臣均有統兵防勦彈壓撫綏之責豈容任意延玩節節逗遛著阿克敦布劉長佑沈桂芬於

接奉此旨後查明各該大臣現在行抵何處卽傳知迅速趲程前進毋許再有稽延如有託故不前藉詞延宕者卽指名奏叅毋稍瞻徇將此由六百里各諭令知之○工部右侍郎和潤因病解職以內閣學士毓祿為工部右侍郎管錢法堂事載驚署兵部左侍郎○予浙江杭州殉難內務府六品司庫繼曾祭葬世職眷屬人等分別旌卹如例○予浙江諸暨殉難從九品銜朱仁布政司理問銜朱禮祭葬世職眷屬人等分別旌卹如例○甲戌諭內閣萬青藜奏科場人數眾多號舍不敷擬請變通辦理御史台斐音等奏鄉試號舍不敷添搭棚號各一摺據稱貢院號舍適用者向止九千三百餘間本年應試士子已交納試卷一萬六百套號舍不敷現擬將向來膳錄對讀各號舍全給士子另搭席棚數處給膳錄對讀暫為辦公其運用物料及添設柵欄等件所有匠役人等擬令於初八日

以前士子未經點進之先晝夜趕辦完竣至三場試卷亦擬先後蓋印送進各等語本年甲子科順天鄉試士子踴躍觀光人數較多萬青藜等所請各節自係因時制宜即著該兼尹等迅速辦理務臻妥善○又諭李鴻章奏官軍克復湖州府城一摺堵逆黃汶金等固守湖州希圖號召賊黨抗拒官軍經李鴻章派令郭松林等分路進攻該逆於尹隆橋南岸堅築壘卡掘濠釘椿防守極為嚴密郭松林調齊開花礮隊於十五十六十七等日奮力轟擊黃汶金復挑悍黨數千繞呂山後路八字橋欲阻官軍糧道十九日郭松林抽派李長樂等三營馳往李家巷搶築營壘賊眾蜂擁來撲官軍迎戰兩時斃賊甚夥賊遂潰退二十日湖賊大隊自尹隆橋接連八字橋等處延袤二十餘里傾巢來爭郭松林飭令易用剛等分路迎敵山上羣逆衝下郭松林李長樂等捲旗突入縱橫盪決並飭王平

西礮船由河內助擊斃賊無數賊陣漸亂王永勝等由山脊翻下疾如風雨逆眾遂蒼黃紛竄陣斬偽列王黃十四及餘逆數千名二十六日夜間昇山守逆棄壘先遁潘鼎新會合浙軍帶隊追剿二十七日追至八里店水陸各軍併力夾擊賊眾大敗三里橋逆壘望風奔潰李朝斌劉秉璋張樹聲等各進大錢口攻毀賊營併至湖州城下沿途殺斃溺斃賊匪無算敗賊擁擠入城閉門不及潘鼎新

等率勇先登由東門攻入斬賊甚眾立將湖州府城克復勦辦甚為得手著左宗棠李鴻章督飭蘇浙各軍將潰竄之賊分投追捕悉數殲除尤為出力之提督李朝斌謀勇兼優所向無前著發去白玉四喜搬指一箇玉柄小刀一把火鐮一件大荷包一對小荷包二箇交李朝斌祇領道員潘鼎新督隊苦戰克復名城著賞穿黃馬褂翰林院侍講劉秉璋躬冒矢石治軍整嚴著賞給振勇巴圖魯名

號遇有應升之缺開列在前道員張樹聲堅忍百戰積功甚多著賞給二品頂帶以按察使遇缺提奏用示優獎署福建陸路提督郭松林奮勇勦賊左膀受傷著先行交部從優議敘仍著侯廣德四安克復後由李鴻章查明勞績與提督劉銘傳等一併從優保奏諭議政王軍機大臣等李鴻章奏官軍進攻四安廣德連獲勝仗來勢克復湖州府城一招覽奏甚為嘉悅湖州一城為髮逆悍黨麇

聚之所現在雖經收復而羣賊一日不盡終成不了之局且堵逆尤為著名悍賊洪幼逆復潛入其中難保不紛竄旁趨希圖免脫湖州西通四安毗連廣德該逆既節節築壘護其竄路是蓄意謀竄已非一日李鴻章既飭劉盛藻馳抵廣德即著督令派出之軍迎頭截擊並將四安廣德迅圖克復使該匪無可駐足自當易於翦滅郭松林屢著戰績此次因奮勇勦賊身受槍傷著傳旨存問勛其力

疾殺賊以竟全功左宗棠亦當飭在事諸軍迅速追勦敗匪盡行殲除以絕根株餘匪若由廣德上犯則徽甯一帶又形喫緊著曾國藩迅派得力將弁會同李鴻章所派之軍合力扼擊毋令逆蹤上竄以保皖南大局將此由六百里各諭令知之○以吏部尚書瑞常為順天鄉試正考官吏部尚書朱鳳標戶部尚書羅惇衍禮部尚書李棠階為副考官○以兵部尚書載齡刑部尚書趙光兼署吏部

尚書工部尚書單懋謙兼署戶部尚書都察院左都御史齊承彥署禮部尚書兵部左侍郎曹毓英署兵部尚書戶部右侍郎崇綸兼署禮部右侍郎以鑲白旗滿洲都統倭什琿布署正藍旗滿洲都統正藍旗漢軍副都統穆隆阿暫署左翼前鋒統領鑲藍旗滿洲副都統明善署鑲黃旗護軍統領鑲藍旗蒙古副都統恩齡署正藍旗護軍統領正紅旗滿洲副都統基溥署正黃旗滿洲副都統正

紅旗漢軍副都統增慶暫署正黃旗蒙古副都統正紅旗漢軍副都統裕瑞暫署鑲紅旗滿洲副都統○以江蘇蘇州等府撫恤難民出力賞在籍郎中王恩壽等花翎餘升敘有差予浙江湖州陣亡參將何錫恩遊擊張祖述都司余兆貴等祭葬世職加等○追予安徽甯國殉難知縣朱丙林陳葆森外委張雲華等祭葬世職監生吳楠賞卹加等○追予安徽廬江殉難文生盧堃祭葬世職如訓導例○乙亥諭內閣曾國藩奏停止廣東釐金請加廣該省文武鄉試中額一摺前因浙江江蘇安徽三省軍餉支絀經曾國藩奏請開辦廣東釐金三成留辦本省防剿七成協解江皖現計自同治元年七月起截至同治三年八月止除留歸該省軍需局外前後約解過軍餉銀一百二十萬兩該省商民踴躍輸將集成鉅款俾江甯各軍藉得迅速成功實屬好義急公有裨大局著照該大臣所請

加廣廣東文武鄉試永遠中額各四名以示鼓勵現在江甯既克各軍已議陸續裁撤該大臣奏請停止廣東釐捐自係為體恤商民起見惟裁勇之欠餉征兵之口糧需款仍鉅自應將該省釐金暫行照舊辦理以裕餉源俟各營餉項稍充再由該大臣奏請停辦○又諭前據沈葆楨奏道員周汝筠稟訐知縣石昌猷袒匪殺良請派大員審辦當經降旨交曾國藩提審茲據曾國藩審明定擬具奏此案江西前署南康縣知縣升任督糧道周汝筠因在署縣任內奉文辦理防剿事務借捐助餉任用許高鴻楊韶九等遂令倚勢勒捐罰產偪斃多命並有誣人為匪各情屢次經人控告周汝筠皆為曲庇致招物議該員卸任後經前任江西布政使李桓屬令後任南康縣知縣石昌猷將周汝筠劣蹟詳查而石昌猷刻意搜求誣列多款以重其罪於拏辦許高鴻楊韶九時並將許高鴻之父許觀

國獲案偁令呈送忤逆將許高鴻正法梟示任聽勇丁殘毀屍骸又不釋放其父復查拏其母捕其家屬追取田產充公直以叛逆治之至張書燁楊韶九尋仇互控兩相搶奪與此案本不相涉因許高鴻被殺後楊韶九往愬周汝筠該員遂併為一案指張書燁為匪卽以石昌猷袒匪殺良具稟現經審明許高鴻平日倚勢害命藉局吞財業經正法著無庸議石昌猷於此案並不悉心研鞫按律懲辦乃偁令許高鴻之父呈送忤逆加以極刑又復株連籍沒致有罪之誅轉同枉殺意存傾陷審辦矯誣業經革職著發往新疆充當若差遇赦永遠不准援免周汝筠雖無擅殺人犯受贓侵餉情事而偏信小人勒捐濫罰殃及無辜罪有應得惟念該員前此辦團勦賊保障江西南路曾著功績著從寬拔去花翎革去歷保道員知府等官以知縣降補革生楊韶九因與張書燁積有嫌隙屢行陷害

搶擾並稟請查拏張書燁父子株累張姓多人實屬非常傾險著發極邊足四千里充軍到配折責安置張書燁於查拏楊韶九之際意存報復來便搶奪楊姓多家亦屬有干法律業已身死著無庸議沈葆楨辦理此案雖意在急於除惡惟因石昌猷呈首忤逆一言率令回縣速辦致石昌猷得將許高鴻一犯專殺非尋常疏忽可比李桓因聞周汝筠苛政病民密令石昌猷詳查稟復固是正辦惟於石昌猷覆稟周汝筠得受典商贓銀等款概置不問輒將不應立決之忤逆一款草率定案並函令石昌猷於請將許高鴻正法之稟刪去奉某劄諭等字句不必具稟總督等語措置未能正大實屬不合沈葆楨李桓著交部分別議處尋議沈葆楨降二級留任准其抵銷李桓降三級調用不准抵銷從之諭議政王軍機大臣等有人奏直隸清豐縣奸民馬學孟卽馬三黑本係逆黨經地方官

宥其既往調隨官兵勦賊保至守備茲復怙惡不悛不遵該督調省當差輒敢私行回籍與在籍紳士孫懷珍構釁興訟擅將孫懷珍之子登時斫斃該縣知縣急出彈壓復被槍刺幾至殞命現聞結黨思變若不及早殲除恐釀成巨患等語馬學孟曾以團練為名經該督裁撤後是否安分守法若如所奏怙惡釀命目無法紀大為閭閻之害著劉長佑嚴密確查如實有前項各節亟應嚴密布置使之猝不及防立即殄除以弭巨患如尚能遵守約束並無不法情事即著據實具奏亦不必因有此奏操切從事致生事端原摺著鈔給閱看將此諭令知之○又諭曾國藩奏遵覆遣撤勇丁詳查逸賊及江皖近日軍情各摺片金陵大功雖已告蒧而裁兵之欠餉與出勒之行糧正煩籌畫曾國藩現派江蘇官紳赴滬勸捐並函商李鴻章酌分松滬釐金殊恐緩不濟急本日已於明發諭旨內令將

粵釐暫緩停止並寄諭毛鴻賓等照舊籌解計曾國藩軍營有此一款源源撥運自可稍濟兵糈李鴻章仍當督飭官紳將勸捐抽釐等事認真籌辦務令涓滴歸公以資協濟裁撤勇丁為善後第一要務既據曾國藩奏稱湘勇有業者多無根者少但使欠餉有著當可安靜回籍即著責成該大臣妥速辦理毋令游惰無歸別生枝節至挑補兵額一節既屬窒礙難行即著照該大臣勇則遣回原籍

兵則另募土著之議次第擘畫以期經久可行洪幅瑱敗殘之餘即使其人尚在亦屬無能為役惟該逆潛稱偽號刻有金玉偽璽非其餘賊酋可比其存亡實在下落必應查究明確方足以靖人心而弭後患仍著曾國藩詳細訪查務得確據此時湖州已復該逆曾否竄入湖城不難查訪而知並著左宗棠一體查明具奏至金陵逸賊既據曾國藩奏稱漏網者至多不過數百所有在防將士均著

免其查叅以勵有功聽逆陳炳汶率眾求撫自係懾於軍威勉思效順惟黨眾有六萬餘人洋槍隊七十餘人為數太多安置遣散均不易辦楊岳斌當督飭鮑超察看真偽妥籌辦理不可稍涉大意現在辦理情形及汪海洋譚逆李逆等蹤跡楊岳斌如尚未帶兵赴甘卽著會合沈葆楨迅速詳細具奏湖北之賊尚盤踞羅田麻城一帶曾國藩當會商喬松年將皖北防守事宜嚴密布置其皖南廣

德一路防勦尤關緊要著迅派得力陸師籌給餉項飭令剋日起程扼要駐紮會同李鴻章派撥弁兵迎勦竄賊毋稍延玩將此由六百里各諭令知之○又諭曾國藩奏停止廣東釐金一摺現在江甯省城雖經克復曾國藩軍營欠發遣勇餉項暨征兵行糧為數甚鉅且該省餘匪未淨尚須撥兵防勦需餉浩繁若將此項釐金遽行停止深恐餉項不繼籌辦又形棘手毛鴻賓等辦理釐金向能不

分畛域接濟鄰封該省商民亦能踴躍急公有裨軍務著毛鴻賓郭嵩燾督飭該局員等照舊徵收並仍照原定章程以三成留作本省軍需以七成撥解皖營俟江蘇上海等處籌定款項足敷接濟皖營之用再行停止解往將此由六百里各諭令知之○又諭吳棠奏東民侵占銅沛民田現在勦逐一摺據稱銅山沛縣境內之微山湖濱新淤地畝前有山東魚臺鉅野一帶災民遷避開墾湖荒並無民田迨後另有東民潛至沛縣境內占種民地創名新團與沛民時有搶割爭鬪之案屢經驅逐不去六月初三日突有新團奮匪糾眾搶入沛境劉莊寨殺傷人口等語山東民人始因避水徙入銅沛境內開墾湖濱閒田自謀生業尚屬情有可矜乃另來東民占種民地膽敢創立新團名目糾集匪黨劫寨殺人實屬目無法紀且有私築新團各圩濠深圩固抗拒官軍若不迅速勦辦何以除橫

暴而安善良現在吳崇已派徐州鎮道等帶兵勦逐將新團各圩平毀餘匪逃往西北新團兩圩著吳崇飭令派出各員弁實力追勦盡殲醜類將所立新團各圩一律平毀毋令逸匪逃匿其從前開墾湖荒之東民如查明實係開種閒田無礙本境民人生計且能安分謀生不致別滋事端即著飭令該管地方官編成戶籍責令按地升科輸租執業儻查有侵占民田及勾通新匪情事即立加驅逐

毋任逗遛生事庶不致貽患將來山東教會各匪甫經蕩平難保無逸出匪徒竄入其中希圖嘯聚江南銅沛一帶與山東兗沂曹各屬地界毗連此股匪徒雖經官軍勦散而此拏彼竄終為地方之害著閻敬銘督飭山東江南交界處所地方文武各官遇有前項逸匪務當不分畛域立即掩捕盡法懲治以淨根株將此由五百里各諭令知之又諭喬松年奏皖營餉需奇絀請飭山西鹽務應撥

該營餉銀二萬兩迅速報解一摺據稱原任漕運總督袁甲三於同治元年奏請於山西山東地丁鹽關項下各提銀二萬兩限期趕解業經奉旨允准嗣經山西巡撫咨部無款籌動請另行改撥復經部駁以奉旨籌濟之款仍令迅速籌解疊經前任安徽巡撫唐訓方及該撫屢次咨催而迄今已逾兩年未據報解現在臨營餉源久已告竭請飭迅解等語皖省防勦諸軍需餉孔亟如令懸釜待炊

關係非輕山西鹽務尚稱完善二萬金亦非難辦此項銀兩係降旨允准之款何得任意延宕著沈桂芬迅飭河東道將前項撥款二萬兩速解皖營以濟急需毋再推諉至前撥李世忠月餉改撥皖營每月五千兩並著陸續籌解毋稍缺乏將此由五百里諭令知之安徽巡撫喬松年奏羅田踞賊西竄蘄水已飭道員蔣凝學跟蹤追勦得旨刻下賊匪既有西竄之意著督令蔣凝學認真追勦仍



一面力顧皖防妥籌布置○旌表守正捐軀順天大興縣回民女沙愛子

上以祭

社稷壇自是日始齋戒三日○丙子諭內閣官文奏懇恩將嫡堂弟一併賞入正白旗滿洲旗籍等語大學士湖廣總督官文前因克復江甯省城懋著勲勞降旨加恩將其本支擡入正白旗滿洲無庸仍隸內務府旗籍茲據奏稱該督因乏子嗣以嫡堂弟內務府衣庫

六品庫掌官廣之次子榮綵承繼為嗣懇恩將榮綵之生父官廣並官廣之胞兄官永一併賞入正白旗滿洲等語向來奉特旨將本支擡旗僅指本身及其子孫而言即同胞兄弟已不得隨同擡入他旗誠以世系蟬聯而下旁支即不能連及榮綵雖經過繼官文為嗣其本生父官廣及官廣之胞兄官永均著與官文之胞弟胞姪不准一併擡旗○又諭楊岳斌沈葆楨奏賊酋率眾投誠懇恩給獎

並留營效力等語前經朝廷明降諭旨凡被賊脅而悔罪自新者皆准免死此次陳炳汶等自拔來歸並率六萬之眾同心反正願納礮械數千件助剿殘匪且據稟從前屢欲投誠均被康逆汪海洋所阻康逆圖犯江西省垣該降眾等未經允從尚屬真心悔罪若不寬其既往無以昭激勸而廣仁恩陳炳汶等均著准其投誠陳炳汶並賞給參將銜張學明陶金會陳報林均賞給遊擊銜李三畏賞給六品頂帶並均准留營效力此係朝廷恩施法外予以自新若他股賊眾咸知不殺之仁聞風向化仍著該督撫等妥為酌辦○諭議政王軍機大臣等前因保恆奏請飭撥餉銀數萬兩由草地解運並知照經過各城一體趲運當交戶部速議具奏茲據該部奏稱古城需餉孔殷請仍令前次指定各省將未解新疆餉銀迅籌轉解等語新疆回氛肆擾軍情喫緊萬分亟應厚集餉糈以利攻剿前

經戶部奏撥山西等省解濟新疆軍餉銀前  
後共六十萬兩解赴鎮迪道庫轉撥各城現  
據保恆奏請由北路草地行走係為慎重起  
見著照該部所議前次奏撥新疆各城餉銀  
六十萬兩除山西省解過三萬兩山東省解  
過一萬兩外其山西未解銀二十七萬兩著  
沈桂芬於接到此旨十日內無論何款趕緊  
先行籌措銀八萬兩派委委員解交綏遠城  
並著德勒克多爾濟豫派委員俟前項銀兩

到時覈計運至科布多應用盤費若干兩卽  
飭歸綏道於庫存各款內迅籌發給委員乘  
坐加桿車解送烏里雅蘇台城毋稍延緩並  
由麟興車林敦多布邁派員弁會同解交科  
布多廣鳳奎昌於解到時卽行知照保恆派  
員全數領回以濟要需其山西並綏遠城籌  
墊解費著沈桂芬德勒克多爾濟覈明實用  
數目准其作正開銷至山西省下餘欠解餉  
銀十九萬兩仍著沈桂芬迅速籌撥分為兩

批陸續起解卽由各城接替趲運解交科城  
存庫常清明緒豫行覈定南北各城每城應  
用若干知照各城派員赴科布多自行分提  
並著平瑞文祥錫霖於接到常清知照時派  
員妥為提解以昭慎重其山東省未解銀六  
萬兩河南省未解銀七萬兩卽著閻敬銘張  
之萬速行籌撥解交山西一併由沈桂芬從  
北路草地轉解綏遠城科布多等處聽候常  
清等分撥濟餉此外四川未解銀十六萬兩

著駱秉章飭司迅籌撥解並選派委員探明  
道路由陝西甘肅境內行走解交安肅道庫  
以備南路各城就近提用此項餉銀過境時  
並著都興阿恩麟派委弁兵沿途迎護趲解  
暨飭安肅道妥為收存毋稍疏忽將此由六  
百里諭知常清明緒德勒克多爾濟都興阿  
麟興車林敦多布平瑞文祥駱秉章張之萬  
閻敬銘沈桂芬廣鳳奎昌錫霖保恆並傳諭  
恩麟知之 又諭楊岳斌等奏收復宜黃克

復南豐詳細情形克復新城大慨情形。王文瑞一軍在槎路口等處獲勝。陳炳汶等投誠。請賞虛銜頂帶毛鴻賓等奏勅辦戴梓潰一股斬馘極多。請飭曾國藩扼防贛南並嘉應石阮堡鄉民械鬪派兵彈壓各摺片。官軍收復宜黃並南豐縣城亦經震宇等營克復。辦理均極得力。所有出力人員著准其擇尤保奏。惟敗匪上竄廣昌甯都已偏南贛其東鄉金谿敗匪現聚瀘溪新城南贛甯三府州毗

連閩粵楚南楊岳斌等已派鮑超進勦新瀘。防賊入閩王開琳等回駐弋陽貴溪以備浙西敗賊勾結楊岳斌不日馳赴贛甯調度。著卽飛催劉典等繞出賊前扼要兜擊並令席寶田等跟蹤追勦以期一鼓聚殲毋任再有竄逸湖州業經克復浙西敗賊恐復上竄並著責令王開琳王德榜以勦為防毋稍疏懈。陳炳汶等投誠既屬真心悔罪自應網開一面准予自新所請獎賞參將等銜未免過優。

惟念該降人等尚知順逆且以激勸未降各股是以俯如所請楊岳斌等當傳知該降眾等俾知感奮圖功如續有勞績仍准保獎但其人數在數萬以上概予遣散後患必多是否酌留效力未據聲明其洋礮等件曾否呈繳均著飭令鮑超等妥為經理李侍賢汪海洋現在何處此二逆必須殲除方免滋擾鄰省之患宜黃之賊屢犯槎路口交湖經王文瑞三次痛勦茲復往撲甯都著卽催督各軍

四面截殺敗匪上竄廣昌甯都已偏南贛若開此一路縱令入粵又成不了之局本日據毛鴻賓等奏請控贛南自係目前切要之圖著曾國藩楊岳斌等飭令派出各軍繞前截擊務須就地殄除能否增兵繞越甯都石城一帶扼賊南竄並著曾國藩等酌度辦理毛鴻賓等亦當派兵出境防堵不得任其闖入其竄甯都之賊與閩省切近左宗棠徐宗幹務飭兵練認真設防遇賊卽擊張運蘭已取

道嘉應赴閩。卽著令其迅速前進。擇要駐紮。毋令一賊竄入閩境。毛鴻賓奏。勦辦客匪。偽軍師戴梓潰。一股餘匪退入五阮。五阮為客匪所居。山深林密。經卓興等進勦。獲勝。傳言戴逆已死於亂軍之中。著該督撫仍飭卓興查明戴梓潰實在下落。並將餘匪一併殲滅。毋使再有勾結。嘉應州石阮堡溫淩等姓。因事挾嫌械鬪。溫姓子弟復勾通揭陽匪首溫亞喬等。率黨相助。長樂興甯二縣亦有械鬪。

之事。毛鴻賓等已派吳贊誠會同地方官查拏懲辦。著卽責令妥為辦結。不得草率了事。正在寄諭間。左宗棠奏官軍進規湖郡。疊次獲勝。另片奏據蔣益澧稟報。湖州踞賊夜開西門竄出。劉樹元已率所部入城等語。湖州克復。昨已據李鴻章奏報。仍著左宗棠將詳細情形查奏。洪福瑱逃避廣德。李鴻章所派之軍。力攻州城。自未可稍涉鬆勁。著曾國藩左宗棠李鴻章督飭各軍。務將該逆擒獲。毋

令漏網。湖州收復後。賊由西門出竄。究竟已竄何處。著左宗棠李鴻章查明具奏。一面飭令蔣益澧等會同蘇滬各軍。躡蹤緊追。不得任其紛竄。致令死灰復燃。致勦辦又形棘手。四安梅溪等處。踞賊尚多。李鴻章當飭各軍節節掃蕩。以期漸次肅清。將此由六百里各諭令知之。又諭富明阿奏。馳回揚營。並請將揚防陸軍暫緩裁撤。一摺。據奏。接據富森保函稱。湖北擒獲賊供。因麻城一帶無糧可

據。聞江北饒富欲於秋涼時大股東下。為就食揚城。接援金陵之計。所供各情。該逆自尚未聞金陵克復之信。此時老巢業經攻克。江南一律蕩平。楚北之賊。自必聞風喪膽。且疊據官文等奏。稱官軍勦辦甚屬得手。賊勢已感似尚不至大股東趨。惟羅田麻城一帶。賊蹤趨向未定。逆情詭詐。難保不因被勦窮蹙。復圖竄擾。完善是江北之防。仍不可稍鬆。若遽將各軍概行裁撤。未免太形空虛。且據該

將軍奏稱水陸各軍欠餉甚多一時難以籌給亦係實在情形著卽照所擬俟水師三批裁竣後卽將揚防陸軍先為酌撤數千名以節糜費其餘酌留若干名暫緩裁撤仍著認真訓練實力巡防以期有備無患毋致虛糜餉項所有揚防各營官弁兵勇從征有年著准其查明尤為出力者奏請恩施毋許冒濫將此由四百里諭令知之 又諭寄諭山東巡撫閻敬銘前因御史陳廷經奏請將江浙

降卒移撥大名兗州添作額兵以資分布當經諭令劉長佑閻敬銘妥議具奏業經劉長佑奏稱事多窒礙茲復據該撫歷陳諸有未宜該御史所奏著毋庸議惟是該省營制廢弛已久亟應選將練兵力求整頓卽營房塘汛亦宜卽日興修以資防守不得以餉需支絀積習難返為詞致負委任懍之慎之將此諭令知之 廣東南韶連鎮總兵官勒福因病解職擢瓊州鎮左營遊擊卓興為南韶連

鎮總兵官 以虛報勇糧山東已革知縣吳瑞珊遣戍軍臺 予浙江湖州陣亡遊擊楊應龍傷亡副將蔣榮彩祭葬世職加等 予山東東昌陣亡殉難民勇婦女二千八百五十四名口分別旌卹如例 丁丑 太宗文皇帝忌辰遣官祭

昭陵 祭

先師孔子遣工部尚書單懋謙行禮 諭內閣前因山西潞安府知府鈴祥升補冀甯道所遺員缺當經降旨以升用知府解州直隸州知州葉桂芬補授嗣經吏部以與定例不符議駁茲據沈桂芬奏稱潞安府與豫省接壤近年逆匪屢擾豫疆邊防極為緊要請仍以葉桂芬升補等語山西潞安府知府員缺著仍以葉桂芬補授此係特旨簡放之員嗣後不得援以為例 又諭沈桂芬奏請將庸劣各員弁分別撤革休致一摺山西應州知州趙之瑛聽斷任性聲名平常且有被控案

件著卽行革職大同府通判洪汝霖前在平陽府通判任內欠交兵糧為數甚鉅著卽撤任調省勒限完交如再不完卽著從嚴叅辦河保營參將穆騰額年力漸衰防務不能得力著以原品休致○諭議政王軍機大臣等有人奏直隸撫甯縣知縣孫康壽與武舉王奎交結信任家丁私徵稅課浮收錢糧並吉林人王國裕刦案王奎代行賄屬輒將賊匪悉行保釋原贓分肥各等語州縣為親民之

官必須潔己奉公除莠安良方資治理若所叅各情屬實實為有玷官箴亟宜嚴行懲辦著劉長佑嚴密查察如有前項各情卽著據實奏明叅辦原摺著鈔給閱看將此諭令知之○又諭官文奏攻克白杲髮捻分股奔竄官軍跟蹤追擊並各路堵剿情形一摺成大吉姜玉順等克粉壁學銀家官塘等賊壘後直擣白杲追剿兩晝夜斬殺甚多現在髮捻各逆分路狂奔尚無定向東竄之賊將與蘄

水羅田踞匪合夥西竄之賊已由料棚竄新集距光山不遠大股仍廣聚黃安牽制楚師官文已令楊朝林等分道追擊並飛咨僧格林沁截剿著官文嚴飭各路將領無分漏夜盡力追蹤兜截毋任再有延蔓僧格林沁駐軍光州諒該逆不能偷越著卽偵賊所向派兵兜剿毋任竄入皖豫境內麻城北路賊匪著僧格林沁督飭馬步各軍認真剿洗近日軍情並著隨時馳奏以慰廑繫其分股竄撲

黃安之賊業經官紳擊退蘄水之賊擾六神港又由西岸竄陳家灣等處經張啟基礮船擊敗匪向殷家沖山後而遁此股逆匪現竄何處並著官文查明下落飭令在防將士會同地方文武迅圖撲滅以收廓清之效蘄水羅田等處之賊趨豫入皖蹤跡不定著喬松年張之萬懍遵初四日諭旨整飭防軍會合楚軍前後夾擊儻令深入定惟該撫等是問汝正新息餘匪未靖毛昶熙當會同張之萬

督軍認真按捕不得稍留餘孽致貽後患將此由六百里各諭令知之○又諭閭敬銘奏逃匪蘇落坤句結直隸清豐縣逆團馬三黑聚眾滋事現在辦理情形一摺據稱七月間據直隸大名道祝塏等稟稱有逃匪蘇落坤在山東館陶縣所轄鴨窩地方傳帖聚眾又據東昌府及所屬各縣稟報直隸大名府屬清豐縣有團首馬三黑與孫姓尋仇滋事踞寨聚眾旋經兵役勦散又據總兵馮瑚翔等

稟稱在館陶縣車町村拏獲形跡可疑之薛滿囤搜出逆帖一紙係蘇昆岡之名有七月二十六日在該邑之紫家堡廟內聚齊字樣訊係蘇落坤遣往馬三黑處助逆旋經該總兵派兵掩殺餘匪均各逃散各等情奸民馬學孟卽馬三黑怙惡釀命殺斃紳士孫懷珍之子該縣知縣幾被槍刺殞命前經有人奏請查辦諭令劉長佑嚴密確查如閭敬銘所奏逆跡昭著何以劉長佑並無一字奏及直

東交界地方素為盜藪亟應派兵嚴密按捕以安畿輔著劉長佑閭敬銘查明蘇落坤等犯現在逃匿何處不分畛域務將逃犯按名弋獲並著劉長佑仍遵前旨將馬三黑與孫姓構釁情形確切查明具奏毋稍含混將此由四百里各諭令知之○又諭前據惲世臨奏委員押解田興恕行抵秀山已交四川委員姚寶銘接管解當經諭令崇實駱秉章妥為羈禁悉心辦理並咨會勞崇光等將該

革員罪名妥議速奏茲據崇實等奏據姚寶銘稟稱田興恕行至秀山縣城傷病纏綿難以就道現飭暫在秀山羈禁俟調治就痊仍押解赴省等語此案從前延閣已久田興恕早到一日卽可早結一日該革員甫入川境卽因病不能前進難保非心懷疑懼託詞逗遛著崇實駱秉章密飭姚寶銘剴切開導並察看該革員病體稍痊如能就道卽行押解起程不准再有遲延俟到省後卽著懍遵疊

次諭旨妥為辦理。勞崇光張亮基即將田興  
恕應得罪名先行迅速定議具奏。毋得稍有  
延誤。致生枝節。將此由五百里各密諭知之。  
又諭本日議政王軍機大臣呈進常清咨  
送具奏冰嶺阻隔官兵。改道進剿。俄兵強占  
卡倫。請飭總理衙門辦理。各城探報回匪肆  
擾情形。請派兵二萬出關進剿。各摺片。前據  
各城該大臣馳奏。回匪變亂。並常清奏逆回  
肆擾三城。伊犁危急。各情形。疊次諭令常清

督飭將士妥籌防剿。該將軍諒已陸續接奉  
寄諭。恪遵辦理。據奏圖庫爾改道由東路那  
拉特卡倫前進。自係發報在前。昨據常清奏  
到。將圖庫爾所帶之兵一千餘名。調回伊城。  
已照該將軍所請行。即著撤飭官軍。扼要嚴  
防。妥為布置。一面懍遵。疊次寄諭。籌撥兵勇。  
調赴各城。迅速救援。將回逆趕緊殄除。以次  
肅清疆圉。常清請調兵二萬名出關剿辦。內  
地一有兵力。可以騰出。即當揀派大支勁旅。

星速赴援。會籌埽蕩。此時該將軍惟當就現  
存兵勇。勉支危局。以保邊疆。若專待內地大  
軍一味株守。坐視逆燄燎原。恐常清不能當  
此重咎也。俄夷帶兵隊五百餘名。強占西北  
之夏博羅胡吉爾卡倫。六月間又添兵六百  
名。直入冬博羅胡吉爾卡倫。聲言欲占圖爾  
根地方。前據明緒奏。內憂外患相逼而來。已  
行文俄國。准照議單分界。當以業經行文。即  
屬無可挽回。自不得不從權辦理。惟該國不

候分界。意圖逞強。侵占除諭令總理各國事  
務衙門與該國使臣駁詰外。仍著常清督飭  
派出官兵。加意防範。力籌堵禦。毋得稍涉疏  
虞。致令該夷逐漸內犯。是為至要。將此由六  
百里諭令知之。以內閣學士許彭壽為江  
西鄉試正考官。翰林院編修蔣彬蔚為副考  
官。鑄給江南長江水師提督印信。從總督  
曾國藩請也。戊寅祭

大社



大稷遣孚郡王奕譞恭代行禮

上詣

奉先殿

壽皇殿行禮 諭議政王軍機大臣等喬松年

奏麻羅之賊現竄英山並據報陳國瑞有謀

叛情事一摺前據僧格林沁奏陳國瑞進兵

遷延玩視軍務當以該員不知緩急降旨交

部嚴加議處因材堪節取仍令該親王調令

來營酌量調遣茲據喬松年奏稱接據英翰

稟稱陳國瑞因奉僧格林沁劄調赴營將所

部隊伍交郭寶昌管帶心生慙懼遂率眾謀

叛圖襲商城句結扶逆並據稱其黨止有譚

趙二姓及親隨隊伍等語覽奏曷勝詫異陳

國瑞自歸僧格林沁調遣以來戰勝攻取屢

著勞績朝廷嘉其勇往擢任專閫待之不為

不厚此次喬松年所奏各情是否因疑懼交

乘遽生反側其譚趙二姓及親隨隊伍人眾

究有若干著僧格林沁喬松年查明具奏僧

格林沁仍遵前旨將陳國瑞所部隊伍交郭寶昌迅速接統解其兵柄一面劄令來營聽候查辦如情有可原不妨稍示優容留資驅策儻敢不遵調遣及真有謀叛實據則是驕盈昏悖自外生成朝廷亦不能因其曾效微勞曲加姑息即著僧格林沁相機妥籌辦理迅絕後患麻城羅田之賊直竄英山喬松年已飭將疑學嚴防六安並派張景春張得勝會同防守即著督飭派出各軍實力扼剿遇

賊即擊毋令匪蹤東竄但兵力尚嫌單薄著曾國藩仍遵前旨調派得力將弁帶兵從英山一路前進以厚兵力諒該大臣成竹在胸必能權衡緩急妥速籌辦也將此由六百里各密諭知之○又諭喬松年奏請將前調揚防馬隊催令來皖等語前經諭令富明阿派記名副都統富陞督帶所部馬隊馳赴皖北一帶防剿現在金陵克復揚防已鬆而湖北麻城羅田之賊竄及英山皖北防務喫緊喬

松年駐紮壽州所部兵勇僅二十人兵力單薄必須添兵策應著富明阿迅飭富陞統帶所部馬隊剋日起程前赴壽州交喬松年安籌調派毋稍延緩將此由五百里諭令知之

又諭文煜奏滙陳甘肅軍需萬分緊急奉撥協餉屢催罔應請旨再行嚴催一摺前因甘省餉項竭蹶疊經降旨諭令駱秉章等各將原撥銀三十萬兩源源報解並無論何款各先撥解銀十萬兩迅速委解慶陽糧臺毋得稍分畛域致誤戎機茲據文煜奏稱該副都統於奉旨後分派各員前往守提截至七月底止僅據河東道報解銀十萬兩山東解到銀四萬兩山西解到銀二萬兩業經報解起程銀二萬兩四川河南兩省並未報解分毫該省大兵雲集需用浩繁解到銀兩為數無多杯水車薪隨到隨用西北地方極寒轉瞬深秋兵勇僅著單衣間日始得一飽儻餉項日久不到必致有譁潰之虞貽誤大局不

堪設想請旨立限嚴催各該督撫迅速撥解以救眉急等語甘省需餉緊要屢經降旨嚴催四川河南兩省各督撫何以置若罔聞分毫未解山西山東解到之餉為數無多不敷應用現在都興阿一軍進紮花馬池旬日之間連獲五捷需用餉糈軍火萬分緊要雷正綰一軍攻擣張家川老巢正當得手儻因餉源告竭致令停兵待餉貽誤非輕著沈桂芬接奉此旨後迅飭河東道將奉撥甲子綱鹽課銀兩實力徵收如數趕解慶陽並著駱秉章閻敬銘沈桂芬張之萬於奉旨後限十日內無論何款迅速各籌撥銀數萬兩委員解赴慶陽糧臺毋得遲延膜視致干重咎原撥協餉銀三十萬兩仍著各該督撫源源籌撥分批迅解以濟要需將此由六百里各諭令知之○引見前任浙江鹽運使朱孫詒得旨仍著以鹽運使候補○撥火器營火箭二千枝解赴甘肅慶陽糧臺備用

大清穆宗繼天開運受中居正保大定功聖智  
誠孝信敏恭寬毅皇帝實錄卷之一百十一

大清穆宗繼天開運受中居正保大定功聖智  
誠孝信敏恭寬毅皇帝實錄卷之一百十二

臣等謹將本年以來各省督撫奏報各款恭摺具陳伏乞聖鑒訓示謹奏  
光緒二十九年八月

同治三年甲子八月己卯

同治三年甲子八月己卯

太祖高皇帝忌辰遣官祭

福陵○諭議政王軍機大臣等馮子材魁玉秦  
鎮防頭起凱撤兵勇派員統率回營回籍一  
摺據稱鎮防定復奇勁雄宣制七營並果凱  
勝等勇共計凱撤四千餘名作為頭起派委  
原營將領管帶給發川資起程不准攜帶兵  
仗逗遛滋擾並知會地方官彈壓其三江本  
省應募勇丁分別交地方官管遞回籍咨明  
江南北軍營地方約束各等語辦理甚為妥

協卽著馮子材等飭令派出各員知照沿途各該地方官一體認真彈壓毋令生事其未經遣撤兵勇現經馮子材等查明精壯可用者存記應否挑補綠營兵額之處著曾國藩李鴻章會商馮子材等妥辦鎮防雖屬安穩惟該處兵勇業已裁撤以後防務李鴻章當妥籌兼顧不可稍涉大意鎮城留守各營後起凱撤事宜卽著馮子材等按照此次辦法妥為遣撤前據御史陳廷經奏已革安徽道

員黃元吉才尚可用該革員現在何處其人是否可用著曾國藩查明具奏將此由四百里各諭令知之○以大理寺卿賀壽慈署禮部左侍郎○以江南鎮江歷年防勦出力賞提督張文德總兵官楊青山正一品封典副將歐得亮吳天興參將龔大興遊擊陶世洪巴圖魯名號防禦順明等花翎驍騎校慶廣藍翎餘加銜升敘有差○追予江蘇蘇州陣亡參將張朝綱祭葬世職加等 庚辰遣官

祭黑龍潭

昭靈沛澤龍王之神玉泉山

惠濟慈佑靈瀨龍王之神昆明湖

安佑普濟沛澤廣生龍王之神密雲縣白龍潭

昭靈廣濟普澤龍王之神○遣官祭圓明園

惠濟祠

河神廟○以克復江南省城遣官告祭

長白山

松花江

五嶽

四鎮

四瀆之神○以國史館補繕

宣宗成皇帝實錄黃綾本告成予清文總校等

官署副都統奕慶翰林院編修車順軌等加

銜升敘有差○辛巳遣官祭

文昌帝君廟○諭內閣李鴻章奏請將失守

知縣破格施恩等語前署江蘇吳縣知縣沈

偉田於咸豐十年四月間賊陷蘇州省城身受刀傷多處被難民救護出城嗣經浙江巡撫委辦太湖團練復自募練勇節次打仗隨同李鴻章克復蘇州幫辦善後各事宜該員前此失守城池例有應得罪名姑念受傷情節尚非捏飾且據李鴻章聲稱該員平日居官輿情愛戴蘇省甫就肅清善後事宜需員經理著照所請沈偉田免其治罪仍暫行革職留於江蘇地方效力以昭激勸○又諭前

因李鴻章奏參將孫家烺訛詐降眾馬文彪銀兩並摻搶難民江義和財物指勒使女等情當經降旨將孫家烺革職交該撫從嚴訊辦茲據該撫奏稱查明孫家烺嚇詐馬文彪銀兩後旋即呈繳給回其摻搶江義和財物一節係誤聽章慶昌訛傳即將江義和並伊妻江汪氏及使女等拏回訊問搜出洋錢七圓分賞親兵旋因江義和訊不承認遂送交善後局審辦先將江汪氏等分別釋回各等

語孫家烺本有查拏奸細之責乃誤聽人言輒將江義和獲解雖查無摻搶指勒各情而辦理實多草率其嚇詐馬文彪銀兩雖即給還究屬貪鄙無恥孫家烺著發往黑龍江充當苦差○諭議政王軍機大臣等李鴻章奏攻克湖州西路詳細情形並克復四安廣德派兵扼守鎮城各摺片湖州攻克後賊眾分股直趨安吉劉士奇等追至梅溪斬馘不少吳毓芬一軍由長興觀音橋追勦直破四安及沿路賊壘劉銘傳等率隊由建平進攻廣德城賊出隊拒敵戰不逾時遽行返奔開南門而逸竄向甯國安吉山中李鴻章現派周盛波等駐守廣德所辦均屬妥協惟湖州之賊擁眾竄入廣德廣德之賊未受大創遽由南路出竄其人數必尚不少摺內所稱敗賊大股受創從萬山叢雜中逸出無多糧藥輜重拋棄殆盡前路徽浙交界各有截勦之軍當不難以次撲滅等語此乃懸擬之詞不可

恃以無恐甯國一路防軍甚單且堵逆黃汶  
舍及幼逆洪幅瑱均未伏法必將竄擾徽甯  
號召羣逆或與江西匪黨聯絡勾結均屬不  
了之局著曾國藩左宗棠嚴檄甯國徽州守  
將慎重防勦儻兵力單薄卽各添撥勁兵助  
勦並探明賊蹤已竄何處迅速具奏李鴻章  
素能不分畛域著卽飛調得勝兵勇出境追  
勦以竟此一簣之功黃逆洪幼逆下落並著  
查明具奏鎮江防軍已據馮子材等奏請陸

續裁撤李鴻章現派道員張樹聲統領六營  
駐守鎮江著卽飭令該道妥為彈壓巡防與  
劉銘傳等廣德東壩各軍聯絡聲勢務使閭  
閻安堵塵市無驚方為妥善將此由六百里  
各諭令知之○又諭都興阿奏官兵克復寶  
豐後移營進勦兵力不敷請飭曾國藩挑選  
馬步精壯十數營揀派得力統將數員赴甘  
飭富明阿令副將胡世英等帶英字選鋒兩  
營剋日赴甘並請飭穆圖善統帶馬步兵勇

來營一摺都興阿軍自克寶豐後進紮平羅  
縣城附近渠口堡一帶相機攻勦惟因進攻  
兵力不敷分布寶豐平羅一帶地勢極寬馬  
步各軍分投雕勦刻下情形進退維谷雷正  
綰等軍會勦張家川一時未能北來而河狄  
一帶賊氛尤熾中衛防兵單薄竄越堪虞在  
在須增兵防守自屬實在情形前曾諭令都  
興阿如兵力單薄咨明曾國藩等酌撥並已  
令楊岳斌酌帶勁旅赴陝甘總督新任江西

軍務未竣楊岳斌恐不能迅速到任著曾國  
藩於各路防兵內挑選馬步精壯十數營揀  
派得力將弁數員統帶赴甘交都興阿調遣  
如金陵兵力仍可分撥卽酌撥數營由宿松  
斜趨麻城與楚豫各軍會勦髮捻各逆尤可  
迅收夾擊之效並著曾國藩妥籌兼顧揚防  
現在無事著富明阿卽派胡世英李曙堂將  
所帶英字選鋒兩營剋日拔隊取道赴都興  
阿軍營此二營係都興阿舊部自可十分得

力本月初二日已有旨令穆圖善統帶所部馬步各營馳往甘省會同都興阿雷正綰妥籌勦辦著穆圖善懍遵前旨星速帶兵前往會勦不得稍事觀望是日並諭駱秉章於川省得力兵勇挑選數千籌備軍裝口糧揀派知兵大員統帶赴都興阿軍營聽候調遣著都興阿酌度情形分別咨催仍就現有兵力妥慎勦辦如雷正綰一軍先行得手亦可酌量分撥該將軍老於行陣自然成算在胸不

為遲制另片奏中衛防勦情形請將鄧鳳林革職各等語中衛地當衝要恐該逆乘筏偷渡防不勝防著即責令王贊襄會同地方官督率紳團妥為防勦不得稍有疏虞候補參將鄧鳳林經都興阿派令隨同伊昌阿帶兵駐紮渡口以通糧路乃該官兵散漫不整沿途逗遛實屬玩誤已極鄧鳳林著即行革職不准留營以示懲儆河東五堆子渡口防兵即令參將春福等管帶駐紮彈壓以專責成

烏什幫辦大臣伊昌阿即著迅赴本任毋任遷延將此由六百里各諭令知之又諭都興阿奏甘省兵勇雲集進勦正當得手惟糧餉缺乏轉瞬秋深邊地嚴寒各兵衣食無資深恐有誤事機現委甯夏道三壽帶同隨員赴山西省會商藩司或催提應解正項或暫借晉省別款速籌銀二三十萬兩分批解營等語甘肅回匪現在官軍進勦聲威甚振惟軍行糧隨全賴餉精充裕方可收士飽馬騰之效茲據都興阿奏已委道員三壽赴晉或催提正項或暫借別款即著沈桂芬督飭藩司無論如何移緩就急迅籌銀二三十萬兩分批星速解甘以濟急需將此由五百里諭令知之又諭李雲麟奏川髮兩逆圖竄西鄉現籌進勦並楚軍欠餉實數各摺片蔡啟雨逆由洋縣以下之鍋灘金水酉河等處意圖搭蓋浮橋渡河經官軍擊退賊見勢難偷渡即沿江西竄圖趨褒沔該逆抵褒沔後如

折而東竄由西鄉出紫陽甄坪從此南趨夔萬以入川東竄房竹以擾楚均有防不勝防之勢亟應嚴密堵禦以遏狂氛著官文吳昌壽駱秉章各就本境檄飭將弁實力嚴防毋令匪蹤闖入李雲麟卽飭派出之遊擊姜維揚一軍趕緊馳赴西鄉迎頭截擊並著該京卿剋日親赴前敵相機調度迅埽賊氛李雲麟務將此股逆匪就地殄除若有名無實一味紙上空談縱令該逆紛竄川鄂又成不了

之局該京卿自問當得何罪著劉蓉妥籌兼顧抽撥勁旅前赴西鄉一帶會籌埽蕩楚軍忍飢苦戰餉項奇絀前據官文奏楚軍五六兩月餉銀陸續籌解現在該營需餉甚亟若不速籌接濟譁潰卽在目前著官文吳昌壽將應解五六兩月餉銀如數籌撥星速解赴李雲麟軍營以濟眉急劉蓉身任陝撫責無旁貸亦著迅籌餉需源源接濟用資騰飽而策成功將此由六百里各諭令知之○又諭

張凱嵩奏派軍分徇思恩南甯兩府暨武緣徭匪倡亂督軍撲滅查明歸順州城被匪闖入官紳奮力勦除各摺片粵西官軍殄滅貴縣餘匪潯郡已就肅清惟左右兩江地方尚有伏莽未淨思恩之宋扶桿南甯之孫茫廣均係著名悍逆亟應乘勝埽除以靖邊圉張凱嵩現派道員易元泰統領參將潘忠實等營由賓州遷江一帶沿途搜勦以達思恩總兵李士恩統領水陸各營由橫永進規南甯

所籌均尚周妥卽著張凱嵩督飭易元泰等軍相度機宜穩慎進勦務將宋扶桿孫茫廣等巨逆實力殲除其被脅團眾及現在求撫賊渠惟當體察情形妥為解散設法安置總期勦撫兼施迅速肅事如宋孫二逆就殲思南各屬戡定卽飭易元泰等督軍分路進規泗城太平等府埽蕩餘逆肅清全境均著張凱嵩隨時籌度辦理並檄催道員王承澤迅將寶慶所募新兵挑足成隊卽行赴營協剿



劉坤一回省後因病請假。卽著飭令迅速調理。一俟就痊。卽出省擇要扼紮。相機督辦。武緣縣屬之安定土司。突有徭匪蒙李旺等脅眾煽亂。知府沈康保飭地方文武及土巡檢潘梧等督團勦辦。卅月之間。將逆首蒙李旺斬除。該匪全股撲滅。辦理尚為妥速。在事官紳勇練及捐助經費人等。准由張凱嵩彙案擇尤請獎。毋許冒濫。仍檄飭該地方文武激勵團勇。協同易元泰官軍進勦。思恩境內

踞逆歸順州城於本年正月間。因賓州游民楊三等與廣東客團挾嫌滋鬧。該州已革團總鍾啟藩勾結匪黨。突撲州城。兼理知州瑞齡等督兵抵禦。均受重傷。致匪徒乘閒闖入。均屬咎無可辭。惟於城陷後尚能乘機應變。密檄各鄉團練會同署知府興福所調各團。將賓州悍逆悉數殲滅。並擒斬團匪鍾啟藩等。州城內外肅清。尚知愧奮。至援黔之楊廷桂一軍。與全祖凱所部攻勦水潘十六寨土

匪連日疊有擒斬。並焚毀賊寨多處。旋因匪首李七分股由雞場出竄。圖擾獨山州城。楊廷桂分軍赴援。會合黔軍堵勦。獲勝餘匪奔往都勻八寨。現在獨山附近。尚有苗教各匪著勞崇光、張亮基督飭全祖凱駐紮獨山之軍。會同楊廷桂所部剋期進攻。務當乘此賊勢漸蹙之時。迅將李七股匪全數撲滅。匪黨陳輝良因與李逆不睦。思欲投誠自贖。楊廷桂遣派勇民等入寨偵探。相機解散。著張凱

嵩飭該副將知會黔軍酌量妥辦。不可稍涉大意。將此由六百里各諭令知之。又諭前因崇實駱秉章奏。田興恕行至秀山傷病纏綿。難以就道。現飭暫在秀山羈禁。當諭令勞崇光、張亮基將田興恕應得罪名先行迅速定議具奏。田興恕現在秀山因病逗遛。雖經諭令崇實等密飭姚寶銘剋切開導。卽行押解起程。尚恐未能剋期就道。若必俟其到省後始將此案擬結。恐日久復生枝節。著勞崇

光張亮基懷遵疊次諭旨妥為辦理迅速持平擬結將田興恕應得罪名即行定議具奏不必俟該革員到省再行結案致稽時日儻因辦理遲延致有可轉圜之事復又波折橫生於大局殊有窒礙恐勞崇光張亮基不能當此重咎也將此由六百里密諭知之○以候補提督劉銘傳為直隸提督未到任前仍以通永鎮總兵官徐廷楷署理○以江蘇勸辦京倉米石出力予知縣蔣棠以知州用並

賞花翎知州胡璋藍翎餘加銜升敘有差○以浙江勦辦湖州竄匪獲勝並克復四安鎮廣德州城賞提督郭松林等雲騎尉世職楊鼎勳周盛波黃馬褂副將趙友文參將楊正清守備譚正武張遵道已圖魯名號都司廖德旺花翎餘加銜升敘有差予陣亡遊擊杭進先守備葉雲龍祭葬世職加等○以廣西克復容縣戡定梧州出力賞知府覃遠璵都司汪有志等花翎外委周吉昌等藍翎餘加

銜升敘有差○以廣西歸順州城被賊竄陷旋即克復革署知州瑞齡護副將遊擊楊致英職仍留營楊致英並留任命工部勘修朝陽門外窩橋北明橋工程○壬午遣官祭昭忠祠○諭議政王軍機大臣等官文奏髮捻被勦分竄豫皖派兵追擊一摺髮捻各匪自官軍擊敗後人數尚多分股亂竄漸水羅田等處之賊悉數東趨擾及六安英山一帶麻城西路分竄料棚之賊經文武鄉團連次

擊退河口防師李成謀率隊截擊僧格林沁之軍亦至與楚軍會合跟追敗賊悉數遁入光山縣境是楚北雖無賊蹤而豫皖均形喫重前因官文奏匪股趨豫入皖紛竄不定諭令僧格林沁喬松年張之萬分投截擊現在皖豫兩省軍情並緊雖係敗殘之賊而匪勢尚眾亟宜迅圖聚殲方免蔓延之患昨據喬松年奏已飭蔣凝學嚴防六安並派張景春張得勝協同防守此時賊竄英山著喬松年

迅飭蔣凝學等整隊前進迎頭截擊。儻兵力不敷。卽著飛咨曾國藩派兵合剿。務期厚集兵力。一鼓殲滅。毋稍大意。僧格林沁曾有誘賊出險卽可縱擊之奏。此時賊入皖境。地漸寬平。馬隊正可施展。而黃安敗後復竄光山。僧格林沁之軍未免為所牽掣。該親王務卽督飭色爾固善等先將捻股勒盡。卽可移師而東。兜擊髮逆。將楚皖豫三省交界之賊次第殄除。毋留餘孽。張之萬身任封圻。責無旁貸。現在逆匪闖入光山。若任令竄越。擾及完

善。更成不了之局。著懷遵疊次諭旨。飭令在防各將士振刷精神。實力遏擊。迅掃賊氛。官文雖已擊賊出境。仍當督飭東西兩路各將弁分投追剿。與皖豫各軍聲勢聯絡。以收夾擊之效。毋得以賊蹤漸遠稍形鬆勁。將此由六百里各諭令知之。又諭文祥奏南北兩路軍務緊急。懇請發兵撥餉一摺。新疆自回匪倡亂以來。庫車喀喇沙爾吐魯番以至烏

嚕木齊古城奇台木壘河一帶。亂者四應。日益蔓延。幾有不可收拾之勢。巴里坤地方緊要。雖經榮慶何瑄等多方撫綏。文祥復措借銀兩解往接濟。杯水車薪。難裨實用。且哈密城小兵單糧餉匱乏。亦難兼顧。巴里坤著文祥就現有兵力妥籌策應。扎薩克郡王伯錫爾開渠籌餉。懋著忠勤。業已降旨加銜示獎。卽著文祥傳旨令其安撫回眾。認真防範。毋令煽惑滋事。以顧大局。古城漢城失後。保恆

當激勵將士迅速攻剿。毋令賊匪得以久踞吐魯番及巴里坤等處。防剿事宜並著文祥保恆咨令榮慶何瑄色普詩新等妥籌辦理。平瑞帶兵在紅山背接仗。後有無績獲勝。仗能否迅解城圍。該都統總當懷遵前旨力籌守禦。不可稍有畏葸。明緒督飭榮全帶兵赴伊塔城距伊犁不遠。日來計已到任。常清務當與明緒將各城守禦及如何策應之處統籌熟計。相機調派。前次所調之喀爾喀蒙古

官兵著麟興車林敦多布廣鳳奎昌等迅即調派數千飭令前赴古城交平瑞等帶領進剿以厚兵力古城東接巴里坤西鄰烏魯木齊如有重兵扼紮則南路賊氣自可漸戢想該將軍大臣等必能斟酌機宜權衡緩急也新疆回氛不靖必須命將出師大張撻伐前已疊次寄諭楊岳斌令其酌帶所部勁旅馳赴陝甘替出都興阿帶兵出關勦賊現在江西賊勢已挫腹地漸清而關外賊燄日張早

一日援救即早解一日倒懸楊岳斌接奉此旨即著酌帶勁兵數千剋日起程赴甘該督到任後甘省軍務事有專責都興阿大軍即可出關辦賊迅就蕩平從前回疆用兵每得力於川甘兩省之兵前曾諭令駱秉章派兵赴甘此時西路軍情日緊駱秉章當懷遵前旨於川省得力兵勇挑選數千籌備軍裝口糧揀派知兵大員統帶前赴都興阿軍營聽候調遣毋稍延緩李季高已簡放甯夏鎮總

兵並著催令迅赴新任以資得力前因鹽固收復安置難回事體重大特派張集馨馳赴甘省妥為查辦現在都興阿雷正綰各軍疊獲大勝乘甘回震懾之餘將陝西投誠難回善為安置亦足令反側自安不至固結不解張集馨務即剋日起程星馳赴甘相機籌辦並著將起程日期具奏將此由六百里諭知常清明緒平瑞文祥保恆麟興車林敦多布廣鳳奎昌楊岳斌駱秉章並傳諭張集馨知

之○又諭文祥奏據哈密通判恆齡申稱轉奉安肅道牌開晉省在於捐輸防費項內先行籌撥新疆銀二萬兩已於同治二年十二月三十日自山西省押解起程至今尚未接到出關之文請飭下陝甘山西各督撫迅速催解等語新疆回匪變亂各路撥兵防剿需餉孔殷著都興阿劉蓉沈桂芬恩麟飭令沿途地方官查明此項銀兩係在何處稽延迅速催令該委員趲程解運出口以濟要需甘

肅肅州鎮總兵何勝必現在陝西軍營著劉  
蓉飭令該總兵迅赴新任毋稍延緩將此由  
六百里諭知都興阿劉蓉沈桂芬並傳諭恩  
麟知之○以勸辦開渠暨接濟防堵鹽糧賞  
哈密扎薩克郡王伯錫爾親王銜○以工部  
左侍郎恆祺兼署理藩院右侍郎○以鑲藍  
旗滿洲副都統靈桂暫署鑲黃旗護軍統領  
鑲黃旗蒙古副都統長善署正白旗蒙古副  
都統○癸未遣官祭

關帝廟○諭議政王軍機大臣等喬松年奏  
髮逆大股竄至英山接仗防守情形並擬將  
何紹彩防兵移向霍山各摺片髮逆糾眾數  
萬屯圍英山縣城經蔣凝學統率所部官軍  
馳往進剿力戰數時之久賊匪敗竄追殺至  
南路山岡斃匪甚眾勦辦尚為得力惟捻逆  
散漫東竄勢將接踵而來六安舒城一帶均  
須實力嚴防該撫已添派都司羅元起等帶  
勇數百交張得勝統帶駐守六安並調陳飛

熊往守舒城布置甚為周妥著即飭令張得  
勝等嚴密防守毋稍疏懈蔣凝學一軍兵力  
過單髮逆敗退之後復勾結大股圍攻英山  
縣城現仍悉力拒守儻髮捻合竄皖境一半  
牽掣英山一半徑犯霍山以斷英山後路則  
蔣凝學一軍勢成孤立喬松年現已函商曾  
國藩擬將巢縣防兵何紹彩一軍移向霍山  
即著曾國藩迅飭何紹彩統帶防兵進紮霍  
山與蔣凝學之軍前後夾擊一鼓殲除甘肅

涼州鎮總兵馮標前在該大臣軍營此時甘  
省軍務緊急即著迅飭赴任毋得任令延緩  
昨據官文奏白果之賊經官軍擊敗悉數東  
竄英六一帶當經諭令僧格林沁官文喬松  
年等分投截剿茲據喬松年奏稱該匪由松  
子關一帶圖竄六安是六安防剿更形喫緊  
喬松年擬調英翰一軍回皖協剿惟據該撫  
奏稱據英翰稟報陳國瑞部下將士不肯同  
叛均投歸英翰營中陳國瑞自帶親隊千餘

人仍在麻城之三河口駐紮。必須陳國瑞之事辦理就緒。英翰之軍方能調赴皖境。著僧格林沁仍遵前旨。將陳國瑞所部交郭寶昌接統。迅調陳國瑞來營。相機查辦。陳國瑞到營後。即飭英翰馳往六安。與在防各軍迎頭截剿。並著督飭色爾固善速即剿除捻逆。移師東擊。並著官文督飭各路將弁追賊出境。會合英六等處防兵。兩面兜擊。盡殲醜類。將此由六百里各諭令知之。○又諭左宗棠奏。

克復湖州安吉兩城。並追剿竄賊。大獲勝仗。及督飭官軍搜捕划船土匪各摺片。所奏克復湖州情形。與李鴻章前奏大略相同。至安吉一城。與湖郡有犄角之勢。經楊昌濬及周廷瑞等軍分路進攻。迅將堅城攻拔。並追剿竄賊。大獲勝仗。殺斃溺斃及逃散就撫者約計不下十數萬人。剿辦甚為出力。所有在事文武數月以來疊次苦戰。尚屬著有勞績。著俟此股竄賊剿除。即由左宗棠分別保獎。候

旨施恩。湖州安吉已克。浙境肅清。惟堵逆黃汶金挾幼逆洪福瑱由昌化績溪一路逃竄。值逆黃汶英與忠逆之子向涇縣祁門一路竄去。漏網餘氛。分路上竄。必將假道徽池以擾江西。而為入粵之計。若不迅速兜剿。深恐匪黨聯絡勾結。其勢復張。左宗棠已飭提督高連陞等躡蹤緊追。並飭黃少春王德榜等軍從徽嚴一帶繞出賊前。相機截擊。即著嚴飭諸軍盡力截剿。無論竄江竄皖。總期悉數

殲除。李鴻章恪遵前旨。飛調得勝兵勇會合浙師出境追剿。竟此一簣之功。楊岳斌沈葆楨督飭饒景等處在防將士實力扼堵。毋令一賊入境。庶不至與前股竄匪聯成一氣。又成不了之局。江右敗賊竄至贛甯南贛防務喫緊。此次湖州等處竄賊。又有由江入粵之意。毛鴻賓郭嵩燾務當懍遵疊次諭旨。先事圖維。派兵出境防堵。張運蘭已取道嘉應赴閩。即著徐宗幹催令迅速前進。擇要駐紮。以

固閩省邊防皖南防兵單薄曾國藩當迅撥陸師前往助剿毋稍疏虞湖州蘇州土匪乘坐小划肆行劫掠人數多至數萬划船多至數千恃其港汊紛歧船礮利便導賊抗軍習為故智實蘇浙兩省心腹之憂著左宗棠督飭水陸各軍及地方守令乘此兵威密速妥辦盡絕根株毋留後患左宗棠徐宗幹奏臺灣文武藉詞諉過派委胡肇智前往查辦一摺此案前因丁曰健奏稱林文察頓兵逗遛

並其叔林天河依勢作威等語曾經諭令左宗棠等查叅茲覽左宗棠所奏林文察以餘匪復熾諉過於地方官是該處文武意見不合互相攻訐殊屬不成事體著左宗棠徐宗幹督飭胡肇智將實在情形確切查明分別嚴叅懲辦以肅官常另片奏林文察等日久尚未赴調等語已明降諭旨將該總兵交部議處矣仍著左宗棠飭調該總兵等迅速內渡毋再延緩喬松年奏皖省軍務日繁軍餉

已竭請將江蘇停撥月餉照舊撥解等語著李鴻章將江海關每月舊撥皖餉二萬兩仍飭該司道照舊按月協撥解赴喬松年軍營毋稍延誤將此由六百里各諭令知之○又諭雷正綰奏攻毀張家川逆巢現移營進攻龍山鎮賊壘及河州戒嚴請飭曹克忠迅赴本任各摺片張家川逆匪踞險抗拒官軍經雷正綰與陶茂林合軍攻剿破其巢穴餘賊向龍山鎮敗竄雷正綰已與陶茂林各派隊伍拔營跟蹤進剿即著該提督等將龍山鎮蓮花城迅圖攻拔盡洗逆氛都興阿之軍進規甯靈前經派兵渡河將寶豐攻克軍聲丕振賊膽已寒惟甯靈一帶回蹤麇集仍應厚集兵力方能迅就蕩平雷正綰擬俟龍山鎮等處克復親督各營直趨隆靜就近察看固原情形順道北向與都興阿之兵會辦甯靈即著會商都興阿妥籌夾擊固原回匪雖稱乞撫前據恩麟奏報該處回眾北竄甯靈中

衛等處喫重。是乞撫之說尚難深信。雷正綰務當詳察真偽。相機辦理。不可大意。中衛地當緊要。梁生嶽等軍本不足恃。雷正綰擬令陶茂林於攻克龍山鎮蓮花城後。率所部馳赴中衛蘭州一帶。扼要防剿。所籌深合機宜。著卽飭令陶茂林將該兩處賊巢。迅卽攻克。率師前進。以資得力。前次恩麟奏稱趙必達統帶果義一軍。勦辦河州回匪。連戰皆捷。而此次雷正綰則稱河州紳民稟訴趙必達防

練疏忽。恒怯無能。是該員之不能得力。已可概見。恩麟乃以此等劣員統兵。勦賊已屬用人不善。又不將該員據實奏。猶且粉飾多詞。鋪張入告。該護督是何居心。甘省偏地賊氛。恩麟貽誤不少。不知力圖補救。稍盡心力。尚如此昏憤糊塗。任令地方糜爛。自問當得何罪。著雷正綰卽將趙必達劣款查明。如果防練疏忽。恒怯無能。務卽嚴參懲辦。一面派委知兵大員前往接統其眾。至河州鎮係曹

克忠本任該處情形。喫緊陝西賊勢已鬆。無須該員在陝助剿。著劉蓉卽飭曹克忠統帶所部原營。迅赴河州。本任不准遲延。並不准劉蓉再行奏留。致誤事機。陝省近日軍情。仍著劉蓉隨時馳奏。曹克忠抵河州後。如尚須添兵助剿。著雷正綰會商都興阿酌量派撥數營。以資攻剿。將此由六百里諭知都興阿。雷正綰。劉蓉。並傳諭恩麟知之。又諭麟興等奏遵調喀爾喀蒙古官兵馳往古城助剿。

並撥給科城腰刀火藥廣鳳等奏蒙兵向無軍器糧餉。盡匱諸多掣肘情形。暨屯防兵丁無可分撥等摺。片古城待援甚亟。烏嚕木齊賊氛更熾。經麟興等於西兩部落蒙古官兵及各旗防邊蒙古官兵內。前後調撥一千名。並飛咨文盛等調蒙兵一千二百名。廣鳳等已揀選蒙兵一千名。前往古城應援。卽著催集各軍星馳進發。趕抵古城。以備各城調遣。所有該官兵口分。仍著保恆平瑞設法籌備。若



因遠道而來枵腹荷戈非但征勦不能得力兼恐有譁潰之虞其烏城迤北一帶西接科布多路通古城恐該處回匪奔竄靡定人心惶惑著麟興等飛飭該盟長等傳集各旗蒙古官兵扼守要隘遏賊東竄之路科城軍器不敷麟興等將庫儲腰刀火藥等件撥赴科布多應用卽著飭令蒙古臺站弁兵按站護送以期妥速科布多調撥之兵雖經廣鳳等飛飭杜爾伯特等選兵備調而該蒙古等向不應私置軍械且均未經出征科城糧餉支絀器械餉糈均難籌畫古城以西各城回氛四起萬難坐視不救但調兵卽須得一兵之用若以烏合之眾湊集成軍器械又不應手到防後不能禦賊徒耗餉糈於事何濟著廣鳳等慎加遴選擇其精壯可用者酌量派往以期得力正不必拘定數目反致有名無實科布多屯防兵丁無多旣屬不敷分撥卽著留於本城毋庸勉強調派將此由六百里各

諭令知之○又諭廣鳳奎昌奏查勘科爾沁海留圖等處居住內服之哈薩克作何安置應由塔城辦理並豫籌科屬蒙古情形仍須照舊游牧各摺據稱接准分界大臣咨稱令查科爾沁海留圖一帶居住交納租馬內服之哈薩克人眾作何安置查此項人眾雖居科境不屬科城管轄遇有事件向係由哈薩克汗綽坦公阿濟呈報塔爾巴哈台參贊大臣覈辦其每年交納租馬亦係由塔城派員解交科城科布多並無此項冊檔無憑查其確數等語此項人眾旣據廣鳳等奏明係屬塔城所管卽著明誼會同錫霖等按照廣鳳等此次咨送哈薩克居住地名清單酌覈辦理並據廣鳳等查明烏梁海邊境除瑪呢圖噶爾勒幹卡倫一帶科爾沁海留圖及霍呢邁拉扈等處有哈薩克居住外別無空閒地方將來分界後如須內遷應由塔爾巴哈台參贊大臣酌地安置明誼尤當與錫霖等豫

籌安輯之方。免致失所。至科城所屬蒙古人眾。現經廣鳳等體察情形。未便遽入卡內。萬不得已。僅可在北八臺等處暫為安置。而臨時有無掣肘。日久能否相安。均難豫定。並據杜爾伯特烏梁海等處蒙古呈報。遊牧處所無可讓出。總以照舊遊牧。方為妥善。各等情。現在西路分界。業據明緒等給與俄國照會。准照議單分界。是該處地方。恐不免為俄國包去。應如何妥籌辦理。俾該蒙古等得安生

業之處。著明誼相度情形。知照廣鳳等妥為商辦。將此由五百里各諭令知之。○以防勒遷延。福建署提督林文察曾玉明下部議處。○予安徽英山陣亡副將王福齋等十一員祭葬。世職加等。○撥工部火藥六萬斤。解赴陝西提督雷正綰軍營備用。○撥山西歸綏道庫銀三萬兩。解赴科布多城。以備軍需。○甲申。諭議政王軍機大臣等。本日據特普欽奏請回旗省親。業經明降諭旨。賞假兩月。黑

龍江將軍令寶善署理盛京副都統。令慶春署理山海關副都統。令長善署理矣。前據寶善奏稱。巴爾虎喀爾喀互爭地界一案。擬俟來歲春融再行起程。會勘業經批示。照准。現在寶善既署黑龍江將軍。著即馳赴署任。將勘界事宜。先行熟籌情形。以便臨時勘辦。較有把握。慶春著俟長善馳抵山海關後。即行交卸。起程馳赴盛京署任。將此各諭令知之。○又諭僧格林沁奏剿匪獲勝。賊分東西兩

路逃竄。親督馬隊堵剿。西竄股匪先勝。後挫一摺。麻城以南。踞賊經成保等軍在閔家集蔡家畝等處疊獲勝仗。僧格林沁親督馬隊馳赴羅山堵剿。西竄股匪追至蕭家河一帶。大股援賊繼至。我軍馬力難施。陷於深溝之中。以致失利。據該親王奏稱。傷亡兵丁不過二百餘名。稍加整頓。即可進剿。即著僧格林沁整飭隊伍。激勵將弁。相度地宜。實力進攻。以期迅殲醜類。該親王成算在胸。雖偶有挫

失自能運籌決勝以振軍威僧格林沁擬就近招募本地勇丁千餘名作為嚮導該處地勢既須步隊方能得手即著該親王酌量辦理該匪現竄霍山葉家集一帶盤踞並分擾商城黃土嶺以南游弋英翰郭寶昌等軍已抵商城之豐家集即著僧格林沁檄令該臬司等偪賊而營與張曜等軍會籌埽蕩迅殄逆氛僧格林沁大軍進擣羅山逆匪非有步隊協勦不足以資取勝著官文速派成大吉

李成謀等步軍出境跟蹤追躡並一面派撥步軍繞出羅山之前攔頭截擊以收夾攻之效該逆現竄英霍一帶喬松年雖已調何紹彩一軍與蔣凝學協同扼守如兵力尚嫌單薄著曾國藩酌調數營前赴英霍助勦曾國藩現駐安慶即可就近權衡緩急情形妥為調度並著張之萬就現有步隊檄赴光羅等處均歸僧格林沁調遣以厚兵力喬松年仍遵本月十四十五等日兩次諭旨妥為籌防

陳國瑞曾否到營現在情形若何著僧格林沁詳查具奏另片奏請將張曜開復等語業經批示照准仍著該親王隨時策勵認真追勦以期迅速歲功將此由六百里各諭令知之○又諭穆圖善奏遵旨馳援甘省將各營部署起程慶昫奏抽挑兵勇夾擊獲勝並聞有西回匪來投入夥各摺片穆圖善所統各營經該將軍飭各營官剴切曉諭均各深明大義志切同仇實屬奮勉著先行傳旨嘉獎仍著劉蓉查明各該營欠餉酌量給發如一時未能全給俟各處協餉到後陸續補解並著查明從前各營兵弁勇丁隨同多隆阿在陝打仗實在出力未經得有保獎者准穆圖善劉蓉擇尤彙案請獎不得稍有冒濫以昭平允穆圖善所請令金順兩起馬隊隨同赴甘即照所請行此次追勦蔡啟各逆勞績亦准查明請獎穆圖善當隨時激勵諸軍勛以大義俾邊徼早就肅清同膺懋賞仍將兵

勇實數及起程日期趕緊奏報以慰馳廬都興阿於此軍到後商酌調派以期得力蔡啟等逆向秦嶺一帶逃竄劉蓉仍駐藍鄂一帶務當督飭將弁儘力追剿楚豫各邊防尤須慎固封守不可大意仍將近日勦辦情形據實馳奏慶昫即知照常陞在納家牐一帶擇要屯紮牽制賊勢以通南堡運道一俟杜嘎爾之軍到齊即行會剿不可率行深入致有疏虞都興阿當飭杜嘎爾等與常陞所帶兵勇聯絡聲勢以收夾擊之效城防一切事宜仍著慶昫妥為經理際此事機漸順尤不可稍涉大意墮賊詭謀懍之慎之慶昫另片奏近日偵探平固敗賊入金積堡為馬化澂挑選收集次入納家牐王家團莊以及郡城等處已屬聚六七十名並聞郡城中有西同兩府投來入夥之賊此等匪徒聚集多人必圖大逞都興阿慶昫均須督飭帶兵各員認真防勦毋任肆意句合又滋蔓延慶昫欲於綏

遠城勸捐馬匹解送甯夏著即咨催德勒克多爾濟迅即籌辦可也將此由六百里各諭令知之黑龍江將軍特普欽乞假省親以盛京副都統寶善署黑龍江將軍山海關副都統慶春署盛京副都統鑲黃旗蒙古副都統長善署山海關副都統以力戰受傷賞甯夏防禦連瑞花翎予湖北羅山陣亡都統舒通額侍衛隆春奇克塔善參領祥恩營總常德西蒙額等祭葬世職加等復已革副

將徐連陞原官予祭葬世職蠲緩廣西永安修仁荔浦容岑溪貴武宣橫永瀘新甯凌雲賓歸順宣化隆安崇善左養利永康甯明來賓遷江上林西隆天保北流蒼梧藤桂平柳城象武緣西林興業三十四州縣暨歸德果化太平安平田五土州被擾地方舊欠額賦有差乙酉以前任西安將軍福興為正黃旗漢軍都統正白旗漢軍副都統烏勒興阿署鑲黃旗蒙古副都統正紅旗蒙古副都

統奕貴署正白旗蒙古副都統。丙戌順天府以宗室鄉試中額請得旨取中五名。○丁亥諭內閣綿宜萬青葵奏本年順天鄉試試卷較前加倍謄錄書手齊心趕辦將頭場試卷全數謄完並無遲誤懇請將書手獎勵等語。總辦書手薊州經書趙際亨著賞給從九品職銜以示鼓勵嗣後不得援以為例。○又諭前因倉場侍郎奏本裕倉役滿花戶郭畫溪等把持倉務並該倉監督家人及書吏等舞弊各情當將該監督等撤任並將花戶郭畫溪等暨被控之該監督家人書吏均交刑部審訊茲據宗人府刑部訊明定擬具奏此案本裕倉滿監督宗室康來之家人侯三恃該監督平日信任輒敢聽許財物關說公事倚官詐贓情節較重著即發近邊充軍該倉散夫梁二於散米之時膽敢聽從已故夫頭李瑞勒索得贓實屬執法著即發雲貴兩廣極邊充軍照例改發黑龍江交該將軍酌量

安插滿監督宗室康來信任家丁關說公事漢監督司智於倉役李瑞勒索得贓及同官家丁舞弊等情毫無覺察均有不合著交部分別議處逸犯盧應辰賈九郭畫溪周六呂三侯四侯七仍著步軍統領衙門順天府五城一體嚴拏務獲究辦。○又諭都察院奏奉天民人邱吉孟遣抱告邱倉兒以傷母害子焚屍霸產等詞赴該衙門呈訴此案邱吉孟因典與堂伯山場墳樹被伊堂伯之子邱吉卜根伐涉訟邱吉卜賄買趙四閻王等將伊母毆傷並將伊幼子踢死焚屍等情於咸豐七年六月八年三月先後赴都察院具控疊經奉天府府尹提訊嗣於同治元年復以案懸未究赴該衙門呈訴當經降旨嚴催何以案懸八載至今仍未奏結實屬玩視人命任意延闕著寶珣德椿即行親提人證卷宗嚴訊確情定擬具奏毋再玩延。○諭議政王軍機大臣等張之萬奏麻城敗賊被勦狂奔官

軍沿途追截互有勝負現籌添募勁旅相機兜剿一摺所奏情形與僧格林沁前奏大略相同現在東竄之扶逆折回商城近境與張曜相持而西竄逆氛廣集於楚豫之交賊勢甚熾僧格林沁現已移紮羅山扼賊西向惟該處地勢崎嶇田塍交錯馬隊仍難著力僧格林沁派楊長春招募秦軍散勇二千名張之萬飭宋慶添募步勇一千五百名因為因時制宜起見第賊計甚狡難保不一氣狂奔

肆其衝突況倉卒招募之勇訓練未精亦恐難以禦敵僧格林沁張之萬總當就現有兵力熟籌堵剿毋令賊蹤西犯擾及完善之區仍一面將存營步隊逐加選汰去弱留強一面將募勇事宜迅速辦理務期精壯可用以輔馬隊之不足毛祖熙所部步隊居多可否調赴前敵以厚兵力之處並著酌量調派官文燾遵前旨速派成大吉李成謀等步軍出境跟蹤追躡並一面派撥步軍繞出羅山之

前攔頭截擊歸僧格林沁調遣以收夾擊之效不得畫疆自守貽誤戎機自干咎戾將此由六百里各諭令知之以正紅旗漢軍副都統增慶署正白旗護軍統領鑲白旗滿洲副都統載容署正黃旗滿洲副都統○戊子諭內閣前因戶部奏將軍需報銷變通辦理當經明降諭旨凡同治三年六月以前各處軍務未經報銷之案准將收支總數開單存案免其造冊報銷茲據該部奏請嚴飭各統

兵大臣督撫認真督辦另片奏請將已經咨題題覆各案畫一辦理等語向來糧臺造報本易矯誣此次開單更恐肆行冒濫儻封疆大吏不能破除情面認真刪減將使朝廷逾格隆施轉為屬吏侵漁地步殊非國家實事求是之心所有同治三年六月以前各處軍需用款准照新章奏報者有統兵大臣責成統兵大臣辦理無統兵大臣省分責成各該督撫辦理至江蘇徐州及江南江北糧臺向

准管理糧臺之員徑行咨銷此次若仍由糧臺開單殊不足以昭覈實徐州糧臺著責成吳崇辦理江南江北糧臺著責成曾國藩吳崇辦理各省鉅萬軍需由該大臣督撫一言而定儻有不實不盡之處必惟該大臣督撫是問至開單存案事屬創始其中款目繁多應如何分年分起覈實開報之處著該大臣督撫等各就實在情形先行妥議章程具奏如有吏胥人等在外藉端撞騙者著懷遵前

奉諭旨嚴行查拏從重懲辦其同治三年七月初十日以前已經咨題到部尚未覈覆之案卽由戶部查照收支總數暫行存案無庸題覆仍行文各該省自行覆加確覈遵照新章開單奏報毋許稍有含混至從前已經題覆各案內有指款駁查之件並著各該省詳細查明應刪減者覈實刪減應聲明者據實聲明各歸各起奏報存案以歸畫一而杜流弊○又諭戶部錢法堂奏請飭催直隸積欠

寶泉局銅批飯銀一摺戶部寶泉局例由直隸省藩庫每年撥解銀四萬二千餘兩以資辦公歷年積欠已有四十二萬七千餘兩之多節經該部奏催籌撥先後僅據直隸總督解到銀九千兩零除由該部例分工局三分之一及搭解鈔票並歸還庫款銀兩外所餘實銀已屬無幾現在鼓鑄正當喫緊該鑪役人等豈能枵腹從事著直隸總督嚴飭該藩司於應解前項銀兩內無論何款先行籌解

銀三萬兩並前次所欠奏准未解之一萬九百餘兩通計四萬兩限一月內迅速如數批解以應急需而資辦公毋許延緩○又諭前因英元奏山海關監督任內短徵銀兩與鳳安無涉請將部議令鳳安攤賠之款仍由英元賠繳諭令戶部查議具奏茲據該部奏稱各關管關人員向例無論兩任數任統以一年為期儻有短少各按在任月日攤賠惟嘉慶二十四年崇文門左右兩翼遇有前任未

經缺額後任始行虧短即著落後任賠繳奉有

諭旨咸豐四年殺虎口短徵銀兩亦係按日覈計並不將前後任牽算亦經辦有成案查英元接收交代摺內曾經奏明鳳安代徵一百三十五日移交均屬數額是短收新徵贏餘銀兩係英元接徵後始行虧短自應援照成案准如所請辦理等語各關短徵稅銀如第按任期攤繳恐後任恃有前任分賠轉滋弊

竇所有英元在山海關監督任內短徵新增贏餘銀一萬八千三百八十三兩內議令鳳安攤賠之六千餘兩著照部議責令英元於限內照數完繳毋庸令鳳安分賠嗣後山海關及張家口殺虎口關期任期暨代徵名目悉仍其舊惟應徵稅課凡在此次奉旨以後交議者無論經徵代徵均按在任月日覈計毋庸按年統算以歸畫一而杜牽混並著纂入則例永遠遵行此外各關仍不得援照辦

理○又諭賈洪詔奏假期已滿病難速痊請開缺調理一摺賈洪詔自簡放雲南巡撫以來朝廷因該省軍務緊要疊經諭令迅速前赴昭通妥為辦理該撫以告病人員經朝廷特加超擢簡任封圻宜如何激發天良遵旨前往實心任事乃自上年三月開簡放後該撫即託詞節節逗遛遲至十月始抵四川省城方冀其抵川後權衡緩急迅赴昭通悉心籌辦以副委任迄今又將一載未離川省一步措置毫無覽其奏報均屬紙上空談並不認真籌畫前以嘔血益劇病體難支等詞入告給假兩箇月俾資調理茲復據奏稱雲南軍務緊要未敢以病軀戀棧請開缺回籍調理等語顯係飾詞規避辜恩昧良實堪痛恨雲南為邊陲要地治理需人若奉旨簡放之員均似賈洪詔之託病不前工於趨避尚復成何事體賈洪詔著即革職以為規避取巧者戒○以故烏喇特輔國公拉旺哩克錦子



貢桑棟魯布襲爵○以恭纂

文宗顯皇帝實錄過半。予提調等官盛京戶部侍郎前內閣學士寶珣翰林院侍讀學士童華等升敘有差。○以四川勦滅髮逆全股出力。賞知州梅震煦主守備陳文魁等花翎教諭蕭鴻吉等藍翎餘加銜升敘開復有差。

大清穆宗繼天開運受中居正保大定功聖智誠孝信敏恭寬毅皇帝實錄卷之一百十二

大清穆宗繼天開運受中居正保大定功聖智  
誠孝信敏恭寬毅皇帝實錄卷之一百十三

[illegible]

同治三年甲子八月己丑諭內閣曾國藩奏

從前保奏攻克各城水陸出力人員各案疊經吏部咨覆令將各員勞績分晰註考報部覈辦時因軍務倥傯未及按名分註現在事隔數年積至二十二案之多勢不能逐一補註懇請均免加考報部卽照原單一體註冊等語向來軍營保舉人員均應將何項勞績聲明報部覈辦此次據曾國藩奏稱所保各案均係首先陷陣戰功卓著者始保越級免補免選等項與部章本無不符况現已事隔

多年積案不少若必令逐一補註考語再行覈准轉使積功將士官階懸而無薄殊不足以示激勵所有曾國藩奏保各案人員均著照原單一體給予獎敘其有原保與例未符業經有旨更正者亦即遵旨給獎無庸加考報部覈議此係特旨允准嗣後不得援以為例○又諭前因江蘇釐局過多諭令該督撫等逐加裁撤歸併茲據富明阿吳棠奏稱遵飭妥員周歷揚通各屬逐加履勘計裁併各

局卡共七十二處現存各處正局分局係因各軍尚未盡撤暫行酌留以供揚鎮兩營並江甯清淮等軍月餉商民之力自可稍紓卽著照所議辦理江蘇省城業經克復水陸各軍亦將次第減撤此後需餉較前漸省仍著富明阿吳棠隨時體察情形酌量妥辦並嚴飭現設各局委員認真覈辦以期有裨軍需無擾商民如查有官吏蒙混侵蝕致滋擾累者卽著指名嚴叅懲辦○諭議政王軍機大

臣等有人奏直隸贊皇縣知縣李傳猷庸劣不職請飭查辦一摺據稱該縣令人本庸闇所募捕快半係馬賊以致鄰近州縣均被滋擾如果屬實糊塗謬妄於斯已極著劉長佑查明據實叅辦毋稍含混原摺著鈔給閱看將此諭令知之○又諭曾國藩奏接奉寄諭分條覆奏一摺江南北現經蕩平亟宜振興文教前次寄諭以貢院有無損壞為問原欲於來歲特開一科以免士子日久向隅茲據

奏稱該大臣親至貢院履勘至公堂等處及號舍均尚完好惟號板毀失監臨主考房官等屋片瓦無存現已派員採辦木料趕緊興修擬於九月奏請簡放考官於十一月舉行鄉試等語著卽飭令委員認真經理如工料一時不能畢集卽緩至來歲補行鄉試亦無不可仍著該大臣酌度時勢再行奏請江甯旗營駐防現存不過八百餘人京口旗兵已挑補足額該大臣擬將江甯滿營概發全餉

京口旗營暫給半餉俟庫藏漸裕再行一體全支均著照所議辦理旗營兵丁現無屋宇棲止其情形倍極困苦著飭令辦理之員迅即督工修理毋稍延緩至挑閒散京旗補江甯兵額之不足俟營房稍有眉目即與富明阿商酌辦理陳廷經前奏變通疆輿一節朝廷即恐輕議更張未必實有裨益該大臣以為吏事軍事之廢興全在疆臣之賢否似不必輕改成憲可謂要言不煩陳廷經所奏應

毋庸議江西軍事浙平惟侍康等逆尚未誅鋤楊岳斌赴任後鮑超與劉典等分辨南北兩路不必另派大員督辦沈葆楨有地方之責著與鮑超等隨時商榷和衷辦理以靖疆圉現在湖州廣德克復餘逆竄甯國等處山內曾否續竄江西軍情旦夕不同曾國藩仍當會同沈葆楨統籌兼顧即飭令鮑超等分任南北兩路以專責成俾收廓清之效英山被圍糧路梗塞深為可慮該大臣即嚴催劉

連捷等二十一營迅赴皖北如一時餉項未集即先到十數營亦可期其得力著即妥為區畫務將英霍一帶竄匪剿除淨盡不得稍留遺孽皖南北近日軍情並著隨時馳報以慰廑繫江忠源已屢次加恩於朝廷報功之典亦尚允當此次該大臣所請與何桂珍劉騰鴻畢金科等三員應如何一併加恩之處即著該大臣查明具奏再降諭旨密片一件留中將此由六百里各諭令知之○又諭前

因有人奏已革臬司李元度罪重罰輕請仍按律定擬先後諭令左宗棠曾國藩確切查明據實具奏茲據曾國藩奏稱李元度從該大臣最久艱險備嘗咸豐十年守徽之役到郡不及十日侍逆大股猝至兵力未厚府城失陷奏參革職拏問本屬從嚴十一年援浙之役參案未結遽行回籍沿途飾報勝仗又不努力救抗奏參革職留營尚為允當且當六年春間江西糜爛之時賴李元度力戰撫

州支持危局該革員本有兼人之才惟戰陣非其所長用違其材遂致身名俱裂現在大功將成追思昔年患難與共之人惟李元度獨抱向隅之感懇請酌量錄用等語李元度一員前因有人參奏於同治元年閏八月間寄諭左宗棠查奏此次曾國藩所奏各情仍著該督詳細查明李元度從前被參罪重罰輕之處是否允當迅速具奏至湖州安吉克復以後堵逆黃汶金挾幼逆洪幅瑱由績溪

一路竄去該督飭高連陞等追勦並令黃少春等軍繞前截擊近日軍情若何此股敗匪向西奔竄必併趨江右以圖勾結著左宗棠嚴飭派出各軍前截後追將湖郡逸出之匪悉數就地殲除毋任竄入江境復形滋蔓將此由五百里諭令知之○又論文盛阿爾塔什達奏酌派東兩盟兵下前赴烏魯木齊等處助勦一摺據稱所屬兩盟北面皆與俄羅斯連界邊防極關緊要該兩盟僅有備操兵

丁二千名若盡數調遣於防範俄人恐有疏虞現由兩盟調撥兵五百名選派得力之扎薩克公等管帶至烏里雅蘇台承領軍火前赴烏魯木齊助勦等語東兩盟與俄國毗連若將防兵全行徵調本境未免空虛文盛等所奏自係實情即著文盛阿爾塔什達將派出兵丁五百名遴選得力之扎薩克公等管帶星速起程前赴烏魯木齊會籌掃蕩迅復城池此項兵丁行抵烏里雅蘇台所有應領

器械鉛丸火藥著麟興車林敦多布寬為籌給俾資攻勦並著平瑞派員迎提催令該官兵趲程前進督飭會同烏魯木齊官軍實力進攻以期迅殲醜類常清領袖各城責無旁貸並著隨時統籌兼顧妥為布置至該官兵素無軍械鍋帳等件庫倫尚未設立倉庫亦屬無款可籌情形殊為苦累該官兵口糧馬乾及應需鍋帳器械等件著麟興車林敦多布文盛阿爾塔什達仍設法妥為籌畫一面

知照沿途經過各城大臣先期豫備隨時給發毋令稍有缺乏至到烏魯木齊後並著常清平瑞源源接濟以收飽騰之效將此由六百里各諭令知之○命翰林院編修曹秉潛提督福建學政○以江南陸軍克復省城出力賞提督周惠堂總兵官晏理週鄧泰志王庫賢宋茂英副將雷正清楊富有鮑昌勝楊瑞堂李麟定王恆豐武銀山王連陞黃一陞張耀春一品封典總兵官唐景春方萬盛蔣

得勝王道達易忠信張泰交歐陽清鑑丁得勝戴佑勝副將熊隆名趙有名李春森羅高政楊廷輝凌子龍鄒廷贊羅澤潤陳必友李隆典王先勝羅紫臨李宏珍陳萬山胡作成王本祥王玉貴張泰葛青雲劉璧友賀猷武熊春森孫俊傑戴洪福陳復茂蘇有奇彭秀清黃壽齡袁明亮劉大貴陳輝章陳錫林陶青松袁光明賀廣興唐洪福蕭玉吉熊品佳董文華沈鎮湘殷鳴岐徐復仁劉昌英宋步

雲參將張日昇成與國曾傳俊胡楚楠周榮亭蔣月華周仕達田天祿陸開德顏光志劉第益劉秀禮李孔英周玉堂王佑山龍開宗劉子貴陳新光皮開榮馮光順謝正印楊遇泰馬吉祥彭大中朱啟柏范心墉楊顯明朱安國姚桂林梁經魁謝洪勝梁憲章武文彪舒贊彪蔣玉貴曹良臣宋有亮鄧敬財秦有勝朱士達劉倫昱歐陽勝巴圖魯名號道員龐際雲副將張家魁等花翎都司周壽春等

藍翎餘加銜升敘開復有差子陣亡副將彭迎祥等祭葬世職○庚寅諭議政王軍機大臣等工部奏硝斤需用甚急各省勒限已逾多日請將承辦督催各員再行交部議處仍勒令按批解部交納等語現在火藥需用浩繁外省奏請調撥者又復絡繹不絕工部配造本年及明年備用火藥尚短硝五十餘萬斤各省報解仍復任意遲延貽誤軍火所關非細著直隸山東河南各督撫順天府府尹

接奉此旨後迅將欠解硝斤督飭承辦各員趕緊按批星速赴部交納毋得再行玩延致干重咎將此各諭令知之○署河東河道總督譚廷襄奏報搶辦中河廳下三堡險工得旨著督飭各員認真搶辦以期穩固仍著隨時馳奏以慰廑繫○以辦解硝斤遲延直隸山東河南順天府各督撫府尹暨承辦督催各員均下部議處○辛卯秋分夕月於西郊遣睿親王仁壽行禮○

世宗憲皇帝忌辰遣官祭

泰陵○

上詣

壽皇殿行禮○諭內閣吏部奏湖北咸甯縣知縣羅琳疏防連劫盜案限滿無獲暫署湖北巡撫唐訓方遲至四箇月疏防限滿之後始會同湖廣總督官文奏參摘頂勒緝應比照徇隱例議處擬請將唐訓方降二級調用官文降一級調用俱無庸查級紀議抵等語官

文著加恩改為降二級留任唐訓方著加恩改為降三級留任其議以降二級調用之知縣羅琳著准其抵銷○諭議政王軍機大臣等喬松年奏陳報西南兩路軍情並英翰一軍攻克金家寨及陳國瑞折回光州各摺片據稱賊竄過松子關後一股竄往豫境一股竄入皖境之金家寨地在六安霍邱之間喬松年以軍情緊急將英翰調回英翰隨與郭寶昌進兵攻克金家寨餘賊向南潰遁即著

飭令英翰等跟蹤躡勦務將此股敗匪盡數殲除毋令死灰復燃又成滋蔓其英山一路之賊圍攻蔣凝學營壘經該道督軍苦戰擒斬甚多賊始解圍惟該處逼近羅田恐賊接踵而來尚須後路接應蔣凝學兵力本單前經諭令曾國藩撥營前往英霍助勦現經該督調派劉連捷朱洪章兩軍來皖官文亦派譚仁芳馳赴英霍兵力已厚著喬松年催令各軍迅速前來會合蔣凝學等軍力遏兇鋒

杜其竄擾張得勝現在六安與英翰蔣凝學兩軍相為犄角著飭令勤探兩路軍情何處緊要卽往何處協助防守巢縣之兵如尚可撥援英山仍著曾國藩調派前往其竄入豫境一股現已在商城羅山一帶游弋僧格林沁進擣羅山步隊不敷分布著官文遵照前旨速派成大吉等出境追躡並派撥步軍繞前截擊張之萬亦當遵旨將現有步隊檄赴光羅歸僧格林沁調遣前諭僧格林沁於陳

國瑞到營後查看該員曾否實有反情妥籌辦理茲據喬松年奏稱陳國瑞本由光山赴該大臣軍營現已折回光州不知曾否謁見等語該總兵向來打仗勇敢曾著功績本屬有用之才惟在駕馭得宜恩威並用此次該員叛狀既未確有實據或尚可就我範圍惟因何折回光州曾否到營謁見著僧格林沁詳細具奏如果叛跡昭著自外生成自當聲罪致討喬松年卽可飭防軍杜其入皖若因

跡在疑似之間操之過嚴激成事端亦非朝廷保全功臣之道此事惟在僧格林沁辨別真偽斟酌機宜妥籌辦理正在寄諭聞據富明阿奏遵撥富陞馬隊赴皖並詳陳江北情形一摺富陞所部馬隊一百二十餘名現經富明阿飭令赴皖卽著迅催該副都統剋日起程前往壽州聽候喬松年調遣惟據富明阿奏稱賊有秋涼東竄之語恐其繞越安慶由巢舒各城直達和含則裏下河一帶亦不可不防如該逆覬覦江北揚防處處喫重喬松年當仍飭令富陞管帶所部馬隊迅速回揚不得稍分畛域曾國藩隨時偵探如果揚防有警亦當酌量撥兵協助富明阿之軍先事豫防毋稍大意皖北現在兵力較厚喬松年務將此起竄匪就地殲除並力扼要隘毋令賊匪東趨擾及完善將此由六百里各諭令知之○又諭揚岳斌沈葆楨奏籌防東路情形一摺江省之賊自許灣敗潰後金谿南

豐等城相繼克復賊猷頓衰相率西遁楊岳斌督軍跟追並飭江忠朝等繞赴上游截擊其浙省之賊自湖州克復後已棄廣德赴甯國分道狂竄賊悍且多廣饒防兵單薄甚屬可虞是江省東路尤為喫緊前因左宗棠奏堵逆黃汶金等由績溪祁門等處分路上竄恐其假道徽池以擾江西當經諭令左宗棠嚴飭提督高連陞等軍從徽嚴一帶截擊李鴻章飛調得勝兵勇會合浙師出境追剿現

在鮑超擬由撫州至東鄉劉典已由甯都拔營前赴婺源即著該提督等各統所部星馳進擊力挫兇鋒左宗棠李鴻章恪遵前日諭旨督飭派出各軍分路追擊與江省諸軍會合四路兜擒將湖州逸匪盡數殲除毋任逃竄侍康等逆西竄何處必須極力跟追方免滋蔓江忠朝王文瑞等業經繞赴上游席寶田韓進春既已拔營西行自應探明賊蹤相機剿辦昨據曾國藩奏楊岳斌赴任後江省

南北兩路令鮑超劉典分辦現在劉典已赴婺源其勢不能折而西馳著沈葆楨責令席寶田韓進春等覘賊所向實力截擊如兵力尚嫌單薄即由沈葆楨酌量調派楊岳斌接奉前旨諒已部署起程沈葆楨身任封圻責無旁貸著會同鮑超劉典等和衷商辦迅圖

歲事曾國藩亦當妥籌兼顧以維大局正在寄諭間惲世臨奏黔匪大股復行勾結下竄侍康等逆竄近贛郡各等語江西之賊由甯都擾及雩都縣屬樂坳地方逼近贛郡惲世臨已派趙福元馳抵太和劉德謙等添募一營同駐興甯周興隆募勇五百名前赴郵茶邊隘以便王永章唐應聘等移營出境即著飭令趙福元等會同席寶田等軍兩路夾擊一面飭令王永章等移師出境覘賊所向橫出截剿以期聚殲劉德謙周興隆等募勇守邊自為添助兵力起見惟新募之勇訓練需時各營勇丁裁撤回籍者甚多著惲世臨酌



撥若干名交劉德謙等管帶嚴防要隘以資得力黔匪圖撲沅州經湖南官練擊敗後竄回貴州金家場張家寨適匪玉屏縣苗匪下竄洞坡汪家溪敗歸竹寨章寨一帶另股圖擾涼傘之賊雖未得逞而天柱股匪又分竄靖沅邊界縱橫紛竄四出滋擾若不迅圖撲滅勢將處處燎原終成不了之局著勞崇光張亮基飭令派出防兵會合楚師聯絡聲勢認真兜剿以收夾擊之效楚境邊隘仍著惲

世臨督飭周洪印等嚴密堵遏以保疆圉將此由六百里各諭令知之○又諭前因富明阿奏請將遣撤吉林等處官兵照數更調並添調正兵各一百名來揚助剿當經寄諭各該將軍照所請更換添調茲據富明阿奏稱揚防馬隊單薄請將前次調換吉林官兵催令來揚其黑龍江前調兵丁來營需時請即行停止止將所捐馬匹解送來防等語現在皖境防務喫緊富陞所部馬隊已撥赴壽州

防剿揚防馬隊彌形單薄著景綸麟瑞將富明阿前奏調換之吉林官兵一百二十七名迅速催令起程赴防以資得力其黑龍江調換兵丁既據富明阿奏稱距揚較遠毋庸更換即著寶善將捐辦馬匹酌派官兵由揚營前次帶去整裝銀兩內發給川費下餘之銀仍儘數湊買馬匹交委營總那遜達賚等解回揚營以備操防之用如寶善尚未到任即著特善欽妥為辦理將此由五百里各諭令

知之○予安徽英山陣亡守備廖得隆等祭葬世職加等○予貴州玉屏陣亡副將胡均祿等祭葬世職加等○予江南紅單船水師陣亡病故溺斃官兵弁勇於廣東順德縣原籍建立忠義祠○旌表守正捐軀直隸河間縣民王泳城妻李氏泳和妻王氏○壬辰遣官祭賢良祠○諭內閣前因毛鴻賓奏湖南洪江釐捐積弊當將該局委員林慶光等分別革職撤任交該撫嚴查叅辦茲據惲世臨

奏稱遵卽調集釐局卷宗提集林慶光等逐加研詰尚無私設釐卡並假冒入己情弊惟查該局收釐總簿內同治二年夏秋二季分造報鹽數與鹽行簿據不符至五萬餘斤據林慶光等供稱係局丁蔣恆舞弊失於覺察各等語此案已革知縣林慶光已革府經歷翟詵已革從九品董立誠於收釐重務率用局丁以致舞弊少報雖訊無通同授意究屬辦理不善咎無可辭該員等均已革職著毋庸議前任清泉縣知縣許標訓導舒其鏐於創辦之始任用家丁管卡巡船立法不善接辦各員亦未能更改雖查無丁差侵蝕實據究屬不合所有歷年接辦局務之員著查取職名與許標舒其鏐一併交部分別議處至前署湖南巡撫翟誥等係專委督率之員於該局任用家丁未能隨時駁斥撤換亦屬疏於覺察除翟誥業經休致無庸議外道員陸傳應撤任按察使兆琛著一併交部議處○

入諭張之萬奏參庸劣衰老才不稱職之知縣請分別撤任降補改用勒休一摺河南中牟縣知縣蔣鳳標久無政績人地未宜著撤任另補署蘭儀縣知縣慶霖褊急躁妄不協輿情著降為府經歷縣丞准補涉縣知縣董藍田才識迂疏辦事遲鈍惟該員由舉人出身文理尚優著開缺以教職改用上二員均著歸部銓選伊陽縣知縣戴錫福年力衰憊昏憤不堪著勒令休致准補息縣知縣王德洋心地明白惟才具不甚開展難勝繁劇著開缺留省遇有中簡知縣缺出酌量補用仍送部引見新野縣知縣余松才幹不足辦事顛預著開缺以府經歷縣丞留省補用以肅官方而重吏治○諭議政王軍機大臣等左宗棠奏截剿竄賊大勝首逆黃汶金等就戮一摺徐宗幹奏張運蘭到閩接任卽赴防所勦辦並康熊飛克復新城情形林文察奏臺灣大局底定撤隊內渡各摺片堵逆黃汶

余由廣德繞過甯國分竄昌化瀆安等處。疊經官軍擊敗。並殲斃黃汶金黃汶英等逆黨甚多。勦辦甚屬得手。惟洪幼逆及偽祐王李遠繼等尚在稽誅。人數不下四五萬。著左宗棠督飭諸軍盡力搜勦。毋留餘孽。以竟全功。同膺懋賞。黃汶英既與洪幅瑱同逃。洪幼逆必在瀆安一路。據獲賊所供偽幼逆逃去時將頭髮鬘髮裝扮洋人。希圖混竄。左宗棠已令諸軍物色。著卽密飭購捕。務在必獲。並傳諭各營將弁。如獲得洪幼逆。必仍破格重賞。斷不可任令免脫。致貽後患。輔逆楊輔青已由湖州薙髮潛入上海。著李鴻章派委妥員密速擒獲。此種匪類。若投入洋人處。所恐遂為遁逃之藪。將來又費唇舌。該撫當慎以圖之。黃汶金逆屍是否瘞於白牛橋側。著於掘驗後。由左宗棠隨報附奏。浙江餘逆。恐勾結前竄江西。各逆聯為一氣。曾國藩沈葆楨當遵照歷次諭旨。飭諸軍截勦。不可稍涉大意。

張運蘭業經接印任事。其所部勇丁已可行抵汀境。著左宗棠徐宗幹卽催該臬司剋日出省。前赴邵武防所。迎提全隊。擇要駐紮。與康國器會商出關。兜勦。仍令查明建甯汀州各屬要隘。及江西各路軍情。多設偵探。嚴密堵禦。毋致稍有疏失。曾玉明林文察二員。早已奉旨。令其內渡。本日適據林文察奏到。擬卽配船內渡。仍著該督撫委員迎提。如仍無內渡信息。卽行從重叅處。新城之役。前據江西奏到情形。甚略。亦未提及閩軍出力各情。徐宗幹轉據康國器稟稱。康熊飛率勇將黃沙渡等處賊壘十二處。次第勦平。賊退入城。康熊飛會同林本熊直抵城下。斬關直入。鮑超部下馬隊亦到。該逆驚惶失措。越城由石溪頭向南豐大路而去。其情形是否確實。仍著沈葆楨徐宗幹會同查明具奏。並查明此股逆眾竄向何處。責成各路防軍會合痛勦。未可蹈勝不相讓。敗不相救之習。致滋蔓延。

陳啞狗一犯前據徐宗幹曾元福奏報均稱於五月二十三日生擒正法本日據林文察奏該逆受傷泗水逃遁該逆之族垓垓大突等莊跟蹤圍捕於二十四日該莊頭等將陳逆獻出情形既有互異則下手出力卽迥不相同著左宗棠徐宗幹切實查明具奏俾將來列保各員不至有遺漏冒濫之弊臺郡大局已定彰屬餘匪林文察已交林文明分別按捕該提督卽撤隊內渡商辦閩省邊防事宜

毋再遲誤干咎臺灣餘匪著左宗棠徐宗幹責令曾元福丁曰健實力辦理洪橫一犯必須擒獲正法以淨根株毋任漏網將此由六百里諭知曾國藩左宗棠李鴻章沈葆楨徐宗幹並傳諭林文察曾玉明曾元福丁曰健知之○湖南巡撫譚世臨奏清釐湖南錢糧章程飭屬遵守得旨該撫仍當隨時留心訪察各屬如有陽奉陰違額外添設名目恣意多取者立卽從嚴叅辦以昭儆戒○以雲

南布政使林鴻年為巡撫按察使劉嶽昭為布政使巡東道席寶田為按察使○以浙江昌化勦賊獲勝賞提督黃少春從一品封典予外委孔行斌以守備用並賞花翎餘加銜升敘有差予陣亡守備滕雲山祭葬世職加等○癸巳諭內閣現在庫車等處逆回變亂業經飭調各城勁旅陸續進剿大兵一到不難立就殲除因思國家撫育黎元漢回居民均係赤子回疆自隸版圖百有餘年朝廷一

視同仁從未嘗稍存歧視前因內地漢回構釁疊經明降諭旨飭令各統兵大臣分別勦辦止分良莠持平辦理並令刊刻謄黃剴切曉諭現在新疆各城回匪紛紛攘亂自必係內地逃出奸民編造謠言肆行煽惑惟恐良回不信故先布散全行誅滅回眾之語剗之入夥當其剗掠貲財則奸回獨享其利及至官兵誅戮則良回共受其殃哀此愚民實堪矜憫著新疆各路大臣仍遵疊次諭旨分別

勦撫但將為首滋事回匪殲戮不可因回民中有恃強玩法之人即將安分良回概行株累其有被倡脅從者但能悔悟解散即是安分良民一概免其究治經此次訓諭之後須知朝廷提伐從無將安分回民概行勦辦之理至新疆各部落回眾自入版圖以來百有餘年均皆安分更非內地附居之漢回可比縱有奸回肆行搖惑斷不可信仍當各保各境齊心禦侮同膺懋賞不可心生疑懼墮其

奸計而害及身家是為至要該各城大臣即將此旨刊刻謄黃再行曉諭以示朝廷胞與為懷之至意○諭議政王軍機大臣等官文奏斬羅賊匪踞險牽掣官軍驟難出境追擊並防北竄股匪回擾楚境一摺鄂省東竄賊匪虜聚斬羅交界之大小界嶺等處依山踞險抗拒官軍賊勢絲亘幾二百里雖經官軍分路環攻而賊情甚為狡諂迄未大受懲創官文現飭成大吉等分由大小界嶺月山互

為援應進勦蕪水之賊譚仁芳等分由鴨子坂駱駝坳一帶進勦羅田之賊周成謀馳赴麻城何處有賊即由何處進勦周鳳山扼守團陂何處緊急即由何處援應布置尚為周妥即著官文嚴飭派出諸軍會同將疑學等由英山兜勦之軍實力進攻務將該逆就地殲除毋任蔓延為患如逆黨被創奔突仍飭諸軍躡蹤追勦不准稍分畛域並著曾國藩飛飭赴援之劉連捷朱洪章及續派各軍分由宿松太湖及桐城潛山一帶進兵會合將疑學何紹彩等軍嚴遏英霍竄匪相機迎勦毋徒株守本境喬松年即飭英翰郭寶昌等實力會勦迅殲醜類其由黃安北竄光山股匪經僧格林沁擊勦復竄羅山境內並撲孝感縣屬之三里城一帶現據官文探知該逆仍欲乘隙窺伺黃孝應德圖犯隨棗一帶如楚邊無懈可乘即由信羅直犯南陽前因僧格林沁進勦羅山逆匪馬隊未能得力諭令

官文迅飭成大吉李成謀等步軍出境夾擊現據官文奏稱蘄羅賊勢尚張成大吉等軍現在分路勦辦一時未能出境另派姜玉順蕭河清常星阿蘇倫保溫德勒克西馬步各軍由河口抄出賊前徑赴三里城德孝等處與豫軍會勦仍分撥隊伍馳赴武勝關探明豫軍及僧格林沁之軍現紮何處卽由何處出境夾擊卽著僧格林沁迅速催提赴光羅一帶協勦竄匪姜玉順等馬步各隊共有若

千名如步隊為數尚多可資分撥卽由官文知照僧格林沁抽調赴營以厚兵力其羅山信陽毗連南陽各要隘著張之萬選派勁旅加意防維毋任匪蹤闖入並懍遵疊次諭旨迅派得力步隊前赴僧格林沁軍營以資調遣僧格林沁張之萬務當會飭諸軍與楚省所派姜玉順等軍盡力扼勦成大吉李成謀步軍仍著官文隨時酌度軍情如蘄羅賊勢少衰可以抽調出境卽遵前旨迅飭成大吉

等繞出羅山之前與僧格林沁等軍前截後追以收夾擊之效黃孝應德各路要口並著官文飭派出防軍嚴密遏截毋稍疏懈將此由六百里各諭令知之○又諭前因官文奏髮捻竄擾楚北兵力不敷分布請就副都統安圖等管帶遣撤傷病官兵回旗之便卽令更換吉林精壯官兵一百名赴楚以厚兵力當經諭令景綸照數抽撥茲據官文奏稱現在髮捻各逆敗竄豫皖前次援陝之溫德勒

克西等所統馬隊均已回鄂兵力足敷追勦無庸再行更換等語所有官文前次請調吉林官兵一百名卽著無庸遣往知已起程並著景綸知照該官兵經過各省地方無論行抵何處飭令就地截回以省兵力而節餉需將此由五百里諭令知之○又諭官文奏請將各省釐金留作善後之費除直隸山東山西河南陝甘雲貴廣西賀遷艱遠釐金不多無濟於事軍務告竣卽可議撤外其餘若江

皖蘇杭福建兩湖四川廣東等省釐金雖軍旅歲事止宜嚴禁重科萬不可驟議裁撤請緩至三五年後軍事大定再議裁除等語軍興以來舉辦釐金原因度支告匱不得已而借資民力以濟餉需乃行之未善墨吏奸胥任意侵漁藉端訛索以百姓之脂膏供奸徒之中飽病商病民於國課仍無裨益是以朝廷疊經降旨裁革茲覽該大臣所奏亦屬實在情形現在東南等省大局雖已稍定而百

廢待舉需用浩繁於釐金一款本未能盡議裁撤昨據富明阿吳棠奏稱裁撤各局卡共七十二處現存各處正局分局各軍尚未盡撤暫行酌留等語朝廷亦經明降諭旨俯如所請總之釐金一項全在地方官實心經理果能弊絕風清未始非一時權宜之計所有兩湖釐金卽著官文擇其扼要處所抽收豐旺者酌留照常抽收總期有裨國用無累商民方為兩全之策如有不肖官吏蒙混侵蝕

肆意婪索以致擾累民生並著官文隨時查察嚴行懲辦以杜弊端將此諭令知之○又諭文祥奏哈密地方緊要之員接署勢難赴任並郡王伯錫爾誠實可靠請明降諭旨曉諭回眾各摺片據稱南路自文永一軍失利後吐魯番境內之匪聞風響應圍困城池兇鋒逼近北路木壘奇台一帶之匪聞烏魯木齊變亂後焚燒街市圍困古城幸連得勝仗舊城並未失陷現在自古城至巴里坤一帶

道路稍通哈密現籌防堵請暫留辦事大臣之任等語哈密為新疆門戶現在南北兩路回氛肆擾哈城防務關繫緊要現既乏員接署文祥卽暫緩赴程仍著將本城防守事宜妥為布置勤加偵探如有賊蹤竄近卽派兵迎頭截擊毋令闖入境內哈城回眾尤宜加意撫綏聯絡防禦伯錫爾忠勤懇著前已加銜示獎茲復據文祥奏稱該郡王已函劄各城台吉伯克等竭力報效殺賊立功實屬深

明大義著文祥傳旨嘉獎。卽商令派出回兵。隨同官軍。妥籌防勦。以資得力。古城百姓既甚出力。連獲勝仗。該匪退至南山吉布庫更格爾二處紮營。仍不時出沒。焚燒村莊。著保恆激勵兵民。奮力堵勦。堅守城池。以固東路之防。庫車失守以後。文永進勦失利。亟應添兵繼進。現在文祥既不能分身。該處軍務。不可無人督辦。明緒人尚明白。前已由塔城帶兵馳回伊犁。此時計已可到。著常清商同將

各城防勦事宜。布置就緒後。明緒卽選帶得力之兵。酌量南北兩路緩急情形。取道進勦。所有旗綠各營官員兵丁。均歸明緒調遣。明緒接奉此旨。卽當迅速籌畫。毋稍遷延。常清統轄各城。責無旁貸。現在南北軍情。毫無頭緒。該將軍務當懍遵疊次諭旨。催提前調喀爾喀等兵。籌備口糧器械。星速前進。以利攻勦。毋得一籌莫展。坐失事機。至新疆各城之變。皆由奸徒捏造謠言。多方煽亂。各城大臣

總當分別良莠。持平辦理。豈可概將安分良回盡行殲戮。據文祥奏稱。傳聞依奇哩將喀喇沙爾回民全行誅戮。以致流言四起。相繼作亂。是否實有其事。著常清等查明具奏。新疆自入版圖以來。各部落回民食毛踐土。百有餘年。率皆良善。卽該處附居之漢回亦皆安分居多。何至毫無天良。率行稱亂。總由內地逃出。漢回乘機煽惑。於中取利。致令良回實受其害。本日發去明發諭旨一道。著常清

明緒。文祥刊刻謄黃。頒發各城。徧行曉諭。以安眾心。惟回部恐不甚通曉漢文。可卽將頒去明發諭旨。令伯錫爾譯出。回文派員前赴各城宣示。回眾正在寄諭間。據常清奏庫爾喀喇烏蘇回匪變亂。焚燒軍臺。殺傷兵民。現派圖庫爾等管帶兵丁。遣勇二千二百名。分起赴援。並調土爾扈特蒙兵三千名。協力進勦。聲勢較壯。著卽督飭圖庫爾等星速前進。務將庫爾喀喇烏蘇賊匪趕緊撲滅。節節束



趨進援烏魯木齊以靖北路逆氛至南路各城待援甚急據奎棟奏庫車回匪擾及阿克蘇官兵在鹽山口一帶堵截馬步全被衝散道路阻滯奎棟已咨伊犁喀什噶爾催調兵丁應援卽著常清酌量情形派撥兵勇疏通道路前往接應奎棟亦卽派調就近各城兵丁馳往阿克蘇助剿迅殄逆氛常清奎棟仍一面將本日所發安撫良回諭旨譯出回文派令誠實回子分投剴切宣示開導以釋羣

疑常清請將平瑞景廉奎棟嚴加議處並自請嚴議該將軍等均有地方之責辦理不善以致各城變亂厥咎甚重豈嚴議所能蔽辜著俟查明各城失事情形覆奏到日再降諭旨所請調撥內地兵丁一節現在各路軍務漸次蕩平不日當可騰出兵力出關助剿常清等亦當就現有兵力悉心籌畫不可專待援兵致誤戎機嗣後非極緊要軍情不必擅發八百里摺報以免駭人聽聞俄人兵隊現

已撤退仍著常清隨時偵探防範將此由百里各諭令知之○甲午諭議政王軍機大臣等上年疊諭賈洪詔進駐東昭相機籌辦乃賈洪詔受命一年有餘仍未離川省一步不得不將其罷斥現在林鴻年已擢任封圻自應由川起行前赴昭通一帶妥為部署劉嶽昭所部九營駱秉章卽令帶往昭通隨同林鴻年前進其口糧等項卽由川省酌量籌畫以資接濟昭通有楊盛宗署理鎮篆於雲

南情形亦頗熟悉該撫等卽可飭令妥籌辦理馬如龍三世忠貞深明大義岑毓英亦以忠義自許如其善為驅策未嘗不可為先路之導前據勞崇光奏馬如龍彈壓省垣籌濟糧餉軍火岑毓英帶兵出省數月之中克堅城十數處復據尚書趙光奏滇省現在情形並將該省紳耆士庶公啟呈覽內稱馬如龍岑毓英均屬剋圖上進不憚以回攻回為同教所忌亟應優加獎敘曾諭令勞崇光等先

將攻克楚雄景東等府廳縣出力情形確切查奏候旨施恩著勞崇光等仍遵前旨趕緊查明據實保奏以示鼓勵惟須賞及有功不可稍有冒濫並著勞崇光林鴻年傳諭馬如龍岑毓英令其激勵兵勇妥速進剿日攻拔大理殄除杜汶秀以明心跡而膺懋賞朝廷大公之心初不以漢回稍存歧視馬如龍等進兵大理亦當令其切體此意分良莠不分漢回如有漢民從賊者概予誅鋤其有良

回被脅或不甘甘心從賊者均當分別撫綏安插毋令玉石俱焚文武官弁亦須分別賢否兼收並用稍有偏私卽不能為人所畏服林鴻年劉嶽昭不日卽抵昭通東川馬如龍等進剿之軍自不難聲勢聯絡席實田又在行間所部素稱勁旅刻下江西軍務漸定俟該省無事卽可令其帶兵赴滇所有應辦之事應籌之餉駱秉章勞崇光林鴻年均當悉心籌畫以期無負委任徐之銘業經病故巡

撫關防著林鴻年飭令岑毓英派員齎送行營以昭信守林鴻年劉嶽昭均著隨時籌商相機妥辦毋庸來京請訓將此由六百里各諭令知之○又諭昨因賈洪詔藉病規避降旨將其革職並簡授林鴻年等為雲南巡撫藩臬本日另有寄諭駱秉章勞崇光林鴻年諭旨一道該督撫等不妨錄示馬如龍岑毓英等令其迅速進兵妥辦此時兵力餉力斷不能及迤西一路若馬如龍岑毓英果能奮

勉出力將大理攻克杜汶秀擒斬其心跡不辨自明朝廷自當論功行賞曲示優容若徒有討賊之名並無尺寸之效則是藉剿賊以自固仍不免暗中勾結聯為一氣又豈能久假兵柄致有太阿倒持之弊本年七月二十五日所諭甚明駱秉章等惟當遵照前奉諭旨妥為籌辦杜逆攻取建南之說是否確實駱秉章務當密為偵探豫籌防範徐之銘已死岑毓英曾否將巡撫關防齎送到川著林

鴻年專弁往取。前因賈洪詔奏稱徐之銘徇私濫保。請將所保各員撤銷。當經明降諭旨。允准。交賈洪詔於到滇後酌量宣示。嗣因滇省各案所保人員雖多冒濫。亦未必無認真出力之人。現當用人之際。豈可令其寒心。復疊次諭令賈洪詔妥為收存。暫緩宣示。著駱秉章林鴻年就近向賈洪詔索回此旨。附報恭繳。無庸宣示。如有應行查辦者。俟將來滇南軍務大定再行酌辦。上年十二月二十四

日。及本年三月十八日。四月十五日。並歷次所降諭旨均著駱秉章勞崇光鈔咨林鴻年閱看。該撫現在何處。及如何籌辦之處。並著趕緊具奏。嗣後凡密諭事件該督撫等均不得假手於人。致事機或有宣露。懍之慎之。將此由六百里各密諭知之。○又諭錫霖奏請飭催山西撥解銀兩等語。據稱塔爾巴哈台現在調派官兵防守堵剿。在在均關緊要。近年內地應撥經費銀兩。分毫未解。在防官兵

月支鹽菜全賴烏魯木齊販來茶斤徵收稅銀散放。刻下烏魯木齊等城商販不通。稅釐均屬無望。而塔城又當防堵緊要之際。若不能隨時給發兵丁監菜銀兩。則譁潰堪虞。請飭山西籌撥兵餉。以應急需等語。所奏情形甚為迫切。著沈桂芬即在前次部撥新疆經費銀四十萬兩內。先行籌撥銀一二萬兩。並前報長起管解之三萬兩。暨韓升之等管解之八萬兩。迅即兼程解至綏遠城。交德勒克

多爾濟派員從蒙古軍臺轉行遞解。科布多現在科布多所屬之昌吉斯臺卡倫一帶。秋冬大雪封山。萬難行走。即著由新設蒙古蘇牧臺站護解至塔爾巴哈台。並著德勒克多爾濟咨明經過地方。妥為解送。錫霖接奉此旨。即可派委員弁前往迎提。以期妥速。此後該城兵餉仍著沈桂芬隨時源源接濟。將此由五百里各諭令知之。○又諭明誼奏請簡派立界大員一摺。前因明誼等奏請派各城

大臣四員換約後各赴本境建立界牌經總理各國事務衙門開單呈覽當經派出廣鳳等三員以專責成茲據明誼奏俄使換約後立界時烏里雅蘇台亦須專有大臣建立界牌鄂博請於麟興車林敦多布二員內簡派一員等語所有烏里雅蘇台立界事宜卽著派麟興專司其事現在分界一事雖准照議單辦理惟該夷性情狡詐於換約後立界時仍須時防格外侵占方不至墮其術中麟興

既經簡派責任綦重卽著會同車林敦多布將應立界牌鄂博處所豫為妥商俟換約事竣俄使前來時卽由麟興按照議定界址與俄使建立界牌鄂博務須辦理周妥以免日後侵越之患明誼等亦須咨照各城豫籌妥辦庶臨時較有把握將此由五百里各諭令知之○命翰林院檢討孫詒經編修李文田在南書房行走○乙未諭內閣前因閻敬銘奏已故前署壽光縣知縣潘運第子媳潘黃

氏呈告潘司貢璜前在登萊青道任內科索潘運第節壽季規等銀請飭賞還並查出潘運第歷任交代虧空約有三萬餘兩潘黃氏呈控難保非先為挾制地步各情當經降旨交閻敬銘詳查具奏茲據都察院奏潘黃氏遣抱告家人黃榮以潘司貢璜收受陋規巡撫閻敬銘徇庇迴護臬司丁寶楨授意委員代為彌縫請簡派大員來東查辦等詞赴該衙門呈訴閻敬銘係朝廷封疆大吏於特旨

交審之件諒不敢袒護屬僚蹈向來官官相護惡習其是否潘黃氏因潘運第交代虧空意圖挾制及潘司貢璜在登萊青道任內有無收受陋規確據均須徹底根究此案著仍交閻敬銘親提人證卷宗秉公詳查據實具奏毋稍徇徇○諭議政王軍機大臣等據御史丁浩奏稱皖豫交界地方自苗沛霖潘壇伏誅後伏莽尚多恐乘閒竊發河南光州游家廟及息縣青陂固始縣張老埠楊家集並

安徽霍邱縣境等處擒首劉克昌等均係潘逆餘黨平日倚勢燒殺搶掠現復擁眾自衛心懷叵測儻大兵一去必仍肆行無忌請飭派撥兵勇嚴密拏辦等語現在皖豫之交髮捻竄擾所奏擒首劉克昌等亟宜淨絕根株以免勾結著僧格林沁張之萬喬松年派撥兵勇會同各該地方官嚴密查拏以淨餘孽而免後患原片均著鈔給閱看將此各諭令知之○又諭馮子材等奏後起凱撤員弁兵勇悉數貲遣鎮江一律撤防總兵張文德可否赴任並自請回籍修墓及總兵黃武賢請回籍補行穿孝各摺片所有留防七營兵勇三千五百餘名卽著按照頭起凱撤章程由糧臺按名給發川貲令管帶各官妥為管押分遣回營回籍並咨行江南北軍營及沿途地方官一體彈壓不准逗遛滋事鎮防兵勇已撤李鴻章派去之張樹聲所統六營計已足數彈壓卽著魁玉督飭旗綠各營兵丁

妥為巡查防守毋稍疏懈黔省軍務方殷貴州鎮遠鎮總兵張文德卽著飭赴新任以重職守甘肅西甯鎮總兵黃武賢著准其回籍補行穿孝百日著卽傳知俟百日孝滿後卽赴甘肅新任陝西延綏鎮總兵陶茂森前經降旨賞假回籍省親假滿後著一併飭赴新任不准再行延緩馮子材督辦鎮江軍務數載以來勤勞懋著茲因鎮郡撤防奏請回籍省墓自應俯如所請俾展孝思馮子材著賞

假三箇月回籍修墓惟廣西現在軍務未竣亟需知兵大員前往以資得力馮子材係該省提督職守不宜久曠著俟假滿後卽赴廣西提督本任俟廣西餘匪肅清全省平定再行奏請陞見所保堪勝提鎮各員均著交軍機處存記將此由四百里各諭令知之○丙申諭內閣戶部奏酌籌種樹款項一摺前因定陵儀樹亟須栽種飭部籌撥款項並諭令劉長佑將直隸遵化等州縣欠解永濟籌備雨

庫租銀埽數完解以濟種樹要需用符舊制乃自本年二月降旨以來各州縣應解租銀仍未報解劉長佑亦無隻字片語將如何籌措如何飭催之處覆知奕劻等似此任意延宕貽誤非輕現在部庫未充斷不能為直隸州縣代墊永濟籌備庫款支應各項著劉長佑在直隸藩庫無論何款先照原撥銀一萬三千三百兩零如數發給俾得趕緊及時栽種一面嚴催遵化等州縣將積欠租銀六萬

六千餘兩先提一萬三千三百兩零徑解藩庫以清墊款其餘銀兩仍儘解永濟籌備兩庫毋許再有拖延以完欠項而備要款○又諭御史佛爾國春奏請禁地棍需索假公濟私一摺各直省州縣向有保長鄉約等名目原為稽查保甲承辦差徭而設若如該御史所奏各州縣往往有地棍私立總保長總社長等名目出入衙門包攬需索甚至本官需用物件悉由若輩取之民間因得假公濟私

肆行無忌直隸之河間大城等縣卽有此項名色自應嚴行飭禁著各直省督撫嚴飭所屬查明除在官人役例所不禁者悉仍其舊仍責令各州縣隨時稽查不得任令把持公事凌虐善良以杜擾累儻查有地棍私立名目如前項弊端卽著嚴行禁革從重懲辦如地方官縱容勒索及擅受民間供應者一併從嚴叅處毋稍姑容○諭議政王軍機大臣等僧格林沁奏督飭馬步各軍進剿西竄髮

捻先勝後挫賊漸南趨咨催楚軍迎擊並飭催進剿東竄股匪一摺賊匪在柳林寨大山寨一帶麇聚官軍分路衝壓乘勝窮追山後伏賊齊出將陳國瑞等軍圍困官軍內外夾攻兩晝夜始將賊眾擊退巴揚阿力竭陣亡參將尹作賓尚無下落逆匪穿山向新店一路奔竄後股已至潑陂河僧格林沁緊躡其後該逆竄入楚境大山向南奔竄馬隊不能窮追該逆東則可竄麻城南則可竄黃安西

則可竄應山一帶著官文飛飭姜玉順蕭河清等各率部隊迎頭截擊務須將山內賊匪就地殄除勿再任其紛竄如該逆被逼出山馬隊可以施展卽著僧格林沁督飭諸軍乘隙兜剿儘不得地勢仍當令陳國瑞等步隊向前毋庸令馬隊跋涉山險田埂致令再有疏失成保帶隊如不得力卽行揀員更換東竄之賊由麻埠竄六安青山一帶英翰郭寶昌各率所部由胡家店繞赴六安攔截逆知

六安有備折路漫水河一帶游弋其另股馬融和等已竄至英山地方該親王已飛飭張曜等迅殄此股惟該逆既分竄六安英山等處地勢寬廣張曜英翰郭寶昌等兵力尚恐不敷分剿著曾國藩喬松年督飭蔣凝學等軍認真迎剿劉連捷朱洪章之軍當已陸續到英霍一路曾國藩等催令速進與將疑學何紹彩等會合夾擊一面仍將續派各軍迅催入皖視何路兵單卽飭赴何路助剿官文

前派譚仁芳馳赴英霍此軍已否入皖並著催令速進以厚兵力其黃安等處要隘仍著官文妥籌兼顧毋令回竄僧格林沁另摺奏陳國瑞到營後伏懇戴罪剿賊並身臨前敵困苦備嘗未嘗不自知愧悔當此用人之際自應善為駕馭以供驅策僧格林沁所奏操縱深合機宜該員現已降三級調用仍留軍營效力如能立功自贖將來仍由該親王奏乞恩施惟在該親王隨時妥為調遣以成其

材將此由六百里各諭令知之○又諭德興阿奏就撫陝回宜防詐偽毋令仍歸原籍擬飭曹克忠暫紮鳳寶請留金順馬隊並自請獨當一面各摺片據稱鹽固回逆就撫該匪詭詐狡猾乞撫緩兵乃其故技若令仍歸原籍與漢民雜處勢難相安且西回兩屬多成荒土任令自為棚巢必致紛爭啟釁不若俟其真正窮蹙乞降再為分別安插等語回匪意存反側屢降屢叛朝廷久經洞燭其奸本

未嘗一意主撫前據都興阿奏鹽固回逆就撫節據臬司楊柄程等稟訴陝回流離困苦情形必須遣回陝省本籍復業因人數過多請派大員赴甘查辦當經諭令張集馨以此項回眾其兇頑渠魁原應實力殄除至脅從老弱若必悉數誅夷殊非國家好生之意將來甘肅回眾不能不就本境安插如就撫陝回亦令棲身甘省流寓異鄉勢難經久似不若各歸本籍尚可復謀生業張集馨明白曉

事是以令其前往妥為籌辦此事仍著張集馨於抵甘後酌量情形與都興阿雷正綰籌商安置之法仍當分別良莠悉心籌畫如實係安分良回自不能不為之代謀生計固不可令莠回於回籍後滋生事端尤不可令安分被脅良回流離失所總在該臬司辦理得宜仍不准迴護前說膠執已見並著張集馨剋期趕緊起程一面自行具奏不准託故耽延前諭曹克忠統帶所部原營速赴河州鎮

本任現據德興阿奏稱恐賊匪回竄終南請飭曹克忠所部七營暫紮鳳寶以資防禦並顧雷正綰陶茂林後路等語該總兵可否暫緩赴任並陝省是否必需曹克忠一軍方數分布著都興阿雷正綰劉蓉妥商辦理如曹克忠駐鳳寶一帶與雷正綰等軍聲勢尚難聯絡即著雷正綰催調曹克忠前進其鳳寶一帶即著劉蓉妥籌兼顧穆圖善尚未起程即著迅帶所部前往甘省會同都興阿雷正

綰妥籌勦辦毋再遲延金順馬隊著照德興阿所請暫留陝西俟該省軍務稍鬆仍著調赴甘省以厚兵力陝南近日軍情若何著劉蓉檄飭各軍節節進剿以期廓清疆宇德興阿呈遞履歷自請獨當一面朝廷簡派統帥自有權衡豈容自行瀆請至德興阿從前辦理軍務朝廷知之甚詳乃率行呈遞履歷鋪敘戰功尤屬冒昧德興阿現署西安將軍印務操練旗營辦理防守責任甚重即著慎固



城防實心辦理毋得稍涉疏懈如賊蹤距省較近該署將軍原應將城守布置妥協帶兵出勦本無待臨時奏請致誤事機將此由六百里諭知都興阿雷正綰穆圖善德興阿劉蓉並傳諭張集馨知之○以福建上杭縣紳民守城出力永廣學額三名○予河南柳林寨陣亡總兵官巴揚阿祭葬世職加等諡剛毅 丁酉諭議政王軍機大臣等雷正綰奏攻拔龍山鎮逆巢進攻蓮花城情形並固原

復為回陷各摺片雷正綰一軍攻克張家川後乘勝進拔龍山鎮逆巢並將邵家店馬家堡各小巢平毀因聞固原回逆復變該署提督督隊力攻蓮花城急圖克拔以便移師隆靜詎銳師乘勝深入山險人馬礙難旋布雷正綰猝被矛傷領下弁勇陣亡者千餘名披覽之餘曷勝塵繫著雷正綰趕緊調治一俟傷口平復即行整飭隊伍與陶茂林會督諸軍迅拔蓮花城老巢移軍隆靜規復固原疏

通蘭州驛路兼顧省防雷正綰所部各營因疊次傷亡及裁汰老弱外現在賊蹤蔓延已屬不數勦辦而固原州城復於八月初四日被陝回孫義保潛帶賊眾四千餘人句合城中回逆赫明堂等乘夜襲陷固原鹽茶回眾前經甘詞乞撫此次陝回即句結內應撲陷固原可見若輩狼子野心萬難寬宥亟應大加懲創俾其震懾軍威始能徐議招撫著穆圖善懷遵疊次諭旨迅即統帶所部赴甘會

同都興阿雷正綰妥為籌商應由何路進兵助勦均著相機辦理都興阿一軍已抵靈州花馬池能否與雷正綰聲息相通並著酌度機宜先與雷正綰等軍聲勢聯絡再行節節進兵毋稍大意雷正綰現經派員分赴楚豫各路招募勇丁剋期赴營著劉蓉於所募新勇經過陝境時將沿途所需麪斤飭屬寬為籌備供支毋令缺乏以利進行並著催令曹克忠一軍迅速入甘與雷正綰等軍聯絡進

攻迅殲醜類其鳳寶一帶卽由劉蓉妥籌兼顧江西軍務漸次肅清楊岳斌卽遵前旨將應辦各事宜移交鮑超劉蓉與沈葆楨會籌辦理迅將酌帶所部剋期赴甘何日起程並著先行馳奏所有雷正綰現在進兵攻取各要隘著繪圖貼說呈覽將此由六百里各諭令知之○以鑲紅旗滿洲都統仁壽署正黃旗蒙古都統鑲紅旗蒙古都統景壽署鑲藍旗蒙古都統○戊戌諭議政王軍機大臣等

恩麟奏河州被圍日久請飭曹克忠帶兵赴任並河狄回匪分撲皋金地方兵勇擊勦失利及南路軍餉請旨酌定供支省分並請飭催甘省及新疆餉銀各摺河州鎮城被圍日久道員趙必達帶兵援救遷延不進畏蕙無能實堪痛恨著革去三品銜仍革職留營以觀後效並著恩麟飭令該員會同參將胡飛鵬迅速前進立解城圍儻再不知愧奮卽行從嚴叅辦河狄回匪分股竄撲皋蘭金縣地

方遊擊鄒占先以二千餘名之勇禦二千餘名之賊輒被賊匪衝散以致各路失利實屬貽誤戎機鄒占先著拔去花翎摘去頂帶以爲玩誤軍情者戒至皋金被擾係本年四月間事何以遲至八月始行出奏可見恩麟平日全以消弭粉飾爲事如此行爲豈能表率屬員力圖整飭無怪趙必達鄒占先等之覆轍相尋也現在固原復爲賊陷而河狄等處一片賊氛省垣爲根本重地恩麟務當激發

天良督率員弁兵勇力籌防勦毋稍疏虞經屢次訓飭之後儻再不知振作仍復泄沓因循貽誤大局必將該護督從重治罪決不寬貸曹克忠一軍著劉蓉恪遵前旨飭令該總兵統帶原部七營剋日起程赴甘毋稍稽延曹克忠入甘後應由何路進兵著都興阿雷正綰等妥籌調派務令東西兩路各有勁兵聯絡一氣鼓勇齊進庶可痛埽狂氛陶茂林一軍到甘後疊克城隘所向有功其軍火糧

餉曾經諭令陝省供支茲據恩麟奏接據陶茂林咨稱陝省以勦辦髮逆自顧不暇所需軍火餉項應仍由甘省支領等語甘省餉需久絀羅掘已空慶陽糧臺專顧都興阿軍餉勢已不及萬難兼顧他營而陶茂林所部士卒單寒帳房不蔽風雨一切軍械又不應手若餉需稍有不繼譁潰堪虞著劉蓉懍遵前旨仍將陶茂林各營餉項軍火源源籌解毋得稍分畛域恩麟所請或由別省供支之處

著戶部覈議速奏將此由六百里諭知都興阿雷正綰劉蓉並傳諭恩麟知之○又諭恩麟奏甘肅兵餉停發日久各省協款撥解無期擬派員前赴川省抽收鹽釐以濟急需一摺此項鹽釐向由川省派員抽收業已辦有成效若令甘省委員前往接辦於一切辦理章程未能熟悉深恐窒礙難行仍著駱秉章督飭富犍二縣局員將此項鹽釐按照舊定章程照常抽收俟收有成數即行派員陸續

解交甘肅省城俾資接濟恩麟另片奏陝甘富商巨賈在川貿易各屬地方公建陝西會館歷年積有會底銀兩盈千累萬為數甚鉅擬派員赴川將會底銀兩覈撥一半借供兵餉等語當經降旨諭令恩麟准其派員前往即著駱秉章轉飭各該府州縣等俟甘肅委員到境即行傳知陝西會館直年會首等將現存會底銀兩覈撥一半交該委員守提運解一面發給印借字據將來軍務完竣即由

甘肅軍需總局照數籌還以歸有著四川欠解甘肅協撥軍餉等項並著駱秉章迅速寬為籌解毋稍延緩將此由六百里諭令知之○山東布政使貢璜因案查辦命於結案後來京以按察使丁寶楨為布政使鹽運使恩錫為按察使○復甘肅尖山傷亡已革遊擊汪永楨原官予祭葬世職

大清穆宗繼天開運受中居正保大定功聖智  
誠孝信敏恭寬毅皇帝實錄卷之一百十三

大清穆宗繼天開運受中居正保大定功聖智  
誠孝信敏恭寬毅皇帝實錄卷之一百十四

同治三年甲子九月己亥朔

上詣綏履殿問

慈安皇太后安平安室問

慈禧皇太后安至丁卯皆如之諭議政王軍

機大臣等李鴻章奏甯國孝豐安吉界內擊

敗賊股情形一摺據稱劉銘傳等因廣德克

復後卽率黃桂蘭等三路追剿賊被官兵殲

斃解散者甚眾黃汶英挾洪幼逆竄赴績溪

一路堵逆黃汶金已槍斃於陣等語前據左

宗棠奏黃汶英亦經殲斃洪幼逆及偽祐王

李遠繼尚在稽誅。左宗棠當仍遵前旨。督飭諸軍密速購捕。並將逸出之賊分路搜拏。幼逆究竄何處。是否殲斃。及輔逆逃往上海。是否確實。均著左宗棠李鴻章查明具奏。李鴻章派出各軍。已分布廣德建平東壩溧陽宜興等處。卽著飭令扼要嚴防。如浙皖兵力不敷。勦辦仍著派兵出境會剿。以期迅速。歲事藉固。蘇省藩籬。另片奏蘇省餉需艱窘情形。擬於陸軍六萬人內分別裁撤酌留三萬人。

以資扼守等語。因念裁撤勇丁。因為節省餉需起見。第辦理稍有未善。深恐流弊滋多。卽如前日官文所稱。撤勇過境。本省必須分留營座。沿途鎮撫彈壓等語。可見裁勇一事。經過各處辦理甚難。現在東南軍事將竣。裁撤勇丁一事。固應及時辦理。惟現在用兵省分招募勇丁者尚多。憚世臨曾有募勇防邊之奏。而僧格林沁近因勦辦髮捻各逆。亦擬添募步勇補馬隊之不足。雷正綰在蓮花城勦

辦回匪。亦請募勇增兵。毛鴻賓等亦有招募楚勇防守邊隘之議。各該處所招募者。難保非卽係各省裁撤之勇。與其募已散之勇。辦理殊費周章。不如就未散之勇。令原管將官統帶回籍。如經過募勇省分。卽可截留應用。否則酌量何省需用。卽撥往何省。既無慮沿途擾累。又可免各省零星招募之煩。係一舉兩得之事。此項勇丁。卽或募勇各省不能全數留用。而帶回原籍遣散較之隨地遣散亦

屬妥協。以上各節著曾國藩左宗棠李鴻章斟酌情形妥籌辦理。江皖一帶防兵足數。扼守金陵一軍。卽可派至皖北。會勦楚皖各界之匪。庶兵力厚集。易於得手。並著曾國藩等迅速籌辦。將此由六百里各諭令知之。○甯夏將軍慶昫奏移營納家牖迤西分撥兵勇扼要紮營。以分賊勢而通糧道。得旨著慶昫督飭在城在營各將弁實力堵扼。一俟杜嘎爾等軍聲勢聯絡。卽行奮勇進攻。以收夾擊

之效常陞紮營隘口藉通郡南運道惟兵力甚單孤立一營甚屬可慮務令其專疏糧道時刻嚴防不可輕率出戰致有疏虞○江蘇巡撫李鴻章奏淮揚鎮總兵官楊利見呈請歸宗復姓為歐陽利見下部知之○追予湖北武昌殉難通判沈燿鑒祭葬世職○庚子諭內閣譚廷襄奏搶辦中河廳十三堡潰隄工繪圖呈覽一摺據稱中河廳十三堡潰隄圍刷之處搶辦後戲因灘係純沙隨築隨塌擬

於退後數十丈現築圍埝之處加高培厚再將先年老越隄補築完整以作重障惟趕築圍埝長三百餘丈補修老越隄原長七百七十八丈力為收縮尚有六百餘丈擗節估計需銀三萬餘兩查每年例儲春伏二汛防險銀三十萬兩上年僅撥銀十一萬兩節省銀十九萬兩請提撥現銀三萬兩俾資趕辦等語中河十三堡存灘被刷驟出奇險現雖搶辦漸臻底定而築埝修隄既據譚廷襄奏萬

分緊迫自未便稍涉延緩致誤要需著張之萬督飭藩司於上年春伏二汛節省銀兩內提撥現銀三萬兩俾供支放至石家橋鄭下汛九堡刷塌隄邊二十餘丈亦關緊要即照譚廷襄所擬認真辦理譚廷襄於前項要工惟當督飭屬員實心經理務期工堅料實毋得稍涉草率圖留覽將此各諭令知之○諭議政王軍機大臣等楊岳斌沈葆楨奏肅清瀘溪克復新城甯都解圍收復雩都縣城各

情形並籌分路追剿兼顧皖南各摺鮑超派唐仁廉由金谿西鄉進剿瀘溪之賊敗匪向新城竄去瀘溪一律肅清鮑超探知康逆汪海洋與利逆朱恩澄等層聚新城遂親率馬步各隊奮力克復又復追剿大勝陣斃賊目甚多宜黃竄匪圍攻甯都州守備賴永福等與在城文武擊退州城圍解賊陷雩都王文瑞率勇力戰收復均屬奮勉在事尤為出力及甯都守城各員均著楊岳斌沈葆楨擇尤

保奏侍逆李侍賢前在崇仁被礮擊傷左膝嗣又糾合宜黃敗匪竄撲甯都並陷雩都為王文瑞擊走遂遁往新豐縣境因江忠朝一軍在東路防守嚴密復繞由廣東南雄州邊境突犯南路之新路口乘隙撲南安府城江忠朝令徐生德先往援勦楊岳斌現亦抵贛著卽督飭各軍兜擊務須殲厥渠魁以次埽除羣醜毋任再有延蔓該處與廣東處處毗連如有逆匪入粵著毛鴻賓郭嵩燾派兵扼

要設防遇賊卽擊毋稍疏失汪海洋在新瀘等處經鮑超督軍追擊四次敗遁現踞瑞金縣境該縣通連會昌大路著楊岳斌等飛飭席寶田王文瑞兩軍兼程前進毋任再有他竄皖南之防最為緊要楊岳斌等已派劉典率所部暨王開琳等營同赴徽甯擇要扼守該處本有防兵現在洪幼逆等仍在皖浙之交冀圖負隅死拒左宗棠已派兵窮追著卽懍遵疊次諭旨飭諸軍認真按勦曾國藩當

飭皖南守將會江浙諸軍合力殄除為一勞永逸之計鮑超一軍卽令暫駐建昌防瑞金各匪回竄並堵湖州餘逆西窺伺隙卽勒以竟全功楊岳斌已屢諭馳赴陝甘總督新任何以尚未接奉前旨著卽趕緊部署遵照前旨酌帶勁兵數千赴任勦辦回匪以慰朝廷西顧之憂江西各路未竟事宜卽交沈葆楨鮑超劉典等妥為籌辦贛江與湖南一水可通恐該匪意圖竄往該省著惲世臨督飭地

方文武認真籌辦防勦毋令闖入本境將此由六百里各諭令知之以江蘇捐輸軍餉永廣海州學額六名靖江縣二名以江西捐輸軍餉永廣南安府學額五名鄱陽縣十名南康縣九名○以江南軍營總兵官詹啟綸捐輸船礮永廣湖北黃安縣學額一名○予江西新城等處陣亡都司陳明德等二十七員祭葬世職加等○予江西東鄉陣亡傷亡都司李雲福等二十五員祭葬世職加等

○辛丑以神靈顯應加湖南長沙縣龍巖寺向真人封號曰普佑○諭內閣李雲麟奏積勞病劇請回旗調理一摺李雲麟以候補郎中經朝廷不次超擢以四品京堂候補辦理陝南軍務宜如何實心任事奮勉圖功力求報效乃自到陝後迄今一年有餘於一切防勦機宜所行不逮所言毫無成效可觀茲復以寒暑積勞率行告病並遽請回旗調理殊屬有負委任李雲麟著革去四品京堂卽行

回旗仍以郎中候補用示薄懲○又諭張之萬等奏請將已革臬司留營等語已革安徽按察使張學醇前於辦理苗逆仇殺徐立壯一案顛倒荒謬貽害地方情罪較重經曾國藩等查奏降旨發往軍臺效力贖罪尚屬從輕辦理該撫所請將張學醇留營之處著不准行仍著懷遵前諭迅速派員押解起程毋許逗遛該省防勦正當喫緊統帶需員所有張之萬等前次奏調之道員張汝梅現在回

籍省親侍講吳元炳現在丁憂回籍著張之萬毛昶熙迅卽行知各該省原籍飭令該二員趕緊赴營帶隊以資得力○諭議政王軍機大臣等左宗棠奏官軍截勦竄賊疊獲大勝情形一摺淳安等處竄賊踞唐村黃金嶺一帶經黃少春等痛加掃蕩追至歙淳交界地方搜斬淨盡其前隊之賊由建口過河復經官軍分路夾擊擒斬賊目甚多該逆窮蹙乞降者五千餘人其向績溪翻山遁去者僅

數百名著仍督飭諸軍奮力追勦以清餘孽投誠賊眾妥為安置前據奏報洪福瑱將髮剪鬚裝扮洋人意圖涸竄現在祐逆李遠繼因黨與紛散隻身遁走洪幼逆等已繞由遂安昏口一帶逃竄著左宗棠懷遵疊次諭旨檄令劉明珍等軍嚴密購捕務在必獲以膺懋賞斷不可任令兔脫祐逆逃往何處並著嚴飭諸軍認真追捕劉典等已由楊岳斌派赴徽甯扼守要隘著卽飭令將此股賊匪迎



頭截擊悉數殲除。毋令再擾江境。又成蔓延之勢。將此由六百里諭令知之。○又諭官文奏。官軍移營擊賊。獲勝。現飭約期會剿。追賊出境。一摺。斬羅賊匪。經成大吉等分路痛剿。賊匪無算。直追出大小界嶺。始行收隊。該逆復在大坳沖及羅田離城二十餘里之黃泥塘地方。意圖分竄。復經石清吉等迎剿。匪勢窮蹙。訊據賊供。七區之賊。備有行糧。有將遁走之勢。昨據僧格林沁奏。該逆竄入楚境。大

山向南奔突。麻城黃安應山一帶。路路可通。是該逆游魂無歸。現在分路狂奔。尚無定向。著官文檄飭成大吉與富森保石清吉等軍。約期再舉。乘勝進攻。仍遵前旨。將該逆就地殲除。毋留餘孽。如該逆竄出山險。卽著曾國藩喬松年督飭皖軍兩面夾擊。協力掃蕩。俟賊蹤竄近平原。馬隊可以施展。並著僧格林沁督軍兜剿。悉數殲滅。毋令再行紛竄他處。英山之賊。有分股由打虎廠圖竄蘄州等處。

之信。著官文卽飭譚仁芳由長嶺岡移紮張家塆。嚴密防守。以保蘄黃門戶。並著曾國藩喬松年飭令英山防軍跟蹤追躡。以期聚而殲旃。羅山賊匪。由朋興店擾至易家棚。因蕭河清等軍踵至。該逆知防有重兵。連夜向羅山竄走。並據探該逆皆竄光息交界之剝皮河。墨斗關。勞山一帶。僧格林沁現駐羅山之南關外。正可派兵迎截。並著張之萬毛昶熙選派勁旅。會籌剿洗。迅殄逆氛。曾國荃於克

復金陵後。心血過虧。困憊殊甚。前經諭令在營安心調理。日來曾否就痊。朝廷甚深廕繫。著曾國藩傳旨存問。前諭曾國藩如不能赴安慶。卽派彭玉麟曾國荃等酌量帶兵分駐上游。將來曾國藩由安慶赴金陵後。應否卽遵前旨酌量奏聞。正在寄諭間。據張之萬毛昶熙奏。勦辦東路股匪。獲勝。六安之賊復圖回竄西路之賊。南竄麻城。各情形。與僧格林

沁官文所奏略同。既據張之萬等奏稱將士出境援剿轉戰半年傷損實多。所部兩營實無可調之隊。卽著張之萬毛昶熙就前敵現有之兵力加整頓。飭令聽候僧格林沁調遣。實力防剿。毋任回竄。仍一面將添募練勇迅速訓練成軍。以厚兵力。將此由六百里各諭令知之。○又諭李雲麟奏蔡啟敗匪奔竄甘省。遵旨遣回楚軍。並將隴軍酌量裁撤一摺。蔡啟兩逆自陝北入山。屢經官軍擊敗。現竄

甘肅階州之西和縣等處。劉蓉所部各營已追至甘界。並經駱秉章調湘果兩營扼紮陽平關朝天關等處防剿。賊勢已威。惟甘肅階州文縣一帶。在在與川省毗連。深恐敗匪銖隙闖入蜀疆。著駱秉章劉蓉督飭諸軍盡力夾擊。務將蔡啟餘匪就地殄除。毋任再行紛竄。至李雲麟所部之軍除業經籌給餉銀遣撤回楚外。現留毅健中前後三營暫紮陝楚交界之漫川關。並隴軍歸化歸義兩營。李雲

麟擬卽全行遣撤。著劉蓉悉心籌畫。現紮漫川關之毅健三營或須留防陝楚毗境。或可籌給餉項。卽行遣回。均卽迅速酌辦。並飭李雲麟將隴軍妥為遣撤。毋令滋生事端。李雲麟移交劉蓉管帶之三營並水軍等尚有若干人。均著劉蓉派員統帶。妥為調度。與商一帶如尚須派兵扼防。並著劉蓉妥籌兼顧。蔡啟二逆勢已窮蹙。劉蓉現已追入甘境。近日勦辦情形若何。著一併迅速具奏。甘省回氛

甚熾。著穆圖善懷遵疊次諭旨。迅卽起程赴甘。與都興阿雷正綰會籌進剿。毋許再有延緩。本日據官文奏請飭總兵顏朝斌赴鄂隨營等語。著駱秉章傳知顏朝斌於補行穿孝百日屆滿卽行馳赴湖北軍營。隨同官文辦理防剿。毋稍稽延。將此由六百里各諭令知之。○又諭都興阿奏前敵布置情形。並請調西安滿兵各摺。片據稱前敵各軍克復寶豐後。聯絡平羅進紮渠口堡一帶。時出雕勦。頗

有新獲。惟後路空虛。兵力不敷。分布該逆。現聚清水堡兩岸。阻我進攻之路等語。杜嘎爾一軍。攻克寶豐。後乘勝進剿。軍威頗振。惟該處地勢寬廣。官軍節節深入。後路糧道最關緊要。此時兵力未厚。自當穩慎。進取步步為營。不可稍涉大意。儻有隙可乘。仍卽激勵將士。相機進剿。以期迅掃賊氛。慶昫仍當督飭將弁。固守甯夏城池。並著知照。進規納家牐之常陞一軍。務須嚴密穩固。並隨時偵探。期

與都興阿所派之兵。遙為聲援。一俟杜嘎爾一軍。逐漸南趨。聲勢可以聯紹。卽著合力夾擊。以竟全功。前因固原復陷。平涼一路軍情喫緊。業經諭令穆圖善統帶所部赴甘。會商都興阿等。應由何路進兵。相機辦理。本日復經寄諭。催令迅速前進。仍著都興阿俟其到營。妥籌進兵。都興阿所請調撥西安駐防滿兵五百名。赴甘演習洋槍。著德興阿卽行挑派。星速前往。儻因西安城防緊要。不能如數

派往。卽著酌量調撥。如實係不敷。可卽咨明都興阿。由都興阿另行籌調。將此由六百里各諭令知之。○湖廣總督官文奏。遵查湖北綠營兵額。於咸豐六年克復省城後。已一律補齊。與江皖等省缺額待補者。有閒常年兵餉。應請循例撥給。以紓兵力。而符定制。下部知之。○河南巡撫張之萬奏。派參將崔廷桂等。擒獲唐縣積匪郝道進等。已就地正法。得旨。所辦甚好。仍著飭令該參將將各該處伏

匪餘匪。認真搜捕。務絕根株。以靖疆圉。○命盛京將軍玉明。在紫禁城騎馬。以直隸滄州防堵竄匪出力。予防禦富成等。加銜有差。○以甘肅克復寶豐縣城出力。予侍衛色楞額等。加銜升敘有差。○予湖北長嶺岡陣亡都司成志義等。祭葬。世職加等。文生李南英。祭葬。世職如從九品例。○壬寅諭內閣。前據曾國藩奏。稱曾國荃於克復江甯後。患病。欲請回籍。當經諭知曾國藩傳旨存問。卽令其

駐紮江甯。安心調理。毋庸遽請開缺回籍。茲復據曾國藩奏。曾國荃病勢日增。必須靜養。方能早就痊癒。據情代奏。懇請開缺回籍等語。浙江巡撫曾國荃自隨同曾國藩剿賊以來。疊克名城。勲績卓著。本年親督將士。苦戰數月。攻拔江甯省城。殲除巨逆。厥功尤偉。乃以連年辦理軍務。心力交瘁。遂至憂勞成疾。請假開缺回籍調理。情詞極為懇摯。若不俯如所請。惟恐為職守所羈。未能從容靜攝。轉

非體恤功臣之道。曾國荃著准其開缺回籍調理。並賞給人蔘六兩。交該撫祇領。用資保衛。該撫係有功國家之臣。朝廷正資倚畀。尚其加意調治。一俟病體痊癒。即行來京陛見。○又諭前因曾國藩等奏江蘇通州直隸州知州員缺緊要。請以遇缺即補直隸州知州梁悅馨補授。當經降旨。交吏部議奏。嗣經吏部以該員捐升知州。尚未引見。且保舉升階。又在出缺以後。照例議駁。茲據曾國藩李鴻

章奏稱。通州係海疆要缺。民竄雜處。又與福山對峙。港汊紛歧。為匪徒出沒之區。號稱難治。且管轄如皋泰興兩縣。政務殷繁。該員曾任繁劇人地。實在相宜。蘇省亦別無合例人員。可以擬補。請仍以梁悅馨補授等語。梁悅馨著准其補授江蘇通州直隸州知州。以資治理。嗣後不得援以為例。○諭議政王軍機大臣等。曾國藩奏湖州廣德賊竄犯歙南。官軍截剿屢勝。並彭玉麟督帶水師。不能專

駐安慶。及江皖近日軍情。暨曾國荃病勢增劇。代奏懇請開缺各摺片。本日已明降諭旨。准曾國荃開缺回籍。該撫其安心靜攝。善自保衛。一俟病就痊癒。即行來京陛見。以備倚任。所有江甯省城一切善後事宜。即著曾國藩馳往江甯。斟酌機宜。妥籌辦理。安慶地處上游。控制皖南皖北。既據曾國藩奏。彭玉麟總統水師事務。繁重不能專駐安慶。亦不能兼顧陸路安慶防守及善後等事。飭馬新貽

等會同妥辦可無疏虞。卽著照所請行。馬新貽已簡放浙江巡撫。仍著曾國藩飭令該撫留駐安慶。同何璟等將應辦事宜妥為籌辦。務臻周密。浙省撫篆現有左宗棠兼攝。暫可無庸到任。卽著曾國藩行知該撫可也。皖北英霍等處一片賊氛。蔣凝學雖屢獲勝仗。而糧路尚屬梗塞。曾國藩現調劉連捷等率兵萬餘由桐城進剿英山。調李榕王可陞何紹彩三軍八千人由六安進援霍山。有此兩支

勁旅。皖北軍務必可得手。劉連捷等此時計已到防。著曾國藩督飭該員等迅速進兵。喬松年督率所部會合各軍實力掃蕩。盡殄賊氛。毋令紛竄。曾國藩回駐江甯後。距英霍較遠。所有派往該處援應各軍。自應有所統率。俾令事權歸一。曾否酌派有人。抑仍由該大臣遙為控制之處。著隨時酌量奏聞。湖州廣德敗賊併犯歙南。經易開俊唐義訓各軍併力堵剿。俘斬降散為數甚眾。曾國藩當飭令

乘此聲威。將此股竄賊就地殲除。昨據左宗棠奏。唐村黃金嶺一帶竄賊。經黃少春等痛剿。擒斬甚多。此次歙南諸軍。又獲大捷。著左宗棠督飭在事員弁。奮力追擊。以清餘孽。曾國藩本日所奏江西軍情。與楊岳斌等前奏大略相同。卽著曾國藩左宗棠督令皖浙各軍會合鮑超劉典等軍。將敗殘竄匪前後夾擊。掃除淨盡。以竟全功。而膺懋賞。將此由六百里各諭令知之。○以安徽布政使馬新貽

為浙江巡撫。未到任前。仍以閩浙總督左宗棠兼署。安徽按察使英翰為布政使。廬鳳道何璟為按察使。○予安徽歙縣陣亡遊擊唐遠岳祭葬。世職加等。○癸卯諭內閣。劉蓉奏陝西漢中鎮總兵余福象自願隨同穆圖善赴甘剿賊。懇請暫行開缺等語。余福象勇往任事。甚屬可嘉。著准其暫行開缺。隨同穆圖善前往甘肅剿辦賊匪。俾得盡其所長。○諭議政王軍機大臣等。穆圖善奏督師赴甘請

調赴鄂舊部劉蓉奏敗匪紛竄階州督軍越境窮追遵飭張集馨曹克忠赴甘及因患病懇請開缺各摺片甘省回氛日熾軍情緊要移圖善現已督率馬步各營陸續進發惟後起步隊尚須俟有餉銀方能西上著劉蓉督飭糧臺迅速籌款給發俾利進行甯靈一帶地方平曠利用騎兵穆圖善所部馬隊僅金順兩起三百名實屬不敷分遣其前調赴鄂之溫德勒克西兩起馬隊本係穆圖善舊部

且皖楚交界山路崎嶇稻田遍野馬隊難以展布不如調赴甘省用其所長較可得力著官文酌量調派至蘇倫保兩起馬隊及藍斯明四營步隊能否一併飭赴甘省之處並著斟酌軍情妥籌辦理穆圖善勇往直前深堪嘉尚本日已明降諭旨令其幫辦都興阿軍務該將軍務當益矢忠勤兼程入甘與都興阿和衷商辦盡力勦洗肅清邊陲以副委任蔡啟等逆業經蕭慶高等督軍追攝疊獲勝

仗擒斬收降匪黨甚眾餘孽狂竄階州劉蓉現檄林之望力扼要隘並飭蕭慶高等越境窮追辦理尚屬認真此股敗匪現在猛撲畢口急圖入川蕭慶高等已繞出甯羌截勦駱秉章當督飭川軍會合陝軍分途兜擊就地殲除毋令紛竄入川致形滋蔓曹克忠一軍現已拔隊赴甘既可為雷正綰後路聲援並可兼顧隴防第該營中有新收降卒必須嚴加鈐束隨時防範毋稍大意張集馨所陳通

籌全局謂議撫緩兵糜餉老師不如先機決策一勞永逸等語前據雷正綰奏固原降回復叛襲陷城池是該逆譎說性成以乞撫為緩師確有明證張集馨既於回情知之甚悉必能操縱得宜著懍遵前旨馳往甘省相機籌辦不得膠執成心亦不必意存遷就雷正綰傷口已否平復甚深塵繫現在逆氛復熾雷正綰務當與陶茂林迅籌進勦力挫兇鋒恩麟當振刷精神督率兵勇固守省垣認真

勦辦河狄等處回匪不得一味畏葸因循貽誤軍事此時陝西境內雖已肅清而西固汧隴之防東嚴興商之守責任甚重劉蓉著毋庸開缺賞假兩箇月安心調理其重大軍情仍著力疾料理毋許推諉將此由六百里諭知官文都興阿穆圖善雷正綰駱秉章劉蓉並傳諭恩麟張集馨知之○又諭本日據劉蓉奏前准都興阿以甘省邊地嚴寒咨飭陝西藩司趕辦羊皮大襖五千件小襖五千件

解營備賞價銀准赴甘肅糧臺請領等因當經劉飭藩司速行趕辦現據藩司詳覆陝西皮貨向來聚於涇陽該縣失守之後人煙斷絕現在甘回擾亂皮貨更無來路該撫詳加察覈實在無從購辦請飭甘肅山西各督撫就近採買等語所奏自係實在情形惟甘肅地處極寒現交冬令軍士日久從征禦寒無具所需皮貨等件實關緊要陝省雖近日販運較少而合山陝甘肅三省共辦此事究易

為力著沈桂芬劉蓉恩麟於各該省出產皮貨之地趕緊派員如數購辦迅速解往毋誤要需穆圖善現往甘肅帶兵勦賊所部馬步各軍需餉甚急著沈桂芬劉蓉每月各籌撥銀二萬兩並軍火等項按期解赴穆圖善軍營交納以資接濟將此由六百里諭知都興阿沈桂芬劉蓉並傳諭恩麟知之○又諭廣鳳奎昌奏揀派蒙古官兵前赴古城一摺據稱陸續調到杜爾伯特土爾扈特等處蒙古

官兵一千二十三員名派副盟長郡王凌札棟魯布貝子察克都爾札布公多果爾巴管帶赴古征勦等語即著照所擬傳諭該盟長等統帶各項官兵迅速前進沿途妥為鈐束不可稍事滋擾俟到古城時即著保恆妥籌調遣所有軍火器械及官兵口糧務須籌款接濟毋令缺乏前據文祥奏奇台一帶之匪間烏魯木齊變亂後圍困古城幸連獲勝仗舊城並未失陷現在該城軍情若何此項蒙

兵是否精壯可用。著保恆詳加遴選擇其驍健可效前驅者。派員統率先剿古城一帶之匪。再行救援。迪化其烏魯木齊吐魯番等處回氛。近日能否稍戢。並著隨時查探具奏。將此各諭令知之。○命荊州將軍穆圖善幫辦署陝甘總督都興阿軍務。○以記名提督蕭慶高為陝西漢中鎮總兵官。以陝西克復山陽縣城暨肅清鎮安等處出力。賞都司徐統恩等花翎餘加銜升敘。開復有差。○以陝

西興安漢中二府辦團出力。賞在籍知州管芳花翎主事蔣常垣藍翎餘加銜升敘。有差。○予甘肅階州等處陣亡總兵官蕭餘勝毛芳恆參將陳賢元都司瞿升富守備朱球珥千總吳高遠等祭葬世職加等。○甲辰諭內閣。前因曾國藩奏楊岳斌因父母年逾七十。母病增劇。據情代請開缺回籍養親。當經降旨。諭令楊岳斌俟克復金陵後再行請旨。省親。茲據楊岳斌奏稱八月間行抵贛州。病體

難支。傷處復加痛楚。心中怔忡不止。父母老而多病。疾痛之餘。思親倍切。請開陝甘總督之缺。回籍調理等語。楊岳斌統兵十餘年。銜冒矢石。力疾苦戰。傷病交作。且其父母年皆七十有餘。原應俯如所請。俾資調理。並遂其孝養之忱。惟前因甘肅逆氛不靖。當授楊岳斌為陝甘總督。辦理剿匪事宜。現在甘省軍情關繫極為緊要。該督久歷戎行。威望素著。軍麾所至。疊奏膚公。此時西北軍事孔棘。朝

廷正資倚畀。自未便遽令回籍。楊岳斌著賞假一箇月。在營趕緊醫治。俟假滿後即行馳赴陝甘總督新任。毋庸開缺。又諭楊岳斌沈葆楨奏特參怯懦玩誤縱勇擾害之帶兵各員。請旨懲辦等語。江西補用道王沐經楊岳斌等派令自撫州移軍秀才埠防守。並赴樂安一帶截剿竄賊。節節逗遛。罔顧軍情。緩急所部勇丁沿途騷擾。不能約束。經撤去統帶。抗不移交。勇數名冊其營官運同銜知縣



王安敦遊擊賀長春唐榮貴縱容勇丁索餉滋鬧該員並不彈壓實屬謬妄玩誤王沐著卽行革職從重發往軍臺效力贖罪不准藉端奏留王安敦賀長春唐榮貴著一併革職交楊岳斌沈葆楨提訊縱勇確情從嚴懲辦新授雲南按察使席寶田疊經楊岳斌等催令援勦南甯甯都賊匪遷延不進藉詞延宕任賊遠竄實屬巧詐不力席寶田著降為知府並撤去布政使銜撤銷勇號仍責令率勇

勦賊以觀後效儻再延誤卽著從嚴叅辦卽補參將劉勝祥所帶勇丁全無紀律所過村市任意擾害實屬約束不嚴劉勝祥著暫行革職責令嚴束各勇勦賊自贖儻再不知愧奮一併嚴叅懲辦○諭議政王軍機大臣等前因有人奏毛鴻賓不能安插散勇致該省盜劫頻仍勸捐一味徇勒致紳商紛紛逃匿當將原奏一條摘鈔給予該督閱看並諭令將各處散勇妥為安插毋令滋事近據毛鴻

賓遵旨覆奏摺稱安插散勇人數雖眾訪查在鄉間尚能相安南海等縣劫案每月間有數起不至如原叅之多所指捐者均係商富而刁民林青萍等不肯報效逃避香港澳門等處依附洋人並非徇勒各等語續有人奏毛鴻賓不能安插陳金缸等散勇致令千百成羣劫掠為生南海等縣劫案一月有多至四十餘起者省垣近地銀號有被盜假充官役席卷而去者該督撫又創為新例被劫者

責令左右鄰及地保拏賊追賊以致人多不敢呈報派捐紳富如省城伍姓潘姓番禺新會之張李等姓陵辱鎖押盡力誅求甚有一鄉勒捐立斃數命者該督並密令官差於夜靜時踰牆入捐戶之室搜索鎖拏致強有力者多潛赴香港依附洋人邑里騷然有不可終日之勢請速派公正大臣秉公查辦各等語封疆大吏除暴安良是其專責卽勸捐軍餉亦係朝廷不得已借資民力之舉豈可任

意偏勒四出追呼毛鴻賓覆陳各情及續有人奏參各節孰是孰非所言孰為確實瑞麟崑壽近在同省見聞較確著即秉公嚴密訪查據實具奏瑞麟崑壽接奉此旨務須嚴密不准稍有漏洩毛鴻賓摺及續有人奏摺均著鈔給閱看將此由六百里密諭知之○又諭楊岳斌沈葆楨奏南安援師收復水城郡城解嚴又奏信防喫緊現籌進剿情形各一摺侍逆率眾直撲南安府城時援軍適至該逆縮入水城提督江忠朝知府黎兆棠等督軍力戰克復水城賊匪踰嶺遠遁郡城危而復安在事出力各員實屬異常奮勉著楊岳斌沈葆楨擇尤保獎以示鼓勵此股賊匪悉趨粵境官軍追至南雄州之槐花灘斬獲不少楊岳斌等以江西尚有賊蹤徽甯亦有竄匪兵力難以出省擬俟信豐瑞金湖州各路竄匪翦滅後再行確探前股趨向飭各營越境會剿惟侍逆係賊中最狡悍之股現在窮

感竄粵若粵兵迎截江軍跟追不難一鼓殄滅否則任其所之養成羽翼必至又形費手著楊岳斌沈葆楨迅速調派勁旅出境追剿毛鴻賓郭嵩燾當懍遵疊次諭旨派兵迎擊務將侍逆一股悉數殲除梅嶺南雄均與湖南接壤著憚世臨嚴飭在防各軍認真會剿共埽寇氛如令闌入完善蹂躪地方必惟各該督撫是問江西信豐尚有賊氛汪海洋大股在瑞金境內楊岳斌即飛催韓進春席寶田等軍實力進剿王沐等已照該督撫所請分別懲處席寶田向來打仗尚肯出力此次以知府降補如自知愧奮仍由該督奏乞恩施儻始終怙過無裨戎行即著據實奏參毋稍姑容皖南餘匪已由開化之華埠闖入江境距玉山僅三四十里鮑超適赴省就醫聞報力疾啟行奮勇可嘉著楊岳斌等即飭該提督出貴溪金谿之間確探賊蹤迎頭兜剿劉典由撫州到省現率所部由東鄉進發已

抵貴溪卽著飭令會同信防各軍實力夾擊務將全股撲滅母任再有逃竄楊岳斌另摺奏舊疾增劇請開缺調理等語本日已明降諭旨賞假一月調理俟假滿後仍遵前旨帶兵赴任誠以西北形勢甲天下非文武兼資不足膺此重寄該督威望素著必能底定巖疆殄除羣醜該督一日不赴甘則都興阿一日不能出關勦賊西陲大局將不可問該督當勉體朝廷不得已之苦衷力圖報稱以副

厚望將此由六百里各諭令知之○以記名按察使趙煥聯為雲南按察使○予江西南安陣亡參將譚茂高李竟成守備曾長義等祭葬世職加等○乙巳諭內閣本日兵部遞到伊犁將軍常清八月初七日所發摺報外面黃布包封騎縫蓋印處及黃紙封面印花均經拆損夾板亦未用繩束顯係途中私行開拆以致損壞著兵部行文經過沿途臺站地方逐一挨查係在何處拆損卽由該管督

撫大臣等嚴叅懲辦並著該部知照常清一體按站挨查覈實叅辦以肅郵政○諭議政王軍機大臣等前因陝西調回湖北之溫德勒克西兩起馬隊及蘇倫保兩起馬隊藍斯明四營步隊昨因甘肅回氛日熾諭令官文將前項馬步各隊酌量馳赴甘省諒該大臣已妥為調度本日復據常清由八百里馳遞據稱葉爾羌回變被陷英吉沙爾喀什噶爾兩城武弁謀叛烏魯木齊城圍未解請催調內地精兵援勦等語前授楊岳斌為陝甘總督令其帶兵赴任昨據奏到江西軍務未竣兵不能分該督亦因病奏請開缺已賞假一月調理本擬俟楊岳斌到任後酌撥甘肅兵將出關助勦今楊岳斌既不能卽日赴甘是甘肅情形仍形危迫穆圖善已帶所部赴甘著官文卽遵照本月初五日諭旨速將溫德勒克西等及蘇倫保馬隊派往甘肅交穆圖善統帶藍斯明等步隊如楚省軍情稍鬆可

以調撥亦著派令赴甘以資得力以上各起馬步著官文於接奉此旨時迅速遵旨酌量調派不准藉詞奏留麻城餘匪仍有若干曾否復竄豫境近日軍情若何著僧格林沁官文隨時具奏東竄英霍之賊業經曾國藩調派劉連捷等營迎剿該逆不能逞志於皖必再犯鄂官文務飭各軍盡力防剿毋任回竄勾結現在東南大局雖定西北軍事方殷新疆地方關繫緊要邊城處處傳烽勢將不可

收拾僧格林沁老成宿望視國如家必有救時良策不妨剴切敷陳以備採納將此由六百里加緊各諭令知之○又諭勞崇光張亮基奏兵飢餉竭請飭酌籌接濟教匪滋擾思南松銅各屬委沈宏富募練勦辦請飭周洪印馳往荔波獨山等處會剿桐梓失陷卽復各摺片包伍等逆以一股牽掣印江一帶徐河清等軍一股竄松桃廳屬之大坪場等處疊撲廳城經官軍擊敗該逆退紮距城六七

里地方現在思南朗圖等處雖已廓清而首惡未除河西賊巢未破亟宜實力勦辦著勞崇光張亮基檄令沈宏富統率所部相機進剿沈宏富現在湖南邊界就近添募勇丁卽著認真訓練以期餉不虛糜兵歸實用勞崇光張亮基惟當督飭該署提督迅將松銅思南各匪節節掃蕩翦除巨憝次第肅清疆圉松桃等屬匪勢甚熾該處均係湖南毗境黔省兵力本單亟須鄰軍援應著惲世臨督飭

派出官軍會合黔軍協力勦洗兩面夾攻以收聚殲之效該逆前由寨瓦旁竄秀山連界之濫橋九峰寺一帶雖經秀山兵練擊退難保不再圖窺伺著駱秉章檄飭該縣防軍嚴密堵禦力保完善毋令匪蹤闖入總兵周洪印一軍前在三崗會剿因糧乏撤退現在荔波獨山一帶逆猷鴟張意圖大舉粵黔兩軍防剿不敷分布若非添撥勁旅恐該逆益肆蔓延著惲世臨仍飭周洪印統率所部兼程

馳往荔波獨山等處會同粵黔各軍進剿以厚兵力勞崇光等所稱前請飭撥各省協餉均以空文見覆黔事尚非必不可為惟餉項奇絀若再毫無接濟飢軍一經譁潰不獨本省不可收拾卽川楚毗境必至駸駸蔓及請飭川楚二省按月協濟銀一二萬兩卽可稍蘇涸轍等語亦係實在情形著駱秉章憚世臨無論如何為難竭力籌措每月各協解黔餉一二萬兩以濟要需前因甘省軍情緊要

諭令駱秉章於川省得力兵勇挑選數千籌備軍裝口糧揀派知兵大員統帶前赴都興阿軍營聽候調遣現在甘肅回匪披猖固原復陷新疆各城亦均多蠢動亟需厚集兵力以資勦辦而遠調之兵不習地利無可籌撥著駱秉章懍遵前旨迅速撥往毋再遲延將此由六百里各諭令知之○又諭常清秦葉爾羌失陷烏魯木齊城圍未解英吉沙爾等城防守情形保恆奏各處回匪變亂烏城久

困並因病懇請開缺各摺覽奏不勝憤懣葉爾羌為南疆總匯之區茲據奏稱六月二十三日漢回變亂城池被陷是南路匪勢極為猖獗英吉沙爾喀什噶爾二城均有武弁勾通漢回謀叛雖經官軍剿殺數百名餘匪逃竄而葉爾羌既經失守該二城僻在西隅勢成孤立亟應加意嚴防著奎英托克托布就存城兵力慎固封守毋稍疏虞常清一面酌撥兵勇繞道援應一面派兵疏通冰嶺之路

由阿克蘇一帶節節進剿迅復葉爾羌等城均著妥速籌辦烏魯木齊滿城被圍日久糧食垂盡勢甚岌岌著常清督飭圖庫爾等軍迅速前進將庫爾喀喇烏蘇賊匪先行勦淨進援烏城平瑞當固守城池一面催提援兵合力夾擊以解城圍現在南北兩路同時擾亂伊犁防守事宜尤宜嚴密布置明緒此時計已行抵伊犁卽著常清商量籌畫一切辦理就緒後明緒懍遵前旨帶兵出境酌量南

此緩急剋期進發。仍分別良莠。勦撫兼施。以期肅清疆圉。常清請調之內地兵。雖屢經有旨催調。但此時亦緩不濟急。昨據廣鳳等奏。已調到科布多蒙兵一千餘名。派郡王凌札棟魯布等帶赴古城。著廣鳳奎昌催令星速前進。如有可續調之兵。再行酌量派撥。並著麟興車林敦多布迅將喀爾喀蒙兵儘數調撥。飛催由科布多一帶取道前赴烏魯木齊。聽候調遣。古城近接烏魯木齊。保恆惟當督

率兵勇認真防勦。並設法籌解烏城糧食。以濟眉急。巴里坤派到之官兵二百餘員。著保恆飛催起程。應援烏城。毋稍延緩。保恆因病懇請開缺。此時古城防勦緊要。豈得置身事外。著賞假一月調理。毋庸開缺。仍著將城守事宜竭力籌辦。以副委任。將此由六百里各諭令知之。○兩江總督曾國藩奏遵繪安徽全省地圖。並長江圖說進呈報聞。○漕運總督吳棠奏占種沛地之畝匪勦逐淨盡。得

旨辦理尚屬妥速。其查辦湖荒事宜。著卽飭令顏培瑚會同東省派出之道員崇芳等迅速妥商會辦。俟定有章程。卽行具奏。又奏請將記名鹽運使李元華留於江蘇以道員借補。允之。○以貴州桐梓縣城被賊竄陷。旋卽克復。革署知縣徐行署典史黃道安職。仍留營賞團總縣丞王大衡等藍翎。餘升敘有差。○予江蘇銅山陣亡練總文生鹿慶商賞卹如例。○予貴州思南陣亡守備談堯華等祭

葬。世職生員姜應璜等賞卹如例。予貴州天柱殉難知縣方時乾祭葬。世職加等建專祠。○丙午江甯將軍富明阿奏撥營赴甘。勦賊並裁撤水陸各軍。得旨胡世英等兩軍據奏已遵調起程赴甘。辦理甚屬妥速。裁撤水陸各軍務須派員沿途彈壓。妥善辦理。江面滋事游勇。仍飭吳全美認真查拏。毋令一名漏網。○福建巡撫徐宗幹奏汀州官軍截勦江西瑞金竄匪獲勝。得旨瑞金竄匪雖已擊

退仍應嚴防回竄。竄近廣昌之賊股。卽飭張運蘭馳往確探。會合江西官軍迎剿。以期一鼓殲除。林文察已抵泉州。卽派令酌帶隊伍。確探賊蹤所在。痛加剿洗。毋令闖入閩境。○四川總督駱秉章奏。蔡啟二逆。合竄漢南。現籌防剿事宜。得旨。昨據劉蓉奏。蔡啟二逆。被官軍擊敗。後餘黨狂竄階州。該撫已飭蕭慶高等越境窮追。與駱秉章此奏大略相同。著卽飛催唐友耕各軍。偵探迎剿。並會同蕭慶

高等軍夾擊。務期剪滅淨盡。毋令闖入川境。○以鑲黃旗蒙古都統明慶暫署正黃旗蒙古都統。鑲藍旗漢軍都統綿森兼署鑲紅旗滿洲都統。鑲白旗蒙古副都統孟保暫署正黃旗滿洲副都統。鑲紅旗蒙古副都統恆祺署鑲白旗滿洲副都統。○以鑲黃旗滿洲副都統崇綸署右翼前鋒統領。正白旗漢軍副都統烏勒興阿署正黃旗護軍統領。○以大

理寺卿賀壽慈為都察院左副都御史。○予

安徽滁州殉難署知州潘忠聚祭葬世職。○戊申。遣官祭。

歷代帝王廟。○諭議政王軍機大臣等。穆圖善奏馬步各營分期起程。並仍帶金順馬隊援甘一摺。蔡啟二逆由略陽突圍。經置口郭家壩竄至白馬關。餘賊已出陝疆。穆圖善以甘省軍情緊急。要仍飭金順馬隊於八月二十日起程赴甘。計此時已過耀州。辦理甚為妥協。著穆圖善卽飭金順趕程前進。協同剿

洗。以厚兵力。前諭官文將溫德勒克西等及蘇倫保馬隊派往甘肅。交穆圖善統帶。藍斯明等步隊如楚省。軍情稍鬆。亦令調撥赴甘。著官文懍遵前旨。趕緊籌撥。催令飛速起程。毋得奏留。致誤事機。漢南一帶。現在雖無賊蹤。難保不復圖回竄。如將來陝西有必需馬隊之處。俟溫德勒克西等各起馬隊抵秦時。著劉蓉酌度情形。就近暫留若干。藉資協助。如陝省無須此項馬隊。卽著劉蓉於溫德勒

克西等過境時催令星速逃行迅赴穆圖善軍營聽候調遣前據駱秉章奏逆匪竄至柳林鋪勢將窺伺通江南江邊隘或卽循黃官嶺以奔廣元茲據穆圖善奏賊已由文縣竄至龍安府境是該逆業由西路竄入川疆著駱秉章飛催唐友耕周達武等軍確探賊蹤星馳截勦並著劉蓉檄令蕭慶高何勝必兩軍跟蹤緊躡面夾攻以收聚殲之效陝省此時雖已無賊各路防堵仍不可稍涉大意

善後事宜亦當次第經理均著劉蓉妥為籌辦將此由六百里各諭令知之○以江西捐輸軍餉永廣金谿萍鄉安福三縣學額各三名玉山萬載二縣各二名

大清穆宗繼天開運受中居正保大定功聖智誠孝信敏恭寬毅皇帝實錄卷之一百一十四



大清穆宗繼天開運受中居正保大定功聖智  
誠孝信敏恭寬毅皇帝實錄卷之一百十五

校修

同治三年甲子九月己酉諭議政王軍機大

臣等玉通奏西甯回眾投誠以後屢差文武  
委員暨身赴各處寺院莊村撫恤難民解散  
鄉勇一摺並補奏上年十月兵勇節次獲勝  
餘匪畏威投誠各情形一摺玉通帶員馳赴  
北川果莽果隆吹布藏等寺商同章嘉呼圖  
克圖等傳集漢土番回勇目曉以安分務農  
無不樂於息事惟因回性反覆不得不防現  
將團勇散去一半尚餘一半保守寺院暨各  
村莊尚非恃眾尋釁自應俯如所請其塔爾

寺練勇經玉通等疊次勸諭已有息事之機  
著玉通即飭知府達昌等認真開導以期永  
息爭端不得畏難苟安冀圖目前便利恩麟  
護理督篆各路均應兼顧乃不察被害情形  
一味主撫於西甯軍務漫不關心前派道員  
雅爾佳納在湟安撫該道見事難為先行回  
省恩麟何以並不據實參奏馬也氏勸諭回  
眾尚能聽從何以復行調回省垣以致回民  
勾結殺掠相尋實堪痛恨嗣後務須隨時兼  
顧若再視同膜外貽誤地方必將恩麟從重  
治罪決不寬貸玉通另片奏紳民請留成瑞  
在甯開導等語成瑞前次獲咎甚重既據該  
處紳民合詞籲懇即著恩麟飭令該革員前  
赴西甯開導花寺臨洮兩教回匪如其辦理  
無效仍著玉通等將其解京治罪不得藉詞  
延緩將此由六百里諭知玉通並傳諭恩麟  
知之○又諭慶昫奏請飭山西籌撥火藥鉛  
丸並常陞退紮平湖橋各摺片本日已諭令

沈桂芬將火藥鉛丸等項迅速籌撥矣。常陞在納家牐左近地方勦匪獲勝。嗣因賊勢甚眾。渠水盡乾。率卽移營退至距城五里之平湖橋。該副都統始報大獲勝仗。旋即輕率移營退守。究竟因何挫敗。軍械等項有無遺失。著慶昫詳細查明。如有畏葸退縮及調度失宜情事。卽著據實參奏。該郡各堡供支常陞軍營米麵錢文。是否民間捐辦。抑或暫行那借。並著飭令常陞查明辦理。前諭慶昫知照。

常陞進規納家牐。卽在該處就近屯紮。俟杜嘎爾一軍逐漸南趨。合力夾擊。著慶昫仍遵前旨。知照常陞嚴密布置。穩紮穩進。毋得稍有疏失。俟杜嘎爾一軍及都興阿大營現在分撥之兵。與常陞所部可以聯絡一氣。卽著協力埽蕩。迅殄逆氛。常陞此次失挫。糧路又形阻滯。並著慶昫設法疏通。源源籌解。以濟兵食。將此諭令知之。○以籌餉辦防出力。予江蘇布政使劉卹膏優敘。賞按察使郭柏蔭

二品頂帶。○以江蘇官軍克復蘇州。暨浙江平湖等城出力。賞總兵官曹仁美宋甸南從一品封典。參將陳曰有等二品封典。總兵官陳定國參將江開泰。巴圖魯名號。知府葉寶樹。參將戴春林等花翎。在籍員外郎陳桂棠等藍翎。餘加銜升敘。開復有差。○以襄辦江蘇軍務出力。予通判陳肅以道府用。並賞花翎。○以江蘇軍營製礮出力。賞洋將馬格里三品頂帶。○復江蘇宜興陣亡已革知縣周

守典原官。予祭葬世職。○追予江蘇丹陽殉難文生林蔚中等男婦十九名口分別旌卹如例。○追予江蘇蘇州合門殉難在籍府經歷楊春霖暨眷屬人等分別旌卹如例。○予陝西潼關等處陣亡殉難紳民婦女四百六十一名口分別旌卹如例。○撥山西火藥一萬斤。鉛丸一萬五千斤。火繩一萬五千丈。解赴甘肅甯夏軍營備用。○庚戌諭議政王軍機大臣等。都興阿奏張家川回民旁竄。平慶

戒嚴並請飭陝撫撥解糧餉軍火等件各摺片張家川逆巢經雷正綰攻克後敗回三路竄入鎮原縣境已抄過平涼漸近慶陽其意蓋欲糾合全股乘平涼後路空虛慶陽防兵單薄北趨援甯非有勁兵截擊不足以制賊死命前據雷正綰奏進攻蓮花城因銳意深入山險人馬礙難旋布猝被矛傷以致失挫當經諭令都興阿酌度機宜先與雷正綰等軍聲勢聯絡再行節節進剿現在回匪已經

旁竄雷正綰傷口近日是否平復著卽整頓隊伍與陶茂林會督諸軍北趨平固會合慶陽一帶防兵跟蹤兜剿迅圖埽蕩毋令與甯靈之賊串通一氣並著穆圖善懍遵疊次諭旨迅統所部星馳前進會同都興阿雷正綰妥籌攻剿曹克忠一軍著劉容催令剋期入甘迎頭截擊務與雷正綰等合力進攻迅殲醜類陶茂林等軍火等項疊經諭令劉蓉飭令陝西糧臺按月供支現在陶茂林軍火缺

乏糧餉又無接濟將士飢寒交迫譁潰堪虞陳天佑西蒙克西克等軍雖經都興阿為之騰那竟有不支之勢劉蓉於疊次催解要需竟敢視同膜外屢催罔應儻因糧餉軍火不繼貽誤大局該撫其能當此重咎耶著劉蓉懍遵疊次諭旨迅撥鉅款並所需軍火等件一併星速妥解分赴陶茂林陳天佑西蒙克西克等行營以濟急需並著源源接濟毋令匱乏不准再事推諉都興阿另片奏遵飭訥

欽回旗另派翁同書接統其眾卽著照所擬責令翁同書將訥欽部眾力加整頓認真防剿將此由六百里各諭令知之○又諭傳諭陝西按察使張集馨前因固原復陷回匪叛服無常曾諭令張集馨馳抵甘省後相機籌辦茲據張集馨奏稱陝逆孫義寶赫明堂等叛踞州城固原現已梗塞擬先到涇州一帶察看情形等語著於馳抵涇州後將現在回匪情形據實詳細具奏如該匪犬羊性成負

固不服萬無勉強招撫之理。卽著張集聲徑赴蘭州會同恩麟於一切防勦事宜妥籌辦理。仍一面將抵蘭日期迅速具奏。○命四川北鎮總兵官鶴齡赴署陝甘總督都興阿軍營聽候差委。○予四川會理等處陣亡殉難文生胡德鏊等紳民婦女二千四百六名口分別旌卹如例。○予四川中江陣亡在籍縣丞王鎮莖祭葬世職加等建專祠。勇丁艾榮陞等二百餘名均附祀殉難文童謝緒鴻。

賞卹如例。○撥江蘇小洋槍一千桿洋火藥五千瓶小銅帽五十萬粒解赴甘肅軍營備用。○辛亥遣官祭

都城隍之神。○諭議政王軍機大臣等有人奏江西督銷鹽引委員廣西候補道程桓生把持鹽務藉督銷之勢使其父程穎芝於安徽省城開設合和鹽行其弟江西候補知縣程朴生於饒州開設泰和鹽行名為督銷鹽引實則利歸於己以官民並准試辦之引地

幾為一人獨辦之引地並聞該道之父在樞陽開棧之日護勇號褂私用欽差大臣字樣尤屬妄誕懇請飭查嚴辦等語。兩淮引地前經重定章程派委監司大員分駐督銷原以裕課便民承辦之員理應潔己奉公實力整頓方於鹽務有裨。若如所奏各情以督銷鹽引之員一味倚勢招搖營私牟利如果屬實殊屬可惡著沈葆楨按照所奏各節確切查明據實具奏毋稍徇隱原摺著鈔給閱看將

此諭令知之尋奏遵查程桓生被參各款均無其事自設局以來領運踴躍每月接濟餉銀七八萬兩不無裨益報聞。○又諭楊岳斌沈葆楨奏皖南各軍分路堵勦疊勝並江省東路布置情形一摺。另片奏皖防各營續報截殺竄賊等語。湖州廣德竄出之賊闖入皖南經劉松山收降五千餘人復經唐義訓易開俊痛勦於山陽阮其鋒愈挫逆眾敗伏淳安山內另股逆匪亦經易開俊等督軍邀截

斬殺解散其眾。卽著楊岳斌督飭皖軍乘此聲威。會合浙師。聯絡兜擊。盡殲醜類。至收降太眾。宜防反側。其隨營效力之賊目王起汶等。尤應加意防範。毋令患生肘腋。並著楊岳斌飭令皖南將弁。妥籌辦理。毋稍大意。此次紛竄各股賊匪。未能越皖入江。具見皖軍遏截之效。現在鮑超已由建昌拔營東行。以顧廣饒兩路。楊岳斌等復派孫昌國督帶水師。嚴扼廣信等處河面。東路防守已固。仍著楊

岳斌沈葆楨督率在事文武。審慎守禦。百密毋致一疏。是為至要。正在寄諭間。據毛鴻賓馳奏。逆匪由江西竄入粵界。分隊進逼南雄州城。雖經唐啟蔭督兵攔截獲勝。而賊勢蔓延南雄。迤東之始興翁源。迤西之仁化樂昌。皆有賊蹤。廣東為賊匪注意之區。而惠潮嘉三屬尤首當其衝。毛鴻賓現已飭令唐啟蔭等募勇增兵。防堵北江一路。方耀等軍。防堵東江一路。又另委守備黃添元等募選練勇。

以備調遣。並為省城巡防之需。所籌尚屬周密。卽著毛鴻賓郭嵩燾督飭在事員弁。實力扼剿。迎頭截擊。毋令賊蹤紛竄。擾及完善之區。前據楊岳斌等奏。賊匪被剿竄粵。江西各軍不能越境追剿。當經諭令粵東地方緊要該督等務當派兵追擊。毋任滋蔓難圖。現在南韶一帶。賊勢甚熾。新募之兵。恐不足以制賊死命。著楊岳斌沈葆楨懍遵前旨。迅飭甯贛等處防兵。剋日拔隊越境會剿。不得畛域

攸分。貽誤大局。其毛鴻賓咨商鮑超調派之王衍慶五營。並著楊岳斌等催令迅速起程赴粵。以厚兵力。毋許稍有遲誤。將此由六百里各諭令知之。○又諭麟興等奏。遵調喀爾喀西兩部落蒙古官兵起程。並委員管帶蒙兵暨改道採買官兵口食各摺片。前次催調蒙古官兵。經麟興等調到西兩盟喀爾喀扎薩克圖汗賽因諾顏兩部落蒙兵一千五百名。卽著配齊軍火。催令起程。此項官兵所需

口食由各旗墊辦數十日。僅到烏里雅蘇台為止。其前途應領行裝等項。既據麟興等奏稱倉庫無儲。諭令該盟長等先將自烏里雅蘇台至古城官兵口食。仍由兩盟墊辦。俟抵古城。由該大臣照例開放。即著照所擬飭令該盟先行墊辦。並著咨明保恆等。俟此項官兵到時。照例支放。毋令匱乏。一面嚴飭帶兵各員。沿途妥為彈壓。不得稍有滋擾。烏里雅蘇台官兵口食。近因古城烏魯木齊一帶道路梗塞。無從購買。自應改由歸化城等處採辦。著德勒克多爾濟轉飭所屬。照例免稅。俟古城一帶道路稍通。即行停止。以符定制。將此各諭令知之。○以記名按察使張兆棟為四川按察使。○以江西廣信府城修築完竣。予知府鍾世楨等加級升敘有差。○以管帶蒙古官兵出力。予烏里雅蘇台防禦遇春等加級升敘有差。○予江蘇蚌埠等處陣亡守備張學林等祭葬世職加等。○壬子。諭議政

王軍機大臣等。左宗棠奏截剿竄賊獲勝。浙境肅清。各營出境追剿一摺。逆匪由遂安昏口一路闖入開化。總兵王開琳。副將劉明珍等合兵追擊。賊不能支。由華埠竄江山玉山。疾趨廣豐。沿途殲斃甚眾。受降者亦近萬人。洪幼逆幾被擒獲。復為粵逆拌死潰圍。挾之而走。現由廣豐竄入鉛山縣境。一向紫溪車盤一繞。鉛城向湖坊一路逸去。死黨尚有數千。現在劉典一軍已抵貴溪。黃少春、劉明珍兩軍已抵廣信河口。王開琳等已率眾跟追。著左宗棠、楊岳斌、沈葆楨督率諸軍前截後追。毋留餘孽。左宗棠自入浙以來。克復城隘數十處。肅清全境。厥功甚偉。本欲即加懋賞。恐該督以洪幼逆未滅。必將固辭。一俟餘逆淨盡。即降恩旨。浙省軍務已竣。地方應辦一切善後事宜。該督當督飭司道等次第辦理。以期奠安閭閻。另片奏洪幼逆入浙各情。覽奏均悉。朝廷於有功諸臣。不欲苛求細故。該

督於洪幼逆之入浙。則據實入告。於其出境。則派兵跟追。均屬正辦。所稱此後公事。仍與曾國藩和衷商辦。不敢稍存意見。尤得大臣之體。深堪嘉尚。朝廷所望於該督者。至大且遠。該督其益加勉勵。為一代名臣。以副厚望。鮑超由建昌拔營。顧廣饒兩路。楊岳斌等復派孫昌國督帶水師。嚴扼廣信等處。著卽懍遵。昨奉諭旨。督軍會浙軍迎剿。以期一鼓殲除。收降之眾過多。仍飭各軍妥為駕馭。如遣

散其眾。尤須審慎辦理。以防後患。將此由六百里各諭令知之。○又諭張之萬等奏東路竄匪。經張曜追擊出境。西路一股被剿。南竄復偪商城。請飭張曜回軍扼守一摺。遵逆等股在黃安麻城境內。分路盤踞。經陳國瑞等揮軍追殺。賊竄黃安大山。依險負隅。該處溝深路窄。馬隊難於施展。豫省步軍又多疲乏。亟需勁旅協剿。以厚兵力。著官文嚴檄成大吉等軍。會同僧林林沁所部及豫省官軍協

力兜剿。四面圍攻。以期聚而殲旃。並著張之萬毛昶熙激勵將弁。實力進攻。如該逆逸出山險。卽著僧格林沁督飭馬隊官軍痛加剿洗。迅殄逆氛。黃麻之賊復竄至石香鑪黃土岡等處。偪近西界嶺。圖窺商城。張之萬擬調張曜回軍商城扼守。張曜現在扼紮六安之流波疇等處。應否調回商城。以固豫省邊防之處。著僧格林沁體察情形。相機辦理。偽端王及馬泳和等股。仍踞英霍一帶。偽扶王等

股由六安之流波疇折竄漫水河地方。是皖省邊境匪勢尚形滋蔓。著喬松年督飭在防各軍節節掃蕩。將各股匪迅速殄除。肅清邊圉。正在寄諭間。據官文奏斬羅賊匪。仍復依山固踞。光羅髮捻繞道回竄。黃安擾及麻城。黃岡地界經水陸官軍追擊。悉趨蘄水蘄州等語。與張之萬所奏情形不同。是否該逆由黃安分股竄逸。著官文張之萬探明賊蹤。分投剿洗。成大吉等後路運道已為蘄水之賊

圍偪梗阻。官文當督飭李成謀、周鳳山等軍，星速解圍。疏通成、大吉等營糧路，一面繞路會攻蘄水。羅田、英山、毗境賊匪負隅如故。著官文飛飭劉連捷、朱洪章等軍，由宿松太湖一路節節迎剿。力顧蘄州等處要隘。僧格林沁之軍如已到麻城，卽著相機會剿，以資厚集。前諭官文將溫德勒克西等及蘇倫保馬隊派往甘肅，交穆圖善統帶。著官文懍遵前旨，催令趕緊起程，儻再不知緩急，觀望遲延。

卽著從嚴叅辦。至藍斯明等步隊能否調撥赴甘之處，並著官文妥為籌畫，迅速辦理。將此由六百里各諭令知之。○署陝西提督雷正綰奏陝回竄陷固原，現籌勦辦，得旨著思麟督飭楊炳鏗飭屬一體嚴防竄越，毋得再有疏虞。其穆隆、成瑞退駐平涼情形，難保非聞警先遁。著查明據實具奏。思麟、楊炳鏗疏於籌布，均交部議處。○以詹事府詹事廷煦為內閣學士兼禮部侍郎銜。○以浙江開

化縣城被賊竄陷，旋卽克復。革代理知縣方崇崇職，免查辦。予殉難署縣丞張名第祭葬。世職○癸丑諭議政王軍機大臣等戶部奏本年京餉請嚴飭各省趕解以供開放一摺。近年京餉均於八九月間統覈年內用項，在原撥未解銀內酌量專提。本年京餉原撥銀五百萬兩為數較少，現計截至八月底止，除解到劃撥並已報委解外，尚有山西欠解地丁銀七十五萬兩，山東欠解地丁銀十三萬

兩，河南欠解地丁銀十四萬兩，湖北欠解地丁銀十五萬兩，湖南欠解地丁銀十萬兩，廣東欠解地丁銀二萬五千兩，江西欠解地丁銀十六萬兩，長蘆欠解復價銀五萬兩，補墊積欠銀五萬兩，廣東欠解鹽課銀八萬兩，新舊息銀八萬兩，河東欠解加課銀十萬兩，羨餘銀五萬兩，山東欠解鹽課銀四萬兩，湖北欠解鹽釐銀五萬兩，粵海關欠解稅銀二十五萬兩，閩海關欠解稅銀十萬兩，江漢關欠



解稅銀十萬兩。山海關欠解稅銀五萬兩。天津關欠解稅銀五萬兩。福建欠解茶稅銀二萬兩以上共銀二百五十二萬五千兩。該將軍督撫等具有天良。應念京師為根本重地。餉項至關緊要。本年業經酌量減提。若再行酌減。誠恐年內不敷應用。著該將軍督撫通商大臣監督等。於接奉此旨後。各將未解銀兩。務於十二月內。儘數解齊。儻仍飾詞宕延。致誤要需。卽由該部查照奏定章程。指名嚴

參。毋得視為具文。自取咎戾。廣東應解下半年京餉。昨據毛鴻賓等奏請截留為本省防勦之需。雖經飭部速議具奏。惟不得以奏請截留在先。一味諉卸。竟置京餉於不問。著毛鴻賓等仍卽飭司籌款。趕緊報解。毋許仍前玩延。致滋貽誤。將此由五百里諭知官文英。桂劉長佑。毛鴻賓。閻敬銘。沈桂芬。張之萬。徐宗幹。沈葆楨。吳昌壽。惲世臨。郭嵩壽。崇厚。並傳諭寶章。毓清。師曾知之。○又諭前因恩麟

奏陶茂林各營餉項。請酌定供支省分。諭令戶部覈議速奏。茲據奏稱。陶茂林一軍。餉需孔亟。擬在江海關稅原撥咸豐十一年京餉未解銀內。劃撥銀五萬兩。閩海關稅原撥咸豐十年京餉未解銀內。劃撥銀五萬兩。解往甘省。作為陶茂林軍營協餉。但此二處距甘稍遠。恐尚緩不濟急。查有同治二年奏撥四川協甘餉銀五萬兩。及按糧津貼項下協甘銀數萬兩。時閱年餘。未據報解。擬卽將此二

款全數作為陶茂林軍營專餉。川省解到較易。陶茂林一軍。於閩海江海二關餉銀未經解到之前。得此二款接濟。庶不致停兵待餉。請飭迅速解甘等語。陶茂林一軍。勦匪正在喫緊。該營所需餉項。亟應廣為籌備。所有江海閩海兩關各撥銀五萬兩。著李鴻章。英桂如數籌措。派員探明赴甘道路。星速解交陶茂林軍營。並將委員起程日期。先行報部。儻有遲延。卽著該部奏參。至川省所撥之餉。尤

須飛速解到方足以濟眉急。著駱秉章將戶部上年指撥甘餉銀五萬兩。按糧津貼銀數萬兩。嚴飭藩司如數措齊。速委妥員解甘。探明陶茂林軍營交納。毋得遲延推諉。另片奏。遵議恩麟請飭各省協撥款內。聲明指撥甘餉及新疆餉。以杜牽混等語。新疆需餉緊急。前由山西山東河南四川專撥新疆經費銀四十萬兩。除山西省有另撥新疆軍餉銀二十萬兩。已據報解八萬兩。應撥經費十萬兩。

已據報解三萬兩外。其餘十九萬兩。著沈桂芬仍遵前旨。作為兩批趕緊解往。山東等省奉撥新疆經費。山東應解銀七萬兩。已解銀五萬兩。未解銀二萬兩。河南應解七萬兩。四川應解十六萬兩。均分毫未解。著駱秉章張之萬閻敬銘飭司籌措。迅速解赴新疆交納。至甘省協餉。現有省城慶陽兩處需款浩繁。亟應速籌接濟。著曾國藩路秉章毛鴻賓李鴻章沈葆楨張之萬閻敬銘劉蓉沈桂芬郭

嵩壽。遵本年六月間諭旨。將歷年欠解甘餉內。先行各籌解銀二三十萬兩。解往甘肅。不得概以不能兼顧無款可籌等詞。空言搪塞。以上各款。經過地方。亦不得擅行截留。致干叅辦。浙江應解甘餉。昨據左宗棠奏。地方彫敝。請飭改撥。現在雖令戶部速議具奏。惟甘省餉項奇絀。仍著左宗棠無論如何為難。先行設法籌解若干。以濟急需。甘省軍情。極為緊急。新疆回匪相繼煽亂。勢甚鴟張。非寬

籌軍食。不足以資攻剿。該將軍督撫等受恩深重。務當飛速措解。力維大局。將此由五百里各諭令知之。○又諭李雲麟奏。請將暫紮漫川關之楚軍三營。全行遣回。仍由陝省籌還借項。並將水師酌量裁撤。又病勢加重。請由襄陽回旗各摺片。據稱中前後三營。暫紮漫川關。現在楚陝之交。軍事已鬆。必須全行遣撤。已飭三營赴襄陽領五六月餉銀。所有借款一萬兩。仍咨劉蓉籌解襄陽。一俟此款

解到便可同時遣撤並將水師一併裁撤僅留澄漢一營等語著官文卽飭襄陽委員將五六兩月餉銀關支劉蓉將欠款一萬餘兩轉飭糧臺如數解襄並令李雲麟妥為遣撤如此後有該營滋事定惟李雲麟是問李雲麟由水路赴襄陽但須將經手事件完竣方准回旗如有輟輟不清擅自回旗將來亦必仍行發往清理也隴軍營務據李雲麟奏稱有浙江候補知州黃加焜心地和平樸誠諳

練現已交該員辦理等語黃加焜統帶隴軍能否勝任著劉蓉查明具奏如不得力仍遵照初三日諭旨派員統帶妥為調度李雲麟摺片發交劉蓉由該撫咨行楚省並飭李雲麟遵照辦理將此由四百里各諭令知之○甲寅諭內閣巡視西城御史奎英奏請飭拏竊聽公事包攬詞訟匪徒一摺據稱近有無賴游民專以講論公事詢問某御史居住何處巡視何城稽查何倉並詢問各城城期竊

聽公事以便挑詞唆訟或在刑部及步軍統領衙門附近處所串通胥役包攬詞訟等語京師重地豈容不法棍徒招搖撞騙著步軍統領衙門順天府五城御史一體訪拏務獲從嚴懲辦以靖地面而安善良○諭議政王軍機大臣等喬松年奏英霍逆匪被剿西竄現籌剿辦情形一摺逆匪竄聚英霍一帶圍攻蔣凝學之軍並分擾至潛山邊境經蔣凝學督軍苦戰屢挫兇鋒復經英翰郭寶昌儘

力追剿該匪遂退竄蘄羅一帶蔣凝學乘勝尾追斬擒甚眾英霍已無賊蹤剿辦甚屬出力蔣凝學等均著先行存記俟軍務大定由喬松年奏請給予獎勵現在逆蹤雖已西趨難保不乘間回竄蔣凝學扼守英山極為得力未可遽令赴鄂其英霍交界卽著飭令英翰扼要駐紮妥籌援應六安及流波疇一帶仍著責令張得勝認真防守與英翰等聯絡聲勢嚴密戒備曾國藩前派之劉連捷朱洪

章朱南桂等軍。及續派之李榕。主可陞。何紹彩等軍。計已到皖。此時英霍已無賊蹤。自應越境進剿。卽著曾國藩。喬松年。飭令拔隊赴鄂。會合楚師。兩面夾擊。盡殄賊氛。曾國藩現赴江甯。距英霍一帶較遠。若派出諸軍。悉由曾國藩調度。軍情旦夕變遷。千里請戰。深恐緩不濟急。所有劉連捷等軍。已抵皖境。以後一切進剿機宜。卽可由喬松年斟酌調派。以期毋誤。事機。靳羅等處賊氛。廣集。官文當懷

遵前旨。督飭在事將弁。實力扼剿。並飛調劉連捷等軍。追擊。僧格林沁之軍。如已到麻城。並著相機會剿。以資厚集。將此由六百里各諭令知之。○予安徽英山等處陣亡把總謝桂林等。祭葬。世職加等。○乙卯。諭內閣。毛鴻賓等奏。查明長隨虧餉。為子壻蒙捐官職。咨提審辦。請將蒙捐各員。革職解訊。一摺。據稱已故代理揭陽縣知縣潘銘憲。長隨唐幅。卽唐希燕。又名唐錦。於咸豐九年間。先後領文

管解地丁稅羨等銀。赴省投納。輒敢任意侵那。為其子唐應坤蒙捐同知。分發福建。又為其壻王有源報捐縣丞。分發廣東。事後復將解文彙件。銷毀滅跡。實屬膽大妄為。目無法紀。唐幅現經逃往唐應坤寓所。卽著移咨福建巡撫。派員將該犯唐幅。並伊子唐應坤。一併拏解廣東。從嚴究追懲辦。王有源現已捐升知縣。更名秉廉。著與唐應坤。一併革職。歸案質訊。唐幅之次子唐美謙。唐美讓。均經蒙

捐官職。並著查明分別咨革。提究。以慎名器。而肅紀綱。○又諭。毛鴻賓等奏。請將疏防監犯越獄之知縣等官。懲處等語。廣東署歸善縣知縣完繼美。疏防監犯越獄。至十九名之多。雖據稱因變疏脫。情尚可原。惟該署縣於拏獲盜犯。延不訊結。致令與在監各犯乘閒共逸。辦事實屬顛預。若僅照有獄官例議處。不足蔽辜。完繼美著先行革職。管獄官歸善縣典史沈懋勳。著交部照例議處。一併勒限

緝拏逃犯周亞二等務獲。儻限滿無獲。再行分別叅辦。○諭議政王軍機大臣等。有人奏吉林三廳地方。有賭匪盜匪。山匪各名目。逞兇擅殺戕斃多命。將軍景綸聲名狼藉。粉飾欺蒙。日縱協領常明。富金。明祿等。擅權納賄。表裏為奸。各等語。吉林為根本重地。似此賊匪不靖。劣員貪污。虧國帑而害民生。所關非細。著阜保接奉此旨。卽行馳赴吉林地方。將賊匪肆劫情形。及該將軍景綸。並協領常明

等各款劣蹟。秉公嚴密訪查。據實叅奏。毋稍徇隱。又有人奏。吉林宜專設理刑大員。及菸木等稅銀。宜查明歸公。各摺片。是否可行。應如何妥定章程之處。著一併查議具奏。摺二件。片一件。均著鈔給閱看。將此密諭知之。○又諭本日有密諭阜保之件。黃紙封固。鈐用御印。著寶珣於接奉後。先行收存。俟阜保差旋抵奉天時。卽將此件轉交阜保。拆閱遵辦。永陵神榆前已派禮親王世鐸前往。敬謹閱視。

阜保文謙均著無庸前往。並著寶珣傳知。將此諭令知之。○以正紅旗蒙古副都統奕貴署鑲白旗護軍統領。○以廣東韶州等處紳民勦賊出力。賞在籍道員葉永元布政使銜。州同楊開泰等藍翎。餘升敘有差。○丙辰。諭內閣。總管內務府大臣奏。統籌庫款全局。請飭部妥議章程一摺。內務府廣儲司銀庫。備辦內廷一切供支。並紫禁城直班官兵口糧等項。均係必不可少之款。原係粵海關按年

解交公用銀三十萬兩。以供急用。乃該關歷年積欠甚鉅。曾經該衙門疊次奏請。將該監督及該省督撫等叅處。並兩次奏借戶部銀三十萬兩。粵省督撫及粵海關監督累次奏請改撥。亦經該部衙門議駁。而議駁之後。仍未見踴躍報解。內廷正供。幾屬虛懸。實屬不成事體。著戶部將粵海關指撥一切款項。通盤籌畫。務將應解內務府公用銀三十萬兩。令該監督按季全數報解。迅速妥議章程。奏

明請旨遵辦。以重要需。此項公用銀兩。係常年正供。並非為額外工作及服物玩好之用。惟物力艱難。理財首宜節用。嗣後宮內雖尋常工作。非大不得已者。亦著酌量停緩。以節糜費。其餘一切照例進御服飾器皿等件。並著總管內務府大臣等。懍遵疊次諭旨。覈實備辦。力求撙節。以示朝廷崇儉黜奢之至意。

○諭議政王軍機大臣等。駱秉章奏攻勦滇黔股匪獲勝一摺。伍逆股匪。麇聚秀山龍甕

場。經曾志友等進剿。該逆敗竄黔境。復糾白號股匪。由麻兔司擾陳家陂等處。大股竄至濫橋。官軍分路痛殲。復敗由黔境孟溪逃入銅仁屬之三元地。該處距川雖已較遠。難保不復圖回竄。著駱秉章檄令曾志友等軍。在秀山西南兩路嚴密防守。賊匪現仍逃回銅仁。著勞崇光、張亮基督飭官軍。痛加勦洗。迅殄逆氛。前諭譚世臨仍飭周洪印馳往荔波獨山等處勦匪。茲據駱秉章奏。曾志友帶兵

出境會同周洪印直抵孟溪。是該總兵所部尚駐銅仁一帶。現在曾否起程前赴荔波獨山。著譚世臨酌度情形。相機辦理。譚世臨惟當督飭防軍。會同黔粵各軍。將黔省之匪。迅加殄滅。庶湖南邊境得以漸就敕平。貴州正安桐梓之匪。竄至涪州之大河壩。經成耀星等越境追剿。餘匪由蓋了場遠竄。著駱秉章、勞崇光、張亮基激勵派出各軍。協力掃蕩。兩面夾攻。務將此股賊匪殲除淨盡。以期漸就

肅清。滇匪向結苗匪。由敘永之大壩竄至建武興文瀘衛等處。經胡日祥等帶兵追擊。該逆敗回大壩。許蔭棠復率所部緊躡。躡平大壩賊壘。追賊出境。貴州仁懷號匪。又竄至敘永廳古蔣地方。駱秉章現派許蔭棠約會劉嶽昭所部前往截剿。即著飭令相機布置。認真勦辦。林鴻年身任巡撫。雲南勦匪事宜。責無旁貸。應如何將此股滇匪速為撲滅之處。著與駱秉章妥為商辦。八月二十六日密諭。

林鴻年接奉後。並著與駱秉章。勞崇光。悉心酌度。通籌全局。迅赴昭通。妥為辦理。啟蔡二逆。渡白水。江西竄階文。意將出畢口。以窺川西。著駱秉章。飛檄周達武等軍。移防昭化。平武。江油一帶。與陝軍前截後追。迅殲醜類。前諭駱秉章。撥兵數千。赴甘助剿。著卽迅速調派。毋誤事機。將此由六百里各諭令知之。○又諭。前因新疆軍務喫緊。疊經諭令文祥。馳赴軍營督辦。並揀員署理哈密辦事大臣。以

便文祥交卸起程。茲據保恆奏稱。哈密無可派署之員。新任吐魯番領隊大臣扎克當阿。庫爾喀喇烏蘇領隊大臣惠慶。俱已行抵巴里坤。請飭扎克當阿就近署理哈密辦事大臣印務等語。新疆回氛甚熾。烏垣等處防剿均形喫緊。現在科布多調派蒙古援兵。已於八月初十日起程。不日卽到古城境內。烏里雅蘇台所派蒙古官兵。計亦尅期赴援。亟須大員督率操練。以利攻剿。扎克當阿已行抵

巴里坤。著卽馳赴哈密。就近署理哈密辦事大臣印務。並由保恆知照文祥。俟扎克當阿行抵哈密。卽行交卸。馳赴軍營督剿。毋稍延緩。保恆前因衰病奏請開缺。業經賞假一月調理。並責令將城守事宜認真籌辦。該大臣旣因痼疾不能乘騎。自可無庸督隊。著卽飛咨惠慶。迅由巴里坤起程。馳赴古城。統帶蒙古援兵。一切防剿事宜。仍著保恆與惠慶會籌妥辦。毋得稍形推諉。貽誤事機。一切現辦情形。卽由保恆咨照常清。平瑞。文祥。知悉。將此由六百里各諭令知之。○以不守營規。革四川遊擊魯得勝職。○予四川敘永等處陣亡遊擊胡得勝等十九員祭葬。世職加等。○予四川節年陣亡殉難紳民婦女八千二百名口分別旌卹如例。○丁巳以神靈顯佑。頒江南江甯府暨湖南湘鄉縣關帝廟扁額曰宣威翊運。加四川嘉定府河神封號曰護國。○諭內閣。不入八分輔國

公承志著襲封鄭親王爵。入八分鎮國公載敦著襲封怡親王爵。岳靈前經賞給不入八分輔國公。卽著作為承襲承志所遺世職。載泰前經賞給不入八分輔國公。此次載敦所遺之爵。例應降襲入八分輔國公。世襲罔替。載泰著加恩賞給入八分輔國公。卽著作為承襲載敦所遺之爵。均准世襲罔替。○又諭前因載垣狂悖恣肆。跋扈不臣。革除王爵。其怡賢親王允祥。雍正年間所奉

特賞手敕。業由宗人府恭繳。嗣因追溯前勲。時深眷念。於本年七月間。特沛恩綸。將怡親王世襲王爵賞還。本日宗人府將應襲之人。帶領引見。已降旨令載敦承襲。所有雍正元年原奉

手敕。卽著載敦祇領。敬謹尊藏。用昭世守。其勤慎恪恭。勿隳先人舊德。以期裕後光前。長承恩眷。此旨並著內閣繕錄一通。交宗人府頒給載敦祇領。○又諭前因譚廷襄奏河南開

封府上南河同知員缺緊要。請以京員期滿留工儘先同知蕭彥申補授。當經降旨交吏部議奏。嗣經吏部議駁。以上南河同知一缺。照例應用分缺先用人員。仍令另揀合例人員。按班請補。茲復據譚廷襄奏稱。上南廳地居南岸上游。修防緊要。甲於通工。非尋常試用人員所克勝任。雖在工尚有合例之員。人地均不甚相宜。蕭彥申在工年分較深。自委署斯缺以來。經理裕如。本年疊辦險工。實屬

得力。未便更易生手。且係咸豐十年

特旨儘先補用人員。人地亦實在相需。請仍以蕭彥申補授等語。蕭彥申著准其補授河南開封府上南河同知。以資治理。嗣後不得援以為例。○諭議政王軍機大臣等。前因曾國藩奏江甯興修貢院。擬於本年十一月間舉行鄉試。疊經諭令該大臣酌度情形。妥籌辦理。茲據曾國藩奏稱。行抵江甯。查驗貢院工程均已完竣。請於十一月舉行鄉試。並咨明



李鴻章。屆期入閩監臨等語。江甯省城新復。現卽舉行鄉試。兩江士子。聞風雲集。商賈輻輳。一切稽查奸宄。鎮撫地方各事宜。均應如意籌度。著曾國藩督飭司道等官。妥為經理。毋得稍形疏懈。蘇境雖已肅清。惟善後各項事宜。仍須次第籌辦。李鴻章能否馳赴江甯入閩監臨之處。並著曾國藩悉心酌度。會籌妥辦。萬啟琛已抵江甯。如李鴻章不克入閩監臨。該藩司能否代辦。或咨明安徽學政朱

蘭代辦監臨事務。均由曾國藩李鴻章迅速籌商。奏明辦理。本日據都興阿奏。曾國藩當明阿挑撥赴甘各軍。請飭江蘇籌給餉糈等語。著曾國藩李鴻章將派出援甘各軍。先行籌給數月餉需。催令迅速前進。嗣後並著照舊供支。按月源源運解。毋令缺乏。將此由五百里各諭令知之。○又諭。文煜奏。准都興阿咨稱。穆圖善十營起程入甘。請將軍食餉項寬為籌備。惟慶陽糧臺。各省協餉。報解寥寥。

僅收過山東山西河東解到銀二十四萬兩。以供四五十營餉糈軍火。奇窘萬分。現在存款一空。卽供支都興阿雷正綰及慶環各軍。已覺顧此誤彼。穆圖善餉糈。實難兼顧。請飭該將軍將原有糧臺隨帶入甘。其原撥該營餉銀。卽徑解該將軍糧臺交納。並請飭山東山西河南四川各督撫。迅解慶陽協餉等語。所奏自係實在情形。著該將軍卽將原有糧臺隨帶入甘。一切收支散放。卽由該將軍糧

臺經理。以專責成。並著沈桂芬劉蓉懷遵前旨。按月如數撥解。務期源源接濟。以資飽騰。至慶陽糧臺。入不敷出。為數甚鉅。現在節屆深秋。各軍衣食無資。豈能荷戈力戰。著駱秉章張之萬閻敬銘沈桂芬。迅於前撥慶陽糧臺協餉之三十萬兩內。無論何款。移緩就急。各先籌解銀十萬兩。沈桂芬並飭河東道將甲子綱鹽課銀兩。趕緊分批解赴慶陽。以濟急需。正在寄諭間。據都興阿奏。西甯回匪猖

擬府城被圍。固原復陷。請將辦撫不實之員。嚴辦。及飭江蘇等省。將調撥赴甘各軍餉銀。按月運解各摺片。西甯回匪。前據玉通奏業已投誠。並親赴各處寺院村莊。解散鄉勇。何以此次青海盟長王公。及塔爾寺阿家呼圖克圖。復紛紛向都興阿軍營。呈稱回匪圍困西甯府城。懇請發兵拯救。可見回逆犬羊成性。反覆無常。玉通所奏投誠各情。全不足恃。著玉通將回逆何以復叛情形。迅速馳奏。現

在該逆勾通巴燕戎格廳撤回等。肆意焚搶。猖獗已極。而都興阿。雷正綰。分勦靈甯。蓮花城等處之賊。兵力難分。非得知兵大員。統帶勁旅。馳往勢難力挫兇鋒。前有旨令駱秉章撥兵援甘。並因官文奏調顏朝斌。諭令駱秉章飭令該員。迅赴鄂省。此時西甯軍務緊要。自應移緩就急。迅速赴援。著駱秉章於援甘兵勇外。另撥勁旅。於顏朝斌。江忠濬二員內。酌派一員統帶。馳赴西甯。力籌勦辦。並著都

興阿。劉蓉會商。檄令曹克忠。卽統所部。前往西甯協勦。如該總兵尚須會勦蓮花城之賊。一時未能前往。卽由都興阿。劄飭蒙古各王旗。同心禦侮。以資保衛。玉通身任西甯辦事大臣。責無旁貸。著就現有兵力。布置城守事宜。妥籌防勦。毋稍疏虞。至甘肅餉源。支絀萬分。駱秉章先後所派援甘兵勇。甘省萬難供支。著該督將調撥赴甘各軍。先行發給數月餉銀。飭令迅速赴甘。仍照舊按月供支。源源

接濟。固原復陷情形。前據雷正綰。恩麟先後馳奏。與都興阿此奏略同。楊炳銓以辦理撫局之員。前稱固原回匪投誠。情詞已多愴恍。此次藉口張家川喫緊。與雷正綰面商進兵。遽出危城。脫身遠遁。情節顯然。穆隆阿。成瑞。本在固城。所稱良回泣請出城。並送至平涼各節。種種支離。難保非聞警先遁。借詞掩飾。張集馨現抵涇州。卽著將此案主撫不善。及失事情形。徹底根究。據實叅辦。毋稍徇隱。將

此由六百里諭知都興阿。穆圖善賂秉章。張之萬。閻敬銘。沈桂芬。劉蓉。王通。文煜。並傳諭張集馨知之。○又諭都興阿奏請催令按察使赴任等語。署甘肅按察使劉于浚前在江西操練水師。未克赴任。現在金陵克復。巨逆殲除。江西省城防務已鬆。而甘省回逆披猖。軍務地方。在在需人整頓。署臬司楊炳銓辦理諸多未善。著沈葆楨卽飭劉于浚迅赴甘肅按察使署任。隨同都興阿等辦理防勦事宜。以重職守。其所帶江軍水師。卽著沈葆楨派員接管。不得藉詞奏留。致誤戎機。將此由六百里諭令知之。○補鑄江蘇江浦縣知縣。安徽建平縣知縣。南陵縣儒學。河南永甯縣儒學。各印信條記。從巡撫李鴻章。喬松年。張之萬請也。○戊午。諭議政王軍機大臣等。據賈楨等奏。風聞有綽號東霸天黃五。西霸天富六。北霸天曉七。凍豆腐張三。滾地雷蕭禿子。小光棍崔三。小霸王賈三。賽羅成韓六。與

前經拏獲之綽號南霸天來拴兒。結黨連盟。均係著名棍徒。常在銀庫左近滋擾。並在庫樓門外索詐庫兵。請飭拏辦等語。著步軍統領衙門按名嚴密查拏。審訊明確。卽著送交刑部按律懲辦。毋任一名漏網。將此諭令知之。○又諭恩麟奏陝回竄陷階州。請飭川陝官兵援救。並察看鹽固等處陝回情形。及請撥火箭各摺片。據稱蔡逆一股。由陝西略陽直撲甘肅徽成兩縣。經兵圍堵。退至略陽復犯階州。致將州城攻陷。現飭林之望馳往勦辦。而兵力單薄。請飭催各路援兵等語。前據劉蓉奏。敗匪紛竄階州。已派蕭慶高等追擊。並據穆圖善奏。賊由文縣竄至四川龍安府境。當經諭令賂秉章飛催唐友耕等軍探蹤迎勦。劉蓉飭蕭慶高。何勝必兩軍跟追。現在賊已攻陷階州。逆氛正熾。賂秉章迅卽檄令唐友耕周達武等。由階州一路前進。迎頭截擊。力挫兇鋒。劉蓉所派追賊之蕭慶高等

軍現在行抵何處。何以並未追及。致賊勢如此猖獗。著劉蓉嚴飭該員等迅速進兵。力圖掃蕩。如再不能得力。即將該員等嚴參治罪。甘肅彫敝之區。非賊之所注意。其意仍欲乘隙圖擾川陝階州境地。與川陝兩省毗連。川陝兵勇。果能越境勦賊。卽所以自固疆圉。駱秉章必能不分畛域。協力助剿。此股賊匪。本由陝省敗竄入甘。劉蓉何得以驅賊出境。遂爲了事也。至恩麟請令曹克忠徑赴階州。穆

圖善取道入甘。先除髮逆。再勦回匪各節。昨因都興阿奏。西甯被圍。已令曹克忠赴該處勦賊。而甯靈一帶。軍務緊要。疊次催令穆圖善赴都興阿軍營。此時均難改調。恩麟惟當就現有兵力。檄令林之望迅圖恢復。會合川陝援軍。併力兜擊。一切軍情。隨時咨商都興阿妥辦。昨諭駱秉章派撥勁兵。酌委顏朝斌等帶赴西甯。此軍如能取道階州。節節進剿。更爲得力。此外如有可撥兵勇。添派入甘之

處均著駱秉章酌度辦理。恩麟所陳鹽囤等處陝回情形。前已派張集馨赴甘查辦。該員現赴涇州。自必能遵旨相機辦理。其請撥火箭數千。赴陶茂林軍營一層。火器營火箭。疊經各路軍營調撥。所存無多。不敷撥解。山西省前有由京派往製造火器之員。此種火器該省必有存留。卽著恩麟咨明山西省撥用可也。將此由六百里諭知都興阿。駱秉章。劉蓉並傳諭恩麟知之。○引見四川等省補行

考取拔貢生。得旨周盛典等九名。以七品小京官分部學習。文邦從等六名。以知縣試用。○命大學士周祖培管三庫事。

大清穆宗繼天開運受中居正保大定功聖智  
誠孝信敏恭寬毅皇帝實錄卷之一百十五

大清穆宗繼天開運受中居正保大定功聖智  
誠孝信敏恭寬毅皇帝實錄卷之一百十六

秋

同治三年甲子九月己未諭議政王軍機大

臣等沈葆楨奏東路主客各軍勦賊獲勝廣  
信地面肅清暨洪幼逆等遠遁各摺片玉山  
之賊經官軍擊敗後竄擾江山界以出廣豐  
顧雲彩等於施村一路追勦沿途砍殺賊屍  
枕藉張岳齡等復由杉溪一帶擒斬賊首並  
老賊無算王德榜等由浙埭蕩入江擊賊於  
七都球等處收降二萬餘人陣斬洪沅珍李  
金信等花旗羣賊擁洪幼逆而遁王開琳追  
至鉛山界上斃賊多名黃少春王德榜復追

賊於陳坊湖坊等處沿途斬截不可勝計此股賊匪踉蹌逃遁匪勢寢衰著左宗棠楊岳斌沈葆楨等督飭江浙各軍盡力窮追毋令死灰再行復燃洪幼逆同李遠繼均薙髮扮作難民率餘黨分股竄光澤瀘溪一帶晝不落村莊夜用香火照行不循蹊徑避兵而行雖其氣衰竭而行蹤殊形詭秘設亡命窮奔與前股之賊會合則其賊又將復熾且殘匪尚有數千非零星落荒之賊無足重輕者可

比仍著檄令各軍奮力窮追務將洪李各逆剋日擒獲並飛飭沿路經過地方認明蹤跡一律訪拏以膺厚賞汪丁各逆現踞瑞金攻破民寨而分擾興國信豐會昌龍南崇義各界之賊分股回竄韓進春等馳往勦擊復分犯興國之上下謝雲都之仙露觀賊氛膺集勢殊死鬪必須迅圖掃蕩方免蔓延江省東路既已肅清正可騰出兵力專意西指以期厚集鮑超擬由甯都馳赴瑞金著左宗棠楊

岳斌等督飭全軍合力兜擊務將幼逆一股杜絕竄路各路餘匪殄滅淨盡並著徐宗幹毛鴻賓郭嵩燾嚴飭防軍會同追兵合力夾勦毋令紛竄皖南防務已鬆著曾國藩酌調數營會合江浙等軍將竄賊悉數誅鋤以竟全功前由江入粵之賊進逼南雄州城分竄翁源樂昌等處近日勦辦情形若何著毛鴻賓郭嵩燾隨時具奏以慰馳座將此由六百里各諭令知之○又諭穆圖善奏援甘之師

前隊已抵中部督率後路繼進現飭前途籌備行糧並遣撤傷病官兵一摺據稱該將軍派兵起程先期咨會劉蓉飛飭北山延安一帶州縣籌備二日行糧並委員前往催辦該將軍行抵三原接據延安府稟稱延安所屬各縣地瘠民貧所有麩麸等項難以籌辦等情查延安地方苦寒雖係實情然一二日之糧為數無多總可設法辦理現已飭令該府等趕緊籌備等語此項兵勇前隊已抵中部

若令停兵待餉。譁潰堪虞。著劉蓉速飭該府等。無論何款。趕緊設法籌辦。並飭鄰近州縣。幫同趕辦。籌備二日行糧。俾得迅速前進。以利軍行。毋得稍事延玩。致滋貽誤。該兵勇行抵甘境。所需行糧。為數甚鉅。著都興阿、雷正綰。迅飭沿途鄰近各州縣。趕緊設法採辦。所需價銀。俟山陝解到穆圖善軍營餉項。即照原價劃扣。以清款項。所有打仗受傷之馬隊官兵。即著穆圖善妥為遣撤。將此由五百里

各諭令知之。○刑部奏遵旨查辦秋審重犯。請予勾決。得旨。本年係停止勾決之年。據刑部將秋審各犯情罪尤重者。照前例摘敘案由。請旨正法。所有單開之梁亞有等十二犯。覈其情節。均屬法無可貸。著照擬即行正法。○以光祿寺卿潘祖蔭為都察院左副都御史。○以搞士守城深明大義。江西署南安府知府黎兆棠母馮氏。得旨嘉獎。賞二品封典。並給扁額曰教忠勵俗。○以江西東路勦賊

疊勝廣信全境肅清。賞總兵官李佑厚巴圖魯名號。道員王德榜以按察使用。餘加銜升敘。有差。予陣亡都司何明德、謝吉祥祭葬。世職加等。○予廣東橫板橋等處陣亡從九品馬振鸞祭葬。世職。武生廖龍飛祭葬。世職。如外委例。○庚申諭內閣。給事中王憲成奏。山東曲阜縣

聖廟。請飭敬謹勘修。並各直省學宮。請飭一體勘修。一摺。山東曲阜縣

聖廟。為

先師孔子舊里。各直省學宮。均為教育人才之地。自應隨時修葺。以肅觀瞻。著閻敬銘會同行聖公孔祥珂。即詣曲阜縣聖廟。將應修各工。敬謹勘估。次第興辦。其各直省

文廟。並著各該督撫。通飭所屬。敬謹查勘。有無應修要工。一併妥籌辦理。用副朝廷崇儒重道至意。○諭議政王軍機大臣等。前據毛

鴻賓奏廣東防務喫緊請將本年未解京餉全數截留當交戶部速議具奏茲據戶部奏遵旨議覆一摺廣東本年京餉共尚欠銀四十三萬五千兩曾諭毛鴻賓限於年內解齊此項關繫年內放款需用至為緊要惟念該省東西兩路防勦喫緊添兵募勇需項浩繁著照該部所請准將該省欠解一半地丁銀二萬五千兩鹽課帑息銀十六萬兩暫時截留一俟軍務稍鬆卽行補解其粵海關欠解

銀二十五萬兩仍著毛鴻賓懍遵前旨限於年內全數解京此係朝廷俯念地方緊要故為此暫行移緩就急之舉該督務將欠解關稅銀兩迅速依限報解以供支放毋稍遲延至廣東釐捐原議以七成協解江皖三成留備本省曾國藩屢以此項釐金為非所應得之款形諸章奏不啻再三嗣因江甯克復復行奏請停止當以江皖餉源未裕仍令照舊辦理此時廣東防勦喫重著於前項協解江

皖之七成釐捐銀內准該督撫再酌留四成以備粵省防勦之用毛鴻賓郭嵩燾惟當樽節動用以充軍實毋稍冒濫將此由五百里各諭令知之○以江西捐輸軍餉永廣浮梁縣學額十名瑞金縣六名○予江蘇常熟殉難廩生屈茂曾等暨婦女四十八名口分別旌卹如例○予江蘇宜興殉難文生儲士材妻湯氏旌表如例並建專祠○辛酉諭內閣前據吏部奏軍功開復知府沅保道員之前

任山東青州府知府王繼庭應令補繳捐復銀兩當經降旨依議茲據閩敬銘奏稱該員素著循聲實心任事現在山東善後各事悉資襄辦懇恩免繳捐復銀兩以示鼓舞等語王繼庭應繳知府任內降調捐復銀兩著加恩准其免繳嗣後不得援以為例○諭議政王軍機大臣等左宗棠奏浙軍出境追勦連獲勝仗現籌勦辦情形一摺此股逆匪由皖浙邊界上竄人數眾多經浙軍節節追勦斬



擒不少。入江後。復經王開琳等追勦於廣饒鉛山等處。其由茶山竄瀘溪地界者。僅一二千人。該軍截其尾股。現在江西金瀘新城一帶。兵力不少。著楊岳斌。沈葆楨督飭各軍接捕。以清餘孽。洪幼逆。李遠。繼等由江閩邊界山徑偷越。勢極窮蹙。著左宗棠。徐宗幹。督飭張運蘭。康國器。相機截勦。毋令闖入閩邊。楊岳斌等仍當飭軍跟追。毋稍疏懈。前由江入粵之賊。竄偏南雄等處。著毛鴻賓。郭嵩燾。妥

籌辦理。並將近日情形速行入奏。如續有竄入餘匪。務即督飭兵練迎勦。毋任深入為患。浙軍往返奔馳。傷病不少。著照左宗棠所請。暫留弋陽河口。稍為養息。各軍追奔逐北。十有餘里。備極勤劬。著准其彙入克復湖州安吉案內。一併保獎。洪幼逆踉蹌逃走。終必就擒。左宗棠惟當督飭閩浙諸軍。合力夾擊。毋任漏網。以竟全功。所請交部議處。著加恩寬免。前據御史洪昌燕奏。浙江海塘潰決。請速

籌款修理。當經降旨。交戶部妥速議奏。昨經戶部議准。將浙海關等稅酌撥動用。著左宗棠遵照部議章程。履勘興修。及此冬令水涸。潮汐不旺。易於告成。東南民命攸關。漕運大局所繫。諒該督必能仰體朝廷惠愛黎元之意。撙節帑項。妥速籌辦。其如何辦理情形。並著趕緊具奏。以慰馳廑。將此由六百里各諭令知之。○山東巡撫閻敬銘奏。遵派臬司丁寶楨帶兵赴直東交界。查拏蘇落坤匪黨多

名正法。地方業已安靜。報聞。○以太僕寺卿劉崑為江南鄉試正考官。翰林院編修平步青為副考官。○壬戌諭內閣。前因鄭親王端華革爵。應行呈繳鑲藍旗纛旗。當經降旨。交惠親王執掌。茲據宗人府奏。和碩鄭親王爵現經奉旨。令承志承襲。其鑲藍旗纛旗。應否移交承志執掌。○諭議政王軍機大臣等。前因麒慶奏。奈曼旗拏獲賊匪。仍請由旗解縣。當

經諭令理藩院傳知該王旗迅將所獲各犯派員解交朝陽縣審辦並諭麒慶飭令該縣酌派兵役迎護茲據理藩院奏稱轉據德木楚克扎布呈稱業將所獲賊匪派員解赴朝陽行至該縣迤北之三義站地方突有賊匪百餘持械放礮將所解賊匪劉得等十名全行劫去該縣並未派有差役迎護迨經呈報該縣轉將事主及蒙古官兵等綁拏示刑且被劫賊匪內有孫老三膽敢在縣街行走該

縣並不拏究等語此案賊犯既經解至朝陽縣境該縣因何不派兵役小心迎護致已獲賊犯被匪搶去轉將蒙古官兵等綁拏示刑而搶去賊犯敢在縣街行走又不捕拏若如所呈各情是該縣昏憤糊塗任聽盜賊肆行尚復成何事體著麒慶確切查明嚴叅懲辦一面派委妥員協同該地方官將逃犯劉得等十名嚴緝務獲毋令一名漏網此起搶犯聚眾至百餘名之多帶有礮械肆意搶劫亟

應及早捕獲並著麒慶認真查拏以靖地方譯漢原呈著鈔給閱看將此諭令知之○又諭雷正綰奏擊退撲營賊匪進逼蓮花城賊巢涇州防軍截剿固原竄賊獲勝及固原撫局復變鈔錄曉諭良回告示呈覽各摺片逆回於八月十八九二十等日分遣悍黨攻撲官軍營盤陶茂林堅壁不動用槍礮連環轟擊俟該逆力懈撤圍跟蹤追殺斃賊千餘雷正綰復於二十七八等日力疾周視各營嚴

陣以待俟賊匪將近鼓譟追呼該逆自相驚潰斃賊甚眾將士膽氣愈壯該提督遂商同陶茂林每日更番疊戰滾營進紮逼近蓮花城賊巢其由固原圖竄涇州之賊亦經留防各營剿敗餘匪旁竄鎮原一帶勦辦甚為得手即著雷正綰督飭陶茂林等奮力進攻務將蓮花城賊巢迅速攻拔毋稍鬆勁其固原旁竄之賊仍嚴飭劉正高等嚴密堵剿毋任狂竄雷正綰傷病漸愈仍著加意調攝以慰

塵念。前因都興阿奏。西甯被圍。已諭令曹克忠速赴該處。勦賊勢。難改調。儻西甯賊勢較鬆。雷正綰軍營。實在不敷分布。曹克忠一軍。即可飭赴雷正綰軍營。助勦。著都興阿。穆圖善。雷正綰。斟酌情形。相機辦理。固原回目張保瀧等。前已獻城就撫。朝廷寬其一綫之路。准予自新。派令張集馨馳往辦理。並諭令分別良莠。勦撫兼施。原非專主撫議。概令投誠。現在固原復陷。自應實力勦辦。以儆兇頑。該

提督奏稱。西南各回。尚未大受懲創。該回懷奸挾詐。非痛加勦洗。恐難革面洗心。蓮花城。張家川之匪。最為狡悍。必須悉數殲除。其乞撫良回。但屬可矜。自應分別辦理。並鈔錄安撫良回告示原底呈覽。所奏甚合機宜。即著會同都興阿妥為籌辦。毋得稍涉寬縱。余福象一員。前據劉蓉奏稱。該員情願赴甘助勦。當經降旨准其開缺。馳往穆圖善軍營。隨同勦賊。雷正綰著毋庸咨調。余福象赴營。以免

紛更。將此由六百里各諭令知之。○予浙江嘉興等處殉難候選訓導張晉燮等紳民婦女九十七員名口分別旌卹如例。○癸亥。賞普濟堂功德林。煮賑小米三百石。○甲子。諭內閣。恩合奏。廠地被水淹沒。佃戶併力開渠。請緩為徵租。一摺。錦州新開牧廠荒地。前經定限二年成熟徵租。本年六七月間。該處霖雨連綿。上游羊腸河水泛溢。到廠。兼之醫巫閭山南麓大小河渠之水。全行下注。以致禾稼被淹。秋成無望。據該佃民等公稱。情願併力雇備人工。挑挖河道。消洩積水。南流入海。請免徵一年之租。以恤農力等語。此項渠工。即著恩合飭令該佃民等。趁此冬令。未交積

水不至凝凍。趕緊挑挖。以資疏洩。並需力求深闊。使膏腴之地。永絕水災。農民得安耕種。其如何避高就下。擇地開渠之處。即著恩合妥為履勘。實力興辦。並著王明寶。德椿。督飭旗民地方官。認真彈壓。監視辦理。如遇挖

毀佃墾田地計畝銷租不許藉端阻撓致該佃民等本年秋成既失復辦渠工殊形苦累加恩著照大凌河三年起科之案其同治二年佃租荒段著於同治六年起科同治三年佃租荒段著於同治七年起科其續租荒地並由開種之年定限三年成熟起科徵租以歸畫一而恤農力○又諭官文奏請將候選知縣改補守備等語五品頂帶花翎候選知縣劉金榜經官文調營察看該員打仗奮勇

吏治未諳文職不甚相宜武職可期勝任劉金榜著照原品頂帶仍留花翎改歸湖北以營守備補用○諭議政王軍機大臣等官文奏髮捻膚聚蘄水圍逼官軍營壘並分股竄擾蘄州麻城等處一摺光羅髮捻晝夜東趨勢甚剽疾而羅田踞逆亦欲與蘄水一帶踞匪句合經楊朝林成大吉等分路攻擊將鴨子畈七區匡家河等處賊巢埽平敗賊悉竄蘄水蘄州與髮捻合股盤踞該逆乘霧出隊

環攻官軍營盤石清吉等禦賊陣亡富森保衝出重圍成大吉一軍及飛虎七營仍為賊匪層層圍裹未能驟出官文已調姜玉順等營赴下游蘄水巴河會合李成謀相機進剿以解成大吉之圍為今之計非先解此圍不能取勝著即督飭李成謀等迅速進攻力解重圍妥籌進取官文前調蔣凝學六營赴蘄水駐紮仍請調劉連捷一軍赴楚兜剿本日適據喬松年奏張曜郭寶昌等軍現駐金家

寨等處東西均可兼顧劉連捷等軍行抵潛山太湖暫為駐紮聽候曾國藩調度前諭此軍到皖即歸喬松年調度現在楚省軍情甚緊著曾國藩喬松年飛檄劉連捷一軍速赴湖北即歸官文調遣以厚兵力僧格林沁現駐商城如匪蹤橫出河南即著督飭馬步各隊認真勦擊陳國瑞等軍能否分援蘄水合力解圍並著迅速籌辦無分畛域總之此股賊匪人數尚眾逆首陳得才馬融和倪瀧懷

吳義汰均在蘄水廣濟一帶。非楚皖豫三省通力合作。不能殲滅。著僧格林沁等會籌辦理。以紓朝廷南顧之憂。湖北水陸兵力。不為不厚。現又調蔣凝學劉連捷等入楚。該營均屬勁旅。惟在調度得宜。方能收指臂之效。官文於此股賊匪竄擾。未能迅即撲滅。此勦彼竄。兵力頗受賊匪牽掣。又復屢次敗衄。損失名將。若不振刷精神。力圖勦賊。自問當得何罪。官文另片奏請留馬步各隊助勦等語。溫

德勒克西等馬步各隊。現紮宋埠等處。經官文飭令覘賊所向。力清後路。再赴蘄水蘄州會勦。著照所請。暫行留楚。俟軍務稍鬆。兵力稍裕。仍令赴甘。勦賊不得藉詞逗遛。曾國藩前保之布政使彭毓橘。劉連捷。按察使吳坤修。黃潤昌。易良虎。陳湜。平日於吏治地方。能否講求。何人足以勝方面之任。著再行察看。據實具奏。以備錄用。將此由六百里各諭令知之。○又諭恩麟奏上年階州成縣疊次堵

擊川髮逆匪守城出力。靜甯勦回獲勝出力。暨靜甯隆德擊賊解圍。疏通道路出力各員。分別開單請獎。各一摺。甘肅階州等處。均有逆匪滋擾。該員弁等。如實係節年防勦出力。自應酌予獎敘。惟前據恩麟奏稱。階州現被陝匪攻陷。並疊經雷正綰等奏報。隆靜道路尚待疏通。此時若遽行給獎。難保無冒功邀賞者。濫廁其間。且令奮勉出力之員。未經覈實。殊不足以昭公允。著都興阿。雷正綰查照

恩麟單內所開各員。逐加綜覈。如有稍涉冒濫之處。即行刪減。其實在出力員弁兵勇。並由都興阿等暫行存記。統俟階州克復。再行彙案請獎。仍著恩麟懷遵前旨。檄飭林之望。迅圖克復階州。會合川陝援軍。併力兜擊。務將陝匪悉數就地殲除。毋任滋蔓。雷正綰現已進逼蓮花城。賊巢即著督飭陶茂林等軍。速籌攻拔。並嚴檄涇州留防諸營。將固原旁竄賊匪。實力扼勦。就地誅鋤。即可次第規復。

固原移軍隆靜疏通驛路一切軍情仍著雷正綰恩麟隨時咨商都興阿妥籌辦理恩麟請獎摺單各三件著鈔給都興阿雷正綰閱看將此由五百里諭知都興阿雷正綰並傳諭恩麟知之○以力戰解圍賞還湖北總兵官梁洪勝頂帶○予湖北蘄水陣亡總兵官石清吉祭葬世職加等入祀昭忠祠並於直隸沙河縣原籍暨安徽廬州湖北黃州德安蘄水立功各地方建立專祠副將江星南等祭葬世職加等附祀蘄水縣石清吉專祠○

乙丑

孝慈高皇后忌辰遣官祭

福陵○以神靈顯應加湖南善化縣朗公普濟真君封號曰綏順○諭內閣前因都察院奏貴州紳士內閣中書周之翰等呈控提督沈宏富縱賊殃民及總督勞崇光袒護私人各節當經諭令張亮基據實查奏茲據該署撫奏稱查明署提督沈宏富在黔勦賊疊著戰

功其在遵義甕安先後買民女二人為妾訪無搶掠婦女確據惟攻克螺螄堰賊巢及鼎山城旺草勦賊後未免居功其部將惟全祖凱尚知自愛餘皆漫無紀律因而土棍游匪皆冒充沈練搶劫成風開州之變實由所部商肇淮王國榮先後激成尚非全祖凱等之過引賊攻開州實係國首晏景青所為亦與黃安邦無涉沈宏富與趙德昌雖積不相能實無遣卒行刺之事所稱沈練救賊以及劫

奪松坎釐金並燒房助賊各節皆屬傳聞無據之詞其哨官藍文蔚投賊及部將吳正連等通賊各情亦查無其事總督勞崇光家丁郭五郭七隨該督由楚入黔服役日久為該督素所親信沈宏富曾否與之換帖無從查悉現在郭七患病郭五亦將回籍各等語沈宏富以統兵大員當此黔省軍務喫緊應如何激勵將弁力圖振作雖查無縱寇殃民實據究因不能約束兵勇以致眾議沸騰本應

從嚴懲辦。姑念該總兵打仗素稱勇往。在黔亦尚有戰功。沈宏富著毋庸署理提督。仍責令帶兵勦賊。以觀後效。貴州提督卽著趙德昌暫行署理。郭五郭七雖查無與沈宏富換帖確據。惟為該督素所親信。難保不倚勢生事。擅作威福。著勞崇光勒令卽速回籍。不准在貴州逗遛。○諭議政王軍機大臣等。沈葆楨奏克復甯都。出力請獎一摺。另片奏瑞金克復甯都。解圍各情。覽奏均悉。逆匪偽天將丁汰洋攻陷甯都。擾及贛縣之添子壩一帶。經韓進春督隊馳至。先敗其斷後之賊。掃除北鄉賊館。督軍攻西門小西門。賊開南門涉河而遁。官軍追抵河干。沿途溺斃殺斃不少。當將縣城克復。丁逆遁往何處。著飭韓進春實力追剿。一鼓撲滅。湖逆由陳坊分兩股。一由大路向雲際關。一由小路向大呂口。洪幅瑱馬隊尚多。魏喻義扼之於雲際關。斃賊極多。收降三千餘人。該逆越唐坊入石城境。席

寶田已督隊前進。著左宗棠楊岳斌沈葆楨督飭席寶田魏喻義等軍合力追擊。務將洪幼逆全股悉數殲除。毋留遺孽。會昌等練勇已將瑞金縣克復。康逆圍甯都甚急。聞鮑超兵至。解圍而去。到處句添賊黨。冀圖接應。湖逆盤踞對河之東山壩等處。鮑超現已追及。著卽檄令緊躡賊蹤。毋令與洪幼逆句合。以期早日肅清。楊岳斌現駐何處。病勢諒已輕減。著卽趕緊具奏。以慰廑繫。將此由六百里各諭令知之。○又諭勞崇光等奏楚黔官軍擊退銅仁松桃逆匪。請飭周洪印由荔波會剿。並攻克大定府屬免場賊巢各摺。包茅仙股匪盤踞松桃廳屬之太平營大坪場。復分股竄擾長坪亢及銅仁府屬卜口場等處。經楚省周洪印保慶等軍會同黔軍將兩路賊營踣毀二十餘座。乘勝進攻太平營等處。立將賊巢鎗平。斬馘甚夥。該逆由孟溪竄去。復經官軍夾擊。餘賊四散。廳境肅清。勦辦甚

為得手。惟首逆包茅仙迄未成擒。該逆分擾黔楚川邊。歷年為數省之患。一經免脫。必至餘燼復燃。著勞崇光、張亮基飭令陳昌運會督松桃文武設法購緝。嚴拏務獲。並將餘匪挖捕淨盡。毋任漏網。松桃毗連四川秀山等處。有無餘匪竄入包茅仙難保不逸入川疆。並著駱秉章飭令酉秀防兵會合黔軍實力捕拏。以清數年巨患。李七股匪自踰伏黔邊。疊經楚粵官軍會剿。勢已窮蹙。乃楚軍周洪印因防本境中道折回。粵軍楊廷桂復因水土不服。全隊撤去。以致日久稽誅。現在該逆竄至荔波縣屬拜讓地方。全祖凱一軍兵力不敷。勦辦而貴定縣城尚為另股潘名傑占踞。恐其互相勾結。必至蔓延。著憚世臨懷遵前旨。飭令周洪印迅統所部由荔波一帶進剿。並著張凱嵩飭令楊廷桂另選精銳迅速入黔。會同黔楚官軍併力夾擊。以期及早殲除。毋得稍分吟域。苗匪竄踞大定府之新免

場等處。署知府劉正朝等督練攻破賊巢。擒斬千計。該匪現分竄郎岱水城平遠各廳州境。仍著飛飭各屬一體集練。兜擒務期盡絕根株。毋留餘孽。另片密陳副將曹元興練勇見賊即潰。天柱被陷並不救援。縣城克復復捏稟冒功。並有通賊情事。即著該督撫等切實查明。設法弋拏正法。毋得以操之太切。恐激變端。遂令日久養癰貽害。此時秋稼業已登場。仍著飭令各該鎮將規取尚大坪壩芒等處老巢。埽穴擒渠。肅清邊圉。張亮基仍當力疾從公。遇事奮勉。不可萌頽退之志。所有自請罷斥之處著毋庸議。將此由六百里各諭令知之。○又諭前因文盛等奏酌派東兩盟兵丁前赴烏嚕木齊等處助勦。諭令麟興、車林敦多布、文盛、阿爾塔什達將該官兵口糧馬乾及應需鍋帳器械等件妥為籌畫。茲據麟興、車林敦多布奏稱車臣汗部落蒙兵二百五十名業經酌給器械軍火至文盛等



咨令覈其人數發給前赴烏魯木齊所需馬匹口食一切款項現在庫項支絀無款可籌請飭庫倫辦事大臣照西兩盟辦法自行墊給等語麟興等所奏自係實情惟烏魯木齊等處待援甚迫急需此項蒙兵趕緊前進協同勦洗自應速籌接濟以利進行著文盛阿爾塔什達卽照西兩盟章程無論如何為難將該官兵前赴烏魯木齊所需馬匹口食一切款項設法自行墊辦並著麟興車林敦多

布文盛阿爾塔什達懍遵前旨知照沿途經過各城大臣先期豫備隨時給發以濟要需將此由五百里各諭令知之又諭麟興奏遵旨豫籌立界事宜並請帶兵前往請飭晉省撥解餉需廣鳳等奏俄人侵擾阿勒坦淖爾烏梁海遊牧各摺片前據麟興等奏請飭庫倫將分界原圖咨送伊犁覈辦當經諭令文盛速將原圖徑送明誼等以備與俄使會議茲據該署將軍奏稱詳查唐努烏梁海實

無唐努鄂拉達巴哈地名其西兩部落盟長地方因遊牧窄小無地可讓未能豫籌安插將來定議分界時如唐努烏梁海遊牧內有應分給俄夷處所其人戶應移往何處安置均應先事豫籌著明誼迅卽咨催文盛等將雍正五年已定界址圖誌剋期送交俟該俄使到塔卽按原圖與之指明辯論如能按照總理各國事務衙門前奏令讓出數百里安插內徙之眾較為妥善抑或仍在西兩盟部

落地面設法籌商安插卽由麟興車林敦多布妥籌辦理如俄使堅執不允西兩盟部落又無閒地可以安置卽當與俄使反覆言明所有分給該國地方原居人戶仍照東界議定章程照常居住遊牧不得驅逐越境以免紛更至俄國議分界址自沙賓達巴哈界牌末處起順山嶺先往西行應若干里至某地名止後往南行至唐努鄂拉達巴哈俱係由何地名經過並唐努鄂拉達巴哈是否卽烏

里雅蘇台所屬唐努烏梁海地面並著明誼等與俄使會議時先行逐一指明繪畫圖誌開載兩國應行堆立鄂博處所以便分界時憑圖定議即由麟興等與明誼妥籌辦理麟興俟明誼換約事竣回城即行前赴沙賓達巴哈一帶建立界牌所請隨帶委員岳嵩武等及攜帶關防前往之處均著照所議辦理至請飭綏遠城揀選擡槍等件並調宣化等鎮兵丁隨往堆立鄂博一節屆時換約事竣

分界已定諒不至別啟釁端如所帶兵衛過多或轉滋俄人疑慮著麟興於存營兵丁內揀帶百餘名前往以壯觀瞻其擡槍等件均可無庸調撥兵數既少所需口糧無多本日已諭知沈桂芬撥銀一二萬兩迅由歸綏道轉解矣俄人闖入阿勒坦淖爾烏梁海兩旗游牧地面欺陵擾害業經廣鳳等知照明誼等辦理即著明誼行文西悉畢爾衙門令將兩旗游牧內之俄官等先行調回並將來分

界後原住人眾或照廣鳳等前奏暫令在北八臺等處妥為安置之處並著明誼廣鳳奎昌迅籌會辦將此由五百里各諭令知之○又諭現在麟興等先期前往沙賓達巴哈一帶等候俄人分界堆立界牌鄂博官兵人等鹽菜口糧需用緊要著沈桂芬無論何款速籌銀一二萬兩解交歸綏道衙門轉解烏里雅蘇台以備應用毋稍延玩將此由五百里諭令知之○新授陝甘總督楊岳斌奏遵查

陳汶炳等降眾經鮑超挑選精銳一千八百人為啟化副中營令陳汶炳統帶以張學明陶金會為哨官均知奮勉圖功並無反側其餘六萬降眾陸續遣散回籍亦均安靜報聞○科布多參贊大臣廣鳳奏請改令奎昌往立界牌得旨仍著廣鳳前往遵旨妥辦廣鳳起程後所有該城邊防事宜即著移交奎昌暫行代辦○以故杜爾伯特貝勒雅林丕勒多爾濟子德勒克瓦齊爾襲爵○以克復江

西寧都縣城。予副將韓進春以總兵官簡放。○以貴州貴陽擊退賊匪。暨克復開州。修文各城。賞知府林桂清。巴圖魯名號。餘升敘有差。○以貴州清鎮等處勦匪出力。復參將林懷清。遊擊林貴祥職。並升敘有差。○以貴州貴定縣城被賊竄陷。革署知縣王錫祿。署典史萬瑩。署都司帥承恩。千總宣國恩。外委劉世德職。仍留營。○予貴州大定陣亡府經歷李有容。千總曾連科。祭葬。世職加等。○予江西弋陽陣亡武舉江雲龍等九十一名賞卹加等。○

上以孟冬時享

太廟。自是日始齋戒三日。○丙寅。諭議政王軍機大臣等。御史富稼等奏。訪聞把持倉務之棍徒。請嚴拏懲辦一摺。據稱風聞北新倉有著名棍徒孫三。倚該倉滿監督慶春之家人。蒙官舞弊。糾花戶李順為心腹。本年四五七等月。孫三季順陸續盜出粟米一千七百餘

石。並盜御用黃老米一百五十石。以二十石送該倉滿監督慶春食用。並盜御用粳米二百石。九月間開放正白鑲白兩旗並包衣甲米綠營兵米。孫三等勒令同日闔廩。俱以六斗放給。共計餘米一千六百餘石。陸續運出分肥。請飭查拏究辦等語。天庾重地。豈容著名棍徒。任意偷盜。若如該御史所奏種種舞弊各情。實屬不法。已極。著步軍統領衙門順天府五城倉場侍郎。迅速派委官役。按名查拏。務獲究辦。監督慶春有無收受孫三米石。並任聽家人蒙蔽等情。並著倉場侍郎查明具奏。原摺均著鈔給閱看。將此各諭令知之。○賞五城貧民棉衣銀。○丁卯。

孝敬憲皇后忌辰遣官祭

泰陵。○

上以孟冬時享

太廟。前期親詣行禮。○諭內閣。前因沈桂芬奏前任廣東布政使文格行至山西途次患病。

呈請回旗調理。據情代奏。當有旨。賞假一月。調理。茲據該撫奏稱。文格假期將滿。病難速痊。可否准其回旗調理等語。文格著准其回旗調理。

大清穆宗繼天開運受中居正保大定功聖智  
誠孝信敏恭寬毅皇帝實錄卷之一百十六

大清穆宗繼天開運受中居正保大定功聖智  
誠孝信敏恭寬毅皇帝實錄卷之一百十七

同治三年甲子冬十月戊辰朔享

太廟遣醇郡王奕譞恭代行禮○遣官祭

永陵

福陵

昭陵

昭西陵

孝陵

孝東陵

景陵

泰陵

泰東陵

裕陵

昌陵

昌西陵

慕陵

慕東陵○遣官祭

文宗顯皇帝

孝德顯皇后暫安寢殿○遣官祭

端慧皇太子園寢○

上詣綏履殿問

慈安皇太后安○平安室問

慈禧皇太后安○至丁酉皆如之○頒同治四年

時憲書○諭議政王軍機大臣等○前據總管

內務府大臣奏○粵海關欠餉甚鉅○請飭部妥

議章程○當經諭令戶部迅速妥議具奏○茲據

奏稱粵海關指撥一切款項○該監督如能移

緩就急○將各處要款陸續勻解○亦何至積欠

累累○至於此極○且戶部於上年奏停洋稅親

填簿及題本案內○行令各關從第一結起○按季造具四柱清冊送部○乃該關奉文以後○迄今年餘○應解之款○既不認真籌措○應造之冊○又復置若罔聞○現在該關監督業經更換○請飭兩廣總督督同前任粵海關監督毓清○迅速辦理等語○毓清於應解要款○既以徵收短絀為詞○屢催罔應○至於四柱清冊○造報之遲速○與餉項之盈絀○毫無關涉○何以遲至年餘○亦復並未報部○似此疲玩因循○實堪痛恨○著

毛鴻賓督同毓清○將該關近年收支各款○迅速查明○第一結以前實存若干○自第一結起○每結四柱各若干○截至新任監督師曾接任之日止○分結造具清冊○即行送部○並著師曾將接收實存若干○於到任後迅速奏報○以憑查覈○儻該前後任交代稍有不清○即著兩廣總督據實奏參○其常洋兩稅如何分晰○常稅應如何定額○一併查明○戶部前奏趕緊奏明辦理○不准稽延○至該關所欠各處協餉○著照

部議免其補解。其戶部京餉除上年欠解十萬兩。應與陳欠銀四十萬兩一併緩解外。所有欠解本年京餉銀二十五萬兩。著准其緩解銀十五萬兩。尚有十萬兩。限該關監督於年內分起解齊。如再逾限不解。或解不足數。即著戶部照案奏。至欠解工程處餉銀二十七萬兩。仍著該關監督遵照戶部前奏章程。按限報解。經戶部此次分別覈辦之後。是該關奉撥各款業已比前輕減。著粵海關監

督速將內務府公用一款陳欠陸續補解。本年應解銀兩。務於年內解齊。嗣後並著按季源源報解。如再仍前延誤。即由內務府查明奏。將此由五百里諭知毛鴻賓並傳諭毓清。師曾知之。尋奏四柱清冊趕緊造齊送部。常洋兩稅現因土貨多由洋船運送。常稅為洋稅所併額難懸定。俟二三年後體察情形再行奏請定額。下部議從之。○又諭前據都察院奏山東在籍遊擊常啟雲呈控荷澤縣

監生王克一唆訟陷人聚眾築寨等情。當經諭令劉長佑密拏懲辦。茲據劉長佑奏稱派員會查王克一並未潛匿東明縣境。聚眾築寨伊父子素日安分。與被控武生王峰即王瑞峰等均無為匪從逆。唆訟陷人情事。王克一投案請質。具見心跡坦然。常啟雲與王克一平日挾有訟嫌。且據該委員等稟稱。常啟雲曾經伊父呈首不孝多款。伊子常國興在籍辦團種種妄為。皆由常啟雲主持助惡。茲

復飾詞赴京妄控。實屬居心險惡。原被告皆籍隸山東。請飭就近提訊等語。常啟雲所控王克一助逆縱匪各款情節重大。既據劉長佑查明王克一係安分良民。若非將該原告提案三面質明。不足以折服其心。常啟雲平素既不安本分。輒敢挾嫌捏詞妄控。心術險詐。可惡已極。此等刁風斷不可長。亟應從嚴究辦。著閩敬銘確查常啟雲現在曾否回籍。提集案內應訊人證。就近派員審訊。從重懲

辦母任奸徒狡展以成信讞原摺單著鈔給閱看將此諭令知之尋奏訊明王克一等並無聚眾築寨從逆縱匪等情常啟雲誣告叛逆擬發往新疆效力贖罪照新章改撥各省駐防酌量安插下部議從之○又諭僧格林沁奏督軍進剿西竄股匪偏賊東趨官文奏髮捻東趨與蘄水之賊勾合現籌辦情形各一摺逆匪盤踞新店雙山門等處經陳國瑞等軍擊敗遁入楚疆僧格林沁進紮商城而捻匪張總愚率眾回竄官軍敗之於木子店復向西南白朶一帶狂奔陳國瑞姜玉順等督軍扼剿疊有斬擒該逆已東竄上巴河蘄水一帶與下游大股髮捻勾合是楚北西路可保無虞而逆勢既歸併一處則下游倍形喫重皖楚之交山重水複馬隊萬難施展著官文卽飭姜玉順蕭河清等軍銳意東行會合成大吉之軍內外夾擊務將此股賊匪就地殲除母任再行西竄其劉連捷一軍並

著官文飛檄催提飭令自東而西與鄂軍兩面兜圍大彰捷伐成保陳國瑞扼紮羅田遏賊西北竄路李濟清等水師嚴扼辛家沖一帶以防搶渡卽著僧格林沁官文分飭各軍嚴密堵禦以備抄擊僧格林沁現已移營黃岡之上巴河擬俟賊蹤竄近平原督率馬隊追擊該大臣惟當穩慎進取毋稍疏虞將此由六百里各諭令知之○又諭楊岳斌奏滙陳回籍募勇籌備餉項情形一摺據稱甘省逆回黨與眾多心志齊一必得一二萬生力之師方能挫其兇鋒惟舊部本屬水師並無陸隊此次來江勦匪僅由金陵大營抽帶千餘人勢難遠調籌畫再三計惟有親赴楚南募勇擬卽與疾南歸先遣得力營官認真招募精勇七八千人迅速成軍卽可趁此訪醫調理就近省親至招募經費及製辦軍械等件所需甚鉅擬於各近省設法籌撥以濟急需並請飭安肅道蔣凝學署皖南鎮總兵唐

義訓兩軍赴甘助勦等語。楊岳斌現已回江  
西省城。力疾啟行。具見勇於任事。所籌各節  
亦具周妥。著准其回籍省親。並訪求舊醫。趕  
緊調治。一面分遣得力營官。赴各路募勇。俟  
募有成數。加以訓練。統帶赴甘勦賊。蔣凝學  
唐義訓二員。在皖南北帶兵。素稱得力。且蔣  
凝學係甘肅本任道員。前經官文奏調赴靳  
水助勦。著俟成大吉解圍後。卽飭帶所部赴  
甘。並著曾國藩卽飭唐義訓酌帶勁兵。先行

赴甘。均歸楊岳斌調遣。該二員所需行糧。著  
曾國藩寬為籌備。其所駐地方。應否另派將  
弁分守。並著酌度妥辦。沈葆楨於楊岳斌之  
行。允籌銀七萬兩。諒可不誤行期。此外所需  
仍多。著官文、左宗棠、毛鴻賓、吳昌壽、徐宗幹  
郭嵩燾、惲世臨各於本省籌撥銀八萬兩。惲  
世臨並於東征局撥銀四萬兩。李鴻章籌撥  
銀十萬兩。均須剋期如數解交楊岳斌行營。  
以便該督迅速募勇起程。該督撫等均當仰

體朝廷軫念西陲之意。速為籌解。不得稍有  
膜視。致誤師行。楊岳斌抵甘後。應如何源源  
接濟之處。本日已諭戶部速籌議奏矣。劉于  
浚前有旨令署甘肅按察使。並令其迅赴新  
任。著楊岳斌、沈葆楨卽飭該員趕緊起程。毋  
稍延緩。將此由六百里各諭令知之。○福建  
巡撫徐宗幹奏。汀軍出境勦賊獲勝。並請免  
林文察處分。得旨著卽飭令張運蘭等軍分  
道嚴密遏勦。務將股賊盡殲。毋令擾及完善。

林文察被參赴調延緩處分。著加恩寬免。○  
廣西巡撫張凱嵩奏。分勦思恩南甯匪徒。獲  
勝得旨。仍著飭令易元泰等軍乘勝進攻。將  
首要各犯盡數殲除。毋稍鬆懈。○命刑部尚  
書綿森、戶部左侍郎吳廷棟馳往察哈爾查  
辦事件。○己巳。以河東各工修護平穩。頒中  
河廳  
九龍將軍廟扁額。曰德普榮光。上南廳  
大王廟扁額。曰迴瀾顯佑。命河道總督譚廷



襄恭詣記謝○調正藍旗護軍統領托雲為正白旗護軍統領以正藍旗漢軍副都統安興阿為正藍旗護軍統領○調正白旗蒙古副都統額勒和布為正黃旗滿洲副都統以御前侍衛西拉綢阿為正白旗蒙古副都統○改烏魯木齊提督文祥名為文祺○賞故額駙恩醇銀四百兩治喪○庚午諭議政王軍機大臣等有人奏直隸肅甯縣知縣黃惠廉任用刑書于謙光攬權舞弊包庇賊匪請飭查辦等語州縣為親民之官如所參黃惠廉信用惡書袒庇盜匪得賊釋放各款如果屬實大干法紀著劉長佑按照所參確切查明據實參辦盜匪黃澱恩等並著一併嚴拏懲辦原摺著鈔給閱看前有人奏參贊皇縣知縣李傳黻貪鄙不職當經諭令該督查明參奏茲復有人片奏李傳黻前在贊皇任內用騎馬賊為捕快今調任饒陽又任用匪徒王守本為阜頭種種不法請飭嚴查著劉長

佑彙入前參案內一併查明具奏原片並著鈔給閱看將此諭令知之尋奏審明黃惠廉被參各款均無其事李傳黻在贊皇任內查無招賊充捕縱匪殃民之事饒陽任內被參各節亦均訊屬子虛惟捕役私雇眼錢未經回明本官與私帶白役無異李傳黻失於覺察應請交部議處從之○又諭都興阿奏豫籌出關勦賊情形一摺據稱體察刻下情形出關一節非馬隊不能得力請飭吉林挑兵一千名黑龍江挑撥官兵及西丹間散一千名等語吉林黑龍江馬隊節經各路軍營奏調為數不少且因東三省邊防緊要亦經准該將軍等所請停止再調惟回疆事體重大將來都興阿進兵必須馬隊方能制賊死命著該將軍等酌量情形如尚可以抽撥即著按照都興阿所請數目先行挑備聽候都興阿調遣現在東南軍務大定各路所調馬隊陸續撤回即可以補此缺額並著該將軍等

斟酌辦理。將此由五百里各諭令知之。○又諭都興阿奏逆賊撲犯營壘。官軍擊勦獲勝。並籌議勦辦新疆回匪各摺片。送首馬叱咤糾集馬步賊匪。撲犯官軍營壘。經杜嘎爾督飭托克屯揮軍迎擊。斃賊七八百名。勦辦尚屬得手。第該逆狡黠異常。探知我軍地廣兵單。難保不再來窺撲。且甯夏之賊復於上游放水。洩浸滿城。尤應亟籌宣洩。著都興阿督率杜嘎爾等嚴密防勦。毋稍大意。一面催令定安統帶練勇。搶奪大壩。廂口。趕緊設法宣洩水勢。以保危城。現在楊岳斌回籍。選募精勇七八千名。赴甘尚需時日。都興阿督軍勦辦甘回。正當喫緊。非俟楊岳斌大支勁旅到甘。萬難出關。勦賊。所請飭派明慶等統帶所調馬隊來甘助勦。及請飭僧格林沁抽撥官兵交成保統帶之處。屆時再降諭旨。將此由六百里諭令知之。○廣州將軍瑞麟等奏。江西竄賊擾連粵境。旗營籌備防勦。得旨據奏。

籌備各節。甚屬周妥。旗營兵丁。如果訓練精捷。洵足備緩急之用。仍著偵探賊蹤。會商督撫妥為籌辦可也。○河南巡撫張之萬奏。署甯陵令方恩植走失。得旨方恩植雖患痰迷。亦何至走失無蹤。有無別故。仍著該撫飭屬訪查下落。據實具奏。尋奏提訊方恩植家丁。據供方恩植實因舊疾痰迷。復發走失無蹤。並無別故。報聞。○督辦甘肅軍務署陝甘總督都興阿奏。請調陝西延榆綏道常瀚兵部

主事崇綺。陝西試用知縣恩元。赴營差委。允之。○辛未諭內閣。現值天氣漸寒。實錄館人員。朝夕恭纂書籍。著加恩於例支柴炭外。十一月十二月正月每月賞銀五十兩。在廣儲司支領。○又諭前因新疆換班各員。延不赴任。曾經降旨嚴催。至今已逾數月。僅據保恆奏稱。吐魯番領隊大臣扎克當阿。及新調古城領隊大臣惠慶。行抵巴里坤地方。其伊犁領隊大臣阿隆。阿烏魯木齊領隊大

臣德克吉訥。巴里坤領隊大臣訥爾濟。哈密幫辦大臣明瑞。葉爾羌幫辦大臣常續。喀什噶爾辦事大臣常明。和闐辦事大臣奎章。烏什辦事大臣慶明。阿克蘇辦事大臣崇恩。及新授伊犁參贊大臣前任古城領隊大臣聯捷等。均尚未據報到任。現在新疆軍事孔亟。防勦需員。豈容無故逗遛。致曠職守。著各該旗查明以上各員。如有尚未起程者。卽行嚴催趕緊起程。其業已起程之員。並著沿途各將軍都統督撫等一體嚴催。飭令迅赴新任。如再遷延觀望。卽著各該旗及沿途各將軍都統督撫等指名嚴叅。○又諭伊犁將軍常清。自到任以來。於邊防事務。一切未能整頓。本年庫車等處回匪煽亂。該將軍有統轄各城之責。事前既未能防範。事後又未能設法趕緊撲滅。實屬庸懦無能。大負委任。且有被叅謬妄貪婪各款。常清著卽行革職。仍留伊犁聽候查辦。○又諭左宗棠奏查明失事武

員。分別定擬。開單呈覽。一摺。咸豐十一年間。浙江省城失守。各屬相繼淪陷。失事文職各員。業經該督奏請分別懲辦。其失事武員。自應按律定擬。茲據該督奏稱。各該員或兩次失陷城池。咎無可辭。或著有微勞。功不掩過。或暫代人員。並未接印。或隨同攻克。並復鄰封。情節不同。自應分別輕重。各當其罪。所有單開之已革前署處州鎮總兵台州協副將特保。已革前杭州協副將王邦慶。均著發往軍臺効力贖罪。前代辦撫標中軍參將衢州城守營都司林奎著革職。免其治罪。已革前提標中軍參將博忠著免其治罪。○諭議政王軍機大臣等。惲世臨奏楚師防勦黔匪。肅清沅晃邊境。及籌防江西竄賊情形。暨包茅仙被擒。自刎各摺。片。黔匪勾結下竄。擾及湖南。沅晃邊境。經周洪印等分路勦擊。各有斬獲。沅晃境內。已無賊蹤。戈鑑等復由邦洞一帶越境進勦。連破賊巢。仍著惲世臨督飭各

軍實力扼擊以勦為防。毋稍鬆懈。前因李七股匪由王家司竄至荔波縣屬拜讓地方。黔省兵力不敷。勦辦曾經諭令惲世臨飭令周洪印迅統所部由荔波一帶進勦。現在該撫飭周洪印酌派數營駐黎靖之交。埽蕩天柱各匪。卽著該撫酌量緩急相機調遣。江西之賊勢窮紛竄。現在瑞金雩都已復。鮑超率師直下。步步追躡。正須楚軍會同夾擊。方可收聚殲之效。惲世臨現飭趙煥聯等分扼上猶

龍泉。陳士杰等軍照舊布置。所籌尚妥。卽著飭令各軍與江省官軍互相聯絡。迅殄賊氛。包逆被擒自刎。黔楚邊界已除一巨患。該逆倡亂多年。恐不免餘匪潛匿。仍著飭令在事各員弁實力搜捕。以清餘孽。將此由五百里諭令知之。○又諭前據武隆額德明奏叅常清劣蹟多端。聲名狼籍。嗣又據武隆額奏查出牧廠虧短馬匹各摺片。據稱常清居官辦事軍民同深憤恨。甚至有常口袋常錢串子

之號。揀選協領任意黜陟。徇庇解任聽審之巴哈善。意存開脫。羅世瑤一案。有該將軍門丁吳姓在內。延不交出。屬令委員徧供刑嚇。意在致死滅口。綠營出有官缺。積壓一年有餘。未經出奏。需索守備夏正羸頭未遂。意欲羅致重罪。以找貢馬為名。徧地搜羅。以致軍民不敢養馬。傳聞所得馬匹轉售外夷。及馬差沿途代為變價。凡有呈遞馬羸銀物者。皆係章京圖姓達姓與門丁吳姓等互為綫索。

將自存頂領貂皮等物賣與哈薩克等。錙銖必較。私宅工作。或取諸軍民。或勒令屬員代辦。該將軍因命名常清。凡公牘中遇有清字。必令改避。於勘分地界一事。一概推諉。為卸肩地步。察哈爾營牧廠官馬僅存五百餘匹。虧短四千四百餘匹之多。該將軍因每年需索馬匹。售賣獲利。遂任令管馬官員虛蒙出結。代為隱瞞。以致馬政大壞。各等語。西陲重地。極關緊要。將軍駐紮伊犁。有總統各城之

責必須公正廉明方足以資治理乃如所參各節是常清居心卑鄙辦事謬妄全不以國事為重安望其表率僚屬綏靖地方且現在新疆各城回匪煽亂伊犁地方防守尤重該將軍平時既眾怨繁興又安能固結人心同資保衛本日業經明降諭旨將常清革職聽候查辦明緒現在新授伊犁將軍無所用其迴護著將所參各款詳細查明據實具奏不准一字欺飾原摺片四件均著鈔給閱看將

此諭令知之○又諭常清明緒奏援兵勦辦庫城回匪獲勝並委統兵大員救援烏城常清奏接奉諭旨滙陳惶悚下忱明緒奏抵任大概情形各摺片常清身膺邊寄毫無振作本日已明降諭旨將伊革職伊犁將軍卽命明緒補授矣明緒受朝廷倚畀重恩務當振刷精神於一切防勦撫綏各事宜力求整頓不可稍有懈怠因循致蹈常清覆轍圖庫爾一軍行抵庫爾喀喇烏蘇擊賊獲勝自應一

鼓作氣將逃匿禮拜寺之賊悉數殲除武隆額隨同圖庫爾一路行走既據常清等奏稱該員遇賊接仗深合機宜甚屬可嘉本日已將武隆額賞給副都統銜補授喀喇沙爾辦事大臣所有救援烏城之兵卽著暫由武隆額調度自領隊大臣以下均歸節制武隆額其督帶各軍鼓勇前進迅解烏城之圍疏通咽喉重地此次援兵甫到庫城卽能得手可見官兵果能奮勇直前不肯避賊必可力挫

兇鋒明緒當督同武隆額激勵將士敵愾同仇務令壁壘一新肅清邊徼以副委任哈密為新疆門戶回匪既有勾結安集延霍罕分赴哈密烏魯木齊打仗之謠自應嚴密防範著明緒行知平瑞文祺扎克當阿加意準備毋稍疏忽北路之塔爾巴哈台等處著一併咨令錫霖等嚴為籌備不可稍涉大意至新疆軍餉疊經諭令山西等省趕緊撥解此時諒已陸續起解在途明緒卽可分別咨催迎

提此次所奏飭部另籌撥款等語已有旨令戶部議奏矣。內地精兵業經設法籌調出關。勦賊惟到尚需時。明緒總當就現有之兵實力防勦。遣勇既易滋事。或添募民勇加以訓練。藉厚兵力。不可專待援師。致誤戎機。金頂寺回子意欲變亂。現經開導解散。所辦甚好。仍著隨時撫輯。令其各安生業。以遏亂萌。巴燕岱領隊大臣前有旨令穆克登額補授。至各城未到之員。本日亦降旨嚴催赴任矣。嗣

後非極緊要軍情。不准擅發八百里報。致駭聞聽。將此由六百里各諭令知之。○以伊犁參贊大臣明緒為將軍。古城領隊大臣聯捷為伊犁參贊大臣。調庫爾喀喇烏蘇領隊大臣惠慶為古城領隊大臣。賞候選郎中李雲麟三等侍衛為庫爾喀喇烏蘇領隊大臣。葉爾羌幫辦大臣武隆額副都統銜為喀喇沙爾辦事大臣。○以救護主將不力。革湖南遊擊滕成明職。並逮問。○撫恤琉球國遭風難

夷如例。○壬申諭議政王軍機大臣等。丁曰健奏前往彰化督勦。並辦理善後事宜一摺。北路股首洪欉恃與番界接壤。往來莫定。負隅抗拒。馬奔潭匪首陳鯨等亦恃竹圍堅厚。暗結黨與。狡馬思逞。若不速加殲滅。恐日久死灰復燃。勢將仍肆蔓延。致勦辦又形棘手。丁曰健現於九月初十日帶領兵勇前往北路彰化一帶督勦。著左宗棠、徐宗幹督飭丁

曰健統率所部認真搜捕。務將洪欉等逆首悉數弋獲。並將餘匪勦除淨盡。以竟全功。而清疆圉。其一切善後事宜。即著丁曰健妥為經理。副將林文明以本地之人。辦本地之賊。自不免致招嫌隙。所有內山搜捕事宜。即著責成該鎮道接辦。毋庸林文明前往。署總兵曾元福現在回臺清理積欠口糧。並裁撤疲病各勇。即著照丁曰健所擬暫留郡垣。另行察看情形辦理。丁曰健現赴彰化勦匪。所需兵勇口糧。亟應寬為籌備。著左宗棠、徐宗幹

飭令臺灣府知府陳懋烈於萬難設法之中竭力籌措並著丁曰健自行湊借俾供支放毋令缺乏將此由五百里諭知左宗棠徐宗幹並傳諭曾元福丁曰健知之○以鑲白旗滿洲副都統全慶為正白旗漢軍都統內閣學士毓祿兼鑲藍旗漢軍副都統○癸酉諭內閣給事中福寬奏請稽察夜間城門一摺京師為五方雜處之地奸宄最易潛蹤惟在各城門慎司啟閉嚴密防範如該給事中所奏近來夜間正陽門啟後竟不見一官一兵看守不但入者毫無覺察卽出者亦並不攔阻殊屬不成事體著該管衙門嚴飭城內外官堆認真稽察務遵舊制凡晝夜進城人等均須查明確係當差者方准放入非至黎明一概不准放出毋得仍前玩泄致干重咎○諭議政王軍機大臣等有人奏河南汝甯府匪徒馮天杰與確山縣武生張經綸貢生安增等皆係捻首陳大禧之黨平素暗通消息

知府劉成忠不能查拏復令充當團首以致科派民財肆行劫奪及被搶之張振岳等控告到官該府勒令認作團練捐項捻匪到境不能力為抵禦張經綸等並有餽賊酒食之事其馮天杰一犯曾經張之萬訪拏飭發審辦而該府復多方開脫等語各省辦理團練原以安良禦侮若如所奏招集匪類魚肉鄉閭是衛民轉以虐民殊屬大干法紀著張之萬按照所參各節確切查明據實具奏毋稍徇隱原摺著鈔給閱看將此諭令知之尋奏查明馮天杰久充練總與捻為讎曾拏陳大禧母舅朱連輝等並疊獲巨捻多名紳民僉稱馮天杰有功無過並非該府多方開脫張經綸等訊無餽賊酒食等情張振岳被搶一案劉成忠亦無勒令失主認作團練捐項之事報聞○又諭曾國藩奏官軍驅賊出境皖南北兩岸肅清沈葆楨奏鮑超飛援甯都血戰解圍並席寶田一軍翦除湖逆搜獲偽酋

及龍南縣擊賊獲勝各摺片。英霍之賊退竄鄂疆。徧擾蘄水蘄州等處。皖北雖暫就肅清。未能恃以無恐。蔣凝學一軍已到蘄水。劉連捷軍亦經官文調往湖北。現在成大吉被圍。湖北軍情十分喫緊。著曾國藩懍遵疊次諭旨。飭令劉連捷迅即赴援湖北。其皖楚交界地方。仍責令朱南桂等嚴密防守。毋任回竄。皖南之賊。經易開俊等出嶺追剿。急走遂安。並陷開化。漏逸而西者。尚有數千人。由江竄

楚竄粵。頭頭是道。曾國藩仍當飭令易開俊金國琛等跟蹤出境追剿。務須數省合力。將此股殘匪殄除淨盡。未可以鄰為壑。致令死灰復然。沈葆楨所奏鮑超援甯都血戰解圍已降旨賞戴雙眼花翎。該撫即傳知該提督益圖奮勉。將康侍等逆悉數誅鋤。肅清江境。用副委任。席寶田一軍剪除湖逆。搜獲偽干王洪荏玕等多名。據生擒賊供。粘逆李遠繼已殞於陣。幼逆洪幅瑱或謂死於亂軍。或稱

自經山僻。俱屬渺茫不定。偽主將羅逆。主逆亦俱漏網。恐遺孽復萌。再有勾結。又行費手。著沈葆楨即飭席寶田等確切查明。幼逆所在。認真搜捕。以淨根株。左宗棠徐宗幹亦當督飭各路地方將領。嚴密捕拏。為一勞永逸之計。沈葆楨另片奏南雄之賊犯龍南。洒源堡及插株坳背等處。經署令蔣如琳等督勇轟擊。斃匪甚多。餘匪竄向定南廳而去。此處與廣東地方交界。著毛鴻賓郭嵩燾飭令地

方文武嚴防竄越。並派兵出境追剿。以免再有闌入。沈葆楨仍當責令地方文武員弁認真防剿。如賊勢尚眾。即酌量抽調數營前往會同粵軍合力剿洗。正在寄諭間。據毛鴻賓等奏匪撲南雄州城。官軍迎擊疊勝。賊趨東路。現飭臬司督兵出省防剿。另片奏賊由江西安遠長甯竄入平遠縣城。知縣吳炳綬中槍墜馬等語。南雄賊匪被擊退竄。復由江西之龍南竄入和平龍川境內。幸各縣均有準



備遂橫竄嘉應州界之長田和平龍川交界之下車等處。毛鴻賓等已飛飭鄭紹忠由龍南馳赴連平。與崑壽所派之常秀各軍互為聯絡。並令知府吳贊誠等扼紮州境防勦。著即催令李福泰籌添兵勇。統帶出省赴南雄一路妥籌勦辦。毋任匪蹤紛竄。並嚴飭方耀等軍。迅行規復平遠縣城。以贖前愆。粵省與江西湖南犬牙相錯。在在接壤。粵東一日不得肅清。江西湖南即一日不能安枕。與其糜

經費以籌防。不若合羣力以制賊。著沈葆楨即飭王文瑞一軍。由贛南一帶長驅入粵。會合惠潮各軍。以勦東江之賊。惲世臨即令趙煥聯一軍。由桂陽桂東入粵。會合南韶各軍。以遏北江之衝。均須剋日赴援。不得稍分畛域。致誤戎機。毛鴻賓等當飭令李福泰先就現有兵力。迅圖勦辦。不可坐待客兵。遷延時日。將此由六百里各諭令知之。○河南巡撫張之萬等奏。捻逆由白果竄上巴河。現飭各

軍扼勦。得旨著該撫即飭前敵各軍乘勝進擊。並飭張曜趙鴻舉等嚴扼商城一帶關隘。防勦兼施。毋任再行北竄。○兩廣總督毛鴻賓等奏。勦辦客匪。攻破雲鄉匪巢。得旨仍著嚴飭卓興等跟蹤力勦。務將戴逆擒獲。並埽除餘匪。以靖地方。又奏請調廣西候補道王承澤四川候補知府曾紀鳳前赴廣東差委。允之。○以正白旗漢軍都統全慶署鑲黃旗蒙古都統。鑲白旗漢軍都統存誠署正黃旗蒙古都統。正黃旗滿洲副都統察杭阿署正黃旗漢軍副都統。鑲藍旗滿洲副都統靈桂署鑲白旗蒙古副都統。○以安徽南北兩岸肅清。賞總兵官劉松山一品封典。復已革總兵官唐義訓職。實授皖南鎮總兵官。餘升敘開復有差。○以江南克復溧水等城。並進援青陽出力。賞總兵官劉得花。楊正彪。謝占春。副將胡友勝。柳壽田。潘長順。李大鵬。周文耀。柏正才。蔣占鼇。戴雙美。鄧大進。巴圖魯名號。

守備張德儀等花翎楊采芹等藍翎餘加銜升敘有差○以安徽青陽解圍出力賞總兵官劉光文一品封典遊擊鄧善端等花翎千總曾友才等藍翎餘加銜升敘有差○以江蘇揚州節年防勦出力賞副將蔣臨照都司廖長明驍騎校儂英阿博爾托巴圖魯名號協領炳林等花翎筆帖式富倫等藍翎餘加銜升敘開復有差○以江西龍南勦匪獲勝賞守備范應龍等花翎○以江西甯都州城

解圍提督鮑超得旨嘉獎並賞雙眼花翎守備賴永福等花翎餘升敘有差予陣亡遊擊牟占魁等十員祭葬世職加等○以江西廣昌擊賊獲勝生擒首逆洪玘開復降補知府席寶田處分仍以按察使用並賞還勇號布政使銜予陣亡遊擊夏基鴻外委廖生達祭葬世職加等○乙亥諭議政王軍機大臣等保恆奏烏魯木齊省垣失守請派兵出關勦賊並請於科布多揀員統轄蒙古官兵各

摺片覽奏曷勝焦憤烏魯木齊滿城固守數月仍被回匪攻陷綏來縣城亦被賊踞哈密漢回又乘勢變亂將關廂等處焚掠巴里坤漢回聞哈密之變亦遷移不知去向南北兩路偏地皆賊烏魯木齊為新疆扼要之區今既淪陷全局震動必須先將此城克復再行勦辦各路之賊惟關外既無得力之員又無熟習戰陣之將楊岳斌回湘募勇急切不能到甘都興阿既不能出關勦賊穆圖善身歷行陣屢立戰功奉命督師援甘復能激勵士卒踴躍前驅深堪嘉尚著即統率全部出關勦賊如兵力不敷勦辦或先駐紮哈密以為將來進兵地步該將軍現由中部一路進援甯靈此時既須出關自應探明道路前進俾無阻滯之虞現在鹽固等處均有賊蹤是否仍須繞赴蘭州省城由涼肅一帶出關抑甯羅迪北關外尚有可通之路均由該將軍探明前進以期妥速穆圖善改道出關甯靈一

帶之賊著都興阿就現有兵力妥籌勦辦。但兵力實形單薄。綏遠歸化等城兵力如果足資防禦。即著桂成仍遵前旨。於該二城挑選精壯兵丁一千名。備齊器械。迅赴都興阿軍營聽候調遣。從前勦辦西路之賊。川陝兵勇最能得力。雷正綰籍隸川省。能否派員回籍添募若干。即著酌量辦理。其各路援兵未到之先。都興阿須穩慎進取。聯絡甯夏官兵。力圖扼守。不可稍涉大意。穆圖善所部已有十二營。本日又諭令官文催調溫德勒克西等馬隊。迅赴該將軍軍營。兵數愈多。糧餉尤須寬為籌備。前據德勒克多爾濟奏。山西解到銀八萬兩。委員解往科布多交納。惟杯水車薪。難敷分撥。此項餉銀。陝甘既不能籌撥。止可於晉省設法騰挪。著沈桂芬無論何款。先其所急。迅籌銀二三十萬兩。解赴穆圖善軍營。俾得迅速出關勦辦。嗣後仍須源源接濟。毋令缺乏。當此時勢艱窘。務當力任其難。通

盤籌畫。並著迅速覆奏。以慰廑懷。師行糧隨。必須有轉運糧臺。方可不誤餉糈。從前西路用兵。多於肅州等處。安設糧臺。以資轉運。著都興阿。恩麟。斟酌情形。何處可以安設。即於得力道府中。酌派一人經理。以專責成。穆圖善未出關之先。仍著明緒督飭武隆額。由庫爾喀喇烏蘇進兵。先復綏來縣城。疏通道路。由昌吉一路進勦。並由保恆飛催惠慶馳赴古城。統帶蒙古援兵。星速前進。以期兩面夾擊。迅復烏垣。毋稍延緩。平瑞不知下落。烏魯木齊都統著保恆暫行署理。烏垣等處文武下落。著查明具奏。一面將現存蒙古官兵。並烏科等處調到蒙兵。妥籌調度。科布多地方亦關緊要。廣鳳已派往辦分界事宜。保恆所請由該城大臣揀調一員。來古督同辦理。著毋庸議。本日廣鳳奎昌奏。續撥二起蒙兵起程赴古。嗣後無可再撥等語。自係實在情形。所有科城蒙兵。即著毋庸再撥。此項蒙兵到

古時卽由保恆等分別調遣可也。將此由六百里諭知都興阿、穆圖善、雷正綰、明緒、保恆、武隆額、德勒克多爾濟、桂成、廣鳳、奎昌、沈桂芬，並傳諭恩麟知之。○又諭新疆各城自庫車、喀喇沙爾、葉爾羌、烏魯木齊、漢城被陷後，回氛四起，勢極蔓延。本日又據保恆奏，烏魯木齊滿城亦已失陷，並聞巴里坤、哈密一帶均有回匪擾亂，是新疆情形極為喫緊。邊疆重地，亟應及早廓清。惟該處向來用兵，必須

內地籌調大支勁旅，寬撥餉需，方能布置裕如。大張撻伐，現在甘肅軍務尚無就緒，道路亦未通暢，而湖北賊氛未淨，礙難騰出兵力。赴甘援剿，是欲勒關外之賊，必須先清甘省。欲清甘省，非將竄擾楚豫皖三省之賊迅速殄除，則兵力悉為牽掣，不能鼓行而西。前諭曾國藩調派劉連捷等軍赴楚助剿，疊據奏報，業經陸續到皖。劉連捷一軍已由官文檄調赴鄂。此起官兵皆係曾國藩舊部，卽鄂省

水陸各營亦係楚勇居多。若得曾國藩前往調度，則兵將相習，必可收指臂之效。現在江甯已臻底定，軍務業經歲事。卽著曾國藩酌帶所部前赴皖鄂交界，督兵剿賊。務卽迅速前進，毋稍延緩。第恐曾國藩之兵由東路進，偏賊必避兵西竄。武漢一帶防守亦關緊要。官文俟曾國藩到後，卽可回駐省垣。會同吳昌壽妥籌防範，並將各營餉需源源接濟。毋令缺乏。僧格林沁現駐黃岡之上巴河，第恐

深入楚境，難保賊匪不伺隙竄擾北路。著酌量情形，扼要駐紮，力顧豫疆。賊或北竄，卽著督率馬步迎頭夾擊，以期聚而殲旃。僧格林沁、官文、曾國藩均係威望素著，似此三面扼紮，必能將此股賊匪悉數殲除。剋期歲事至江南甫經肅清，所有撫輯地方一切事宜均須妥為籌辦。卽著李鴻章前赴江甯，暫署總督篆務。曾國藩俟李鴻章到後，卽行交代起程。江蘇巡撫著吳棠暫行署理，並著迅速起

程赴蘇將地方應辦事件認真籌辦富明阿著兼署漕運總督所有淮徐一帶防守事宜卽著妥籌兼顧應否移紮清淮並著富明阿斟酌情形奏明請旨至李鴻章籍隸安徽該省係總督兼轄固應迴避惟此時軍情緊要不能不權宜變通李鴻章著無庸奏請迴避卽行前往江甯接替以便曾國藩迅速出省曾國藩李鴻章皆係朝廷有功之臣素能不分畛域此時雖係暫時任事於應勦應防一切機宜均當以大局為重力戒滿盈不可稍涉大意以副委任穆圖善一軍本日已諭令出關勦賊甘肅兵力不敷調撥楊岳斌前已奏明回籍募勇赴甘著卽趕緊選募成軍剋日起程毋稍遲誤溫德勒克西等及蘇倫保等馬步各隊前經官文奏請暫留楚省現在西路需兵孔亟仍著官文曾國藩飭令迅赴穆圖善軍營不得藉詞奏留甘省軍情萬緊四川係屬鄰疆派兵赴援較為迅速著駱秉

章無論如何總須抽調一軍派員統帶前往聽候都興阿調遣毋許再有推諉將此由六百里各諭令知之○旌表守正捐軀河南鄆陵縣民楊三汰女省姐○丙子命鑲黃旗蒙古都統明慶戶部左侍郎吳廷棟在紫禁城騎馬○丁丑

慈禧皇太后聖壽節遣官祭

太廟後殿

奉先殿○遣官祭

文宗顯皇帝

孝德顯皇后暫安寢殿○

上率王以下文武大臣詣

慈寧門行慶賀禮眾官於午門外行禮

大清穆宗繼天開運受中居正保大定功聖智  
誠孝信敏恭寬毅皇帝實錄卷之一百十七

大清穆宗繼天開運受中居正保大定功聖智  
誠孝信敏恭寬毅皇帝實錄卷之一百十八

教修

同治三年甲子十月戊寅諭內閣沈葆楨奏

官軍追勦敗匪生擒首逆一摺幼逆洪幅瑱  
一犯前於江甯攻克時據擒賊供稱該逆積  
薪自焚嗣據左宗棠探明洪幅瑱實已潛蹤  
逃竄疊經諭令各路跟蹤兜拏該逆被官軍  
追勦屢次敗衄由安徽廣德逃往浙江湖州  
復出竄安徽甯國昌化績溪自浙江遂安一  
帶遁入江西廣豐瀘溪官軍沿途躡勦追及  
於廣昌石城地方將各逆首斬馘殆盡幼逆  
尚未就擒席寶田一軍移紮石城派員帶隊

按拏九月二十五日遊擊周家良於石城荒谷中將洪幼逆拏獲該犯雖係洪秀泉之子而么膺小醜漏網餘生亦不值檻送京師著沈葆楨卽將洪幅瑱在江西省城凌遲處死以快人心沈葆楨自簡任江西巡撫籌防籌勦深合機宜浙皖賊匪屢次竄入江西均經調派兵勇次第掃蕩並生擒首逆殲除各巨酋實屬勦勞懋著加恩著賞給一等輕車都尉世職並賞給頭品頂帶署浙江提督鮑超前在江楚皖三省勦賊卓著戰功此次督軍入江所向大捷疊催巨股連克堅城賊眾聞風膽落遂能盡掃逆氛膚公立奏加恩著錫封一等子爵以示優異○又諭閩浙總督兼署浙江巡撫左宗棠督師入浙恢復浙東各郡縣進規浙西攻克杭州省城及湖州等府縣肅清全浙並派兵截勦皖南竄賊蕩平巨股卓著勦猷茲當幼逆洪幅瑱就擒殲除餘孽東南軍務漸次底定自應渥加懋賞左宗

棠著加恩錫封一等伯爵浙江布政使蔣益澧隨同左宗棠統兵入浙身先士卒所向無前先後力拔堅城廓清浙境懋著戰功並著加恩賞給騎都尉世職以示渥沛恩綸至意○又諭官文奏請飭候選道裘德俊暨發往貴州差委之前任直隸清河道鮑桂生赴營委用等語裘德俊係特旨簡放甘肅蘭州府遺缺知府之員旋據捐升道員自應在部候選鮑桂生業經有旨發往貴州軍營差委應卽遵旨前赴貴州官文所請調該二員赴湖北軍營之處著不准行○諭議政王軍機大臣等僧格林沁官文奏蘄水髮捻被勦窮蹙分竄廣濟太湖督率水陸各軍分路防勦一摺逆眾自趨蘄水後大股麇聚梅子山等處與蔡家河踞匪互為犄角經僧格林沁官文分督水陸各軍扼要防勦連獲勝仗成大吉一軍復與蔣凝學援師奮勇力戰立解重圍又累捷於關口等處逆匪分股敗竄一竄太

湖彌陀寺一竄廣濟自應乘勝會勦以期聚而殲旃卽著僧格林沁督飭成大吉等馬步各軍跟蹤追擊至劉連捷等軍已抵太湖並著僧格林沁會國藩飭令迎頭會勦迅奏膚公第逆匪旣經陸軍勦擊下游又有皖軍攔截當此秋深水涸沿江沿湖各要隘尤應嚴密堵禦以防搶渡官文務當督率水師梭巡防範遇賊卽擊毋得稍有疏虞英山一路防守尚屬空虛著僧格林沁酌撥數營嚴防回竄現在東南軍務漸次底定楚皖交界之賊尤應及時撲滅曾國藩著仍遵前旨迅赴皖鄂一帶督兵會勦俾此股殘匪早就殄除以副委任將此由六百里各諭令知之○又諭徐宗幹奏官軍擊退瑞金竄匪逆偪漳郡並請飭浙營得力將官來閩林文察奏由省啟行馳赴邵汀一帶等摺片瑞金踞賊經官軍擊走後繞竄廣東平遠鎮平大埔等處闖入閩境窺伺龍巖直犯漳郡現在漳郡失守與

否尚無確信賊勢旣趨重閩疆漳屬南靖等縣復有土匪串同粵勇假冒髮逆各處滋擾現在關鎮國留守汀州要隘康國器駐防光邵徐宗幹已飭郭什春帶兵勇二千馳往泉州並調魏喻義張運蘭作速進勦卽著督飭各軍乘新竄之賊喘息未定一鼓殲除毋任蔓延閩省兵力較單全浙現已肅清左宗棠檄飭得勝之軍統帶勁旅星馳赴閩迅殄賊氛該督職任兼圻責無旁貸務須實力區畫以維全局林文察已赴邵汀一帶卽著探明賊蹤相機進勦毋稍遲緩本日據沈葆楨奏鮑超一軍攻克瑞金縣城追賊至距城三十餘里之莖田直達閩界等語仍著鮑超乘破竹之勢督軍出境會合閩省防軍將此股敗匪追捕淨盡以竟全功前據毛鴻賓等奏賊由江西竄入平遠縣城南雄解圍後賊由江西龍南竄入和平龍川縣境橫竄嘉應州界現在粵省之賊由大埔竄入閩境其嘉應等



處賊勢如何。平遠縣城是否收復。前調之王文瑞趙煥聯兩軍著毛鴻賓郭嵩燾飛咨江西湖南分飭該員等迅速入粵助剿並嚴飭李福泰等將各處竄匪節節掃蕩以期定東南全局。將此由六百里諭知左宗棠毛鴻賓沈葆楨徐宗幹郭嵩燾並傳諭林文察知之。○又諭保恆奏迪化失守阜康縣被賊焚燒現籌防堵麟興等奏蒙古官兵餉缺情形各摺片現在賊匪悉竄迪化阜康一帶勢將逐漸東趨。亟應嚴密堵遏。保恆現經署理烏魯木齊都統所有各城防勦事宜。卽著妥為籌辦。協領功訥布等所帶滿漢兵勇不足千人。兵力實形單薄。著再添募勇丁。扼紮濟木薩一帶。力遏東竄之路。科布多所派蒙兵業經到古。卽著妥為調遣。喀爾喀西兩部兵一千五百名。據麟興等奏稱未經戰陣。口糧亦苦不足。恐難得力。著嚴飭委員遇春妥為駕馭迅速前進。所需糧餉。卽著將晉省解到銀兩

先行發給。毋令枵腹荷戈。巴里坤哈密等處近日防守情形。著保恆隨時查明具奏。並著行知文祺侯扎克當阿接任署事後。卽行前赴古城一帶督兵進剿。毋稍遷延。前經諭令穆圖善統率全部出關勦賊。此時新疆北路逆氛漸張。若得內地之兵星速赴援。則壁壘一新。自不至蔓延為患。穆圖善當懷遵前旨。卽行部署起程。取道出關相機進剿。不得稍有遲誤。所需餉項並著飛咨山西巡撫趕緊撥解。以利進行。烏什幫辦大臣伊昌阿前在都興阿軍營。業經諭令赴任。著穆圖善咨會都興阿催令迅速起程。毋稍延緩。將此由六百里各諭令知之。○以福建軍務未竣。復展鄉試。命正考官殷兆鏞副考官阿克丹回京。○以江西官軍生擒首逆洪幅瑱。賞記名按察使席寶田黃馬褂。遊擊周家良巴圖魯名號。均給雲騎尉世職。遊擊龔繼昌屈得茂魏玉彩巴圖魯名號。知縣謝蘭階以同知直隸

州知州用。並賞花翎餘加銜升敘有差。○以江西定南擊賊獲勝。賞同知寶鴻儀花翎都司姚元盛以遊擊用。予陣亡武生龍雲章賞卹加等。○予烏魯木齊合門殉難都統平瑞祭葬世職加等入祀京師昭忠祠。諡忠壯道員伊昌阿祭葬世職。眷屬人等分別旌卹如例。革署知州孔昭恆職。並逮問。○予湖北蕪水陣亡副將楊秀琪祭葬世職加等。○庚辰諭內閣。左宗棠奏。特保政績卓著各員。懇請

獎勵一摺。浙江兼署溫處道温州府知府周開錫於吏治軍政。刻意講求。為道府中不可多得之員。著開缺以道員留於福建浙江補用。署杭州府知府薛時雨為守兼優。堪膺表率。即著補授杭州府知府。署嘉興府事。補用知府候補同知許瑤光廉幹樸勤。輿情愛戴。著免補同知。以知府留於浙江補用。該員前於署諸暨縣任內失守。業經左宗棠併案奏保開復原官。並著免繳捐復銀兩。以示鼓勵。

○諭議政王軍機大臣等。左宗棠奏賊竄閩境。派兵援勦。請催巡撫赴任。並漳州賊匪退往龍巖各摺。片。江西逆眾由廣東大埔翻山竄犯汀屬武平縣境。張運蘭轉戰失利。賊分股陷龍巖州南靖縣。入漳州府城。徐宗幹調林文察回扼泉州。左宗棠飭提督黃少春副將劉明珍由衢州取道浦城赴邵武一帶接防。以便替出康國器全部進勦漳州。劉典一軍由建昌赴汀。該督恐緩不濟急。已飭高連

陞由海道赴福州省城相機迎勦。並擬進駐衢州就近調度。催新任巡撫馬新貽赴任。所籌均尚周妥。本日已諭令馬新貽即赴浙省矣。浙省接辦善後各事亦關緊要。萬一閩省軍情更緊。馬新貽一時未能赴任。即令蔣益澧暫行護理。仍隨時兼顧。以期無誤。漳州踞匪是否退往龍巖各該府州縣等城文武如何下落。均著左宗棠徐宗幹查明具奏。龍巖與粵東毗連各處俱為賊踞。閩省軍情萬分

喫緊著左宗棠催令派出各軍並親提官軍速籌進剿張運蘭一軍雖小有挫失左宗棠徐宗幹仍當督飭該臬司激勵將弁以期再整軍威閩省被賊闖入連陷數城徐宗幹何以先事毫無準備如再有疏失自問當得何罪毛鴻賓沈葆楨等於賊匪竄出境外何以不令諸將跟追畛域分明以鄰為壑殊非同心禦侮之道著卽飭令在事員弁出境窮追會同閩浙諸軍協力剿洗淨絕根株其瑞金等處踞匪及南雄一帶竄匪仍著各該督撫認真按捕毋留餘孽將此由六百里各諭令知之○又諭左宗棠奏賊匪繞竄閩疆暨賊陷漳郡各摺片逆賊李侍賢等股由廣東大埔翻山竄入閩境撲陷武平縣城張運蘭進剿失利賊卽分股竄陷龍巖南靖並勾結內應攻陷漳州府城汀州所屬徧地賊氛左宗棠現調援江之劉典一軍八千人由建昌取道赴閩計已起程前進惟江西瑞金會昌一

帶尚有賊踞現在僅留王德榜王開琳兩軍在吉安等處防剿兵力恐不敷分布且虞竄閩之賊被閩浙粵東諸軍兜剿窮蹙難保不回竄江境著曾國藩飛飭鮑超一軍乘勝越境會剿務將入閩賊匪就地殲除毋得稍分畛域之見貽誤戎機左宗棠因閩省賊蹤紛擾撲陷漳州之賊現雖退往龍巖而汀屬匪勢延蔓擬親赴衢州調度暫令蔣益澧護理浙江巡撫前因曾國藩已赴江甯諭令馬新貽仍留安慶辦理善後事宜此時左宗棠移紮衢州恐須親督諸軍入閩剿賊馬新貽身膺浙撫責無旁貸著卽將安慶應辦善後各務與曾國藩等會商揀派大員接辦卽由曾國藩迅速飭赴安慶以便馬新貽交替起程劉典一軍調赴閩省皖南防剿事宜並著曾國藩喬松年妥籌會辦江西瑞金會昌踞匪並由曾國藩會商沈葆楨督飭諸軍迅卽殲除毋任復行旁竄將此由六百里各諭令知

之○又諭張集馨奏馳抵涇州偵察賊情一摺。逆回自叛陷固原後。虜集涇平交界之新城地方。欲斷平涼各營糧道。又有馬步賊萬餘在涇州之北原肆擾。首逆孫義寶欲將老弱送回白集原。糾眾回竄。長安現經留防平涼之總兵周顯承等。在黨原各隘連戰皆捷。餘賊遁回新城小峴子一帶盤踞。涇平兩處計可無虞。糧道尚不至阻塞。惟該逆盤踞北原。必須力籌扼剿。以免旁逸。著都興阿雷正

綰飭令留防平涇各營。務將此起竄賊就地殲除。杜其竄陝之路。曹克忠已抵蓮花城。現與雷正綰陶茂林三路進攻。著該署提督督率諸軍。迅圖攻拔。以便次第規復。固原兼顧平涇等處。至逆匪既有竄回陝西省城與城中回民勾結內應之語。尤不可不嚴為之防。著劉蓉將城守事宜。不動聲色。嚴密稽查。並派兵於邠州白集原等處。實力防範。儻有疏虞。任賊闖入。惟劉蓉是問。蘭州道路無徑可

繞。張集馨擬將辦撫不實之楊柄銓一案。辦結後。道路疏通。再行赴省。著該臬司趕將此案查訊明確。即行前赴蘭州。會籌防剿。毋誤事機。蔡啟二逆。自竄陷甘肅階州後。劉蓉所派追剿之蕭慶高等軍。現在勦辦情形若何。何以久未據該撫馳奏。著飭令該員等會同隴蜀各軍實力勦洗。並將現在賊情迅速奏聞。將此由六百里諭知都興阿雷正綰劉蓉。並傳諭張集馨知之。○署浙江提督秦如虎

因病解職。以廣西左江鎮總兵官高連陞署浙江提督。○辛巳。諭議政王軍機大臣等。前因勞崇光張亮基奏將已革提督田興恕等。審明分別定擬。當諭令總理各國事務衙門議奏。茲據該衙門奏稱。此案上年與柏爾德密辯論時。該使臣曾言。將田興恕監禁後。照中國例辦理。給予照會。以便寄回本國。即可辦結。嗣因此事遷延時日太多。難免該使不藉口翻悔。前議因先與面晤。重申上年之議。

並酌給一函。告知遇恩減等辦法。乃該使於辦法雖無異詞。而覆信內仍有必須告知本國俟覆到再行知照辦理等詞。揣其用意。該國素崇奉天主教。此案從寬議結。恐各教士退有後言。故不得不藉本國一言。以杜教士之口。惟中國距該國甚遠。往返總需數月。恐勞崇光等暨崇實等未悉此間辦理情形。因先各寄一函。告知原委。請飭崇實駱秉章。仍將田興恕妥為看管等語。此案辦理。總以結

實為主。自應照該衙門所請。稍寬時日。以免後來別生枝節。惟田興恕現在秀山。該處距鎮筵甚近。賊氛未淨。崇實駱秉章遠在成都。有鞭長莫及之勢。計法國覆到。至速亦在三四箇月以外。恐田興恕因日久案懸莫結。自懷疑懼。設滋他故。則傳教人等浮言又起。恐致波折橫生。柏爾德密亦將藉口翻悔。著崇實駱秉章酌量情形。如秀山可以無虞。即仍將田興恕在該處羈禁。若秀山相距較遠。防

範難周。即著設法將田興恕解省。妥為安置。一俟該國覆信到時。即可照中國遇赦減等之例辦理。該將軍督撫等務當悉心籌畫。計出萬全。毋得稍有疏虞。總理各國事務衙門摺一件。並給法國使臣信一件。均著鈔給閱看。將此由五百里各密諭知之。○安徽巡撫喬松年奏。楚賊復竄皖境。現飭各軍分投堵剿。得旨。著即督飭諸軍遇賊即擊。均歸僧格林沁節制。仍隨時與曾國藩會商妥辦。皖北

各路防務。不准稍涉疏懈。○福建巡撫徐宗幹奏。漳州等城被匪竄入。現在分兵進剿。得旨。著懍遵前旨。與左宗棠籌商妥辦。如再有疏失。即惟該撫是問。徐宗幹自請議處。著暫行寬免。又奏。籌備省防。即出省防剿。批。福建省防緊要。徐宗幹著仍駐紮省垣。與英桂將防勦事宜。妥籌辦理。毋稍疏懈。○命醇郡王管總理行營事。○轉宗人府。右宗正華豐為左宗正。以禮親王世鐸為右宗正。○調正黃

旗領侍衛內大臣惇親王為鑲黃旗領侍衛  
內大臣鑲黃旗領侍衛內大臣醇郡王為正  
黃旗領侍衛內大臣以鑲紅旗蒙古都統景  
壽為正白旗領侍衛內大臣鑲黃旗漢軍都  
統春佑署正白旗領侍衛內大臣○以正白  
旗蒙古都統文祥為閱兵大臣○調鑲藍旗  
漢軍都統綿森為鑲紅旗滿洲都統鑲紅旗  
滿洲都統西凌阿為鑲藍旗漢軍都統○以  
戶部尚書寶璽兼署刑部尚書內閣學士李  
鴻藻署戶部左侍郎管三庫事通政使司通  
政使朱夢元署刑部右侍郎○命醇郡王帶  
領侍衛十員往奠故睿親王仁壽茶酒賞銀  
一千兩治喪予祭葬諡曰僖○壬午諭內閣  
宗人府奏應封宗室業已當差可否仍准入  
考一摺應封宗室謙華耆徵均著准其一體  
考試照例授職另片奏應封宗室溥信前經  
奉旨以七品筆帖式用嗣因久未當差咨回  
原旗行走此次應否入考等語溥信著不准

其入考○又諭前因和潤德椿奏清查奉天  
各廳州縣倉庫虧短請將歷任現任各員分  
別革職勒追賠繳當經降旨照議辦理茲據  
寶珣德椿奏稱查明奉天各屬虧短銀錢米  
石已各歸各任截清覈算請援照成案辦理  
等語著照所請所有奉天離任欠員均著暫  
緩革職仍分別虧短數目勒限嚴追自一千  
兩至五千兩者限一年完繳五千兩以上至  
一萬兩者限二年完繳一萬兩以上至二萬  
兩者限三年完繳二萬兩以上至四萬兩者  
加展一半例限一體按限嚴追歸款儻限滿  
不完即著革職監追病故人員著查明子孫  
家屬著追其無著之款即著落該管上司分  
賠八成失察處分著加恩寬免其下短二成  
著落最後出結之員賠繳自此次定立章程  
以後即須畫清界限不准再有那移掩飾情  
弊現任各員遇有升調覈算交代務須認真  
盤查毋許稍有含混儻仍有前項情弊即著

從嚴叅辦○諭議政王軍機大臣等有人奏山東濟南府屬濟陽縣現有捐納候補知縣劉時霖在彼肆擾自稱係藩司丁寶楨同鄉隨侍多年因聞警救主代捐知縣委帶毛勇赴濟防堵藉端橫索請飭查訊辦等語知縣職司民牧豈容奴僕人等蒙混報捐貽害地方若如所奏倚勢殃民誣良索賄各情如果屬實大干法紀著閻敬銘親提人證按照所叅各節確切根究據實具奏毋稍徇隱將此諭令知之○又諭李鴻章奏請將措解楊岳斌募勇銀兩劃抵撥款一摺前因陶茂林勦匪喫緊諭令李鴻章籌撥江海關銀五萬兩嗣因楊岳斌募勇赴甘需費甚急復諭李鴻章迅速籌撥銀十萬兩茲據李鴻章奏稱江海關稅款入不敷出僅湊撥銀三萬兩解交楊岳斌募勇赴甘卽抵作飭撥甘省之款等語甘省軍情萬緊涇平一帶回氛日熾陶茂林隨同雷正綰攻取蓮花城亟須鼓勇前進

非厚儲餉糈不足集事江省雖餉項支絀仍應通盤籌畫力顧大局所有前撥之江海關銀五萬兩著李鴻章仍遵前旨迅速如數撥解現在由陝抵甘道路尚可探明前進不至梗阻並著嚴飭委員趲程解往不得藉口稽延致誤事機至楊岳斌募勇之費雖經李鴻章撥銀三萬兩亦斷不能敷用且指撥各省內亦尚有力難兼顧甚於江蘇者設皆紛紛解不足數西北大局安望其能有起色耶仍著李鴻章如數協濟俾楊岳斌趕募成軍星馳西行以後尚須源源接濟以顧邊陲而全大局將此由五百里諭令知之○以正藍旗滿洲都統瑞常署鑲紅旗滿洲都統○賞順天鄉試年老諸生杜天煦等八人舉人副榜有差○癸未諭內閣據議政王軍機大臣奏昨日御史富稼在隆宗門內面見議政王聲稱據軍機處傳片伊子吏部筆帖式延序蒙恩賞給軍功加一級應否謝恩當經議政王



軍機大臣面詢原委據富稼親筆呈稱有延序隨同欽差明善於十月初三日起程赴順義縣捕拏土匪多名奉有諭旨將該匪等就地正法於初八日回京由軍機處傳片蒙思得邀加級等語並將富稼呈詞呈進覽其所敘情節以毫無影響之事言之鑿鑿實堪詫異當諭令將延序革職交刑部嚴行審訊富稼解任聽候傳質旋據議政王等奏稱召見後富稼到軍機處面稱伊子延序於昨日逃走不知去向等語顯係情虛畏罪潛行逃逸更難保非富稼有心藏匿富稼著卽行革職派議政王軍機大臣會同刑部審訊責令富稼將延序卽行交出毋任隱匿並著步軍統領衙門順天府五城御史訪查延序蹤跡拏獲送部歸案嚴訊○又諭沈葆楨奏拏獲兇悍逆首請旨辦理一摺本年自江甯湖州克復後漏網悍逆洪玕玆洪玕政黃汶英等窮蹙奔竄擾及江皖疊經官軍跟蹤追捕茲由

席寶田等軍將該逆等擒獲後訊取供詞洪玕玆尤為羣兇渠魁十數年來流毒江浙等省生靈塗炭實堪痛恨著沈葆楨卽將洪玕玆洪玕政黃汶英三犯就地凌遲處死以快人心○諭議政王軍機大臣等據議政王軍機大臣面奏昨日御史富稼在隆宗門內面見議政王聲稱軍機處傳片吏部伊子延序蒙恩賞給軍功加一級應否謝恩等語並據該御史聲稱伊子係跟隨欽差赴順義縣勦匪當因事涉可疑經議政王軍機大臣面詢原委復令其親筆敘述供詞本日於召見時呈覽復經議政王等片奏富稼至軍機處呈遞稟詞伊子延序逃走不知去向等語因其復遞親供語多狡避並未接收覽其昨日所遞親供情節已屬支離延序又復情虛逃匿本日已有旨將富稼革職交議政王軍機大臣會同刑部審訊並令步軍統領衙門順天府五城將延序查拏究辦矣著卞寶第一面



輕車簡從馳赴順義縣將富稼親供內所陳各節不動聲色嚴密訪查該縣是否有人假冒欽差調兵捕匪就地正法情事務須密速查明於二三日內即行據實具奏富稼親供二紙均著鈔給卞寶第閱看將此各諭令知之○又諭沈葆楨奏閩省軍情萬緊請飭左宗棠入閩督辦一摺據稱粵逆回竄汀郡張運蘭失利賊陷武平瑞金踞逆盡數下竄粵之大埔嘉應閩之永定龍巖漳州先後失守

現在咨商鮑超劉典相機赴援徐宗幹擬出省調度而省防又慮空虛若坐鎮省垣則前敵諸軍無所統攝請飭左宗棠剋日入閩等語前據左宗棠奏賊匪繞竄閩境已飭黃少春劉明珍由衢州赴邵武劉典由建昌赴汀高連陞由海道赴福州該督進駐衢州相機調度當經諭令曾國藩飭鮑超越境會剿刻下閩省賊氛甚熾著左宗棠催令派出各軍迅速起程赴閩剿賊該督行抵衢州就近體

察軍情如果十分緊急即行移軍直入閩境相機督剿迅掃逆氛江省主客各軍共計七萬有餘續又添募勇丁為數不少此時瑞金踞匪已全數下竄軍務較鬆正可騰出兵力赴閩會剿沈葆楨既桑梓關情想斷不能坐視著酌度情形何處兵勇可以抽撥即派令得力員弁統帶赴閩鮑超一軍該撫亦可就近咨催入閩毋得稍分畛域所有援閩各軍均歸左宗棠調遣以一事權江省防務仍著

沈葆楨妥籌兼顧毋令賊匪得以回竄將此由六百里各諭令知之○江西巡撫沈葆楨奏署甘肅按察使劉于浚因病未克赴任請開署缺調理允之命仍在江西帶兵剿賊○旌表守正捐軀直隸元城縣民杜長梓妻王氏○甲申諭議政王軍機大臣等道員金國琛在安徽帶兵得力本日已簡放甘肅鞏秦階道現在階州失守該省需員辦理軍務著曾國藩即飭金國琛酌帶所部迅速赴任以

資得力。前經諭令曾國藩駐楚皖交界督師  
勦賊。該大臣接奉前旨。諒已部署起程。嗣據  
喬松年奏。蘄水等處之賊。回竄霍山太湖等  
境。僧格林沁已至英山。誠恐賊眾逐漸深入。  
皖南北防不勝防。必須就地殄除。方可一勞  
永逸。李鴻章現已至江甯。辦監臨事務。即可  
就近照料一切。以便曾國藩督師出省。前因  
左宗棠須赴衢州。辦理閩省軍務。曾經諭令  
馬新貽迅赴浙江省城。是安慶省垣尤須大

員駐紮。應派何員前往接替之處。並著迅速  
具奏。本日據御史胡慶源奏江南鄉試人眾  
雲集。請飭稽察奸宄等語。金陵開科。士商雲  
集。誠恐良莠不齊。奸宄涸跡。著曾國藩李鴻  
章督飭文武各員加意防範。不可稍有疏虞。  
將此由五百里各諭令知之。○又諭恩麟奏  
回匪分擾東北各州縣。渭源失守。現籌防勦  
情形一摺。鹽固陝回。勾結義岡川踞匪。分竄  
靖通安會靜甯等處。於九月初三至十四等

日。直撲靖遠縣城。圍攻甚緊。十六日渭源被  
陷。靖遠為省城糧運要路。且通河西三郡。現  
在城圍未解。亟應籌撥勁旅。實力進勦。以保  
危城。著恩麟督飭派出之王德恆等軍。重整  
隊伍。出城迎勦。一面酌派兵勇前往援救。以  
解該縣之圍。東路州縣風鶴時驚。河州勦辦  
仍未得手。誠恐該匪漸偏漸近。窺伺省城。著  
雷正綰於陶茂林曹克忠所部內。酌撥數營。  
馳赴蘭州省城。以備調遣。該署提督惟當趕

緊抽撥。催趲前進。力保省垣重地。兼顧河西  
三郡。毋稍延緩。致誤戎機。恩麟仍當就現有  
兵力。將各路防勦事宜妥為調度。並督飭在  
省文武嚴密巡防。慎固封守。儻蘭州省垣稍  
有疏虞。必治恩麟以應得之罪。都興阿督辦  
甘肅軍務。責無旁貸。應如何統籌兼顧。並分  
兵進勦。以牽賊勢之處。即著該將軍酌度情  
形。相機辦理。將此由六百里諭知都興阿。雷  
正綰。並傳諭恩麟知之。○又諭恩麟奏省城

餉需緊急。並籌撥陶茂林軍火餉項。數月以來。羅掘一空。請飭催各省迅速撥運餉銀等語。甘肅餉需竭蹶。呼籲煩聞。疊經諭令劉蓉等迅籌協濟。陶茂林一軍。應用軍火鍋帳。尤為刻不可緩之需。現在該軍進逼蓮花城。攻勦正形喫緊。陝省軍務肅清。籌解亦易為力。何得屢催罔應。不顧大局。著劉蓉迅將陶茂林一軍所需軍火鍋帳等項。源源接濟。毋誤急需。並著駱秉章沈桂芬劉蓉各將應解協

甘餉銀。星速派委妥員徑解甘肅省城。以資支放。毋得膜視致誤事機。將此由五百里各諭令知之。○又諭恩麟奏哈密漢回變亂。官兵會同郡王伯錫爾夾擊獲勝。全行殲滅。一摺。哈密回逆。於本年八月間乘夜縱火焚燒關廂。勢甚猖獗。經文祺派兵約會郡王伯錫爾統帶該處兵丁夾勦。大獲勝仗。立將該匪全行殲滅。辦理甚為妥速。本日已明降諭旨。將伯錫爾嘉獎。並交理藩院從優議敘矣。該

城逆回聞風煽亂。前據保恆奏報匪勢鴟張。關廂等處俱被焚掠。此次郡王伯錫爾督帶回兵會合官軍兜勦。能否殲除淨盡。抑尚有零股被勦竄匿。著文祺扎克當阿督飭存城兵勇會同伯錫爾所帶回兵實力挖勦。務期盡絕根株。毋留遺孽。前因扎克當阿已行抵巴里坤。諭令馳赴哈密署理辦事。大臣印務計已趨程前進。文祺俟扎克當阿到城後。卽將應辦防勦事宜移交該大臣與郡王伯錫爾妥籌會辦。文祺卽可馳赴軍營。迅籌勦辦。並由保恆飛催惠慶迅赴古城統帶蒙古援兵。星速前進。規復烏垣。本日據兵部遞回八月十四二十一兩日由軍機寄交平瑞印封二件。內諭旨二道。均係軍情緊要之件。保恆因烏垣被陷。輒卽遞回。殊屬不知緩急。嗣後遇有此等緊要寄諭之件。卽著保恆收存拆閱。遵旨籌辦。毋得稍涉推諉致誤事機。至八月二十一日寄諭係因庫倫辦事大臣文盛

等酌派東兩盟官兵。遴選得力之扎薩克公等管帶。馳赴烏垣助勦。諭令平瑞派員迎提等情。此項官兵。現在行抵何處。並著保恆派員迎提。催令趲程前進。以厚兵力。將此由六百里各諭令知之。○太常寺卿胡家玉等奏。遵旨起程查辦事件。得旨。馳抵該省後。著卽將被叅各款。嚴密徹底根究。從實覆奏。不可敷衍了事。○河南巡撫張之萬奏。請調直隸副將趙喜義赴營帶隊。允之。○以甘肅鞏秦

階道林之望為按察使。○以甘肅克復平涼府城出力。賞總兵官高餘慶副將饒得勝孟玉德蔡殿甲參將劉明泰熊文貴遊擊方得元。巴圖魯名號。參將吳于城。知州志靜等花翎。通判周振紳等藍翎。餘加銜升敘。開復有差。○以哈密擊勦回逆獲勝。回子郡王伯錫爾得旨嘉獎。並予優敘。○命貝勒伯彥訥謨祜帶領侍衛十員。往奠故前任陝甘總督熙麟茶酒。予祭葬。諡忠勤。○予浙江湖州殉難

在籍翰林院庶吉士胥瑞榕等祭葬。世職加等。並附祀道員趙景賢專祠。候選縣丞許晉達等紳民婦女七百七十三員名口分別旌卹如例。○乙酉。以捐修軍械。予烏里雅蘇台委員郎中奇克慎以知府選用。○丙戌。諭內閣。前因已革御史富稼供稱。伊子延序隨同欽差明善前赴順義縣捕拏土匪多人。正法等語。當經諭令卞寶第馳赴順義縣嚴密訪查。茲據奏稱。馳抵該縣。當向知縣李賡雲詢

問。近日實無假冒欽差赴縣調兵捕匪正法。並該縣西北鄉土匪聚眾打造軍器各情事。富稼所稱各節。均屬毫無影響。惟查有韓姓卽韓起。吳四。卽吳仲元。俱係富稼供內要證。現經拏獲。請解送刑部審辦等語。韓姓卽韓起。吳四。卽吳仲元。均著交刑部歸案質訊。其延序有無別項招搖事蹟。仍著萬青藜卞寶第飭屬訪查具奏。○諭議政王軍機大臣等。前據理藩院奏。奈曼王旗解送賊犯。至朝陽

縣境脫逃。當經諭令麒慶查明。叅辦。茲據麒慶將案內互異情形查奏。此案該旗呈報朝陽縣並未派役迎護解犯。致有賊匪百餘將各犯搶去。孫洛三在縣街行走。並不查拏。轉將蒙古官兵綁拏。而朝陽縣所稟。則稱選派頭役孫均安等。迎至興隆溝。與原解旗員見面。始知解犯業經逃逸。且據該旗原報。搶匪百人。原解旗員則稱約四五十人。扎蘭諾林丕勒等又供止二十餘人。孫洛三等業已自行投案。稱係原解旗員屬令逃跑。與綽洛岱所供相同。至該王呈報各節。亦與該縣原詳情詞互異。種種支離。必須研訊。明確方成信讞。該旗距熱河甚遠。案證難齊。著額勒和布於審辦老頭會案完結時。經過朝陽。就近查訊。是否該王受人蒙蔽。以至失實。抑係該縣辦理乖謬。任賊肆行。均著確實查明。徹底根究。所有全案卷宗。並宋光遠控詞。卽著麒慶併案咨送額勒和布。以憑訊辦。麒慶原摺著

鈔給額勒和布閱看。其該王所給綽洛岱赴縣頂案諭帖一紙。著麒慶卽行封咨軍機處備查。將此諭令知之。尋奏遵查。奈曼王旗派委梅倫特普格等押解賊犯邢思禮等赴朝陽縣。該犯戚屬周聰等糾眾二十餘人。於南河套地方刼放。維時該解員等在後。未及上前拒敵。輒敢以搶匪百人眾寡不敵等詞。回旗妄稟。應請斥革。朝陽縣知縣李繼昭撥兵迎護。犯已被刼。趕援不及。旋將夥犯周聰等緝獲。並無故縱情事。宋光遠京控各情。訊係懷疑妄控。應卽定擬奏結。下部議從之。○又諭曾國藩奏提督鮑超遵奉前旨請假葬親一摺。已明降諭。旨賞假兩箇月。回籍經理葬事矣。鮑超轉戰數省。所向有功。本年冒暑西征。累獲大捷。肅清江西全境。厥功尤偉。前已加恩賞戴雙眼花翎。旋復錫封子爵。此次又准其回籍葬親。所以獎其勤勞而遂其孝思者。想鮑超必知愈加感奮。現在甘肅軍務未

歲新疆回氛日益蔓延前已命穆圖善帶兵出關剿賊而兵力尚單非得勇略出羣如鮑超者前往協力恐難壁壘一新著曾國藩傳旨鮑超令其俟假期一滿卽行由川起程出關勦辦回匪其舊部兵勇及得力將弁並准其酌量奏調隨帶同行川勇向稱趨捷並著該提督挑募成軍安立營規帶赴關外以厚兵力從前回疆用兵楊遇春卽係川省土著立功邊域彪炳旂常鮑超務當督率諸軍肅

清西陲威揚萬里以與前賢後先輝映該提督忠勇性成接有此旨必卽欽奉遵行以副朝廷委任閩省軍務萬分喫緊前曾諭令沈葆楨催令鮑超赴閩援剿此時鮑超既經賞假回川其所部如總兵宋國永婁雲慶等皆係勇敢素著卽著分領鮑超之軍由左宗棠沈葆楨徐宗幹檄令赴閩會合夾擊痛掃逆氛援閩各軍並著仍遵前旨統由左宗棠節制調遣以一事權將此由六百里諭知曾國

藩左宗棠沈葆楨徐宗幹並傳諭鮑超知之○又諭前因都興阿奏新疆回匪滋事現籌出關剿賊非馬隊不能得力請飭吉林挑兵一千名候調等語當經諭令景綸等酌度情形如尚可以抽撥卽著按照都興阿所請數目先行挑備聽候調遣茲據景綸等奏稱吉林自軍興以來徵調頻仍存營兵數僅止五千餘名該省地方遼闊巡守堆撥卡倫看管監獄等項已覺人少事繁現在土寇猶未盡

絕根株儻捕務稍鬆惟恐乘虛竊發東南調出各兵凱撤亦無時日請將都興阿請挑官兵停止徵調等語所奏自係實在情形所有前次諭調之官兵一千名著准其暫緩挑撥以重邊防穆圖善奏吉林荆州官兵前經調赴湖北安徽陝西等處軍營勦賊出力疊經奏保以協領等缺儘先補用本城所出之缺未能排列拔補請飭照黑龍江章程輪補等語此項人員現隨穆圖善出關剿賊著景綸

麟瑞巴揚阿按照黑龍江出征馬隊奏定章程遇有協領佐領防禦驍騎校等缺出以一缺送營以一缺留城相間拔補以昭平允穆圖善原片均著鈔給閱看將此各諭令知之○又諭穆圖善奏統兵陸續抵甘請催山陝兩省軍火餉銀並行糧原款卽在陝西補解欠餉內扣還歸款各摺片穆圖善所部黃金山等四營金順兩起馬隊先後馳抵花馬池地方並督率孟宗福等剋期前進所陳餉糈艱窘情形朝廷早經鑒及前因新疆回氛甚熾諭令穆圖善出關勦賊或繞赴蘭州或北走草地均由該將軍探明前進著仍遵前旨統軍出關暫駐哈密籌畫進兵之策穆圖善既不克在甘勦賊著都興阿就現有兵力妥籌防勦前次請調吉林兵一千名赴甘助勦本日據景綸等奏存兵無多無可徵調已允所請俟湖北軍務告竣僧格林沁馬隊尚可酌撥數千屆時卽當撥交該將軍統帶以資

調遣穆圖善所需餉項十分緊急前諭沈桂芬先撥銀二三十萬兩迅解穆圖善軍營俾利進征該營糧臺現無絲毫存款各軍士整替待哺幾有不可終日之勢著沈桂芬將指撥之款迅速籌解一面趕緊覆奏毋得稍延劉蓉相距較近尤應力籌接濟乃疊次奉諭嚴催竟敢延不報解任意宕延實屬不知緩急著劉蓉懍遵疊次諭旨將欠解之餉按數如期籌解並將軍火帳棚等項按次委解以供要需並著穆圖善派員迎提以期妥速儻劉蓉仍前延玩致穆圖善停兵待餉不克前進必重治該撫以應得之罪穆圖善所部兵勇陝省欠餉七八月之多此次沿途所發麪斤等項著劉蓉卽在補解欠餉內扣還歸款嗣後該將軍行糧仍著劉蓉陸續協濟將此由五百里各諭令知之尋沈桂芬奏遵撥晉省防費銀四萬兩解赴穆圖善軍營並督飭藩司再行儘力籌解下部知之○欽差大臣



曾國藩奏署浙江提督鮑超懇請賞假兩月  
回籍葬親允之○予江蘇蘇州殉難在籍訓  
導梅振鏞從九品銜蔣映杓祭葬世職眷屬  
人等分別旌卹如例○予安徽安慶殉難通  
判達凌阿祭葬世職加等○予江西金谿陣  
亡殉難千總劉朝棟等紳民婦女二千三百  
十一員名口分別旌卹如例○蠲緩直隸開  
東明長垣東安唐豐潤武清寶坻薊大城望  
都完東鹿景吳橋東光天津青靜海滄南皮

鹽山慶雲晉永年元城大名玉田衡水深寧  
河肥鄉雞澤廣平武強安平三十六州縣被  
水被雹被旱地方新舊額賦有差○丁亥諭  
議政王軍機大臣等僧格林沁官文奏追勒  
髮擒各匪獲勝匪首窮蹙乞降一摺髮擒各  
匪經官軍擊敗後向東狂奔與前次東竄股  
匪聯成一片官文嚴防水路僧格林沁督軍  
追擊成保陳國瑞等奮力截勒殲斃無算匪  
首黃中庸等震懾軍威畏罪乞降陸續來歸

者不下十萬餘眾偽端王藍城春已訊明正  
法該親王聲威所及巨憝授首匪眾傾心蓋  
緣公忠素著用能數日之間獲此奇捷覽奏  
深為嘉悅馬融和亦係著名悍寇雖暫時帖  
耳受撫狼子野心終難馴制且降眾人數過  
多恐首鼠兩端之輩不免久而生心著僧格  
林沁暫駐黑石渡妥為鎮撫以防反側其有  
籍可歸者自應妥為安置俾安生業沿途經  
過各地方尤須認真彈壓方不至滋生事端

著官文吳昌壽喬松年張之萬嚴飭所屬地  
方妥籌辦理陳德才張總愚陳大澹三犯尚  
在逃未獲著僧格林沁督飭各軍實力擒拏  
並著飭令馬融和設法誘擒陳德才等以明  
心跡該三犯現在踰伏英霍潛太一帶著喬  
松年嚴飭在防諸軍一體兜勒儻堵遏不力  
任令脫逃查由何路竄走即惟何路防兵是  
問常星阿等追勒南竄股匪至廣濟縣地方  
遇伏失挫蕭河清力戰陣亡馬步官兵亦多



陣沒殊堪憫惜。接應不力之員。著該親王會同官文查明叅辦。現在此股若干人。著僧格林沁查明具奏。逆眾既圖上竄。回擾黃麻。難保不北犯豫疆。該親王已令成保陳國瑞向光州一帶扼紮。以杜北竄。並著國瑞選帶馬隊馳往光州。會同張之萬督飭防軍奮力扼剿。馬德昭現已到營。即著劄令幫同成保管帶步隊。以資差遣。將此由六百里各諭令知之。○又諭。本日據僧格林沁等奏。官軍剿賊

疊獲大勝。各股匪眾窮蹙乞降。現擬陸續遣散遞籍。已分咨湖廣等省督撫。妥為安插等語。此等降眾大半為賊裏脅居多。現既投誠反正。自應分別遣散。惟其中良莠不齊。若不妥籌安置。難保不別滋事端。著憚世臨於該降眾等遣回過境時。飭令所屬地方官酌給口糧。分別遞回原籍。妥為安插。認真約束。毋稍大意。將此諭令知之。○又諭。雷正綰奏官軍攻克蓮花城老巢。現擬分路勦辦。並曹克

忠助勦得力。請飭陝西接濟軍餉。及圖繪攻取要隘呈覽各摺片。雷正綰自平涼移師而南。疊破逆巢。殲除悍黨。此次復督率曹克忠等攻克著名老巢。洵屬調度有方。勇略出眾。不負朝廷倚任之隆。深堪嘉尚。前因靖遠被圍。渭源失守。省城防務喫緊。曾經諭令雷正綰於陶茂林曹克忠所部內酌撥數營。馳赴蘭州。以備調遣。雷正綰現於攻拔蓮花城後。即令陶茂林督帶馬步十七營。剋日徑赴蘭

州。妥籌堵剿。所辦與前旨適相脗合。即著馳赴蘭州省城。所有趙必達一軍。及省城一帶各營防勦兵勇。悉歸陶茂林調遣。即將西路一應防勦事宜相機妥辦。迅解河州之圍。以冀漸次戡定。嗣後軍情事件。即由陶茂林與恩麟聯銜具奏。俾免稽延。蓮花城為四達之衝。且地屬秦安。與階州接壤。現在髮逆竄擾階州。逆蹤環逼。尤不可不加意防範。曹克忠紀律嚴肅。所部各營一律精銳。即著飭令暫

紮蓮花城。居中控。其張華之軍。卽撥歸曹克忠調遣。以便進攻秦州。鹽關等處。回匪迅速掃蕩。雷正綰現已回軍平涼。卽著審度軍勢。恢復固原。節節北趨。期與都興阿合兵夾擊。肅清甯靈一路賊匪。底定邊陲。所陳要隘圖說。具悉一切。以後雷正綰進兵道路。仍著將地勢賊巢。隨時繪圖貼說呈覽。曹克忠一軍所需糧餉。向由陝省供支。此時雖已入甘助勦。而甘省餉項支絀。難期接濟。仍著劉蓉照舊供支。源源運解。不得稍分畛域。致誤戎機。秦州捐款釐金。業由恩麟撥充雷正綰兵餉。陝餉未到以前。卽著將此項歸併曹克忠軍營應用。以濟然眉。髮逆竄往階州。劉蓉所派追賊之蕭慶高何勝。必兩軍現在行抵何處。一切勦辦情形。總未見劉蓉詳細具奏。實不可解。著卽恪遵前旨。迅速覆奏。毋得視同隔膜。置軍事於不問。自取罪戾。本日據僧格林沁等奏。勦辦楚皖賊匪。疊獲大勝。除斬殺

外。各股匪首。窮蹙乞降者甚眾。已陸續遣散回籍等語。此股降眾。多有籍隸陝西者。著劉蓉嚴飭各地方官。妥為安插。毋令滋事。致干重咎。將此由六百里諭知都興阿雷正綰劉蓉。並傳諭陶茂林恩麟知之。○以湖北蘄水等處。勦匪疊勝。賞總兵官郭寶昌黃馬褂。復已革副都統成保降調總兵官陳國瑞職。予都司桂錫楨以遊擊升用。○以運解糧餉出力。賞甘肅知州張徵等花翎。知縣劉元績藍翎。餘加銜升敘有差。○以甘肅攻克蓮花城賊巢。賞總兵官曹克忠黃馬褂。提督張在德總兵官仇有道副將陶世貴陶生林參將龔良臣周有貴。知府陶兆熊。巴圖魯名號。餘加銜升敘有差。予陣亡副將陳有傳等祭葬。世職加等。建專祠。參將謝光發等一併附祀。○予江蘇淮安等處殉難在籍知縣陳敬修等紳民婦女二千二百八十一名口。分別旌卹如例。

大清穆宗繼天開運受中居正保大定功聖智  
誠孝信敏恭寬毅皇帝實錄卷之一百十八

一、

聖

大清穆宗繼天開運受中居正保大定功聖智  
誠孝信敏恭寬毅皇帝實錄卷之一百十九

[illegible]

較修

同治三年甲子十月戊子諭議政王軍機大

臣等僧格林沁等奏陸路賊匪由廣濟上竄督師追勦一摺逆匪分股一由張家塆陳德園潰走一由蘄州廣濟奔逃疊經官軍追勦該逆以一股牽掣我軍分股由廣濟翻山繞越蘄州潰湖一帶上竄經譚仁芳等截殺遂由棗茨嶺逸入上下巴河等處旋由黃岡麻城直趨岐亭新洲各路上竄黃陂官文現派常星阿等趕赴上游節節追勦並令喜昌等分防漢口等處著官文檄飭派出各軍實力

嚴防扼要駐紮。相機勦辦。務期一鼓殲除。毋得稍涉疏懈。昨據僧格林沁官文奏。追勦髮捻獲勝。匪首馬融和等受撫。陸續來歸者不下十餘萬眾等語。該逆心存巨測。首鼠兩端。係屬意中之事。著僧格林沁懍遵前旨。暫駐黑石渡。妥為鎮撫。並著官文妥籌辦理。陳德才。張總愚。陳大禧等。勢極窮蹙。現在英霍潛太一帶。形同流寇。非合數省兵丁會勦。無以制賊死命。著僧格林沁。官文嚴檄各軍。前截

後追。兩面夾擊。務將該逆等迅速擒獲。毋令再行漏網。致稽顯戮。並著知照豫省官軍。合力兜勦。迅殄逆氛。將此由六百里各諭令知之。○引見前任御史寶璋。得旨。著以知府發往貴州。交勞崇光。張亮基。差遣委用。○欽差大臣曾國藩奏。請將新授總兵朱南桂等暫緩赴任。得旨。朱南桂。熊登武。均著准其暫留防勦。俟軍務稍定。仍飭令迅赴本任。○署漕運總督富明阿奏。請另簡賢員接署漕督。得

旨。覽奏具見誠悃。所請仍紮揚營。兼辦漕務。及暫交詹啟綸代辦揚防軍務。馳往清淮之處。均著照所擬辦理。楚匪如可速了。吳棠卽不久可回本任。該將軍不過暫行兼署。尚其慎勉為之。妥籌兼顧。以副委任。○以湖北廣濟勦賊失利。革副都統常興阿。蘇倫保。溫德勒克西。富森保。提督藍斯明。姜玉順。總兵官楊朝林。梁洪勝職。奪勇號。仍留營。予陣亡提督蕭河清祭葬。世職加等。諡忠壯。入祀湖南

湖北昭忠祠。並於死事地方暨原籍建立專祠。○旌表守正捐軀山西忻州民婦李杜氏。○己丑諭內閣。沈葆楨奏。滙陳下沈。懇恩歸養一摺。江西巡撫沈葆楨。自簡任以來。於軍務吏治。事事講求。殫盡心力。本年江甯逸賊竄擾江西。該撫督軍防勦。漸就肅清。功績昭著。朝廷正資倚畀。茲據奏稱。伊父母年逾七旬。且多衰病。懇請開缺回籍侍養。情詞極為肫摯。本當俯如所請。俾遂孝思。惟江西現在

軍務雖已告竣。而一切善後事宜。正須妥為經理。該撫久任江西。士民同深愛戴。未便遽易生手。沈葆楨著無庸開缺。並賞給伊父母人蔭六兩。交該撫祇領。用資調攝。該撫其仰體朝廷孜孜求治之心。力圖報稱。毋再固請。○又諭。前因吏部將降調山東知縣捐復原官之方振業。帶領引見。當經降旨。准其捐復知縣原官。照例用。茲據閩敬銘奏稱。方振業在山東官聲本屬平常。前在泰安縣任內。為前藩司清盛之父。辦理泰山公館。趨承供應。迎合上司。部議降調後。以虧那銀兩另案奏參革追。雖於解清後。即奏請開復原參處分。其降調處分。仍須覈辦。山東吏治。亟當整頓。請仍不准該員捐復。知縣原官等語。屬員逢迎上司。久為官場惡習。該員聲名平常。專以迎合為事。似此卑鄙。闡茸之員。若令仍廁仕途。必至羣相效尤。何以挽積習而裕庫款。方振業著革職。永不敘用。以示懲儆。該員尚有

刪減軍需著賠銀一萬五千餘兩。著閩敬銘仍行按限勒令完繳。毋任宕延。○諭議政王軍機大臣等。沈葆楨奏。懇請歸養一摺。沈葆楨以老親衰病。鄉里告警。迫切陳情。原應俯如所請。以遂其孝養之忱。惟江省軍務。雖已漸次戡定。而按捕餘匪。撫綏地方。一切善後各事宜。亟需賢能大吏。實心經理。該撫自抵任以來。公忠體國。為守兼優。於軍務吏治。靡不刻意講求。該省治理。蒸蒸日上。朝廷正資倚畀。自未便遽易生手。且江西與福建相去甚近。一俟親病稍愈。即堪迎養到署。庭闈定省。自可無間。晨昏。朝廷前畀該撫。以疆寄時業。已早為籌及。有旨諭知。現在漳龍各郡。縣賊勢鴟張。著該撫趕緊抽撥勁旅。赴閩協勦。力保桑梓。即所以上慰椿萱。沈葆楨著無庸開缺。惟當慎勉圖功。力求報稱。以副委任。毋再固辭。將此由五百里諭令知之。○又諭。駱秉章奏。官軍攻勦滇黔各匪。獲勝。並越境克

復仁懷縣城。憚世臨奏。楚師肅清。天柱各寨。及東西籌防情形。各一摺。黔滇與川省接壤。隘口紛歧。寇蹤時出沒。敘永之閒。駱秉章此次所派劉嶽昭等軍。勦敗仁懷竄匪。並越境攻克縣城。實能不分畛域。調度有方。現在仁懷縣城。已有黔省兵練駐紮。劉嶽昭等以遵義徧地皆賊。回顧邊防。所有該處按勦餘匪。及遵義各屬號匪。均須力籌掃蕩。勞崇光。張亮基。身任地方。責無旁貸。卽著督令該處兵練。乘勝勦洗。毋得專恃客兵。貽誤疆事。敘永一帶。已為該逆熟徑。著駱秉章飭在防各軍。慎固封守。嚴扼另股分竄。如有應行越境會同黔軍夾勦之處。並著妥籌調度。其竄擾黑堡之滇匪。雖經擊敗。由滇境落堡竄去。難保不復行窺伺。著駱秉章督飭各營。仍當加意嚴防。毋稍大意。楚軍戈鑑等入黔。肅清天柱各寨。苗教各匪。悉數退歸清江台拱老巢。戈鑑等各營。已次第拔營回楚。分固邊防。其天

柱善後事宜。勞崇光。張亮基。卽責成該地方文武妥籌辦理。黔省松桃銅仁一帶。用兵日久。永無了期。憚世臨以湖南防黔兵勇。合計數千人。深入則道路紛歧。後無援師。擬俟東路解嚴。添調勁旅萬人。選派知兵大員。分道入黔。以為一勞永逸之計。所籌尚是。著卽豫籌調派。一俟東路稍鬆。卽行大舉入黔。廓清兩省歷年邊患。毋得僅託空言。或徒緩師期。致負委任。勞崇光。張亮基。亦當就現有兵力。力籌勦洗。豈得以松銅一帶。距省窩遠。遂謂鞭長莫及。委為他省應辦之事耶。憚世臨另片奏趙煥聯帶勇駐紮江西龍泉縣境。以防東路竄賊。請暫緩赴滇臬之任等語。趙煥聯一軍。前已有旨。令由桂陽桂東入粵。會合南韶各軍。以遏北江竄匪。著憚世臨仍遵前旨。飭令該臬司妥籌會勦。俟楚粵邊界肅清。再令該員統帶舊部。由貴州入滇。順道將黔省下游各匪。妥籌勦辦。將此由六百里各諭令

知之○以故扎薩克圖汗扎薩克頭等台吉瑪克蘇爾扎布子扎克達薩木巴爾襲職○以四川官軍攻勒黔滇各匪獲勝並克復貴州仁懷縣城賞副將許蔭棠參將謝茂隆巴圖魯名號知府劉嶽駿等升敘有差○予江西崇仁傷亡參將蕭高發等祭葬世職加等○予山東濟南府屬節年陣亡殉難紳民婦女八千七百二十六名口分別旌卹如例○庚寅諭內閣前因王有齡奏稱陣亡前署浙

江鹽運使金衢嚴道繆梓偏執已見創議株守以致省垣被陷請將該故員卹典撤銷業經奉

旨允准嗣據浙江舉人趙之謙等以該故員於杭城失陷時遇害最慘王有齡原奏係屬傳聞之誤懇將該故員應得卹典開復遣抱告赴都察院呈訴當經降旨交左宗棠查明具奏茲據左宗棠奏稱查明該故員在浙服官多年素稱廉幹保守衢郡尤著勞績杭城被

圍兩次派勇緹城斬賊並無堅不出戰之事及城陷時該故員猶登城拒戰身受多傷遇害尤為慘烈王有齡奏參撤銷卹典實屬一時疏誤請將前得卹典給還等語繆梓著賞還卹典以慰忠魂○又諭張之萬奏參帶兵過境之武員騷擾地方請旨革職等語提督銜記名總兵直隸昌平營參將李曙堂統帶選鋒營兵勇由揚州赴甘肅賊經過河南虞城等縣違例需索贏馬車輛等項復勒折夫馬等價稍有不遂卽恃眾逞兇任意開闢臨行時復勒逼各州縣出具並無濫支濫付各結兵以衛民似此沿途騷擾帶兵官並不嚴加約束實堪痛恨李曙堂著卽行革職以為帶隊騷擾者戒嗣後各路徵調官兵經過各州縣地方均著住宿城外不准擅自入城應給米粥等項由地方官先期送至城外若帶兵官不能嚴加約束致兵勇索擾商民者卽由該地方官據實稟揭由該督撫參辦並著

各路統兵大臣。於出征弁兵。嚴加約束。一體  
懍遵。不准入城騷擾。以明紀律而肅戎行。○  
諭議政王軍機大臣等。前據劉長佑奏。任邱  
縣民人陳如汰等。謀殺夏壽域一案。業經審  
明情由。該犯之母陳趙氏。輒稱委員王啟曾  
與宗室志照。曾向伊子索借不遂。非刑拷逼。  
架詞赴京呈控。希圖翻案。請將此案仍交直  
隸審辦。當經降旨。令宗人府查明宗室志照  
訊取供詞具奏。茲據宗人府奏。訊據宗室志

照。卽志照供稱。伊於咸豐八年間。因雇工山  
東人趙四引薦。與王啟曾交好。是年十二月  
及次年正月。見過兩次。王啟曾給過伊玉搬  
指一箇。以後並未見面。本年三月間。志照私  
往保定。於二十四日進城。寓富盛店內。因尋  
覓候補知縣瑞斌之家人楊富亭。知已隨往  
新樂縣任所未遇。於二十五日。我向王啟曾  
借幫盤費。二十六日。伊同王啟曾遊逛。同至  
利順店。陳天太處坐談。王啟曾向陳天太借

銀千餘兩未允。當卽回寓。志照於二十七日  
起程回京等語。此案關鍵。總以陳如汰是否  
確係謀殺夏壽域正兇為斷。至陳趙氏牽控  
各節。其為意存翻案。亦屬顯而易見。惟據志  
照所供。與王啟曾向來交好。本年復在保定  
會晤。並目覩王啟曾向陳天太借銀各情。是  
否實有其事。亦不能置之不問。著劉長佑按  
照供詞內所指人證。提案訊問。有無其事。迅  
速覆奏。再行候旨辦理。原摺著鈔給閱看。將

此諭令知之。○又諭。左宗棠奏臬司查無下  
落。遴員接署臬篆。請將協濟楊岳斌行賄抵  
解甘餉。存庫養廉銀兩。作為京餉。匯兌解京。  
及劉典、李榕。均請開缺。另簡各摺片。張運蘭  
馳援武平縣城。孤軍挫陷。身受重傷。至今尚  
無下落。所有福建按察使印信。現存汀郡。刻  
下該處軍情緊急。自應遴選知兵大員。前往  
接署。著照左宗棠所請。福建按察使卽著王  
德榜署理。並飭令速帶所部。由江西瑞金入



汀會合各軍。實力攻勦。毋稍遲誤。其張運蘭實在下落。並著左宗棠。徐宗幹。查明具奏。劉典現由左宗棠檄赴汀州勦賊。軍務喫緊之時。未能遽准終養。其浙江臬司本任。卽無庸先行開缺。現署臬篆之林聰彝。如果閱歷尚淺。於此缺不甚相宜。卽著左宗棠另派賢員接署。或於鄰近省分。另有所知人才。亦可酌保數員。候旨簡用。李榕現在皖北帶兵。一時未能履任。業准其開缺。浙江運司已簡放楊

昌濬。所遺浙江糧道一缺。並令周開錫補授矣。馬新貽已屢經寄諭。催令赴任。著左宗棠再行咨催。毋令延緩。左宗棠所陳浙江籌餉維艱。甘餉無可措撥。請籌銀四萬兩。解交楊岳斌應用。抵作甘餉等語。自係實在情形。第楊岳斌募勇赴甘。非集成鉅款。難以成行。入甘以後。協餉尤關緊要。仍著左宗棠於無可籌畫之中。極力設法。將欠解之四萬兩。陸續解赴湖南。以符前撥八萬原額。其甘省協餉。

並著源源籌解。以維大局。毋許藉詞推諉。京餉關繫緊要。仍著英桂。徐宗幹。遵照戶部原奏。於閩海關及茶稅欠解項內。迅籌解納。至養廉係左宗棠應得辦公之項。該督懇將養廉一萬兩抵餉解京之處。礙難允其所請。如業已匯兌來京。卽著英桂於關稅項下。如數撥還可也。將此由五百里各諭令知之。○又諭張之萬等奏。髮捻分股蔓擾。嚴扼豫邊。並商城光山一帶。截勦竄賊。各摺片。前因價格

林沁等奏。廣濟地方股匪。竄擾黃麻。恐北犯豫防。已令成保。陳國瑞。向光州一帶扼紮。國瑞並選帶馬隊。馳往光州。當經諭令會同張之萬。督飭防軍。奮力扼勦。茲據張之萬等奏。賊由英山擾及商城邊境。復由蘄水上犯。逼近豫南。英山竄匪。有陳大澹等。在內。商固一帶。皆其熟徑。其勢鋌而走險。漸有深入之虞。而黃麻又與信陽羅山處處接壤。亟宜嚴密扼勦。方免竄入腹地。且張總愚。陳大澹。為豫

省積年巨患。若不乘此大兵雲集之際。合力兜剿。迅圖聚殲。儻再令逃。後患何時可已。該撫等已飭王文行等馳赴光羅適中之地。探賊迎剿。趙鴻舉等馳赴商城邊境之蘇仙集。會合張曜之軍夾擊。卽著嚴飭各軍。遇賊卽擊。毋令深入。擾及完善。蘇仙集之匪。經張曜前隊親軍與僧格林沁所派之春壽馬隊合兵進逼。賊向商城以北奔竄。張曜繞至光山一帶。由北面橫截。該匪由光山竄往西南。

亟宜乘其窮蹙。一鼓殲擒。著僧格林沁嚴飭春壽會合豫軍。分路窮追。毋令該逆得以喘息。勒辦自易得手。張之萬。毛昶熙。亦卽督催各軍。盡力追擊。並分飭沿途地方民團。扼要堵截。不可稍涉大意。將此由六百里各諭令知之。○蠲免河南永城。夏邑。項城。汝陽。正陽。新蔡。信陽。確山。息。商邱。沈邱。十一州縣被擾地方新舊額賦有差。○辛卯諭議政王軍機大臣等。徐宗幹奏。汀漳等處賊氛肆擾。派兵

防剿。一摺。據稱龍巖州踞賊日眾。漳郡城賊未退。焚殺慘虐。並南靖平和相繼失守。現在檄飭丁翼帶勇五百。赴大田交界地方防堵。委趙均帶勇千餘。赴甯洋。催林文察由同安一路進兵。並撥隊前赴甯洋扼紮。惟盼浙軍及援江各軍。早抵閩境等語。前據左宗棠奏稱。閩省軍情緊急。業經派令黃少春。劉明珍赴邵武。劉典赴汀州。高連陞赴福州。現在汀漳賊勢猖獗。著左宗棠分檄派出各員。迅帶

所部。剋期入閩。該督抵衢後。仍著體察情形。入閩督剿。迅掃逆氛。前因鮑超請假。諭令左宗棠等卽飭宋國永。婁雲慶。分帶鮑超所部赴閩剿賊。著曾國藩再行檄催該員等迅速前進。歸左宗棠調遣。毋失機宜。江省兵勇。可以抽撥入閩者。沈葆楨此時當已酌量派往。卽著迅催起程。毋稍延緩。左宗棠前派援閩之兵。已有一萬八千。而由江援閩者。尚有宋國永數起。兵力已厚。徐宗幹當飭閩省兵勇。

併力協勦。務將此股賊匪聚而殲旃。省城防守事宜。隨時與英桂妥籌布置。毋稍大意。漳郡紳民。皆欲齊心殺賊。義勇可嘉。徐宗幹須乘機鼓勵。以輔兵力。曾玉明內渡。已抵廈門。卽著催令統領水師。會同現派之陸軍相機兜勦。毋得專待援軍。致賊延蔓。廣東自平遠失守後。近日軍情。未據毛鴻賓郭嵩燾馳奏。現在該縣是否克復。李福泰出省。已抵何處。賊勢如何。均著毛鴻賓等詳細具奏。前據沈

葆楨奏。廣東嘉應大埔均已失守。毛鴻賓等何以並未奏報。卽著將各該州縣失守情形。確實查奏。毋稍粉飾。此股賊匪。雖已趨重閩疆。而粵省邊隘。多與閩省毗連。隨處皆可回竄。毛鴻賓等尤當力籌防勦。不可稍有疏虞。其王文瑞趙煥聯兩軍。著毛鴻賓等分咨江西湖南。催令迅速赴粵援勦。劉連捷一軍。昨據官文奏。該員坐守皖境。並未入楚等語。此時鄂皖賊勢已熾。亟須一鼓作氣。迅速殲除。

著曾國藩迅速催劉連捷等軍。剋日拔隊前進。會合楚師。前後夾擊。或僧格林沁或官文調遣。均須飭令遵調。不得專候曾國藩到楚。始行前進。致誤事機。徐宗幹摺內稱由六百里馳遞。而發報時又用六百里加緊。殊屬不合。嗣後務歸畫一。以符體制。將此由六百里各諭令知之。○壬辰。諭議政王軍機大臣等。給事中博桂奏。直隸寶坻縣新安鎮地方。惡棍王得荃。與鄭五劉三。並東路廳刑書李四李

五。本處駐防旗人項三奎。狼狽為奸等語。著萬青黎卞寶第劉長佑。按照摺內所陳。確查究辦。並將逸盜高孝。及王得荃等嚴拏務獲。原摺著鈔給閱看。另片奏。熱河土棍趙秀昌等。聚眾傳徒。製造槍械。與都統衙門門丁係屬姻親。勢燄愈張等語。匪徒倚勢擾害平民。最為閭閻之患。著劉長佑密派委員前往查拏。提省審辦。毋令疏脫。原片一件。著鈔給劉長佑閱看。將此各諭令知之。○又諭官文奏。

擊勦上竄髮逆獲勝。擬俟楚境肅清。卽飭溫德勒克西等赴甘援勦。並陣斃藍城春各摺片。賊匪由新洲倉子埠竄過黃陂。勢將突撲漢口。經官軍堵截。該逆折回黃陂。竄入孝感之楊店。分股擾至九子墩雙廟等處。經周鳳山等督軍分路截勦。將白沙鋪賊館蹋毀。賊向三家店趙寺埠斗岡嶺分竄。賊之前隊已至德安。官文現今李成謀。梁洪勝兩軍。由應城天門繞出賊前迎擊。江長貴嚴防襄樊。

隨棗。張啟基等嚴扼襄河等處水路。著卽嚴飭派出各軍。分路緊躡。合力勦洗。為一鼓聚殲之計。以期迅殄逆氛。官文所稱溫德勒克西等馬步各軍。若賊西竄。卽可跟蹤追擊。就便入甘等語。該督如令溫德勒克西等督軍西追。勢將縱賊入秦。又成不了之局。官文惟當督飭該員等。將黃孝德安等處之賊。實力勦辦。就近殄除。毋得以鄰為壑。致令窮蹙之賊。復肆披猖。俟此股賊匪殄滅。卽令溫德勒

克西等馳赴甘省。以厚兵力。僧格林沁現在追賊赴皖。據官文奏稱。楚軍均已回鄂。何以並不會同該親王之軍協同埽蕩。其應如何撥兵前赴皖豫交界。越境追勦。以固邊圉之處。並著官文妥籌辦理。前據僧格林沁。官文奏稱。偽將甘懷德等誘令偽端王藍城春至成保營前投降。當將藍城春解送到營。訊明後卽將該逆凌遲處死。茲據官文奏。成大吉在麻城之木牌樓地方。將藍呈春已殪於陣。

所奏情節。前後不符。該逆藍呈春。是否卽係藍城春。究竟在何處殲斃。著僧格林沁。官文確切查明具奏。將此由六百里各諭令知之。○又諭。前因穆圖善帶兵出關。甯靈一帶。兵力單薄。諭令德勒克多爾濟。桂成。酌挑精兵一千名。赴都興阿軍營調遣。茲據奏稱。綏遠歸化。防務緊要。口外各廳。多與甘境毗連。歸化回戶眾多。良莠溷雜。城小而固。又無堡壘可守。統計兩城存營兵僅千餘名。緩急尚

難兼顧。至沿邊沿河駐紮滿蒙等兵。口岸過多。猶虞不敷分布。冬令河凍。防務尤不可稍鬆。請仍停抽調赴甘等語。所奏自係實在情形。歸綏官兵。卽著暫緩抽調。德勒克多爾濟桂成。惟當飭令在防各軍。加意戒備。慎固邊圉。甯靈回匪。被勦窮蹙。卽恐有東竄之意。其駐紮磴口沿河一帶之蒙兵官兵。防堵尤關緊要。著卽於伊克昭各盟內。就近添調勁旅。擇要分段巡防。毋稍大意。都興阿亦當就現有兵力。聯絡甯夏官兵。將甯靈一帶之賊。妥籌勦辦。以期及早廓清。德勒克多爾濟等另片奏。伊克昭蒙古官兵。駐防沿河沿邊一帶。口糧欠發日久。軍械亦不得力。擬由綏遠庫存烏槍內。撥給三百桿。所需藥鉛。由歸綏道發給。先給一月口糧。於糧餉廳庫存儲款內。暫行動支。卽著照所請行。嗣後該官兵口糧。並著沈桂芬與防兵一律籌款發給。毋令缺乏。以示體恤。至兩盟蒙古。自設防以來。籌備

駝馬口糧等項。該滿蒙旗綠官兵。駐防兩載。亦不無微勞足錄。著准由德勒克多爾濟等擇尤請獎。毋許冒濫。將此由五百里各諭令知之。○兼署順天府府尹萬青藜等奏。遵查香河縣知縣黃曾居官勤慎。無信任丁役攬權納賄情事。香河逸犯王金龍。聞在熱河地方逃匿。已飛咨熱河都統飭屬嚴拏。務獲究辦。報聞。○雲貴總督勞崇光等奏。分派官兵。勦辦鎮遠石阡等府苗教各匪。得旨。著嚴飭該地方文武。及帶兵各員。認真勦辦。並咨照惲世臨派兵會勦。務將餘匪一律捕斬淨盡。毋留餘孽。○以鑲黃旗滿洲副都統克興阿署鑲紅旗蒙古副都統。○以記名提督張樹珊為廣西右江鎮總兵官。○以哈密勦滅回匪。賞回子郡王伯錫爾黃纒。○補鑄浙江杭州府知府。杭州府理事。總捕東塘中塘西塘各同知。杭州府經歷。儒學。知事。照磨。司獄。杭州府稅課大使。城南稅課大使。江漲稅課大

使錢塘縣知縣儒學安谿稅課大使仁和縣知縣儒學塘棲鎮巡檢橫塘稅課大使海甯州知州判儒學富陽縣儒學餘杭縣知縣儒學臨安縣知縣儒學於潛縣知縣儒學新城縣知縣儒學昌化縣儒學各印信關防條記從兼署巡撫左宗棠請也○以安徽太和縣紳民力保危城永廣學額四名○以勸捐濟餉予雲南道員張兆辰等加銜升敘有差○以貴州貴陽等處勦匪出力賞遊擊張樾

唐天佑已圖魯名號知府周秉正守備李勝山等花翎黃文禮等藍翎餘加銜升敘有差○以貴州銅仁擒獲首逆包茅仙賞知府蔡興槐等花翎餘升敘有差○以貴州黃平等處勦匪獲勝賞把總杜玉堂等藍翎知縣黃啟蘭等升敘有差○以貴州官軍協勦四川敘州髮逆出力賞知州陸祐勤花翎餘加銜升敘有差○予雲南舊縣陣亡知州熊錫齡等祭葬世職加等○癸巳諭內閣前因常清

奏葉爾羌參贊大臣景廉因病咨請開缺曾經賞假一箇月調理嗣據奎棟奏景廉已於拜摺後起程進口當以該大臣並不靜候諭旨擅自交卸起程降旨嚴行申飭仍令迅速折回本任景廉於行抵歸化後又經德勒克多爾濟代為陳請復行賞假一月飭令病勢稍愈卽行折回茲復據德勒克多爾濟奏據景廉呈稱病勢日深懇請開缺回旗並委員驗看該大臣病勢實係沈重等語景廉身膺邊寄職守攸關縱使病非虛捏亦當候旨遵行何得擅自起程且新疆現當多事之秋防勦均關緊要該大臣藉病推諉徑行離任謂非規避取巧其誰信之景廉著卽行革職仍著德勒克多爾濟飭令在歸化城趕緊醫治一俟稍痊卽行發往都興阿軍營聽候差委不准藉詞再行逗遛致干罪戾○諭議政王軍機大臣等都興阿等奏穆圖善督兵到營擬進攻甯夏請嚴催解餉一摺穆圖善一軍

前有旨令其統帶出關駐紮哈密。茲據奏稱。該將軍所部僅止步隊五千。馬隊兩起。難以獨攻一路。而前敵兵數更單。且相隔數百里。勢難聯絡。必須合兵先攻甯夏。移圖善已轉回定邊。剋期由草地渡河。會同前敵進剿。所籌尚妥。著卽會合杜嘎爾之軍。進攻甯夏。殲除醜黨。俟甯夏克復後。再行整兵出關。都興阿務當督飭杜嘎爾等。隨同移圖善奮勉圖功。仍隨時與甯夏各營聯絡聲勢。一鼓成功。

當此冬寒。餉精支絀。兵勇飢困。自在意中。所有山西陝西每月應解移圖善軍餉二萬兩。著沈桂芬、劉蓉各先撥兩箇月。飛速運解。至都興阿馬隊每月應由山西解銀一萬五千兩。西蒙克西克、陳天佑等營應由陝西籌解月餉。並著該撫等趕緊撥解。毋得再事耽延。致誤軍食。另片奏請催直晉官兵軍餉。翁同書所帶直晉官兵積欠至兩月之久。凍餒不堪。言狀著劉長佑、沈桂芬源源撥解。其積欠

餉銀著一併如數撥解。又片奏山西茅津渡駐防之楚勇一千名。素稱精壯。請調撥赴甘。原調之大同兵一千名。擬遣撤回晉等語。山西防務已鬆。著沈桂芬卽將派防茅津渡之楚勇一千名。撥赴甘肅。歸移圖善統帶。俟此項勇丁到營。卽將原調之大同兵一千名。遣撤回晉。彼時如尚須防河。再由該撫奏請調派。以期兩無所失。楚勇口糧卽照該將軍等所請。每月加解銀六千五百兩。務須按月接濟。毋得稍分畛域。致有譁潰之虞。雷正綰於攻克蓮花城後。令陶茂林督帶十七營赴蘭垣。前有旨令將趙必達等軍歸陶茂林統帶。該提督是否已到省垣。嗣後蘭州一帶軍情卽由陶茂林會同恩麟迅速馳奏。雷正綰回軍平涼。著卽審度軍勢。恢復固原。以便節節北趨。與都興阿等合兵夾擊。肅清甯靈一路。曹克忠暫紮蓮花城。何路緊要。卽調派援應。以期早日廓清。用慰朝廷軫念西陲之意。將

此由六百里諭知都興阿穆圖善雷正綰劉長佑沈桂芬劉蓉並傳諭陶茂林知之○撥直隸帳房二百二十架火藥五千斤鉛丸三千斤山西帳房一百架鳥槍一百桿火藥三千斤鉛丸二千斤火繩一萬盤解赴甘肅甯夏軍營備用○緩徵山西薩拉齊廳被水地方新舊額賦○甲午諭議政王軍機大臣等喬松年奏扶逆就殄皖省賊蹤淨盡並陳現辦情形一摺髮捻各匪前經僧格林沁等督

軍追剿受降十餘萬眾旬日之內漸就廓清惟扶逆陳得才一股尚在後路經蔣凝學一軍自楚追及疊獲勝仗殺賊甚眾收降三萬餘人僧格林沁亦由霍山派兵進擊該逆前後受敵計窮服毒身死蔣凝學將該逆屍身撥獲送至僧格林沁軍營查驗皖北一律肅清此股髮逆竄擾楚皖陝豫已及十年陳得才曾擾蘇州尤屬著名巨匪現在計窮身死洵足寒賊膽而快人心所獲是否陳得才正

身即著僧格林沁查明具奏髮逆漸就殄滅惟擒匪陳大濤張總愚兩首逆前據僧格林沁奏俱在英霍潛太一帶山內伏匿已飛咨喬松年一體撥拏仍著僧格林沁喬松年嚴飭該處帶兵將弁分投搜緝務在必獲前據官文奏稱賊之前隊已至德安已令李成謀統前截擊皖省現無賊蹤著喬松年督飭蔣凝學等軍馳赴楚境會合夾擊以收聚殲之效豫省距楚較近前據張之萬奏賊由英山

擾及商城邊界復由蘄水逼近豫南該撫已派王文行張曜等軍迎剿當經諭令張之萬督軍追剿扼要堵截並著喬松年選派皖防將弁帶兵前赴豫疆與豫省各軍併力兜擊務期盡殲醜類將此由六百里各諭令知之○又諭寶善奏遵挑官兵備調一摺前因都興阿奏調黑龍江官兵及西丹閒散一千名當經諭令該將軍斟酌辦理茲據寶善奏稱擬由齊齊哈爾挑兵一百名黑龍江挑兵一



百名。墨爾根城挑兵五十名。呼倫貝爾挑兵一百五十名。布特哈挑兵一百名。共五百名。俟奉到諭旨。卽行起程等語。著照所擬。先行挑齊。仍著暫駐各本城候旨撥調。務須年力精壯。弓馬嫺熟者。方可得力。不得以疲弱充數。致誤事機。西丹閒散。既據寶善奏稱。概皆老弱。不諳技藝。卽著無庸勉強派撥。此次備調官兵。應需整裝銀兩。著照該署將軍所擬妥籌辦理。以示體恤。將此諭令知之。○以正

藍旗滿洲副都統載騫。暫署鑲黃旗蒙古副都統。鑲藍旗漢軍副都統毓祿。署正白旗漢軍副都統。○調喀喇沙爾辦事大臣武隆額。為葉爾羌參贊大臣。以塔爾巴哈台領隊大臣榮全。為喀喇沙爾辦事大臣。賞內閣侍讀學士扎拉芬頭等侍衛。為塔爾巴哈台領隊大臣。○以安徽官軍殄滅首逆陳得才。賞還道員蔣凝學布政使銜。予提督張得勝。何紹彩優敘。○乙未。諭內閣。這所參疏防監犯越

獄之管獄官直隸東光縣典史王蔭鼎。著卽革職拏問。交劉長佑提同刑禁人等嚴訊。有無鬆刑賄縱情弊。按律定擬。有獄官署東光縣知縣程映璣。著先行交部議處。仍勒限將逸犯宋羣。陳連喜。王青洋。趙修恆。王三等五名。嚴緝務獲。儻限滿無獲。卽行從嚴叅辦。向來疏防監犯越獄。管獄官應卽革職拏問。此案典史王蔭鼎。於擬斬監犯宋羣等。並不留心防範。至令越獄至八名之多。實非尋常玩忽可比。該督何以並不嚴行叅奏。僅請將王蔭鼎與程映璣。均行交部議處。著據實覆奏。尋奏查定例。未經擬定罪名人犯越獄。如供證未確者。先照軍流徒杖等犯越獄之例。將管獄有獄各官。分別議處。此案逸犯宋羣。供詞屢異。是否正兇。仍難懸定。其餘逃脫各犯。未定罪名。是以先行特叅。請將管獄有獄各官。分別議處。報聞。○調鑲藍旗蒙古副都統恩麟。為鑲紅旗滿洲副都統。以前任烏嚕木

齊領隊大臣慶至為鑲藍旗蒙古副都統○  
丙申諭內閣前因曾國藩奏江甯克復請將  
廣東釐金應協江皖之七成停止當以江甯  
餉源未裕未經允行嗣據戶部奏廣東軍需  
緊急餉項浩繁曾於應解江皖七成釐金內  
准令該省再酌留四成以資支應茲復據曾  
國藩奏粵省現有軍事釐金解江終覺於理  
未安請仍令該省全數截留等語該大臣於  
廣東釐金以為非應得之款形諸章奏不啻  
再三此時復以粵東現有軍需仍請停止籌  
畫實為周至嗣後廣東釐金即著該省全數  
截留俟軍事稍平再行酌解曾國藩軍營彌  
補欠餉江西釐金自本年沈葆楨奏定與皖  
營各提一半曾國藩嗣派鮑超周寬世兩軍  
赴援江西即將此一半釐金留充該兩軍之  
餉茲據曾國藩請將江西釐務概歸沈葆楨  
經收其該兩軍口糧自應由沈葆楨妥籌給  
發嗣後江西釐金即著照曾國藩所請由沈

葆楨派員經收並將鮑超周寬世兩軍口糧  
妥為接濟毋令缺乏其饒州景德鎮兩卡仍  
著照舊撥解祁門糧臺以資饋運至曾國藩  
之軍現在分駐金陵及皖南北者為數尚眾  
其防兵口糧及將來撤勇欠餉自應妥為籌  
備蘇皖皆該督所轄省分所有該二省鹽務  
釐卡仍著照舊撥解由曾國藩提用○諭議  
政王軍機大臣等曾國藩奏請將粵釐停止  
並江西釐務請概歸沈葆楨經收等語本日  
業經明降諭旨照所請行矣粵釐本為江皖  
協餉一大宗毛鴻賓郭嵩燾從前屢以餉需  
竭蹶分成解皖存留不過涓滴為言此後全  
數留充該省軍需餉源不為不裕毛鴻賓郭  
嵩燾惟當搏節動支以期日有起色至廣東  
及粵海關應解京餉總未能如期報解該省  
既得此鉅款更不得以餉項支絀藉詞延宕  
嗣後著該督撫並粵海關將應解京餉遵照  
部定限期趕緊如數報解毋得藉口扣收未

旺再行遲緩致誤要需。江西釐金自曾國藩奏派鮑超周寬世兩軍赴援江西後其應行解皖之半釐卽留充該兩軍之餉。是江省釐金雖有協皖之名已無解皖之實。曾國藩現復請將該省釐務概歸沈葆楨經收其鮑超周寬世兩軍自應由該省妥籌供應。現在瑞金等處餘股未淨閩粵之賊尚虞回竄該兩軍自難卽撤著沈葆楨將此兩軍妥為調度其應給口糧卽由沈葆楨給發以清界限至

江省饒州景德鎮兩卡本係提出作為祁門糧臺辦米之需嗣後仍著照舊撥解祁臺以資饋運將此由五百里各諭令知之○又諭曾國藩奏遵赴皖鄂交界督兵擬仍駐紮安慶六安等處派劉連捷等入黃州歸官文調遣並調劉銘傳等率淮勇渡江北勦一摺前因楚皖賊勢甚眾僧格林沁官文均未得手是以諭令曾國藩赴楚皖交界督師勦賊嗣據僧格林沁等先後奏報蕪水獲勝成大吉

軍解圍賊竄英山等處經僧格林沁等督師進剿擒獲首逆多名降者十餘萬眾昨又據喬松年奏報扶逆陳得才自戕髮逆勦除淨盡皖省一律肅清是楚皖近日軍情較之半月以前大不相同現在楚境餘賊由黃孝竄德安一帶逆數無多楚軍可敷勦辦曾國藩又派劉連捷等軍入楚歸官文調遣計日定可廓清著卽飭令劉連捷李鶴章劉銘傳等軍迅赴黃州德安等處遇賊卽擊如賊趨皖豫並令各軍分投防勦通力合作為一勞永逸之計曾國藩卽可無庸前赴安慶亦無須交卸督篆仍駐紮金陵妥籌調度李鴻章現在入關監臨俟出關後仍回江蘇巡撫本任並咨行吳棠富明阿各回本任江蘇各郡縣新復規制稍定一切理財用人撫綏安輯諸事宜非老成碩畫真能視國如家者不克勝此鉅任曾國藩惟當仰體朝廷倚畀之重次第經畫奠安黎元所有覈算報銷及籌餉撤

勇諸事宜。卽在金陵督飭司道。從容辦理。不得遽盟功成身退之志。用副厚望。將此由六百里各諭令知之。○又諭。張集馨奏。敬陳各軍分道進剿。並籌畫糧餉章程一摺。雷正綰一軍。攻拔蓮花城後。現由涇州北原進兵。規取鹽固。並調曹克忠八營。幫同進剿。分撥六營屯紮秦州天水。以防回逆分竄陝疆。卽著都興阿。雷正綰。督飭各軍。迅克固原。併攻鹽茶。將各村逆窟。悉數掃除。疏通驛路。卽可由

靖遠直達蘭垣。屆時或助勦甯靈。或進援西甯。如河州逆勢鴟張。兼可分兵馳應。並著雷正綰隨時會商。都興阿等。妥籌辦理。陶茂林所部各營。前經雷正綰檄令由靜甯徑赴蘭州。卽著迅解靜甯之圍。馳赴省垣。將省防布置妥帖。卽由河干沙泥一帶東行。促解河州城圍。收復狄道。仍飭該提督步步為營。穩慎進取。毋得稍有疏虞。前據都興阿等奏稱。穆圖善已由定邊草地渡河。會合杜嘎爾之軍。

進攻甯夏。並著該將軍懍遵前旨。與前敵聯絡聲勢。奮勉圖功。以副委任。都興阿。雷正綰。俟克復固原後。如甯靈一路。兵力尚單。現紮慶陽防守之八營。能否調往助剿。並著屆期會籌妥辦。甘省督標城守六營。弁兵千餘。均係回籍。中軍副將趙秉鑑。左右多係回弁。張集馨請俟雷正綰到省後。將回弁回兵。調入大營隨剿。有無窒礙。抑應作何彈壓撫馭之處。著雷正綰。張集馨。會同恩麟。慎密酌辦。張

集馨於拜摺後。馳赴平涼。著將應辦一切機宜。與雷正綰悉心籌商。布置妥協。仍遵前旨。迅赴蘭垣。於行抵蘭州後。卽行馳奏。所有簡閱兵勇。鎮撫回眾各事宜。並著照所擬。商同都興阿。雷正綰。陶茂林。恩麟等。迅籌妥辦。甘省需餉孔殷。張集馨與雷正綰。商委知縣張清濟等。分赴三水等處。勸捐濟餉。如能集有成數。卽由雷正綰等從速奏獎。以示鼓勵。並著恩麟飭甯州靈臺鎮原正甯四屬。將曹克

忠各營所需糧石。妥籌供支。其隆德靜甯各屬。距鹽固較近。並飭隨時解濟。以資軍食。雷正綰仍當懍遵前旨。迅拔固原。節節北趨。與都興阿聯絡夾擊。迅殲醜黨。克藏全功。以慰懸望。將此由六百里諭知都興阿。穆圖善。雷正綰。並傳諭陶茂林。恩麟。張集馨。知之。○又諭。張集馨奏。通盤籌畫。餉需一摺。據稱。雷正綰馬步二十八營。月需餉銀八萬數千兩。而製造帳房。修理軍械等款。尚不在內。曹克忠馬步十六營。陶茂林馬步十八營。每軍各月需銀數萬兩。向由陝西供支。該省餉源枯竭。雖有報解。杯水車薪。亦屬無濟。部撥之款。各直省督撫均以自顧不遑。未能如期籌撥。現與雷正綰籌商。自本年臘月起。以半年為率。甘肅腹地軍務。可期大有起色。不至再累鄰疆。查湖北從前協濟多隆阿營。每月三萬五千兩。並協撥軍火等件。嗣多營裁撤。協餉亦停。請飭湖北督撫。仍照協濟多營數目。籌解

半年。山西河東鹽課四十餘萬兩。向係協撥甘餉。自必照章運解。請飭山西每月再籌三萬兩。四川每月籌解銀二萬兩。直隸山東河南每月各籌解銀一萬兩。概以半年為率等語。甘省餉項奇絀。係屬實在情形。既據張集馨與雷正綰籌商。自臘月起。以半年為率。甘省軍務可期速了。該督撫等自當竭力籌撥。以期眾擎易舉。力保嚴疆。著官文。吳昌壽。仍照協濟多隆阿營章程。每月解銀三萬五千兩。並將軍火等件源源接濟。山西除將河東鹽課四十餘萬協撥甘餉外。著沈桂芬每月再籌解銀三萬兩。駱秉章每月籌解銀二萬兩。劉長佑閻敬銘張之萬。每月各籌解銀一萬兩。均以半年為率。該督撫等務當如數籌撥。按月批解甘省。毋令缺乏。將此由五百里各諭令知之。○又諭。據張集馨奏。前任甘州提督索克雇覓偷它金沙回民二萬餘人。專備勦捕生番之用。報明總督樂斌。以此項金

夫。作為官兵。卽以金沙變價。充為口食。原屬一時權宜之策。自索文出缺後。該金夫無籍可歸。自必仍以它沙為業。聞烏嚕木齊滋事逆首。卽係索文之子。參將索煥漳。如果屬實。恐勾結共謀不軌。則甘涼勢必鼎沸。現在甘涼肅尚屬完善。請密飭都興阿派員潛往訪查等語。此項金夫。多係亡命之徒。無籍可歸。且曾受索文雇用。如烏嚕木齊首逆果係索煥漳。該金夫均係回民。犬羊之性。何知順逆。

難保不煽惑助惡。誠為可慮。著都興阿不動聲色。密派幹員往查此項人等。是否業經解散。若仍盤踞金廠。卽密飭該處提鎮道府嚴密防範。以期消患未萌。並須先行查明該省現任各營員。有無回人。方可行文密商。不可稍有洩露。致啟猜嫌。是為至要。原片著鈔給閱看。將此密諭知之。○引見已革江甯布政使楊能格。得旨。著以按察使候補。發往都興阿軍營差遣委用。○欽差大臣曾國藩奏。請

於江甯府城建立昭忠祠。彙祀陣亡湘軍。允之。並飭地方官春秋致祭。○河南巡撫張之萬等奏。春壽張曜等軍。追賊於羅山之宣化鎮。擒斬甚多。匪向西南竄去。現飭各軍合剿。得旨。竄往西南之匪。固應嚴防回竄。豫疆仍應嚴飭張曜。王文行等軍。會合楚軍夾剿。聚而殲旃。毋留餘孽。○追予浙江杭州殉難署布政使道員麟趾祭葬。世職如布政使例。諡壯介。入祀昭忠祠。母瓜爾佳薩克達氏。暨子

女。旌卹如例。○予河南曾家岡陣亡千總昌萬國。把總劉得勝。祭葬。世職加等。○蠲免浙江西安。永嘉。建德。淳安。壽昌。遂安。縉雲。宣平。八縣被擾地方積欠額賦。○丁酉。以陝西官軍疊克城隘。暨官紳辦防轉運出力。賞副都統富魁。總管佛什洪阿。協領清福。明祿。霍爾慶額。佐領王寬。溫成額。副將陳東霖。劉洪貴。唐清。孫。馬。從勝。李。長福。參將李佑。清肅。起鳳。遊擊陶金龍。陳廣治。都司蔡玉堂。王天祥。巴

圖魯名號都司金起發等花翎訓導丁道銘等藍翎餘加銜升敘開復有差

大清穆宗繼天開運受中居正保大定功聖智誠孝信敏恭寬毅皇帝實錄卷之一百十九

大清穆宗繼天開運受中居正保大定功聖智誠孝信敏恭寬毅皇帝實錄卷之一百二十

臣等謹將本年以來各省督撫奏報各款恭摺具陳伏乞聖鑒訓示謹奏

同治三年甲子十一月戊戌朔

上詣綏履殿問

慈安皇太后安平安室問

慈禧皇太后安至丁卯皆如之○以神靈顯應

加福建安溪縣

城隍神封號曰護國○諭內閣戶部暨載容等存誠等奏內倉失火即時撲滅請將該倉監督議處等語內倉重地理宜防範嚴密此次橐庫無端被焚難保非因匪徒希冀偷竊溷入所致著前鋒統領護軍統領轉飭長安

門直班官兵嚴拏務獲究辦嗣後仍飭加意防守儻再疏懈必將該弁兵從嚴懲辦所有內倉監督員外郎瑞琛升泰均著交部議處○諭議政王軍機大臣等恭親王等奏工程待餉孔殷請嚴飭各省依限解清一摺

定陵暨順水峪工程應於明春工竣一切物料均須趕緊籌辦萬難再緩各省欠解之款為數尚鉅

文宗顯皇帝梓宮尚未奉安凡在臣工宜如何激發天良於籌解萬分棘手之中先其所急若再任催罔應必至貽誤要工清夜捫心其能當此重咎耶著駱秉章等懍遵疊次諭旨迅將欠解工程銀兩統限於本年十二月內全數解清毋得仍前玩忽致干咎戾經此次嚴諭之後如有敢故違定限再行帶欠者即著恭親王等按照戶部奏定處分章程將逾限之藩司監督等移咨吏部嚴加議處並將

督催不力之督撫一併交部叅處另片奏委員解餉遲延請嚴加懲處等語各省管解餉銀委員往往在途逗遛到京後又延不投批實屬不成事體嗣後如有此等情弊即由工程處移咨吏部叅處並咨明該省督撫將該委員從嚴懲處以昭炯戒將此由五百里諭知駱秉章張之萬劉蓉並傳諭毓清師曾知之○以國子監祭酒衍秀為詹事府詹事○己亥諭內閣前因毛鴻賓等奏率屬捐廉助

餉並自陳不敢仰邀議敘朝廷念其因廣東軍需緊要共濟時艱首先報捐銀兩以資倡率尚屬急公加恩將毛鴻賓等交部從優議敘前任學政王澐等所捐銀兩分別移獎子弟以示區別茲據毛鴻賓郭嵩燾奏稱該督撫所得優敘請照學政司道等一體移獎子弟等語該督撫俱係封疆大吏祿入較豐竟欲與學政司道等官共希恩賞所見甚為卑陋毛鴻賓郭嵩燾前次所捐銀兩均著即行



發還並撤銷從優議敘中外臣工捐貲助餉給予獎敘自有一定權衡乃該督撫輒以己私事意存計較嘵嘵瀆陳殊屬不知大體毛鴻賓郭嵩燾均著交部議處尋議毛鴻賓郭嵩燾均照不應重私罪例降三級調用無庸查級紀議抵得旨均著加恩改為革職留任○諭議政王軍機大臣等曾國藩李鴻章奏請遣撤揚防兵勇節餉解甘等語前因甘省餉需支絀諭令李鴻章設法籌解茲據曾國藩等奏稱江省各屬蹂躪過久元氣大傷蘇滬釐稅及蘇皖鹽務釐卡等款仍須籌濟江皖兩省軍食惟揚防一軍可以裁撤即可騰出江北之餉半濟皖軍半解甘省所籌尚屬可行現在楚皖一帶賊勢浸衰諒不能肆意北竄貽害鄰疆揚防一軍自可遣撤以節經費該處現存兵勇共若干名著富明阿查明將現有馬隊裁汰疲弱揀選精銳派員管帶馳赴甘省都興阿軍營助勦所有一切勇

隊卽著分起妥為遣撤務須查照屢次裁勇章程嚴加鈐束並分咨該勇原籍各地方官量為安插俾安生業富明阿於遣撤兵勇後著卽馳赴江甯接印任事將整頓旗營撫綏勞來各事宜次第舉行以重職守江北之餉計可騰出若干著曾國藩李鴻章查明實在數目以一半分解甘省以濟要需以一半分濟皖軍前敵如甘省待用萬分緊迫卽將此有著之款儘力籌撥不必拘定一半之數並著妥議章程迅速具奏裏下河一帶現在無事該處地方本係該督撫等所轄自應妥籌兼顧以免疏失將此由五百里各諭令知之尋奏來年每月計可騰出有著之款五萬兩擬以三萬兩撥赴甘肅以二萬兩留供皖軍俟皖軍裁撤卽行併解甘肅報聞○又諭僧格林沁國瑞奏投降髮逆酌量遣留並督軍追勦髮捻竄匪各情形一摺投降人眾經僧格林沁督飭英翰等分別留營遣散業已就

緒辦理甚妥。仍著飭令帶兵各員。及沿途地方官。妥為彈壓。毋任別滋事端。其西竄股匪。向光山一帶奔逃。僧格林沁派令馬德昭。陳國瑞等。跟蹤追擊。斬殺解散甚眾。著僧格林沁。國瑞乘此聲威。嚴飭馬德昭。陳國瑞等軍。務將此股逆匪。悉數殲除。毋任遠竄。張之萬前已派令王文行等軍。馳赴信陽羅山一帶。會合張曜。春壽等馬步各隊。夾剿竄匪。仍著嚴飭各軍。分路兜擊。互相策應。使賊無路可

竄。即可一鼓殲擒。陳大濬。張總愚等均係著名首惡。現在竄匿何處。著僧格林沁。張之萬分飭各營。探明蹤跡。設法購擒。毋令免脫。其邱沅才一股。現竄隨州之高城一帶。勢漸西趨。僧格林沁現已飭張曜督軍緊躡。並著官文。迅飭西路防軍。迎頭截擊。力扼竄路。楚豫邊界。為賊匪往來熟徑。官文。張之萬務當督率。在事員弁。探明賊蹤。併力夾擊。以收聚殲之效。曾國藩昨已有旨。令其毋庸赴楚。其所

派劉連捷。李鶴章。劉銘傳等軍。已令其馳赴黃州。德安等處。剿賊。著官文酌量情形。分別調遣。以資得力。將此由六百里各諭令知之。○又諭毛鴻賓。郭嵩燾奏擊退各股逆匪。現籌防勒情形。並請調鮑超。勒除閩粵髮匪。及廣東現辦釐金情形。各摺片。粵中敗賊竄擾福建漳州所屬。康逆汪海洋復竄汀屬之武平。游騎四出。侵入粵境。既經吳贊誠。方耀等截剿。獲勝。而東路情形。仍屬喫緊。毛鴻賓

等現檄方耀帶勇四千名。由嘉應統赴閩境。會軍兜擊。並令程國彥。鄭紹忠。唐啟蔭。任星元等。分防要隘。李福泰督兵策應。所籌尚合機宜。即著督飭派出各軍。實力防剿。毋稍疏虞。鮑超已經賞假回籍。葬親。其所部之軍。前已有旨。令宋國永。晏雲慶分統其眾。入閩援剿。歸左宗棠調遣。宋國永等皆係勇敢善戰之員。再得左宗棠發縱指示。必能會合閩軍。痛埽賊氛。毛鴻賓等惟當嚴飭方耀迅速赴

聞合力夾擊將此股餘孽悉數殲除毋留後患所陳粵東釐金大概情形覽奏均悉該督撫等總當認真籌辦務令商民相安不至擾累而又能杜絕中飽之弊方足以收實效而免怨讟將此由五百里各諭令知之○江蘇巡撫李鴻章奏請於無錫縣惠泉山建立昭忠祠彙祀陣亡員弁兵勇允之並飭地方官春秋致祭○以內閣學士桂清為盛京工部侍郎○以廢弛營務革河南軍營侍衛富山

副都統善慶職仍留營○以廣東平遠鎮平兩縣城被匪竄陷旋即收復免知縣吳炳綬龐掌運罪仍革職留營予陣亡守備任士魁祭葬世職加等○豁免江蘇上元江甯六合江浦句容溧水高淳七縣被擾地方同治四年五年六年額賦○庚子諭內閣前因烏嚕木齊都統平瑞在迪化州全家殉難當經諭令該旗查明該故員是否另有子嗣在京奏明請旨茲據正黃旗滿洲都統恭親王等奏

稱該故員京中別無子嗣本族公議願將該故員之胞姪桂明繼與平瑞承祧經戶部覈與定例相符准其承繼查明請旨等語太醫院學習醫生護軍桂明既經繼與平瑞為嗣著俟百日孝滿後由該旗帶領引見○諭議政王軍機大臣等都察院奏江蘇童生劉際昌呈控逆團焚掠斃命一摺據稱畚匪占地南至銅邑北至魚臺共有十團皆以唐守中為盟主本年六月間該匪攻破劉寨傷斃多

人劉際昌之父亦被殺斃控經府道漕督等衙門七月內官兵赴沛縣勦辦僅將新團之人拏究至唐團肆惡各情竟不過問並唐守中設立湖田總局為其子唐錫齡捐納縣丞在清浦候補各等語畚匪糾眾肆惡勾結新團其勢蔓延數縣亟應嚴密查辦以遏亂萌前據吳棠奏稱畚匪占種沛地業經派兵勦逐並將新團各圩平毀與劉際昌呈控情節尚屬相符惟所稱新團焚掠均係唐守中主

使並匪勢蔓延魚臺各情未經吳棠切實聲  
敘著吳棠李鴻章按照所控各情遴派妥員  
嚴密查察如該童生所控情節屬實應如何  
妥為辦理之處卽著迅速酌辦該逆團盤踞  
魚臺縣境閭敬銘何以未經查奏現在沛縣  
新團業經吳棠勦除是否尚有餘匪唐守中  
是否潛蹤東境著閭敬銘設法迅速查拏以  
除後患唐守中之子唐錫齡是否捐納縣丞  
在清浦候補並著吳棠查明迅行覆奏原摺  
並劉際昌呈均著鈔給閱看將此由四百里  
各諭令知之○又諭御史張觀鈞奏邊城需  
餉孔亟擬請移緩就急一摺新疆自用兵以  
來籌餉既難解運尤難據該御史奏稱訪聞  
山陝各處商賈之貲均聚迪化州城自城陷  
後貲財一空而伊犁喀什噶爾古城等處皆  
有分設鋪戶貲本存留尚復不少擬請飭陝  
甘山西各督撫派員傳集本籍各商戶令其  
寄信新疆各城將現存商貲兌充軍餉收銀

後分咨本籍督撫照數發還等語所籌係為  
移緩就急起見山陝各處富商在新疆貿易  
者是否可以通那措兌著都興阿沈桂芬劉  
蓉恩麟按照摺內所籌辦法派員各就該地  
方商戶妥為商酌如果可行亦可省解運之  
煩而濟餉需之急於邊疆不無裨益但須遴  
派素洽輿情之員俾官商面為酌定不得假  
手吏胥致滋弊竇以免商戶疑懼推諉原摺  
著鈔給閱看將此諭知都興阿沈桂芬劉蓉  
並傳諭恩麟知之○又諭都興阿奏親赴前  
敵仍擬合兵會勦先通北路穆圖善奏甯靈  
軍務緊急勢難分兵出關各一摺前因都興  
阿等奏穆圖善所部太單難以獨攻一路必  
須合兵先攻甯夏諭令穆圖善俟甯夏克復  
後再行整兵出關現在都興阿業已馳往寶  
豐親赴前敵穆圖善督率後隊陸續由草地  
進發渡河而西相機勦辦所籌均尚周妥卽  
著該署督等嚴檄諸軍認真掃蕩節節進逼

務將甯夏靈州力圖規復。迅殄逆氛。穆圖善暫時既不能出關。惟當懷遵前旨。會合杜嘎爾等軍。奮勉圖功。恢復名城。疏通北路。俟甘肅軍務辦有眉目。兵力稍厚。即可移師出關。以資攻勦。將此由六百里各諭令知之。○撥山西陝西帳房各七百架。解赴幫辦甘肅軍務穆圖善軍營備用。○壬寅。諭議政王軍機大臣等恩麟奏。河州鎮城被陷。稟報兩歧。雷正綰攻克蓮花城。陶茂林馳赴河州。暨滙陳西甯回匪漢番人等解散。未可深信。並道員雅爾佳納查辦事件。未能妥協。各摺片。馬也氏等既在河州開導回眾。何以州城猝然被陷。可見該回婦辦理情形。未可深恃。前諭陶茂林一軍。迅解靜甯之圍。馳赴省垣。布置妥帖。卽解河州之圍。收復狄道。現在河州被陷。軍情尤為緊要。該提督行抵何處。著懷遵前旨飛速前進。督飭所部各營。並趙必達等。現存各兵勇。奮力進攻。將河州狄道次第克復。

河州文武稟報與難民供詞歧異。並著陶茂林恩麟詳查確情。具奏。千總魏智勇等糾黨開城。情殊可惡。著查拏訊明。盡法懲治。西甯回漢既稱永息。紛爭何以回撒仍復焚搶。其獷悍情狀。非大加懲創。不足以儆其兇頑。惟甘省兵力未集。不敷往勦。著王通暫示羈縻。妥為撫輯。俟河州收復後。卽著陶茂林乘得勝之勢。鼓行而西。斟酌勦撫。則操縱在我。易於見功。並著都興阿穆圖善雷正綰酌量軍情。如有可分之兵。卽行抽撥前往西甯。以資鎮攝。恩麟奏稱西甯一事。並未完結。文武員弁亟圖立功。慫恿王通早為出奏。現在給予翎枝者。已不下數百人。等語。朝廷旌功之典。豈容濫邀。是否實有其事。著王通據實覆奏。不准稍存欺飾。該處回匪鴟張日甚。一切軍情。著恩麟王通隨時和衷商辦。不得各存意見。致滋貽誤。道員雅爾佳納於奉委事件。未能妥籌辦理。並與王通各執意見。互相爭持。

實屬不能得力。即著恩麟查明叅辦。將此由六百里諭知都興阿、穆圖善、雷正綰、玉通，並傳諭陶茂林、恩麟知之。○以江蘇鎮江軍營報效欠餉永廣鄉試中額一名。○以江西捐輸軍餉永廣瑞州府學額六名、星子縣七名、上高縣四名、新昌縣三名。○以甘肅河州鎮城被匪竄陷，護總督恩麟下部嚴議。摘參將胡飛鵬遊擊周玉超、都司熊鎮武、守備鍾在朝、千總傅坦從九品趙壁等頂帶。○癸卯諭

內閣沈葆楨奏遵查節年民欠，暨因災緩徵帶徵銀米等項數目，開單懇請豁免一摺。江、西、省、節、年、民、欠，及軍欠商欠各項銀兩，既據該撫查明均係實欠在民，並無絲毫隱混，自應悉予豁免，以清庫款而裕民生。加恩著照所請。所有單開之民欠地屯丁耗入官田租商稅贏餘驛站節省等銀五百三十二萬七千八百七十兩零，本色物料銀二萬二千三百十八兩零，地丁腳耗銀七萬五千三百九

十二兩零，折色物料銀二十三萬三千五十一兩零，牛牙當稅銀三萬六千六百三十七兩零，蘆課正耗銀六千六百五十三兩零，濠租銀三千四百九十五兩零，地稅銀三千四百六十四兩零，鐵稅銀一萬九千三百四十二兩零，官山田地湖洲等租，蘊息銀四千一百九十一兩零，救生田租銀二千三百七十二兩零，入官田畝租穀二千九十七石零，正耗漕米二百三十三萬三千八百十三石零。

兵米五萬四千三十六石零，隨漕屯糧米折正耗銀五十一萬二千五百六十七兩零，兵折正耗節省米價回疆天津改折等銀二十萬二千七百四十五兩零，漕糧腳耗銀十七萬四千一百九兩零，兵加銀五萬一千四百七十三兩零，暨軍欠之餘租銀二十二萬二千二百四十兩零，商欠之茶課紙價銀四千六百四十九兩零，均著一併豁免，以紓民力。該撫卽刊刻謄黃，徧行曉諭，務使實惠均

雷母任吏胥舞弊用副朝廷軫念民依至意  
○又諭前因左宗棠督師恢復浙東郡縣規  
復浙西並攻克杭州省城肅清全浙派兵援  
剿皖南江西埽除餘孽特沛殊恩將左宗棠  
錫封一等伯爵以示優異茲據左宗棠奏憑  
陳下惻懇請收回成命並推功於諸將士各  
等語所奏意存退讓具見惻誠惟朝廷功懋  
懋賞原以該督抵浙以後削平巨寇屢克名  
城肅清浙江全境厥功甚偉豈能無破格恩  
施以獎勞動至溫處嘉湖用兵雖得閩師蘇  
軍之助總由該督調度有方剋期底定洪幅  
瑱竄擾江西亦由該督派兵援剿方能迅速  
歲事左宗棠實為有功國家之臣錫爵酬庸  
洵可當之無愧所請懇辭伯爵之處著毋庸  
議○又諭前因御史劉慶奏參已革臬司李  
元度罪重罰輕請仍按律定擬當經諭令曾  
國藩左宗棠查明具奏嗣據曾國藩奏稱前  
因徽州失守將李元度奏參革職拏問本屬

從嚴該革員前在江西力戰撫州支持危局  
本有兼人之才懇請酌量錄用復經諭令左  
宗棠查奏茲據左宗棠奏稱李元度固守徽  
州三日賊眾兵單力竭城陷原參謂其棄城  
逃避在徽城未失之先殊為失實其募勇赴  
浙實係王有齡奏調並非不候審訊擅自回  
籍該革員援浙時浙東徧地賊蹤進兵之路  
中斷孤軍未能深入杭州失陷非由李元度  
逗遛所致惟飾報克復江西義甯等城一節  
查李元度由平江通城尾賊而來於賊去之  
後居復城之功未經開仗竟報捷書嗣後在  
江山隨營剿賊輒因曾國藩參劾落職悻悻  
求去必欲將各營全撤偏索軍餉不顧大局  
則實咎由自取等語李元度從前本有戰功  
被參各節亦多不實情有可原惟在江西飾  
報勝仗復不顧大局撤勇索餉咎有應得著  
該部分別情罪秉公按律定擬以昭平允○  
諭議政王軍機大臣等綿森吳廷棟奏職官



供詞狡展請旨革審一摺據稱察哈爾商都牧羣兵丁呈控總管總管復揭翼長一案經該尚書等督飭司員逐加研訊所控攢扣兵餉一節據舒濃棟魯普供認與翼長公同在各羣兵餉內每兩扣銀自一二錢至六錢不等至挑缺索要馬匹銀兩一節據護軍羅布桑等供稱均經出過銀兩舒濃棟魯普則堅不承認委翼長巴勒沁等僉供察連泰於所扣兵餉委有欠交銀兩並私用馬駒價銀提訊察連泰則稱並無私用銀兩亦未將收用馬駒價銀供明請將該總管等革職嚴訊等語此案已經綿森等訊有端倪豈容該總管等恃符狡展堅不吐實總管舒濃棟魯普翼長察連泰即著先行革職交綿森等確切根究務期水落石出以成信讞另片奏據舒濃棟魯普供欽差到口及部院等衙門向來均有陋規等情並著綿森等詳稽帳目冊檔認真查辦據實具奏毋稍徇隱將此諭令知之

○又諭左宗棠奏交卸撫篆赴閩督師勦賊並滙陳浙省應辦善後事宜徐宗幹奏官軍分路勦賊情形各摺片福建官軍分路勦賊疊獲勝仗惟李侍賢汪海洋丁三洋等逆尚踞漳州濯田武平等處左宗棠現飭劉典王德榜由西路進黃少春劉明珍由中路進高連陞等航海直趨福州出興泉為東路之師而自率親兵由衢州浦城赴閩相機調度於地勢軍情籌畫均中竅要即著督率各軍迅速入閩實力勦賊以副委任其閩省之曾玉明康國器等軍及江西赴援之宋國永婁雲慶等軍仍著左宗棠徐宗幹分別檄催會合夾擊期收聚殲之效至援閩軍餉業由左宗棠飭令蔣益澧楊昌濬等每月籌解銀十四萬兩源源接濟即著蔣益澧督飭楊昌濬妥為籌畫按月如數撥解以利軍行徐宗幹所請飭部酌撥鄰餉一節即可毋庸再議浙江初復百度維新左宗棠於除匪安良剔除銅



弊修復水利諸大端竭慮殫心漸有端緒此時交卸起程蔣益澧護理撫篆自屬責無旁貸所有海塘工程農田水利及濱海各郡整飭水師台州所屬懲除豪惡各事宜並著與楊昌濬審度時勢次第籌辦馬新貽到任後並著將以上應辦各事宜咨商左宗棠妥籌辦理至嘉湖槍匪為蘇浙兩省奸盜之源風俗之害經蔣益澧節次擒斬劇匪編立船埠稽查保甲勒繳船械浙境漸已斂戢而徒黨之投入上海者尚多著李鴻章督飭員弁密速捕治以淨根株不得敷衍了事致成隱憂左宗棠所稱為治之道興利不如除弊任法不如用人蔣益澧等數歷未久請勿繩以文法等語部中文法皆係歷久奉行舊章自當遵守至地方瘡痍未起一切章程有必應變通者疆臣果能剴切敷陳朝廷未嘗不特予俞允蔣益澧等惟當勤求民瘼力矢公忠遇有應行事宜將實在情形詳晰具奏朝廷必

能斟酌重輕權衡至當毋以文法相繩鯁鯁過慮也將此由六百里諭知左宗棠李鴻章徐宗幹馬新貽並傳諭蔣益澧知之○又諭閻敬銘奏濟甯散勇謝占魁等聚眾謀逆等語前據江蘇童生劉際昌呈稱奮匪十團蔓及魚臺縣境當經諭令該撫密速查拏此次片內所稱有散勇謝占魁等聚眾多人勾結湖團奮匪約期起事之語該逆謝占魁等雖已拏獲正法而餘黨尚恐未盡難保無勾結唐團希圖滋事東省已經肅清此種游勇互相勾通務須淨絕根株以免後患著閻敬銘嚴飭該地方官密速查拏擒捕餘黨毋致養癰貽患是為至要將此諭令知之○又諭劉蓉奏官軍進趨階州淹遲緣由暨逆回竄犯徽縣請飭曹克忠兼顧汧隴之防等摺片蔡啟兩逆敗殘西竄經劉蓉派令蕭慶高何勝必等軍分路躡擊滿謂漏刃之匪不難即日埽除茲據劉蓉奏稱蕭慶高何勝必黃鼎等

經駱秉章檄調回川分防要隘賊遂乘間竄踞階城句結鹽關等處逆回氣燄又張是該處賊勢復熾亟須迅圖撲滅著駱秉章嚴飭所派之周達武等軍協同蕭慶高何勝必黃鼎等移軍迅赴階州與劉蓉派出各軍併力急攻迅復階城將逆眾一鼓聚殲以免旁竄並著恩麟陶茂林嚴防該逆由岷入鞏竄犯蘭省之路兼斷逆回應援昨諭陶茂林由靜甯一路進兵河狄該處與階岷一帶毗連儻

階州之賊被勦北竄與河狄等處之賊聯為一氣則勦辦更形棘手著陶茂林加意防範毋稍疏虞鹽關回匪猝犯徽縣所屬之傅家鎮等處或圖與階州髮逆相為犄角或徑由兩當竄入陝境必須趕緊勦辦方不至墮其詭計劉蓉已檄令彭基品等會同駐防鳳縣之軍往勦著即嚴飭該總兵等奮力縱擊早圖蕞事楚北賊勢已衰仍恐有敗殘之匪乘虛鉞走著劉蓉飭令隴軍鎮西各營確探嚴

防以免竄越蓮花城攻拔後雷正綰已回平涼曹克忠暫紮蓮花城該處甫經收復不能無勁軍屯紮以資鎮撫兵力本屬不厚刻下又萬難移動惟邠長汧隴等處為陝省西路門戶即為平涼等處後路藩籬誠不可令其空虛著都興阿穆圖善雷正綰等悉心籌畫如就近有可撥之兵即酌量分飭數營前往該處駐紮以重防務文煜奏請開缺回旗已有旨允准並令楊能格接辦慶陽糧臺著俟

該臬司到慶時文煜將應辦事宜交付清楚方准回旗楊能格抵甘接辦糧臺後並著由都興阿傳知准其專摺奏事甘省軍餉多賴陝西協濟劉蓉瀝陳艱窘自係實在情形惟甘省向來地瘠民貧且近來糜爛情形較陝省為尤甚劉蓉仍當實心經畫妥為協濟軍火等項亦須儘力撥解毋畏其難將此由六百里諭知都興阿穆圖善雷正綰駱秉章劉蓉文煜並傳諭陶茂林恩麟知之○江西巡

撫沈葆楨福建巡撫徐宗幹會奏遵查閩軍克復新城情形悉如前奏江西因得報較遲是以未及詳奏報聞○山東巡撫閻敬銘奏黃水漫溢請修築濮州等處金隄得旨據請動撥本年地丁項下銀三萬兩往濮州等州縣補築缺隄以工代賑著照所議行惟須遴派廉幹之員實心經理務期工料堅實而災黎亦均霑實惠方為一舉兩得如有官吏剋扣浮冒等弊即著查明嚴叅○辦理甘肅慶陽糧臺○以山東濟甯拏獲謀逆游勇予知州程繩武優敘○以誣良詐贓山東已革把總柏永清發往黑龍江安置○以貪劣不職革陝西遊擊何九皋職不准投效軍營○予福建漳州殉難署總兵官祿魁道員徐曉峰知府扎克丹布知縣錢世敏署遊擊沙肇修祭葬世職加等○蠲緩山東歷城章邱鄒平長

山新城齊河齊東禹城臨邑平原陵長清泰安肥城東平東阿平陰惠民青城陽信霑化蒲臺商河海豐樂陵利津濱滋陽曲阜甯陽鄒滕嶧泗水陽穀壽張汶上荷澤曹定陶鉅野鄆城濮范單城武觀城朝城聊城堂邑博平茌平清平莘冠館陶恩高唐濟甯金鄉魚臺嘉祥蘭山沂水郟城費日照臨淄樂安昌邑濰臨朐武城夏津邱七十五州縣暨東昌臨清德州濟甯東平五衛本年被水被旱被蟲地方新舊額賦暨各項租課並原借籽種口糧有差○甲辰遣官祭先醫之神○諭內閣前因沈葆楨奏官軍勦賊疊次獲勝生擒幼逆洪幅瑱朝廷以該撫自抵江西後籌防籌勦深合機宜浙皖賊匪屢次竄江均經次第掃蕩當降旨賞給一等輕車都尉世職並賞給頭品頂帶茲據沈葆楨奏憑陳悚愧下忱推功諸將並以曾國藩左宗棠不分畛域協餉濟師始得轉危為安

懇請收回成命等語具見該撫退讓之忱惟朝廷論功行賞一秉至公沈葆楨於賊匪竄江以來督率兵勇殲除各巨酋生擒幼逆先後肅清疆圉戡亂之功深堪嘉尚至該省兵力不敷調遣雖由曾國藩左宗棠撥軍援助究由該撫開誠布公聯絡一氣始能將士用命迅奏膚公且江西省吏治民風日有起色皆由該撫實力實心克盡厥職所致允宜殊恩特沛以獎勳勤該撫所請收回成命之處

著無庸議○補行引見壬戌科進士朱迥然得旨著改為翰林院庶吉士○以記名副都統玉亮為鑲黃旗蒙古副都統未到任前以乾清門侍衛何永安署理○以詹事府詹事衍秀充日講起居注官○乙巳以正黃旗蒙古副都統富明署鑲藍旗護軍統領正白旗漢軍副都統文謙署正黃旗漢軍副都統○旌表守正捐軀四川宜賓縣民虞潮先妻劉氏○丙午引見應封宗室三等輔國將軍慶

昭聯耀三等奉國將軍恩榮奉恩將軍惠雲者徵遐亨載第得旨均著照例授職○丁未諭議政王軍機大臣等慶昫奏帶隊官員奉差不慎致蒙古官兵遇賊被害一摺另片奏賊踞城堡失火延燒匪勢日見窮蹙等語驍騎校吉勒杭阿吉隆阿等奉派護送蒙古運餉兵丁回旗輒敢半途而返詭言枝梧致該官兵遇賊接仗被害六名奉差不慎任意欺蒙實屬可惡慶昫等請將該二員革職給予

馬甲之處殊覺輕縱吉勒杭阿吉隆阿均著卽行革職不准給予馬甲亦不准隨隊當差以為嬾惰欺誑者戒其被害之蒙古兵丁六名卽著由慶昫造冊咨送理藩院照例議卹賊首赫汶典馬萬選等糾集悍黨赴清水堡等處抗拒杜嘎爾一軍所踞甯夏漢城不遑兼顧慶昫時派官軍乘夜掩擊疏通運糧之路此時漢城瘟疫時行連次失火納家牖一處亦有失火延燒之事是賊勢渙散將有棄

城遁竄之謀著都興阿穆圖善督飭杜嘎爾等軍乘此聲勢迅將清水堡要隘攻克殲其悍賊則其餘羣醜自成瓦解並相度地勢扼要堵遏斷其旁竄之路慶昫常陞務當激勵兵團相機策應以期克復漢城殄除醜類將此由五百里各諭令知之○又諭文祺奏哈密逆回變亂會勦撲滅暨調派兵勇救援烏魯木齊色普詩新奏勦辦巴里坤逆匪並請籌撥糧餉各摺片此次逆回糾眾煽亂伯錫爾督兵助戰調度有方所部回眾皆能踊躍用命奮勇前驅深堪嘉與伯錫爾前因開修渠工出力已賞加親王銜復因恩麟前奏殲滅回匪已特旨賞用黃纁著文祺傳諭該郡王令其益加奮勉為國宣勤此次所請賞加勇號著暫行存記俟再立有功績更當懋賞酬庸以旌勞勩吐葫蘆一帶餘匪即著文祺飭令派出兵勇會同伯錫爾所派之伯克纏頭等實力擒拏以清餘孽烏魯木齊業經被

陷協領功訥布等前諭保恆飭令駐紮濟木薩一帶仍著文祺督令該協領等實力防勦俟各路援兵到齊合力進擊迅復烏城所陳賊眾兵單自係實在情形俟內地兵力可以分撥即當陸續出關大張捷伐新疆餉銀已疊諭沈桂芬籌款接濟前已由草地解去銀八萬兩交科布多城分撥計時諒已可到以後當可源源撥解巴里坤漢回變亂雖經色普詩新派兵勦殺而逃竄餘匪亦須趕緊撲滅方免蔓延惟兵丁口糧缺乏勢難枵腹荷戈著恩麟飭令安西敦煌等處地方官籌辦糧石解赴巴里坤滿營以資接濟並著色普詩新隨時設法撫綏以安兵心該處商民既能捐助糧石以顧兵糈可見該商民等尚知大義昨因御史張觀鈞奏山陝各商在伊犁等處皆有分鋪請飭傳各商寄信新疆將存貲兌餉由本籍發還已諭令恩麟等查照辦理現在巴里坤如有殷實商民肯將存貲兌

餉既可濟目前之急。亦可省轉運之勞。並著恩麟等斟酌情形。妥籌辦理。惠慶已起程前往古城。扎克當阿已赴哈密署理。辦事大臣現在哈密。逆回雖經剿滅。而彈壓撫恤均關緊要。且該處為新疆門戶。尤須力籌保衛。扎克當阿雖經到防。仍著文祺體察情形。如須該提督駐紮鎮撫。即著暫緩起程。以重邊防。將此由六百里諭知文祺。色普詩。新並傳諭恩麟知之。○直隸總督劉長佑奏。新任和闐

辦事大臣奎章因病請假。得旨奎章自簡放以來。業經兩載。尚在直隸逗遛。顯係意存規避。現新疆正在需人之際。若簡放各員。皆託故逗遛。尚復成何事體。前已諭令理藩院將烏拉票分路頒給。以便各路換班。大臣起程著劉長佑即行知奎章。迅速取道前進。若再有意抗違。即按軍法治罪。決不寬貸。○以哈密勦辦逆回。殄除全股。賞副將王德溥伯克帕他諾什等花翎。把總趙英傑等藍翎。餘升

欽有差

大清穆宗繼天開運受中居正保大定功聖智誠孝信敏恭寬毅皇帝實錄卷一百二十

大清穆宗繼天開運受中居正保大定功聖智  
誠孝信敏恭寬毅皇帝實錄卷之一百二十一

[illegible]

教諭

同治三年甲子十一月戊申諭內閣前因兵

部奏軍臺廢員已革兵部尚書穆蔭補交臺費當經降旨俟扣滿三年再行釋回茲據阿克敦布等奏該廢員現已三年期滿遵旨釋回等語穆蔭前在軍機大臣上行走有年班次居首於載垣等竊奪政柄不能力爭溺職辜恩獲咎甚重此次雖經加恩釋回仍著閉門思過毋得再蹈愆尤○諭議政王軍機大臣等德勒克多爾濟奏甯靈征兵待米孔殷請借款採運一摺據稱都興阿軍營需米緊

急前准移知飭由歸綏道採辦。惟道庫早經告罄。廳庫又無可借閒款。查綏遠廳庫現存塔爾巴哈台餉銀一萬兩。擬暫行那用採辦。請飭沈桂芬籌款歸還等語。甯靈攻勦正形喫緊。米石尤營中刻不容緩之需。該將軍請移緩就急之處。卽著照所請行。惟塔爾巴哈台餉需亦屬萬分竭蹶。著沈桂芬飭司作速籌款。委解歸還。卽由晉省協撥甘餉內劃扣歸款。毋稍遲延。至此項塔爾巴哈台餉銀一萬兩。何以本年三月由省解到。至今尚未接據該處委員來提之信。是否因道路阻滯之故。並著德勒克多爾濟沈桂芬查明一面設法迅速改道。照部定新章運往該城。毋庸再令該處派員來提。以免周折。將此由四百里各諭令知之。○己酉諭內閣。長善奏請將釐捐錢文移補兵米一摺。山海關駐防官兵應領餉米。歷年積欠甚多。亟應設法籌補。以濟軍食。著照所請。所有臨榆縣釐捐錢文暫停



搭放官俸兵餉其一年節省稅銀並無庸解交部庫均由該副都統截留儘數移補兵米卽按照所議章程辦理俟此項兵米移補完竣分別報明戶部覈銷並著直隸總督奉天府府尹轉飭各州縣迅將欠解山海關兵米餉項查明歷任虧短數目勒限嚴催追繳齊全解交山海關副都統衙門以清款項儻仍有虧那拖欠情弊卽著指名嚴叅○又諭李鴻章奏請將蘇省咸豐十年以前清查攤補

各款一律豁免以紓民困一摺江蘇省自軍興以來疊遭蹂躪現雖全境肅清而民力彫殘元氣未復該省歷屆辦理清查各案應行攤補之款為數甚多而州縣籌補之法不免仍借資民力甚至恣意浮收有提無解且該省現飭酌減賦額方冀與民休息力洗從前弊竇此等無著待補之款若仍令攤賠不肖官吏或致藉口肆其朘削於民生吏治均有關係所有江蘇省清查等五案內籌補攤補

銀兩及咸豐十年以前一切由外捐攤各款加恩均著全行豁免其餘派攤名目並著永遠禁革經此次豁免後各該州縣既無賠累之苦惟當激發天良力除積弊於應徵之額年清年款如有藉口民欠以致缺額卽著該督撫查明嚴叅治罪用副朝廷體恤黎元勤求吏治之至意○諭議政王軍機大臣等長善奏臨榆縣釐捐自設立以來辦有成效每歲可收東錢五六萬串有奇所有添設園丁

步甲月餉及搭放俸餉均於是出現因兵米積欠藉資彌補礙難議裁請俟籌補虧米後各州縣米石解清補還釐捐墊款之日再行裁撤等語卽著照所請行惟釐捐一項既不議裁則須涓滴歸公與民無擾該副都統亦可隨時按數覈實稽查如有地方官吏以多報少及胥役舞弊擾累商民各情卽著指名叅奏務期實力奉行不得有名無實致滋流弊將此諭令知之○又諭喬松年奏現在布



置情形並請飭楚豫分派守城扼隘遊擊之兵各專責成等摺片。蔣凝學一軍由英山拔隊赴楚。陳飛熊一軍亦回楚歸官文調遣。著官文卽妥為調派。迅將黃孝德安等處餘賊一律埽除。毋留遺孽。張總愚陳大濬等回竄楚豫餘黨無多。自不難於翦滅。惟僧格林沁以統師重臣追奔逐北。幾無停晷。而楚豫境上不能豫籌堵截之方。未免曠日持久。著官文張之萬通籌大局。酌分三項守城之兵。專守城池。扼隘之兵。專守險要。賊來卽擊。不必遠追遊擊之兵。分作兩支。以一支隨僧格林沁轉戰。以一支駐於本省邊界。往來追勦。援應各專責成。賊蹤何路竄逸。卽惟守隘之員是問。如竄陷城池。卽惟守城之官是問。儻隨勦不力。賊去不追。卽由僧格林沁查明嚴行叅處。如此明定章程。庶不慮賊之東奔西竄。而足以制其死命。現在張總愚等竄向何處。僧格林沁當居中駐紮。派兵四面兜擊。明立

獲犯賞格。嚴定縱匪罪名。以期廓清地方。一勞永逸。潛太英霍一帶。現雖無賊。仍著喬松年督飭英翰等實力防範。按查。毋任再有竄越。將此由五百里各諭令知之。○以報效俸餉。賞已革浙江黃巖鎮總兵官黃彬五品頂帶。○予安徽流波墮陣亡千總方全勝祭葬世職加等。○庚戌

聖祖仁皇帝忌辰遺官祭

景陵。○諭內閣。喬松年奏遴員請補知府同知州縣等缺一摺。安徽省府廳州縣各缺。停補多年。現在軍事初定。民間瘡痍未復。亟須實缺人員。安輯撫綏。俾資整飭。所有該撫奏請升補太平府知府等缺之湖北補用同知唐景皋等。既據聲稱人地相需。才堪勝任。卽著依擬分別升補。補授以重地方。他省不得援以為例。○署福建臺灣鎮總兵官曾元福奏續獲匪首廖談等。現定期馳赴漳屬。按捕餘匪。並順道巡閱營伍。得旨著卽會同丁曰健。

設法將洪構陳鯨等首從各匪迅速捕斬淨盡。毋令稽誅全臺營務廢弛。並著該署鎮認真校閱實力整飭。鎮道均經出省。當嚴飭陳懋烈於郡城防守彈壓事宜。妥為辦理。不可稍涉大意。○加賞通州王恕園賁賑粟米三百石。○辛亥諭議政王軍機大臣等。官文奏上竄髮逆狂奔德隨一帶。派軍分路兜擊。一擄髮逆上竄雲夢孝感境內。經官軍分路截殺。疊有斬擒。賊向京山應城一帶竄去。張總

愚逆黨復由光山黃安竄向黃陂之河口。范立川餘黨亦自信陽應山竄入隨州之安居環潭。圖與上竄之逆合股。逆蹤聚德隨等處。漸有西趨之勢。官文現飭江長貴等力扼襄樊。並飭常星阿等由京山安陸前進。成大吉馳向茅茨。吸進勒李成謀梁洪勝等軍力。顧京鍾應城要隘。所籌尚合機宜。卽著嚴飭各軍前截後追。務將此股敗匪就地殲除。毋令旁竄。常星阿等前次赴援不力。致賊乘虛

奔竄。業經降旨革職留任。此時如再不知奮勉。縱賊西行。卽著官文嚴參。按照軍法治罪。不得稍涉姑容。僧格林沁督軍楚豫於各營接仗情形。必所深悉。如有臨陣退縮之員。無論楚豫兵官。並著指名嚴參懲辦。以肅戎行。德隨一帶。與豫境處處毗連。張曜一軍已抵棗陽。正可攔頭截擊。著僧格林沁張之萬飭令會合楚軍。兩面兜剿。毋令竄擾豫疆。老河口為繁盛之區。該逆如繞過襄樊。轉窺光化

則該處適當其衝。著官文飛催梁作揖等實力扼剿。遏其奔突。此股敗殘之匪。奔竄靡定。總由防剿各軍未能聯絡兜擊。有追兵而無遏截之兵所致。現在賊蹤西向。難保不由鄖西一路窺伺陝疆。官文張之萬務當督飭在事將弁。繞出賊前。痛加勦洗。楚省兵力甚厚。儻奔竄賊股不能在楚地就地殲除。任令長驅入陝。以鄰為壑。必將官文從重治罪。決不寬貸。劉蓉前奏商州僅存鎮西軍三營。興安

僅存隴軍兩營。此外猝無兵勇可調等語。此時賊蹤漸近。著劉蓉添調兵勇。分赴商州興安一帶實力防範。不得稍有疏虞。蔣凝學一軍。官文既擬令其馳赴甘肅援剿。著卽飭令取道郿西等處。將髮捻各匪就近攔擊。以輔陝省兵力之不足。俟此股殘滅。再行由陝入甘。至該道員所部。僅有三千五百人。而降眾馬步亦有三千人。勢均力敵。恐難鈐制。甘省地瘠民貧。餉難充裕。並著官文斟酌情形。或將此起降眾。另行分隸各營。毋庸隨同入甘。較可放心。霍山竄至黃安。股匪人數無多。著僧格林沁飭令陳國瑞郭寶昌等。分投兜剿。迅速殲除。喬松年仍當督率皖軍嚴防回竄。毋稍大意。將此由六里里各諭令知之。○以浙江台州團練克復郡縣六城。永廣台州府暨臨海黃巖太平甯海天台仙居六縣學額各三名。○壬子諭內閣。前因楊岳斌沈葆楨奏參道員王沐帶兵逗遛。並營官王安敦等

縱勇滋鬧。當經降旨將王沐革職發遣。王安敦等一併革職提訊。茲據沈葆楨奏遵旨訊明該營官等。隨同王沐在撫州防剿。嗣經楊岳斌劄飭移紮秀才埠。及劄調駐守崇仁。均因賊勢無常。往返請示。並非沿途逗遛。撫州拔隊時。該營病勇極多。間有因病落後。尚無騷擾情事。自王沐撤去統領各營兵勇。紛紛索餉。經該革員等再三開導。終懷疑慮。亦非敢於違抗等語。此次該營官等於各營勇丁防範不周。及懷疑索餉。復不能設法約束。實屬咎無可辭。惟尚無縱勇滋鬧有心抗拒情事。尚可曲原。已革運同銜知縣王安敦遊擊賀長春。唐營貴業。經革職均著免其治罪。另片奏已革道員王沐於去歲皖南之役。賊已深徧婺源。該革員以孤軍首當其衝。三戰皆捷。皖南轉危為安。浙江江西亦資保障等語。王沐前在皖南堵剿竄江逆匪。尚有微勞。足錄。著加恩免其發遣。○諭議政王軍機大臣

等沈葆楨奏遵旨援閩兼防回竄一摺賊匪竄陷漳龍等處沈葆楨飭劉典等進援並令韓進春劉勝祥由會昌察看賊勢就近進規武平現據探稱武平業經閩粵各軍克復庫送不願入粵有回江西過年之謠該撫現今王開琳帶王文瑞所部入閩又以江省兵單咨商周寬世由信豐進紮長甯飭張岳齡由龍泉進駐會昌以固南贛門戶韓進春移紮瑞金劉勝祥移紮廣昌與石城之席寶田互相聯絡以固撫建門戶所籌均尚妥協著卽飭令在防各將士及地方官弁認真防守毋令一賊回竄江境劉典所部八千人進駐汀州宋國永等亦俱陸續可到並著督飭該員等會合閩浙諸軍相機進剿克復地方務將逆匪就地殄除毋任再行旁竄將此由五百里諭令知之○湖南巡撫譚世臨奏黔省下游苗教等匪復行勾結現籌防剿得旨所籌尚妥惟當嚴飭戈鑑周洪印等就現有兵力

聯絡扼剿以杜紛竄趙煥聯一軍能否撤回及擬調勁旅大舉援黔之處均著該撫察看情形妥籌辦理○廣西巡撫張凱嵩奏分勦思恩南甯兩屬匪徒收復村寨現飭各軍乘勝掃蕩得旨粵西羣盜如毛惟當嚴飭易元泰等軍不遺餘力分路掃蕩劉坤一現赴橫永一帶調度卽飭將孫芒廣一股迅速殲除進規南郡以靖邊氛○以浙江克復杭州等城出力賞總兵官唐學發從一品封典道員

魏喻義二品封典副將胡孚武馮如海楊世俊遊擊賀國輝主東林丁賢發李世祥巴圖魯名號道員史致謬遊擊李楚材等花翎千總余春林等藍翎餘加銜升敘開復有差予陣亡總兵官王聯芳等二百十八員祭葬世職○癸丑諭議政王軍機大臣等有人奏吉林協領明祿為該將軍景綸所信用任其把持銀庫各屬應解錢糧明祿全數運至自行開設之義誠店內每萬兩抽出實銀二千兩

聯絡扼剿以杜紛竄趙煥聯一軍能否撤回及擬調勁旅大舉援黔之處均著該撫察看情形妥籌辦理○廣西巡撫張凱嵩奏分勦思恩南甯兩屬匪徒收復村寨現飭各軍乘勝掃蕩得旨粵西羣盜如毛惟當嚴飭易元泰等軍不遺餘力分路掃蕩劉坤一現赴橫永一帶調度卽飭將孫芒廣一股迅速殲除進規南郡以靖邊氛○以浙江克復杭州等城出力賞總兵官唐學發從一品封典道員

易換銀鈔。搭放兵丁錢糧。卽以實銀入已。請旨飭查等語。錢糧要款。豈容貪劣之員。任意侵漁。圖飽私橐。若如該協領被叅。之以鈔易銀等款。翫法營私。亟應嚴行懲辦。著阜保將此次所叅情形。歸入前案。嚴密訪查。據實叅奏。其所稱吉林地方銀鈔價值無幾。久不使行。可否飭令該將軍全行繳回之處。並著阜保體察情形。酌量奏聞。原摺著鈔給閱看。將此密諭知之。○又諭恩麟奏鹽關回匪出巢。

滋擾秦州戒嚴。現在籌辦情形一摺。甘省鹽關逆回竄撲秦州。將城外回民裹脅。並縱火焚燒四鄉。搶掠民糧。勢極猖獗。林之望所部張華一軍。經恩麟撥往階州助剿。現僅調到秦安兵勇四百名。到城防守。因兵力較薄。迄未大挫兇鋒。秦州為甘省富庶之區。設有疏虞。勦辦更形棘手。曹克忠所撥四營赴援秦州。尚恐不敷分布。著都興阿、穆圖善、雷正綰悉心籌度。曹克忠一軍能否馳赴秦州援剿。

並應如何分兵駐紮蓮花城。以扼險隘之處。均一併妥籌兼顧。如蓮花城布置已妥。無虞回逆紛竄。卽飭曹克忠酌帶所部星速往援秦州。迅解城圍。毋稍延緩。並著恩麟嚴檄林之望。就在城兵力與曹克忠所撥四營妥籌防剿。或進攻鹽關回巢。以牽賊勢。毋致稍有疏失。近省會甯安定一帶賊匪時出肆擾。陶茂林一軍現已西進。卽著懷遵前旨迅解靜甯城圍。並將安會等處竄匪節節掃蕩。再行

馳赴省垣。進規河狄。前據劉蓉奏稱鹽關回逆竄犯徽縣之傳家鎮等處。刻下秦州又復戒嚴。匪蹤滋蔓甚廣。如與階州髮逆勾結。攻勦更難著手。著駱秉章懷遵前旨嚴檄周達武等軍協同蕭慶高等移軍迅赴階州。與劉蓉所派各軍併力急攻。迅復階州城垣。以杜紛竄。而免勾結。蘭州省城防務。恩麟就現有兵力。慎密防維。並嚴飭派援階州之張華一軍與川陝援兵聯絡進剿。毋許稍涉疏懈。雷

正綰現在移軍平固一帶如蓮花城防兵尚單卽著酌撥兵勇前往協守以便曹克忠抽調所部馳援秦州卽與思麟等妥籌會辦將此由六百里諭知都興阿穆圖善雷正綰駱秉章劉蓉並傳諭陶茂林思麟知之○又諭思麟奏軍餉萬難措持請催山西並河東道協餉及山東河南欠餉各摺片甘肅餉需踴躍援兵漸集需用尤屬浩繁著沈桂芬迅飭河東道先將甲子綱奉撥同治三年協甘新

餉銀五十二萬兩限日派員徑解蘭州省城並將山西藩庫應先行籌解之三十九萬兩飭司分起馳解慶陽糧臺以供支放思麟現派員分赴太原河東籌辦匯兌並著沈桂芬飭令各地方官妥為辦理以資周轉陶茂林軍需劉蓉前奏陝省尚按月供支此時該軍雖逐漸西趨仍著劉蓉妥籌兼顧無分畛域至甘省旗綠各營並陝省駐甘各營汎斷餉動經數年兵心怨詈豈容坐視著閻敬銘張

之萬無論何款各於欠餉內先行籌撥銀三十萬兩派員解甘或解儲陝西藩庫由甘省委員迎提以期力全大局將此由六百里各諭令知之○以江西捐輸軍餉永廣吉安府學額二名龍泉縣八名○甲寅諭內閣慈安皇太后之母承恩榮敬公夫人溘逝慈衷哀慟悲不自勝朕仰體孝思中懷莫釋著由內賞銀三千兩交廣科祇領經理喪事○諭議政王軍機大臣等都興

阿奏請飭總管訥依綢阿赴營覈算報銷等語黑龍江布特哈總管訥依綢阿前在都興阿軍營支放糧餉所辦報銷案內於捐項一款漏未報明遣撤後亦未據實詳報迨經備文查詢仍復含混登覆案關錢糧重款豈容該總管任意延宕著寶善卽飭納依綢阿迅赴甘肅都興阿軍營將漏報捐項認真覈算據實報銷不得稍有弊混將此諭令知之○兩廣總督毛鴻賓等奏賊擾大埔縣城經援

軍擊退並越境克復武平等城得旨朱家綬著暫行革職留任仍著查明該縣城是否失陷該令有無與賊巷戰各情分別奏明辦理大埔既轉危為安粵軍現已越境克復武平等城賊勢趨重漳州著嚴飭方耀等跟蹤追勦會合江西閩浙諸軍將竄閩之賊就地殄滅漳州距潮州較近饒平縣屬亦有賊蹤並有沿海擄船竄擾澄海之信著卽移撥重兵嚴行遏截如任令入海剽掠貽患無窮惟毛

鴻賓等是問○以甘肅克復寶豐縣城出力賞佐領伊能額防禦慶順譚品察巴圖魯名號委參領徵福等花翎驍騎校安祥等藍翎餘加銜升敘有差○予河南各屬陣亡殉難紳民婦女一千三十五名口分別旌卹如例○乙卯諭內閣劉蓉奏請將庸劣不職之道府州縣分別革降勒休一摺陝西署鹽法道候補道景祥性質輕率嗜好尤深候補知府賈敦惺精神昏惰難期振作候補知府坐補

涇陽縣知縣周文郁巧滑鄙俗行同市儈試用同知署興安府知府謝復榮麤鄙近利不協輿情補用同知慶祺心地頗頑任性妄為均著勒令休致候補直隸州知州瞿樹鎬險詐貪鄙前在孝義甯陝漢陰等任所輿論沸騰聲名狼藉准補朝邑縣知縣朱璋性耽安逸最善鑽營前署武功縣任內藉稱差務苛派婪索該二員現有查辦事件均著先行革職聽候查辦試用知縣朱煥璧居心狡詐前

署韓城縣拖欠交代業經奏參革職著永不敘用候補同知周潮性情躁競舉動輕浮著降為通判歸部銓選補用知縣陸庭來行事瑣屑不識大體分缺間用知縣劉普習染甚深不知自愛均著以府經歷縣丞降補候補縣丞馮駿心地卑污聲名甚劣署臨潼縣典史顧守坦把持公事浮躁不謹均著卽行革職以肅官方近來各省甄別人員往往投效軍營鑽求差使旋以軍功濫行保奏開復原



官既開仕途取巧之習兼壞軍營樸直之風於世道人心大有關係嗣後各路統兵大臣凡遇各省甄別人員不准隨營收錄濫請開復用絕夤緣幸進之階○諭議政王軍機大臣等劉蓉奏籌辦階州等處軍情並請嚴防下游擒匪上竄一摺鹽關回匪竄往秦州之馬跑泉階州蔡啟兩迭分路扼守隘卡竟圖堵我進兵之路必須官軍四面環擊方可制其死命昨據思麟奏鹽關回匪出巢滋擾秦

州戒嚴當因匪蹤滋蔓恐與階州髮逆勾結諭令駱秉章嚴檄周達武等軍協同蕭慶高等迅赴階州與劉蓉所派各軍併力急攻克復城垣著劉蓉嚴飭各軍會合周達武等實力掃蕩迅復階城毋任逆匪久踞惟湘果英殺諸軍須由漢郡採辦米糧周達武等軍所需糧米亦須由昭劍一帶採辦相去較遠轉運倍艱著思麟卽派道府大員由階州附近一帶州縣採辦糧米接濟其需用糧價銀兩

卽在各軍應發月餉內扣還如此辦理並不致貽累甘省思麟當妥籌迅辦不得視同膜外致誤事機由楚西竄之匪窺伺陝疆著官文等懷遵前旨嚴飭馬步各軍取道郿西一面繞前截擊一面跟蹤躡剿以期迅掃逆氛蔣凝學一軍仍飭令取道郿西等處將髮捻各匪就近攔擊俟此股殄滅卽行由陝入甘興商防兵甚單劉蓉務當遵奉前旨設法添調兵勇分赴各該處實力嚴防毋稍疏懈正

在寄諭聞據張之萬等奏擒匪被擊西遁逼近宛境等語張陳等迭在光山縣境被擊西竄賴汶光等亦擾至棗陽南之吳金店是唐桐各屬情形旣形喫重尤恐匪眾勾合繞窺宛境著僧格林沁張之萬嚴飭各軍分路扼剿務將竄竄之匪一鼓殲滅毋任竄入陝境又成不了之局邱沅才以賊中悍黨窮蹙乞降雖不妨暫事籠絡亦須時防反側以弭後患汝光一帶匪蹤紛竄靡定著張之萬嚴飭



該處防兵嚴密堵遏以重邊防其降眾由汝光經過者人數較眾並著飭令該處文武員弁彈壓撫輯毋令滋事將此由六百里諭知僧格林沁官文張之萬劉蓉並傳諭思麟知之○又諭常清明緒奏滙陳伊犁地方情形並烏什阿克蘇二城被占一摺新疆南路各城先後被賊占踞此時大兵未集尚難進剿總宜先將北路之賊趕緊撲滅方可進規南路烏魯木齊迪化城前據保恆奏報業經失

守賊蹤擾及阜康是該處逆勢甚為猖獗現在東路之古城哈密等處經保恆文祺等督兵防守尚可無事惟西路道途梗阻聲勢未能聯絡明緒身膺疆寄自當統籌全局商同武隆額督兵東進節節掃蕩迅將庫爾喀喇烏蘇餘匪廓清進復綏來縣城直達烏魯木齊疏通大路此次回眾變亂皆由奸回捏造謠言乘機煽惑其中裏脅之人未必盡甘叛亂明緒武隆額當遵照八月二十五日諭旨

分別良莠勦撫兼施惟回性狡詐往往以就撫為緩兵之計亦當加意防範不可墮其術中塔爾巴哈台既有回匪勾結之信亟應先事豫防明緒已將榮全所帶蒙兵五百名派協領郭羅那帶回塔城防守著即知照錫霖等添派兵丁嚴密防維毋稍大意內地精兵已陸續調撥一俟甘肅大路疏通即可出關助勦明緒武隆額仍當嚴飭帶兵員弁迅速圖功不可專待援兵致誤軍事將此由六百

里各諭令知之○山西巡撫沈桂芬奏西安將軍都興阿委員前來設局辦捐現值商民貲財耗竭勢難勸辦得旨晉省民力之彫敝固係實情然各路軍營餉需亦刻不容緩總當於培養之中設法籌畫裕於國而不病於民惟在地方大吏實力經理以副委任○以未能整頓營制降河南南陽鎮總兵官圖塔納為副將○以河南官軍攻克安徽阜陽賊寨出力予主事朱壽鏞以直隸州知州用並

賞花翎千總胡秉忠等藍翎餘升敘有差○  
丙辰諭議政王軍機大臣等前因都察院奏  
江蘇童生劉際昌呈控奮匪占地唐團肆惡  
各情當經諭令吳棠等嚴密查辦茲據都察  
院奏江蘇貢生張其浦等聯名呈控奸民唐  
守中糾眾霸占地畝戕害縣令攻破劉莊寨  
殺斃多人其子唐錫齡捐納縣丞在清江候  
補因此漕督耳目盡為遮蔽遂以攻破劉寨  
之罪諉之新團等語與劉際昌前次呈控情

節相符唐團肆惡擾民疊經有人控告亟應  
嚴查訊辦以杜亂萌著吳棠李鴻章閻敬銘  
彙入劉際昌前此控案密速查明嚴拏懲辦  
毋得意存消弭養癰貽患唐錫齡是否捐納  
縣丞在清江候補吳棠不准因案有牽涉該  
漕督之處稍存迴護仍著懷遵前旨迅速秉  
公據實查奏原呈一件單一件均著鈔給閱  
看將此各諭令知之○又諭德勒克多爾濟  
等奏蒙古官兵駐紮甯夏邊界請由都興阿

就近酌給馬乾一摺據稱烏蘭察布盟兵五  
百名前在磴口地方駐紮未出本盟境地未  
經議給馬乾僅支口糧該蒙兵現經都興阿  
調赴石嘴子西附近邊牆防勦該處柴薪稀  
少食物無從購買駝馬亦無草地牧放請就  
近由都興阿糧臺按月發給馬乾口糧等語  
所奏自係實情此項烏蘭察布盟兵五百名  
應月支鹽菜口糧馬乾等項卽著就近由都  
興阿糧臺與征兵一律按月放給其每月應

需餉銀若干兩並著都興阿覈明咨行沈桂  
芬仍由山西籌款源源接濟毋令缺乏至該  
蒙兵駐防處所採買維艱或放米石或放銀  
兩之處並著都興阿隨時斟酌辦理以資飽  
騰將此由五百里各諭令知之○予河南夏  
邑等處殉難生員彭德彰等紳民婦女六百  
六十名口分別旌卹如例並予建祠○丁巳  
諭內閣前因直隸民婦陳趙氏呈按委員王  
啟曾一案牽涉宗室志昭當令宗人府訊取

志昭供詞交劉長佑查奏茲據奏稱按照昭志昭原供逐一訊明如所稱夙與王啟曾交好及曾睹王啟曾向陳天太借銀未允等情均無其事各等語此案陳趙氏因伊子陳如汰謀殺夏壽域賄串頂兇經該委員訊明希圖翻案駕詞妄控既經該督訊無其事即著將同謀兇犯夏黑等嚴拏務獲並將陳趙氏陳詳汰一併傳到將何人起意下手殺害夏壽域並何人主使陳趙氏牽涉志昭各情一併

嚴切根究務期水落石出以成信讞前代陳趙氏抱呈之監生王熙齡該部即行解往備質尋奏審明夏黑挾嫌糾同陳如汰趙良潰謀殺夏壽域賄屬趙良潰頂兇陳趙氏實係架詞捏控宗室志昭私自出京聽從代作證見均經研詰屬實請分別按律定擬下部議從之○以江蘇捐輸軍餉永廣鄉試中額四名○以安徽捐輸軍餉永廣鄉試中額三名合肥縣學額十名盱眙縣六名六安桐城二

州縣各五名壽定遠阜陽天長四州縣各四名無為巢懷遠三州縣各三名和泗霍邱全椒含山五州縣各二名廣德滁太湖宿松涇旌德廬江舒城鳳陽鳳臺十州縣各一名○旌表守正捐軀順天大興縣民李大妻童氏直隸曲陽縣民張黑隴妻商氏○

上以冬至祀

天於

圜丘自是日始齋戒三日

大清穆宗繼天開運受中居正保大定功聖智誠孝信敏恭寬毅皇帝實錄卷之一百二十一

大清穆宗繼天開運受中居正保大定功聖智  
誠孝信敏恭寬毅皇帝實錄卷之一百二十二

監修總裁臣等謹將穆宗成皇帝實錄卷之一百二十二  
理吏部等事加七版實功加五版等加七版實功加五版等  
正統滿洲副都統等事加七版實功加五版等加七版實功加五版等  
崇禎皇帝等事加七版實功加五版等加七版實功加五版等  
加六版實功加五版等加六版實功加五版等加六版實功加五版等

教修

同治三年甲子十一月戊午諭內閣閣敬銘

奏特參庸劣不職之員分別革職降補改補  
一摺山東撤任濱樂分司運同松年縱容丁  
役假公索詐著卽革職武定府同知張繫素  
不得民未協輿論著卽勒令休致莒州知州  
趙溶徵收含混操守平常革縣知縣戴勉嗜  
好既深性浮且愎署朝城縣知縣權汝欽利  
口飾非藉公擾累候補知縣張俊傑少年紆  
袴輕懦無知均著卽行革職文登縣知縣宋  
春禽精神疲弱事不自持署禹城縣知縣趙

惟嚆性情怠惰聽斷迂疏均著以府經歷縣  
丞分別降選降補候補知縣王培楨才識迂  
拘臨朐縣知縣劉景超辦事遲鈍均著以教  
職改選撤任武城縣知縣郭尚桓人尚安分  
閱歷未深撤任平原縣知縣文熙才非強幹  
不勝銜區均著開缺留省遇有相當缺出酌  
量補用撤任長清縣知縣丁兆基難任繁要  
撤任齊河縣知縣張聯奎不勝繁劇均著開  
缺留省遇有相當中簡缺出酌量改補仍送

部引見○諭議政王軍機大臣等徐宗幹奏  
疊勦漳龍踞逆獲勝暨浙師到閩日期一摺  
閩軍勦辦漳龍等處賊匪疊獲勝仗其竄踞  
汀境之匪亦經兵勇擊敗尚未大挫兇鋒高  
連陞一軍航海來閩經該撫飭令取道興泉  
由同安一路進攻漳州並飭黃少春改由興  
化進兵與高連陞會合後卽由安溪至漳屬  
之長泰一帶前進約期兜勦所籌尚屬周妥  
卽著左宗棠徐宗幹督飭高連陞等會合閩

軍協力進擊。迅復各城。毋稍延緩。劉典王德榜兩軍。計日已到閩。並著左宗棠等檄令該臬司等星速赴援。以資得力。康國器趙均所部官軍。現紮永安連城。務令嚴杜汀境竄匪歸併龍巖。並防該逆乘機下竄。毋稍鬆勁。前據左宗棠奏。已由衢州起程赴閩。計日已達閩境。務當相度機宜。將各城踞匪一鼓殲除。以期肅清邊圉。將此由六百里各諭令知之。○山東巡撫閻敬銘奏。遵旨查辦湖團。唐

守中久充團長。實無為匪情形。魚臺境內。係舊墾湖荒之人。並無匪眾盤踞。畝匪經江省勦平。查無餘匪潛來東境勾聚情事。得旨著卽會商吳棠李鴻章。將一應善後事宜。迅速妥籌辦理。唐守中雖已自投到官。仍須妥籌安插。○予熱河駐防出征各省陣亡病故員弁兵丁於原籍建立總祠。○己未諭內閣。前因升任內閣侍讀學士于凌辰奏。吉林獄訟繁多。請專設理刑大員。辦理刑名。當經諭令

阜保查議具奏。茲據阜保奏稱。吉林地處邊陲。若添設監司大員。則建立衙署及廉俸等項。所費不貲。請查照熱河設立刑司之例。酌加變通等語。著照所請。卽由刑部揀派正途出身漢郎中或員外郎一員。專司主臬。科甲出身主事一員。幫辦主臬。並再派刑部滿郎中一員。專司掌印。其原設之協佐領。著仍留一員。幫辦掌印。並辦理蒙文事件。統歸吉林將軍管轄。以資治理。其原設理刑主事一缺。

卽著裁撤。所請該司員等三年期滿無過。由該將軍出具考語。送部引見。並如何酌加獎勵之處。著該部妥議具奏。尋刑部議。派往吉林司員。擬請兵部酌給車馬。由驛遞行。三年期滿。勒慎辦公。始終無過。送部引見。交吏部從優獎敘。如不能稱職。仍隨時奏撤。另行揀派。以昭慎重。從之。○又諭前因給事中劉毓楠奏。吉林賭匪盜匪。仇殺搶掠。將軍景綸粉飾欺蒙。縱令協領常明等擅權納賄等款。當

經諭令阜保確切查明。據實具奏。茲據奏稱。查明被參各款。或事出有因。或查無實據。分別定擬具奏。此案筆帖式巴克喜經管錢糧重務。雖無虧短官項情弊。輒敢將庫存錢八萬七千餘吊。擅存私鋪。倚官射利。壟斷營私。情殊可惡。巴克喜著卽行革職。交刑部從重定擬罪名具奏。協領明祿於巴克喜私用庫款。扶同袒庇。奉派管理官錢鋪。於燒商于焯莖短少官錢。攪頭王泳詳拖欠地價。並不嚴

追。雖訊無與王泳詳拜認義叔。收受重賄確據。而挾私徇縱。玩視帑項。且平日把持公事。專擅自由。實屬有玷官常。明祿著卽行革職。永不敘用。協領常明。雖訊無與巴克喜等夥開當舖。及得受王泳詳重賄各情。惟歷年管理銀庫。於巴克喜擅動庫款營運。豈得諉為不知。且縱容刁佃久欠鉅款。於應放兵丁錢糧。不能如期開放。教場官地。違例任令商民造房。私取地租。實屬咎無可辭。常明著交部

嚴加議處。先行撤任。聽候部議。參領富全。雖訊無與常明明祿等舞弊罔利確據。辦理山匪董鎖子等案。亦無審訊不公情事。惟於首犯白珠等糾眾將伊弟姪擄去放回。並不稟請捕拏。始終隱匿真情。以致重犯至今未獲。亦有應得之咎。富全著交部議處。吉林將軍景綸。雖查無收受謝儀及開設錢鋪之事。惟專閫大員。任令所屬把持公事。牟利營私。毫無覺察。實屬形同聾瞶。豈能復勝將軍之任。

景綸著先行交部嚴加議處。來京聽候部議。吉林將軍。卽著阜保署理。副都統麟瑞與景綸同辦一事。未能稽察。亦屬不合。著先行交部議處。尋議景綸常明富全。均請卽行革職。麟瑞降三級調用。不准抵銷。從之。○諭議政王軍機大臣等。阜保奏遵查吉林叅案。分別定擬一摺。另片奏遵查於木稅情形。請將各稅由吉林廳徵收等語。吉林為根本重地。關繫非輕。阜保於特旨交查之案。宜如何詳慎

周密以期徹底澄清。乃覽其所查各節。尚多敷衍了事之處。卽如操演西丹一千名。既無花名清冊。而勒捐錢文。卽由該協領等領回散放。其為侵肥入己。並未操練。情弊顯然。阜保僅於捐數用數。求其相敷。而於操練之有無其事。並不根究。至上年操演兵丁二百名。動用捐項一萬三千餘吊。有無不實不盡。自應嚴切查明。何以輒為姑免深究之請。巴克喜以私鋪存庫項。牟利營私。阜保既稱其蹤跡詭秘。難保非與常明明祿等夥開錢鋪。卽應究其夥開實據。不應以疑似之辭。輒為臆斷。菸木稅銀徵收實數。與報部額數。大相懸殊。贏餘之款甚鉅。所稱津貼辦公。何以並不逐款訊明。又不將所呈清單奏明。殊屬含混。其案內未盡各事宜。阜保既奉命查辦。自應逐件清釐。永除積弊。何以不候諭旨。輒將未了各事。咨交景綸辦理。且阜保既稱景綸形同聾聵。辦事不能自主。整躬率屬。豈所望於

景綸耶。阜保現命署理將軍。責無旁貸。卽著趕緊折回。接篆任事。將應查之件。切實詳查。應辦之事。次第妥辦。務令弊絕風清。以副委任。儻敢因循含混。希圖塞責。則景綸覆轍具在。不能稍加寬貸也。吉林菸木等稅銀。既有贏餘盈千累萬。自應涓滴歸公。以昭覈實。嗣後此項銀兩。應令定歲額若干。酌留辦公經費若干。並由吉林廳徵收之處。均著阜保斟酌情形。妥議具奏。至伯都訥長春兩廳。均係吉林將軍所轄。並著阜保查明歲收稅銀若干。一併妥速籌辦。雜稅銀兩。應否酌量定額。亦著善為辦理。釐捐一項。既為抵充放餉之用。准其暫緩裁撤。盜犯痞子李等。阜保務當督飭兵弁。會同盛京黑龍江等處官兵。撻拏務獲。以絕根株。將此諭令知之。尋奏查覈近年收數。酌中定額。每年吉林廳徵收菸酒木稅。以銀三萬一千七百兩為額。土稅以京錢二萬八千吊為額。酌留辦公銀八千兩。長春



廳徵收各稅。以京錢二萬八千吊為額。酌留辦公錢八千吊。伯都訥廳徵收各稅。以京錢二萬吊為額。酌留辦公錢六千吊。除倒支書役工食紙張等項一成。均以同治三年為始。照數徵解。如數年後盈虧懸殊。隨時奏明辦理。下部議從之。○又諭阜保奏。遵查吉林盜匪一摺。內稱有滾地雷王五餘黨。烏痣李即痣子李。於四月間。糾同劉發好等。竄至吉林之東南地方。復西竄至大孤山。句結回匪楊

發等肆搶等語。盛京黑龍江地界。與吉林毗連。現在該犯等尚未弋獲。恐其潛蹤逃匿。著玉明寶善各派官兵。會同吉林派出員弁。將痣子李等首夥各犯。嚴密兜拏。並查明該犯內有無戴老疙瘩。一併捕拏。毋任漏網。將此各諭令知之。○又諭。官文奏。髮捻敗逆。奔趨襄棗一帶。現籌會剿一摺。德安股匪。由府北之平林市。竄向雷公店。隨州之賊。分竄襄棗之黃龍壩。資山等處。經官軍擊敗。奪路狂奔。

前由霍山竄入黃安。敗匪復上竄孝感。應山之小河溪等處。奔赴隨州。雖係亡命之餘。乘虛鉞走。而狼奔豕突。其勢尚熾。且匪氛尚在楚境。何得遽謂全境將次肅清。腹地無虞。官文既稱逆匪歸併一處。正可合力兜剿。就地殲除。不准徒託空言。必須嚴申軍令。督飭常星阿李成謀等軍。一面分路追剿。一面繞出賊前。迎頭截擊。務須悉數殲誅。毋任逃竄出境。成大吉已紮楚豫交界之呂堰驛。梁洪勝

已紮老河口。楊朝林馳赴鄖陽。並顧鄖西竹溪一路。即著責令該提督等實力遏截。儻任令賊蹤竄入豫陝境內。必當按照軍法治罪。蔣凝學一軍。並著飭令趕緊拔隊。馳赴鄖西。以備截擊。毋稍延緩。僧格林沁督軍已抵棗陽。際此雪虐風饕。衝寒督戰。朝廷甚為廑繫。前曾諭令該大臣。如楚豫兵官臨陣退縮者。即指名嚴參懲辦。現在官文所派各軍。已由僧格林沁調遣。即著督飭該將士奮力勦賊。



與郭寶昌等軍。會合兜擊。迅殄逆氛。儻在事員弁。有不遵調度者。卽著指名嚴叅。以軍法治罪。毋稍姑容。前據官文奏。劉連捷等坐守皖境。並未赴鄂。嗣據曾國藩奏稱。已派劉銘傳等統淮勇渡江。剿皖鄂之賊。劉連捷等赴黃州候官文調遣。何以此次官文摺內。於劉連捷等入楚一節。並未提及。著曾國藩嚴飭劉連捷等。星馳入鄂。會合楚軍。併力擊賊。儻敢意存畛域。任意遲延。朝廷法令具在。不能因該軍士在江南勦賊。著有微勞。稍從寬宥也。將此由六百里各諭令知之。○以戶部左侍郎阜保署吉林將軍。○庚申冬至。祀天於圓丘。遣豫親王義道恭代行禮。○遣官祭永陵。福陵。昭陵。昭西陵。

孝陵

孝東陵

景陵

泰陵

泰東陵

裕陵

昌陵

昌西陵

慕陵

慕東陵。○遣官祭

文宗顯皇帝

孝德顯皇后暫安寢殿。○遣官祭

端慧皇太子園寢。○停次日朝賀。○諭內閣

前因阿克敦布等奏商都牧羣護軍那穆濟

勒多爾濟等控告該羣總管舒濃棟魯普攢

扣兵餉勒索銀兩挑缺受賄擅將牧長解任

各款舒濃棟魯普復呈揭該羣翼長察連泰

欠交餉銀私用駒價各情當令綿森吳廷棟

馳往訊辦。嗣因該總管等供詞狡展。將舒濃棟魯普察連奏革職嚴審。茲據綿森等奏稱。督同隨帶司員。訊明舒濃棟魯普科斂餉銀。察連泰私用馬駒價銀屬實。並究出協領舒都爾古等收受陋規各節。分別定擬具奏。此案舒濃棟魯普雖無勒索筆帖式巴特瑪泳隆等銀兩。賄買牧丁。及每挑一缺。收受賄賂情事。其將牧長拉普坦多爾濟等解任。或因差使懶惰。或因動用公項撤退。亦無勒索情事。惟因辦公支絀。輒於放給兵餉後。令各出銀兩歸公。為數至二萬餘兩之多。雖據供稱。歷任相沿。究屬任意科斂。舒濃棟魯普業經革職。著從重發往黑龍江效力贖罪。翼長巴彥。係幫辦總管。於舒濃棟魯普科斂餉銀。隨同附和。翼長齊黨依付於接署總管時。科斂兵餉一季。均著即行革職。察連泰雖無欠交餉銀三百餘兩之事。惟擅用駒價銀四十餘兩償還私債。即與科斂入已無異。察連泰業

已革職。著與巴彥齊黨依付。俱從重發往軍臺效力贖罪。惟係察哈爾蒙古。均著酌發吉林當差。翼長洋濟普巴勒諾爾布旺濟勒於舒濃棟魯普科斂餉銀。並不勸阻。實屬不合。均著交部照例議處。已革委翼長洋濟普車林等八員。代舒濃棟魯普收取銀兩。亦有不合。洋濟普車林著開復委翼長。與瑪哈西哩巴勒沁額林沁。綢素克拉付巴布噶爾布。那遜布彥特古斯綽克圖。均照律笞四十。准其納贖。協領舒都爾古王事恒廉。收受舒濃棟魯普等規禮賀銀。實屬不知閑檢。均著革職。發往軍臺效力贖罪。舒都爾古係察哈爾駐防。著酌發吉林當差。員外郎保順。佐領伊什貢布。筆帖式慶瑞。得受餽送銀錢。均著交部照例分別議處。阿克敦布家人李詳等。應得杖笞各罪名。均著照擬辦理。至察哈爾各任都統等。於商都牧羣科斂兵餉。及所屬官員暨家人等收受規禮。均有失察之咎。著交部

查取職名。照例分別議處。至所稱規禮。係歷久相沿。上年查羣大臣熙拉布。收受該總管等程儀八折銀五百兩。馬二匹。前任察哈爾佐領升任副都統定安。亦曾收受該總管等賀喜銀一百兩。著熙拉布。定安。明白回奏。其案內牽涉之在京職官及書吏人等。均著交刑部提訊。應行對質之舒濃棟魯普巴彥。察連泰。色勒沁端多克。濟克默特旺布。並著解交刑部備質。○又諭綿森。吳廷棟。奏請飭整頓馬政等語。國家設立牧羣。養養弁兵。原以備臨時徵調。緩急可以應用。乃近年以來。該總管等並不認真牧放。遇有徵調。往往馬匹疲乏。不堪挑選。因而扣餉購馬。累及兵丁。甚至將馬駒變價。孳生日少。百弊叢生。殊堪痛恨。現在軍務未竣。需用馬匹尤多。豈容任意廢弛。著察哈爾都統等力加整頓。嚴飭總管翼長等認真牧放。隨時查驗。務期馬匹全無疲乏。馬駒覈實歸羣。以祛積弊而收實效。如

遇有徵調。必須添買。及籌備供應各項。並著該都統等通籌全局。悉心妥議。奏明辦理。其攢扣兵餉。馬駒變價。及挑缺令兵丁出銀添補馬羣。一切積弊。務須全行革除。各衙門陋規。及餽送查羣大臣程儀等項名目。並著永遠裁汰。毋得再蹈從前積習。○諭議政王軍機大臣等。富明阿奏覆陳揚防兵勇數目。分別調撥裁撤一摺。揚防現存吉林等處馬隊。計三百餘名。除傷殘老弱應行遣撤回旗外。其精壯可用。及新調吉林官兵。著富明阿轉飭糧臺。籌給路費。找清欠餉。交派出之侍衛壽昌等管帶。馳赴都興阿軍營。聽候調遣。其揚防陸營兵勇。尚存一萬四千餘人。積年欠餉甚多。並著照該將軍所請。將本年江北冬漕折色。全行借撥。以便陸續裁撤。至水師留防礮划兵勇。俟糧臺籌給口糧解到後。應如何妥為遣撤之處。並著富明阿會商吳棠。迅籌會辦。此項冬漕折價。業經借作遣撤兵勇

之需。並著吳棠於揚防裁撤兵勇節省銀兩內。卽行撥還漕價。解交京師。以重倉儲。將此由四百里各諭令知之。○又諭楊岳斌奏。抵湘日期。並請催各省協餉一摺。前因楊岳斌募勇援甘。當經諭令左宗棠等各籌銀八萬兩。惲世臨於東征局撥銀四萬兩。李鴻章籌銀十萬兩。剋期如數解交。茲據楊岳斌奏。行抵長沙。卽擬招勇。無如各省協餉。僅准江西解銀四萬兩。彭玉麟解銀一萬兩。惲世臨先籌銀一二萬兩。除製辦鍋帳等項外。所餘無幾。請飭催江蘇等省督撫。將應解餉銀。如數湊交委員解回等語。著官文左宗棠毛鴻賓李鴻章吳昌壽徐宗幹郭嵩燾惲世臨按照原撥數目。趕緊湊齊。交楊岳斌守提委員解回。俾得早日募勇赴甘。毋得視為不急之務。任意宕延。致誤戎事。各省所奏協餉。已有報解在途者。諒陸續均可解到。楊岳斌當懷遵疊次諭旨。迅卽招募新勇。如集有成數。或先

派委員帶數營赴甘。或自行帶赴新任。若俟各省餉項到齊。方始開招。則招募訓練。又需時日。何以濟甘省燃眉之急。刻下甘省情形。靜甯尚在被圍。甯夏仍未克復。安會河狄均有賊氛。而鹽關回匪出擾。秦州又復戒嚴。都興阿雷正綰所部兵勇各萬餘人。曹克忠陶茂林所部亦各數千。兵力並不過薄。再益以楊岳斌所部勁旅。節節攻取。無難綏靖邊疆。該督務當妥速區畫。部勒起程。用副委任。將此由六百里各諭令知之。○又諭勞崇光等奏克復興義府城。並勦辦新城竄匪獲勝各摺片。回逆盤踞興義府城。經署知府孫清彥等帶領兵練。分路進攻。並密約朱天貴等作為內應。於九月十六日。將興義府城克復。該城雖經攻拔。惟首逆張凌翔乘閒脫逃。餘匪亦多竄逸。著勞崇光張亮基督飭派出各軍。乘此聲威。跟蹤緊躡。將張凌翔嚴密擒捕。並將逃竄餘匪。及貞豐新城之賊。悉數殲除。毋

任該逆首久稽顯戮該城善後事宜著該督等督飭文武妥為籌辦新城回匪因普安廳防堵嚴密不克假道赴滇卽糾各匪圍撲該廳城池經官軍疊次追剿餘匪逃踞播政歸順一帶地方該逆圖援曲靖回逆馬連升難保不乘閒再行攻撲以遂其赴滇之計卽著嚴檄各軍實力埽蕩務將此股就地殄除毋令闖入滇境方為妥善將此由六百里各諭令知之○以翰林院侍讀梁肇煌檢討趙新

充日講起居注官侍讀學士王祖培署日講起居注官○以雲南普安勦辦逆回獲勝賞守備馬金奎等花翎軍功周步雲等藍翎餘升敘開復有差予陣亡把總李志雲高思堯祭葬世職加等○以克復貴州興義府城賞守備徐定邦花翎餘升敘有差予陣亡從九品胡廷澤守備陸萬春把總周步雲祭葬世職加等○予貴州仁懷被戕知縣馬鈞陣亡把總艾定國傷亡典史潘騰芳祭葬世職○

追予江南浦口陣亡殉難各營員弁兵勇建立專祠並予揚州節年陣亡殉難員弁兵勇附祀總兵官雙來專祠○辛酉諭內閣御史阿凌阿等奏參陪祀人員到班無多一摺冬至

圜丘大祀典禮綦崇各衙門派出陪祀人員均應恪恭將事以昭誠敬乃據該御史等奏稱是日到班人數寥寥殊屬不成事體總因視稽查為具文怠惰偷安罔知敬畏嗣後凡恭

遇

壇

廟祭祀其應行陪祀人員如有無故不到及呈遞職名後先行散歸者卽著糾儀監禮各員據實查叅從嚴懲處以重祀典○又諭前因玉明等奏參領催稟控協領蒙蔽上司錯填軍政薦本各款當經諭令和潤等提訊具奏茲據寶珣志和奏稱查明虛頂領催易廣安所控驍騎校慶麟等步射未能張弓一款實

因考驗時因病上隊轉求別人代寫親供以致錯誤。委無另有情弊。協領成殿鼐蒙填薦本一款。實因佐領全順因見冊內年歲不符。自行貼改。當時忘未報明更正。該協領於經制冊內未經查出。委係遺漏。並無知情徇隱情事。揀選水師營協領不合原奏一款。係屬易廣安因誤會懷疑具控。實與原奏並無不合。派差甘苦不一。並營幹倉差一款。係屬得之誤聞。至收受匿敬一款。則因該協領嫁女

時。易廣安等公送玉錫。亦因素有往來。始行收受。請分別定擬等語。此案已革佐領全順。於經制冊內增改年歲。雖訊無希圖免驗騎射情弊。惟不呈明報部。擅自貼改。究屬任意妄為。全順著開復原叅革職處分。仍交部照例議處。撤任協領成殿鼐於保舉全順薦冊內。並非蒙蔽錯填。其派充倉差。亦無營幹情事。收受匿敬。係親故往來。例所不禁。與地方官接受餽送者不同。惟於軍政箭冊年歲不

符。並不同明查對。並於全順免驗騎射。亦未查例同堂。實非尋常錯誤可比。成殿鼐著交部嚴加議處。佐領德慶等承辦軍政箭冊。並未詳查。輒將薦舉印冊。令照箭冊回明更改。均屬疏忽。佐領德慶李天恩。防禦榮斌。驍騎校馬有利。景祥。均著交部議處。協領集爾哈布。佐領李興。詩於全順貼改年歲。失於覺察。著交部分別察議。驍騎校慶麟。考驗步箭。倩人代寫親供。致有錯誤。著交部議處。盛京將

軍王明前署副都統侍順於失察全順年歲錯誤。業經自行檢舉。惟因全順年屆六十。未驗馬箭。薦舉冊內。填註騎射優考語。雖係照案辦理。究與條例未合。王明侍順仍著交部察議。司達榮慶高殿試將全順年歲貼改。係屬奉官指使。尚無不合。著無庸議。已革虛頂領催易廣安所控各情。雖皆事出有因。究屬於已無干。所控補缺派差各項。審明均係虛誣。跡近逞刁挾制。自應照例定罪。惟或因誤

會。或係懷疑。究非盡屬子虛。尚可量從末減。易廣安著照例折枷鞭責。交該旗嚴加管束。嗣後該將軍等。凡遇軍政補缺派差等事。務當秉公辦理。釐剔弊端。力挽積習。不得仍前玩忽。致滋貽誤。○諭議政王軍機大臣等。戶部奏北路草地遞解新疆軍餉。請飭迅速趲運。並覆查伊犁將軍奏覈各城應用銀數一摺。據稱山西巡撫沈桂芬奏報籌解銀八萬兩。於八月十三十七等日起程。解交歸綏道衙門。由德勒克多爾濟轉解。科布多。知照古城迎提。又報河東道籌撥鹽課銀三萬兩。於八月二十五日起程。解交歸綏道衙門。迄今保恒尚未接據知照。是否北路各城。任意稽延。請旨飭查等語。新疆匪勢蔓延。需餉甚迫。如各該城節節延宕。致令各省業經報解之款。日久未能解到。因循疲玩。貽誤戎機。尚復成何事體。著德勒克多爾濟麟興。車林敦多。布廣鳳。奎昌。查明山西委員韓升之。李敬淑。

解到之八萬兩。長啟解到之三萬兩。係於何日解到綏遠城。該城係於何日轉解烏里雅蘇台。何日解到科布多。其各處委員。是否沿途逗遛。並科布多知照古城及各路日期。迅速詳細奏聞。並著該將軍大臣等。將此外續到餉銀。隨到隨解。隨時奏報。儻委解任意遲延。不卽知照各路。以及各委員有逗遛情事。卽著戶部據實嚴叅。以為玩視軍需者戒。昨因常清等奏覈定各城餉銀數目。均令解交伊犁分撥。當經諭令戶部辦理。茲據該部奏稱。原撥新疆餉銀六十萬兩。除山東山西解過四萬外。將山西未解之二十七萬。以八萬轉解古城。由保恒提取。再將其餘十九萬。並山東未解之六萬。河南未解之七萬。由北路運存科布多。由伊犁將軍塔爾巴哈台大臣。豫覈南北各城緩急。應用若干。知照各城赴科自行提取。又將四川未解之十六萬。由陝甘解存安肅道庫。備南路各城提取。並非概



由北路草地趲運亦非以六十萬統歸伊犁將軍覈定更不能俟運至伊犁後再行分撥等語朝廷於新疆餉銀方慮程途寫遠轉運不能迅速致誤軍糧若如常清等所奏均交伊犁再行分撥勢必令飢軍枵腹坐視餉銀往返數千里之遙殊屬不知緩急著明緒錫霖豫覈南北各城緩急情形各應用若干知照各城自行提取毋庸解交伊犁再行分撥哈密為南北路之門戶古城又新疆各城之門戶科布多運餉必先至古城安肅道運餉必先至哈密各省餉銀必運至該二城著保恒惠慶扎克當阿妥為照科卽行知照各該城迅速提取毋稍延緩至山東山西河南四川等省未解新疆餉銀著戶部飛催迅速趲運儘再遲延推諉置回疆要需於不顧卽著該部指名叅處原摺均著鈔給閱看將此由六百里各諭令知之尋德勒克多爾濟奏查明解過新疆餉銀暨委解日期覆覈無誤以

後遇有餉鞘解到隨到隨解儘委員及各站弁兵稍有耽延卽指名嚴叅下部知之○入諭前因保恒惠慶奏烏里雅蘇台所派喀爾喀蒙兵一千五百名業已齊抵古城該署都統擬將麟興等派往之主事職銜遇春等七員留於軍營管帶蒙兵以資得力而遇春執意不從遂帶領存保起程旋回當經批示令該署都統嚴催遇春等折回古城聽候差委並於麟興等陳奏遇春由古起程旋回片內批令迅飭該員前赴古城不准逗遛嗣據廣鳳奎昌奏該員違令啟行至科布多尚有私發傳條勒索臺員供給擅行馳驛各情事復將遇春革職勒令折回管帶蒙兵如再遲延卽行治罪茲據麟興等奏接據保恒咨調擬令防禦薩錫等五員前往其遇春存保二員仍留烏里雅蘇台辦理蒙古事務所奏殊屬不知緩急麟興前於奏派遇春帶兵赴古時則稱其管帶蒙兵緩急可恃並於未經起



程之先越級保奏加協領銜委營總以防禦首先坐補朝廷業經允准該革員宜如何激發天良乃敢不遵軍令擅行折回情殊可惡麟興等此次又復代為奏留豈以該城辦理蒙古事務較之古城帶兵需員尤為刻不容緩耶何惜昧至此著卽懍遵前旨催令該革員遇春及存保等趕緊前赴古城聽候保恒等差遣以觀後效儻敢抗違逗遛及到古城後不遵調度不能得力卽著保恒按照軍法治罪毋稍寬貸將此由五百里各諭令知之

○又諭總理各國事務衙門戶部奏據美國公使蒲安臣在總理衙門呈遞照會內稱咸豐八年伍崇曜向美國旗昌洋行借銀三十萬兩經前任兩廣總督會同粵海關監督立揭銀單由伍崇曜交與洋行收執請飭廣東督撫將伍氏欠項查明於應繳各項內先行撥抵或由伍氏自行劃扣將印票收回並將各年款項分晰造報等語伍崇曜前代籌

借三十二萬兩當時給與海關印票初無借自美國之說前經諭令毛鴻賓傳諭該故員家屬將此項銀兩妥為籌措自行經理尚未據該督等將現辦情形具奏茲據美國公使呈遞照會請照單計息清還此項銀兩既經發給印票自應早為清理現由戶部查明該省遞年應行報解各款內有伍氏所開之怡和等行欠繳公項銀二百六十八萬餘兩著毛鴻賓郭嵩燾師曾迅將伍怡和等行積年欠解公項截至本年止究竟有無按限完繳據實查明勒限催解一面在於應繳各項內准其先行撥抵或由伍氏自行劃扣抑或仍歸藩庫轉發務須迅速妥辦將印票仍由海關收回以免軋轢此外應繳各軍款項已未完解亦卽分晰造冊報部查覈該督等務當仰體朝廷寬大之恩傳知該故員家屬俾知感激圖報速為清理儻仍藉詞推諉有意宕延卽照道光二十五年奏案執法嚴懲毋稍

徇縱原摺著鈔給閱看。將此諭知毛鴻賓郭嵩燾並傳諭師曾知之。○壬戌以神靈顯應加河南項城縣

城隍神封號曰靈應。○諭內閣昨因綿森等奏查出上年查羣大臣熙拉布有收受程儀情事。當經諭令熙拉布明白回奏。茲據奏稱上年四月間派往商都查羣。曾經收受該處總管折給駝贏等項銀四百兩。馬二匹。自請治罪等語。熙拉布係派往查羣大員。宜如何潔已奉公認真查辦。以期釐剔弊端。整飭牧政。乃於歷久相沿之陋規未能拒絕。安望其破除情面。剔盡懲奸。若奉使大員皆如此不自檢束。則朝廷派查事件。不幾視為具文耶。熙拉布著交部嚴加議處。○癸亥諭議政王軍機大臣等。僧格林沁奏追剿髮捻各股賊匪。先後接仗失利。現駐鄧州。相機追擊。檄調楚皖官軍扼剿。並自請嚴議一摺。髮捻各股由棗陽黃龍壩峪山等處向西北滾河一帶

竄去。經僧格林沁督軍追擊。乃帶兵各官未能勦力同心。以致馬步官軍或因陷於溝坎泥淖。遂至失利。或因霧氣迷漫。為賊所乘。總由該將弁等帶兵不能得力。屢致敗挫。即著僧格林沁查明據實嚴參懲辦。以肅戎行。該逆現竄鄧州東北白牛里一帶。僧格林沁移紮鄧州。即著整飭隊伍。督令帶兵將弁合力追剿。以贖前愆。僧格林沁自請嚴議之處。著加恩寬免。賊蹤已入豫境。著張之萬嚴飭張

曜等實力嚴防。毋令紛竄腹地。擾及完善。鄧州距陝較近。著劉蓉檄飭在防各軍嚴密防剿。毋令闖入邊境。陝省與商等處兵力甚單。蔣凝學一軍現紮商城。未能由鄖西繞出賊前。迎頭截剿。必須由楚省調撥勁軍繞前截擊。方能遏其入陝之路。即著官文迅撥得力兵勇馳赴豫陝之交界地方。會合陝軍奮力兜截。毋稍延緩。前諭曾國藩迅飭劉連捷等軍星馳入鄂。歸官文調遣。即著仍遵前旨。飭

令迅速前進。儻敢逗遛。卽著曾國藩查明嚴  
叅。並著官文檄調劉連捷等軍到鄂。以便騰  
出兵力。赴陝助剿。以資周轉。國瑞現由光山  
移紮信陽。卽著該將軍妥籌布置。相機策應。  
將此由六百里各諭令知之。○又諭林鴻年  
奏擬辦滇事大概情形。暨勦辦鎮雄土苗等  
匪各一摺。所陳籌度辦滇之法。非借資川力。  
別無良策。自係實在情形。惟現在馬如龍與  
梁士美不協。岑毓英亦與馬聯陞不協。滇省  
員弁兵練。不知紀綱。以故數年來百端廢墜。  
焚如亂絲。該撫現擬先靖黔匪。黔事既定。卽  
可合力辦滇。著卽咨商四川湖南各督撫。妥  
籌會剿。其滇黔邊界。卽以劉嶽昭任之。滇之  
東境。亦可藉資震懾。我邊馬邊民勇。卽由林  
鴻年酌募精壯數千人。認真訓練。所需軍火。  
由川省借用。儻滇省機有可乘。卽可相度進  
剿。以期得力。昨據勞崇光等奏貴州新城回  
匪。與雲南曲靖府逆回馬連升勾連一氣。岑

毓英進攻曲靖。該逆馬連升被勦窮蹙等語。  
此次摺內。僅稱岑毓英與馬聯陞不協。是否  
卽係勞崇光等所稱之馬連升。著林鴻年查  
明具奏。永北廳失守情形。及文武下落。並著  
查探明確。照例辦理。一面飭令派出各員。前  
赴大姚元謀永北一帶。激勵團練。防其北竄。  
入川。鎮雄與川黔相錯。逼近昭通。土苗各匪  
嘯聚。自應迅圖廓清。方不致阻塞。由昭通一  
帶進兵之路。現在李延忠節節進剿。擒獲賊  
首。鎮雄地方。漸有起色。卽著責令該署牧乘  
此聲勢。逐節清釐。如果始終出力。卽著林鴻  
年酌覈請獎。該州附近土匪。多係雲貴四川  
三省邊界之人。苗匪則畢節威甯者居多。三  
省地勢交錯。自須會商勦辦。方可迅就撲滅。  
卽著與駱秉章勞崇光張亮基妥籌辦理。以  
顧全局。將此由五百里諭令知之。○又諭林  
鴻年奏滇省軍餉。萬分支絀。請飭廣東湖南  
迅速撥解餉銀等語。滇餉支絀。係屬實情。湖

南東征局籌用漸舒。廣東釐金協助江南大營者。亦經停解。均可勻出餉需。分撥滇省。以資勦辦。著毛鴻賓、郭嵩燾、惲世臨酌量數目。迅速籌出若干兩。源源撥解。以濟要需。毋稍遲延。將此由五百里各諭令知之。○甲子。諭議政王軍機大臣等。官文奏。兵力厚集襄樊。會勦敗匪。楚省可保無虞。定期回省。曾國藩奏。遵旨回任。擬赴安慶黃州。妥籌防勦。各一摺。據曾國藩奏。劉連捷等軍。宜以黃州上巴

河為老營。凡黃州八屬有警。即令分隊馳勦。劉銘傳等軍。宜以三河尖固始為老營。凡皖豫交界有警。即令相機防勦。有此二枝勁旅。庶可騰出湖北本省兵力。專顧德安襄陽等處。以為通力合作之計。自是老謀深算。惟遠防不如近勦。現在賊蹤駁駁西竄。若駐紮三河固始。未免距賊較遠。兵情旦夕變遷。著曾國藩飭令劉連捷、劉銘傳等。入鄂入皖之軍。探蹤前進。均歸僧格林沁調遣。以期力殄狂

氛。肅清餘孽。曾國藩擬俟科場完竣。諸務就緒。乘坐輪船。駛赴安慶黃州。一次不若就目前。李鴻章尚在江甯。該督即日出省。規畫指揮。嚴飭諸將認真防勦。較可得力。俟各路布置定妥。仍即馳回江甯。辦理善後一切要務。官文以西征軍實。及金陵遣勇欠餉。尚無端倪。並公事積壓已久。請回省督辦。自係實情。著即回省。督飭司道認真籌辦。一面嚴飭水陸各軍。認真勦辦。務將此股賊匪。即在楚境

就地殲除。毋任旁竄他省。僧格林沁暫駐鄧州。惟當恪遵昨日諭旨。穩慎進兵。力圖勦洗。凡遇山險泥淖。均以步隊當先。平原曠野。以馬隊當先。並須豫撥勁兵。嚴扼該逆西竄之路。前截後追。毋任入陝。劉連捷、劉銘傳等軍。並著該親王酌量調度。以資厚集。其何路兵將赴調遲延。即著僧格林沁嚴行叅奏。皖境現雖無賊。喬松年仍當飭屬妥防。不可稍有疏失。張之萬惟當懷遵昨日寄諭。嚴飭張曜

等實力防勦。興商之防甚單。劉荅當設法添派兵勇。豫籌堵截。免致臨渴掘井。貽誤事機。將此由六百里各諭令知之。○以江南克復江甯府城。暨隨營籌飭出力。賞遊擊蔡麟厚二品封典。總兵官熊濟圖。楊龍光。楊維勝。張光德。周日昇。副將羅芝雲。趙升揚。陳祿安。劉國斌。劉取仁。王春和。滕代祥。劉价貴。李光裕。余有德。繆福賓。柳金源。陳復堂。廖雲清。參將張得勝。徐洪仁。錢榮華。梁崇利。朱光明。鍾明

亮。遊擊茅子莊。巴圖魯名號。按察使何璟。參將喻光彪等花翎。千總喻子鵬等藍翎。餘加銜升敘。開復有差。○予江南江甯合門殉難國子監典籍錢繼文。祭葬世職。附祀江甯府暨浙江嘉興府原籍昭忠祠。眷屬旌卹如例。○乙丑。諭議政王軍機大臣等。景綸麟瑞泰山匪聚眾蠢動。派兵勦捕。獲勝一摺。據稱該城西南許三家子屯地方。突有山匪多人。持械入屯。搶刦團練槍礮。經景綸等派佐領依

常阿帶兵役馳往搜勦。擊斃夥首張楚兒。把勢等五十餘人。生擒宋義等十三人。餘匪向圍場邊山邊逸。分竄響水河子屯一帶地方等語。吉林圍場地方遼闊。盜賊易於匿跡。若不迅速殲滅。必致蔓延。著阜保麟瑞嚴飭依常阿等。並添派之雲騎尉富明阿等。分路掩捕。務將此股匪黨。殄除淨盡。並將匪首梁才拏獲。毋任他竄。並著玉明寶珣選派得力弁兵。一體堵擊。其附近圍場各地方。該將軍等

尤當隨時實力巡緝。以靖寇蹤。將此由五百里各諭令知之。○又諭雷正綰奏。規拔固原。疊平逆壘。曹克忠馳解秦州城圍。進擣鹽關。請飭余福象在營效力各摺片。雷正綰自克蓮花城後。回軍涇平。規復固原。將石家溝等處逆巢平毀。移營進逼東山城。賊復大潰。追至距固城三十里之打河店。並將鷄哥嘴等處巢穴蹋平。所辦甚為得手。此時軍威大振。該逆敗潰之餘。聞風膽落。雷正綰現抽軍十

五營由瓦亭大道進剿。飭總兵胡大貴等次第滾營大舉。不難功收破竹。迅復名城。著卽親督各軍。兩路夾擊。務須嚴防回逆狡詐。穩慎進兵。將該逆就地聚殲。堅城立拔。其逆首孫義寶。尤當設法擒斬。毋令漏刃他竄。又形勾結。曹克忠馳援秦州。城圍立解。復將分擾甘泉寺之賊。斬截殆盡。拔營赴天水進剿鹽關。斃賊甚夥。著卽飭令該總兵乘此聲威。鼓行而西。迅將鹽關巨巢攻克。以期節節掃蕩。

該處地連秦蜀。道路紛歧。尤當防其與階州髮逆勾合聯絡。致剿辦又形棘手。陶茂林現赴蘭州。專顧西路。著傳諭該提督仍遵前旨。先解靜甯之圍。順道剿除安會一帶逆匪。再赴蘭州。將河狄一帶軍務。妥籌會辦。此時甘省各軍。分三路剿辦。賊勢旣分。軍務不難日有起色。都興阿、穆圖善、雷正綰等。惟當通盤籌畫。妥為調度。迅殄狂氛。以期肅清西陲。用副委任。余福象一員。現經雷正綰派令回楚。

招募精銳六營來甘。俟抵甘後。卽著該署提督留於軍營效力。以資臂指之助。其所募勇丁。或分撥數營赴穆圖善軍營之處。屆時斟酌軍情。與穆圖善妥籌調派。雷正綰、張集馨另奏軍餉萬分支絀。請將部准新疆贖罪章程。量為變通。酌減銀數。以濟要需一摺。雷正綰等營餉項異常支絀。自屬實在情形。前經奏准。已未到成。各官犯文武贖罪銀兩數目。奉文已屆半年。尚無一人捐贖。該提督等以

銀數仍鉅。各官犯力量未必盡寬。是以雖有贖罪之條。並無濟餉之實。請照籌餉事例。分別已未到成。銀數覈減五成。定以呈限半年。銀限一年。以奉到部文之日起限。不准展緩。他省不得援以為例。其中如情節較輕者。捐贖後准回旗籍。如情節稍重者。捐贖後由流減徒。改發軍臺。呈繳三年臺費。方准釋回旗籍等語。著卽照所請行。其有情節甚重者。仍著隨時奏請辦理。以示區別。本日又據劉蓉

奏副將顏明亮押解餉銀五百兩。行抵城固縣。被勇丁劉占洪刦去餉銀。將顏明亮殺死等情。劉占洪係曹克忠部下副新中後兩營勇丁。膽敢刦奪餉銀。殺斃副將大員。實屬罪大惡極。著都興阿、雷正綰等飭令曹克忠迅將該犯劉占洪嚴拏。解交劉蓉歸案審辦。盡法懲治。毋任漏網。將此由六百里諭知都興阿、穆圖善、雷正綰並傳諭張集馨知之。○以禮部右侍郎汪元方為

實錄館副總裁官。○補鑄浙江嘉興府知府理事同知。水利通判。儒學經歷。照磨。司獄。西水驛驛丞。乍浦同知。巡檢。嘉興縣儒學。秀水縣知縣。儒學。嘉善縣儒學。縣丞。王簿。海鹽縣儒學。平湖縣儒學。白沙灣巡檢。石門縣知縣。儒學。桐鄉縣知縣。儒學。各印信關防條記。從兼署巡撫左宗棠請也。○以打仗出力。免陝西已革都司崔勝朝罪。仍留營。○以失察勇丁刦餉戕官。撤陝西知縣程道源任。下部議處。

○緩徵陝西府谷縣被雹村莊本年下忙額賦。○丙寅。以神靈顯應。頒哈密

關帝廟扁額。曰德威廣運。

火神廟扁額。曰離德光昭。○諭議政王軍機

大臣等。前據戶部奏撥新疆餉銀六十萬兩。

疊經諭令各該督撫等按數撥解。並據戶部

飛催各該省迅速趨運。以濟要需。迄今數月

之久。已據山西陸續報解銀十餘萬兩。山東

僅解到銀一萬兩。四川河南兩省。並未絲毫

報解。現在新疆軍務喫緊。需用浩繁。僅再遲

延日久。必致飢軍枵腹。貽誤戎機。於邊陲要

地。大有關礙。著閻敬銘、張之萬轉飭各該藩

司。卽將應由科布多轉運之山東欠解銀六

萬兩。河南欠解銀七萬兩。趕緊籌解。其應由

安肅道庫轉運之四川欠解銀十六萬兩。著

駱秉章迅速派委委員。趲程運解。毋稍延緩。

並著沈桂芬速將欠解餉銀。如數解由科布

多轉解外。仍隨時籌撥銀兩。源源接濟。毋得



稍存膜視。致誤要需。將此由五百里各諭令知之。○入諭給事中博桂奏。順天文安縣小趙村地方。有兇犯寇玉林充當本縣總鄉長。與衙役劉沅和並劉沅和之父劉四。及蠹棍李福桂等朋比為奸。請飭捕拏審辦等語。前有旨令各直省督撫。禁革私立總社長總保長等名目。若如博桂所奏。則是順天地方。尚有棍徒充當總鄉長。假公濟私。有干例禁。並據奏稱寇玉林家有地窖。曾於咸豐二年間。

毆死民人王三。私埋匿報。現復充總鄉長。索詐攬權。如果屬實。不法已極。著萬青藜下實第派員前往查明。如實有其事。卽查拏懲辦。並著劉長佑派員一體前往查辦。毋稍輕縱。原摺著鈔給閱看。將此各諭令知之。○入諭前據給事中博桂奏。熱河土棍趙秀沔等聚眾傳徒。製造槍械。與都統衙門門丁王守齋係屬姻親。圖典官地承種。並構釁焚搶莊頭。范幘鼎家產。王守齋從中夤緣。反將范幘鼎

押禁。以致眾佃心俱不服。當經降旨交劉長佑密派妥員。前往熱河查拏提審。茲據麒慶奏稱。查得趙秀沔等聚眾置械各款。全無端倪。其搶奪范幘鼎家產一節。覈與本案情事。顯然相反。至都統衙門。向無總辦門丁名目。家人中並無王守齋其人。卽該都統批呈。亦無飭將范幘鼎鎖押。原奏種種舛誤等語。御史風聞言事。原不能盡屬可憑。若舛錯太甚。致令無辜平民。反受拖累。殊非朝廷申理冤

抑之意。著麒慶將金案人證卷宗。飭交委員瑞珊。帶赴直隸省城。交劉長佑親提嚴訊。務將此案是非曲直。徹底根究。以成信讞。范幘鼎搶奪趙幅沔家產。已據趙幅沔在熱河都統衙門呈控有案。何以博桂原奏。則稱趙秀沔等搶奪范幘鼎家產。情節相反。所稱門丁王守齋等亦屬子虛。其為有人屬託出奏。顯而易見。著劉長佑提集案內要證。嚴切根究。何人從中屬託。有無賄賂。務須盡情吐露。據



實具奏。儻仍有不實不盡。含混了事。將來別經發覺。惟劉長佑是問。麒慶片著鈔給劉長佑閱看。將此各諭令知之。○又諭。保恒惠慶奏。逆回勢益猖獗。分股上竄。請飭大兵出關。勦辦。文祺奏。撲滅巴里坤逆回。並坤郡勦捐糧石。籌辦城防各摺片。回逆自攻陷迪化後。分陷綏來南北兩城。庫爾喀喇烏蘇城垣。亦於九月二十九日失守。並有欲犯伊犁之謠。庫爾喀喇烏蘇與伊犁僅隔晶河。伊犁為新疆總會重地。設有疏虞。邊陲大局。何堪設想。著明緒督飭在事員弁。認真堵遏。毋令賊氛紛竄。所屬各城。並須鎮靜彈壓。嚴密防守。以固藩籬。其駐紮濟木薩一帶蒙古旗綠各兵。勇。著保恒惠慶。飭令勤加訓練。以備進剿。並將南山與吐魯番相通之處。一帶隘口。嚴密防堵。以防賊匪乘虛竄入。庫爾喀喇烏蘇失守。詳細情形。及該城員弁並武隆額下落。著保恒等查明具奏。前因該城大臣等屢有先

撫後剿之奏。朝廷正慮回眾居心狡詐。反覆堪虞。此次武隆額因與賊匪講和。受其愚弄。兵敗不知何往。以帶兵大員。甘為逆回所紿。喪師損威。殊堪憤懣。嗣後保恒等務須嚴飭各城帶兵員弁。一意堵剿。毋得再言撫議。致蹈從前覆轍。現在甘省軍務。大有起色。都興阿等已分三路進兵。俟辦理就緒。即當分撥勁旅出關。以張捷伐。援兵未到之先。明緒保恒均當慎重固守。以免疏虞。巴里坤回匪變亂。滿漢官兵民勇。卽時撲滅。辦理尚屬妥速。著文祺會同扎克當阿郡王伯錫爾。並咨色普詩新督飭在事員弁。擒捕餘匪。以淨根株。巴里坤民勇。及公局人員。於回匪釀亂之時。奮力殺賊。並捐助糧石。以濟兵食。尚屬出力。著文祺查明請獎。毋許冒濫。將此由六百里各諭令知之。○以哈密勦辦吐葫蘆逆回。淨盡。賞守備趙英傑花翎。千總張梁棟等藍翎。餘升敘開復。免戍有差。予陣亡外委高萬清

祭葬世職加等。○丁卯。諭內閣長善奏防獲  
逗遛宗室。解交宗人府收管。請飭嚴定章程  
一摺。宗室存瑞。自上年告假出京。逗遛山海  
關。將及一年。迄未回京。現經長善訪獲。解回  
宗人府。卽著該旗族長嚴加管束。至宗室人  
等因事告假出京。或在途中不安本分。致有  
騷擾招搖等情事。地方官因係宗室。不能拘  
責。遂益肆行無忌。擾害民間。訛詐地方。此風  
斷不可長。嗣後遇有宗室出京。在途滋事。應

如何嚴定章程。隨時查辦之處。著宗人府妥  
議具奏。○又諭滿慶等奏。請派青饒汪曲辦  
理商上事務一摺。汪曲結布因病出缺。無人  
辦理。達賴喇嘛商上事務。查羅布藏青饒汪  
曲人甚明白。辦事謹慎。為合藏僧眾素所推  
服。若令該喇嘛辦理商上事務。實於藏中事  
務有裨。著照所請。卽著青饒汪曲敬謹辦理  
商上一切事務。並賞給諾們罕名號。達賴喇  
嘛現在年幼。該喇嘛務當留心妥為照料。俟

遇便再行頒給敕書。○諭議政王軍機大臣  
等。滿慶恩慶奏。汪曲結布病故。商眾公舉僧  
人代理一摺。藏中事務緊要。必須得人辦理。  
羅布藏青饒汪曲。既據僧俗大眾稱其深通  
黃教。並曉公事。卽著滿慶等將本日清字諭  
旨二道宣示。令其感激恩施。勤慎辦公。務協  
輿論。儻能始終奮勉。僧俗永遠相安。將來必  
當錫以名號。准其轉世。以獎勤勞。如始勤終  
怠。不愜眾情。致藏地未能綏靖。朝廷洞燭萬

里。必將該諾們罕治罪。原保之人。亦豈能辭  
咎耶。福濟景紋行抵雅州。何以迄今尚未赴  
藏。此時打箭鑪至卡察一帶設站事宜。聞已  
辦理就緒。卽著福濟景紋。剋日起程。迅速入  
藏。毋許再有逗遛。致干重咎。羅布藏青饒汪  
曲協理商上事務。能否得力。並著到藏後隨  
時察看。據實具奏。毋稍徇隱。將此各諭。令知  
之。尋景紋奏。遵查新派掌辦商上事務諾們  
罕羅布藏青饒汪曲。老成持重。素為合藏僧

俗敬禮藏地底定僧俗相安報聞

大清穆宗繼天開運受中居正保大定功聖智  
誠孝信敏恭寬毅皇帝實錄卷之一百二十二

大清穆宗繼天開運受中居正保大定功聖智  
誠孝信敏恭寬毅皇帝實錄卷之一百二十三

同治三年甲子十二月戊辰朔

上詣綏履殿問

慈安皇太后安平安室問

慈禧皇太后安至丙申皆如之○諭內閣戶部

等部奏倉儲重地請嚴飭稽查以專責成一

摺戶部內倉廩座及工部木倉庫房坐落地

面各該弁兵等均責有專司理宜嚴密防範

乃近年以來該二倉屢有偷竊之案若漫無

責成難保不日久懈生仍有前項情弊著前

鋒統領護軍統領步軍統領各衙門於該二

倉坐落地面。再行嚴飭直班及地面弁兵。認真稽查。加意看守。東西長安門。毋許閒雜人等任意出入。自此次申諭之後。僅該二倉再有被竊等項情事。卽著該部據實奏參。將直班官兵等交刑部審辦。以昭慎重而專責成。○又諭戶部奏查辦黑地。請嚴定章程。申明賞罰一摺。黑地一項。直隸奉天所在多有。前於咸豐十一年間。經寶璽等會同直隸總督順天府府尹。查出昌平州地四百四十餘頃。試辦升科。並奏准飭令直隸總督盛京將軍。順天奉天各府尹一體辦理。乃兩載以來。各州縣具報寥寥。皆由該地方官畏難苟安。於旗園迷失地畝。及山隅河閃。不能詳稽檔案。親歷查勘。以致愚民觀望隱匿。奸吏從中訛索。扶同欺隱。弊竇滋多。甚至無賴棍徒。在京外各處。假充委員。查辦黑地。恐嚇得贓。地方官不加詳察。任其肆行無忌。擾累鄉愚。而於應查之地。轉多置之不辦。亟應嚴定章程。以

除積弊。嗣後直隸盛京順天奉天等處。遇有查辦黑地之委員。著該將軍總督府尹等。飭令地方官詳細盤查。如無戶部先期咨會。及隨身劄付。卽屬棍徒詐冒。立卽按名嚴拏押解。奏明究辦。至所請各該州縣查出隱地二十項以上者。照例給予優敘。其勘辦升科地畝最多者。隨時奏請恩施。如有因循不辦。任令地戶私墾。吏役詐贓。別經發覺者。卽以溺職例參處。均著照議行。經此次明定章程之

後。各該將軍總督府尹等。務飭所屬實力遵行。以期興利除弊。毋得視為具文。○又諭前因福建省捐務積弊案內。已革藩庫大使屠莖。應追部飯火耗等銀八千八百餘兩。當經降旨將該革員提省訊追。茲據戶部奏稱據福建巡撫咨覆。該革員告病。已回宛平原籍。應由部就近提解訊追。復據順天府查覆。宛平縣並無其人。又據吏部覆稱該革員報捐時。並未聲明祖籍。請旨飭拏等語。已革福建

藩庫大使屠堃。應追款項。至八千八百餘兩之多。且係奉旨追辦之案。若竟以查無下落。任令脫逃。何以儆官邪而重款項。屠堃著步軍統領衙門。順天府五城御史。並直隸總督。福建巡撫。查明該革員現匿何處。一體嚴拏。務獲歸案追辦。○諭議政王軍機大臣等。左宗棠奏督師入閩。行抵浦城。現籌勦辦情形。一摺。閩省漳州各城。均為賊踞。署提督林文察倉卒進剿。致後路被賊抄襲。兵勇敗潰。林文察中槍陣亡。賊勢披猖。泉廈危急。高連陞一軍。已抵泉州。著左宗棠徐宗幹飛檄該署提督。迅率所部。急趨同安。務期到在賊前。扼要防剿。以保泉廈門戶。並飭調赴長泰之黃少春等軍。合力兜剿。穩慎進攻。毋令賊蹤再行滋蔓。劉典前隊已抵甯化。王德榜一軍。由江西取道入閩。計已馳抵汀界。著卽照左宗棠所籌。飛飭劉典所部。先將汀州連城甯洋一帶踞匪肅清。進攻龍巖之北。王德榜所部。

由汀州南趨上杭。進攻龍巖之西。總期聯絡遏截。妥籌分布。將龍巖踞逆。悉數聚殲。以免復行旁竄。左宗棠因中路空虛。先撥隨行四營。馳赴延平。卽率親兵續進。著俟抵延平後。居中策應。分籌遏剿。卽將辦理情形。迅速奏聞。漳龍一帶。賊勢鴟張。各軍分路環攻。能將該踞逆在閩境就地聚殲。自屬上策。惟恐該匪被勦窮蹙。鋌而走險。則回竄江西。旁窺粵境。或潛蹤入海。以致滋蔓難圖。均在意計之中。毛鴻賓郭嵩燾所派粵軍。前已越境收復武平等城。著仍懍遵前旨。迅飭方耀等軍。跟蹤追剿。會合江西閩浙之軍。進規漳郡。殄除竄匪。其閩粵濱海地方。並著左宗棠徐宗幹毛鴻賓郭嵩燾撥兵嚴防。儻任令匪蹤入海。剽掠必惟該督等是問。江西援閩之婁雲慶等軍。現在行抵何處。著沈葆楨迅催前進。並由左宗棠徐宗幹探明催提。以厚兵力。沈葆楨務當嚴飭江防諸軍。嚴扼要隘。以杜匪蹤。

回竄毋稍疏忽。本日已降旨將劉典開缺。仍以二品頂帶幫辦福建軍務。閩浙勦匪事宜。卽著左宗棠隨時與劉典籌商辦理。迅將逆氛掃蕩。疆圉肅清。以副委任。將此由六百里各諭令知之。○准丁憂署浙江按察使劉典開缺。仍以二品頂帶幫辦閩浙總督左宗棠軍務。以浙江鹽運使楊昌濬為按察使。○以浙江温州台州巡洋出力。賞都司湯昭龍等花翎。餘加銜升敘有差。○豁免浙江瑞安縣

被擾地方節年民欠額賦。○己巳諭內閣左宗棠奏請將北新關暫緩開設。按月由釐捐酌撥。以抵關稅一摺。據稱浙省疊遭兵燹。彫敝不堪。市肆蕭條。小民未能復業。卽設法招徠。瘡痍猶難遽復。若再竭澤而漁。不但百貨翔貴。商賈糊口無貲。卽此孑遺之民生計益形窮蹙。北新關試辦已逾三月。徵數寥寥。實因關書巡役等。向來視為利藪。一經設關。故態復萌。藉端刁索。以致商民視為畏途。裹足

不前。請將關稅暫停。以順輿情等語。所奏切中地方利弊。浙省蹂躪已深。正宜休養生息。以培元氣。若任令關書巡役人等擅作威福。肆意誅求。於國課毫無裨益。而閭閻苦累甚深。殊非體恤商賈之道。著恆延將北新關暫緩開設。關口各稅一概暫停抽收。毋得任聽關書等恣憑別生枝節。並著照左宗棠所擬於浙江各屬釐捐項下。按月劃撥錢一萬串。解交織造。為採辦一切工料之需。另撥銀一

千兩。津貼織造司庫庫使等辦公。及該衙門書吏匠役紙張飯食各項用費。俟軍需一律告竣。釐捐停止。再行循照舊章辦理。○又諭左宗棠奏敬舉人才。請旨錄用一摺。浙江杭州府學生員丁丙在杭州賑撫局辦理各務。巨細咸宜。著以知縣發往江蘇補用。內閣中書陳政鑰在甯波襄理局務。能持大體。江蘇候補知縣陳其元。辦理甯波局務。勤幹有為。以上二員。均著以直隸州知州發往江蘇補

用國子監學正銜洪自含。甘貧守正。勸捐善舉。皆有實濟。著賞加光祿寺署正銜。以示鼓勵。○又諭左宗棠奏甄別道府知縣各員。請分別降革勒休一摺。浙江金衢嚴道恆山袁庸充位。難期振作。著勒令休致。紹興府知府懷清才具中平。不勝繁劇。著以同知候選。候補知縣蔣正坤試用知縣籍文學。以上二員才識迂淺。難膺民社。均著以教諭銓選。補用知縣江森棠葉九齡蔣爾鈞先用知縣林寵銑候補知縣徐兆森李曾祐試用知縣徐士珪周瑩張清荼以上九員才具平庸。志趣亦無所取。均著以縣丞降補。先用知縣吳榮曙好甚多。不堪造就。候補知縣劉煊性情巧滑。聲名尤壞。以上二員均著革職。永不敘用。間用知縣馮志勤試用知縣耿舉賢性情鄙陋。聲名平常。以上二員均著即行革職。湯溪縣知縣慶齡當浙省兩次淪陷時。延不赴浙。至本年秋間始行到省。實屬規避取巧。著一併

革職。○諭議政王軍機大臣等駱秉章奏黔省苗號各匪竄擾川邊。截勦獲勝。請飭貴州派兵夾擊一摺。貴州苗號各匪突由赤水竄至敘永屬之丫叉場。知府劉嶽陽等分隊直搗。賊殊死戰。千總許長發等死之。賊亦潰敗。向馬疏灘而奔。該逆復糾約苗犢各匪分竄黑泥哨。牽綴我師。藩司劉嶽昭由合江抽撥兩營前往助勦。斬擒悍賊數百名。餘悉敗遁。其桐梓綏陽等處匪勢亦尚披猖。黔省與川省之敘永合江江津綦江南川以及彭涪酉秀在在毗連。羣賊環繞窺伺。雖屢經川軍擊敗。而後路無兜勦之師。每由黔疆退遁。若不亟籌截勦。何以戢匪股而靖地方。著勞崇光張亮基撥兵數千。由遵義掃蕩而前。與川軍兩面夾擊。駱秉章仍嚴飭劉嶽昭等不分畛域。出境會勦。速將盜藪鏟除。又安邊境。將此由六百里各諭令知之。○又諭玉通奏會勦番賊。追獲營馬。並塔爾寺僧團與回人構釁。



各摺片。青海駐牧之汪什代克族番。夥同曲加洋冲等野番。搶刦甘州營馬多匹。經玉通調派弁勇。會同扎薩克王公。探蹤馳勦。獲勝將馬匹全行追回。辦理尚屬認真。青海駐牧各族野番。族衆人繁。良莠不等。玉通惟當設法羈縻。嚴加防範。毋任滋生事端。塔爾寺阿家呼圖克圖。與回眾構釁。未肯散團。玉通現派官紳馳往該寺。並小南川各莊。善為排解。即著飭令該官紳妥慎辦理。回情狡譎異常。

甘言就撫。殊屬未可深恃。仍著玉通妥籌防禦。不得因該回暫時相安。遂將團練全行遣撤。致墮狡謀。另片奏請飭甘肅撥解蒙古王公俸銀等語。甘省軍情喫緊。需餉浩繁。恐無閒款可數分撥。本日已諭令沈桂芬由山西省迅籌撥解矣。將此由四百里諭令知之。○又諭。玉通奏青海各旗蒙古郡王等歲支俸銀。自同治元年起。至本年止。共應支銀二萬七千三百兩。迄今未據甘肅藩司動撥。疊次

咨催。均以軍餉浩繁。庫款告匱。未能設法。該蒙古生計維艱。不免因困苦而生觖望。請飭速催撥解等語。蒙古王公應支正俸。欠發至數年之久。兼之西甯回匪滋事。該蒙古等被搶窮蹙。養贍無貲。尤應亟籌體恤。以免別滋事端。甘肅軍務未竣。庫儲已罄。著沈桂芬即將前項銀二萬七千餘兩。迅速籌款。准於欠解甘餉中劃抵。刻即派委妥員解交玉通。以資散放。而恤外藩。毋得稍分畛域。將此由四

百里諭令知之。○漕運總督吳棠奏請無庸兼管江北事宜。以符舊制。得旨。即著將清淮善後事件。次第舉辦。曾國藩現須籌辦鄂豫等省軍務。及金陵等處善後事宜。其江北地方公事。一時尚難兼顧。仍著吳棠管理。俟江蘇善後完竣。再行循照舊章辦理。又奏遵查劉際昌呈控唐守中一案。湖田各自為團。不盡歸唐守中鈐制。所控主使焚掠等情。毫無實據。湖田總局。係官設辦公之所。並非唐守



中所設唐守中之子唐錫齡捐納縣丞。驗看到省。係屬照章辦理。魚臺境內。並無匪徒滋擾。現在清丈湖田。編查戶籍。並擬派員移紮。以資彈壓。批仍著會同李鴻章。閻敬銘。妥籌辦理。○以江西九江府捐輸軍餉。永廣學額三名。德化縣九名。○以江南水師克復江甯省城出力。賞提督羅進賢黃馬褂。彭楚漢雲騎尉世職。總兵官夏開鳳曹明友。副將張萬美。陳明勝。參將譚福勝。彭金樾。巴圖魯名號。遊擊劉得勝等花翎。把總李實忠等藍翎。餘加銜升敘有差。○以甘肅青海勦辦番賊出力。予扎薩克郡王烏爾津扎布等獎敘。把總蘇有成以守備用。○予四川敘永陣亡守備朱陞騰千總許長發。把總姚宗禮等祭葬世職加等。○庚午諭議政王軍機大臣等都興阿穆圖善奏連日移營獲勝。攻克清水堡賊墟。暨攻勦甯夏喫緊。請飭慶昫謹慎防守。各一摺。慶昫奏查明常陞挫敗情形。並近日賊

情各摺片。逆回盤踞清水堡老巢。意在死守。經都興阿抽撥兵勇滾營進紮。穆圖善揮兵迎擊。各軍士衝冒嚴寒。力殊死戰。將清水堡大小賊墟同時攻克。墟內敗竄之賊。均由甯夏狂奔。亟應乘此聲勢。悉數殲除。穆圖善各營已紮至金貴堡。陳天佑及杜嘎爾馬隊連紮王格莊。均距甯城已近。著都興阿等督飭各軍節節進取。將甯夏漢城迅速攻拔。以靖賊氛。惟逆回狡詐百出。都興阿務飭將士穩慎進取。不可墮其奸計。致為所乘。糧糈採辦維艱。已由都興阿飭提平羅縣生息銀三千兩。購麥接濟。又派員赴阿拉善旗磴口地方採買。即著照所擬妥速辦理。以濟兵食。擡槍火礮等件。最為攻城利器。著都興阿酌量。如果需用。即量為調取。毋致缺乏。都興阿等攻勦甯夏喫緊。兵力不敷。圍攻誠恐賊匪被勦窮蹙。奔竄滿城。著慶昫督飭防兵穩固城守。使賊無隙可乘。萬不可掉以輕心。致有疏失。

甯夏之賊窺伺滿城圖阻援軍復有金姓為之主謀其計殊狡現在天寒凍結大兵已無阻滯著該將軍等一鼓作氣竟此全功賊中主謀之金姓究係何人並著密速查明嚴拏務獲毋任漏網清水堡之戰將士受傷者甚多著都興阿查明打仗出力者擇尤保奏杜嘎爾已調補甯夏副都統於該處操防一切事宜務須妥籌兼顧會同慶昫力圖整頓以副委任將此由六百里各諭令知之○禮部

以明年元旦禮節請得旨是照例行禮奉

慈安皇太后

慈禧皇太后懿旨停止筵宴其在外公主福晉命婦進內行禮之處並著停止○兩廣總督毛鴻賓等奏嘉應未失賊蹤亦未擾近州城得旨嘉應既未被賊蹤擾及係屬沈葆楨探聽之誤該督撫仍當慎固封守力保完善不得存是己非人之心稍涉大意○調京口副都統杜嘎爾為甯夏副都統○以甘肅納家

插勒匪失利革副都統常陞協領依銓額佐領慶霖職仍留營○以廣東肇慶勦賊大捷生擒首逆戴梓潰賞總兵官卓興一品封典餘升敘有差予陣亡隊目陳貴祭葬世職如把總例○辛未諭內閣兵部等部奏遵議前鋒統領熙拉布收受陋規處分一摺熙拉布派往商都查羣不知潔己奉公輒收受該處總管餽送銀兩馬匹本應照兵部等部所議革職治罪惟昨據熙拉布奏稱該員誤聽司

員稟詞將折給銀兩信為公用之需冒昧收受請將銀四百兩馬二匹交還察哈爾都統發交該牧羣兵丁等語所奏各情尚無掩飾迴護姑念其出於一時糊塗較有心婪索者情尚可原熙拉布著即行革職加恩免其治罪其呈繳銀兩馬匹即由該旗發交察哈爾都統轉行發還○以詹事府詹事行秀為內閣學士兼禮部侍郎銜○調江甯副都統魁玉為京口副都統以記名副都統富陞為江

甯副都統○予雲南各屬陣亡殉難軍功周  
翊等紳民婦女一百七十四名口分別旌卹  
如例○壬申諭內閣前因御史富稼面向議  
政王軍機大臣以伊子筆帖式延序隨同欽  
差明善赴順義縣捕拏土匪多名正法得有  
軍功加級等情繕遞呈詞情節支離當經降  
旨將延序革職交部嚴訊富稼解任候質復  
因富稼到軍機處面稱伊子畏罪潛逃難保  
非富稼有心藏匿並諭將富稼革職派議政

王軍機大臣會同刑部審訊仍飭步軍統領  
等衙門將延序拏獲歸案訊辦旋據延序赴  
部投首並經順天府等衙門將案內要證韓  
姓等先後拏獲送部茲據議政王等會同刑  
部遴派章京司員分別研訊按律定擬此案  
已革吏部筆帖式延序因王七即王富城告  
知順義縣有已故鑲黃旗人德銘地畝十四  
頃九十六畝年久無人取租起意冒稱伊係  
德銘本家商允王七等前往認領地畝共分

租錢延序未向富稼告知實情捏稱隨同明  
善赴順義縣查辦事件當於十月初三日約  
同王七等前赴該縣找向韓姓即韓起吳四  
即吳仲沅述悉前情因吳仲沅告以聽聞高  
得昌等因辦此地在慎刑司涉訟勸其不必  
辦理延序即未至該縣遞呈旋於初八日回  
京復向富稼捏稱跟隨明善行抵順義縣該  
處土匪聚眾欲行滋擾經明善委伊訪查屬  
實調兵拏獲土匪多名請旨正法並得有軍

功加級等情雖訊明未向外人傳說亦無另  
項招搖詐騙情事究屬荒誕已極惟訊止在  
家向伊父私相告語與詐傳詔旨自內傳出  
者尚屬有聞延序除擅離職役及冒認田宅  
各輕罪不議外著照所擬從重發往軍臺効  
力贖罪已革御史富稼於伊子延序捏詞出  
外滋事未能覺察輒以伊子得有軍功加級  
等詞赴軍機處請示迨將延序革職交部復  
稱業已潛逃雖訊非有心藏匿殊屬糊塗謬

妄。該革員以伊子支離荒謬之詞。尚不能辨別真偽。平日居官莅事。受人欺蒙。已可概見。富稼業經革職。仍著永不敘用。以為身列諫垣。闡革不職者戒。○又諭萬青藜。卞寶第。奏甄別知縣佐雜等官。請分別改補革職一摺。順天府東安縣知縣楊因培。人尚謹慎。惟才欠開展。人地不甚相宜。著留省遇有相當缺出。另行酌量補用。候補照磨施連。候補未入流楊獻璋。久不赴府當差。實屬不成事體。均

著卽行革職。以示懲儆。○又諭徐宗幹。奏閩省軍務繁興。請飭提鎮實缺各員赴任等語。福建水師提督吳全美。統帶江南撤勇回粵。陸路提督郭松林。現在江蘇軍營。汀州鎮總兵沈俊德。前在湖北軍營。業經官文飭令帶兵赴閩。著毛鴻賓。李鴻章。官文。分飭各該員等迅速赴任。其漳州鎮總兵李成謀。金門鎮總兵王東華。建甯鎮總兵張得勝。亦均在軍營帶兵。著各該督撫一體飭令卽速赴閩。以

專責成。毋再延緩。○諭議政王軍機大臣等。戶部奏豫撥來年京餉。開單呈覽一摺。歷屆京餉。向係年前豫撥。上年戶部以各省軍務稍平。尚須籌辦善後。將應撥本年京餉。照歷屆酌減十分之三。僅撥銀五百萬兩。而各該省關報解仍復拖延。京餉關緊要需。該部放款纍纍。實已無可再減。現在戶部奏請豫撥同治四年京餉。擬於地丁鹽課關稅等項銀兩。仍照本年酌減數目。撥銀五百萬兩。限於

明年五月以前解到一半。十二月初間全數解清。均係斟酌各省緩急情形。撙節動撥。以期易於遵解。並非強以所難。各該省將軍通商大臣督撫鹽政監督及藩運各司等。具有天良。自當按照戶部指撥銀數清單。依限解齊。以濟要需。儻以為數視歷年較少之款。仍復任意截留。藉詞劃扣。卽著戶部按照奏定章程。指名參奏。定將該將軍等從重懲處。決不寬貸。至本年未解京餉。曾於九月間降旨

嚴催現屆年終放款較鉅。各該省關豈容再事宕延。著卽迅速解到。以供支放。毋得仍前玩泄。致干重咎。懍之慎之。原摺單均著鈔給閱看。將此由五百里諭知福州將軍。辦理三口通商大臣。直隸山東山西河南湖北湖南兩江江蘇福建廣東各督撫。並傳諭山海粵海各關監督知之。○又諭戶部奏。新疆南北兩路經費。請仍照上年專案另撥。擬撥山西乙丑年應徵地丁銀二十萬兩。山東乙丑年應徵地丁銀十萬兩。河南乙丑年應徵地丁銀十萬兩等語。新疆軍務緊急。甘省防勦未竣。所有同治四年分新疆南北兩路經費。自應仍照上年專案另撥。俾免延誤。著沈桂芬。閻敬銘。張之萬。仍照本年奏案。均由山西解至綏遠城。由綏遠城從北路草地解至烏里雅蘇台。運交科布多。知照伊犁將軍。塔爾巴哈台大臣。烏魯木齊都統。覈定數目。由南北路各城分提應用。如有飾詞擅請改撥。及託

故截留。致誤要需。卽由該部查奏。從嚴叅處。將此由五百里各諭令知之。○又諭張之萬奏。髮捻各逆。由鎮平分竄。現派隊追擊。並親赴舞陽布置。請飭催陳國瑞。助勦各摺片。前據僧格林沁奏賊竄鄧州。官軍小挫。當經諭令該親王等整隊追擊。茲據張之萬奏逆賊勢又猖獗。疊撲鄧州城垣。經馬步各軍擊退。復向鎮平一帶竄擾。刻下鎮平西南北三面均有賊蹤。西北為馬山口入山之路。西南則由內鄉趨浙川。頭頭是道。張之萬已行抵舞陽。催王文行勇隊前進。僧格林沁現在移紮南陽。著卽整頓各軍會合痛勦。務須就地殄除。毋任再行肆竄。英翰及蔣凝學二軍。能否酌調赴營。著該親王察度妥調。陳國瑞打仗向稱勇往。據張之萬奏。該總兵因病請假。在光州調理。現在諒已就痊。著僧格林沁飛調該總兵迅赴前敵。以資得力。張之萬務當嚴飭湯聘珍等各營。星夜繞由南召出賊之前。

扼賊北竄河陝之路並飛檄河陝汝地方整飭民團共資保衛。王文行勇隊催令卽日前進。會合僧格林沁所派之軍合力痛擊。毋任觀望。賊勢駸駸西趨。若一入山險。又成不了之局。劉蓉前奏興商止有五營。而他處兵勇萬難抽動。請責成湖北派兵前截後追。該撫責任封圻。自當於無可抽撥之中設法籌備。方為不負委任。豈能盡諉鄰封。袖手坐視。著卽嚴飭地方官實力辦理團練。以補官軍之

不足。仍於附近營汛抽調兵勇。擇要設防。儻任令匪蹤闖入。定惟該撫是問。均光。鄖陽與鄧州鎮平接壤。逼近賊氛。著官文嚴飭鄖西一帶防兵認真截剿。毋得縱令西竄。致滋延蔓。現當河水凍結之時。賊蹤若至陝汝。卽易履冰過河。沈桂芬務須嚴飭地方文武各員實力巡防。備豫不虞。不得以寇氛尚遠稍涉大意。將此由六百里各諭令知之。○又諭徐宗幹奏漳州踞賊撲營官兵失利並高連陞

等軍陸續前進。賊匪各懷猜忌。各摺片。漳州踞賊出城。由好景山等處包抄。萬松關瑞香亭官軍營盤。林文察中傷陣歿。曾玉明現飭該署提督部將許忠標等管帶兵勇一千三百餘名扼守江東橋要隘。曾玉明仍在三汊河駐守。現在高連陞已由同安前赴漳境。黃少春亦由泉州進紮漳城外之萬松關等處。著左宗棠徐宗幹嚴檄派出各軍協力掃蕩。迅殄逆氛。廓清疆圉。福建陸路提督卽著黃

少春暫行署理。以資統率。賊黨各懷猜忌。城內連日互鬪。自相殘殺。當此機有可乘。如能迅速進兵。尤為事半功倍。卽著該督撫相機辦理。汀州龍巖各路康國器一軍駐紮離龍巖州城四十里之雁石地方。張恆祥移紮長汀河田。關鎮國扼守上杭連城。劉典前隊已入汀境。昨據左宗棠奏擬令劉典攻龍巖之北。王德榜攻龍巖之西。並以中路空虛。先撥隨行四營馳赴延平。此時劉典等計皆次第

到防著左宗棠徐宗幹督飭閩浙官軍妥籌  
勦辦將失陷各城力圖規復務將此股逆匪  
就地殄除毋令再行回竄江西廣東或潛蹤  
入海復肆蔓延又成不了之局將此由六百  
里各諭令知之○調右翼前鋒統領載容為  
左翼前鋒統領以鑲白旗護軍統領基溥為  
右翼前鋒統領鑲白旗滿洲副都統德懋為  
鑲白旗護軍統領○調正白旗漢軍副都統  
文謙為正白旗滿洲副都統以署鑲黃旗蒙  
古副都統何永安為正白旗漢軍副都統散  
秩大臣果勒敏署鑲黃旗蒙古副都統正紅  
旗漢軍副都統增慶署正白旗蒙古副都統  
○以工部左侍郎恆祺兼京營右翼總兵○  
予福建漳州陣亡署提督林文察祭葬世職  
加等○諭剛愎遊擊李世進同知平懋儒等祭  
葬世職○癸酉

孝惠章皇后忌辰遣官祭

孝東陵○諭內閣閻敬銘奏甄別軍功保舉候

補州縣人員以清吏治一摺山東候補知州  
章棣人尚安詳文理未能深暢該員係由候  
補布政司經歷保升著仍以布政司經歷原  
官留於山東歸候補班儘先改補同知銜候  
補知縣盧汶清人本平庸鄒蔭廣才未老練  
候補知縣龔逢詔才浮識淺以上三員年力  
尚皆富強均著以府經歷縣丞留於山東歸  
候補班降補○又諭閻敬銘奏武弁毆斃平  
民審明定擬一摺山東已革儘先千總李恩  
洪奉派隨同候補守備李鵬霄管帶練勇赴  
恩縣緝拏馬賊因疑良為倡擅入民人劉人  
和家內閒逛致被劉人和捆毆咎由自取李  
恩洪復逞私忿喝令勇丁將劉人和帶回處  
治毆打致斃實屬兇暴眾著皆不畏法李恩  
洪著照該撫所請即行正法以昭炯戒升用  
都司候補守備李鵬霄奉派帶勇拏賊漫無  
約束致弁勇毆斃人命事後又未能將滋事  
勇丁悉數交出實屬管帶不力著交部嚴加



議處○諭議政王軍機大臣等。明誼奏差旋到城接印日期。詳籌善後事宜。麟興等奏查明委員並無騷擾違法。並麟興奏交卸將軍印務。現時不克建立界牌鄂博各一摺。明誼所稱豫行嚴飭明年立界大臣。先行查勘明晰。以便屆時建立界牌鄂博。不得稍有含混。致令侵占愈多一節。最關緊要。至阿勒坦淖爾烏梁海蒙古部落中。如有真心內附者。亟須擇地令該處人丁等。移於卡內住牧。不得遲至立界時。再行遷移。致令俄人藉口。阿勒台烏梁海游牧內潛居之哈薩克人眾。應往卡外驅逐。已與廣鳳商辦等語。卽照明誼等所籌妥為辦理。該夷貪得無厭。明年立界後。尤須各城將軍大臣相度地勢。體察情形。為思患豫防之計。以杜俄人窺伺。別生枝節。所有各城善後未盡事宜。著明緒明誼麟興車林敦多布錫霖廣鳳奎昌豫先督飭在事員弁。隨地隨時。密為布置。毋得稍有疏虞。明誼

與俄夷所換條約內載換約後限二百四十日。建立界牌俄博。計其限期。應在明年五月間。此時如赴卡外辦理。亦難剋期。歲事卽著麟興於明春承領關防前往。妥為籌辦。麟興車林敦多布所稱。據咨查明委員遇春等。並無騷擾驛站及違法情事。前於保恆惠慶麟興廣鳳奎昌摺內。先後批示。勒令遇春等折回古城聽候差委。並將遇春革職。此次所奏殊形嘖瀆。據稱遇春自揣膽略小。欠果斷。未嫻行陣。又不能熟悉地理。恐誤軍務大事。與麟興前次奏保遇春管帶蒙兵緩急可恃之語。先後如出兩人。實屬自相矛盾。且遇春聞烏魯木齊滿城失陷。不肯在古城帶兵。其為畏葸無能。已可概見。乃麟興並不秉公參劾。代為百計掩飾。以遂其庇護屬員之私。究竟是何居心。麟興所稱恐與公事無益。自請開缺。語涉負氣。尤屬糊塗膽大。回疆軍務孔亟。正臣子竭力圖報之時。麟興借端陳請開缺。



隱售其規避之計。該大臣清夜捫心。能無負疚耶。麟興所請開缺之處。著不准行。將此由五百里各諭令知之。○予山東膠州陣亡外委高逢志等祭葬世職。○予山東海陽殉難紳民趙士珩等暨婦女三十名口分別旌卹如例。○甲戌諭內閣。前因升任御史鍾佩賢奏。叅河南辦團委員梁璨有虛冒勇糧情事。經嚴樹森查明。並無確據。奉

旨。將該員交地方官嚴加管束。如查有實在劣

蹟。卽行叅辦。茲據張之萬奏。該員回籍數年。安分無過。離營日久。亦無經手未完事件。請飭回京供職等語。郎中梁璨著准其回京。留於工部學習行走。仍著該部堂官隨時察看。○又諭張之萬奏。甄別候補州縣。分別叅劾一摺。河南候補知縣周之新。貪鄙營私。聲名狼藉。著卽行革職。候補知縣張福謙。任情妄舉。歷練未深。候補知縣楊郁榮。才識平庸。局量淺躁。均難膺民社之任。著降為府經歷。縣

丞歸部銓選。候補知縣韓叔埏。識見不宏。過於拘謹。著以府經歷縣丞留於河南補用。其單開之候補直隸州知州汪厚基等。均著照例分別補用。○護浙江巡撫蔣益澧奏。遵旨籌修海塘要工。得旨。著卽將近水缺口。妥速督率堵築。務須料實工堅。一律穩固。其應須籌款興辦石工之處。並著俟省城善後辦有端緒。卽親赴海甯一帶沿塘察看。會商李鴻章等酌量奏請開辦。又奏。浙江實缺人員。僅

有十分之一。現無應舉應劾之員。請將大計歸入下屆舉行。從之。○以大理寺少卿鮑源深為太常寺卿。翰林院侍讀學士童華為光祿寺卿。○予浙江湖州殉難候選從九品顏亮暨眷屬等分別旌卹建祠如例。○予河南光山等處陣亡殉難文生周寶豐等紳民婦女四百三十九名口分別旌卹如例。並予建祠。○停河南例貢。秉實。○乙亥。諭議政王軍機大臣等。張集馨奏彙報各路軍務。並會商

籌辦情形。及金縣失守。咨催陶茂林赴省。並曹克忠攻克鹽關各摺片。甘肅進兵形勢。須步步防其回竄。與陝省用兵可以一意向前者。迥不相侔。雷正綰督軍進逼固原。仍分兵回顧邠長汧隴等處。所辦甚合機宜。現在雷正綰一軍。已紮鷄哥嘴地方。距固原城不遠。即著督率各營。節節進紮。分派馬隊。繞出賊前。兩面夾擊。迅拔堅城。盡殲醜類。曹克忠一軍。力解秦州之圍。並攻克鹽關逆巢。則蓮花

城等處。無所用其回顧。正可騰出兵力。相機進剿。應如何分兵夾擊之處。著雷正綰酌度機宜。妥籌調撥。金縣失守。靖遠危急。東則清水。西則蘭州。南則河干。沙泥等鎮。一片逆氛。蘭州省垣。防守喫緊。著陶茂林即由會甯拔營赴省。屯紮省郊。不必入城。庶策應雕勦可期。靈便。其省城守禦事宜。恩麟務當嚴密圖維。不可稍涉大意。張集馨擬由隆德靜甯一帶赴省。此時計早行抵蘭垣。即著與恩麟妥

籌防剿。仍一面具奏。所請簡查省垣勇數。及調回弁回兵出城助剿之策。並著相機籌辦。務令妥協合宜。清水堡攻克後。穆圖善等軍。已逼甯夏。並著都興阿。穆圖善等。恪遵前旨。穩慎進取。攻克郡城。毋墮賊計。川省援甘之兵。前據駱秉章奏。顏朝斌尚未回籍。江忠濬未能出省。已飭鶴齡帶兵一千五百名。前赴都興阿軍營差遣等語。當經諭令迅催前進。本日復有寄諭駱秉章促令速行。此起兵勇

到甘後。或令先在階州會剿踞逆。或視何路緊要。就近策應。均著都興阿。穆圖善。雷正綰等。妥籌調遣。劉蓉前帶各營。多係川兵。現在蜀軍追賊入甘。陝省防兵無多。各營兵額。亦因缺餉未補。關中負天下形勢。必須重兵固守。況髮捻西趨。駸駸犯陝。尤應亟籌防禦。力顧疆圉。張集馨所奏。請於省城募兵三千名。仍復總兵舊制。並查明叛絕各產。認佃無人者。按兵授田。收租代餉之議。尚為因時制宜。

豫籌備禦起見。著劉蓉酌量情形。實力辦理。不得畏難苟安。致防守空虛。或啟賊匪窺伺之念。正在寄諭間。據雷正綰奏。曹克忠攻克鹽關情形一摺。鹽關既克。曹克忠兵力已無後顧之虞。卽著飭令迅率所部。由秦安北赴靜甯。分路夾擊固原。以期必克。秦州防務已由曹克忠留撥四營。足資鎮撫。其林之望統帶之兵。卽飭馳赴階州。會合川陝各軍。迅速合圍攻剿。毋令髮逆紛竄。致成蔓延。當此隆

冬風雪。北地苦寒。士卒冒險衝鋒。艱苦情形。實深廬繫。都興阿等務當激勵拊循。俾將士人人用命。肅清邊陲。同膺懋賞。將此由六百里諭知都興阿。穆圖善。雷正綰。劉蓉。並傳諭陶茂林。恩麟。張集馨。知之。○又諭崇實。駱秉章奏。西藏暨瞻對現在情形。無需大員前往查辦一摺。前因滿慶等奏。汪曲結布病故。已將羅布藏青。饒汪曲。賞給諾們罕名號。協理商上事務。並諭滿慶等。勅令勤慎辦公。務協

輿論。著滿慶恩慶。仍遵前旨。飭令羅布藏青。饒汪曲。凡事秉公辦理。以期僧俗相安。俾藏地日臻靜謐。景紋係特簡駐藏大臣。責無旁貸。著卽遵照前旨。趕緊馳往西藏赴任。將應辦事宜妥協辦理。以重職守。道員史致康赴打箭鑪安設臺站。疏通大路。崇實等派令隨同福濟赴藏。該道員藉詞推諉。而於各土司地方設站。有無梗阻。又不稟覆。辦理殊未妥協。史致康著暫行革職。著崇實。駱秉章。責令

速將瞻對之案。辦理完結。以贖前愆。將此由五百里各諭令知之。○撤辦理西藏事務。福濟副都統銜。以四品頂帶回旗。○以記名總兵官劉明燈。為福建福甯鎮總兵官。○以甘肅攻克鹽關賊巢。賞總兵官曹克忠。白玉翎管一支。白玉搬指一箇。火鐮一件。大荷包一對。小荷包兩箇。參將李奉清。周潮旺。巴圖魯名號。按察使林之望等。花翎。餘升敘有差。子陣亡千總王尊華。祭葬。世職加等。○以胤法

營私革甘肅知縣申清鑫職永不敘用。縣丞李國桂吏目吳瑩革職逮問。○科爾沁親王巴寶多爾濟等四人。翁牛特郡王布爾那巴達拉敦漢郡王布彥德勒格喀爾喀克齊等二人。巴林頭等台吉阿拉瑪斯巴咱爾喀爾喀貝勒布彥巴達爾琥等二人。扎魯特鎮國公達瓦甯保於養心門內瞻覲。○丙子諭內閣前因阜保奏遵查景綸等叅款未能徹底根究。當諭令該侍郎再行詳查辦理。茲據阜

保奏查辦事件未能詳細。自請議處。並景綸麟瑞奏續行查在庫吏那移款項。據實檢舉各一摺。阜保於特旨交查之案。宜何如審慎周詳。以期水落石出。乃於所查各款。第求迅速了事。並不悉心研究。卽如景綸等本日所奏。續行查出筆帖式巴克喜那移庫款。已收未交銀二萬六千三十五兩零。票銀五千二百五十七兩。錢九萬四千四百餘吊之多。該侍郎於上次奏結時。亦並未詳晰查出。實屬

辦理草率。阜保著交部議處。近來欽派大臣於交查案件。往往存避重就輕之心。將就完結。不肯認真究辦。積習相沿。牢不可破。何以嚴旌別而飭紀綱。嗣後遇有交查事件。派出之員。務當破除情面。秉公確查。毋得稍涉含糊。致負朝廷委任。尋吏部議阜保應照含糊叅奏私罪例。降一級留任。從之。○又諭巡視中城御史瑞亨等奏革員聞拏先逃。現將家屬訪獲。請飭部究辦一摺。前因己革福建藩

庫大使屠莖應追官項為數甚鉅。查無下落。當飭京外各衙門一體嚴拏。茲據該御史等奏稱。遵飭司坊官訪得該革員在京師前孫公園居住。帶役往拏。該革員已聞風先遁。當將其母屠章氏其妻屠陳氏等陸續獲案。旋據該革員之父屠克昌投案。呈請代子繳銀等語。此案屠莖短繳款項。疊經嚴旨追辦。該革員膽敢潛匿京師。茲復聞拏先遁。實屬不法。且難保非該家屬等有意藏匿。屠克昌屠

章氏屠陳氏著一併交刑部嚴訊追辦。勒令將屠莖交出。應行質訊之陳義元等。均著聽候傳質。所有該革員寓所房屋貲財。卽著該城御史等查封備抵。○諭議政王軍機大臣等。景綸等奏續行查出庫吏那移款項。已收未交。現在查封變抵。及巴克喜中途病斃各摺片。阜保奏查辦事件。未能詳細。自請議處一摺。此項銀錢各項。何以阜保在吉林時。竟未查出實在數目。其為草率含混。急圖了事。

已可概見。本日已明降諭旨。將阜保交部議處。著該侍郎卽行前赴吉林署任。按照摺內數目確查。並將巴克喜所開店當等鋪及家產一併變價備抵。以重庫款。案內未盡確實各情。著懍遵前次諭旨。將未盡各事宜。逐件清釐。不得再有因循含混。致干重咎。常明。明祿。巴克喜。解赴奉天聽審。巴克喜行抵蒐登站。因病身死。巴克喜係虧那庫款緊要人犯。阜保既奉命查辦。本不應提至奉天。現在該

革員中途病斃。是否實係因病。抑或另有別情。著阜保親自查驗明確。據實具奏。景綸另奏吉林辦理海防。借墊款項。以開荒地捐一款。為歸補經費之用。據經手之撤任協領明祿。彙具用款稟報等語。著阜保認真查覈。毋令浮冒。景綸摺一件。片二件。均著發給阜保閱看。前已有旨。將景綸交部嚴加議處。麟瑞交部議處。此次景綸等自請治罪之處。著阜保將全案訊明具奏時。聲明請旨。將此諭令

知之。○又諭張之萬奏賊由南召北趨魯山。窺伺河汝。現在會籌進剿一摺。豫省髮捻各逆。由鎮平紛竄。擾及裕州之趙河等處。該逆因馬山口有兵扼守。分股來撲。疊經防軍擊卻。未得逞志。遂相率北趨。由南陽之石橋。疾趨南召。直薄魯山縣城。全股在近城一帶游弋。窺伺河汝。僧格林沁。張之萬先後督軍馳紮葉縣。現將臨勝四營。及新募飛虎一營。撥歸張曜宋慶管帶。剋日進剿。卽著飭令該總

兵等。整飭諸軍。取道前進。並飛檄王文行勇隊。跟蹤躡剿。魯山西北皆山。直接河汝。務須嚴飭張曜等軍。繞出賊前。合力兜擊。毋令賊蹤竄入山險。致滋蔓延。僧格林沁所部馬隊。日夜奔馳。疲乏已極。著俟暫行休息。兵力稍紓。卽由該親王統帶前赴邾汝。相機籌度。會合張曜等軍。穩慎進攻。其扼紮鎮平之湯聘珍。崔廷桂等數營。現已落在賊後。應由何路調赴前敵截剿。並豫省本境有可添調之兵。

應行酌量調撥。並著僧格林沁。張之萬。妥籌速辦。曾國藩前派分赴楚豫之劉連捷。劉銘傳等軍。曾否到防。楚省現無賊蹤。著曾國藩。李鴻章。迅檄劉連捷等所部。星速馳赴豫境。毋許再有稽延。官文所部成大。吉。李。成。謀。諸軍。自應遵旨飛速撥赴豫省助剿。卽著僧格林沁。檄調前進。分投堵剿。陳國瑞因病請假。諒已就痊。卽著僧格林沁調赴前敵。並飛檄皖省之英翰。郭寶昌。蔣凝學各軍。迅赴南召。

魯山一帶。前截後追。以杜紛竄。喬松年卽催令英翰等速行入豫。毋稍延緩。以上各軍。均歸僧格林沁節制調遣。卽著該大臣隨時檄調。如將士有畛域之見。及赴調遲延者。均著嚴參。該處山路居多。步隊尤為得力。該大臣務須多為之備。加意慎重。以防意外之失。該逆有入山過冬。再竄陝境之說。現屆冬令。黃河三門。冰結成橋。匪蹤易於渡河。秦晉毗境防務。均形喫重。著沈桂芬。懷遵前旨。嚴飭河

防文武實力堵禦。應否添兵協守。以備不虞。並應熟籌妥辦。萬勿以寇氛尚遠。稍涉疏虞。陝省毗連河汝等處要隘。並著劉蓉派兵嚴防。仍遵前旨。速飭地方官整飭民團。妥籌守禦。陝省防兵。僅有興商數營。較形單薄。如賊勢西趨陝疆。並著官文酌派勁兵。越境兜擊。毋得稍分畛域。豫省扼守馬山口兵隊。現係何人統帶。仍著張之萬飭令擇要扼紮。以杜匪黨回竄。爭據山險之路。昨據御史陳廷經

奏。綠營水師廢弛。請飭整頓營伍。製造火器一摺。所陳各節。是否可行。並著曾國藩李鴻章會同商酌。奏明辦理。陳廷經原摺。著鈔給曾國藩李鴻章閱看。將此由六百里各諭令知之。○護浙江巡撫蔣益澧奏。現籌辦理浙省善後事宜。得旨。惟當實心實力。與馬新貽楊昌濬審度時勢。次第妥籌辦理。總期弊無不除。利無不興。不可稍有畏難之心。又奏。留浙兵勇。不可不豫為布置。批。所奏留浙兵勇

布置情形。均尚周妥。金衢溫處緊接閩疆。宜飭管帶各員隨時梭巡。嚴防閩賊竄越。浙西受害過深。一應撫綏事宜。尤須會商馬新貽妥籌辦理。○以右春坊右庶子紹祺充日講起居注官。○以鑲黃旗蒙古都統明慶署正黃旗蒙古都統。○補行同治元年山東省大計。卓異官七員。浮躁官一員。不謹官二員。罷軟官一員。才力不及官一員。年老官一員。分別議敘處分如例。○蠲緩浙江山陰會稽蕭

山諸暨金華蘭谿東陽義烏永康武義浦江湯溪西安龍游開化建德淳安遂安壽昌桐廬分水麗水縉雲青田松陽雲和常山宣平二十八縣。暨衢州嚴州二衛。所被水被旱地方。新舊額賦有差。○丁丑。諭內閣。戶部奏。河南省應豁節年民欠錢糧。延未奏請豁免。請勒限飭催一摺。前於咸豐十一年及同治元年。疊降諭旨。將各省歷年積欠錢糧。並咸豐九年以前民欠倉糧。一律豁免。茲據戶部奏

稱。河南省應豁各案。至今尚未具奏。且查咸豐九年以前奏銷案內。節年應題之件。已有一百三十餘件之多。皆因該省應豁銀兩。未經奏報。不能與吏部會議。以致應題之案。愈積愈多等語。朝廷豁免民欠。原冀恩膏速沛。普及窮黎。乃該省奉旨數年之久。尚未辦理。卽調驗勾稽。有需時日。亦不應如此遲滯。更難保無不肖州縣重複徵收。胥吏從中積壓等弊。著張之萬飭令藩司。以此次接到部文



之日起限一箇月。迅將奏銷冊報咸豐九年以前節年民欠各項錢糧。覆加確覈。開單奏請豁免。如有已徵未解之項。勒令按限提清。卽於奏豁單內扣除。不得稍有含混。以昭實惠而清積牘。○又諭富明阿奏請將江甯京口陣亡殉難大員。及兵丁婦女等。分別建祠等語。咸豐三年。粵匪竄擾江甯省城。前任江甯將軍祥厚。副都統霍隆武。及八旗協佐各官。或力竭捐軀。或臨難自盡。同時陣亡殉難

者。文武各官計三百餘員。兵丁婦女不下三萬餘人。祥厚之子恩綸。恩齡。暨家丁巴彥。石套僕婦李氏。楊氏等六名口。亦同時殉難。又自是年逆匪東竄。後京口八旗官兵。或在城殉難。或隨勒陣亡。歷年以來。共計官兵三百九十九員名。盡節婦女四百八口。又前任江甯將軍蘇普通阿等。均以統兵大員。勦賊陣亡。積勞病故。現當江甯克復。追念死事諸臣。及該兵丁婦女等。忠義奮發。節烈懷然。自應

分別建祠。以隆廟祀。所有前任江甯將軍祥厚。副都統霍隆武。及江甯京口陣亡殉難之官兵婦女等。卽著於江甯京口兩處旗營中。分建昭忠節烈各專祠。其前任江甯將軍蘇普通阿和春。署江甯將軍京口副都統巴棟阿。京口副都統長安。綢閣海。舍及祥厚之子恩綸等六名口。均著一併附祀。以慰忠魂。至京口未經請卹之兵丁婦女七百餘名口。並著交部分別旌卹附祀。以彰忠節。○

大清穆宗繼天開運受中居正保大定功聖智誠孝信敏恭寬毅皇帝實錄卷之一百二十三



大清穆宗繼天開運受中居正保大定功聖智誠孝信敏恭寬毅皇帝實錄卷之一百二十四

監修穆宗實錄臣等謹將穆宗實錄卷之一百二十四  
理宗實錄卷之一百二十四  
正統實錄卷之一百二十四  
聖祖實錄卷之一百二十四  
加六載紀元之次

敘修

同治三年甲子十二月戊寅

孝和睿皇后忌辰遣官祭

昌西陵○諭內閣惇親王等奏年終承襲公爵開具宗譜請旨一摺據稱滿洲鑲黃旗一等果毅繼勇公那蘇巴圖病故時因無子嗣其公爵係伊弟巴雅爾綽克托承襲今巴雅爾綽克托因病出缺伊子一品廕生保連例應入選擬正次子保全前經過繼與那蘇巴圖為嗣現據那蘇巴圖之妻孀婦宗室氏呈稱如應出缺之子承襲公爵願將繼子保全歸

宗承襲請旨遵行等語保全既經繼與那蘇巴圖為嗣所請歸宗之處著不准行所有一等果毅繼勇公爵著以兵部候補主事保全擬正一品廕生保連擬陪由該旗帶領引見候旨承襲○諭議政王軍機大臣等常清明緒奏伊犁城圍緊急懇請迅速發兵一摺庫爾喀喇烏蘇被賊攻破後伊犁北關回匪數千登時起事攻撲城垣官兵甫經接仗全行敗退領隊大臣托克托奈失利陣亡所屬各城亦均淪陷金頂寺回眾數萬現已變亂當此賊氛四起伊犁城垣孤懸岌岌難保且存城之兵不過千餘而察哈爾厄魯特蒙古官兵又屢調周應尤有戰守兩難之勢明緒現因俄國貿易圍地為賊擾占行文西悉畢爾衙門暫借俄兵相助亦是急則治標之意尚屬可行第道路遙遠文報能否達到俄兵能否前來均未可定况借力外邦不可不慎近年蘇省勦賊亦參用英法各國兵力幸李鴻

章尚能委曲聯絡。卽如常勝一軍。雖係外國兵官教練。仍隸以中國兵勇。且由中國派員會同統帶。不以兵權委諸外國。是以所向有功。尚不至貽笑外國。左宗棠勦辦浙賊。於攻復甯紹等城。亦用此法。伊犁借助俄兵。若能藉生力軍。猛鷲之氣。以振我軍積餒之心。自可事半功倍。儻自強無策。惟鄰國之命是聽。無論未必有功。即使真能奏效。而主客勢殊。亦屬失計。明緒惟當以江浙辦法為準。慎始圖終。事事熟籌妥辦。若能保全伊犁。將附近各城克復。卽以厚貲犒勞。亦所不惜。惟在明緒等操縱得宜。方為妥善。都興阿穆圖善等。勦辦甘肅回匪。漸可肅清。本日已寄諭該將軍等。迅速進兵。殄滅甘回。以便騰出兵力。出關助剿。大兵未到。以先明緒當就現有兵力。聯絡俄兵力。圖埽蕩。既據常清奏稱。明緒抵伊犁後。事無巨細。悉合機宜。軍民藉為長城之固。諒必能激勵人心。固守待援。以副委任。

常清稱明緒宜錫以極品之榮等語。自係尚未接奉明緒簡任將軍之旨。明緒果能奮勉圖功。朝廷自當更加恩賚也。將此由六百里諭令知之。○又諭據明緒等奏庫爾喀喇烏蘇城池於十月間被回匪攻破。伊犁北關回匪數千。登時起事。攻撲城垣。接仗失利。其巴燕岱各城。紛紛變亂。道途梗塞。該處存兵無多。勢成坐困。請速派大員帶兵救援等語。新疆北路。自烏魯木齊失陷後。伊犁已成孤立之勢。現在賊匪逼近。該城勢極蔓延。情形更為危急。此時古城以東道路尚能疏通。內地精兵若能迅速出關進剿。尚可保全完善。徐圖攻取。儻再任其滋蔓。必更無從措手。前據都興阿穆圖善奏。攻克清水堡賊巢後。官軍已進逼甯夏。著卽乘此聲威。督率各軍奮力進剿。攻拔城池。將甯夏一帶地方廓清。能早一日蕆事。卽可早一日出關助剿。以紓朝廷西顧之憂。楊岳斌募勇一事。曾否辦理就緒。

此時西路軍情萬緊。尤應力顧大局。剋日選募成軍。統帶赴甘。俾都興阿穆圖善之兵。卽可早日騰出。鼓行而西。以維危局。駱秉章所派援甘兵一千五百名。由鶴齡統帶前往。著卽催令剋日趲行。迅赴都興阿軍營。聽候調遣。毋得遷延時日。致誤事機。將此由六百里各諭令知之。○安徽巡撫喬松年奏。現飭英翰一軍。移紮潁州防堵。得旨。遠防不如近勦。著該撫仍遵前旨。催令英翰等軍入豫。迅掃

賊氛。潁州地當衝要。仍著另撥勁兵扼守。毋稍疏虞。○復以兆琛為湖南按察使。命來京陛見。○予山東故江蘇按察使宮慕久入祀鄉賢祠。從巡撫閻敬銘請也。○旌表守正捐軀直隸新城縣民婦王張氏。○烏珠穆沁親王彭蘇克那木齊勒於養心門內瞻覲。己卯。

孝德顯皇后忌辰。遣官祭。

暫安寢殿。○諭議政王軍機大臣等。保恆惠慶

奏分兵勦匪失利。請調烏科官兵救援。一摺。迪化回匪。在阜康一帶滋擾。欲攻濟城。吐魯番竄匪。殺傷穆家地山口民勇。在奇台三箇泉地方盤踞。木壘河街市被賊焚燒。濟木薩兵勇接仗失利。蒙兵未曾接仗。先自潰散。各項兵勇。或接仗卽挫。或不戰先潰。兵勇緩急難恃。至此。致匪勢日益猖獗。殊堪痛恨。迪化陷後。賊踞適中之地。四出滋擾。前諭功訥布等駐紮濟木薩。待援兵一到。進復烏城。此次接仗失利。非但收復烏垣毫無把握。將來匪勢日漸東趨。何以禦之前。因烏科二城蒙兵不能得力。已諭令嗣後不必勉強奏調。現在賊氛愈急。關外除蒙古以外。更無可調之兵。著明誼麟興車林敦多布廣鳳奎昌等於烏科二城。挑選蒙古精壯官兵若干名。聽候調遣。此時餉項缺乏。如別無可籌之款。卽由解到古城八萬餉銀內。提出若干兩。以顧急需。下餘之餉。卽行派員解赴古城。俾資散放。聯

捷簡放伊犁參贊大臣。昨據劉長佑奏。該大臣已接到兵部勘合。並烏拉票。於十一月十七日起程。著卽星速前進。兼程出關。馳赴烏科兩城。將明誼等選出蒙古兵。統帶前往古城助剿。該大臣曾在直東帶兵有年。身經戰陣。務須妥籌調度。痛埽狂氛。聯捷出關。必經由察哈爾地方。一俟行抵該城。著阿克敦布廉至催令趕緊進發。不准片刻逗遛。文祺前奏。飭令郡王伯錫爾派纏頭回兵。會同巴里坤滿漢官兵。搜滅餘匪。現在文祺復有自帶纏頭回兵來古進剿之說。著卽統兵前進。相機剿辦。以振軍威。哈密防務。卽責成扎克當阿會同伯錫爾慎固封守。嚴密圖維。毋稍大意。昨據常清明緒奏。賊已逼近伊犁。逆氛愈熾。紛竄更屬堪虞。各援兵未到之先。保恆惠慶務當就現有兵力。妥為拊循。勤加激勵。分投防剿。以衛地方。將此由六百里各諭令知之。○庚辰諭內閣。朕叔祖惠親王綿愉秉性

端凝持躬謹慎。自幼仰承

皇曾祖仁宗睿皇帝恩眷。道光年間蒙

皇祖宣宗成皇帝疊加優異。晉封親王。我

皇考文宗顯皇帝誼篤親親。益隆敬禮。咸豐三

年

簡授奉命大將軍。督辦巡防事宜。凡遇內廷召

對。特免叩拜。紫禁城內賞坐四人轎。王厯事

三朝。始終罔懈。於管理旗營及一切差使。俱能

恪恭盡職。懋著勤勞。朕御極後。復蒙兩宮

皇太后以王輩分最尊

特命在弘德殿照料。俾資矜式。並停止一切應

派差使。以示優崇。本年三月間。染患痰證。步

履維艱。屢經溫諭給假調理。七月間。復因王

病體未痊。准開各項差使之缺。加恩無庸停

俸。仍在內廷及弘德殿行走。並諭令自行酌

量進內。不必拘定日期。方冀珍攝如恆。舊疴

漸愈。遽聞薨逝。震悼實深。昨已賞給陀羅經

被。派惇親王前往奠醊。著再派恭親王帶領

侍衛十員。代朕前往賜奠。加恩於例賞外。加賞銀五千兩。經理喪事。任內一切處分。悉予開復。所有飾終典禮。著各該衙門察例具奏。伊子奉恩鎮國公奕詳於百日孝滿後。卽著承襲郡王。該衙門不必帶領引見。尋議上賜祭葬。謚曰端。○又諭朕叔祖惠親王綿愉薨逝。本日業經降旨。派恭親王帶領侍衛代朕前往賜奠。茲奉

慈安皇太后

慈禧皇太后懿旨。以惠親王輩分最尊。歷受三朝恩眷。朕御極以來。王在弘德殿行走。朝夕照料。深慰

慈懷。迺因舊病淹纏。遽爾薨逝。我兩宮

皇太后披覽遺章。深為悲惋。

命朕於十七日親臨賜奠。用申

慈悃。以示優崇。○諭議政王軍機大臣等。前因都察院奏。江蘇士民殷自芳等呈請挑濬山鹽二縣境內市河十字等河。以收灌漑宣洩

之利。當諭令曾國藩吳棠李鴻章酌覈辦理。茲據該衙門奏稱。鹽城士民趙含生等。遣抱告周郁文呈訴。殷自芳等捏撰水利。山陽縣之市河十字等河。並不在鹽城境內。一經挑築。必至阻遏水道。鹽邑全受其害等情。趙含生等所控各節。與從前殷自芳等呈控情形。彼此各執一詞。均難憑信。其市河十字等河。究竟應否挑濬之處。著曾國藩吳棠李鴻章相度地宜。確切查明。酌覈辦理。原呈所稱。殷自芳等並不遵旨請查。遽行斂錢興工之處。是否確實。尤應徹底根究。並著該督撫等一併查明具奏。原呈一件。著鈔給閱看。圖併發。將此各諭。令知之。尋奏遵查市河十字等河。由山陽流入鹽城。達馬家蕩入海。下游淤阻。則有害民田。殷自芳等稟由府縣籌議挑濬。現在工程已竣。數十頃民田藉資灌漑。至酌捐經費。係另舉殷實董事經理。殷自芳等並無斂費情事。趙含生等不明縣志。控出懷疑。

應無庸議報聞。又諭吳棠奏東南軍務大定擬試辦河運等語。據稱江北各屬均以河運為便。惟停運有年。漕艘久廢。若設法雇用民船。慮難鈐束。並沿河一路緯隄。臨壩。浮送能否無虞。亦難逆料。現擬於清淮軍需捐款內動銀購米三萬石。解赴通倉。試行河運等情。具見該漕督心存大局。辦事認真。江北各屬距滬較遠。如與蘇浙江廣糧艘一律由上海轉運。由北而南。殊多周折。著照吳棠所請。即行採買米石。雇備民船。由河道運送通倉。所有轉運事宜。並江省應行經過河道。均著飭令該地方官妥速經理。一俟議定章程。即行具奏。並著鄭敦謹將糧艘經過河路之緯隄臨壩。有無應行修整挑濬。即飭沿途管河官弁一體迅籌備辦。用利運行。如能挽行無滯。來歲江北新漕。即由吳棠等仿照辦理。以復河運成規。該督等諒能實力興辦。不至徒託空言。稍涉畏難也。吳棠片著鈔給鄭敦謹。

閱看。將此各諭令知之。又諭官文奏髮捻竄豫。派軍馳赴鄧州助剿。及援甘楚軍起程日期。劉連捷令紮英霍六安各摺片。逆匪由鄧州至鎮平。相率此趨。現由南召奔魯山。窺伺河汝。疊經降旨。令官文派兵赴豫助剿。茲據官文奏稱。已令常星阿蘇倫保溫德勒克西姜玉順藍斯明等。隨同僧格林沁出境分追。現又添派富森保楊朝林梁洪勝等。內外夾擊。又派成大吉由老河口均光一路迎頭包襲。兼顧楚境。所籌均尚周妥。現在賊眾北趨。若不迎頭攔截。恐一入河汝。將為秦晉之患。著即催令常星阿等星馳前進。歸僧格林沁調遣。不得稍涉觀望。致干咎戾。楚省要隘。應辦防務。即責成江長貴李成謀等妥為經理。以防回竄。劉連捷一軍。自可無庸赴楚。惟該督飭令駐紮英霍六安潛太一帶。去賊太遠。以有用之兵。置之無用之地。殊為可惜。著僧格林沁遵照疊次諭旨。檄調赴豫。並催調

劉銘傳等軍星速入豫。派赴前敵。截剿以厚兵力。蔣凝學一軍。現紮商城。並著僧格林沁酌量調遣。此軍係派赴甘省之兵。著俟豫省賊勢稍平。仍令該道帶兵赴甘。據官文奏稱。該道每月需餉六萬兩。因楚省支款繁多。力有未逮。不得不藉舊欠接濟新餉。議定自同治四年正月起。每月由湖北補發欠餉銀二萬兩。其餘銀四萬兩。該道行抵陝西。即由陝西籌給。行抵甘肅。即由甘肅籌給等語。著劉

蓉恩麟於蔣凝學一軍到境時。照數接濟。劉蓉並於荊子關設立分局。藉收轉運。以利師行。將此由六百里諭知僧格林沁。官文。劉蓉。並傳諭恩麟知之。○護陝甘總督恩麟奏。甘省危急。請飭督臣楊岳斌星馳來甘。得旨。楊岳斌屢經有旨。催令赴任。該護督惟當盡心竭力。支持危局。以期有所補救。不可稍存諉卸之心。○以安徽霍山解散逆眾逆首陳德才自盡。賞總兵官李揚隆從一品封典。總兵

官袁秀林。參將劉維楨。巴圖魯名號。投誠賊目吳清泰。以都司用。並賞藍翎。餘加銜升敘有差。○以湖北省城辦理營務出力。賞道員義泰。鹽運使銜。○予浙江杭州殉難道員胡元博等暨各屬陣亡殉難紳民婦女一千七百七十九員名口。分別旌卹如例。○予浙江諸暨陣亡民人包立身暨妹美英。並合家男婦十七名口。旌卹加等。同時殉難紳民婦女一萬四千七十七名口。分別旌卹如例。○辛

巳。諭內閣。前因麒麟慶奏。王默特貝勒旗老頭會肆搶一案。請派大員馳赴該旗就近查辦。當經諭令額勒和布。前往會同審訊。茲據額勒和布等奏。審明定擬一摺。所有案內各罪名。著該衙門速議具奏。另片奏請將訛索嚇詐之佐領章京德瓦拉布。窄按例懲辦。並查辦該旗差項地畝。酌擬條款二十二條。開單呈覽等語。著該衙門一併妥議具奏。尋理藩院議。該侍郎等查辦土默特旗差項地畝。應

如所擬二十二條辦理從之○又諭給事中傅桂奏請查拏拆毀倉廩偷盜木料之賊犯交部審辦一摺京師朝陽門外太平倉存有木料等項該倉花戶杜九等膽敢夥同盜賣並將倉廩拆毀十餘座實屬目無法紀所有已革花戶杜九金大金二金四吳四吳五馮套兒祁七等著步軍統領衙門按名查拏務獲解交刑部審辦毋任逃脫並著戶部派員前往查驗明確據實覆奏以重倉儲至各倉為存儲糧米要地如何豫為籌畫修理完固之處著戶部妥籌辦理尋戶部奏派員往驗該倉圍牆有隙數處難保非匪徒剽竄倉廩木植存數據該倉監督呈稱花戶書役前因案發遺案卷無存無從查考應交刑部將杜九等犯嚴訊辦理至廩座多有坍塌擬仿成案拆情形較重之廩擇其木料輒瓦修情形較輕之廩所餘物料變價抵充經費從之○賞八旗兵丁半月錢糧○翁牛特鎮國公永

隴於養心門內瞻觀○壬午諭內閣前因王明等奏盛京紫禁城內緊要工程請派大員估修疊經降旨諭令王明等敬謹查估茲據王明等奏勘估盛京

太廟正殿等四處應修情形惟盛京工部向無估算宮殿大工人役查覈工部咨來修過估冊情形多有未符未敢比照估計仍請飭工部按例估算欽派承修等語即著工部按照現在應修各工情形敬謹按例覈實估算即

由該部奏請欽派大臣承修並著欽天監於同治四年選擇開工吉期以重要工其不露明處所如有應修工程俟承修大員到工再行查勘具奏○又諭吏部奏請將滿洲蒙古郎中升途量予變通一摺據稱滿洲蒙古郎中向無截取知府之例其有勞績出力者向准保舉京堂嗣經奏定章程滿漢人員無論何項勞績概不准保舉京堂近來各該衙門因勞績出力以知府京堂保舉之滿洲蒙古



郎中均經按照新章另覈請獎。請酌量變通。嗣後滿洲蒙古郎中勞績出力。除京堂停止保舉外。比照漢郎中之例。准其保舉知府歸部選用等語。所奏雖為鼓勵人材起見。惟思各衙門滿洲蒙古人員。或保送御史。或京察簡放道府。何至因不准截取知府。保舉京堂。遂無上進之路。設因尋常勞績。概准保舉知府。是雖避截取之名。而實開一幸進之途。且漢員截取尚須歷俸二年。而此項人員轉得隨時保舉。恐適啟屬員冀幸之心。不可不於變通之中。仍示以限制。嗣後滿洲蒙古郎中。如實有才具出眾。勞績較優。堪勝外任者。方准酌保知府歸部選用。如係尋常勞績。概不得率行奏保。仍著該部立定章程。以歸畫一。至所保人員。儻有前後易轍。或犯貪污惡劣。及一切私罪者。除本員治罪外。必將濫保之堂官從重懲處。決不寬貸。○諭議政王軍機大臣等。據沈葆楨奏。接准鮑超咨稱。擬帶所

部八千三百名。另調川兵四千。募川省步勇數千。酌添馬隊。統計新舊各營。月需餉十餘萬兩。請飭各省酌撥協餉等語。新疆各城變亂勢甚猖獗。非有內地大支勁兵出關。難資勦辦。鮑超勇略過人。聲威素著。必能立功邊域。迅埽逆氛。該提督以塞外用兵。必須厚集。擬帶萬餘人前往。方能制勝。自係實在情形。惟籌兵必先籌餉。庶幾士飽馬騰。所向克捷。新疆地處沙漠。餉無所出。從前用兵。皆由各省轉運接濟。此次鮑超所帶兵勇。月餉計需十餘萬。須合各省之力。協濟俾免缺乏。著官文。曾國藩。都興阿。駱秉章。毛鴻賓。李鴻章。吳昌壽。惲世臨。劉蓉。閻敬銘。沈桂芬。郭嵩燾。恩麟。體察情形。每月可以協撥若干。均各酌定數目。奏明辦理。卽按月如數撥解。不得宕延。此係緊要兵精。眾擎易舉。該督等總須顧全大局。寬為籌備。毋許稍分畛域。藉口推諉也。將此由五百里諭知官文。曾國藩。都興阿。駱

東章毛鴻賓李鴻章吳昌壽惲世臨劉蓉閻敬銘沈桂芬郭嵩燾並傳諭鮑超恩麟知之。又諭沈葆楨奏甘肅福建軍情均極喫緊。寔營兵不宜分。並將鮑超原咨鈔錄呈覽。一摺所稱關外平沙廣漠。利在用眾。閩地山重水複。利在用奇。西陸軍務緊急。鮑超宜統全部西行。方可獨當一面。第閩事大棘。江防亦警。若欲肅清康侍各逆。亦須寔營全部兵力。方能摧陷廓清等語。尚屬實在情形。惟新疆

自庫爾喀喇烏蘇失陷。伊犁被圍。情形萬分岌岌。都興阿穆圖善雷正綰等。分勦甯夏固原之賊。正在得手。未能遽爾分兵。非另撥大支勁旅。迅速西行。則出關勦賊之說。幾成虛語。況閩省餘氛。已由左宗棠三路援勦。鮑超又分兵萬餘人。交婁雲慶等統帶。會勦閩賊。兵力不為不厚。自可無須再留鮑超全部。致增朝廷西顧之憂。著曾國藩沈葆楨傳知該提督。於假期一滿。卽日率領所部宋國永等

各軍。由川起程入甘。節節埽蕩。早日出關。相機進勦。婁雲慶等軍。俟閩賊殄滅後。仍著前赴鮑超軍營。聽候調遣。鮑超請撥川省制兵四千名。並由川中招募步勇數千名之處。著駱秉章卽日妥籌辦理。毋稍遲誤。致滯師行。沙漠地方。平原曠野。非馬隊車營。相輔而行。不克有濟。應如何添設馬隊。及入甘購馬之處。著鮑超咨商曾國藩斟酌情形。實力籌辦。其寔營欠餉。並著沈葆楨迅籌清理。俾資行

費。將此由六百里諭知曾國藩駱秉章沈葆楨。並傳諭鮑超知之。○又諭據沈葆楨片奏。准鮑超函開。有卽補副將李文盛係該提督舊部。素稱得力。現在湖南帶廣武左軍。請飭湖南籌撥七八箇月行糧。交該員統帶所部入川。隨同該提督出關勦賊等語。著惲世臨迅速如數籌撥。行糧交李文盛統率所部一營。速行入川。隨同鮑超西勦。不准藉詞奏留。稍涉遲誤。將此諭令知之。○又諭都興阿穆

圖善奏籌防回捻各逆竄擾陝疆並現在甯夏辦理情形暨西甯撤回大肆猖獗各摺片鹽關回匪猝犯徽境既恐繞道入陝綴我兵力現在鹽關雖已攻克而敗殘匪眾勢必蔓延尤應嚴密扼擊力圖撲滅惟兵力既難分撥都興阿等已飭徽縣激勵民勇會同陝軍嚴防力剿並飭徽縣兩當速辦糧米接濟著卽照所擬妥速籌辦並咨明劉蓉嚴飭派出各員實力杜遏以固藩籬雷正綰進偪固原

兼顧邠長汧隴等處聲威頗振儻能分兵會剿徽境一帶之賊尤為妥協著卽斟酌情形與都興阿等商酌辦理楚豫捻匪由鄧州竄赴南召一帶陝境防務著都興阿咨明劉蓉懍遵疊次諭旨設法攔截毋令捻蹤闖入陝疆甯夏回匪狡詐獷悍朝廷早經鑒及前恐慶昫掉以輕心已諭令慎守滿城不可稍涉疏懈並諭都興阿穩慎進取毋墮賊計現在該將軍督飭各隊滾營進紮距城不過十里

內外倂賊愈近尤須慎重圖維務操勝算以期節節進剿克復名城西甯撤回假稱投誠仍復到處焚殺前因玉通奏到塔爾寺阿家呼圖克圖未肯散團已派官紳前往勸導當經諭令玉通回情狡獪未可墜其撫計與都興阿此奏相合現在回氛猖獗民不堪命漢民番僧人等自應集團防範以備不虞著玉通遵奉前旨於撫輯之中隱寓防範之意務須聯絡番僧人眾妥為保護固不可啟釁生事亦不得徂於撫議墮賊奸謀俟甘省軍務漸定卽著都興阿等分兵勦辦以靖地方將此由六百里各諭令知之○以故一等果毅繼勇公巴雅爾綽克托出繼子保全襲爵○以故賽因諾顏三等台吉車凌桑魯布子偉多布三保襲職○予甘肅清水堡傷亡提督孟宗福祭葬世職加等諡勇烈並賞三代封典○癸未諭內閣給事中王憲成奏各省捐輸有已捐未報者請飭查辦一摺據稱江蘇

省華亭婁縣兩邑於咸豐三年六年九年三次捐輸不下十餘萬迄今未據詳報恐係紳董通同地方官侵吞捐項蒙混造冊請飭江蘇巡撫查明參辦等語各省辦理捐輸原以濟軍餉之不足若如該給事中所奏捐輸一項徒為官紳中飽之資而踴躍急公者反不得立邀獎敘殊屬不成事體著李鴻章遴派公正大員查明華亭婁縣歷次捐輸之案是否均未詳報據實參辦並著各直省督撫一體詳查所屬州縣有無已捐未報及侵吞蒙混等弊以奉文之日為始勒限三箇月一律造冊請獎如有應行加廣中額學額一併奏請飭部覈議以昭覈實而示獎勵○又諭總理各國事務衙門奏請飭各省地方官於中外交涉事件按照條約辦理一摺據稱江蘇麻莊地方有英國人一名布國人三名搶取鄉村物件與民人互鬪傷死鄉民三人被該處民人將該洋人等拏獲縛送地方官辦理

乃該地方官展轉推諉並不收理以致延閣三日該洋人等被捆致斃二人已由該衙門咨行該省查辦等語各直省地方遇有洋人不持護照擅入內地及與民人爭鬪或有不法情事理應按照條約將洋人送交領事官懲辦此次麻莊地方互鬪一案若如所奏該地方官並不查照條約迅速辦理致洋人被捆多日遂致殞命實屬非是儻各省皆似此互相推諉畏事不辦尚復成何事體著各直省督撫嚴飭該地方官嗣後遇有外國人不持執照擅入內地及持有執照而或有不法情事抑或照內查有訛誤者均著按照條約拏交領事官懲辦其或官府未及覺察先由民間受害之家拏送者一經解到亦著按約就近送交領事官懲辦無論由官府民間拏送中途拘禁不准陵虐至中外一切交涉事件甚多並著飭令該地方官平時將各國條約悉心檢閱不准視為具文漠不關心致臨

時多所舛誤○諭議政王軍機大臣等御史朱學篤奏黃流為患請飭籌全局設法疏濬一摺據稱黃河自蘭儀決口河流北徙潰運河注大清河為患甚重若於直隸之東明長垣山東之濮范等處強築隄防勢必橫漲入運則張秋以北盡變災區通盤籌畫亟宜先濬下游以殺水勢按大清河與徒駭河相表裏乾隆嘉慶年間屢經挑濬今之徒駭淤墊十倍於前自應挑濬徒駭俾黃流分入得以暢行下游既暢則上游之隄即可節節修築至大清河兩岸土性易圻武定屬境探馬哨白龍灣等處險要異常宜築長隄以資保衛各等語所奏是否可行著閻敬銘詳細查勘酌覈辦理該御史另片奏請依照海塘捐輸事宜在山東省城設局收捐以濟要工等語並著閻敬銘體察情形奏明辦理原摺片均著鈔給閱看將此諭令知之○又諭御史劉慶奏風聞順義縣地方有棍徒趙姓即趙長

霖由京前往該縣句串許姓等在河北地方自稱係現任侍衛查辦地畝將民人許姓家什物全行封閉偪令交銀許姓全家逃避趙姓即赴縣署喧鬧該縣未敢究治請飭查拏審辦等語近來無賴棍徒假充委員借辦黑地為名赴京外滋擾殊堪痛恨著萬青藜下寶第密派委員即將趙姓即趙長霖等嚴拏務獲一併交刑部審明辦理以懲惡棍而靖閭閻原摺著鈔給閱看將此諭令知之○又諭沈桂芬奏豫省匪勢漸近晉疆酌調官兵並暫留楚勇嚴防一摺前因張之萬奏賊擾魯山窺伺河陝當以時交冬令河冰凍結恐匪蹤易於渡河諭令沈桂芬設防茲據奏稱現在蒲州等營調派兵丁一千名就近添防羅承勳管帶二起楚勇赴甘肅經渡河飭令折回暫駐茅津添調太原平陽等營兵一千赴永濟一帶防範澤州防兵早撤現已籌兵備調等語布置尚屬周密惟晉省兵丁向多

孱弱。此次沈桂芬派出防兵。務須揀擇精壯可用者。方不至有名無實。和昌既駐茅津。著飭令整頓各營。將各處緊要渡口。嚴密梭巡。多設偵探。與羅承勛併力協守。毋稍大意。賊既北趨魯山。漸逼秦晉。僧格林沁張之萬當已相機兜剿。扼其入陝。其可以竄入晉省之路。尤應派兵截擊。毋令闖入。擾及完善。是為至要。將此由四百里各諭令知之。○又諭玉通奏。遵覆郡城並未被困。惟漢番回民械鬪。尚未肅清一摺。西甯回民。辯教啟釁。嫌隙甚深。現雖名為投誠。而尋仇械鬪。兩造各執一詞。其禍源仍未稍塞。玉通惟當恪遵疊次諭旨。將城守事宜妥籌布置。不可稍涉大意。至漢民番俗人等。集團備禦。正可藉挫回匪之鋒。斷不可狃於主撫。悉令解散。致墮回匪奸計。現在都興阿雷正綰等分勦甯夏固原之賊。疊獲勝仗。陶茂林帶兵入省。曹克忠攻克鹽關。已與雷正綰合兵一處。甘省軍威丕振。

賊膽已寒。西甯等處回民。度必聞風震懾。玉通務當因勢利導。散其黨與。息其紛爭。以安疆圉。將此由六百里諭令知之。○以大理寺少卿英元為內閣學士兼禮部侍郎銜。○以記名副都統安住為吉林副都統。正白旗漢軍副都統文謙署西安左翼副都統。○廣州漢軍副都統海春。休致以前任甘肅西甯鎮總兵官成明為廣州漢軍副都統。○予江蘇吳江等處陣亡殉難副貢生馮經等紳民婦

女一百二十九名口分別旌卹如例。○追予

江蘇宜興殉難監生周家鋤暨嫂潘氏妹吳

周氏建立專祠。○甲申

上臨故惠親王第賜奠。○諭內閣朕叔祖惠親王老成敦厚。恩禮疊加。力矢靖共。忠勤卓著。本日朕親臨賜奠。悲惋實深。特申優眷之忱。益篤展親之典。其子奉恩鎮國公奕詳前已有旨。令於百日孝滿後承襲郡王。著再加恩。卽行賞食。全俸。不入八分鎮國公奕詢奕謨。

均著加恩晉封奉恩鎮國公至殯送之日著派醇郡王代朕前往賜奠並著送至園寢再行賜奠以示篤念懿親有加無已至意○又諭前因烏喇特農民李福星以公旗特爵封殺等情兩次來京呈控曾經諭令綏遠城將軍山西巡撫親提嚴訊不准遲延茲據都察院奏該民人李福星段德純等復以案懸八載沈寃莫雪等詞赴該衙門呈訴此案烏喇特西公旗蒙員屢次率眾持械肆行搶殺焚毀農民房屋若不從嚴訊結間閭何以安生雖據該將軍以撤任之烏喇特西公貢蘇隆扎布現在帶兵防堵請緩傳訊咨報都察院有案惟此案情節較重未便再事延宕即著沈桂芬會同德勒克多爾濟親提案內要證秉公嚴訊確情按律定擬具奏○諭議政王軍機大臣等沈葆楨奏照錄督糧道段起條陳安置凱撤勇丁事宜原稟至覽一摺前因東南軍務漸就肅清疊經諭令曾國藩等將

遣散勇丁妥為布置並酌議章程具奏茲覽該道員所陳各節內稱今日各路遣撤之勇不下數十萬各省投降遣散之賊亦不下數十萬各路遣撤之勇丁必有膽略謀勇之輩投閒置散必至別生枝節若將此輩加以募養自無構禍之事並可責成與地方官吏協同查拏匪類請酌留各州縣釐金以供撤勇之用自提鎮下至都守均各照本職每年應領俸銀數目分四季向地方官支領並每月酌加米石或由釐稅項下支給或由丁漕正款報銷其餘千把及無職勇丁或令歸農或令補充兵額游兵逗遛外省准其就近營盤及地方官聲明來歷一律咨回原籍辦理其倚勢陵人貽害地方者一經訪聞告發立予治罪所議四條立論不為無見惟酌給俸銀米石等項為費甚鉅亟應先事籌畫方可次第辦理消患未萌著各路統兵大臣各直省督撫按照所陳各節妥議章程據實具奏

不得因事多糜費。創始為難。存畏難苟安之心。草率覆陳。致貽後患。段起原稟均著鈔給閱看。將此各諭令知之。又諭都興阿奏逆賊糾集悍黨。撲犯營壘。堵剿獲勝。並撥營進紮一摺。回逆糾集馬步悍賊。直撲都興阿營盤。官軍連環槍礮迎前衝擊。逆勢不支。紛紛潰敗。官軍追至甯郡城邊。該逆豫伏馬賊分股包抄。馬隊官弁小有傷亡。北路之賊徑撲穆圖善營盤。亦經擊退。擒斬不少。據獲賊供

稱該逆由靈州調到援賊四五千名。又由固原調到悍勇馬賊一千數百名。此次出賊幾及二萬。各營以少勝多。尚屬奮勉。都興阿以賊勢日增。宜乘勝進剿。已令各營及穆圖善親兵等營前進。並調參將趙有勝等相機進紮。以圖攻剿。自係審時度勢。利在速攻。未可稍涉拘泥。惟賊眾且悍。伎倆狡獪。該將軍等務當通飭各營。於勇往之中。加意穩慎。以期萬全無失。雷正綰屯兵固原。節節進逼。固原

賊既已分援甯夏。則該處賊勢較鬆。該提督應趁其空虛之時。派兵迅速進攻。如固原軍事已鬆。並著派兵協同都興阿穆圖善攻拔甯夏漢城。盡殲醜類。該將軍提督等務須聯絡聲勢。毋致為賊所乘。是為至要。將此由六百里各諭令知之。又諭張凱嵩奏髮逆勾結苗匪。竄擾黎平。現飭粵軍援剿一摺。李七股匪自貴州永從縣境退紮丙妹高增等處。與粵西之懷遠羅城等界處處可通。該逆與

苗匪聲勢聯絡。負固自雄。現由三尚竹坪竄去。並據黎平府報稱逆匪由菁崗竄抵潘老廠地方。距府城僅三十里。張凱嵩所派駐防懷遠羅城之楊廷桂一軍。已陸續拔營進援。尚能不分畛域。此股逆匪不過三四人。惟黔地苗寨如林。與該逆蛰居相依。久為黔楚粵三省之患。楊廷桂一軍僅止五營。進剿難挫兇鋒。非合三省之兵。同時並舉。不能大張撻伐。俾世臨前奏。俟東防肅清。擬籌大舉入



黔現在江西肅清。該省無東顧之慮。所有援黔兵勇。諒應早已籌及。著該撫卽行揀派大員統帶。大支勁旅。迅速分道入黔。會合楊廷桂及黔省官軍。妥籌夾擊。務將黎平等處苗匪髮逆盡力殲除。廓清黔省下游。卽以保全楚粵邊圉。毋得因循觀望。徒託空言。致誤戎機。勞崇光張亮基身任封圻。本省地方幾成盜藪。豈能盡誣客兵。不思振作。著卽迅速調派得力兵勇。咨會楚粵官軍。聯絡聲勢力圖

掃蕩。肅清邊境。毋稍玩延。其楚粵界連黔省地方。仍著該撫等扼要嚴防。毋令該逆被勦紛竄。擾及完善。將此由六百里各諭令知之。○廣西巡撫張凱嵩奏。勦辦象州慶遠等處土匪。擒獲逆首。得旨所辦甚好。仍飭各該地方官。搜捕餘匪。務期淨絕根株。來賓賓州股匪。並著嚴飭蕭榮芳等軍。認真勦洗。毋留餘孽。○以正藍旗滿洲副都統綿宜署正白旗滿洲副都統。鑲紅旗漢軍副都統穆輅署正

藍旗蒙古副都統。予吉林陣亡防禦連元曉騎校多清阿祭葬。世職加等。○緩徵吉林雙城堡被淹屯地新舊租賦。○喀爾喀扎薩克貝勒多布清扎穆楚等二人。阿拉善頭等台吉濟克默特嵩魯布於東華門外瞻覲。○乙酉諭內閣。前因給事中恩霽等奏工部各關口照例請領簿冊。任意遷延。請旨飭催。業經諭令各該管督撫查明奏參。仍飭令各關口將歷年未領未繳各簿冊分別呈繳。請領

茲復據恩霽等奏。迄今年餘。僅據淮宿關請領同治元年簿冊。二三兩年亦未請領。其直隸潘桃口山西交城縣則始終未獲補領。湖南常關倒填牽混緣由。亦延不聲覆。各該督撫亦不照例按限據實奏參等語。事關查覈稅課。似此稽遲積壓。玩視定例。更難保無浮收捏報等情。亟應從嚴究辦。著各該督撫查取歷任遷延各職名。從嚴叅處。仍嚴飭各關口將歷年未領未繳簿冊分別呈繳。請領並

於每屆題報考覈時即將原填冊檔一併解科磨對以符定制而重考覈儻敢仍前延玩卽著該給事中等奏請嚴叅另片奏湖南辰關鹽木二稅需用商填簿冊均係逾限補領而該省奏銷題本內稱係商人親填並杭州織造呈解工部制帛飯銀等項到部日久並不將文批赴科投驗各等語著憚世臨查明該關令商人親填係屬何冊據實聲覆到科仍將原填簿冊及紅單一併解赴工科以憑

覈辦並著恆延將此次管解工部制帛飯銀等項之委員查取職名先行送部議處仍將遺漏文批補行赴科呈驗○諭議政王軍機大臣等恩麟奏陶茂林一軍收復金縣進紮省垣分兵進援靖遠會籌布置一摺陶茂林所部由通渭縣進勦中林山等處賊匪沿途乘勝掃蕩疊有擒斬並解安定縣城之圍餘匪向會甯一路奔竄官軍正擬分途搜勦因金縣被匪襲陷省防喫緊陶茂林親督諸軍

由新營清水驛兩路抄入金縣會合恩麟所派之果義營等軍整隊環攻立將金縣縣城克復勦辦甚屬奮勉陶茂林克金縣後進抵蘭垣因靖遠尚被賊圍派提督高餘慶等五營與副將王德恆等相機夾擊卽著陶茂林檄飭諸軍迅解靖遠之圍其分駐金縣清水驛甘草店各營俟各該處稍為鎮定卽由陶茂林統帶進規河狄等城擇要進勦河州回匪聞官軍將至甘詞乞撫緩我師期恩麟與

陶茂林會商暫予牢籠以紓兵力自係一時權宜辦法仍當慎密防維毋墮狡計賊蹤飄忽靡常東路靜甯會甯等境要隘亟須添兵扼守曹克忠一軍應否移紮靜甯適中之地為陶茂林後路聲援著都興阿穆圖善雷正綰妥籌調派都興阿等督隊進攻甯夏直逼郡城利在速攻仍著懍遵前旨穩慎進取以期萬全無失雷正綰仍遵前旨迅拔固原卽可派兵協同都興阿穆圖善攻克甯夏漢城

悉殲醜黨。以靖地方。將此由六百里諭知都興阿。穆圖善。雷正綰。並傳諭陶茂林。恩麟知之。○又諭恩麟奏請飭曹克忠專顧甘境。及請飭四川等省協撥省垣餉需。並飭各省速解慶陽協餉各摺片。曹克忠一軍。已將鹽關回逆老巢攻克。秦州境內一律肅清。正可乘此銳氣。責令進剿。若令回顧陝疆。則陶茂林後勁無人。東路又虞匪竄。著劉蓉就近另籌防兵。以顧邠長汧隴一帶。俾曹克忠專顧甘境。免致鬆勁。所有該總兵營軍火餉需。仍著劉蓉懍遵前旨。照舊供支。金縣等處賊匪。雖已遠颺。蘭垣解嚴。但甘省餉需支絀異常。其大宗餉項。不能不仰給於他省。著駱秉章。沈桂芬。劉蓉。隨時籌款。源源撥解。不得各存吟域之見。以維大局。雷正綰停兵日久。士卒艱窘萬狀。雖撫馭多方。時虞譁潰。所有前諭令四川。山東。山西。河南各督撫。協撥慶陽糧臺之款。著駱秉章。閻敬銘。沈桂芬。張之萬。迅速

按照原撥數目。無論何款。剋日撥解慶陽糧臺。源源接濟。毋稍延誤。並著文煜。楊能格。一面咨催。一面派員迎提。以供要需。將此由六百里諭知駱秉章。閻敬銘。沈桂芬。張之萬。劉蓉。文煜。並傳諭楊能格知之。○又諭常清明。緒奏烏垣滿城失守。添兵助剿。伊犁緊急。請派員出關會剿。並留明緒商辦軍務各摺片。此次摺報。遞到較遲。所有防剿機宜。著明緒懍遵。十二月十一日寄諭。妥籌辦理。常清等請派大員帶兵。馳赴伊犁。會籌剿撫。並飭部無論何款。迅速籌餉銀數十萬兩。撥交帶兵大員。現在署浙江提督一等子鮑超。請假回籍。昨已有旨。諭令該署提督於假滿後。率領所部自川起程。由甘出關。剿辦。並諭令官文等將鮑超一軍月餉。迅速籌撥。該署提督勇略過人。戰功卓著。前在內地剿匪。所向無前。鮑超出關後。定能掃蕩逆氛。廓清邊圉也。都興阿。穆圖善。規取甯夏。亦極得手。郡城指日可

拔亦可騰出兵力。出關進剿。明緒惟當懍遵前旨。慎固封守。一俟大兵雲集。即可大張撻伐。毋得稍有疏虞。常清請將明緒暫留伊犁。自係尚未接奉明緒補授伊犁將軍之旨。卽著明緒於應辦公事及軍務事宜。實心經理。以副委任。喀什噶爾英吉沙爾和闐葉爾羌等城實在情形。明緒務當設法偵探。是否業已失守。確切查明。方可次第辦理。力圖恢復。邁雜木雜特帶領回兵。如能得力。卽著明緒

責令該已革阿奇木伯克妥為管帶。協同剿洗烏科二城蒙兵口糧。著明誼就近籌畫。隨時接濟。甘肅向存副茶數百萬塊。此時伊犁餉需萬分支絀。而所撥之餉。俱未能解到。著恩麟將所存此項副茶。派員由北路草地撥運數十萬塊。解交伊犁。以備搭放兵餉之用。口外茶葉貿易極為流通。而科布多一帶。設立臺站。商賈行走亦無梗阻。據常清等奏。該商民如沿途以茶葉布匹。換易羊畜。實為兩

便。商販果能接踵而至。銀錢轉輸於軍餉較有裨益等語。著德勒克多爾濟沈桂芬宣諭口內商民。廣為招徠。令其前往貿易。以資周轉。將此由六百里諭知。明緒明誼德勒克多爾濟沈桂芬並傳諭恩麟知之。○補鑄浙江湖州府知府同知通判儒學經歷烏程縣知縣儒學南潯巡檢湖口巡檢歸安縣知縣主簿連市巡檢埭溪巡檢長興縣知縣儒學巡檢德清縣知縣儒學巡檢武康縣知縣儒學

安吉縣知縣縣丞儒學孝豐縣知縣儒學巡檢各印信關防條記。從閩浙總督左宗棠請也。○以克復甘肅金縣城。賞總兵官李邦英副將鄧洪池。主子龍張明亮楊洪春。巴圖魯名號。同知劉元績。花翎。餘加銜升敘。開復有差。○丙戌諭內閣刑部奏遵議已革臬司李元度情罪。定擬具奏一摺。已革浙江按察使李元度。前於逆賊由皖南江西紛竄湖北時。該革員由平江通城尾賊而來。並未與賊接

仗賊去後輒飾報勝仗克復城池迨經曾國藩奏効落職後該革員復悻悻求去稟請左宗棠將隨勒隊伍全行遣撤並備索欠餉尤屬不顧大局罪有應得李元度著照該部所議從重發往軍臺效力贖罪○又諭閻敬銘奏東省舊案交代一律算清查如初案虧缺各員開單請旨革職查抄監追一摺山東各屬交代案件自清查以後因籌辦防勦延閣日久積壓過多經該撫督同藩司局員逐案

句稽自道光二十七年十二月二十七日清查以後起截至咸豐五年十二月三十日止共計六十五案除捐攤例不計叅外實在短交正雜倉款等項銀兩竟至六十萬餘兩之多該員等或已身故或轉徙他省潛回原籍以致帑項虛懸實屬大干法紀亟應從嚴懲辦以肅官方所有單開之前任益都縣知縣龔璫等五十一員均著即行革職該員等任所貲財並原籍家產均著查抄備抵由各該

督撫咨照山東巡撫彙總具奏並定限分別銀數監追儘限滿不完即著嚴叅治罪其業經病故者查明有無子孫出仕著落完繳其舊案二三案虧空各員仍著閻敬銘一併查明叅奏該省交代經此次查辦以後自同治三年五月起所有各州縣應解上下忙錢糧著該撫設法稽覈不准絲毫蒂欠以重庫款該省歷年辦理交代遲延該撫奏稱實因軍務倥偬所致所有同治三年四月以前各案

遲延逾限處分均著加恩寬免○又諭前因已革御史富稼奏叅山東候補知縣劉時霖以奴僕蒙捐倚勢殃民誣良索賄當經諭令閻敬銘查明具奏茲據奏稱劉時霖奉派赴濟陽查拏匪犯所帶勇丁約束得宜並無騷擾搶掠情事陳迴即陳銅係圍城抗糧歷年在逃奉

旨飭拏之犯劉時霖於本年夏間將陳迴即陳銅並其弟陳鐔拏獲經委員徐大容李翼清

審明該犯等供認聚眾圍城奪犯抗糧等案不諱。與原叅劉時霖索錢未遂致將陳銅等捆縛。屬徐大容等刑逼誣陷。情節迥異。至劉時霖之父。曾經出仕。且與丁寶楨素不認識。原叅隨侍多年。聞警救主各節。實無其事等語。劉時霖等被叅各款。既據閭敬銘查明毫無影響。著無庸議。陳迴卽陳銅。稔惡多年。豈容幸逃顯戮。著俟定案時卽行正法。以昭炯戒。至富稼奏叅此案。情節舛錯。是非顛倒。御

史風聞言事。何至為罪惡取著之犯捏詞解脫。希圖翻案。殊不可解。恐該犯陳銅等自知罪大惡極。冀圖解免。展轉屬託。有授意該革員出奏情事。著派周祖培。存誠。會同都察院堂官。將富稼傳訊。務得確情。毋稍含混。○又諭前因閭敬銘奏。已故前署壽光縣知縣潘運第子媳潘黃氏。呈告潘司貢璜前在登萊青道任內。科索潘運第壽季規等銀。當經降旨。交閭敬銘詳查具奏。嗣據潘黃氏遣抱

告以閭敬銘等徇庇迴護等詞。赴都察院呈訴。復降旨。仍交閭敬銘秉公詳查。據實具奏。茲據奏稱。詳查潘黃氏所控各節。以故員許乃恩信函。及經送家人范成為據。均已無從質證。其呈出私簿庫帳。所記炭貲等銀。與提到壽光縣庫簿覈對。均不相符。詰之庫書王連升等。亦不能指證。此外牽控貢璜剋扣平餘。買民女為妾等情。均查無其事。將潘黃氏按例定擬等語。此案潘黃氏因潘運第歷任

交代虧空。輒敢捏詞誣告。意圖挾制。情殊可惡。姑念婦女無知。著照例擬軍。准其收贖。貢璜既查無收受陋規確據。著無庸議。本日據閭敬銘奏。查出山東省交代虧短之案。多至六十餘起。欠款甚鉅。似此積習相沿。侵虧帑項。實堪痛恨。現值大加整頓之際。若有如潘黃氏之藉端捏控。意存挾制者。卽著從嚴懲辦。以儆刁風。其屬員於上司勒索。許其立時稟控。如事後及因事挾制控告者。均著立案

不行。至外省收受陋規。本干例禁。各直省大吏。自當整躬率屬。痛絕苞苴。以期大法小廉。吏治蒸蒸日上。儻有不知自愛。暗中收受陋規者。一經發覺。定將該員從重治罪。決不寬貸。○諭議政王軍機大臣等。錫霖等奏偵探烏魯木齊各城失陷情形。並派蒙古官兵前往會剿。暨請准茶布商民改道來塔。暫緩查辦分界等摺片。塔城現懸一隅。防兵較單。雖現在尚屬靜謐。而賊氛正熾。深慮蔓延。著錫

霖等妥為彈壓。隨時撫輯。以保地方。現調之厄魯特土爾扈特蒙古各兵。著飛咨伊犁將軍明緒派員管帶。前往助剿。口內茶布貨物。向由歸化城起運。由草地運至古城。逐漸來塔。自烏魯木齊失守後。道路梗塞。塔城經費支絀。均賴徵收商稅。藉資補苴。著照該大臣所請。令該商民等將茶布貨物。由歸化城草地新設臺站。聽該商等自雇駝馬。運至科布多轉運來塔。以便隨時消售。著德勒克多爾

濟發給該商民路票。沿途一體遵照。俾利通行。塔城分界事宜。著春融雪消時。即行派員前往各處。詳加履勘。務須堅守條約。格外慎重。毋令夷人含混狡執。藉端侵占。一俟查勘明確時。即行繪圖貼說呈覽。將此由五百里各諭令知之。○丁亥。諭議政王軍機大臣等。蔣益澧奏閩省軍情喫緊。派兵扼紮浦城。衢州並勘明塘工。酌籌辦理情形各摺片。劉典一軍前據沈葆楨奏有先勝後挫之說。茲將

益澧奏。接左宗棠咨稱。劉典在楊坊等處失利。是我軍屢挫。賊勢猖獗。閩省軍情萬分喫緊。蔣益澧現派劉清亮帶勇三千人。移紮浦城。擇要扼堵。聽候左宗棠調遣。並派余朝貴率領新湘五營。填紮衢州。與浦城一軍聯絡。聲勢兼護糧道。所籌均合機宜。左宗棠駐師延平。想自能督率諸軍。迅圖掃蕩。其泉州一帶。及省城防守事宜。並著徐宗幹會同左宗棠妥籌布置。劉典一軍失利情形。著左宗棠

查明具奏。蔣益澧現委遊擊張政順等前赴甯波募勇訓練。以便騰出兵力。赴閩助勦。應如何調撥之處。著左宗棠等斟酌妥辦。其浙省毗連閩境。並著馬新貽蔣益澧實力籌防。毋稍大意。海塘工程。既據蔣益澧親自履勘。查出尤險工三千八百餘丈。最險工四千三百餘丈。自應先行修築。以衛民生。第柴埽各工。撙節估計。亦須四五十萬金。蔣益澧現在委員勸辦米捐。彫瘵之餘。恐難集成鉅款。著

李鴻章派員勸諭蘇松太所屬殷實之戶。量力捐助。俾得早日興工。於江浙兩省地方。均有裨益。本日曾國藩奏到李秀成親供內。有堂弟李侍賢之母。及其家眷。為蘇州李撫營漂陽將兵帶去。寬養厚待。欲收我弟之語。是否實有其事。著李鴻章查明覆奏。將此由五百里諭知左宗棠徐宗幹李鴻章馬新貽。並傳諭蔣益澧知之。○安徽巡撫喬松年奏查明霍邱縣練總李道南董有等高非捻首。請

免拏辦。得旨著免其拏辦。該撫仍當隨時留心察看。如果不安本分。即行嚴拏正法。毋稍姑息。○賞隆福寺守衛

梓宮兵丁銀。○追予湖北殉難巡撫陶恩培於死事地方暨原籍建立專祠。知府多山遊擊陶得壽附祀陶恩培湖北專祠。○予安徽六安陣亡千總羅鴻恩典史孔憲天祭葬世職。外委陳連勳等祭葬世職加等。○予湖北麻城陣亡守備閻樂天祭葬世職加等。○展緩兩淮富安安豐梁垛東臺何垛丁溪草堰劉莊新興廟灣伍佑板浦中正臨興十四場被水被旱地方應徵折價錢糧。



大清穆宗繼天開運受中居正保大定功聖智  
誠孝信敏恭寬毅皇帝實錄卷之一百二十四

大清穆宗繼天開運受中居正保大定功聖智  
誠孝信敏恭寬毅皇帝實錄卷之一百二十五

教修

同治三年甲子十二月戊子諭議政王軍機

大臣等左宗棠等奏官軍偪攻龍巖扼守漳  
平獲勝暨由連城進剿先勝後挫現籌勦辦  
情形毛鴻賓等奏越境赴援詔安乘勝進偪  
雲霄現仍防勦兼籌並請調馮子材督辦東  
江軍務吳全美請假回籍各摺片逆首李侍  
賢仍踞漳州汪海洋踞長汀連城上杭交界  
之南陽鄉劉典一軍新挫逆勢狃猖該督所  
籌辦賊之法先取遠勢漸偪漸近驅令歸併  
一處然後合力蹙之實為切中機宜現在王

開琳王德榜兩軍計可抵汀。賴長等軍。經康國器調赴雁石。趙均所部亦已嚴扼漳平。此路兵力較厚。著左宗棠徐宗幹妥籌布置。務期聯絡聲勢。先將汪逆巨股殄除。以期進逼龍巖。劉典退保連城之軍。尤當穩慎進取。毋再疏失。漳州城外地勢平衍。自林文察敗歿後。附近村莊多為賊脅。高連陞一軍。現紮萬松關瑞香亭一帶。以扼漳州東路。黃少春一軍。馳赴長泰。扼漳州東北一路。該逆堅匿不

出。伺隙圖逞。乃其慣技。左宗棠務令各軍深溝固壘。先為不可勝。以待賊之可勝。其漳軍後路及泉廈門戶。須節節布置嚴密。毋致為賊所乘。閩省賊勢甚重。該處兵力恐有不敷。江南現已無警。著李鴻章於蘇省防兵內酌量抽撥礮隊赴閩。歸左宗棠調遣。李鴻章所部除劉銘傳一軍已赴豫省外。此外該省得力兵將。左宗棠如須添調。卽一面檄調。一面奏聞。以資協助。毛鴻賓等奏官軍赴援詔安。

乘勝進逼雲霄。惟龍連汀杭一帶。界連漳州。不能不防其回竄。該督撫現飭李福泰往來嘉應惠州之間。相機調度。方耀一軍。由武平進紮上杭之蚌蛇渡。先顧上杭。進規永定。鄭紹忠一軍。駐紮上杭之蜂市。與翟國彥方耀等聯絡策應。所籌尚妥。賊謀甚狡。伺隙卽逞。著卽飭令李福泰督飭諸軍。相機會合進剿。務先嚴防本境門戶。毋得稍有疏虞。賊如不得逞。志於閩。必將全力趨粵。馮子材前經請

假回籍修墓。曾令其假滿後赴廣西提督本任。該員久歷戎行。深明韜略。廣東形勢岌岌。自應保衛桑梓。馮子材著暫留廣東。督辦東江軍務。並毋庸俟假滿。卽馳赴大埔饒平之交。擇要駐紮。堵剿漳州大股踞逆。李福泰俟馮子材到防後。再行回省。吳全美統帶師船回粵。著賞假三箇月。回籍修墓。福建軍務緊要。著毛鴻賓傳知該提督。假滿後卽馳赴福建。水師提督新任。毋庸來京陛見。毛鴻賓等

片內所稱據總稅務司赫德面稱。適見新聞紙。言侍逆李侍賢現踞漳州。句串洋人。幫同襲取泉州。進襲福州。約將海口通商地面。讓給洋人等語。原不足據。以為信。而各處流氓鬼子。希圖句結罔利。亦事所或有。請飭福建防範。並飭總理衙門。照會各國駐京公使。轉飭駐紮閩省洋官及領事官等。約束商民各等情。本日已諭令總理各國事務王大臣妥籌辦理。著英桂、徐宗幹嚴飭所屬。妥為稽查。如有外國流氓。句結生事。拏交各國領事官從嚴懲辦。泉州等處防務。並著飭令地方文武認真辦理。毋稍大意。毛鴻賓、郭嵩燾另片奏香山富民陳守善、徐瓜林二戶。皆以依附洋人致富。始而避居澳門。繼而避居天津。此輩挾貲既富。聲氣易通。謠言之興。未始不由於此。現飭查拏究罰等語。捐務之興。原係朝廷不得已之舉。必須準情酌理。多方勸諭。方可以免怨尤。若派捐勒捐。自不免人言藉藉。

該督撫以此次謠言之起。謂苛派擾民。逼迫各富戶遷徙澳門、香港。查訪不得主名。疑為陳守善等所為。欲行拏辦。該富戶等坐擁厚貲。一味慳吝。雖屬可惡。然朝廷有寬大之體。遽加以造言之罪。查拏嚴懲。恐弭謗道。以召謗。該督撫仍當斟酌妥辦。未可一意孤行。致失人心。將此由六百里各諭令知之。○又諭劉蓉奏東路匪倡陝疆。現籌派兵集團分防要隘。請將工程處銀兩展限籌解各摺片。豫省髮捻。由鎮平竄南召之白土岡。及鎮內交界之馬山口等處。並有赴河南府過年再圖入陝之信。賊勢愈趨愈近。與商一帶。隘口繁多。亟應力籌防禦。以扼該逆西竄之路。劉蓉現派鄔太愚等駐紮富水等關。並聯團協剿。以壯聲威。均著照所擬辦理。前諭官文如賊勢西趨陝疆。酌派勁兵越境兜擊。並以蔣凝學現紮商城。諭令僧格林沁酌量調遣。茲據劉蓉奏請分撥蔣凝學一軍。繞赴浙川。駐紮

荆子關。為繞前截擊之師。於浙川鄖西兩路均可兼顧等語。現在蔣凝學未知由何路進剿。應否即令該道進駐荆子關。或另騰出兵力。前往扼紮。以固秦疆門戶之處。著僧格林沁。官文通籌全局。妥籌辦理。劉蓉仍當就本省兵力。遏賊氛。不得專待鄰省撥兵。一味株守。致令無賊之區。又被蹂躪。陝西欠解工程處銀九萬兩。據劉蓉奏稱該省殘破太甚。未便急切追呼。請展限籌解。並請將林壽圖

一併議處。該省被擾甚久。未能依限解清。亦屬實情。所請將該撫暨藩司林壽圖一併交部議處之處。均著加恩寬免。並准其展緩三箇月。於明年四月以前。埽數完解。惟

定陵工程緊要。經此次展緩之後。務當依限解清。毋得再事延緩。前諭僧格林沁將李成謀一軍調赴豫省助剿。茲據左宗棠奏閩省賊氛正熾。請飭李成謀速赴漳州鎮總兵本任等語。著官文即飭李成謀迅赴新任。並酌挑

所部水師得力弁丁。隨帶赴閩。以利攻剿。將此由六百里各諭令知之。○又諭劉蓉奏據總兵陳天佑咨稱。東治右後兩營。除領過晉省協餉銀五千兩。借領陝省糧臺銀二千兩外。共欠餉銀五萬二千有奇。擬請由陝給領。此項月餉。曾經沈桂芬奏明由晉省竭力併解。劉蓉亦經咨明沈桂芬係屬晉省欠解之款。請仍由晉省查照原奏按月撥解等語。陝省現在籌撥援甘各餉。為數已多。若再以晉

省欠解之款。移歸陝省清解。力難支持。自是實在情形。著沈桂芬查照前奏。將陳天佑一軍餉銀。按月由該撫派員如數迅速徑解慶陽糧臺。俾此項餉糈。得歸有著。以供支放。而免延誤。將此由五百里諭令知之。○又諭駱秉章奏甘省協餉。請均解慶陽糧臺一摺。據稱甘省軍務喫緊。需餉浩繁。業經撥銀二萬兩。匯解慶陽糧臺。現疊准恩麟咨催。將餉項解至甘省。文煜復咨催。將餉項解至慶陽。又

經戶部奏明將川省協甘餉銀全數作為陶茂林軍餉。此次鶴齡所帶援甘征兵月餉亦須由川撥解。似此紛紛咨撥。幾於無所適從。請將協甘餉銀均解慶陽糧臺查收轉撥等語。所陳自係實在情形。著照該督所請。所有四川協甘餉銀五萬兩。及津貼項下協甘銀數萬兩。卽由駱秉章督飭藩司勉力籌撥。陸續解赴慶陽糧臺交納。文煜楊能格收到此項餉銀。卽酌量甘省各營緩急。隨時分撥。毋

得擅行截留。以濟要需。將此由五百里諭知駱秉章。文煜並傳諭楊能格知之。○陝西巡撫劉蓉奏派援階州各軍。現籌會合兜剿。得旨著卽飭令黃鼎蕭慶高等會合川隴各軍相機圍剿。迅圖克復。其階南竄川要路及北山諸隘尤應嚴密扼守。毋任紛竄。○以福建進攻龍巖。扼守漳平獲勝。賞參將賴長巴圖魯名號。革達令輕進參將劉大謨遊擊陳元彰職。予陣亡副將盧華勝等祭葬世職。○予

浙江各屬陣亡殉難同知馬桂林等暨紳民婦女二百十六員名口分別旌卹如例。○己丑以神靈助順。加江西會昌縣賴公祠封號曰顯應。○諭內閣前因宗人府奏現襲鄭親王承志原領不入八分輔國公分內甲數均應裁撤。現襲不入八分輔國公岳靈仍襲原職。分內甲數無庸增減。當經降旨允准。茲據奏稱查明鄭親王承志前在不入八分輔國公爵內並無領過甲數。無甲可裁。應無庸議。

惟岳靈前次授封時曾經照例給與甲數。現奉旨作為承襲承志所遺之職。其分內甲數是否按照承志前職原無甲數之案。將岳靈原領甲數裁撤。抑照現在應有甲數之例。仍將岳靈原領甲數酌留。請旨等語。岳靈前授不入八分輔國公時原領紅白甲數著毋庸酌留。卽於鄭親王承志應得甲數內劃出護軍領催紅甲四分白甲十六副分給岳靈承領。著為令。○又諭禮部奏琉球國使臣呈稱

該國世子此次恭進方物。懇照道光二年六年咸豐元年五年准予賞收。免其留抵等語。該國世子因慶賀登極並進

文宗顯皇帝香品。專遣使臣呈進方物。前經降旨留抵下次正貢。原以昭體恤而示懷柔。今據該使臣等呈稱。伊等臨行時。該國世子諄屬懇請准予賞收。免抵下次正貢。具見抒誠效悃。誠懇可嘉。著照所請。此次所進方物。准予賞收。下次正貢屆期。該國遣使來京時。再

當優加賞賚。用昭柔惠遠藩至意。該部即傳諭該使臣。令於回國時轉告該國世子知之。○又諭前因沈兆霖奏查明撤匪滋事大員辦理謬妄。其先後調兵動用各款。均屬虛糜帑項。當降旨令樂斌多慧成瑞和祥分成賠繳。茲據戶部奏查明此案虛糜經費銀三萬一千九百三十七兩零。據恩麟原咨覈算內有多慧辦理善後。用去司庫並釐金局銀六千零五十兩。自應照數劃出。專歸多慧一人

賠繳。此外虛糜銀二萬五千八百八十七兩零實鈔二千串。錢一萬五千串。是否應行援案著落樂斌等按成分繳之處。請旨辦理等語。此案虛糜各款著樂斌分賠四成。多慧成瑞和祥均各分賠二成。多慧辦理善後糜費銀六千零五十兩並著照所議專歸多慧一人賠繳。均著該部查明著追成案。起限勒追。該省各屬尚有墊用官兵口食馱載等項銀二萬一千九百餘兩。錢二千六百九十餘串。

著恩麟嚴飭屬員迅速查明呈報。遵照此次派定成數一併著追。此外如有動用之款並著恩麟詳細查明。統行著落樂斌多慧成瑞和祥分別賠繳。以重庫款而杜隱漏。其有已故人員即著落該故員子孫賠繳。至多慧尚有應行交出撤匪賠繳贓錢一萬串。前據沈兆霖奏該士民並未領到。現在多慧是否業經全數繳齊。著恩麟查明報部。毋得稍涉含混。○又諭毛鴻賓郭嵩燾奏甄別道員知

縣請分別降革一摺。廣東儘先補用道員羅上楨。經毛鴻賓等委赴潮州辦理釐務。措施乖方。不能服眾。且舉止輕浮。不勝監司之任。姑念前在福建本籍辦匪。著有微勞。著以同知降補。歸部銓選。知縣吳慶凱。先經委署饒平縣事。於鄉民互鬪。不能體察民情。幾至釀成巨案。荒謬糊塗。不堪造就。著卽行革職。知縣呂璣。委署長樂縣事。性耽安逸。在任經年。不諳吏治。著降為府經歷縣丞。留於廣東補用。以肅官方而嚴考覈。○諭議政王軍機大臣等。僧格林沁奏督軍進紮寶豐。晝夜進剿。明襲暗攻。疊獲小勝。現仍設法規取。並請調步隊來營助剿一摺。逆賊麴聚張八橋梁窪等處。經僧格林沁派令郭寶昌張曜等分道進攻。因限於地勢。尚未得手。必須步步為營。乘隙進取。該親王擬俟帳房解到。偪賊而營。著卽督飭郭寶昌等穩慎進兵。不得稍有疏失。張曜一軍。著僧格林沁張之萬督令將梁

窪賊壘攻拔。使該逆首尾不能相顧。自可收夾擊之效。該親王營內需用帳房軍械等項。著張之萬督飭趕緊運解。以資利用。姜玉順一軍。前已有旨令其赴豫。著官文卽行嚴催。令赴豫省協剿。歸僧格林沁調遣。毋任宕延。劉連捷劉銘傳等勇隊。疊在江南克復城邑。均是百戰勁旅。卽不令當前敵。亦可調令防堵要隘。藉壯聲援。俟該提督等到營。仍由僧格林沁酌量調派。詹啟綸前經請假回籍修墓。業經賞假三箇月。計期尚未起程。本日已諭知富明阿。令該總兵挑選精銳勇丁三千名。剋日赴豫。如回湖北本籍。卽著官文飭令趕緊赴豫。其英翰所部之黃秉忠等二員。亦經諭令喬松年飭令管帶兩營。迅速赴豫。俟豫省軍務肅清。再令詹啟綸回籍。陳國瑞現在何處。能否出力。著該親王量加驅策調遣。該親王營中馬隊傷病不少。實深廛念。蒙古現有捐輸馬匹。尚堪調用。如須添調。卽趕緊

奏請撥解。以利軍行。將此由六百里各諭令知之。○又諭僧格林沁奏請飭英翰所部副將黃秉忠同知史念祖管帶兩營步隊來豫助剿。徐州鎮總兵詹啟綸所帶勇隊頗稱驍勇。並請飭該總兵選帶三千名來營等語。現在豫省匪勢猖獗。竄擾南召魯山。該逆一入山險。非有得力步隊。不足以資剿洗。著富明阿檄飭詹啟綸選帶精銳勇隊三千名。速赴僧格林沁軍營。俟豫省軍務肅清。再行遵照。

前旨。飭令回籍修墓。英翰部下黃秉忠。史念祖管帶步隊兩營。尚能得力。著喬松年飭令星馳入豫。迅赴僧格林沁軍營。均聽候該親王調遣。以資厚集而利攻剿。將此由六百里各諭令知之。○又諭惲世臨奏黔匪環逼楚邊。官軍力戰獲勝。現籌防剿情形一摺。黔省苗教各匪。分擾楚邊。經官軍由涼傘一帶。分路環攻。賊始卻退。仍占踞滿洞凱寨等處。並有零股。窺伺青谿玉屏邛水等處。周洪印乘

賊蹤下竄。直搗寨秧老巢。當將賊巢焚毀。餘賊相率遠遁。沅州邊境。雖暫獲安靜。而賊勢由大魚塘以至涼傘。蔓延數十里之廣。黎平苗匪。復勾結髮逆。竄逼靖州。老號匪又由印江分股下竄。銅仁屬境。楚邊俱形喫重。著惲世臨迅檄彭炳武。于高勝兩軍。由寶慶速赴沅防。並飭周洪印。滕加洪等酌添勇丁。周密布置。以資捍禦。毋任賊蹤復行蔓延。戈鑑一軍。業經馳回靖州。即著飭令擇要扼紮。妥籌

防剿。毋稍疏懈。前因廣東軍事方殷。諭令趙煥聯統帶所部入粵助剿。現在廣東毗連江閩各境。已無賊擾。楚省邊防緊要。賊勢飄忽。東面亦難遽行撤防。趙煥聯所部各營。著仍暫留湖南。分駐江楚邊隘。俟湘省邊界靜謐。即遵前旨。飭令該臬司迅赴滇臬本任。以重職守。將此由五百里諭令知之。○又諭聯捷奏請調大名等處官兵。並請將黑龍江官兵就近帶往各摺片。據稱烏科二城蒙古兵未



諳戰陣。前在大名道並防河任內。皆係招募勇丁。以及大名正定天津河北官兵。親加訓練。情意相孚。緩急亦尚可恃。請調各該處兵勇協剿等語。烏科二城蒙古兵。隨剿未能得力。自係實情。惟回疆匪勢甚熾。非有生力軍前往。大張捷伐。不足痛殄逆氛。如今大名等處兵勇西征。於人地恐尚不甚相宜。所請在於大名等營內調撥馬步官兵。並招集舊日勇丁帶往之處。著毋庸議。該大臣舊部將領

中。如有謀略素優打仗勇往之員。准由聯捷奏調隨帶出關。以資統帶。前據實善奏。遵旨挑備黑龍江官兵五百名。聽候調遣。茲據聯捷奏黑龍江挑派官兵五百名。分為兩起。前赴新疆助剿。可否就近帶往等語。此項官兵五百名。本係挑齊聽候調遣。著實善飭令迅速起程。取道張家口。交聯捷統帶進剿。該官兵起程後。所需行糧等項。著劉長佑妥為供應。並著阿克敦布。廉至。於口外各臺站。妥籌

款項。沿途接濟。毋令稍有缺乏。俾利師行。將此由六百里各諭令知之。○以內閣學士李鴻藻署經筵講官。延煦充文淵閣直閣事。衍秀署文淵閣直閣事。○命前任巴里坤領隊大臣穆騰阿交神機營差委。○以廣東克復信宜縣城。並羅定等處剿匪出力。賞知府蔣超伯。守備方豐等花翎。知縣齊同浩等藍翎。餘加銜升敘有差。○以陝西漢中等處扼堵川匪粵匪出力。賞遊擊蔡和清。尹有倫。都司

賈吉齡。戴茂林。巴圖魯名號。遊擊張殿甲等花翎。千總樊遇春等藍翎。餘加銜升敘開復有差。○以需索滋擾。革甘肅副將胡世英職。與已革總兵官李曙堂。併交署陝甘總督都興阿懲辦。○予湖南寨秧陣亡把總陳開玉等祭葬世職加等。○追予故都察院左副都御史張芾於倉頭鎮死事地方建立專祠。殉難家屬五十二名口分別旌卹。暨家丁等一併附祀陝西省城張芾專祠。○追予浙江烏

程合門殉難知縣許承岳於死事地方暨原籍建立專祠家屬旌卹如例一併附祀○予故廣東潮州府知府吳均湖北荊門州知州蔣照松滋縣知縣汪維城山東商河縣知縣文頴山西河曲縣知縣張燦斗入祀名宦祠從巡撫黃贊湯巖樹森吳昌壽閣敬銘沈桂芬請也○予湖北故內閣中書陳一揆湖南故山東登萊青道舒夢麟河南故陝西潼商道尚開模廣東鎮平縣知縣崔敬修候選同

知王鳴謙文生原文會廣東故雲南曲靖府知府李恆謙番禺縣訓導莫元伯直隸故山東長清縣典史李啟文四川故文生李時春入祀鄉賢祠從總督劉長佑駱秉章巡撫譚世臨張之萬吳昌壽郭嵩燾請也○撫恤朝鮮琉球二國遭風難夷如例○庚寅

上御撫辰殿大幄次賜蒙古王貝勒貝子暨呼圖克圖等宴並賞賚有差○諭議政王軍機大臣等額勒和布奏土默特貝勒旗疏脫要

犯一摺恩合巴土那木薩賚土們恩克三犯係老頭會案內業經定擬罪名要犯宜如何小心看押乃據奏稱該犯等於十二月初一日夜間乘閒脫逃遲至十二日之久始據該旗呈報情節支離難保無有心縱逸情弊該犯等屢經聚眾滋事若任其遠颺必致復生事端亟應趕緊捕拏以除後患著麟慶飛咨卓索圖盟長嚴飭所屬蒙古各旗責令將該三犯按名嚴拏務獲並著玉明寶均德椿恩

合分飭各該地方官一體購緝會緝毋任漏網所有看守疏縱之員弁兵丁等著額勒和布飭令該旗解赴朝陽嚴行審訊有無賄縱情弊按律懲辦將此各諭令知之○又諭楊岳斌奏湘勇起程日期並請飭發協餉及派員募勇情形一摺據稱接准部咨知甘省協撥餉銀已有成議而湖北防務已鬆卽飭安肅道蔣凝學等先期帶兵赴甘該軍馬步七千八百餘人甘省得此一軍可以稍厚兵力

惟該營每月需餉銀四萬餘兩。食米四千餘石。必須按月接濟。請飭都興阿轉飭慶陽糧臺。先將部議協撥楊岳斌軍營之款。暫濟該道軍餉。至各省協餉。已准江西江蘇各解到三萬兩。飭總兵彭楚漢等招募湘勇。一俟訓練成軍。卽當統帶赴甘各等語。前因蔣凝學一軍駐紮商城。諭令僧格林沁酌量調遣。復因髮捻各逆。駸駸西趨。諭令僧格林沁等斟酌情形。飭令蔣凝學駐師荊子關。實力扼紮。

是該道員所部馬步各隊。尚未能剋期赴甘。楊岳斌惟當趕緊募勇成軍。認真訓練。並咨催各省欠撥之餉。以期貲糧稍足。卽日成行。迅赴甘省。俾得騰出兵力。出關剿賊。以靖邊陲。蔣凝學一軍。如有赴甘之期。卽著都興阿。文煜楊能格。由慶陽糧臺支發餉銀。毋稍缺乏。將此由五百里諭知都興阿楊岳斌文煜。並傳諭楊能格知之。○又諭駱秉章奏官軍越境攻剿階州踞逆。疊獲勝仗。催兵進剿一

摺。據稱周達武江忠淑各率所部。進逼階城。該逆分股於城外築壘抗拒。蔡逆親帶黃衣悍賊出城死鬪。周達武督飭各營分兵疊擊。奮力衝入賊陣。賊眾大亂。蔡逆墮馬。被黃衣賊搶護入城。偽巡捕蔡四逆亦被剿奔入城中。其由城西涉淺過河築壘之賊。經江忠淑督飭各營分路截殺。斃賊無算。該兩軍雖連戰皆捷。而兵力不敷。未能合圍。湘果兩軍並陝省之英毅親兵各營。嚴催未到。惟彝字營已馳抵柳壩各等語。階州踞逆川軍新到。卽能力挫賊鋒。著駱秉章仍檄周達武等軍乘勝進擊。務須一鼓作氣。將踞逆悉數殄除。以清餘孽。參將劉鶴齡所部一千七百人。由畢口馳赴階州南岸。並著催令前進。會合漢軍聯絡兜剿。昨據劉蓉奏湘果軍蕭慶高等與右軍各營分紮北山諸隘。催英毅一軍扼阻舊城衝要。遏賊由柳壩一帶出竄之路。而階南竄川要路。現有武字達字兩軍分兵扼守。

現飭會合川隴各軍相機圍剿各等語。是駱秉章具奏時。尚未得陝軍到齊之信。乃在川陝各起勁兵。業經雲集。著卽督飭各將士合力兜擊。迅拔堅城。劉蓉尤當嚴飭湘果等軍。會同周達武等認真痛剿。不得專恃川兵稍形疏懈。將此由六百里各諭令知之。○命阿魯科爾沁貝勒拉什忠。勦科爾沁貝子阿敏烏爾圖克什克騰頭等台吉畢瑪拉吉哩第。喀爾喀扎薩克台吉喇布坦多爾濟在乾清

門行走。賞科爾沁輔國公齊默特多爾濟鄂爾多斯頭等台吉扎那巴蘭扎。喀爾喀輔國公額勒柯木濟爾噶朗密濟特多爾濟察哈爾輔國公吉楚克扎木蘇。喀爾喀台吉魏多布三保花翎。○以疏脫要犯土默特貝勒散巴勒諾爾贊。下理藩院嚴議。摘協理塔布囊揚桑阿。扎奇魯克齊阿克東阿。梅倫那木薩賴扎布。溫哲渾頂帶。仍勒限嚴緝。○予甘肅階州陣亡參將廖德成。遊擊羅孝徽。守備鄭

長棟等祭葬。世職加等。○予四川重慶等處陣亡傷亡官兵勇一百八十九員名分別賞卹如例。○辛卯諭內閣吏部奏已革陝西督糧道沈壽嵩呈請加倍捐復原官。可否准其捐復。請旨遵行一摺。前據升任御史裘德俊奏參沈壽嵩平日貪污卑鄙。於御史李培祐參奏苛派程儀等款。該員餽送樂斌銀兩。為之消弭。當經諭令托明阿等查奏。嗣據履奏以沈壽嵩被參各款事涉曖昧。查無實據。

惟聲名平常。鑽營納賄。不敢謂盡屬子虛。請予議處等語。當以議處不足蔽辜。改為卽行革職。是沈壽嵩係因情節較重特旨革職之員。所請捐復原官之處。著不准行。○諭議政王軍機大臣等官文吳昌壽奏長陽縣刁民聚眾滋事。派兵擒捕一摺。據稱湖北長陽縣土司後裔田士信卽田思羣。並李明得。覃其烈等。糾黨橫行。並長樂縣差役王啟幅等。均因案畏罪。在長陽縣境結夥。意圖拒捕。膽敢

在四方臺山搶擄銀錢。並將該縣派往協緝之族長田青遠等殺斃。刳其財物。製造刀矛。狡馬思逞。經宜昌鎮總兵葉永泰撥兵往剿。並經官文派令都司曹立全等。抽撥礮船。駛赴宜都縣小河口堵截。該逆糾眾於十一月二十八日。繞至王臺子坳地方。經曹立全出隊迎擊。隨即敗退。該匪復由鴨子口偷越。官軍往捕。斃匪數十名。將夥匪李明得。章其烈。擒獲正法。因山路積雪。尚未擣其巢穴。現加

派唐協和統帶四營。添撥礮船。聯絡勦捕。並飛咨湖南巡撫。飭屬嚴防等語。該犯田士信等。以土司後裔。肆行無忌。並敢聚眾殺掠。恃險拒捕。實屬目無法紀。若不及早撲滅。必致釀成巨患。著官文、吳昌壽嚴飭派出官兵。弁丁會同該地方文武員弁。迅速勦捕。將該匪等悉數殲除。不准一名漏網。該處與湖南接壤。並著惲世臨。迅飭所屬各員。於交界處所一體嚴防。密速兜剿。毋任竄越。將此由六百

里各諭令知之。○以曉暢營務。予湖北副將穆克登布以總兵官記名簡放。○以教子有方。賞故提督蕭河清母劉氏一品封典。○緩徵湖北江夏嘉魚漢陽漢川黃陂黃梅鍾祥京山潛江天門江陵公安石首監利松滋枝江荊門沔陽十八州縣暨武昌等衛被水被旱地方新舊額賦雜課有差。○壬辰。

孝莊文皇后忌辰遣官祭

昭西陵。○諭內閣宗人府刑部奏審明筆帖式擅辦公府門文將失察之員分別定擬。並請將奉恩鎮國公桂池議處一摺。據稱已革筆帖式承屏在奉恩鎮國公桂池府內教讀。因本年十月桂池之母向伊提及宗人府辦理應封宗室桂池之弟桂豐業經呈送未見傳牌。屬令繕寫該公府門文交參領奎昌鈐印。奎昌未經查出攔阻桂池因在差次。並不知情各等語。宗人府查辦應封宗室例有定章。桂池之弟桂豐並非應封宗室。例不入考。何

以該公門上率用咨文行查。文內並有若不嚴行究辦。何以肅功令而儆官邪等語。措詞謬妄。膽大任意。有乖體制。亟應嚴行懲辦。著照該衙門所擬已革筆帖式承屏著依罷閒官吏在外干預官事。寫發文案律杖八十。鞭責發落。桂池府包衣參領奎昌著照律笞四十。係職官交兵部照例辦理。奉恩鎮國公桂池雖據聲稱時在差次。並不知情。其平日辦事荒謬。信用非人。已可概見。桂池著交宗人

府議處。○又諭倉場侍郎奏來年米數加增。恐復有攙雜微變等弊。請飭先事豫防等語。漕糧為天庾正供。例應一律乾潔。沙船受雇裝運米石。卽責有攸歸。豈容有攙雜微變等弊。著兩江總督江蘇巡撫於來年新漕起運時。多擇江浙殷實沙船裝載。儻有微變較多之船。或責令賠補。或將船舵人等加以懲處之處。均著酌定章程辦理。以重漕運。○又諭御史佛爾國春奏升科黑地流弊滋多。敬陳

管見四條一摺。直隸等省查辦黑地原以除弊利民。若如該御史所奏。書吏從中索費。奸民倚勢霸認。甚至扶同欺隱。地方官畏難苟安。延不具報。殊非詳慎辦公之道。著直隸總督順天奉天各府尹按照所陳各條。查覈辦理。以祛積弊而重民依。○諭議政王軍機大臣等。林鴻年奏籌辦迤西請撥軍餉。並請撥湖北湖南釐金。調員差委。馬榮就揜各摺片。據稱曲靖地方業已就撫。迤東如果安堵。卽

應進勦大理。該撫已劄飭楊盛宗自選兵練西出大姚。永北一路。聯絡川省之會理鹽源各邊民團。約會馬如龍等分路進勦。規取大理。該撫居中調度。亟須精練數千。為各路聲援。請飭四川督臣轉飭藩司悉心籌畫等語。現在馬聯陞伏誅。馬榮已就擒。獲迤東情形尚為得手。著林鴻年卽飭楊盛宗精選兵練聯絡聲勢。以圖節節進取。唐友耕已授雲南提督。劉嶽昭已授雲南藩司。均無可卸之責。

著駱秉章體察川省情形。如可騰出此二軍。令各率所部入滇。林鴻年再就近在川邊募勇訓練。滇事自可有起色。惟師行餉隨。駱秉章仍當籌銀數萬兩。交林鴻年為勦辦經費。本日已諭令湖南廣東各督撫。令其設法接濟。並照林鴻年所請。於湖北湖南。令各撥釐金月一萬兩解滇。該撫得此兵力餉力。務當隨時與駱秉章。勞崇光會籌妥辦。認真進勦。不得徒託空言。致負委任。鹽井銅礦。為天

地自然之利。滇省餉源所自出。該撫入滇後。即可就地設法興辦。為自強之計。將土夷各匪。次第廓清。至回匪叛復不常。應大張捷伐。不可輕易言撫。致墮賊謀。馬榮罪大惡極。必須處以極刑。以申國法。解川解黔。均無不可。總當視道路之遠近通塞。酌量辦理。以免意外之虞。林鴻年請調蔡步鍾毛震壽二員。著交該撫帶赴雲南差委。將此由六百里各諭令知之。○又諭林鴻年奏現籌進勦迤西回

匪。軍餉支絀。請飭湖南廣東設法接濟。並擬於川省設立後路糧臺。請飭兩湖於釐金項下。每月協撥銀一萬兩。以一年為期。以利進行。各摺片。雲南回匪。負隅已久。非大張捷伐。不足收勦撫兼施之效。惟滇省利源。皆為逆回盤踞。必賴鄰省協濟。雖經川省設法籌畫。而獨力亦復難支。廣東前於同治二年奉撥協滇餉銀二十五萬兩。僅據解到一萬兩。其餘絲毫未解。著毛鴻賓郭嵩燾督飭藩司。迅

將欠解之二十四萬兩。趕緊設法分起如數解交。不准藉詞延宕。並著惲世臨查明該省欠解滇餉。共有若干。迅速籌撥。不得推諉。貽誤至湖南湖北兩省釐金。來源尚旺。現在湘楚軍務無多。自可酌量抽撥。即著官文吳昌壽惲世臨於各該省釐金項下。每月各協滇省銀一萬兩。自同治四年正月。起以一年為限。即行停止。務須如數按期源源籌解。不准稍有遲延。著欠。將此由五百里各諭令知之。



○緩徵湖南武陵龍陽益陽安鄉沅江華容湘陰澧臨湘巴陵十州縣暨岳州衛被水地方新舊額賦雜課有差

上以歲暮裕祭

太廟。自是日始齋戒三日。○癸巳。諭內閣。玉明等奏查勘盛京

昭陵圍城角樓等處工程。請旨辦理一摺。著工部併入前次估算盛京

太廟正殿等處工程內。敬謹按例覈實估算。卽

由該部奏請欽派大臣一體承修。並著欽天監於同治四年二三月內。選擇開工吉期。敬謹遵修。以重要工。○諭議政王軍機大臣等。前因賊由南召北趨魯山。窺伺河汝。諭令李鴻章迅檄劉銘傳所部。星速馳赴豫境。茲據李鴻章奏。劉銘傳等營所用均係外洋軍火。笨重異常。請俟明春水長。察酌入豫道路。何處可通舟楫。易於轉運。再行相機調度等語。劉銘傳赴豫。既據該撫奏稱。恐於大局無裨。

卽著無庸檄令前赴豫省。閩匪日肆猖獗。前諭李鴻章於蘇省防兵內。酌量抽撥礮隊赴閩。歸左宗棠調遣。現在劉銘傳既已無庸入豫。而由蘇赴閩水道可通。攜帶轉運尚屬不難。著李鴻章與左宗棠妥為籌商。如閩省應需該營前往協剿。卽著該撫檄飭劉銘傳統帶所部。星速赴閩。聽候左宗棠調遣。以資厚集而利攻剿。將此由五百里諭令知之。○予河南寶豐等處陣亡守備周步升等祭葬世

職加等。○蠲緩江蘇無錫金匱江陰宜興荆溪丹徒丹陽金壇溧陽太倉鎮洋太湖長洲元和吳吳江震澤常熟昭文崑山新陽華亭婁奉賢金山青浦嘉定寶山上海南匯川沙靖江山陽阜甯清河桃源安東鹽城高郵泰江都甘泉東臺興化寶應銅山豐沛蕭錫山邳宿遷睢甯海沭陽贛榆通泰興海門上元江甯句容溧水高淳江浦六合儀徵六十七廳州縣暨淮安大河揚州徐州蘇州太倉金



山鎮海鎮江等衛被水被旱被擾地方新舊額賦雜課有差。○蠲緩河南祥符陳留杞尉氏洧川鄆陵中牟鄭榮澤滎陽汜水商邱甯陵鹿邑虞城夏邑睢柘城永城湯陰臨漳內黃汲新鄉輝獲嘉淇滑濬考城濟源修武武陟孟溫原武陽武洛陽鞏宜陽新安舞陽葉上蔡西華商水項城沈邱太康扶溝許鄆城南召唐鎮平新野桐柏鄧內鄉淅川正陽羅山確山新蔡固始息六十六廳州縣被水被

旱被雹被擾地方新舊額賦有差。○甲午。

上以歲暮祫祭

太廟前期親詣行禮。○遣官祭

太廟中殿

後殿。○諭內閣據御前大臣奏參禮部堂司各官請旨議處一摺。朕本日親詣

太廟行禮。禮畢時。朝鮮琉球使臣瞻觀。例應由禮部堂官帶領。乃該堂官並未在彼伺候。該部郎中威麟率行帶領代奏。實屬不合體制。

所有本日應行帶領瞻觀之禮部堂官著查取職名。交部嚴加議處。威麟著一併交部議處。○又諭據前任詹事府右春坊右庶子袁保恆由陝州馳遞摺報。條陳屯田事宜。並稱屯政事屬創興。法貴經久。非筆墨所能詳。亦非旦夕所能定。如蒙俯采芻蕘。請躬詣京師。與在廷諸臣當面籌商。悉心妥議等語。國家廣開言路。博采兼收。中外臣工果能於政令急務確有見地。原可剴切敷陳。用備採擇。袁

保恆上年條陳屯田事宜。業經降旨交皖豫督撫會議。其如何因地制宜。應准應駁。理宜靜候督撫覆奏。何得輒以未見施行為詞。奏請躬詣京師。與廷臣籌商定議。況丁憂在籍人員。理應居家守制。宣容與聞朝政。袁保恆從前雖令其會辦陳州團練。亦並未令其專摺奏事。何得行至陝州。發遞摺報。實屬自信過深。冒昧從事。不諳體制。袁保恆著交部議處。○又諭沈桂芬奏特參知縣佐雜等員。請

分別撤革改教一摺。山西臨晉縣知縣陶良駿人尚有才。措施未當。鳳臺縣知縣邢寶第。事無貽誤。惟辦理鹽務。不能得力。均著撤任。留省察看。遇有中簡缺出。酌量補用。右玉縣知縣王者詔。好逸惡勞。精力漸遜。著以教職歸部銓選。後營子巡檢朱廷璧。任性妄為。屢被控告。從九品朱人瑞。性本闒珊。不知慎重公事。均著卽行革職。○諭議政王軍機大臣等。富明阿奏揚防全軍分起凱撤。船隻礮械。

分撥存儲。並擬挑選勇丁。歸補兵額一摺。據稱頭起凱撤兵勇十二營。業已找清欠款。派員管帶回籍。本省招募者。就近交揚州府妥為遣散。現在趕緊催提漕價。將二起凱撤兵勇欠餉。找發清楚。卽於年內責令起程。其餘三起凱撤兵勇。擬俟開年正月。緩為遣撤。其水師留防礮划。並官弁勇丁。已經裁竣。並將礮船礮划。解送曾國藩酌撥配用。各營呈繳槍礮器械。分撥旗綠各營。並糧臺存儲備用。

等語。所辦尚屬周妥。卽著富明阿按照定章。分別貲撤。並飭管帶各員。妥為管押。毋任沿途逗遛滋事。致貽後患。惟據該將軍奏稱。裏下河一帶。游兵散處滋事。已將搶犯陳玉書等。拏獲正法。亟宜趕籌整頓。營汛以資彈壓。揚防勇丁。籍隸揚州屬者甚多。若能挑其精壯。補足兵額。足可保衛閭閻。如餉需不敷。於揚防節省項下提撥。按月散放。似此變通酌辦。巡防不至廢弛。裏下河地方。亦可臻安謐。

所籌自係實情。卽著曾國藩酌量情形。妥籌辦理。將此由五百里各諭令知之。○又諭。常清明緒奏伊犁大獲勝仗。立解城圍一摺。伊犁回匪變亂。攻撲城垣。前據常清等奏到。方深廛繫。此次明緒督派兵勇。及索倫哈薩克等出城接仗。將回匪擊敗。立解城圍。覽奏稍慰。回匪兇悍性成。黨與甚眾。現雖被擊敗走。尚未大受懲創。伊犁餉絀。兵單。回氛四逼。若因此次獲勝。防守稍疏。深恐該逆句黨尋仇。

必將乘隙大逞。明緒當懷遵疊次諭旨。慎益加慎。未可掉以輕心。致有疏失。回匪現竄巴燕岱城。據穆克登額報稱。尚有數萬之眾。圍城緊急。可見賊勢並未衰弱。明緒現派額騰額等統帶各營進剿。務當飭令穩慎前進。不可稍有挫失。致損軍威。又復震動全局。綏定等處賊匪。退竄金頂寺城盤踞。尤當虞其回擾。設法防剿。總在明緒相機籌辦。一切均當持重。以副委任。所請飭催撥餉一節。業已諭令戶部迅催撥解矣。關內精兵。先後調撥。為數已屬不少。陸續當可出關。將來大兵雲集。定可迅速蕺事。明緒當就現有兵力。慎固封守。以待援兵。將此由六百里諭令知之。○福建臺灣道丁曰健奏探聞內地漳郡不守。移商鎮臣迅速折回。妥籌防範。得旨著卽飭在事文武。將洪機陳鯨等逆巢穴。迅速攻拔。殲除羣醜。仍嚴防漳郡逆匪。毋令偷渡勾結。並移知曾元福暫行折回。妥籌防範。毋稍疏懈。

○命喀爾喀貝勒布彥巴達爾呼科爾沁輔國公布彥圖固魯克齊科爾沁頭等台吉達特巴扎木蘇喀喇沁二等台吉塔布囊多爾濟喇布坦在御前行走。○調喀喇沙爾辦事大臣榮全為厄魯特領隊大臣。厄魯特領隊大臣阿隆阿為塔爾巴哈台領隊大臣。塔爾巴哈台領隊大臣博勒果蘇為伊犁索倫領隊大臣。伊犁索倫領隊大臣圖庫爾為塔爾巴哈台領隊大臣。以副都統銜錫拉那為伊犁察哈爾領隊大臣。塔爾巴哈台領隊大臣扎拉芬為喀喇沙爾辦事大臣。○以廣西義甯協副將蔣臨照為直隸天津鎮總兵官。○以甘肅籌餉出力。予已革按察使孫治以道員用。發往署陝甘總督都興阿軍營差委。○以籌解甘肅軍餉無誤。予前任山東布政使貢璜山西布政使王榕吉優敘。賞山西道員楊寶臣鹽運使銜。○以甘肅辦理糧臺出力。予道員三壽等加銜升敘有差。○以伊犁解

圍賞將軍明緒黃馬褂領隊大臣榮金花翎  
餘升敘有差予陣亡總管阿木爾們都領隊  
大臣托克托奈祭葬世職加等○追予故欽  
差大臣琦善提督陳金綬副都統富尼雅剛  
阿總兵官德坤總管西常阿入祀江蘇揚州  
府昭忠祠○朝鮮國使臣俞章煥等三人琉  
球國使臣毛克述於午門外瞻覲○乙未裕  
祭

太廟遣惇親王奕諒恭代行禮○遣官祭

永陵

福陵

昭陵

昭西陵

孝陵

孝東陵

景陵

泰陵

泰東陵

裕陵

昌陵

昌西陵

慕陵

慕東陵○遣官祭

文宗顯皇帝

孝德顯皇后暫安寢殿○遣官祭

端慧皇太子園寢○遣官祭

太歲之神○丙申申刻

上詣綏履殿

慈安皇太后前行禮平安室

慈禧皇太后前行禮○諭內閣吳昌壽奏甄別

知縣各員分別保劾一摺湖北准補枝江縣

知縣恆琛勤奮有為民情愛戴著以同知直

隸州知州儘先升補先換頂帶通城縣知縣

袁秉亮性情乖張試用知縣陳乃汶操守不

潔均著卽行革職升用同知直隸州知州通


山縣知縣王靜一才識迂拘嘉魚縣知縣王

錫榮精神輟弱均著以府經歷縣丞降補留省酌量補用試用知縣吳衡心地糊塗著勒令休致○是年旌表孝子江蘇等省夏濬河等四十三名孝友福建等省高齊雲等四名順孫四川省馬廷瑞一名孝婦河南等省郭曹氏等十一口孝女湖南省易淑和一口烈婦直隸等省姚景崇妾任氏等十八口烈女江蘇等省范循陔女迪還姑等三口義夫四川省張福祉一名烈士四川省趙象昌等六名守節合例滿洲親軍校松奎妻哈白他氏等一百二十二口蒙古護軍校郭勒敏珠妻嘎奇特氏等三十四口漢軍養育兵葉二祿妻王氏等四十一口內務府匠役生兒妻劉氏等五口各省駐防馬甲多仁佈妻柯勒柏蘇氏等一百十四口奉天等省王觀陞妻張氏等六千五百四十二口夫亡殉節福建等省陳幽周妻施氏等十二口未婚守志江蘇等省羅錫齡妻謝氏等十八口百歲壽民婦

廣東等省林卿士等十八名口五世同堂湖北等省陳劉氏等三十八家七世同居山東省劉應掄一家八世同居河南省杜宜山一家九世同居河南省趙克之一家均給銀建坊如例○會計天下民數穀數除江蘇福建雲南安徽廣西貴州浙江陝西甘肅未經冊報外奉天等省通共大小男婦二萬三千七百五十萬七千七百二十七名口存倉米穀三百十三萬六千二百八十八石七斗九升九合九勺

大清穆宗繼天開運受中居正保大定功聖智  
誠孝信敏恭寬毅皇帝實錄卷之一百二十五





統一書號: 11018·1355—47

定 價: 36.00 元